

Pirimqul Qodirov

Yulduzli tunlar





UO'K: 81.512.133-3

KBK: 84(50')1

Q-53

Qodirov, Pirimqul

Yulduzli tunlar: roman / Pirimqul Qodirov. – Toshkent: Yangi asr avlodi, 2015. – 668 b.

ISBN 978-9943-27-250-7

Mahoratli yozuvchi Pirimqul Qodirovning ushbu asari oʻzbek adabiyotining eng sara tarixiy romanlari sirasiga kiradi. Unda Movarounnahrdek ulkan saltanatning parchalanib ketishi, Temuriylar sulolasining inqirozi, hokimiyatga erishish ilinjida taxt talashib, bir-birlariga qilich koʻtargan ogʻa-ini, togʻa-ji-yanlarning fojiaviy qismati aks ettirilgan. Roman voqealari orqali oʻquvchi tarixda Temuriylar oʻrtasidagi nizolar, fitna, fisq-u fasod tufayli yuzaga kelgan qonli urushlar, ayovsiz xunrezliklar oqibatida behad qonxoʻr beklar zulmidan sillasi butkul qurigan xalqning gʻoyat nochor ahvoli va uyushqoqlikdan bexabar Temuriylarni Shayboniyxon qanchalar oson mahv etgani bilan tanishadi.

Asarning bosh qahramoni mirzo Bobur odamlardagi bemehrlik, bir-birini koʻrolmaslik, xudbinlik, xiyonat singari jirkanch illatlar bilan gʻoyat erta, oʻn ikki yoshida taxtga oʻtirganida roʻbaroʻ boʻldi. Taqdirning ayanchli zarbalaridan zada boʻlgan shohning kuygan yuragi — shoir qalbi qalandarlikni ixtiyor etgani ajab emas. Asar mutolaasi davomida butun umr Vatan ishqida yonib, sogʻinch bilan oʻrtanib, «Jonimdin oʻzga yori vafodor topmadim...» deya iztirob chekkan bobokalonimiz dardi kitobxon qalbini larzaga soladi.

UOʻK:81.512.133-3 KBK:84(50ʻ)1

AROSAT

Birinchi qism

QUVA

QIL USTIDA TURGAN TAQDIRLAR 1

Milodiy 1494-yilning yozi. Saraton issigʻida Fargʻona vodiysining osmoniga chiqqan quyuq bulutlar kuni boʻyi havoni dim qilib turdi-yu, kechki payt birdan jala quyib berdi. Qizil tuproqli tepaliklar orasidan oʻtib kelayotgan sersuv Quvasoy qon qoʻshib oqizilgandek qip-qizil boʻlib ketdi.

Soy boʻyidagi majnuntollar panasida bir yigit bilan qiz shivirlashib gaplashmoqda edilar.

- Robiya, inon, men tirik boʻlsam, senga balo-qazoni yoʻlatmasmen!
- Tangrim sizni ham panohida asrasin, Tohir ogʻa!.. Yogʻiyning¹ ming-ming askari bor. Qaysi biriga bas kelursiz? Ana, qochqinlarga qarang!..

Tohir orqasiga oʻgirilib, Quvasoyning quyi tomonlariga koʻz yugurtirdi. Pastda qamishzor botqoqlik va uning ustidan oʻtgan uzun yogʻoch koʻprik bor edi. Koʻprikdan chumoliday behisob odamlar, otlar, mollar, aravalar tizilib oʻtib kelayotgani yomgʻir pardasi orasidan elas-elas koʻzga chalinardi.

¹ Yogʻiy - yov, dushman

Samarqand podshosi Qoʻqonni bosib olib, qoʻshiniga talatgan va Margʻilonga hujum qilgan edi. Bosqinchilar shahar-u qishloqlarni talash bilan qanoatlanmay, koʻhlik qizlarni choʻrilikka olib ketishar edi. Buning hammasini eshitgan odamlar yovdan qochib, tinch joy izlab bormoqda edilar.

– Ulusning shoʻri qursin! – dedi Tohir. – Kasofat podsholar urushmay turolmasa. Biridan qochsang, boshqasiga tutilsang. Undan koʻra qochmaymiz! Tavakkal. Peshonaga bitilgani boʻlur!

Tohir yomgʻirda hoʻl boʻlib, badaniga yopishib turgan qalami yaktak ustidan xanjar taqib olgan edi. Robiya xanjarga qoʻrqa-pisa koʻz tashladi-da:

- Qaydam, dedi. Otamlar meni qoʻrgʻonga eltib qoʻymoqchilar.
 - Qaysi qoʻrgʻonga?
 - Andijon qoʻrgʻonida amakim borlar-ku.

Tohir Robiyaning hoziroq joʻnab ketishidan choʻchiganday uning bilagidan oldi. Ilgarilar hurkovich ohudek tutqich bermaydigan Robiya hozir allanechuk yuvosh boʻlib qolgan edi. Uning xina qoʻyilgan qoʻllari gulday chiroyli. Boshiga otasining qora jun chakmonini vopinib chiqqan ekan. Yomgʻirda hoʻl boʻlib ogʻirlashgan chakmon uning nozik bo'yniga og'irlik qildi. Robiya chakmonni elkasiga tushirdi. Shunda yoqasining bitta bogʻichi yechilib ketdi-yu, qizgʻish marmarday silliq bo'ynining pasti ko'rindi. Yashil nimchasi o'n yetti yoshli qizlardagina boʻladigan tolma belidan quchib, qattiq koʻkraklarini mahkam chirmab turar edi. Bolalikdan Robiya bilan devor-darmiyon qoʻshni boʻlib oʻsgan Tohir uning qanchalik jozibali qiz ekanini, bosqinchi bek va navkarlar mana shunaqa qizlarga qanchalik oʻch boʻlishini go'yo endi astoydil his qildi.

Bu yil bahorda ota-onalari ularni unashtirib qoʻygan paytlarida ham Robiya Tohirga hozirgichalik chiroyli koʻrinmas edi. Ramazon oyi oʻtgandan keyin ularning

toʻylari boʻlishi kerak. Tohir Robiya bilan hademay bir yostiqqa bosh qoʻyishlariga ishonib, bexavotir yurgan edi. Biroq endi urush dovuli Quvaga yaqinlashib kelayotgan shu xatarli damlarda Robiya unga har qachongidan ham aziz, har qachongidan ham gʻanimat koʻrindi.

Tohir Robiyaning Andijon qoʻrgʻonida birorta boʻyni yoʻgʻon bekning tuzogʻiga ilinib qolishi mumkinligini oʻyladi-yu:

– Yoʻq! – dedi. – Meni desang qoʻrgʻonga borma! Robiya Tohirning baxmalday mayin moʻylovi tagida xiyol titrab turgan labiga va iztirob bilan chaqnayotgan qoʻngʻir koʻzlariga tikildi.

– Mening ham sizdan yiroqqa ketgim yoʻq... Lekin ne qilay... Qoʻrqamen!..

Tohir qizni chakmon bilan birga quchib, bagʻriga bosdi. Robiyaning mayin soch tolalari yigitning yuziga tegdi, bir lahza ikkovining nafasi nafasiga qoʻshilib ketdi. Tohir qizning badani titrayotganini sezdi-yu:

- Chindan qoʻrqqaningmi bu, Robiya? dedi. Senga ne boʻldi?..
- Men bir vahimali tush koʻrdim, Tohir ogʻa! Ilohi tushim oʻng kelmasin!..

Endi Tohir ham xavotirlanib, qizni quchogʻidan boʻshatdi-da, uning katta-katta boʻlib ketgan koʻzlariga qaradi:

- Yomon tushmi?
- Aytishga ham tilim bormaydir.
- Tushga nelar kirmas!.. Ayt!.. Mayli...
- Sizni bir qora hoʻkiz xanjarday shoxlari bilan suzib... Yoʻq! Yoʻq! Eslasam, etim junjikib ketadir!

Tohir yomon bir falokatni oldindan sezganday yuragi uvushdi:

- Shoshilmay gapir! Suzgan boʻlsa, qon oqdimi?
- Qon? Ha, ha... Qon tirqirab ketdi.
- Unday boʻlsa qoʻrqma. Tushdagi qon yorugʻlik. Otam doim shunday deydi.

– Tangrim shu ta'birni rost keltirsin! Tohir ogʻa, men... Agar Andijonga siz bormasangiz... Men ham ketmasmen. Neki boʻlsak, shu yerda... birga...

Majnuntol barglari orasidan sirqib tushayotgan yomgʻir tomchilari qizning payvasta qoshlariga, tigʻiz kipriklariga tekkan. Tohirning nazarida, Robiya yomon bir baxtsizlik boʻlishini hozirdan sezib, koʻziga yosh olayotgandek koʻrinardi.

- Mendan koʻp xavotirlanma, Robiya. Men bir dehqon odammen. Havo ochilsa, dalaga chiqib qoʻshimni haydaymen. Oʻrogʻimni oʻramen. Yogʻiyning menga ne ishi bor? Lekin sen... ehtiyotingni qil. Andijon qoʻrgʻonida amakilaring bor...
- Andijonda sizning ham mulla togʻoyingiz borlarku! Yo birga ketaylikmi?

Tohir o'ylanib qoldi. Uning Andijonda me'mor boʻlib ishlaydigan Fazliddin togʻasi el orasida tanilgan mashhur odam. Quvasoy botqogʻining ustidan oʻtgan mana shu uzun yogʻoch koʻprik ham mulla Fazliddin chizib bergan tarh¹ bo'yicha qurilgan. Andijon arkida mulla Fazliddin samoviy naqshlar va koshinlar bilan bezab gurgan devonxona tojdor Umarshayx mirzoga ma'qul bo'lgandan keyin unga to'bichoq ot va bir hamyon oltin in'om qilganini Tohir ham eshitgan. U togʻasining shahar qoʻrgʻonidan tashqaridagi Bogʻot mahallasida turishini biladi. Mulla Fazliddin Quvada turgan paytlarida Tohirga xat-savod o'rgatgan edi. Endi jiyani panoh istab borsa, qanoti tagiga olishi mumkin. Lekin bu yerda chol-kampirlar nima derkin? Tohir - yolgʻiz oʻgʻil, javob bermasliklari mumkin. U Andijonga Robiya tufayli borishini esa ota-onasiga aytishdan uyaladi... Balki buni Robiyaning akasi Mahmud aytar?

¹ Tarh - chizma, loyiha.

– Robiya, mayli, iloji boʻlsa, Andijonga birga keturmiz. Lekin dadamlarni koʻndirish oson emas... Mahmud ogʻang eshikdami?¹

- Doʻkonga chiqqan edilar. Iftorgacha kelurlar. Nima edi?
 - Iftordan soʻng biznikiga oʻtsin. Maslahat bor.
 - Xoʻp, men aytamen.

Robiya yuzini Tohirning keng koʻkragiga bosdi:

– Tangrim bizni bir-birimizga koʻp koʻrmasin! – dedida, majnuntol shoxlari orasidan chiqdi.

Soy boʻyida turgan boʻsh mis koʻzani yomgʻir tomchilari chertib-chertib qoʻyadi. Robiya koʻzaga qarab suvga kelganini esladi va uni toʻldirib, uylari tomon koʻtarib ketdi.

Qalliqlar odamlarning koʻzidan yiroqda – yashiriqcha uchrashib yurar edilar. Qiz uzoqlashib ketgandan keyin Tohir ham majnuntollarning panasidan chiqdi. Shunda Robiyaning tushiga kirgan qoʻrqinchli voqea uning esiga tushdi-da, noma'lum bir xatar vujudiga larza solib oʻtdi...

2

Bu yilgi roʻza yoz chillasiga toʻgʻri kelgan, jazirama kunlarda tong sahardan kechqurun qorongʻi tushguncha tuz totmay och yurish koʻp odamning sillasini quritar, buning ustiga tashnalik azobi qoʻshilardi. Roʻzadorlar kunni qanday kech qilishlarini bilmay, tezroq qosh qorayishini intizorlik bilan kutishardi.

Gʻira-shira qorongʻilikda Quva masjidining minorasidan azon tovushi eshitildi. Urush tahlikasi qanchalik kuchli boʻlmasin, dasturxon atrofiga yigʻilgan odamlar roʻzasini ochayotgan paytda ochlik va

¹ Eshik - bu yerda: uy, hovli ma'nosida.

tashnalikdan qiynalgan vujudlari rohatlanib, dunyo gʻamlari birpasga boʻlsa ham xayollaridan uzoqlashdi.

Tohir keksa ota-onasi bilan birga iftor qilmoqda edi. Dasturxondan sedanali issiq non va handalak hidi keladi. Non yeb, bir kosadan qatiqli osh ichganlaridan keyin Tohir Andijonga ketish haqidagi gapning uchini chiqarishga chogʻlandi.

Shu payt kimdir qamchi dastasi bilan darvozani taqillatdi. Hovlida yotgan keksa koʻppak it yoʻgʻon va xirri tovush bilan vovulladi.

Tohir oʻrnidan turgan edi, otasi:

– Ehtiyot boʻl! – dedi ovozini pasaytirib. – Avval kimligini soʻrab bil.

Tashqarida yomgʻir tingan, lekin osmon bulutli, qorongʻilikda hech narsani koʻrib boʻlmas edi. Tohir darvozaxonaga yaqin borib:

- Kim? deb soʻradi. Koʻppak qattiqroq hura boshladi. Tashqaridagi odam ovozini balandlatib:
- Tohir, jiyan? deb soʻradi. Och, men togʻoyingmen!

Tohir tashqaridagi ovozni tanib, ochiq darcha orqali ichkariga:

– Aya, Fazliddin togʻoyim! – dedi-yu, chopib borib darvozaning zanjirini tushirdi.

Ichkaridan chiqqan chol-kampirlar mehmon bilan koʻrishayotganda, Tohir qorayib turgan ikki gʻildirakli soyabon aravani koʻrdi. Aravaga qoʻshilgan otning egari ustidan kimdir paypaslanib tushmoqda edi.

- Mulla togʻa, arava sizdanmi?
- Ha, jiyanim. Koʻch-koʻronim bilan keldim.
- Shunaqami? dedi Tohir hayron boʻlib. Uning koʻnglida boya togʻasini koʻrganda yongan quvonch endi tashvishli oʻylar bilan almashindi. Tohirning Andijondagi panohi mana shu togʻasi edi. Togʻasi koʻchib kelgan boʻlsa, Tohirning qoʻrgʻonga boradigan yoʻli bekilgani shu. Robiya nima boʻladi?

– Tohir, nega agʻrayib turibsan? Yuklarni tushirishgin! – dedi onasi. – Mullo togʻoying yomgʻirda koʻp azob tortganga oʻxshaydir.

- E, azob ham gapmi, opa! Arava loylarga tiqilaverib jonimizdan toʻydirdi. Yoʻllar tirband. Qochoqlar behisob. Tohir aravadan yuk tushirayotib, otning sagʻrisiga qoʻli tegib ketdi. Shunda qoʻliga shilimshiq loy ilashganini sezdi. Loy otning sagʻrisigacha chiqqan boʻlsa, bu bechoralar kela-kelguncha qanchalik qiynalganikin? Hamma yovdan qochib, Andijonga qarab ketayotganda, bular nega Quvaga koʻchib kelganikin? Tohir qanor qopga solingan yukni aravadan tushirmoqchi boʻlganda togʻasi:
- Hushyor boʻl, juda ogʻir, ikkovlashib koʻtaringlar,dedi aravakashga.

Tohir gopning ichida uncha katta boʻlmagan poʻlat sandiq borligini sezdi. Mulla Fazliddin oʻtda kuymaydigan, suy kirmaydigan bu sandigni Ouyaning temirchi ustalariga buyurtma berib yasattirgan edi. Uning ichida tarhlar, lovihalar, suratlar saqlanardi. Mulla Fazliddin uch yil Samarqandda, toʻrt yil Hirotda tahsil koʻrgan, oʻsha yoqdan me'morlik san'ati bilan birga musavvirlikni ham oʻrganib kelgan edi. Hirotda jangnomalar ichiga suratlar chizish odat tusiga kirgan. mavlono Behzod chizgan Alisher Navoiy va Husayn Boygaro tasvirlari rasmiy doiralarda shuhrat topgan, lekin Samarqandda, xususan, Farg'ona vodiysida odam shaklini chizish hali ham Qur'on nomidan qattiq taqiqlanib kelmoqda edi. Shuning uchun mulla Fazliddin oʻzi chizgan suratlarini mana shu poʻlat sandiqda doim maxfiy saqlar edi. Tohir qopdagi poʻlat sandiqni aravakash bilan koʻtarishib, uyga olib kirishdi. Mulla Fazliddin hoʻl boʻlib ogʻirlashgan chakmoni va etigini dahlizda yechib qoldirdi. Oyogʻiga charm kavush kiyib, obrez chetida bet-qoʻlini yuvdi. Soʻng boya Tohirlar oʻtirgan dasturxonlik uvga kirdi.

Uning chakmonidan oʻtgan yomgʻir kalta yenglik abosini nam qilgan edi. Lekin yoz oqshomi iliq boʻlganligi uchun kiyim almashtirish esiga kelmadi. Yoʻlda qattiq toliqqanligi uchun durust ovqat ham yemadi. Faqat bir-ikki tilim handalak yedi-yu, uchtoʻrt piyola choy ichdi. Aravakash yigit ikki kosa toʻla qatiqli osh ichgandan keyin otlariga qarash uchun hovliga chiqib ketdi.

- Obbo! Mulla Fazliddin-ey! dedi Tohirning otasi uzun oq soqolini oʻychan ezgʻilab. – Zap kelibsiz-da. Shu notinch kunlarda birga boʻlganimizga ne yetsin!
- Hamma yogʻiydan qochganda biz ajdahoning komiga yaqin kelib qolganimiz gʻalati boʻldi, – deb mulla Fazliddin jiyaniga ma'yus koʻzlari bilan qaradi.
- Biron sabab bilan kelgandirsiz-da, mulla togʻa?soʻradi Tohir.
- Sabab shukim, jiyan, urush boshlansa, qurilish toʻxtaydi, me'morning keragi boʻlmay qoladir...
- Iye, axir, sizni podshoning oʻzi xizmatiga olgan emasmidi?
- Podsho Axsi qoʻrgʻonida mudofaa bilan ovora. Toshkent xoni Mahmudxon ham Xoʻjand tomondan bizga qarshi qoʻshin tortib kelmoqda emish. Qashqar hokimi Abubakir dugʻlat degan yana bir bosqinchi sharqdan Oʻzganning ustiga bostirib kelmishdir.

Tohirning keksa otasi qoʻrqib, yoqasini ushladi:

- Yo tavba! Bu yoqda Samarqand qoʻshini... Uch tomonimizdan yogʻiy bostirib kelibdimi, a? Bu ne koʻrgulik, mulla Fazliddin? Axir bu podsholar sal murosa qilsalar boʻlmaydimi, a? Hammasi bir-biriga qarindosh emish-ku. Shu rostmi?
- Ha, rost. Toshkent xoniga bizning podshomiz kuyov boʻladir. Qoʻqonni talab, bizning ustimizga qoʻshin tortib kelayotgan Samarqand podshosi Sulton Ahmad mirzo esa bizning podshomiz bilan bir otadan boʻlgan ogʻa-inidirlar. Yana bu ikki podsho bir-birlariga

quda boʻlmoqchi edilar. Samarqand podshosining qizi bizning valiahdimiz Bobur mirzoga besh yasharligidan unashtirib qoʻyilgan edi. Shundan bilingki, ogʻa iniga, qaynota kuyovga qarshi qilich koʻtarib chiqmishdirlar!

- Yo Parvardigor! Oxirzamon degani shumikin, mulla Fazliddin?
- Bilmadim, pochcha. Harqalay, yomon tojdorlarning zamonasi oxirlab qolayotganga oʻxshaydir. Koshki, oʻzlari bilan oʻzlari olishib, bizni tinch qoʻysalar! Urushning butun jabr-u jafosi el-ulusning boshiga tushadir.
 - Shoʻrimiz bor ekan-da!
- Ha, tole boʻlmasa qiyin ekan! Men ne-ne orzular bilan ilm-hunar oʻrganib kelgan edim! Vatanimiz boʻlmish Fargʻona vodiysida Samarqanddagidek, Hirotdagidek madrasalar-u koʻrkam obidalar qurmoqchi edim. Bu saltanatu podsholardan ne qolur? Hammasi nom-nishonsiz ketgay! Bizdan yodgorlik boʻlib qolsa Ulugʻbek madrasasidek, Navoiy Unsiyasidek san'at asarlari qolur!

Mulla Fazliddin ogʻzidan chiqib ketgan soʻnggi gaplardan xavotirlanib, eshik tomonga qarab qoʻydi. Uning saroy ahliga yaqin yurib, aygʻoqchilardan yurak oldirib qoʻyganini Tohir ham sezdi.

– Mulla togʻa, soʻzlayvering, bu yerda hamma oʻzimizniki... Andijon qoʻrgʻonidan nechun sizga joy bermadilar?

Mulla Fazliddin soʻnggi kunlarda boshdan kechirgan mudhish hodisalarni eslab, bir lahza ogʻir sukutga ketdi...

Oʻtgan kuni xufton paytida mulla Fazliddin oʻzlaridan besh-olti uy narida turadigan bir xattot oshnasinikida iftor qilib oʻtirganda, qandaydir noma'lum kishilar uning uyiga bostirib kiradi. Hovlidagi it vovullab qoʻymaganda uni qilich bilan chopib tashlaydilar.

Bugun bu yerga aravani minib kelgan xizmatkor yigitning ogʻziga latta tiqib, qoʻl-oyogʻini bogʻlaydilar-u

qaznoqqa tashlaydilar. Soʻng uyga kirib, tintuv oʻtkazadilar va poʻlat sandiqni koʻradilar. Lekin uni ochishning ilojini topolmay, qulfini bolta bilan urib sindirishga kirishadilar.

Qilich bilan chopilgan it qattiq vangillaganda devor-darmiyon qoʻshnilar bir falokat boʻlganini sezadilar. Ulardan biri chiqib, mulla Fazliddindan xabar olmoqchi boʻlsa, darvoza qarshisidagi daraxt panasida bir odam toʻrtta otning jilovidan ushlab turibdi. Uning yuzi qora niqob bilan bekitib olingan, faqat koʻzlari koʻrinadi. Ichkaridan esa poʻlat sandiq qulfiga urilayotgan boltaning tovushi eshitiladi...

Mulla Fazliddinga qadrdon boʻlgan qoʻshni uning uyiga yomon odamlar tushganini sezadi-yu, darhol xattotnikiga chopadi. Undan voqeani eshitgan mulla Fazliddin uyiga yugurib keladi. Poʻlat sandiqning qulfini sindirib ochib, undagi qogʻozlarni titkilayotgan bosqinchilar uy egasini koʻrib, darchadan ayvonga sakrashadi.

– Toʻxta, nobakor! – deb mulla Fazliddin bittasining qarshisidan chiqqan edi, yuziga qora niqob tutgan ayiqday zoʻr yigit uni yelkasi bilan urib chetlatadi-da, koʻchaga otiladi. Boshqalari ham koʻchadagi otlariga minib, bir lahzada gʻoyib boʻlishadi.

Mulla Fazliddin ularni quvlab yetolmasligini sezadida, toʻs-toʻpolon boʻlgan uyga qarab intiladi va ochiq yotgan poʻlat sandiqning tepasiga keladi. Tokchada qoʻshaloq sham yonib turibdi. Uning yorugʻida aralashquralash boʻlib ketgan, ba'zi joylari yirtilgan loyihalar va chizmalar koʻzga tashlanadi. Sandiq ichida podshoh in'om qilgan oltinning bir qismi hamyoni bilan turgan edi. Shu yoʻq. Lekin hozir mulla Fazliddinning koʻziga oltin ham koʻrinmas edi. Uning butun xayoli sandiq tubidagi maxfiy tagqutini bekitib turgan silliq mis parchasida edi. Uni chapga sekin surgan edi, tagqutining kalit solinadigan joyi ochildi. Mulla Fazliddin

atrofiga alangladi – uyda boshqa odam yoʻq, qoʻshnisi qaznoqdagi xizmatkorning oyoq-qoʻlini yechish bilan ovora edi. Mulla Fazliddin qoʻynidan kichkina kalit olib, tagqutining qulfiga soldi. Qulf ochilgandan keyin tagqutining mis qopqogʻini sekin koʻtardi-yu, yupqa jild ichidagi suratlarni ochib koʻrdi... Keksa bogʻbonning daraxt payvand qilayotgan payti... Chilmahram togʻlaridagi ov tasviri... Eng pastda chang chalayotgan goʻzal bir qizning surati...

Bu – Umarshayx mirzoning qizi. Andijon chorbogʻida podshoh oilasi uchun tillakori koʻshk qurgan paytlarida oʻn sakkiz yoshli Xonzoda begim uning musavvirligini ham bilib qolib, oʻzining suratini chizdirgan. Mulla Fazliddin bu ishni yashiriqcha qilgan. Agar shariat peshvolari uning odam suratini chizganini bilib qolishsa, sogʻ qoʻyishmaydi. Yana tagʻin goʻzal malika bilan yashiriqcha til biriktirib surat chizgani qizning podshoh otasiga ma'lum boʻlsa bormi, mulla Fazliddinni tilka-pora qilib tashlashlari hech gap emas.

Shu sababli hozir uni eng qattiq qoʻrqitgan narsa – bu suratning bosqinchilar qoʻliga tushib qolish ehtimoli edi. Xayriyatki, ular sandiq tagida maxfiy tagquti borligini sezishmabdi. Lekin sandiqni otlariga oʻngarib ketishsa nima boʻlardi? Unda tagqutidagi suratlarni ham albatta topib olishardi!..

Xizmatkor yigit sal oʻziga kelgandan soʻng, mulla Fazliddin undan va qoʻshnisidan voqeaning tafsilotlarini soʻrab bildi, oʻzining koʻrganlariga buni taqqoslab, shunday xulosaga keldiki, uning uyiga tushganlar – oddiy oʻgʻrilar emas, balki qaysi bir zoʻravon bekning yigitlari. Ular uyni tintib nimani qidirishgan? Tarhlarni tashlab ketishibdi. Demak, suratlarni izlashgan... Mulla Fazliddinning surat chizishini biladigan odam... unda qasdi bor bek yuborgan boʻlishi kerak bu yigitlarni!..

Iztirobli oʻylar tuni bilan mulla Fazliddin koʻziga uyqu qoʻndirmadi. Urushning algʻov-dalgʻovida tobora boʻyni yoʻgʻon boʻlib ketayotgan bebosh beklar esiga tushgani sari koʻngli bezovta boʻlardi. Andijonlik beklardan Hasan Yoqub degani shu yili bahorda mulla Fazliddinni chorbogʻiga chaqirtirib, katta bir ish topshirmoqchi boʻldi.

- Mirzo hammomidan ham ulkanroq bir hammom qurdirmoqchimen... Yozda salqinlaydigan marmar xonalari boʻlsin... Yoqubbek ovozini pasaytirib davom etdi. Chiroylik asira qizlar sotib olgʻaymen. Oltinim yetarli. Oʻsha qizlar hammomning marmar hovuzida choʻmilganda, men oʻltirib tomosha qiladigan maxfiy tuynuklari ham boʻlmogʻi lozim. Uqdingizmi? deb Yoqubbek xaxolab kuldi-da, gapning xulosasini aytdi. Ana shu hammomning tarhini oʻzingiz chizing. Qurilishiga ham siz sarkor boʻling. Qancha haq tilasangiz beray. Xoʻpmi? Me'morlikni muqaddas bir san'at deb ishongan mulla Fazliddin Yoqubbekning shahvoniy niyatlarini eshitib, nafrati keldi:
 - Janob bek, uzr, men harom ishdan qoʻrgamen!..
- Nimasi harom?.. Men hammomni oʻz aqchamga qurdirgaymen!
- Hammomga maxfiy tuynuklar qoʻyib quradigan sarkorlar boshqa... Siz oʻshalarga murojaat qiling. Menga Mirzo hazratlari pokiza bir dargoh qurdirmoqchilar. Shu kunlarda madrasa tarhini chizish bilan bandmen. Ruxsat eting, men boray...

Oʻrinlaridan turganda, Yoqubbek mulla Fazliddinga oʻqrayib koʻz tikdi:

- Lekin men aytgan gap shu yerda qolsin, janob me'mor. Aks holda...
- Albatta, bu gap shu yerda qolur! Lekin siz ham mendan ozurda boʻlmang. Ora ochiq! Ma'qulmi, janob bek?
 - Ma'qul!

Mulla Fazliddin shu bilan bu boʻyni yoʻgʻon bekdan qutuldim, deb oʻylagan edi. Lekin bundan oʻn besh kuncha burun Ahmad Tanbal degan bir badavlat bek mulla Fazliddinni soʻroqlab, kechki payt uning uyiga keldi. Ikkovlari xoli qolganda, Ahmad Tanbal choʻntagidan bir hamyon oltin oldi-da, mulla Fazliddinga uzatdi:

- Taqsir, mana shu oltinni oling-u bitta surat chizib bering.
 - Qanaqa surat?

Yoshi yigirma beshlardan oshgan boʻlsa ham, yuziga hali durust soqol chiqmagan, koʻsanamo Ahmad Tanbal ogʻzini me'morning qulogʻiga yaqinlashtirib shivirladi:

- Malikamizning surati kerak menga!
- Qaysi malikamiz? sergaklanib soʻradi mulla Fazliddin.
- Chorbogʻda tillakori koʻshk qurganingizda koʻrgansiz... Xonzoda begim... Oʻzi ham sizning san'atingizga ixlosmand emish-ku...

Mulla Fazliddinning yuragi taka-puka boʻlib ketdi. Nahotki bu bek poʻlat sandiqdagi suratdan xabardor boʻlsa!

- Kim sizga shunday dedi?.. Men me'mormen... Men faqat imoratlarning suratini chizamen...
- Mendan yashirmang, janob me'mor! Men shariat peshvosi emasmen. Surat chizishni bizda man qilganlariga men ham qarshimen! Hirotda Shohruh mirzo Boysunqur mirzo uchun qurdirgan saroyning devorlari goʻzal qizlar surati bilan bezalgan ekan. Toʻgʻrimi?
- Toʻgʻri-yu, lekin... Har joyning oʻz tosh-u tarozisi bor. Agar Xonzoda begimning surati haqida siz aytgan gapni podshoh hazratlari bilib qolsalar, nima boʻlishini oʻylaysizmi?
- Bilmagay! deb shivirladi Ahmad Tanbal. Ikkovimizdan boshqa hech kim ogoh boʻlolmagay! Xoʻp deng! Mang, oltinni oling!

- Shoshmang, bek. Meni surat chizadi, deb sizga kim aytdi?..
 - Eshitdik-da!
 - Kimdan?.. Hasan Yoqubbekdanmi?..
 - Hasan Yoqubbek bir bogʻbondan eshitgan ekan...
- «Demak, Ahmad Tanbalning bu yerga kelganidan Hasan Yoqubbek xabardor! – oʻyladi mulla Fazliddin.
- Bular birgalashib meni qoʻlga tushirmoqchi boʻlsa kerak. Sendek qurbaqataxlit bek uchun Xonzoda begimning suratini chizib berib men ahmoq emasmen!».
- Janob Ahmadbek, kamina bogʻlarning suratini chizganda bir chetiga bogʻbonni ham tasvirlashim mumkin. Me'morlik san'ati buni inkor etmaydi. Ammo malikaning suratini chizish uchun menda na san'at bor, na haq va na jur'at!
 - Xullas, mening soʻzimni yerda qoldirmoqchimisiz?
- Boshqa ilojim yoʻq. Meni ma'zur tuting, janob bek. Bunday taklif bilan kelish siz uchun ham xatardan xoli emas!
- E, men buzdillardan¹ emasmen! deb Ahmad Tanbal qahr bilan oʻrnidan turdi va yirik tishlarini irjaytirib qoʻshib qoʻydi: Lekin siz mening shaxtimni qaytarganingiz uchun hali pushaymon boʻlursiz!

Bu tahdid mana endi toʻrtta bosqinchining qiyofasiga kirib, qorongʻida uning uyiga bostirib kelgan boʻlsa ajab emas. Qurolsiz, navkarsiz mulla Fazliddin Ahmad Tanbalday yuz-ikki yuztadan qurolli yigitlari bor beklarga qanday bas keladi? Lekin «boʻlari boʻldi», deb indamay yuraversa, bu quturgan bek ertaga beshbattar yomonliklar qilishi mumkin emasmi? Mulla Fazliddin ertalab podshoh in'om qilgan toʻbichoq otni mindi-da, shahar dorugʻasi² qabul qiladigan mahkamaga yoʻl oldi. Uzun Hasan ismli ingichka, novcha dorugʻa askarlikka odam olish va shaharni

 $^{^{\}scriptscriptstyle 1}$ Buzdil – quyonyurak, qoʻrqoq.

² Dorugʻa – shahar hokimi.

yaqinlashib kelayotgan dushmandan himoya qilish tashvishi bilan band ekan. Mulla Fazliddinning arzini qayoqqadir ketmoqchi boʻlib shoshilib turgan paytda tingladi-da:

– Tarhlaringizga tegmay, hamyoningizni olib ketgan boʻlsa, bu – toʻqaydan chiqqan oʻgʻrilarning ishi, – dedi. – Yogʻiy tashvishidan qutulsak, toʻqaylarni oʻgʻrilardan tozalagaymiz... Hozir ahvolni koʻrib turibsiz!..

Qoʻl qovushtirib tikka turgan mulla Fazliddin dorugʻaga yaqinroq keldi:

- Mening boshqa gumonim bor, janob dorugʻa, dedi. Soʻng Ahmad Tanbalning surat chizdirmoqchi boʻlganini, rad javobi olganda esa achchiqlanib ketganini aytib berdi.
- Kimning surati? deb dorugʻa qiziqib qoldi.
 Mulla Fazliddin Xonzoda begimning nomini tilga olishga qoʻradi.
 - Parilar suratimidi? Yaxshi tushunmadim.
- Sandigʻingizda parilar surati bormidi? Bosqinchilar shuni olib ketibdirmi?
- Surat oʻzi boʻlmasa neni olib ketsin! Men hazrati oliylari buyurgan madrasa tarhini chizish bilan bandmen. Suratkashlikka vaqtim yoʻq. Sandiqda xomaki lovihalarim bor edi, xolos.
- Ular joyida qolganmi, axir? Undoq boʻlsa Ahmadbekdan nechun gumonsiramoqdasiz?
- Sababini aytdim, janob dorugʻa! Taftish oʻtkazishingizni soʻraymen!
- Ahmadbek sultonlar avlodidan ekanini unutgan boʻlsangiz, men eslatib qoʻyay. Hazrati oliylarining katta xotinlari Fotima begim Ahmadbekka qarindosh boʻlurlar. Fotima begimning chaqirigʻi bilan Sulton Ahmadbek bugun azonda poytaxtimiz Axsiga ketdilar. «Agar oʻsha bek sandiqdagi suratlarni qoʻlga tushirsa, Axsiga eltib, podshoh oilasiga koʻrsatmoqchi boʻlganmi? – degan oʻy mulla Fazliddinning ichini muzlatib oʻtdi.

– Bular mening qonimga shunchalik tashnami? Balki Ahmad Tanbal Xonzoda begimni ham shu surat orqali qoʻlga tushirmoqchidir? Hali uylanmagan bu bek podshoga kuyov va Xonzoda begimdek goʻzal qizga er boʻlishni jon-dili bilan istasa kerak!»

Oʻrgimchak toʻriga oʻxshash yopishqoq bir balo atrofini oʻrab kelayotganini sezgan mulla Fazliddin jon-jahdi bilan bu toʻrni yirtib chiqib ketishga urindi:

- Janob dorugʻa, men sizdan adolat istab keldim! Podshoh hazratlari meni sizning himoyangizga topshirgan edilar! Agar bosqinchilarni topib jazo bermasangiz, men podshoh hazratlarining huzurlariga panoh istab ketishga majbur boʻlurmen!
- Ammo shuni bilingki, janob me'mor, hazrati oliyning huzuriga sizdan ham oldin ba'zi bir gaplaringiz yetib borishi mumkin!
 - Ya'ni, qaysi gaplarim, janob dorug'a?
- Ba'zi me'morlar oʻzlarini podshohlardan ham baland qoʻyarmishlar. «Bu taxt-u saltanatlar benom-u nishon yoʻqolur, faqat me'mor-u musavvirlar yaratgan zoʻr san'at asarlari tirik qolur», degan gustohona aqidalar bizga ma'lum!

Mulla Fazliddin bugun Quvada pochchasining uyida bexosdan aytib yuborgan bu e'tiqodini boshqa ishongan odamlariga ham aytgan paytlari boʻlgan edi. Ana shu ishonganlaridan allaqaysisi aygʻoqchilik qilib, bu gapni dorugʻaga yetkazganini, endi dorugʻa buni podshohga dasturxon qilib olib borishi mumkiligini sezdi-yu, badanidan sovuq ter chiqib ketdi. Lekin dorugʻaga sir boy berish qanchalik xatarli ekanini payqab:

– Bu hammasi igʻvo! – deb xitob qildi: – Janob dorugʻa, sizning ustingizdan igʻvo qiluvchilar ham oz emas! Buni bilursiz! Men Andijonda neki bino qilgan boʻlsam, hammasiga Mirzo hazratlarining nomlarini bitmoqdamen! Arkdagi devonxonani koʻring!

Chorbogʻdagi koʻshkni koʻring! Men ularning biror joyiga oʻz nomimni yozibmenmi? Qani, igʻvogarlar dalil keltirsinlar! Men hammasiga Mirzo hazratlarining muborak nomlarini bitganmen! Demak, tarixda mening nomim emas, Mirzo hazratlarining nomi qolsin, deganmen! Shundoqmi, yoʻqmi? Qani ayting!

Dorugʻa bu mantiqli dalillarni rad etolmasdan:

- Shundoqlikka shundoq, ammo...
- Ammosi yoʻq, janob dorugʻa! Siz meni bosqinchilardan himoya qilish oʻrniga, aygʻoqchilarning tuhmatiga ishonadirgan boʻlsangiz, men alhol Axsiga borib, Mirzo hazratlariga arz qilurmen!..

Uzun Hasan bu doʻqni pisand qilmay:

- Mayli, boring, arz qiling! dedi. Lekin shuni bilingki, atrofimizni yogʻiy bosgan bu xatarli damlarda podshohga me'mordan koʻra navkar zarurroq! Ahmadbekdek, mendek jangovar beklar uchun podshoh hozir sizdeklardan qanchasining bahridan oʻtur!
- Axsiga borganda koʻrurmiz, deb mulla Fazliddin mahkamadan shaxt bilan tashqariga chiqdi. Uning vajohati hoziroq Axsiga, podshoh huzuriga arzga boradiganga oʻxshardi. Lekin u otlanib uviga qaytayotganda, sal hovuridan tushdi-yu, Uzun Hasan aytgan soʻnggi gaplarda achchiq bir haqiqat borligini sezdi. Yov qurshovida qolayotgan Umarshayx mirzo bitta me'morni deb yuz, ikki yuzdan navkari bor zo'ravon beklarga qarshi bormasligi aniq. Ahmad Tanbal bugun Axsida - shoh saroyida. Agar u mulla Fazliddinning malika suratini chizgani haqida gap tarqatsa... Lekin Ahmad Tanbal buni qanday payqaganikin? Mulla Fazliddin Xonzoda begimning suratini chizish uchun u bilan tillakori koʻshkda pinhon uchrashganda buni zimdan koʻrib qolgan kanizlar yoki savdarlar¹ boʻlsa, Ahmad Tanbal shuning bir chetini eshitib, haligi hamyonni koʻtarib kelganmikin? Bosqinchi yigitlarini

¹ Savdar - xos xizmatkor.

ishga solib ham maqsadiga yetolmagan bu yovuz bek endi shoh saroyiga borib peshgirlik qilishi mumkin. Agar u oʻzi eshitgan mish-mishni haramdagi ayollar orqali podshohning qulogʻiga yetkazsa... Umarshayx mirzo boʻy yetgan qizining qayoqdagi bir me'mor bilan yashiriqcha uchrashib, surat chizdirganini oʻz sha'niga katta isnod deb bilishi aniq. Shoh iskovuchlari ishga tushirilsa, mulla Fazliddin yashirib yurgan suratni topib olib, Ahmad Tanbalning gapiga dalil qilish qoʻllaridan keladi. Ana undan soʻng shoh qiziga isnod keltirgan musavvirni ming qiynoqlarga solib oʻldirishlari turgan gap!

Mulla Fazliddin Xonzoda begimning suratini chizish bilan nechogʻliq xatarli ishga qoʻl urganini endi astoydil his qildi. Agar surat qoʻlga tushsa, u qiz ham malomatga qoladi. Dunyo busiz ham tashvish-tahlikaga toʻla!.. Mulla Fazliddin tagqutidagi malikaning suratini titroq qoʻllari bilan jilddan oldi. Igʻvogar ablahlarga dalil qoldirmaslik uchun buni yoʻq qilishi kerak! Mulla Fazliddin oʻchoqda yonayotgan olovga yaqin bordi.

Rangli boʻyoqlar bilan ishlangan moʻjazgina suratdagi goʻzal qiz shu payt unga tirik bir odam boʻlib koʻrindi. Alanga yolqinida qizning kipriklari, lablari bilinar-bilinmas nafis harakatlar qilayotganga oʻxshab ketdi. Qizning aqlni shoshiradigan jozibasi bor edi. Bu joziba mulla Fazliddinni har galgiday yana sehrlab oldi, boyagi tahlika xayolidan uzoqlashib, qalbida iliq tuygʻular uygʻondi. «Nahotki men bu qizga oshiq boʻlsam? – hayrat ichida oʻylandi mulla Fazliddin. – Qora xalq orasidan chiqqan menday bir suratkashning shoh qiziga muhabbat qoʻyishi kulgili emasmi? Yoʻq! Men faqat oʻzim chizgan suratga – oʻz ijodimga mehr qoʻyganmen, xolos! Boshim omon boʻlsa, bunday suratni yana chizgaymen!» Shu oʻy bilan suratni oʻtga tashlamoqchi boʻlib egildi. Qiz tasviri

olovga yaqinlashganda yuzi qizarib boʻgʻriqqandek, koʻzlari esa chaqnab ketgandek koʻrindi. Mulla Fazliddin tirik odamni oʻldirayotgandek, seviklisini oʻtga tashlayotgandek seskanib orqaga chekindi. Ichki bir ovoz uni «Qoʻrqoqsen!» degandek jerkidi. «Dushmanlaring ustingga bostirib kelayotgani yoʻq-ku! Ahmad Tanbal ham Axsida. Bilib qoʻy, sen bunday goʻzal suratni ikkinchi marta chiza olmassen! Tasvirga bunchalik tirik joziba baxsh eta olganing – takrorlanmas bir ilhomning natijasi. Botir boʻlsang, qutqarib qolursen!»

Mulla Fazliddin suratni tagqutiga qaytarib soldi-yu, xizmatkor yigitni chaqirdi.

- Koʻchlarni yigʻishtir! Aravani qoʻsh! Quvaga joʻnagaymiz!.. Tez!.. Tezroq!..

Mana hozir opasining uyida oʻtirib, yuz bergan voqeani pochchasi bilan jiyaniga soʻzlab berar ekan, poʻlat sandiqda Xonzoda begimning surati borligini ularga ham aytmadi. Bu sirni u hech kimga bildirmoqchi emas edi...

- Vo darigʻ! deb Tohirning otasi ogʻir uh tortdi: Bizning suyangan togʻimiz siz edingiz, mulla Fazliddin!.. Endi siz ham quvgʻinga uchragan boʻlsangiz...
- Nachora? Hammamizning ham taqdirimiz qil ustida turibdi!
- Podshohga arzga borsangiz, dodingizga yetmasmikin, mulla togʻa?
- Bu toʻpolonlar bosilsa, bir marta borib arz qilishim aniq. Agar dodimga yetsa yetdi, yetmasa, yana Hirotga qaytib keturmen! Alisher Navoiy Shifoiya degan bino qurdirmoqchi, deb eshitgan edim. Olamda biz uchun yongan yagona umid chirogʻi oʻsha siymo boʻlib qoldi.
- Hirot orzusini qilmang, mulla Fazliddin, Fargʻonada ham hunaringizning qadriga yetadigan odamlar bor. Quvaning koʻprigi sizning rejangiz bilan qurilgan edi. Xalq haligacha sizni duo qilib yuribdir.

– Xalq! Qani endi bu koʻprikdan faqat xalq oʻtsa! Erta-indin bu koʻprikdan yogʻiy qoʻshinlari oʻtib kelur! Xalqning boshiga yogʻiladigan balolarni oʻylasam, bugungi jalalar selga aylanib, oʻsha koʻprikni oqizib ketmaganiga afsus qilamen! Agar yogʻiy, bu tomonga oʻtolmasin deb, oʻsha koʻprikni hozir yondirib yuborsalar, men jon deb rozi boʻlur edim!

«Chindan ham, – oʻyladi Tohir oʻzicha, – yogʻoch koʻprik. Yogʻ sepsa yonur. Yogʻiy faqat shu koʻprikdan oʻtishi mumkin. Kechuv ham yoʻq. Hammayoq botqoqlik, qamishzor. Agar koʻprik yondirilsa yogʻiy oʻtolmagay!» Tohir kutilmagan joydan najot yoʻlini topganday boʻldi. Tasavvurida gavdalangan yongʻin alangasidan goʻyo uning badani qizib ketganday tuyildi. Robiyani balo-qazodan asraydigan eng zoʻr qalqon ana oʻsha olov boʻlishi mumkin! Tohir qaltis istakdan koʻzlari yonib, otasiga qaradi. «Aytsammikin? Yoʻq! Rozilik bermas. Yolgʻiz oʻgʻilmen. Togʻam... nozik odam, aralashmagani ma'qul. Tavakkalchi yigitlardan topishim kerak!».

Tohir sekin oʻrnidan turib, hovliga chiqdi.

Osmonni toʻldirgan bulutlarning yirtigʻidan birda-yarim yulduzlar koʻrinib qoladi. Uylar chiroqsiz. Koʻchalar sukutda. Ahyon-ahyonda kuchuklar hurgani eshitiladi.

Iftorni qilib chiqqan Mahmud Tohirga darvoza oldida uchradi. Robiyaning akasi boʻlgan bu kosib yigit Andijon qoʻrgʻoniga ketishdan gap ochgan edi:

- E, bu niyatlar hammasi puchga chiqdi! deb Tohir unga togʻasidan eshitganlarini aytib berdi. Mahmudni ham birdan gʻam bosib:
 - Endi qaydan najot izlaymiz, e Xudo! dedi.
- Oʻzing uchun oʻl yetim, degan gap bor, Mahmud... Yur, darvozaxonaga kiraylik. Bir sir aytamen.
 - Ogʻzingdan chiqarma! Koʻprikni yondiramiz!..
 - Qanday qilib? hayrat bilan soʻradi Mahmud.

Tohir unga oʻzining rejasini shivirlab tushuntirdi.

- Yogʻ sepsak, yogʻoch tez yongay. Bildingmi?
- Jinni boʻlibsen! Koʻprikda soqchilar bor-ku!
- Oʻzimizning beklar qoʻygan soqchilarmi? Hali yogʻiy yaqin kelsa, hammasi qoʻrgʻonga qochgay. Oʻshanda biz...
- Yoʻq, shoshma! Axsidan bizning podshomiz qoʻshin tortib kelayotgan emish. Bu koʻprik hali oʻzimizga kerak!..
- Podshoying qoʻrgʻonidan chiqsa shu kungacha chiqar edi! Ana, Margʻilon ham boy berilibdi! Podshodan darak yoʻq!..
- Bilmasam, kadxudo¹ guzarda ishontirib aytdi. «Podsho hazratlari yoʻlda, erta-indin himoyamizga yetib kelishlari aniq!» dedi.
 - Chindan yoʻlga chiqibdimi-a?
- Ha, oʻz qulogʻim bilan eshitdim! Bultur podshomiz yogʻiy bilan Xoʻjanddan nari Xovosga borib urushgan ekan-ku. Quva Axsiga Xovosdan yovuqroq² emasmi?
- Yovuqlikka yovuq-ku!.. Zora sen aytganing rost chiqsa-ya, Mahmud?
- Ha, axir, koʻprikka soqchilarni bekorga qoʻyganlarmi?.. Podshomiz erta-indin kelib, jonimizga ora kirgay... Mana, koʻrursen!..

Shu tobda Tohirning koʻnglida ham umid uchqunlaganday boʻldi. U qorongʻi osmonning uzoq bir chetida – Sirdaryodan narida joylashgan Axsi tomonga intizor koʻzlar bilan tikildi.

¹ Kadxudo – qishloq oqsoqoli.

² Yovuq - yaqin.

AXSI

AJALGA DAVO YO'Q

1

Baland tepalik ustiga qurilgan Axsi qal'asi tun ogʻushida togʻ qoyasiga oʻxshab qorayib koʻrinadi. Qal'a etagida Kosonsoyning Sirdaryoga guvullab quyilayotgani, ikki daryo toʻlqinlari bir-birlari bilan olishib, qirgʻoqqa shaloplab urilayotgani uzoqdan eshitilib turadi.

Axsining hukmroni Umarshayx mirzo bu kecha haramda oʻn sakkiz yoshlik Qorakoʻz begimning xobgohida uxlab yotibdi. Shohona toʻshakning ipak pardasi ortida bittagina sham lipillab yonib turibdi. Uning zaif yogʻdusi tashqaridan bosib kirmoqchi boʻlayotgan tun qorongʻisidan qoʻrqqanday titrabqaltiraydi.

Sahar paytida qal'a sukunatini buzib, hazin surnay tovushi yangradi. Soʻng unga qoʻsh nogʻora tovushi joʻr boʻldi. Roʻza tutish – shoh-u malayga barobar kelgan majburiyat boʻlgani uchun surnay va nogʻora saroy ahlini saharlikka uygʻotmoqda edi.

Yoz tunlari qisqa, uyquga toʻymay saharlikka turish xiyla noxush. Shunday boʻlsa ham Qorakoʻz begim oʻrnidan ohista turib yuvindi, kiyindi. Lekin parqu toʻshakda baquvvat qoʻllarini ipak choyshabdan chiqarib uxlab yotgan Umarshayx mirzo hamon uygʻonmasdi.

Xobgohdan ikki xona narida hashamatli tanobiy uyda allaqachon tuzab qoʻyilgan dasturxon Mirzoga muntazir edi. Uning kecha iftordan soʻng bergan amriga muvofiq bugungi saharlik uchala xotinlari

va bolalari bilan birga qilinishi kerak edi. Mirzoning birinchi xotini Fotima Sulton, ikkinchi xotini Qutlugʻ Nigor xonim, oʻn sakkiz yoshlik qizi Xonzoda begim va oʻn yashar oʻgʻli Jahongir mirzo – hammalari oʻsha tanobiy uyga yigʻilgandilar. Lekin hazratning oʻzlari kelmaguncha hech kim tamaddi qila olmasdi.

Ichki eshikdan Qorakoʻz begim chiqib keldi. Kichik jussali bu yosh juvon tepada yonayotgan qandil yorugʻida behad chiroyli koʻrindi. U katta begimlarga uyalibgina salom berdi-da, hazratni uygʻotishga jur'at etolmaganini aytdi.

Qorakoʻz begimning yoshligi, goʻzalligi, xususan, uyalib gapirishi hozir uning eng suyukli xotin ekanini esga tushirdi-yu, Fotima Sultonning rashkini qoʻzgʻadi.

– Hazratimni muncha qattiq uxlatibsiz, endi uygʻotish nechun ilkingizdan kelmaydir?

Qutlugʻ Nigor xonim bolalar oldida qilingan bu kinoyadan ozorlanib:

– Qoʻying, ogʻa oyi. Bu begimda ayb yoʻq! – dedi.

Xonzoda begim oyisining yuziga ma'noli koʻz tashlab: «Ayb bizning otamizdami?» demoqchi boʻldi. Podshoh ota qizi tenglik Qorakoʻz begimning xobgohida, qonli urush hammani besaranjom qilib turgan shunday tahlikali tunda qotib uxlab yotishi unga behad xunuk tuyildi. Hozir otasi kelsa, Xonzoda begim uning yuziga qaray olmasligini sezdi-yu, oyisidan iltimos qildi:

- Ruxsat bering, men ketay... Saharlikni boshqa qizlar bilan qilay...
- Hazrat otangiz soʻrasalar, biz ne deymiz? Xafa boʻlmasinlar, tagʻin. Sabr qiling, qizim... Muncha oshiqmang...

Tashqari eshikdan ta'zim qilib kirgan choshnagir ayol ovozini qoʻrquv bilan pasaytirib xabar berdi:

– Osmonda yulduzlar siyrak qoldi. Hademay tong yorishur. Hazrati oliy saharliksiz qolurlarmu?

Tong otib, azon aytilgandan soʻng roʻza oʻz kuchiga kiradi, hech kim hech narsa yeb-ichishi mumkin boʻlmay qoladi. Uzun va issiq yoz kunida podshohni saharliksiz qoldirish begimlar uchun oʻzlari och-nahor qolishlaridan qoʻrqinchliroq edi.

Barcha koʻzlar ichki eshik oldida iymanib turgan Qorakoʻz begimga tikildi. Mirzo uning xobgohida yotibdi, u yerga kirib hazratning shirin uyqusini buzishga boshqa hech kim botinolmaydi. Choshnagir¹ ayol Qorakoʻz begimga iltijo qildi:

- Iloho Rustamday oʻgʻil koʻring, begim!.. Bugun umidimiz sizdan!

Qorakoʻz begim tashvishli yuz bilan sekin burildiyu, ichki eshiklardan oʻtib, xobgohga qaytib bordi. Umarshayx mirzo boshi yostiqqa botib, qattiq uxlamoqda edi. Qorakoʻz begim oltin shamdonni parda ortidan olib, naqshin tokchaga qoʻydi. Sham yorugʻi Mirzoning yuziga tushdi. Ammo bu ham uni uygʻotolmadi – Mirzo kechasi ma'jun² yegan edi. Qorakoʻz begim uni choʻchitib yuborishdan qoʻrqib, mayin tovush bilan:

- Hazratim! - deb chaqirdi. Bu ham kor qilmadi. Qorakoʻz begim gilam uzra choʻkkalab, vahimadan xiyol titrayotgan nafis qoʻllarini hazratning mayin choyshab ustida yotgan zalvorli bilagiga qoʻydi. Toʻshakdan gul hidi kelmoqda edi - kecha oqshom choyshablarga gul atri sepilgan edi. Qorakoʻz begim Mirzoning uygʻonmayotganidan ajablanib, unga tikilib qaradi. Lablari yarim ochiq, oqish yuzi osoyishta. Shu yotishda u qoʻrqinchli podshoh emas, hali qirq yoshga toʻlmagan va bahodirona uyquga choʻmgan koʻhlik bir yigit boʻlib koʻrindi. Bu yigit Qorakoʻz begimga

¹ Choshnagir – podshohning dasturxoniga qaraydigan xodima.

 $^{^2}$ Ma'jun – ziravor va dorivor giyohlardan tayyorlanadi. Koʻpincha unga afyun ham qoʻshganlar.

toʻsatdan juda gʻanimat tuyildi. Hozir yurt notinch, Axsiga yov bostirib kelyapti. Mirzoni ajal kutayotganini oldindan sezgandek, Qorakoʻz begimning yuragi yomon bir uvushdi. U toʻsatdan egilib, Mirzoning yuzidan, koʻzlaridan vidolashgan kabi oʻpa boshladi. Umarshayx mirzoning kipriklari titradi. U koʻzini ochib, tepasida turgan Qorakoʻz begimga karaxt yuz bilan bir lahza tikilib turdi.

Qorakoʻz begimning katta-katta koʻzlari xavotirlik toʻygʻusidan yana ham ulkanlashib ketdi. U uyqudagi Mirzoni oʻpish beadablik sanalishidan tahlikaga tushgan edi. Mirzo:

- Sizmi? - dedi-yu, nima boʻlganini fahmlab, kulimsiradi.

Qorakoʻz begim endi yengil tortdi va dadillanib ta'zim qildi.

- Hazratim, saharlik vaqti oʻtib ketmasin.
- Sizning boʻsalaringiz saharlikdan shirinroq...

Begim jiddiy gapirdi:

– Ogʻa oyim, xonim oyi – hammalari hazratimga muntazirlar.

Umarshayx mirzo bugungi rejalari va urush tashvishlarini eslab, qovogʻini soldi-da, indamay oʻrnidan turdi.

U zardoʻzi koʻrpachalar toʻshalgan tanobiyga toʻrdagi eshikdan kirib keldi. Sallasi va kamariga qadalgan qimmatbaho gavharlar sham yorugʻida nafis jilolanardi. Odatdagi ta'zimlardan soʻng, ayollar nafaslarini ichlariga yutib, bir lahza jim qoldilar. Podshoh kimni qaysi yoniga taklif qilsa – kimning hurmati qay darajada ekani shu bilan belgilab beriladi. Fargʻona vodiysiga uch tomondan dushman hujum qilib kelayotgan shu ogʻir vaziyatda Umarshayx mirzo hamma xotinlariga iloji boricha iltifot koʻrsatmoqchi boʻldi. Xotinlari orasida eng yoshi ulugʻi va eng obroʻparasti Fotima Sulton boʻlganligi

uchun Mirzo birinchi boʻlib uni yuqoriga taklif qildi. Fotima Sultonning koʻzlari quvonchdan chaqnab ketdi. U podshohning oʻng tomoniga oʻtmoqchi boʻlib borayotgan edi. Biroq Umarshayx mirzo unga chap tomonidan joy koʻrsatdi. Eng moʻtabar hisoblangan oʻng tomonga esa Qutlugʻ Nigor xonimni taklif qildi. Xonim – taxt vorisi Zahiriddin Muhammad Boburning onasi edi, uning oʻng tomonida oʻtirishi adolatdan ekanini kichik xotinlar tan olar edilar. Ammo Fotima Sulton oʻzining hurmati Qutlugʻ Nigor xonimnikidan past ekanini yana bir marta his qilib, koʻzlari alam bilan qisildi.

Dasturxonga tortilayotgan kiyik kabobi, kaklik goʻshtlari hazratdan soʻng Qutlugʻ Nigor xonimga qoʻyilar, undan keyin Fotima Sultonga navbat kelar edi. Shu sababli ogʻizda eriydigan eng a'lo goʻshtlar ham Fotima Sultonga ilitma ovqatdek mazasiz tuyilardi. Oqshom iftorda yoyilgan taomlar hazm boʻlib ulgurmagan, dasturxon atrofidagilarning koʻpchiligi hali kun boʻyi och yurishini oʻylab, oʻzini majbur qilib boʻlsa ham koʻproq ovqat yeyishga intilar edi. Qutlugʻ Nigor xonimning yonida oʻtirgan Qorakoʻz begim ovqatdan ham koʻproq bodring, handalak yer, sharbat ichar edi – kecha kun issigʻida tashnalikdan nihoyatda qiynalgani esidan chiqmas edi.

Osmon oqarib qoldi. Tong yorishgan sari qandildagi shamlarning nuri xira torta boshladi. Azon aytadigan payt oʻtib boryapti. Arkdan tashqaridagi masjidning imomi koshinlik minoraga chiqib, bakovulning¹ ishorasini sabrsizlik bilan kutyapti. Axir Mirzo hazratlari saharlik qilib ulgurmasdan, azon aytish xatardan xoli emas. Ovqat yeyilib, choyga oʻtilganda Umarshayx mirzo xotinlariga vaziyat qanchalik ogʻirlashayotganini aytib berdi. Shu payt masjid tomondan azon tovushi eshitildi. Choy ichayotgan

¹ Bakovul – podshoh oshxonasining javobgar xodimi.

Xonzoda begim shoshilib piyolasini dasturxonga qoʻydi. Umarshayx mirzo xotinlariga bir-bir qarab, dedi:

- Moʻysafidlar «toʻrt muchang butun boʻlsin», deb duo qilurlar. Fotima Sulton, Qutlugʻ Nigor xonim, Qorakoʻz begim, farzandlarimiz Xonzoda begim, Jahongir mirzo har biringiz oilamizning aziz bir muchasidirsiz. Istaymenki, bu mushkul vaziyatda hamma muchalarimiz butun boʻlsin, bir-birlariga mehr-u shafqat koʻrsatsin. Ilik¹ oʻz oʻrnida aziz. Koʻz oʻz oʻrnida moʻtabar. Agar koʻz bilan ilik bir-biriga nizo qilsa, bundan har ikkisi jabr koʻrur. Soʻnggi gap Fotima Sulton bilan Qutlugʻ Nigor xonimga qaratilganini hamma sezdi. Xonimning xayoli shu xatarli vaziyatda ota-onadan uzoqda Andijonda turgan yolgʻiz oʻgʻli Boburda edi.
 - Hazrat uni nega farzandlari qatori tilga olmadi?
- Hazratim, bergan oʻgitingizni bebaho gavhar oʻrnida qabul qilurmiz, dedi Nigor xonim.
 - Ijozat bersangiz, bitta oʻtinchim bor.
 - Ijozat.
- Urush xatari kuchlik ekan. Bobur mirzoni Andijondan poytaxtga chaqirtirsangiz, yonimizda boʻlsalar...
- Andijon qal'asi mustahkam. Bobur mirzo u yerda boʻlsa qal'a yanada mustahkam boʻlur. Bizning Mirzoga ishonchimiz katta.

Bu javob bilan xonimning iltimosi rad etildi. Fotima Sulton yonida uyqusirab oʻtirgan oʻgʻilchasi Jahongir mirzoni sekin bagʻriga bosib, boshini silab qoʻydi. Bu bilan u Qutlugʻ Nigor xonimdan koʻra oʻzining ahvoli yaxshiroq ekanini namoyish qilmoqchi edi.

– Bobur mirzoning onasi sizdan umrbod minnatdor, hazratim, – dedi Qutlugʻ Nigor xonim, – faqat hali oʻn ikki yoshga toʻlmagan bola... urush maydonida...

¹ Ilik - bu yerda: qoʻl ma'nosida.

- Xonim, ortiqcha xavotirga oʻrin yoʻq. Bobur mirzoning yoniga eng yaxshi beklarimiz yuborilgan. Yosh boʻlsa ham sarkardalikka tayyorlanmogʻi zarur. Agar mening kunim bitsa, oʻrnimni Bobur mirzo olgʻay.

Endi oʻttiz toʻqqiz yoshga kirgan va qirchillama yigit yoshini yashayotgan Mirzoning oʻz oʻlimi haqidagi soʻzlaridan haram ahli ogʻir jimlikka choʻmdi. Hammaning xayoli qonli urushga ketdi. Xonzoda begim otasi haqidagi boyagi noxush oʻylarini unutib, unga koʻzi moʻltirab qaradi. Umarshayx mirzo gapining ta'sirini yanada oshirgisi kelib davom etdi:

- Agar men bu foniy dunyodan koʻz yumsam, hammangiz Bobur mirzoning amrini hozirgi mening amrim kabi bajo keltirgaysiz. Jahongir mirzo!

Podshoh otasi bilan muomalaga yaxshi oʻrgatilgan oʻn yashar bola darhol sergaklanib, qoʻlini koʻksiga qoʻydi:

- Labbay, hazratim!..
- Mening bu gaplarimni sen ham esda tutgil. Bobur mirzo sendan faqat ikki yosh katta boʻlsa ham, agar mening oʻrnimda qolsa, sen unga farzanddek sodiq boʻlgʻil.
 - Xo'p, hazratim!..

Bola otasining soʻzlaridagi ma'noni durust tushunmagani uchun tez va oson «xoʻp» dedi. Ammo ayollar murakkab hislar tugʻyonida qoldilar. Qorakoʻz begimning Umarshayx mirzoga termilib turgan koʻzlarida yosh yiltilladi. Mirzo buni koʻrdi-yu, suyukli xotinining boyagi oʻpichlari esiga tushib, vidolashuv alomatiga oʻxshab tuyildi. Umarshayx mirzo oʻzining soʻnggi gaplari ham vasiyatga oʻxshab ketganini endi sezdi. Yuziga birdan ajal sharpasi tekkanday yuragi «shigʻ» etdi. «Menga ne boʻldi? Oʻlimni boʻynimga olib vasiyat qildimmi? Yoʻq, yoʻq!» Mirzo oʻz gaplaridan oʻzi qoʻrqib ketganini payqagan Xonzoda begim bugun

otasining allanechuk yordamga muhtoj bir ahvolda ekanini koʻrib, unga bexosdan rahmi keldi.

- Hazratim, men mungliq qizingiz, sizga Xudodan Shayx Sa'diyning umrini tilaymen! Ilohim yuzga kiring!
- Aytganing kelsin, qizim! deb Umarshayx mirzo yengil bir soʻlish oldi. U qizining ziyrakligini, soʻnggi paytda boʻy yetib, husni yetilib, koʻzga nihoyatda yaqin boʻlib qolganini goʻyo endi sezdi-da, qoʻshib qoʻydi: – Men axir sening toʻyingni oʻtkazmoqchimen!

Xonzoda begimni Samarqand podshosining oʻgʻli Boysunqur mirzoga soʻratgan edilar. Lekin Umarshayx mirzo bunga rozi boʻlmagan edi. Mana endi agar juda doʻppi tor kelsa, balki u qizini podshoh akasining oʻgʻliga berib, shu yoʻl bilan urushni yarashga aylantirar? Lekin bunday istiqbol Xonzoda begimga qorongʻi tundek mavhum va vahimali tuyilardi. Uning boshqa orzulari bor edi. Shuning uchun otasining soʻnggi niyatidan choʻchib, gapni boshqa yoqqa burdi:

- Agar inimiz Bobur mirzoni chaqirtirish imkonsiz boʻlsa, men bilan oyimga ruxsat bering, biz Andijonga boraylik!
- Qizim, sen mening eng bebaho gavharlarimdansen. Bu xatarli asnoda seni qanotim ostidan chiqarmagaymen!
- Undoq boʻlsa menga ruxsat bering, hazratim! dedi Qutlugʻ Nigor xonim.
- Xonim, Margʻilondan chopar kutmoqdamiz. Vaziyat aniqlansa, ruxsat olursiz.

Umarshayx mirzo dasturxonga fotiha oʻqib, oʻrnidan turdi-yu, shoshilinch tadbirlar oʻylab, haramdan chiqdi. Haramga kirish huquqidan mahrum qoʻrchilar tuni bilan tashqarida qoʻriqchilik qilgan edilar.

Endi hazrati oliyning e'tiborini tortmaslikka va xayolini boʻlmaslikka tirishib, sekingina unga ergashdilar. Tong endi otgan, hali oftob chiqmagan boʻlsa ham koʻpchilik beklar va mulozimlar devonxonada hozir erdilar. Hammalari Mirzoni ta'zim bilan qarshi oldilar. Zarbof toʻn kiygan, beliga tilla kamar bogʻlagan sersoqol eshik ogʻa birinchi vazir darajasidagi eng katta bek edi. Mirzo unga yuzlanib, qayerdan chopar borligini soʻradi.

- Hazrati oliylari, Isfaradan.

Eshik ogʻa ikki bukilib ta'zim qilar ekan, yuzi tund koʻrindi.

- Qanday xabar, bek?
- Hazratim, qulingizning bir qoshiq qonidan oʻting... Demak, Isfara ham yov qoʻlida! Mirzo ichki bir titroq

bilan Margʻilon choparini soʻradi.

- Hazratim, Margʻilon chopariga intizormiz.

Nahotki Margʻilon ham taslim boʻlgan? Unda Andijon ham xavf ostida qoladi! Yoki choparlar yov qoʻliga tushganmikin? Balki birortasi xiyonat qilib, narigi yoqqa oʻtib ketgandir?

- Hazrati oliylari, yana chopar yuborishga farmon berurlarmi?
- Chopar yuborib yana necha kun yoʻliga qaraylik?!
 Eshik ogʻa uzr soʻragandek, ta'zim qilib, orqaga chekindi.

Axsi qal'asining qamalda qolishi Mirzoga endi muqarrardek tuyildi. U eshik ogʻaga olti oylik zaxira tayyorlatishni buyurdi. Qal'a baland tepalikda turgani uchun unga suv chiqmas, suvni meshkobchilar tashib keltirishar edi. Mirzo oʻttiz yoshlik, xushqomat Qosimbekka qal'a ichida bir toshhovuz qurdirish va uni suv bilan toʻldirtirish amrini berdi.

Mirzoning avzoyi yomonligini sezib turgan beklar darhol uning farmonini bajarishga kirishdilar.

Mirzoning oʻzi esa otlanib arkdan chiqdi. Mulozimlar va qoʻrchilar ham otlanib, odatdagiday, unga ergashdilar.

Umarshayx mirzo qal'aning bir chetida, daryoning baland qirgʻogʻi ustida, jar labida turgan kabutarxonaga qarab yoʻl oldi. Otliq choparlar dom-daraksiz ketganliklari uchun Mirzo endi qanotlik «chopar»larini ishga solmoqchi edi.

Kabutarlarning don va suvlariga qarayotgan kabutarbonlar podshohni yaqin kelib qolganda koʻrdilar-u shosha-pisha ta'zimga chiqdilar. Mirzo otini toʻxtatdi. Orqadagi mulozimlardan ikkitasi – rikobdor¹ bilan jilovdor tez otdan tushdilar. Biri Mirzo mingan qora qashqa otning oltin jilovidan, ikkinchisi kumush uzangisidan tutdi. Mirzo kattagina qorin qoʻygan semiz odam edi, otdan ehtiyot bilan sekin tushdi. Margʻilon va Qoʻqonga uchadigan maxsus kabutarlar keltirildi. Naycha qilingan qisqa xatlar ularning qanotlari tagiga mahkamlandi. Umarshayx mirzo kabutarlarni oʻz qoʻli bilan uchirishni yaxshi koʻrar edi. U havorang chiniy kabutarni qoʻliga olib, yogʻoch zina bilan kabutarxonaning tomiga chiqdi.

Tomdan atrof juda yaxshi koʻrinar edi. Uzoqdagi togʻ ortidan quyosh jimgina koʻtarilib kelar, pastda shovullayotgan daryoning toʻlqinlari nafis jilolanib turar, gʻir-gʻir esayotgan ertalabki shabada ipakday mayin tuyilar edi. Umarshayx mirzo tom tepasida turib, oʻzi mustahkamlatgan va poytaxtga aylantirgan Axsiga koʻz yugurtirib chiqdi. Qoʻrgʻonning qoʻl yetmas balandlikka qurilganidan va atrofi chuqur oʻngirlar bilan ihota qilinganidan alohida bir mamnuniyat sezdi. «Hali bu jarlarga qanchadan-qancha yogʻiylarim qulagay», degan oʻy koʻnglini shod qildi.

Biroq bu bahaybat oʻngirlar oyoq ostidagi zaminni ichdan hilviratib qoʻyganini, kabutarxona ortidagi

¹ Rikobdor – uzangichi.

jarning tagini suv oʻyib ketganini, yer oʻpirilgudek boʻlib turganini Mirzo ham, uning atrofidagi mulozimlar ham mutlago sezmas edilar. Tuprogʻi toʻkilib, qulashga bahona topolmay turgan jarning qa'rida xatarli bir sharpa borligini hozir faqat kabutarlar sezayotgan boʻlsa ehtimol. Chiroyli toʻrlar va ozoda kataklar ichida o'tirgan bu jonivorlar bugun kechasi negadir juda bezovtalanib, patir-patir qilib chiqishdi. Hozir ham ular don-suvga qaramay, nuqul tashqariga intilishar, katak chiviqlarini asabiy choʻqishar edi. Kabutarbonlar buning sababini tushunmay hayron edilar. Faqat Umarshayx mirzoning qoʻlidagi chiniy kabutar katakdagi xatardan gutulganday osoyishta boʻlib qolgan edi. Hozir butun olam Umarshayx mirzoga mana shu kabutarday ma'sum va osuda tuyildi. U tom oʻrtasiga borib, kabutarning mayin ganotini vuziga bosdi. Uni uchirishdan oldin:

- Margʻilonga uch, qanotli choparim! - deb shivirladi.

Tagidan nurab turgan jar shu asnoda birdan oʻpirildi.

Kabutarlar qoʻnadigan ayri yogʻoch «shaq» etib pastga uchib ketdi. Odamlar nima boʻlayotganini tushunib ulgurmaslaridan kabutarxonaning narigi devori jar bilan birga oʻngirga qulab, tomni ham tortib ketdi. Tomning oʻrtasida turgan Umarshayx mirzo changtoʻzon ichida qattiq bir chayqaldi-yu, gandiraklab yiqildi. Uning jon achchigʻida qichqirgani vahimali qarsillash va gursillashlarga qoʻshilib eshitildi. U yiqilib tushayotganda qoʻlidagi kabutarni qoʻyib yuborgan edi. Chiniy kabutar chang-toʻzon orasidan yulqinib chiqib, osmonga qarab otildi. Mirzoning oʻzi esa tom yogʻochlariga, somon suvoqlariga, jar tuproqlariga aralashib, uch terak boʻyi pastga qulab ketdi.

Mirzoning ketidan tomga endi chiqqan kabutarbon zinapoyadan oʻzini yerga otdi. Mulozimlar va qoʻrchilar

kutilmagan falokatdan vahimaga tushib orqaga qochdilar. Otlar hurkib, noʻxtalarini uzgudek siltanishar va kishnashardi.

Hazrati oliyni xavf-xatardan asraymiz, deb yurgan qoʻrchilar avval nima boʻlganini fahmlay olmay esankirab qoldilar. Keyin ular jar oʻpirilganini fahmladilar, lekin Mirzoning oldiga tezda yetib bora olmadilar. Chunki bosh aylanadigan balandlikdan pastga tushib boʻlmas, nurab turgan jar labiga odam borsa yana oʻpirilishi mumkin edi. Qoʻrchilar va mulozimlar qal'adan ot choptirib chiqib, Mirzo qulab ketgan jar etagiga yetib borgunlaricha, soʻng uyilib yotgan tuproq, kesak va yogʻochlar orasidan uni topib, kavlab olgunlaricha oʻn jonidan biri ham qolmagan edi.

Uning jasadini arkka kiritib yuvdilar. Majaqlanib, tanib boʻlmas holatga kelgan yuzini oq shohi bilan yopib qoʻydilar. Bugun ertalab Umarshayx mirzo saharlik yegan tanobiyda Qorakoʻz begim Qutlugʻ Nigor xonimni quchoqlab, uvvos tortib yigʻlar edi.

- Men sabab boʻldim, xonim aya! Hazratimni men nechun uygʻotdim?! Uygʻotmasam oʻsha joyga kechroq borar edilar-ku! Men yuzi qora sabab boʻldim bu oʻlimga! Men! Bugun saharlik paytida Mirzo xuddi oʻlishini bilganday vasiyat qilganini eslab, Qutlugʻ Nigor xonim ham oʻzini yigʻidan tutolmas edi.
- E, voh, rahmatlik kuni bitganini qanday bilgan ekan-a?! Shunday gaplarni aytdilar...

Qorakoʻz begim xonimning quchogʻidan chiqib, kichkina mushti bilan chakkasiga urdi.

– Men hali tugʻilmagan farzandimni otasidan judo qildim, xonim aya! – deb oʻrtanib shivirladi: – Boʻyimda boʻlganini shu kecha bilib edilar! «Oʻgʻil boʻlsin!» – deb orzu qilib edilar! Endi bu bolaga otasini qaydan topamiz?! Qaydan topamiz?! Men hazratimni nechun uygʻotdim, xonim aya? U kishiga kelgan ajal meni olsa boʻlmasmidi? Oʻsha jardan men qulasam boʻlmasmidi?

- Undoq demang, jonim! Biz ham endi jar labida qoldik! Butun atrofimiz tahlikali jar!

Qutlugʻ Nigor xonim erining kutilmagan oʻlimida qandaydir sirli bir ma'no borligini hozir tiliga kelgan shu soʻzlardan sezdi. Umarshayx mirzodek jangovar odam qonli urushlarda qilich chopib yurganda oʻlmasdan, jardan qulab oʻlgani tasodifmikin? Mirzoning ota-bobolari barpo etib ketgan davlat mana shunday baland jarlar labiga qurilgan binolarga oʻxshamasmikin? Parcha-parcha boʻlib ketgan va oʻzaro urushlarda yemirilayotgan ulkan davlat Qutlugʻ Nigor xonim tasavvurida jarga qulab tushayotgan oʻsha binolarga oʻxshab koʻrindi-yu, vujudini seskantirib yubordi. Axir uning yolgʻiz oʻgʻli, suyukli farzandi Bobur ham mana shu binolarning birida istiqomat qilmayaptimi? Otasini olib ketgan oʻpirilishlar Boburning boshiga ham tushmasmikin?!

– Yoʻq, yoʻq! Tangrim uni panohida asrasin! Men boray, begim, Andijonga chopar yuboray! Bobur mirzoni bu falokatlardan ogoh qilay!

Qutlugʻ Nigor xonim koʻz yoshlarini artib, oʻz xonasiga chiqdi va eng ishongan amirlaridan Qosimbekni chaqirtirdi. Uni topib kelgunlaricha Andijon chorbogʻida Bobur bilan birga turgan onasi Eson Davlat begimning nomiga maktub yozdi.

Fotima Sulton begimning topshirigʻi bilan Andijonga yashirincha joʻnagan Ahmad Tanbal bu orada Sirdaryo koʻprigidan oʻtib, Bandi Solor yoʻli bilan ancha joyga borib qolgan edi. Koʻzga tashlanmaslik uchun bittagina navkar ergashtirib ketayotgan Ahmad Tanbal kecha Andijondan oltmishta navkar bilan kelgan edi. Bugun Fotima Sulton unga katta va'dalar berdi. Agar Ahmad Tanbal Andijondagi sodiq beklarning boshini qovushtirib, Boburni chetlatsa-yu, taxtga Jahongir mirzoni oʻtqazsa, marra uniki. Ahmad tanbal Umarshayx mirzo saroyida ikkinchi darajali beklar

qatorida shuncha yil koʻngli choʻkib yurdi. Endi bas! Jahongir mirzo podshoh boʻlsa, Ahmad Tanbal uning eng birinchi vaziriga aylanadi. Norasida podshohga vazir boʻlish esa podshoh boʻlish bilan barobar! Ana unda qayoqdagi musavvirdan Xonzoda begimning suratini soʻrab yurmaydi. U Xonzoda begimning oʻzini oladi! Mana shu orzu bilan Andijonga ot surib borayotgan Ahmad Tanbal orqaga oʻgʻrincha oʻgirilib qarab qoʻydi.

Bandi Solor yoʻlida boshqa hech kim koʻrinmas edi. Oradan bir necha soatlar oʻtib, Ahmad Tanbal koʻzga koʻrinmay ketganidan keyin Axsidan Qosimbek qavchin toʻrt nafar navkari bilan ot choptirib chiqdi. U ham tezroq Andijonga yetib borishga intilar, Bobur mirzoning tarafdorlarini yigʻib, uni taxtga oʻtqazish ishtiyoqi bilan yonar edi.

ANDIJON

GUL VA QUYUN

1

Choparlar hali yoʻlda. Urush toʻpoloni Andijonga yetib kelganicha yoʻq. Shaharning shimolidagi koʻrkam chorbogʻ baland devor bilan oʻralgan, darvozalarga soqchilar qoʻyilgan. Chorbogʻ ichida oʻn ikki yoshlik Bobur mirzo chavandozlik mashqlari oʻtkazmoqda. U chorbogʻ chetidagi yalanglikdan boʻz otni choptirib chiqdi-yu, birdan jilovni qoʻyib yubordi. Kamonga chapdastlik bilan oʻq oʻrnatdi va chopib borayotgan ot ustidan nishonga otdi. Yoy oʻqi nishon yogʻochiga «taq» etib urilgani baralla eshitildi.

Bir toʻp otliqlar mashqni chinor soyasida turib kuzatmoqda edilar. Qora otliq Mazidbek nishonga birinchi boʻlib yaqinlashdi. U Boburning bek atkasi¹ edi. Bobur otini qaytarib kelayotganda, Mazidbek unga:

– Moʻljalni andak balandroq olibsiz, ammo zarbingiz behad yaxshi, – dedi.

Mazidbek sopiga sadaf qadalgan yoy oʻqini nishondan avaylab sugʻurib oldi-da, qanchalik chuqur botganini barmogʻi bilan oʻlchab koʻrdi:

– Bilagingizda kuch koʻp, amirzodam! Sherpanjasiz. Podshoh hazratlari sizni Bobur deb ataganlari bejiz emas. Bobur arabcha sher demakdir!

Bobur mirzoning navkarlari, yaroqbardor, tengdoshkoʻkaldosh² mulozimlari ham nishon atrofiga yigʻil-

¹ Bek atka – hali balogʻatga yetmagan mirzolarga homiylik qilish uchun podshoh tomonidan tayin etiladigan mas'ul bek.

² Koʻkaldosh – bir onani emgan bolalar.

dilar. Ular Boburning hali yosh oʻspirin ekanini, qoʻlidagi kamoni boʻyi-bastiga mos qilib kichraytirib ishlanganini bilar edilar. Shuni oʻylab, Bobur maqtovni oʻziga olgisi kelmadi.

- Sherpanja deb otamni aytsinlar. Men koʻrganmen, zarblari bundan oʻn hissa ortiq. Musht ursalar, eng zoʻr yigitni ham yiqiturlar.
- Kamina ham aytmoqchi edimki, amirzodamning sherpanjaliklari podshoh otangizga tortganligingizdan nishonadir!

Mazidbek gapni mohirlik bilan burganini sezib, Bobur kulib qoʻydi. Uning mayin sargʻish tukli peshonasida, yuqori labining ustida ter rezalari yiltirardi.

– Kun isidi, amirzodam. Yoz ramazoni tinkani quritur. Iftorgacha toliqib qolmasinlar. Endi borib, salqinda mutolaa qilsinlar. Kamina Andijon qoʻrgʻonini mudofaaga tayyorlash bilan band boʻlurmen.

Bobur mulozimlari bilan mashq maydonidan chiqayotganida, koʻnglida yangi bir istak uygʻonib, koʻzlari shoʻx yiltiradi. U otini toʻxtatib, orqasiga oʻgirildi va jiyron qashqa ot mingan navkarni yoniga chaqirdi. Navkar yondashganda, qoʻlini choʻzib, otining egarini silkitib koʻrdi. Egar mahkam urilgan edi. Bobur navkarga ellik qadamcha nariga borishni, otdan tushib, jilovidan sekin yetaklab ketaverishni buyurdi.

Mulozimlar orasida eng e'tiborlisi Boburning opasi bilan bir onani emib oʻsgan oʻn etti yoshlik Noʻyon Koʻkaldosh edi. Mazidbek yoʻqligida Boburni ehtiyot qilish Noʻyonga topshirilgan edi. Noʻyon Boburning nima qilmoqchi ekanini fahmlab, bezovtalandi:

- Amirzodam, hozirgina bir mashqdan chiqdingiz. Boshqa mushkul mashqlarni ertaga qoldiring.
- Xoʻp, mushkuli ertaga qolsin, hozir osonini koʻraylik, kulib dedi Bobur.

Navkar aytilgan joyga borib, otdan tushdi va jiyron qashqasini sekin yetakladi. Bobur boʻz otni choptirib borib, navkarga yetganda oyoqlarini uzangidan boʻshatdi, qamchini tishiga oldi. Boʻz ot jiyron qashqa bilan jips kelgan zahoti Bobur boʻy choʻzib, narigi otning egaridan ikki qoʻllab ushladi-yu, bor kuchi bilan egardan-egarga sakradi.

Biroq navkarning oti sakrash zarbidan choʻchib, hurkib ketdi. Boburning xipcha gavdasi bir lahza havoda muallaq boʻlib qoldi, keyin pastga tushib ketdi. Oyoqlari yerga «tap» etib urildi. Ammo u qoʻllarini egardan boʻshatmadi – boʻshatsa yomon yiqilishini sezib, jon-jahdi bilan yopishdi. Bilaklari chindan ham kuchli ekan, shunday ogʻirlikka bardosh berdi. Faqat navkar otini toʻxtatib olguncha Boburning oyoqlari yerni tirnab, sudralib bordi-yu, bejirim ipak sallasi boshidan uchib ketdi.

Noʻyon Koʻkaldosh yordamga yetib kelganda, Bobur oʻzini oʻnglab oyoqda turar, biroq rangi juda oqarib ketgan edi. Noʻyon otdan sakrab tushdi va Boburga sallasini olib bermoqchi boʻldi. Ammo Bobur tuproqqa tushgan sallaga qaragisi ham kelmadi. Qamchi hamon tishida edi, uni qoʻliga oldi, navkar yetaklab kelgan boʻz otga indamay mindi. Soʻng otiga qamchi bosib, chorbogʻ daraxtlari orasidan ot choptirib ketdi.

Noʻyon uning ketidan vahima bilan tikilganicha qoldi. Hamma yoq dov-daraxt, ariq. Otliqlar yuradigan katta yoʻl chorbogʻning narigi chetidan oʻtadi. Bobur esa toʻgʻriga ketgan tor soʻqmoqdan, qalin daraxtlar orasidan yelday uchib boryapti! Ot ariqdan sakrab oʻtayotganda Boburning boshi ariq boʻyida oʻsgan oʻrikning katta bir shoxiga uriladigan edi. Ammo u otning boʻynini quchoqlab, pastga shunday egildiki, oʻrik novdalari orqasini ishqalab oʻtdi. Pishgan oʻriklardan bir qanchasi uzilib, ariqdagi suvga «choʻlp-choʻlp» etib tushdi.

– Sen nega otni mahkam tutmading, avbosh! – deb Noʻyon navkarni soʻkdi. – Hammamiz amirzodaning qahriga qoldik! Bizdan xafa boʻlib ketdilar!

Bobur bogʻ toʻridagi muhtasham koʻshk oldiga borib, otini toʻxtatdi. Xizmatkorlaridan biri shoshilib kelib, otning jilovidan olar ekan, Boburning yolgʻiz va bosh yalang qaytganidan taajjubga tushdi. Koʻshkda Boburning buvisi Eson Davlat begim uni kutib oʻtirgan boʻlsa kerak. Agar hozir u Boburning qay ahvolda qaytganini koʻrsa-yu, nimalar boʻlganini bilsa, mulozimlar ham, navkarlar ham jazo olishi aniq. Chunki podshoh hazratlari Boburni koʻz qorachigʻiday asrashni Eson Davlat begimga topshirib, chorbogʻ va qasrni hamma xizmatkorlari bilan uning ixtiyoriga berib qoʻygan.

Mulozim va navkarlar qoʻrqa-pisa koʻshkka yaqinlashayotganlarida, marmar hovuzdan beridagi behi shoxiga qantarib qoʻyilgan boʻz otga koʻzlari tushdi. Bobur hovuz boʻyidagi tillakori shiyponga kirganini sezishib, shu yerda sekin otdan tushdilar. Noʻyon Koʻkaldosh Bobur sallasini changdan tozalab, qoʻlida avaylab olib kelmoqda edi. Shu payt shiypon ichidan boshiga boʻrk kiygan Bobur chiqdi. Oti hurkkan navkar oʻzini Boburning oyogʻi tagiga tashlab, uzr soʻrashga chogʻlandi.

Noʻyon Koʻkaldosh sallani nodir sovgʻaga oʻxshatib avaylab koʻtarib kelayotgani Boburga birdan juda kulgili tuyildi. Undan qahrli dashnom kutib bosh egib turganlar toʻsatdan kulgi tovushini eshitib, hayrat bilan bosh koʻtardilar. Bobur bolalarcha zavq bilan gavdasini orqaga tashlab, xandon urib kular edi. Noʻyon Koʻkaldosh ham qoʻlidagi sallaga endi boshqacha koʻz bilan qaradi va kulib yubordi. Boshqalar ham yelkalaridan togʻ qulab tushganday yayrab kular va jilmayar edi. Bobur kulgidan toʻxtab, oti hurkkan navkarga yuzlandi:

- Sizda ayb yoʻq edi...

Navkar undan katta bir in'om olganday astoydil minnatdor boʻlib, ta'zim qildi. Bobur Noʻyonga tayinladi:

- Katta onam bilmasinlar.
- Muddaomiz oʻzi shu, amirzodam, kuldi Noʻyon va boshqa mulozimlarga sirdoshlarcha koʻz qisib qoʻydi.

Shunday paytda koʻkaldosh va tengdoshlar oʻzlarini taxt vorisiga xizmat qilib yurgan yosh mulozimlar deb emas, uning sirlariga sherik boʻlgan yaqin doʻstlar deb bilishar va bundan koʻngillari oʻsib, Boburga mehrlari oshar edi.

Koʻshkdan chiqib kelgan savdar Bobur qarshisida qoʻl qovushtirib, ichkarida mudarris uni kutib oʻtirganini aytdi. Bobur bugun shariat ilmidan dars olishi kerakligini esladi va tengdoshlaridan istaristamas ajralib, koʻshkka yoʻnaldi.

Eshiklari nafis oʻvmakorliklar bilan bezangan. ichidagi oltin-kumush buyumlar koʻzni qamashtiradigan koʻshkda hozir Boburni faqat bitta xona oʻziga tortar edi. Mudarrisning kutib o'tirganiga qaramay, Bobur yaxshi koʻrgan kitoblari qoʻyilgan shu xonaga burildi. Baxmal va charm muqovalar ichidan sahifalarga bitilgan satrlarda ulugʻ shoirlarning otash nafaslari sezilib turganday bo'ladi. Bobur Firdavsiydan, Sa'diydan minglab baytlarni yod biladi. Hozir u kitoblari orasidan «Xamsa»ni olar ekan, uzoq Hirotda yashayotgan Alisher Navoiyni xayol koʻzi bilan koʻrib turganday boʻldi. Hirotda ta'lim olib kelgan andijonlik me'mor mulla Fazliddin mana shu ko'shk va marmar hovuzli tillakori shiyponni qurgan paytlarida yosh Boburga Navoiy haqida juda koʻp ajoyib hikoyalar aytib bergan edi. Me'mor Hirotdan Alisher Navoiyning Behzod chizgan rasmidan yaxshi bir nusxa koʻchirtirib kelgan edi. Bobur ham Navoiyga ixlosmand ekanini sezgan me'mor unga mana shu rasmni in'om qilgan

edi. Bobur «Farhod va Shirin» dostoni qatidan shu rasmni oldi-yu, shariat ilmiga oid daftarining ichiga soldi. Soʻng mudarris oʻtirgan xonaga chiqdi.

Oppoq soqoli koʻkragini qoplab yotgan, katta oq salla oʻragan qoshlari oʻsiq keksa mudarris darsxona toʻrida, banoras koʻrpacha ustida oʻltirib, Qur'ondan qiroat bilan suralar oʻqigach, fors tilida fiqh¹ ilmining qonunlarini tushuntirishga kirishdi. Bobur arabfors tillarini yaxshi oʻrgangan, Qur'on suralarining koʻpini yod bilar, ma'nosini ham tushunar edi, fiqh ilmining ba'zi nuqtalariga qiziqar ham edi-yu, ammo hozir shu daqiqalarda uning koʻz oldidan Suhrob va Farhodlarning qahramonona ishlari suron solib oʻtmoqda edi. Chorbogʻdagi mashqlar paytida tanasiga sigʻmay avjlanib ketgan shoʻx, bebosh bir kuch hali ham qalbini junbishga keltirib turibdi.

Unga yod boʻlib qolgan sevimli baytlar goh turkiy, goh forsiy ohanglarda mudarris qiroatini yorib oʻtib, xayolida jaranglab eshitila boshladi:

«Qoshi yosinmu deyin, koʻzi qarosinmu deyin?» «Zi mardoni jahon mardi biyomuz!»²

Yod boʻlib qolgan bu satrlar xayolidan oʻtayotganda, Bobur daftari orasiga solingan suratni mudarrisga koʻrsatmaslikka urinib, sekin oldi. Koʻzlaridan ilhom va mehr yogʻilayotgan Navoiy uzun qora chakmon kiygan, ingichka hassaga suyangan. Uning butun qiyofasi yaxshilik istab kelgan har bir kishiga katta yaxshiliklar qila olishidan dalolat beradi. Bobur suratga qarab turib oʻzicha soʻradi: «Ulugʻ amir, nasib qilsa, huzuringizga borsam, yoʻlimda Axraman-u ajdaho uchrasa, Farhodingizday hammasini yengib

¹ Fiqh – musulmon qonunshunosligi.

 $^{^2}$ «Zi mardoni jahon mardi biyomuz!» – «Mardlikni jahon mardlaridan oʻrgan».

oʻtsam. Oʻshanda siz menga... she'riyat tilsimini ochgʻuvchi kalit berurmisiz?»

Mudarris qiroat bilan uqtirayotgan darslari behuda ketayotganini birdan sezib qoldi, sekin oʻrnidan turdida, Boburning yoniga keldi. Bobur suratni yashirishga ulgurolmadi.

- Odam surati? shiddat bilan soʻradi mudarris. Siz Qur'oni sharifdan saboq eshitish oʻrniga, shariat qat'iyan man etgan suratkashlik bilan mashgʻulmisiz.
- Mudarris janoblari, bu suratni men chizgan emasmen. Buni menga Hirotdin keltirmishlar. Bu ulugʻ zot – Amir Alisher.

Mudarris Navoiyni shoir deb eshitgan, asarlarini hali oʻqimagan edi.

- Odam suratini tarqatmoq - shayton-u layinning ishi! Qani bu suratni menga bering, mirzom! Bering!

Mudarrisning qahrli vajohati suratni yirtib tashlashdan ham toymasligini koʻrsatar edi. Shuning uchun Bobur suratni bermay turib oldi. Mudarrisning gʻazabi keldi-yu, ammo taxt vorisiga qattiq gapirishdan qoʻrqdi. Boburdan xafa boʻlib, Eson Davlat begimga shikoyat qilgani ketdi.

Ellik besh yoshlardagi salobatli kampir sidirgʻa oq atlas koʻylagini shitirlatib, darsxonaga kirib kelayotganda, Bobur darhol oʻrnidan turib, buvisiga salom berdi. Eson Davlat begim suratni qoʻliga oldi va Navoiy tasviriga beixtiyor qiziqib:

- Yuzlarida farishtalari bor zot ekanlar, deb qoʻydi. Soʻng harir dakanasining bir cheti bilan yuzini mudarrisdan toʻsib, unga yarim oʻgirilgan holda dedi: - Mudarris janoblari, bu surat Hirotda shariat peshvolarining ruxsatlari bilan chizilgan-ku.
- Meni ma'zur tuting, hazrat xonim, dedi eshik oldida qovoq solib yerga qarab turgan mudarris,
 ammo Hirotda shariat qonunlari buzilmishdir.
 Shialar ta'sirida chizilgan bu surat bizning pok

sunniy mazhabimizga mutlaqo toʻgʻri kelmaydi. Men taxt vorisini ogoh qilmoqchimanki, bizga Muhammad alayhissalom vasiyat qilgan chin musulmonlik alhol Xurosonda emas, Movarounnahrdadir!

Eson Davlat begim mudarris bilan mazhablar toʻgʻrisida bahslashib oʻtirishni istamadi.

Boburga yuzlanib:

- Mudarris janoblari bir jihatdan haqlar, dedi, fiqh darsida surat tomoshasi oʻrinsiz, azizim. Tangri inoyat qilsa, siz hukmdor boʻlib yurt soʻragaysiz. Shuning uchun fiqh qonunlarini boshidan-oxirigacha bilib oling. Suratni men olib ketay. Bobur suratni buvisidan bir nafasga soʻrab oldi-yu, avaylab kitob orasiga solib berdi.
- Ehtiyot qilingiz, sizga orzuyimni topshirdim, dedi.

Eson Davlat begim nevarasining soʻzlarini yoqtirib dedi:

- Balki Alisherbekni Andijonga taklif qilursiz.
- Kelurmikanlar? koʻzlari yonib soʻradi Bobur.
- Samarqandga kelganlar-ku, Fargʻona vodiysining ta'rifi olamga mashhur. Iloj topsalar, albatta kelurlar. Alisherbek nihoyatda pok, avliyotabiat odam, deb eshitganmiz. Oʻzlari kelsalar, mudarris janoblariga ham manzur boʻlishlari shubhasiz!

Mudarrisning endi sal chehrasi ochildi. Qaddini tiklab:

- Shoyad shunday bo'lsa! - deb qo'ydi.

Eson Davlat begim ularni ustalik bilan yarashtirganidan mamnun boʻlib, darsxonadan chiqdi.

Kun qiyomiga kelib, peshin namozi oʻqilgandan keyin koʻshkning ich-tashi jimjit boʻlib qoldi. Roʻzaning azobi endi bilina boshlagan, yoz kunida chanqab holsizlangan odamlar kunni qanday kech qilishni bilmay, betoqat boʻlishar edi. Koshona egalari salqin xonalarda jimgina yotib, uyqu bilan jon saqlashni odat qilganlar.

Bobur ham bugungi saboqlarini tugatib, oʻz xonasida yonboshlab yotibdi. Biroq boyagi shirin orzular hamon xayolini toʻlqinlantirib, koʻziga uyqu qoʻndirmaydi. U qogʻoz-qalam olib, she'r yozmoqchi boʻldi. Lekin hozir uning xayoliga yod boʻlib qolgan mashhur baytlardan boshqa she'r kelmas edi. Shunda u ikkinchi bir daftarni oldi-yu, Fargʻona vodiysi haqida bilganlarini oddiy nasr tariqasida yoza boshladi: «Girdo-girdi togʻlar, ovi qushi koʻp. Oq kiyikni Axsi choʻlida koʻrganbiz. Margʻilon yovugʻida ham bor». Bobur Fargʻona vodiysida nimayiki goʻzallik koʻrgan boʻlsa, hammasini yozgisi kelar edi. Keyin Hirotga Amir Alisherning huzuriga borganda, bu yozuvlari juda kerak boʻladiganga oʻxshardi.

U yozuvga berilib ketib, koʻshk oldigacha chopib kelgan otning dupurini eshitmadi. Birdan jimjit koʻshkning allaqaysi xonasida ayol kishining oʻrtanib yigʻlagani eshitildi. Bobur choʻchib boshini koʻtardi. Yigʻi tovushi Eson Davlat begimning xonalari tomondan kelmoqda edi. Bobur oʻrnidan sakrab turdi, takror eshitilgan alamli yigʻidan eti junjikib, buvisining xonasiga qarab yugurdi.

Eshik lang ochiq. Eson Davlat begimning roʻmoli boshidan tushib ketgan. U qizi Qutlugʻ Nigor xonim yuborgan xatni ochib oʻqimoqchi boʻladi, ammo yoshli koʻzlari hech narsani koʻrmaydi. Axsidan oʻlim xabarini olib kelgan Qosimbek devorga yelkasi bilan

majolsiz suyanib, oyoqlarida zoʻrgʻa turibdi. U sakson chaqirimlik yoʻlni otda dam olmay bosib oʻtgan va kipriklarigacha changga botgan edi.

Hozirgina gulday nafis tuygʻular ichida yurgan Boburga oʻlim xabari shu gul orasidan chiqqan ilon boʻlib tuyildi. U Qosimbekdan seskanganday rangi oʻchib, birdan orqaga tisarildi. Qosimbek esa unga intildi. Bobur qarshisida tiz choʻkib, boʻgʻiq va iltimoskorona ovoz bilan gapira boshladi:

– Mirzom!.. Tangri sizga quvvat bersin! Endi bizning pushti-panohimiz oʻzingizsiz! Ikki tarafimizni yogʻiy bosgan. Volidangiz tayinlab yubordilar. Darhol Andijon qoʻrgʻoniga borib, beklarni toʻplamoq kerak!

Eson Davlat begim qaygʻuga berilib, yigʻlab oʻtiradigan payt emasligini endi sezdi.

Qosimbekni oyoqqa turgʻizdi-da:

- Sadoqatingizdan minnatdormiz, - dedi. - Siz Bobur mirzo bilan birga otlaning! Biz ham endi chorbogʻdan qoʻrgʻonga koʻchamiz.

Mudhish xabar Boburni jimjit qilib qoʻydi. U karaxt bir ahvolda kiyindi, otiga mindi. Shu payt uning koʻziga yashnab turgan daraxtlar, suvi toʻla marmar hovuz allanechuk mungʻayib turganday koʻrindi. Bularning hammasini otasi bino qilgan edi. Endi u odam bu joylarga hech qachon kelmaydi. Ana u nashvatilarning koʻchatini Umarshayx mirzoning oʻzi oʻtqazdirgan edi. Hozir shular meva solgan, hademay pishadi. Ammo ularni ektirgan odam endi hech vaqt bu mevalardan tatib koʻrolmaydi.

Chorbogʻdan chiqib, tosh yoʻldan borayotganlarida, Bobur yana otasini esladi. Bu yoʻlga otasi toʻshatgan toshlar ham turibdi. Uzoqda koʻringan baland qoʻrgʻonni ham otasi qurdirgan edi. Hammasi butun, hammasi bor. Faqat uning oʻzi yoʻq. Bobur endi otasini umrbod koʻrolmasligini butun vujudi bilan his qildi-

yu, achchiq judolik tuygʻusi birdan uning borligʻini toʻldirib, koʻzlaridan yoqasiga yosh boʻlib tomdi.

Oldinda suv toʻldirilgan choh va oʻn bir paxsalik baland devor bilan oʻralgan Andijon qoʻrgʻoni koʻrindi. Ular Mirzo darvozasiga yaqinlashganlarida, ichkaridan besh-olti kishi ot choptirib chiqdi. Oldinda saman ot minib kelayotgan qisiq koʻzli moʻgʻultaxlit bek – Boburning onasiga qarindoshchiligi boʻlgan Sherim togʻoyi edi. U Boburning yuzida ogʻir musibat alomatini koʻrdi-yu, otdan sakrab tushdi, koʻziga yosh kelmasa ham hoʻngrab:

- Men ishonmagan edim, amirzodam! dedi. Pushti-panohimizdan ayrilganimiz rostmi? Oh, bevafo dunyo!
- Kimdan eshitdingiz? soʻradi Qosimbek. Bu xabar hozircha sir tutilmogʻi kerak edi!

Sherimbek yoqasini ushlab:

- Tangrining qudratini qarangki, - dedi, - bir aloqachi kabutarim osmonda uchib yurib birdan yoʻq boʻlib qoldi. «Kim uni tushirib oldi?» - deb tom ustiga chiqdim. Anchadan keyin kabutar oldimga kelib qoʻndi. Qanotining tagida bir qogʻoz koʻrindi. Olib qarasam - mana shu qaygʻuli xabar! Kim yozgan? Osmonda farishtalar yozib yubordimi, bilmadim!

Sherimbek Boburning egariga bir qoʻlini qoʻyib, yuzini unga yaqinlashtirdi-da, past tovush bilan:

- Mirzom, qoʻrgʻonga kirmangiz, xatarli, - dedi.

Bu soʻzlarni Qosimbek ham eshitdi. Umarshayx mirzo tirikligida durustroq lavozim ololmay koʻngli choʻkib yurgan Sherimbek endi Bobur mirzoga boshqalardan oldinroq mehr-u oqibat koʻrsatib, uning ishonchini qozonmoqchi va kattaroq martabaga erishmoqchi edi. Qosimbek buni sezib, Boburga osoyishta gapirdi:

- Amirzodam, ortiqcha tahlikaga oʻrin yoʻq. Tezroq qoʻrgʻonga kirib, sodiq beklarni toʻplaylik.

Sherimbek ot ustidagi Qosimbek bilan yerda turib soʻzlashishni oʻziga ep koʻrmadi. Shoshib otiga mindida, shiddat bilan dedi:

- Siz hali ahvolni bilmaysiz, janob Qosimbek! Sodiq beklaringiz Xoʻjandni yogʻiyga topshirdi! Isfarani topshirdi! Margʻilonni topshirdi!
 - Margʻilonni?! seskanib soʻradi Bobur. Qachon?
- Hozir xabar keldi! Yogʻiy moʻri malaxday yopirilib, Quvaga yaqinlashdi! Endi navbat Andijonga. Sodiq beklar Andijonga qoʻshib Mirzomni ham yogʻiyga bersinlarmi? Yoʻq! Men tirik boʻlsam, bunga yoʻl qoʻymaymen!

Ogʻir musibat ustiga qoʻshilgan bu shum xabarlar Boburni juda esankiratib qoʻydi. Oʻzi kuni bilan roʻza tutib, darmoni ketib borar, nihoyatda qattiq chanqaganligidan tili tanglayiga yopishib qolgandek tuyilar edi. Uning tashna koʻzlari qoʻrgʻon devori tagidagi xandaqqa toʻldirilgan qoramtir suvga tushdi. Turib qolgan shu qora suv ham unga allanechuk jozibali koʻrindi. U quruqlashgan lablarini namsiz tili bilan yalab qoʻydi.

Sherimbek dadil borib, Bobur mingan boʻz otning oltin bezakli yuganidan oldi:

- Men sodiq togʻoyingizmen, Mirzom, ijozat bering, sizni bu xatarlardan uzoqqa olib ketay!

Bobur Sherimbek aytayotgan xatarlarni hozir uncha oʻylamas va aniq his qilmas edi. Ammo uning qaygʻudan ezilgan koʻngli ham, tashnalikdan qiynalayotgan tani ham koʻz oldidagi bekik va dim qoʻrgʻondan koʻra, uzoqdagi daraxtzorlarni, keng, ochiq joylarni afzal koʻrardi. Shuning uchun Sherimbek uning otini orqaga burayotganda, Bobur qarshilik qilmadi. Qosimbek sarosima boʻlib:

- Mirzom, volidangizning tayinlaganlari boshqa edi! - dedi.

- Volidalari bu yerdagi ahvolni bilmaganlar! deb Boburning oʻrniga Sherimbek javob qildi. Ammo Qosimbek uning gapiga quloq solmay, Boburga yondashdi:
- Xonim hazratlari bugun dafn marosimini oʻtkazib, ertaga Andijonga kelurlar. Ulugʻonangiz ham chorbogʻdan qoʻrgʻonga koʻchmoqchi edilar. Ular sizni qayerdan topurlar?

Bobur endi sal xayolini yigʻib, Sherimbekdan soʻradi:

- Qayoqqa bormoqchimiz?

Sherimbek Qosimbekka eshittirmaslikka tirishib, Boburning qulogʻiga shivirladi:

- Olatogʻ tomonlarga. Oʻshga. Balki Oʻzganga. Bobur buni Qosimbekdan sir tutishni istamay, sekin unga aytdi:
 - O'sh yo'lida bo'lurmiz. Onamga xabar bering.
- Men avval qoʻrgʻondagi beklar bilan soʻzlashay, amirzodam! Ularning kayfiyatini bilay!
 - Undan koʻra, Xoʻja Abdullaga uchrang.
 - Bu amringizni darhol bajo keltirurmen!

Qosimbek otini qoʻrgʻon darvozasi tomonga burdi. Bobur esa yonidagi ellikka yaqin otliq bilan qoʻrgʻondan uzoqlashib keta boshladi.

3

Qoʻrgʻon ichidan darvozaxonaning tomiga chiqib olgan yapasqi bir navkar devor kungurasi orasidan ularni kuzatib turgan edi. Qosimbek Mirzo darvozasidan shitob bilan kirayotganda, bu navkar ham tomdan sekin tushdi-yu, devor oldiga bogʻlab qoʻyilgan otni minib, xoʻjayini Ahmad Tanbal kutib turgan joyga qarab ketdi.

Mevalari gʻarq pishgan katta bogʻning toʻrida marmar gumbazli hammom bor edi. Bogʻ egasi

Yoqubbek yozning issiq kunlarida shu hammomning mehmonxonaga oʻxshatib bezatilgan salqin bir xonasida dam olar edi. Asl gilamlar toʻshalgan bu xonaning toʻrida hozir Ahmad Tanbal oʻtiribdi. U kumush bilan bezatilgan qimiz kadidan jiyda gulli piyolaga qimiz quyib, sipqordi. Soʻng sargʻish moʻylovini kafti bilan artar ekan:

- Tangrim meni kechirsin, bugun roʻzani buzdim, dedi. Yoʻlda tashnalikdan tilim tanglayimga yopishib qoldi. Hushimdan ketib otdan yiqiladigan holatga keldim.
- Bugun sizga ravo, dedi Yoqubbek. Zarurast
 ma'zurast. Mushkul ishga bel bogʻlabsiz. Agar kushoyishi koringizni berib, taxt Jahongir mirzogʻa oʻtsa, siz uning eng ishongan rahnamosi boʻlursiz.

Ahmad Tanbal bu nurli istiqbolni koʻz oldiga keltirib, bir entikdi. Oldingi tishlaridan ikkitasi tushib ketgan semiz Yoqubbek unga sinovchan nazar bilan qarab turardi. Yoqubbekning nigohida «Mening bu xatarli ishga nechun bosh qoʻshayotganimni unutmasmikansen?» degan ma'no bor edi. Ahmad Tanbal sergaklandi:

- Bek janoblari, siz bilan biz asli moʻgʻul¹ urugʻidanmiz. Barloslarning Fargʻona viloyatida shuncha vaqt hukm surganlari yetar. Endi navbat bizniki. Men sizni moʻgʻul beklarining eng ulugʻi deb bilurmen. Tangri omad berib, agar men taxt vorisiga rahnamo boʻlsam, oʻshanda ham menga siz rahnamolik qilgʻaysiz!
- Inshoollo! deb Yoqubbek mamnun yuz bilan kalta soqolini silab qoʻydi. Qani, Ahmadbek, chanqoq bosilgandan soʻng ochlik bilinadir. Yaxna goʻshtdin totining.

 $^{^{\}rm 1}$ Moʻgʻul – bu yerda gap oʻzbeklashgan moʻgʻullar haqida boradi.

Ahmad Tanbal chinni lagandagi goʻshtga endi qoʻl uzatganda, eshik sekin ochildi. Ahmad Tanbal laganni bir chetga surib, eshikka qadalib qaradi. Boyagi yapasqi navkar xoʻjayinining tinchini buzgani uchun uzr soʻraganday boʻsagʻadan narida turib, ta'zim qildi:

– Bek janoblari, sevinchi bering! – dedi. – Bobur mirzo qoʻrgʻonga kirmay qaytib ketdilar. – Ayni muddao!

Ahmad Tanbal uchun bu chindan ham quvonchli xabar edi. Charm hamyonidan bitta oltin tanga olib, boʻsagʻa oldiga tashladi. Yapasqi navkar tangani shosha-pisha olib, ikki bukilib rahmat aytdi. Soʻng Ahmad Tanbalning ishorasi bilan eshikni sekin yopib, orqaga chekindi.

Axsidan Andijonga kelib toʻgʻri Yoqubbeknikiga tushgan Ahmad Tanbal podshohning oʻlimi haqidagi xabarni eng avval Sherim togʻoyiga yetkazdirgan edi. Uning hovliqma fe'lini qoʻzgʻatib, oʻzi panada qolish uchun imzosiz xatni kabutar yordamida osmondan tushirtirgan edi.

- Maslahatingiz bilan tuzilgan reja sharofatli chiqdi!dedi Ahmad Tanbal uy egasiga mamnun koʻz tashlab.
- Ha, Sherimbek endi jiyanini xavf-xatardan yaxshilab «xalos qilur». Uning eng nufuzli bekiga aylanish uchun Olatogʻdan ham oshur.
- Endi biz Boburning xatardan qoʻrqib qochganini xaloyiqning qulogʻiga yetkazmogʻimiz kerak. Bobur shunday paytda ota yurti Andijonni tashlab ketganini xalq bilsin, undan ixlosi qaytsin. Ana undan soʻng Jahongir mirzoning taxtga oʻtirishiga hech bir monelik qolmas.

Yoqubbek soqolini tutamiga olib, bir lahza oʻylanib turdi-yu:

- Ovoza tarqatishning eng afzal joyi bozor, dedi.
- Mening savdogar mijozlarim bor.

- Ammo ovoza bizdan chiqqanini hech kim bilmasligi zarur!

- Xotirjam boʻlsinlar, janob Ahmadbek. Sir saqlashga qodirmiz...

* * *

Andijon aholisi dushman qoʻshinlari yaqinlashib kelayotganini eshitib, shu kunlarda juda xavfsirab yurar edi. Shuning ustiga: «Podshoh jardan yiqilib oʻlganmish, shaharni bugun yogʻiy bosar emish, Bobur mirzo qoʻrqib qochganmish», degan ovoza tarqaldi. Andijon rastalaridagi va timning tagidagi doʻkonlar savdo eng qizib turgan paytda birin-ketin yopila boshladi. Haligi ovozaning qayerdan chiqqanini hech kim aniq bilmas edi-yu, lekin xaloyiq unga bir-biridan vahimali tafsilotlar qoʻshar edi. Nihoyat, «Axsini ham yogʻiy bosganmish, yogʻiy podshoni jardan tashlab oʻldirganmish», degan gaplar ham paydo boʻldi. Xaloyiq orasida yuradigan xufiyalar dahshatli mish-mishlarni shahar hokimi – dorugʻaga yetkazish uchun arkka tomon shoshildilar.

Bu orada Qosimbek Bobur mirzoning ustozi Xoʻja Abdullani uyidan qidirib topgan, ular ikkovlashib arkdagi beklar oldiga chiqishgan edi. Xoʻja Abdulla ham, beklar ham podshohning oʻlimidan mutlaqo bexabar edilar. Bu xabarni Qosimbekdan eshitganlaridan keyin, urush xatari koʻzlariga yanada tahlikali koʻrindi, yomon oʻzgarishlar boʻlishini sezishib, sarosima boʻlib qolishdi. Buning ustiga bozorda dallol boʻlib yuradigan ishonchli bir xufiya kelib, xunuk ovozalardan hamma yoq toʻpolon boʻlib ketganini aytib berdi-yu, Uzun Hasan nomli novcha dorugʻa esankirab qoldi.

- Bizdan omad ketdi, janoblar! dedi yigʻlamsirab.
 Tashqarida gʻanim. Ichkarida toʻpolon. Bobur mirzo qoʻrgʻonga kirmay ketganlari bejiz emas!
- Biz ham jon saqlash uchun har qayonga tarqab qochsakmikin? kinoya bilan soʻradi Xoʻja Abdulla.

Oʻzi ham, soqol-moʻylovi ham qop-qora Xoʻja Abdulla katta olim boʻlishidan tashqari, Andijon beklarining eng nufuzli piri hisoblanar edi. Bobur mirzo ham uni oʻziga murshid sanab qoʻl bergan edi. Shuning uchun Uzun Hasan Xoʻja Abdullaning kinoyasiga qarshi keskin javob bera olmadi.

- Pirim, Bobur mirzo uzoqlashmasdan qaytarish zarur! dedi Qosimbek.
- Bobur mirzoning koʻngillari menga ayon, dedi Xoʻja Abdulla. - U oliy zot qoʻrqib qochgan emaslar. Beklarning sadoqatini bilmoq uchun shunday qilganlar. Bozordagi ovoza - fitnaning belgisi. Agar fitna boʻlmasa, podshohning qazo qilganini bizdan oldin bozordagilar qanday bilmishlar?

Uzun Hasan oʻzining aqli yetmagan bu mantiqli fikrga tan berdi. Boburning koʻnglida nima borligini Xoʻja Abdulla shu yerda turib bilganiga qoyil boʻldi. Xoʻja Abdulla uning koʻziga chinakam avliyo boʻlib koʻrindi:

- Pirimga hammasi ayon boʻlgan ekan! dedi u chuqur e'tiqod bilan. – Endi pirim nima desalar biz shunga shaymiz!
- Menga ayon boʻlgani shuki, dedi Xoʻja Abdulla ovozini pasaytirib, – agar bir tan-bir jon boʻlib, Bobur mirzoga xizmat qilsak, hammamiz omon qolurmiz, hech qaysimizning bir moʻyimiz kam boʻlmagʻay!

Xoʻja Abdullaning komil ishonch bilan aytgan bu soʻzlari Uzun Hasanni bir oz tahlikaga soldi. Agar ish Xoʻja Abdulla aytganday boʻlib chiqsa-yu, Bobur mirzo podshoh boʻlsa... unda Uzun Hasanning bugungi ikkilanishlari qanday oqibatga olib keladi? Uning

raqiblari bu ikkilanishlarni boʻlajak podshohga aytib, dorugʻalik amalini tortib olishlari mumkin emasmi? Yoʻq, Uzun Hasan bunga yoʻl qoʻymasligi kerak.

- Pirim, menga fotiha bering, Bobur mirzoning huzurlariga men oʻzim boray. Beklarning nomidan sadoqat izhor qilib, qoʻrgʻonga taklif etay!
- Niyatingiz tahsinga sazovor, janob Hasanbek. Ammo siz dorugʻasiz. Siz avval shahardagi gʻuluni bartaraf qiling, fitnaning uyasini toping, ana unda Bobur mirzoning inoyatlariga sazovor boʻlgʻaysiz.
- Yana karomat qildingiz, pirim! Biz zudlik bilan bu ishga kirishurmiz!

* * *

Yoz oftobi ver-u koʻkni shunday qizdirmoqdaki, ot tuyoqlaridan koʻtarilgan chang yuzga alanga tillaridek tegadi. Havo dim. «G'ir» etgan shamol yo'q. Tuprog'i bilgillab votgan tor koʻchadan oʻtavotganlarida, Boburni ter bosdi. U benihoya changaganligidan ogʻzi taxir boʻlib ketgan edi. Kecha shu paytlarda Andijonsoy boʻyida salqinlab yotgani esiga tushdi. Bundan bir necha soat oldingi hayoti, chorbogʻning musaffo havosi, zilol suvli hovuz, salgin koʻshk, betashvish damlar - hammasi birdan uzoq oʻtmishga aylangan edi. Nazarida, shiddatli bir quyun uni oʻsha mas'ud hayotdan yulib olib, allaqayoqlarga chirpirak qilib uchirib ketayotibdi. Ot tuyoqlaridan koʻtarilgan chang unga mana shu quyunning changidek tuyiladi. Uni otasidan judo qilgan, pushti-panohidan avirib, xavfxatarlar komiga tortgan mash'um bir kuch go'yo mana shu quyunning kuchi edi. Uni qoʻriqlab borayotgan ellik chogʻli otliqlar ham Boburga mana shu quyun ichida yurganday xira koʻrinardi. Roʻza tutib kuni bo'vi tuz totmaganligidan uning boshi aylanmoqda edi. Atrofidagi otliqlar toʻgʻri yurib borayotgan boʻlsalar ham, Boburning nazarida ularning hammasini oʻsha quyun chirmab aylantirayotganday boʻlardi.

Oʻzgan yoʻli bilan borib, Namozgohga yetganlarida, uzoqda qorli togʻlar koʻrindi. Bobur togʻ salqinini koʻzi bilan his qilganday boʻldi va oʻsha yerga tezroq yetib borgisi kelib, otining biqiniga niqtadi. Qaqroq lablarini qiyinlik bilan ochib, Sherimbekka:

- Tezroq! - dedi.

Sherimbek esa orqaga oʻgirilib qarab:

- Chopar bor! - dedi. - Toʻxtaylik.

Andijon beklari yuborgan chopar Xoʻja Abdullaning qoʻli bilan yozilgan maktubni Boburga topshirdi. Bobur oʻram qilib yuborilgan maktubning ipak bogʻichini uzib, yonida turgan Noʻyon Koʻkaldoshga berdi:

- Oʻqing.

Maktubda Andijon beklarining Boburga sadoqat bildirganlari aytilgan edi. Soʻz orasida yomon ovozalar tarqalayotgani, noma'lum fitnachilar «Bobur mirzo qoʻrqib qochdi», degan tuhmatni tarqatib, bunga elni ishontirmoqchi boʻlayotgani aytilgan edi.

- Men sizni ana oʻsha fitnachilardan ehtiyot qilgan edim, amirzodam! dedi Sherimbek Boburga. Hozir vaziyat yomon. Qoʻrgʻon igʻvoning uyasi. Qoʻrgʻonga qaytmang, amirzodam! Sodiq beklar boʻlsa ketingizdan kelsinlar!
- «Ota yurtini tashlab, qoʻrqib qochdi» bu ovoza ogʻizdan-ogʻizga oʻtib shaharma-shahar, qishloqma-qishloq tarqab ketishi mumkin!
- Yoʻq! dedi Bobur otini orqaga burib. Men qochmoqchi emasmen!
 - Amirzodam, bu hammasi igʻvo!
- Men buning igʻvoligini isbot qilurmen! Qayting hammangiz. Qoʻrgʻonga qayting!

Bobur orqaga burgan otining yuganini boʻshatdi-yu, sagʻrisiga qamchi urdi. Ot chopib borayotganda,

koʻkragiga shamol tegib, oʻzini bir oz yengil sezdi. Boyagi dahshatli quyun endi undan orqada – izmaiz yelib kelayotgan navkar va savdarlar orasida qolib ketganday boʻldi. Ular oftob ufqqa yaqinlashgan paytda Andijon qoʻrgʻoniga kirib keldilar. Kechqurun gavjum boʻladigan koʻchalar hozir allanechuk jimjit. Doʻkonlar yopiq. Hammayoq huvillagan. Butun shahar xavfxatardan qoʻrqib, biqinib turganga oʻxshardi.

Sherimbek oldinda borayotgan Boburni ehtiyot qilmoqchi boʻlib, navkarlariga «qurshab boring» ishorasini qildi. Oʻzi esa Boburning old tomoniga oʻta boshladi. Atrofini otliqlar oʻrab ola boshlaganda, Bobur yana quyunning ichiga tushib qolganday boʻgʻildi. Koʻz oʻngida yana otlar, odamlar chirpirak boʻlib aylanishga tushdi. Bobur yutoqib oldinga intildi, otini qamchilab, navkarlar qurshovini yorib chiqqanda yuziga shabada tegib, xiyol yengillashdi. Sherimbek yana oldinga intilib, Boburga yondashmoqchi boʻlganda Noʻyon Koʻkaldosh uning jilovidan mahkam ushladi:

- Bek janoblari, qoʻying, amirzodam oldinda borsinlar. Fuqaro taxt vorisini koʻrsin, koʻngli taskin topsin. Ana, tuynuklardan moʻralab turgan odamlar igʻvogarlarning gapi yolgʻonligiga amin boʻlsinlar!
- Fitnachilar biror teshikdan amirzodamni oʻqlasalar-chi?
 - Niyatni yaxshi qiling!

Bobur boshliq otliqlar arkka yaqinlashganlarida, ulkan darvozaning har ikki tavaqasi lang ochildi. Xoʻja Abdulla va bir toʻda beklar, mulozimlar Boburga peshvoz chiqdilar. Bobur otdan tushib, ustozi bilan koʻrishar ekan, birdan koʻngli yumshab, koʻzlariga yosh quyilib keldi. Xoʻja Abdulla rangi oʻchgan, lablari titrayotgan Boburni bagʻriga bosib, tasalli bergisi keldi, ammo beklar va navkarlar oldida taxt vorisini quchoqlash odobsizlik sanalishini oʻylab, oʻzini tutdi. U ham koʻziga yosh olib:

Kulfatda qoldik, amirzodam, musibatda qoldik!
dedi. – Endi bizning pushti-panohimiz oʻzingizsiz!

Mazidbek a'yonlar davrasidan bir-ikki qadam oldinga chiqdi. Oʻzining Boburga bek atka ekanini bildirib qoʻygisi kelib, Xoʻja Abdullaning gapini ogʻzidan oldi:

– Amirzodam, hamma beklar sizga sodiq xizmat qilishga tayyordurlar!

Bobur toʻplanib turgan beklarga koʻz tashlagan edi, ular hammasi Mazidbekning gapini tasdiqlab, qoʻllari koʻkraklarida, ta'zim ado qilishdi. Bobur tovushi titrab:

- Minnatdormen, - dedi.

U yana otlanib, ark darvozasidan kirayotganda orqadan Yoqubbek ham yetib kelib, beklar davrasiga qoʻshildi. U Bobur qaytganini eshitgan zahoti har qanday shubhadan xoli boʻlish uchun darhol otlanib, sadoqat izhor qilishga shoshilgan edi. Xoʻja Abdulla oʻngda, Mazidbek chapda yurib, Boburni ark toʻridagi qishlik qasrga boshlab keldilar.

Ilgari poytaxt Andijondaligida taxt mana shu qasrga oʻrnatilgan edi. Keyin poytaxt Axsiga koʻchirilgach, ustunlari oʻymakorliklar bilan bezatilgan marmar zinapoyali bu qasr avvalgi hashamatidan mahrum boʻlib, koʻrimsizlashib qolgan edi. Bugun Bobur kelishidan oldin Xoʻja Abdullaning farmoyishi bilan qasrning zinapoyalariga yana poyandoz toʻshaldi. Ilgari taxt qoʻyilgan shahnishinga turkman gilamlari va kimxob koʻrpachalar solinib, maxsus joy hozirlandi.

Bobur binafsharang poyandozga qadam qoʻyganda quruqshab ketgan tomogʻini hoʻllamoqchi boʻlib yutindi. Ammo ogʻzida nam yoʻqligidan tomogʻini allanarsa qirib oʻtganday boʻldi. Boʻlajak podshohga xizmat qilish uchun toʻplangan beklarning hech qaysisi Boburga hozir bir qultumgina suv kerakligini sezmas edi. Birda-yarim sezganlari ham shuncha

odamning oldida yosh podshohning roʻzasini ochirish musulmonchilikka toʻgʻri kelmaydi, deb bunday ishni qilishdan qoʻrqishar edi.

Hamma oʻltirgach, Xoʻja Abdulla Qur'on oʻqib, Axsida bugun dafn etilgan Umarshayx mirzoning arvohiga bagʻishladi. Bir necha kishi:

- Iloho joylari jannatdan boʻlsin! deb qoʻydi. Yana bir necha kishi Boburga yuzlanib, koʻngil soʻradi.
- Muhtaram beklar, davlatxohlar! deb gap boshladi Xoʻja Abdulla. Urush tashvishi boʻlmaganda, biz avval motam marosimini oʻtkazgan boʻlur edik. Eshitishimizcha, Axsida hazrati oliyni hurmatlariga yarasha ma'raka oʻtkazib qabrga qoʻyganlar. Andijonga yogʻiy yaqin kelib qolgan shu ogʻir kunda bizning avvalin mashvaratimiz davlatni yangi podshohga topshirmoq xususida boʻlgani ma'qul.

Mazidbekdan nariroqda semiz Yoqubbek oʻtirgan edi. U Xoʻja Abdullaning soʻzlarini hammadan oldin ilib ketdi:

- Dono tadbirni oʻrtaga soldingiz, pirim. Bandangizning fikricha, Zahiriddin Muhammad Bobur mirzoni qonuniy podshoh atab, muborak nomlarini xutbaga qoʻshib oʻqitmoq kerak! Bobur «yalt» etib Yoqubbekka qaradi. Uning ovozidagi mayinlik, vuzidagi havajon, hatto old tishlari tushib ketgan ogʻzining kemshikligi Boburga allanechuk yogimli tuyildi. Yoqubbekning eng nufuzli va qaysar moʻgʻul beklaridan ekanligini hamma bilardi. Faqat uning bundan bir necha soat oldin Boburga qarshi fitna uyushtirib yurgani oʻtirganlar uchun sir edi. Endi Yoqubbek mana shu sirni yaxshiroq bekitish uchun Boburga hammadan ortiq sadoqat bildirmoqda edi. Uning shu sir ochilib qolishidan iztirobga tushib, dardli va hayajonli koʻzlar bilan Boburga qarashi, undan najot kutganday boʻlib hayajonlanishi oʻzi qiynalib oʻtirgan Boburga gʻalati ta'sir qildi. Yoqubbek birinchi

boʻlib Boburni podshoh deb atagani yosh oʻspirinning oʻrtanib turgan qalbiga goʻyo sarin bir shabada boʻlib tegdi. Qachondir bir vaqt taxtga chiqish va shu yurgan hamma beklarga bosh boʻlib, gʻolibona janglar qilish Boburning eng kuchli orzularidan edi. Yoqubbekdan keyin gapirgan beklar ham birin-ketin Boburni podshoh deb tan olar ekanlar, uning mana shu orzusi bulut orasidan chiqqan toʻlin oyday charaqlab yuzaga chiqdi-yu, koʻnglini birdan yorishtirib yubordi. Boshiga tushgan musibat ham, ichini kuydirayotgan tashnalik ham xayolidan uzoqlashdi.

Shu payt eshikdan shahar dorugʻasi Uzun Hasan ta'zim qilib kirdi.

– Amirzodam! – dedi u entikib. – Qulingizni afv eting, sizni kutib ololmadim. Men Andijonda nomunosib gaplar tarqatgan fitnachilarni ovlash bilan band edim. Alhol, bir fitnachi arbobni tutib keltirdim.

Bobur beixtiyor oldinga intilib:

- Qaysi arbob? dedi. Kim u? Keltiring!
- Bajonidil, amirzodam! deb Uzun Hasan shoshilib, orqasiga qaytdi.

Hamma koʻzlar ochiq eshikka qadaldi. Yoqubbekning rangi «quv» oʻchdi. Nahotki Ahmad Tanbal qoʻlga tushgan boʻlsa? Unda sir ochiladi. Yoqubbek sarosima koʻzlar bilan darchani qidirib topdi. Darcha u oʻtirgan joydan ancha uzoq. Darchadan narida arkning oʻn paxsalik baland devori bor. Yoʻq, bu yerdan qochib qutulib boʻlmaydi! Yoqubbekni titroq bosdi...

Shu payt eshikdan narida yoʻgʻon bir ovoz:

- Qoʻlimni yeching, men gunohkor emasmen!
 degani eshitildi. Tovushidan Ahmad Tanbalga oʻxshamaydi. Oq shohi yaktak kiygan yoʻgʻon gavdalik boʻydor kishini ikki navkar ikki tomonidan mahkam tutib olib kirdi.
- E, bu Darvesh gov-ku! dedi Yoqubbek birdan yengil tortib.

Andijon miroblarining boshligʻi boʻlgan bu odam gardani juda goʻshtdor boʻlganligi uchun hoʻkizga oʻxshab boʻynini bir oz oldinga egib yurar, shuning uchun orgavoratdan uni «gov», deb atashar edi. Andijon Qoʻrgʻoniga toʻqqiz ariq suv kirsa ham, bogʻ-rogʻlarning koʻpligidan voz ovlarida suv vetishmavdi, amaldorlar oddiy fuqaroning navbatini ham olishga intilishardi. Shunday paytlarda Darvesh gov koʻpincha fuqaroning tomonini olar, beklarga navbati kelmaguncha suv bermas edi. «Bek boʻlsang, oʻzingga, Xudoning oldida hamma bandasi barobar!» – deb tap tortmay gapirganini koʻp odam eshitgan. Shu sababli beklar Darvesh govni yomon koʻrishar, ayniqsa dorugʻa Uzun Hasan koʻpdan beri unga kek saqlab yurardi. Qoʻli bogʻlogʻliq Darvesh gov Boburga va undan beriroqda oʻtirgan Xoʻja Abdullaga bosh egib, ta'zim qildi-yu:

– Adolat qiling, amirzodam! – dedi. – Men fitnachi emasmen, ustod! Bozorda bir yapasqi navkar menga aytdi: «Podshoh Axsida mast boʻlib jardan yiqilib oʻlibdir. Bobur mirzo yogʻiydan qoʻrqib, Olatogʻ tomonga qochibdir», dedi.

Boburning gʻashi kelib:

- Bo'hton bu! dedi.
- Boʻhtonligini men keyin bildim, amirzodam, meni afv qiling! deb Darvesh gov bir-ikki qadam beriga kelib, qoʻli orqasiga bogʻlangan holicha tiz choʻkdi: Tuhmatligiga bu yerda muborak yuzingizni koʻrib amin boʻldim. Ammo bozorda xaloyiq vahimaga tushib, toʻs-toʻpolon boʻlib qochganda, oʻzimni yoʻqotib qoʻydim. Bir odamni toʻxtatib: «Shundoq gaplarni eshitdim, nahotki rost boʻlsa?» deb soʻrayotganimda, dorugʻa janoblarining xufiyalari gapimni eshitib turgan ekanlar...
- Yoʻq, sen gap soʻrash bahonasi bilan bu qabih ovozani tarqatib yurganingda qoʻlga tushding!
 dedi Uzun Hasan.

- Kalomulloni bering, qasam ichamen!
- Kalomulloni ham xor qilmoqchi bu qasamxoʻr! dedi Yoqubbek Boburga yuzlanib: Amirzodam, agar bu mardak sadoqatli qulingiz boʻlganda, yomon ovoza tarqatgan oʻsha navkarni qoʻlidan tutib dorugʻaga topshirmasmidi? Vaholanki, bu oʻzi oʻsha ovozani boshqalarga aytgan, ya'ni igʻvo tarqatgan. Buni hozir oʻz tilidan ham eshitdik!

Darvesh gov hang-u mang boʻlib:

- Yo alhazar! - dedi.

Yoqubbek Boburga boyagidek muloyim koʻz tashlab, kemshik ogʻzini sodiq bir tabassum bilan ochdi:

– Amirzodam, sizning rahmatlik otangiz Darvesh govni miroblarga sardor qilib qoʻygan edilar. Otangizning inoyati bilan shunday martabaga erishgan bu gov endi hazrati oliyni muqaddas ramazon oyida mast boʻlib yiqilgan desa-ya! Bu qanday noinsoflik!

Boburning yosh qalbi bu mash'um ig'voga qarshi g'azab tuyg'usiga to'lib bormoqda edi. «Aldash uchun bola yaxshi!» o'ylandi Yoqubbek umid bilan. Ig'vo tarqatgan bu odam o'zining aybini jon-dili bilan Darvesh govga ag'darib, Boburni bunga ishontirishga butun kuchini sarflamoqda edi. Bu ishda Yoqubbek yolg'iz emas edi, beklarning ko'pchiligi Darvesh govni aybdor deb bilmoqda edilar.

- Igʻvo tarqatganini oʻzi boʻyniga oldi! dedi Yoqubbek.
- Tilidan tutilmishdir, jazosini berish darkor!
 deb Ali Do'stbek nomli badqovoq ko'sa bir kishi Yoqubbekning tarafini oldi.

Oʻychan oʻtirgan Qosimbek boya Sherimbek togʻoyining imzosiz xat keltirgan kabutar haqidagi gapini esladi-yu:

Balki yana taftish oʻtkazish lozimdir? - dedi.
 Unga Mazidbek e'tiroz qildi:

– Ortiqcha taftishlarga fursat qani? Yogʻiy Margʻilonni olib, Andijonga bostirib kelur. Qonli urush paytida elni vahimaga tushirgan, podshohning martabasiga raxna solmoqchi boʻlgan igʻvogarlarga rahm qilinmaydir!

- Siyosat uchun maydonda yasoqqa yetkazish kerak, toki boshqalarga ibrat boʻlsin! dedi Uzun Hasan.
- «Yasoqqa yetkazish» xaloyiq oldida boshini kesish degan gap edi.

Darvesh govning yuziga oʻlim sharpasi soya solib oʻtganday boʻldi. U tizzasi bilan yurib, Boburga yaqinlashar ekan, yigʻlab iltijo qildi:

- Amirzodam, men igʻvogar emasmen! Men igʻvogarlarning qurbonimen! Menga rahm qiling! Beshta yosh bolam bor! Noumid qilmang, amirzodam!

Darvesh gov, yoʻgʻon gavdasi silkinib, oʻkirib yigʻlar ekan, qoʻli bogʻliq boʻlgani uchun yuzini yashirolmas, koʻz yoshlari moshguruch soqoliga tomchilab oqib tushar edi.

Shunday katta yoshli odamning bunchalik kuyunib yigʻlagani Boburning qalbida koʻpirib turgan gʻazabni birdan bosdi. Uning Darvesh govga rahmi keldi-yu, ustozi Xoʻja Abdulladan «shu bechoraning qonidan keching!» – degan bir gapni kutdi.

Biroq Xoʻja Abdulla ogʻiz ochguncha boʻlmay, yana Yoqubbek gapirdi:

- Besh bolasi bor odam tilini tiyib yursa boʻlmasmidi!
- E, bu gov oʻzi haddidan oshgan! dedi Uzun Hasan. – Boʻlmasa, podshoh haqida igʻvo qilganlarning gapini eshitgan hamono ogʻziga urmasmidi! Yoki u haromnamaklarni bizga tutib bermasmidi!

Bir-birini inkor qiluvchi bu gaplar Boburning xayollarini chalkashtirib yubordi. Vujudini oʻrtayotgan tashnalik yangi bir kuch bilan qaytib keldi. Yuzlar, devorlar, gilamlar bir-biriga qoʻshilib, chaplashib, chirchir aylana boshladi. Darvesh govning yigʻlab gapirgan soʻzlari goʻyo uzoqdan eshitildi:

- Amirzodam! Adolat qiling! Men otangizning sodiq raiyatlaridanmen! Siz yoshsiz, begʻuborsiz. Siz hali bu beklarni bilmaysiz! Bularning menda keki bor! Beklarga ishonmang, amirzodam! Xalqdan soʻrang! Meni el-ulus biladi! Raiyat biladi!

Ali Do'stbek qo'lini mirobga paxsa qilib:

– Eshitdingizmi, amirzodam? – dedi. – Bu govning ichi qoraligini koʻrdingizmi?

Yoqubbek Bobur tomonga ta'zim bilan egilib, boyagiday mehribon tovush bilan tushuntirdi:

- Bu gov el-ulusni beklarga qarshi qoʻzgʻamoqchi, amirzodam. Yogʻiy hujumi paytida bariyat bilan raiyatning¹ orasiga nifoq solmoqchi!
- Niyati buzuqligi shundan ham ayon! dedi Uzun Hasan va navkarlarga qarab buyurdi. – Bas, olib chiq!

Boyagi ikki navkar Darvesh govni ikki qoʻltigʻidan olib, oʻrnidan turgʻizdi-da, kuch bilan eshikdan olib chiqa boshladi. Endi Boburdan ham umidini uzgan bandi:

– Men begunohmen! – deb qichqirdi. – Besh bolamning uvoli uradi sen beklarni! Mening begunoh qonim tutadi hammangni!

Bu qargʻish Boburning qalbiga oʻtkir tigʻday qadaldi. Uning qoʻl-oyoqlari titrab, oʻtirgan joyida koʻzi tina boshladi. Nazarida, boyagi quyun avvalgidan battar xuruj qilar, uni mana shu odamlarga qoʻshib chirmab aylantirar edi. Atrof koʻziga chang-toʻzon orasida qolib ketganday xira koʻrinar edi. U oʻtirgan joyida yiqilib ketmaslik uchun ikki qoʻlini ikki yoniga tiradi.

Darvesh govning qargʻishidan gʻazabi oshgan beklar endi uning oʻldirilishini yana ham qattiq turib, talab qildilar:

- Bu koʻrnamak yasoqqa yetmaguncha eldagi vahima bosilmaydir!

¹ Bariyat - bek va a'yonlar. Raiyat - fuqaro.

- Siyosat uchun bitta igʻvogarning boshini kesmoq zarur!

- Yasoq!
- Yasoq!

Boburning koʻz oldidan boyagi odamning soqoliga oqib tushgan koʻz yoshlari ketmas, qulogʻi tagida uning alamli qichqirigʻi hamon jaranglab turardi. Shu tirik odam murdaga aylanishi kerak. Bobur bunga farmon berishi kerak. Nechun? Beklar u odamni gunohkor deb Boburni ishontirgani uchunmi?

Balki bu beklar chindan ham Boburni aldayotgandir? Balki mana shunaqa beklar Axsida Umarshayx mirzoni jardan itarib yuborib oʻldirgandirlar? Balki bular ertaindin Boburning joniga ham qasd qilishar?

Birdan Boburning beg'am yurgan davri esiga tushdi. Kechagina u tengdosh oʻrtoglari bilan ot choptirib o'ynab yurmaganmidi? Alisher Navoiyning rasmiga tikilib, musaffo yoshlik xayollariga berilgani qachon edi? Oradan bir necha yil oʻtganga oʻxshaydi. Holbuki, shu bugun ertalab, shu bugun choshgohda uning hayoti quyoshli osmonday tiniq va sof edi-ku! Bu qora bulutlar uning atrofiga qayoqdan yopirilib keldi? «Yasoq!» - deb qichqirayotgan har darg'azab bek Boburdan quyoshni to'sib olgan bir qora bulutga oʻxshardi. Boburni chirmab aylantirayotgan dahshatli quyun mana shu qora bulutlarning shamoli emasmikan? Nahotki bu bulutlar doim toj-u taxt bilan birga yursa-yu, Darvesh govga oʻxshaganlarning qoniga shunchalik tashna boʻlsa?! Bova Boburga xuddi bulutlar orasidan suzib chiqqan toʻlin oyday goʻzal koʻringan toj-u taxt endi oy tutilgan tunday vahimali tusga kirdi. Bobur noma'lum xavf-xatardan seskanib, Xoʻja Abdullaga yordam soʻraganday qaradi:

- Ustod!

Xoʻja Abdulla unga tomon surilib:

- Amirzodam, bardam boʻling, - dedi.

- Ne qilay, ayting!.. shivirladi Bobur.
- Hukm chiqaring! Beklar yasoqqa yetsin deb talab qilmoqdalar.
 - Siz-chi, ustod?

Agar Xoʻja Abdulla, oʻtirganlarga qarshi chiqib, Darvesh govni yoqlasa, shuncha amal-taqal bilan boshlari zoʻrgʻa qovushgan beklar yana parokanda boʻlib ketishlari aniq edi.

- Amirzodam, - shivirladi Xoʻja Abdulla, - podshohlik udumiga binoan xatarli urush paytida tojdorlar sha'niga nomunosib gap aytgan odam jinoyatchi hisoblanur! Darvesh gov yana bu yerda ham tilini tiymay chatoq qildi. Barcha beklarni yomonlab, qargʻab, olovga moy sepdi! Endi siz... bitta Darvesh govni deb barcha beklardan voz kecholmagaysiz. Vaziyat tahlikali... Siyosat uchun govni yasoqqa yetkazmoqdan boshqa iloj yoʻq!

* * *

Ertasi kuni peshinda Andijon arkining qarshisidagi jazo maydonida nogʻoralar chalindi. Toʻplangan xaloyiqning koʻzi oldida Darvesh gov, yomon ovoza tarqatishda ayblanib, boshi kesildi.

Yoqubbek Ahmad Tanbalni yapasqi navkari bilan birga oʻsha kuni kechasi Axsiga yashiriqcha joʻnatib yuborgan edi. Ikki oradagi sir sirligicha qoldi.

Dushman Margʻilonni olib, Andijonga tahdid solmoqda edi. Xoʻja Abdulla boshliq elchilar Boburning nomidan Samarqand podshosining Margʻilondan beridagi qarorgohiga borib, sulh tuzishni taklif qildilar.

– Siz bilan urush boshlagan iningiz Umarshayx mirzo jardan yiqilib shunqor boʻldi!¹ Bobur mirzoni farzand oʻrnida koʻrgaysiz! Axir u zot sizga kuyov

¹ Vafot etdi ma'nosida.

boʻlish orzusidalar! Sizni bosh hukmdorimiz, deb tan olurlar! Oʻlpon toʻlagaymiz! Urushni toʻxtating, hazratim! Xoʻja Abdullaning bu taklifiga samarqandlik beklar qattiq qarshi chiqdilar. Ular Andijon va Axsini bosib, talab, katta-katta oʻlja olish umidida edilar. Sulh ularni mana shu oʻljalardan mahrum qilar, oʻlponni podshohning bir oʻzi olar edi.

- Shuncha joydan qon kechib, jon berib-jon olib kelib, endi yetdik deganda quruq qaytamizmi? dedi Muhammad tarxon nomli bek.
 - Sulh tuzmang, hazratim!
 - Qattiq turing! deyishdi boshqa beklar ham.

Sulton Ahmad mirzo beklarning ra'yini qaytarolmaydigan zaif tojdorlardan edi. Xo'ja Abdulla boshliq elchilar undan rad javobi olib qaytdilar. Endi avvalgidan battar qirgʻin boʻlishini sezgan bek va navkarlar Andijon qoʻrgʻoniga kirib, bekina boshladilar.

QUVA

JASORATNING JAZOSI

1

Oʻtgan kuni otlanib, Andijonga ketgan mulla Fazliddin bugun qattiq iztirob ichida yana Quvaga qaytdi.

U Boburning otasi oʻrniga hukmdor boʻlganini eshitib undan himoya soʻrash niyatida arkka borgan edi. Agar uning huzuriga kirsa noumid qaytmasligiga ishonardi. Chunki mulla Fazliddin chorbogʻda koʻshk qurgan paytlarda Bobur bilan koʻp hamsuhbat boʻlgan, uning zehni oʻtkir, shoirtabiat, zukko oʻspirin ekanini sezib, Alisher Navoiy suratini hadya qilgan edi. Endi mulla Fazliddin boʻyni yoʻgʻon beklardan koʻrgan yomonliklarini aytib bersa, Bobur uni himoyasiz tashlab qoʻymasligi kerak. Lekin ark darvozasi oldida oʻsha dorugʻa Uzun Hasan turgan ekan.

- Bobur mirzoning huzuriga kirmoq uchun maxsus ruxsat kerak, deb uning yoʻlini toʻsdi.
 - Ruxsatni kim berur, janob dorug'a?
- Eshik ogʻa Yoqubbek janoblari!.. Ana, oʻzlari ichkaridan chiqmoqdalar!..

Oʻntacha navkar qurshovida ichkaridan otliq chiqib kelayotgan Yoqubbek faqat birinchi vazir darajasidagi eshik ogʻalar taqadigan enli oltin kamarni beliga taqib olgan edi. Puli katta bu bek Andijon mudofaasiga hammadan koʻp mablagʻ ajratgan edi. Uning navkarlari ham boshqa beklarnikidan koʻproq edi, oʻzi ham Boburga ixlosi zoʻrligini har ishda namoyish qilib, tun-u kun tinmas edi. U birinchi kuniyoq, Boburga oʻzini sodiq koʻrsatgani ustiga bu hammasi qoʻshilib,

axiri sohib ixtiyor eshik ogʻa boʻlib olgan edi. Buni endi bilgan mulla Fazliddin xiyol sarosimaga tushdi. Lekin oʻzini dadil tutishga tirishib, otliq kelayotgan Yoqubbekning qarshisidan chiqdi:

– Janob eshik ogʻa, ijozat bering, kamina Bobur mirzo huzurlariga kiray!

Yoqubbek otining jilovini tortib, xiyol toʻxtadiyu, qoʻlini koʻksiga qoʻyib turgan mulla Fazliddinga tepadan kinoyali nazar tashladi:

- Kirib ne qilmoqchisiz?
- Arzim bor... Me'morlik san'atiga oid...
- Hozir yosh podshohimizga me'morlar emas, mamlakat mudofaasiga yaraydigan navkarlar kerak! Urush tugagandan soʻng keling!

Yoqubbek: «Gap tamom!» degandek qilib, otini yeldirganicha oʻtib ketdi. Mulla Fazliddin bir lahza qaqqayib turib qoldi. Bir vaqt Uzun Hasanning:

- Janob me'mor, tavochilar navkarlikka odam olmoqdalar, istasangiz borib navkar boʻling! degan kinoyasi uni oʻziga keltirdi.
- Oʻlmasak hali me'mor kerak boʻladigan kunlarga ham yetishurmiz! – dedi mulla Fazliddin dorugʻaga nafratli nazar tashlab.

Endi uning Bobur huzuriga kirolmasligi aniq. Yoqubbek bilan Uzun Hasanning ixtiyoriga oʻtgan qal'ada qolish esa juda xatarli. Darvesh govning oʻlimiga shu beklar sabab boʻlganini mulla Fazliddin eshitgan edi. Hozir uning uchun sal bexatarroq joy – Quvadagi opasining uyi edi...

Mulla Fazliddin xufton payti hovliga kirib kelsa, pochchasi bilan opasi yov yaqinlashayotganini eshitib, vahimaga tushib oʻtirishgan ekan. Quvasoydin narida – Karkidon adiridagi yov ilgʻorlari yoqqan gulxanlar milt-milt qilmoqda edi.

 Mulla Fazliddin, yogʻiy kelsa, poʻlat sandigʻingizni tinch qoʻymas, - dedi pochchasi. - Buni tezroq yashiring.

- Bo'sh o'rangiz bormi, pochcha?
- Bor. Ana, bedaxonada.
- Tohir qani?
- Mahmud bilan koʻprikka qarab ketdi. Bilmadim, ne ishi bor? Soʻrasam, aytmadi.

Mulla Fazliddin pochchasining yordamida poʻlat sandiqni yana qopga solib, bedaxonadagi boʻsh oʻraga tushirib qoʻydi-yu, oʻraning ogʻzini taxtalar bilan bekitdi. Keyin bu taxtalar ustiga beda bogʻlarini baland qilib taxlab tashladi.

* * *

Osmonni yana quyuq bulut qoplagan. Birda-yarim yomgʻir tomchilab qoʻyadi. Quva koʻchalari jimjit. Yov yaqinligini sezgan odamlar uy-uyiga bekinib olgan. Ahyon-ahyonda itlar hurgani eshitilmasa, butun Quva koʻchib ketganga oʻxshardi. Quvasoy ustidan oʻtgan yogʻoch koʻprik ham kimsasiz. Elchilar yomon xabar bilan qaytgandan soʻng, koʻprikdagi soqchilar qoʻrgʻonga qochib ketishgan...

Tun yarimlaganda shu koʻprikka qarab ketadigan yoʻl chetida uch-toʻrtta qora koʻrindi. Yoʻl boʻyidagi darvozaning bir tavaqasi sekin ochildi-yu, undan katta choʻva koʻtargan pakana odam chiqdi.

Tohir shivirlab soʻradi:

- Chaqmoq bilan tutantiriqni ham oldingmi?
- Oldim.

Pakana yigitning kiyimlaridan zigʻir yogʻining hidi keladi – uning kasbi juvozkash. Tohir yuziga yomgʻir tomchilaganini sezib, osmonga qaradi. Bulut quyuqlashib, yulduzlar koʻrinmay qolgan.

«Jala quysa, olov yonmay balo boʻlarmikin? – oʻylandi u. – Koʻprikning yogʻochlari ham hoʻl boʻlib, ivib yotgandir».

– Mahmud, men bitta bolta oldim. Endi yana bitta bolta bilan ikki kishilik katta arra kerak. Sen duradgorsen, asboblaring taxt.

- Arrani nima qilasen?
- Kerak! Umrzoq, sen ham birga bor. Darrov olib chiqinglar.

Ikki yigit bir tor koʻchaga kirib ketishdi-yu, anchadan keyin aytilgan narsalarni olib kelishdi. Keyin hammalari devorning zehi bilan yurib oldinma-ketin koʻprikka yaqinlashishdi.

Tohir koʻprikda qorovul yoʻqligini boya aniqlagan edi. Andijon qoʻshini orqaga chekinib, qoʻrgʻonga kirib ketgan, bostirib kelayotgan yov buni yaxshi bilar, shuning uchun Quvaday joylarda hech qanday xavfxatar boʻlishini kutmas edi.

Tohir koʻprikdan beriroqda – qorayib turgan katta bir daraxtning tagida hamrohlarini toʻxtatdi:

- Oʻzlaringdan qolar gap yoʻq. Beklar bilan navkarlar bizni yogʻiyning oyogʻi ostiga tashlab ketdi. «Oʻzing uchun oʻl yetim», degan gap bor. Xudo kushoyishi korimizni bersa, hammamiz uy ichimiz bilan bir balodan xalos boʻlamiz. Mabodo, ishimiz oʻngidan kelmasa... Bitta-yarimtamiz qoʻlga tushadigan boʻlsak...
- Oʻshanda ham mard boʻlish kerak, dedi Mahmud. - Ont ichaylik: kimki yogʻiyga sir bersa, onasi xotini boʻlsin!
 - Omin!
 - Omin!

Hammalari yuzlariga fotiha tortishdi-yu, birinketin koʻprikka chiqishdi. Tohirning moʻljali qirq-ellik qadam ichkariroqqa borib, koʻprikning oʻrtasidan oʻt qoʻyish edi. Ammo ular ilgarilagan sari atroflari ochilib, oʻzlarini himoyasiz seza boshlashdi. Suvning ochiq sathi sohilga nisbatan yorugʻroq edi. Koʻprik yov qoʻshinlari qarshisida nishon taxtasiga oʻxshab turgandek vahimali tuyilardi.

Bir vaqt duradgor yigitning qoʻlidagi katta arra egilib, yupqa poʻlati Tohirning boltasiga tegib ketdi. Uning jarangi qorongʻida shunday keskin eshitildiki, yigitlar seskanib toʻxtashdi. Atrofga quloq solib, bir lahza qotib turishdi. Qurbaqalar bir tekis qurillamoqda edi.

- Tohir, koʻp nariga bormaylik! deb shivirladi Mahmud. – Kelib qolsa qochib qutulishni ham oʻylanglar.
- Naryoqdan keladimi? Umrzoqni oʻsha yoqqa qorovul qilib qoʻyamiz. Qoʻrqmanglar, yogʻiy uzoqda.

Shu payt yomgʻir savalay boshladi. Endi uzoqdagi gulxanlar ham koʻzdan yoʻqoldi. Yov ularni koʻrib qolish ehtimoli butunlay bartaraf boʻlganini sezib, Tohir ichida suyunib qoʻydi. Koʻprik xiyla uzun boʻlganligi uchun uch-toʻrt jovida tagidan qoʻvilgan zoʻr sepova tirgaklari bor edi. Tohir koʻprikning qanotidan pastga egilib qarab, shu tirgaklardan birini moʻljalga oldi-yu, toʻxtadi. Umrzoq koʻprikning narigi chetida gorovul boʻlib turish uchun ketdi. Qolganlar koʻprik yogʻochlarining osonroq yonishi mumkin boʻlgan joylaridan tanlab, bolta bilan payraha koʻchirishdi, soʻng chuvadagi yogʻdan sepishdi. Uch kishilashib chaqmoqni toshga urib, tutani¹ yomgʻirdan bekitib, rosa uringanlaridan keyin, nihoyat achchiq paxta tutuni dimogʻlariga urildi. Oʻt yoqishga epchilroq boʻlgan juvozkash yigit tutani puflab-puflab choʻgʻ qildi. Tohir chakmonning tagidan qoʻltigʻiga qisib olib kelgan guruq poxolni shu choʻqqa tutdi.

Poxolning zaif olovi zigʻir yogʻi sepilgan payrahalarga ilashib endi sal koʻtarilay deganda, shamol qayirib urayotgan yomgʻir tomchilari «jiz-jiz» etib tegdi-yu, oʻchirib qoʻydi.

 $^{^{\}rm 1}$ Tuta – chaqmoq uchqunidan yonishi qulay boʻlgan paxta ipi.

– Yonmaydigan sirqindi moy ekan! – dedi Mahmud juvozkash yigitga ta'na qilib.

- Yomgʻir oʻchirdi-ku! Shu moyni topib chiqqanimga ham jon de!
- Bas! shipshidi Tohir juvozkash yigitga. Tutani oʻchirmay tur!

Tohir ikkita belbogʻni bir-biriga ulab, bir chetini beliga bogʻlab, koʻprikning tagiga osilib tushdi. Tirgaklarning nam tegmagan joylaridan payraha koʻchirib olib yogʻ sepib, ming azob bilan endi olov oldirayotganda, shamolning kuchli bir epkini yonayotgan payrahalarni suvga uchirib tushirdi.

Tohir koʻprikka qaytib chiqdi-yu, boltani qoʻliga olib, gʻazab bilan koʻprik qanotlarini urib sindira boshladi:

– Mana yonmasang! Mana yonmasang! Mana! Mana!

Juvozkash yigit ikkinchi boltani qoʻliga olib, koʻprikning narigi qanotini sindirishga tushdi.

– Tohir, bu ishlaringdan nima foyda? – dedi Mahmud. – Undan koʻra boltani menga ber. Mana bu mixlangan yogʻochlarini koʻchirib tashlaylik.

Hansiragan Tohir Mahmudning oldiga keldi. Qorongʻida mix koʻrinmasa ham kasbi duradgor boʻlgan Mahmud yogʻochning mix qoqilgan joyini tusmollab topdi. Tohir ikkalasi koʻprikka koʻndalang qoʻyib mixlangan taxtasimon bir yogʻochni koʻchirib olishdi. Ammo ikkinchi yogʻochni koʻchirish juda qiyin boʻldi.

– Aytmoqchi, arra bor-ku, – dedi Mahmud.

Bir chetda yotgan arrani Tohir paypaslab topdi. Ikki yigit uning ikki dastasidan olib, koʻprik yogʻochlarini arralashga tushishdi.

- Shoshma! - dedi Tohir. - Bu yerdagi beshoʻnta yogʻochni arralab tashlaganimiz bilan hech ish chiqmaydi.

- Nega chiqmasin? Ot-arava o'tolmaydigan qilamiz!
- Birorta ustani olib kelib, koʻprikni tuzatib, oʻtib ketaversa-chi?
- Foydasi yoʻq ishga unnadik chamasi-da! dedi juvozkash yigit umidsizlanib.
- Yoʻq, biz koʻprikni boʻyiga emas, eniga qarab arralashimiz kerak.
- Eniga qoʻyilgan yogʻochlar juvozkundaday yoʻgʻonku. Arralab boʻladimi?
 - Boʻladi!

To'rt kishi navbatma-navbat arra tortib, ko'prikning koʻndalangiga toʻsin qilib qoʻyilgan yoʻgʻon va qattiq yogʻochni arralayotganda, qora terga botib ketishdi. Iliq yomgʻir hali ham savalab turar, ularning yuzlari va badanlaridan oqqan ter yomgʻir suviga qoʻshilib, kiyimlarini shalabbo qilgan edi. Yigitlarning maqsadi koʻprikni ikki tomondan ushlab turgan oʻqyogʻochlarni arralab, uni bir-ikki joyidan uzib tashlash edi. Ammo ular koʻprikning har ikki tomonidagi yoʻgʻon oʻqyogʻochlarni arralab qirqishdi hamki, koʻprik ular kutganday uzilib tushmadi. Uni yana gandaydir mixlar, bir-biriga tishlatib qoʻyilgan bolorlar va «belbog'» vog'ochlar mahkam ushlab turardi. Tohir bilan Mahmud arrani qo'yib, yana boltani qo'lga olishdi, qorongʻida timirskilanib, bolorlarga tishlatilgan gavs mixlardan besh-oltitasini topishdi va koʻchirib tashlashdi. Shundan keyin koʻprikning allaqayeri qirsilladi-yu, ammo oʻzi avvalgiday turaverdi.

- Boʻldi! dedi Mahmud madorsizlanib. Qoʻlimizdan kelmaydigan ishga unnabmiz!
- Padariga la'nat! deb, Tohir qo'lidagi bolta bilan yana koʻprik qanotlarini qarsillatib sindira ketdi. Shu payt koʻprikning narigi chetidan ular qorovul qoʻygan yigit chopib keldi:
- Qoʻy, bas! Muncha qarsillatma! Narigi adirdan yogʻiy kelayotganga oʻxshaydi.

- A! Koʻrdingmi?
- Tovushlarini eshitdim. «Otlan!», «Saflan!» deb baqirib-chaqirganlari qulogʻimga chalindi!
- Boʻlmasa hozir bostirib keladi! deb juvozkash qochishga chogʻlandi.
- Arrangni ol, bu yerda hech narsani qoldirmanglar!
 deb Tohir yonmagan payrahalarni, yogʻoch siniqlarini suvga otdi.

Besh yigit muvaffaqiyatsizlikka uchraganday ruhlari tushib, uylariga tarqalganlarida tong yorisha boshlagan edi.

2

Saharlikni yeb, yoʻlga tushgan yov qoʻshinining oldingi toʻpi koʻprikka chiqa boshlaganda, tong qorongʻisi hali tarqalmagan edi. Yomgʻir togʻlarda qattiq quyayotganligi uchun Quvasoyning suvi tobora koʻtarilib bormoqda edi. Oldinda kelayotgan otliq chigʻdovullar uncha koʻp emas edi, shuning uchun koʻprikdan siyrak saf bilan oʻtib ketishdi.

Ammo ulardan keyin kelayotgan saflar juda qalin edi. Har bir bekning navkarlari oʻzlariga qarashli yuklarni tuya qoʻshilgan ogʻir aravalarga ortib kelmoqda edilar. Chugʻuruqday behisob qoʻshin otlari, tuyalari, aravalari bilan birga yomgʻirli tongda qopqora selga oʻxshab koʻprikni limmo-lim toʻldirib kela boshladi.

Koʻprikning oʻrtasida boyagi yigitlar mixlarni sugʻurib, toʻsinlarini arralab ketgan joy bunchalik ogʻir yukka bardosh berishi amrimahol edi. Buning ustiga, xuddi oʻsha joyda bir choʻbir otning ikki oldingi oyogʻi mixi koʻchirilgan yogʻochlarning yorigʻiga tushib ketdi. Ot oʻmrovi bilan yiqilib tushib, oyogʻini sugʻurib ololmay tipirchilay boshladi. Egarda oʻtirgan navkar otning boshidan oshib, boshqa otlarning oyogʻi tagiga

uchib tushdi. Hozir behisob tuyoqlar ostida qolib yanchilishini sezdi-yu, dod solib qichqirdi. Hamrohlari beixtiyor jilovlarini tortishdi. Ba'zi otlar qoʻrqib, orqaga tisarilib ketdi.

Orqadagilar esa hech narsadan bexabar, yopirilib kelmoqda edi. Bir lahzada koʻprikning shu joyi haddan tashqari tiqilinch boʻlib ketdi. Arra va bolta zarbalaridan nochorlashgan koʻprik yogʻochlari toʻsatdan qarsillab sindi. Tiqin boʻlib yotgan oʻnlab otlar, odamlar koʻprik yogʻochlariga qoʻshilib, suvga qulab tushdi. Toshib turgan soyning suvi qulab tushganlarni lopillatib oqizib ketdi.

Koʻprik ustida qolganlar jonholatda orqaga burilib, qochmoqchi boʻlishdi. Ammo orqadan hamon otliqlar, aravalar, tuyalar koʻchkiday bostirib kelmoqda edi. Oldinda nima hodisa boʻlganidan bexabar podshoh eng yaqin beklari bilan soyning narigi chetida turib, qoʻshinni koʻprikka tomon yoʻnaltirmoqda edi. Lekin koʻprik oʻrtasidan koʻtarilgan qiy-chuv, toʻpolon tobora zo'ravib borardi. Vahimaga tushgan qo'shin birdan oʻzini orqaga tashladi, ammo ur-sur toʻpolonda koʻprikka sigʻmay, ot-ulovlari bilan suvga tutday toʻkila boshladi. Koʻprik qanotlarining ancha joyi sindirib tashlangani ularning qulab tushishini osonlashtirardi. Tartibi buzilgan aravalar bir-birini itarib, koʻprikning butun turgan qanotlarini ham sindirib qulamoqda edi. Ba'zi navkarlar yo'lida uchragan tirik jonning hammasini qamchilab oʻtmoqchi boʻlsa, ba'zi beklar qilich yalangʻochlab, toʻpolonni tigʻ bilan bosmoqchi boʻlishadi. Ammo gʻij-gʻij boʻlib, qurt-qumursqaday qaynab yotgan qoʻshin koʻprikka shunday tiqilib qolgan ediki, unga na qamchi kor qilar edi, na qilich. Tuyalar boʻkiradi. Odamlar qichqiradi. Talvasaga tushgan olomon tigʻ koʻtargan beklarning oʻzini otlari bilan surib borib, koʻprikdan agʻanatib vuboradi.

Podshoh bilan birga qirgʻoqda turgan xos navkarlar suvda oqib borayotganlarni qutqarishga farmon oldilar. Ular qamishlarni shaldiratib, suvga yaqin borganlarida, oʻzlari ham balchiqqa botib keta boshladi. Keyin orqada qolganlari arqon tashlab ularning uch-toʻrttasini zoʻrgʻa qutqarib oldi. Boshqalarini qamishzor balchiq qa'riga tortib ketdi. Suvga qulab tushganlarning choʻkkani choʻkib oʻldi. Suzishni biladiganlari esa otlarning boʻyniga yopishib qamishzor qirgʻoqqa chiqay deganda, balchiqqa botdi. Sassiq botqoqlik ajdahoga aylanib odamni ham, otni ham oyogʻidan pastga tortar edi. Otlar jon achchigʻida siltanib kishnar, odamlar qamishlardan qoʻllari tilinib dod solar, ammo ular talvasa qilganlari sari balchiqqa chuqurroq botib, yuz azoblar bilan jon berishar edi.

Oʻrtasi sinib tushgan koʻprikning ustida – agʻdarilgan aravalar, yiqilib yotgan ot va tuyalar orasida talay navkarlarning ezgʻilangan jasadlari qoldi. Yovning shu bir-ikki soat ichida koʻrgan talafoti urush boshlangandan beri koʻrgan hamma talafotlaridan koʻproq va dahshatliroq edi. Yana bu falokatning sababini hech kim bilmas edi. Shuncha odamning mislsiz qiynoqlarda jon berganini koʻrgan jangchilar magʻlubiyatga uchragandan battar esankirab, ruhsizlanib qoldilar.

3

Quvaliklar tong yorishgandan kun yoyilguncha boʻlib oʻtgan bu falokatni narigi qirgʻoqdagi devor va tomlardan moʻralab koʻrib turar edilar. Ularning ba'zisi «yogʻiy battar boʻlsin», deb shodlansa, ba'zisi ne-ne yigitlarning suvga oqib, balchiqqa botib, ming azoblar bilan oʻlayotganidan achinardi. Tohir kechasi oʻrtoqlari bilan qilgan ishlarini boya Fazliddin togʻasiga «uddasidan chiqolmadik», degan ma'noda ma'yuslanib

aytib bergan edi. Keyin yuz bergan hodisani tomga chiqib koʻrgan mulla Fazliddin narvondan tez pastga tushdi-yu, Tohirni bir chetga imlab chaqirib oldi:

- Oʻrtoqlaringga ayt! Hammalaring tezroq berkininglar!
 - Nechun, mulla togʻa?
- Koʻprik arralangan joyidan singanga oʻxshaydi. Agar koʻprikka oʻt qoʻyib yuborganlaringda ham bunchalik talafot boʻlmas edi. Chunki yogʻiy koʻprikning yongan joyini tuzatmaguncha ustiga cherik chiqarmas edi. Ular gʻaflatda qolib baloga yoʻliqqan! Agar qilgan ishlaringni bilib qolsa, hammamizni qirib tashlashlari aniq!
 - Yogʻiy hali naryoqda-ku!
- Chigʻdovullari bu yoqqa oʻtgan ekan, men koʻrdim. Gapni koʻpaytirmay, tezroq yashirin. Toʻqayga chiqib ketinglar. Tez!

Togʻasi astoydil xavotir boʻlayotganini sezgan Tohir boshqa e'tiroz qilmadi-yu, oʻrtoqlariga sekin xabar berib chiqdi:

– Arqon bilan oʻroq olinglar. Kim soʻrasa, oʻtinga boramiz, denglar. Lekin xoʻrak ikki-uch kunlik boʻlsin.

Besh yigit odamlarning koʻziga tashlanmaslikka tirishib, qishloqdan yakka-yakka chiqishdi-yu, toʻqay ichida uchrashishdi.

Koʻprik sinmasidan oldin berigi tomonga oʻtib qolgan chigʻdovullar Quvaning kadxudosini topib, uning yordamida duradgor ustalarni koʻprik tuzatishga haydab chiqdi. Naryoqda qolgan navkarlar arqon tashlab, yogʻoch tashib, ularga koʻmaklasha boshlashdi.

Koʻprik tuzatishga chiqqanlarning orasida Tohirning otasi ham bor edi. U kechasi oʻgʻlining qayoqqadir borib, sahar paytida charchab qaytganini sezgan edi. Duradgorlardan biri yogʻochning arralangan joyini

Tohirning otasiga koʻrsatib, oʻz shubhasini aytmoqchi boʻlganda, usta buning oldini olib, labini tishladi:

- Damingizni chiqarmang, deb shivirladi. Agar yogʻiy biror gumoningizga ishonsa, butun Quvaga oʻt qoʻyadi. Hammamizni qilichdan oʻtkazadi!
 - Gapingiz haq!

Shundan kevin bu toʻgʻrida hech kim ogʻiz ochmadi. Ikki kun deganda koʻprik naridan-beri tuzatildi-yu, yovning otlig askarlari bitta-ikkitadan boʻlib, ehtiyot bilan oʻtishdi. Nihoyat, podshoh ham mulozimlari bilan koʻprikdan oʻtib, Quvada toʻxtamasdan yoʻlida davom etdi. Yovning aravalarga ortilgan ogʻir yuklari va tuva karvonlari koʻprikdan narida golib ketdi. Shunga qaraganda yovning rejalarida qandaydir bir oʻzgarishlar yuz bergan edi. Toʻqayda yashirinib yurgan Tohir Robiyadan xavotirda edi. Ota-onasi qizni qoʻllaridan kelganicha avaylab, yashirib yurganlarini bilsa ham, yovning hamon Quva atrofida oʻralashib yurgani juda tahlikali edi. Uchinchi kuni yigitlarning xoʻraklari ham tugadi. Ahvol qanday boʻlayotganini bilish va xoʻrak gʻamlab kelish uchun Tohir oʻzi boradigan bo'ldi. U kechki payt bir bog' qamishni orgalab sekin hovlilariga yaqinlashdi. Darvoza zanjir ekan, qoʻlining uchini tiqib, zanjirni tushirdi. Mulla Fazliddin bostirmaning oldida aravaning gʻildiraklarini koʻzdan kechirayotgan edi. Qamish koʻtarib kirgan Tohirni koʻrib, unga qarab chopdi:

- Sulh muborak, jiyanim! Sulh!
- Urush tugadimi?
- Xudoga shukr, tugadi.

Tohir yelkasidan qamishni yerga tashlab yubordi. Togʻasi uni bagʻriga bosib, qulogʻiga shivirladi:

– Jasoratlaring bekor ketmadi, jiyanim! Samarqand podshohining oʻzi sulh taklif qilgan emish! Koʻprikdagi talafot yogʻiyning belini sindirgan ekan! Mulla Fazliddin yelkasiga ensiz jiyak tikilgan kiftaki koʻylak kiygan edi. Tohir engagini jiyakning bogʻichiga bosib va kutilmagan shodlikning zoʻridan oʻpkasi toʻlib:

- Xayriyat! - deya oldi, xolos.

Mulla Fazliddin uning zalvarli yelkasini silab past tovush bilan:

- Alomat boʻldi, dedi. Ne-ne beklarning qoʻlidan kelmagan xaloskorlik sendek tavakkalchi yigitlarning qoʻlidan kelgani alomat boʻldi! Kiborlar sendeklarni «qora xalq», deb pisand qilmaydilar. Ammo bugun shu «qora xalq»ning jasorati bilan urush balosidan xalos boʻlganlarini bilsalar edi!
- Lekin munchalik boʻlishini biz oʻzimiz ham bilmagan edik, mulla togʻa. Bir chekkasi, sizning kelib qolganingiz yaxshi boʻldi. Siz boʻlmaganingizda bu ish mening xayolimga ham kelmas edi, siz turtki berdingiz.
- Shundaymi, a, jiyanim? Agar shunday boʻlsa mening boshimni sen koʻkka yetkazding!

Mulla Fazliddin nuqul ovozini pasaytirib, qandaydir xavf sezib, gapirmoqda edi.

- Mulla togʻa, Quvada hali ham yogʻiy bormi? dedi Tohir.
- Ha, yogʻiy oʻtib tamom boʻlganicha yoʻq. Podshohlari Andijondan bir yogʻoch¹ berida sulh tuzib, orqaga qaytgan emish. Cherigining bir qismi koʻprikdan nariga oʻtib ketganini, oʻzim koʻrdim. Ammo qolgan-qutganlari endi qaytsa kerak. Ehtiyot shart, jiyanim, uyga kir.

Tohir ust-boshiga ilashgan qamish barglarini qoqib, uyga kirayotganda qoʻshni hovlidan ayol kishining allasi eshitildi. Tohir Robiyani esladi-yu, yuragi bir orziqdi. Sulh tuzilganini eshitganmikin? Tohir uni juda sogʻingan edi. Qani endi iloji boʻlsa-yu, hozir devor oshib, qoʻshni hovliga oʻtsa. Robiyaga urush qanday daf boʻlganini aytib berib, uning quvonganini koʻrsa! Lekin qalliqlik odobi bunga yoʻl bermas, Tohir Robiya

¹ Bir yogʻoch – taxminan oʻn olti chaqirim.

bilan faqat yashiriqcha uchrashar edi. Tohir endi uyga kirib, onasini sulh bilan muborakbod qilayotgan edi, koʻchada birdan itlar asabiy xurib, ot dupuri eshitila boshladi. Tohir shoshilib, darchadan hovliga qaradi.

Ayvondan pastda turgan mulla Fazliddin unga oʻtinxonani koʻrsatib:

- Bu yoqqa chiq! - deb shipshidi. - Bekin!

Tohir beliga taqilgan xanjarni sopidan ushlab, ayvon orqali oʻtinxonaga chopib oʻtdi va qamish bogʻlarining orasiga yashirindi.

Darvoza tavaqalari shaxt bilan ochildi. Egarlarining qoshiga yoy osilgan, boshlariga dubulgʻa kiygan, keng cholvorlari etiklarining qoʻnjini yopib turgan otliq askarlar hovliga kirayotib, atrofga alang-jalang koʻz yugurtirib chiqdi. Ulardan ikkitasi bitta qora otga mingashib olgan edi.

Dubulgʻasining uchiga yashil matodan bayroqcha qadalgan ponsod bostirmada turgan yaydoq otni koʻrdi-yu, mingashib kelayotganlarga qarab:

- Ana u seniki! - dedi.

Habashday qorayib ketgan oʻsiq moʻylovli yigit qora otning sagʻrisidan sakrab tushdi-yu, bostirmaga qarab yugurdi. Qolgan yigitlar ponsodning ishorasi bilan uyga kirib, yangiroq kigizmi, gilammi, boʻxchami hammasini hovliga koʻtarib chiqa boshladi.

Ayvonning ustuniga suyanib jim turgan mulla Fazliddin bularni: «Koʻprik voqeasidan xabar topib, Tohirlarni qidirib kelganmi?» deb qattiq qoʻrqqan edi. Endi bularning badnafs talonchilar ekanini koʻrib nafrati keldi. Otdan tushmay, hovli oʻrtasida turgan ponsodga qarab:

– Mehmon, insof ham darkor! – dedi. – Podshohlarimiz sulh tuzganlaridan keyin bunchalik talon-toroj qilish musulmonchilikka toʻgʻri kelarmikin?

Bostirmada mulla Fazliddinning otini allaqachon oʻziniki qilib, unga egar urayotgan qora yigit:

- Sulh, omon-omon! - deb, bu soʻzlarni masxaralaganday kulib aytdi.

Boshqa bir yigit boʻxchani titkilab, undan bir juft atlas topdi-da, ponsodga uzatib:

- Moli amon!¹ - dedi.

Ponsod atlasni olib xurjunga solar ekan, mulla Fazliddinga zugʻum qilib, samarqandcha talaffuz bilan gapira boshladi:

- Oltmishta otimiz oʻlat boʻlib oʻldi. Bizga kasofatlaring urdi. Sen bunda savori yurgin-u mani yigitim Samarqandga piyoda ketsunmi? Ikki kishi bir otga mingashib kirganini koʻrdingmi?
- Koʻrdim. Agar aravaga qoʻshilgan shu choʻbir ot yigitingizni Samarqandga koʻtarib borolsa, mayli, oling. Lekin ayollarning boʻxchasini kavlash, sizdek olijanob ponsodga joizmikan?
- Bizning ayollarimiz Fargʻona atlasidan savgʻo keltiring, deb tayin qilgan. Biz shuncha joydan ovora boʻlib kelib, endi besavgʻo qaytaylukmi? Insof shumi?!

Ponsod soʻnggi soʻzni alam bilan aytganiga qaraganda, urushning gʻalabasiz tugaganidan juda norozi edi. Bu odamlar, urushdan katta oʻljalar olish umidida oylab-yillab qon kechib, hamma azobuqubatlarga bardosh berib yurar edilar. Agar Andijon va Axsi kabi boy shaharlar bosib olinsa, jangchilarning har biri oʻljador boʻlishi shubhasiz edi. Biroq Quvadagi talafotdan kevin darhol sulh tuzildi. Andijondan yarashish uchun chiqqanlar Samarqand podshohiga oltin-kumush sovgʻalar, qimmatbaho sarupolar, bir necha yuz chopqir ot va tuyalar in'om qildilar. Bu in'omlar podshohning ichkilari, mulozimlari, beklari va boshqa vaqinlaridan ortmay qoldi. Mana bu ponsodga oʻxshagan jangchilar esa oʻljasiz qoldi. Shuning alamiga ular orqaga qaytishda yoʻllarida uchragan qishloqlarni tintib, oʻlja qidirishga tushgan edi.

¹ Moli amon – urushda toʻlanadigan tovon.

Ulardan beshtasi hozir Robiyalarning hovlisiga ham bostirib kirgan edi. Oʻtinxonaning bir devori Robiyalarning hovlisiga tutash boʻlgani uchun Tohir qoʻshni hovlida ham toʻpolon koʻtarilganini eshitib qoldi.

Kecha ehtiyotini qilib, ichkarida bekinib oʻtirgan Robiya urush tugaganini eshitgan, soʻng hovliga sigir sogʻishga chiqqan edi. Sigirga buzoqni qoʻyib, uni iydirish bilan andarmon boʻldi-da, hovlilariga otliq askarlar kirib kelganini kech sezdi.

Ayasi ogʻilxonaga chopib kirdi.

- Voy, oʻlay, sen shu yerdamiding?
- Nima boʻldi, aya?
- Yogʻiy! Toʻxta! Hovliga chiqma!.. Ana u tuynukdan somonxonaga oʻt!

Oʻlja ot qidirib yurgan navkarlarning ikkitasi darhol ogʻilxonaga kirdi-yu, uning toʻridagi tuynukdan naryoqqa oshib oʻtayotgan qizni koʻrib qoldi. Qisiq koʻzli qipchoq yigit yonidagiga qarab:

- Suluv qizga oʻxshaydi! dedi.
- Ot joʻq ekan-da, dedi sherigi afsuslanib.
- Jaxshi qiz otdan ham qimmat boʻladi. Jur, olib chigʻayiq. Samarqandga olib borib, Fozilbekka sotamiz!

Sigirning panasida turgan ona bu dahshatli soʻzlarning ma'nosini tushundi-yu, chopib borib tuynukning ogʻzini gavdasi bilan bekitdi.

– Musulmon boʻlsalaring qizimga tegmanglar! Meni oʻldirsalaring oʻldiringlar! Qizimga yaqinlashmanglar! Birovning omonati! Birovga fotiha boʻlgan!

Bu soʻzlar qisiq koʻzli yigitning nazarida qizning qiymatini yana ham oshirganday boʻldi. U kampirni qoʻlidan bir siltab, oxurga qarab uloqtirdi. Kampir oxurga boshi bilan urilib chinqirdi-yu, hushidan ketdi.

Qipchoq yigit tuynukdan somonxonaga oʻtganda, Robiya somonxonaning eshigidan qochib hovliga chiqdi. Shunda ikkinchi yigit qarshisidan chopib chiqib, uni tutib oldi. Ichkaridan qisiq koʻzligi yetib keldi. Qiz ularning qoʻlidan chiqib ketmoqchi boʻlib, baliqday patillar edi. Uchinchi bir vigit egaridan qop olib, qopning ogʻzini ochganicha ularga yaqinlasha boshladi. Qiz hozir boshiga qop kiydirilishini sezdiyu, bor ovozi bilan dod solib, qichqira boshladi. Tohir shu vaqtgacha tishini-tishiga qoʻyib, uylarida boʻlayotgan talon-torojga chidab oʻtirgan edi. Ammo Robiyaning chinqirigʻini eshitgandan keyin koʻziga hech narsa koʻrinmay qoldi. Oʻtinxonadan chopib chiqdi-da, qo'shni hovlining devoriga tirmashdi. Devorning suvoqlarini koʻchirib, naryoqqa oshib tushar ekan, shuncha kundan beri uni xavotirga solib yurgan eng yomon baxtsizlik u kutgandan ham dahshatliroq bir tarzda ro'y berayotganini ko'rdi. Biri Robiyani oyoqlaridan ushlab olgan, ikkinchisi uning qoʻllarini beliga qoʻshib, mahkam qisib turgan va uchinchisi qizning boshiga qop kiydirmoqchi boʻlayotgan yigitlar Tohirning badaniga ham zaharli ilon boʻlib yopishayotganday tuyildi. Tohir qichqirib yubordi. Hovlida bir yigit otlarning jilovidan tutib turibdi. Yana biri qoʻlida uzun nayzasi bilan ot ustida oʻtiribdi. Hammasining belida qilichi, yonida oʻq-yoyi. Tohir bir oʻzi bularga bas keloladimi, yoʻqmi, buni oʻylab oʻtiradigan ahvolda emas. Robiyaga yopishgan ilonlarga tezroq tigʻ urishdan boshqa oʻvi ham, istagi ham yoʻq. U yugurib borayotib, xanjarini qinidan sugʻurdi.

Nayza koʻtargan otliq:

- Toʻxta! Toʻxta! - deb uning ketidan ot soldi. Tohir ikki sakrab moʻljallagan joyiga yetib bordi. Robiyani oyogʻidan quchoqlab olgan qisiq koʻzli yigitning biqiniga xanjar urdi. Xanjar sopigacha botib ketgani, qisiq koʻzli yigit ingrab Robiyaning oyoqlarini qoʻyib yuborgani esida. Tohir xanjarni tortib olayotganida oʻzining yelkasiga gʻarchillab sanchilgan nayza

zarbidan gandiraklab ketdi. Uning xanjar tutgan qoʻllari dahshatli bir ogʻriqdan boʻshashdi. Ot ustidan unga nayza sanchgan yigit nayzasini uzun sopidan tortib sugʻurib olayotganda Tohirning yelkasidan – koʻylagi bilan birga kesilgan badanidan qon tizillab otilib ketdi. U oʻzi qulatgan qisiq koʻzli yigitning ustiga yiqilar ekan, Robiyaning kosasidan oʻynoqlab chiqqan vahima toʻla koʻzini koʻrdi. Qizning:

– Voy, Tohir ogʻam! – deb qichqirgani uzoqlardan kelgan sharpaday zoʻrgʻa eshitildi. Soʻng bu ham zulmat qa'riga shoʻngʻib yoʻq boʻldi.

Tohir qoniga belanganicha qoldi-yu, Robiyani Samarqand tomonga olib ketishdi.

O'SH

NAJOT QAYDA

1

Baland qoyatoshlar bilan tekis vohalar bir-biriga gʻalati tarzda kirishib ketgan Oʻsh atroflari bir necha kundan beri juda serharakat. Andijondan tuyalarga ortib kelingan hashamatli chodirlar Buratogʻ¹ etagidan oqib oʻtadigan Jannatariq boʻyiga oʻrnatildi.

Oqburasov boʻylarida ham, Chilmahram togʻining etaklaridagi koʻkalamzorlarda ham yuzlab chodirlar va oʻtovlar paydo boʻldi. Togʻdan haydab tushilgan dumbali qoʻylar soʻyildi, kabob qoʻralarida archaning pistogi koʻmiri choʻgʻlatildi, doshqozonlarda goʻsht qaynay boshladi. Bugun Oʻshga Bobur mirzo boshliq hamma arkoni davlatlarning kelishi kutilmoqda. Mulla Fazliddin yosh podshohning amri bilan Buratogʻning chiqish qiyin bo'lgan xushmanzara bir qoyatoshi ustiga kichkina hujra qurgan. Bobur mirzo bultur shu ishni unga topshirgandan keyin Samarqandga qoʻshin tortib ketgan va Oʻshga mana endi yoʻli tushmoqda edi. Mulla Fazliddin savdarlar bilan pastga tushib, hujraga yarashadigan gilam va zarbof koʻrpachalarni oʻzi tanladi. Tik, sirgʻanchiq qoyatoshga chiqib oʻrganmagan savdarlar jihozlarni olib kelayotganda, juda qiynalib qolishdi. Qashqarcha kumush obdasta koʻtarib kelayotgan semiz oftobachi har oʻn qadamda

¹ Buratogʻ – ba'zi manbalarda Boratogʻ ham deb ataladi. Biroq «Oq Burasoy» kabi asli «bura» soʻzidan olingan boʻlishi kerak. Turkiy tillarda nortuyaning eng ulkani «bura» yoki «bugʻra» deb ataladi. Bu togʻ chindan ham tekis joyda choʻk tushib yotgan ulkan nortuyaga oʻxshab ketadi. (Muallifdan)

bir toʻxtab qolardi. Mulla Fazliddin uning qoʻlidan obdastasini olib, oʻzini suyab chiqdi.

Savdarboshi ayvonning sangfarsh qilingan zinalariga guldor poyandoz toʻshatgan edi, mulla Fazliddin iltimos qilib, uni oldirib tashladi. Chunki zinalarga ishlatilgan rangli toshlar har qanday poyandozdan qimmatroq va goʻzalroq edi.

Togʻ qirrasida turgan hujradan butun Oʻsh shahri va uning atroflari kaftdagidek aniq koʻrinar edi. Hali ham nafasini rostlab ololmay hansirab oʻtirgan oftobachi pastga tikilib qaradi-yu, oʻrnidan sakrab turdi:

- Ana, keldilar!

Mulla Fazliddin ayvon chetiga borib, pastga koʻz yugurtirdi.

Oq otliq Bobur mirzo yuzdan ortiq beklari va xos navkarlari bilan Javzo masjididan oʻtib, togʻ etagiga yaqinlashib qolgan edi. Ular hammasi Jannatariq boʻyiga oʻrnatilgan borgoh¹ va xirgoh² oldida toʻxtadilar. Ichi zarrin ipak, usti qimmatbaho mayin movut bilan qoplangan bu chodirlarning zarhal chilvirlari kumush qoziqlarga bogʻlangan edi. Chodirlarda dam olish va katta ziyofatlar berish uchun hamma tayyorliklar koʻrib qoʻyilganini mulla Fazliddin bilar edi. «Endi bugun Bobur mirzo oʻsha yerda dam olsalar kerak, balkim bizning hujraga ertaga chiqarlar», degan oʻy bilan ishini sekin davom ettirdi. Ammo oradan bir soat oʻtar-oʻtmas pastdan sersoqol qoʻrchiboshi toʻrtta soqchisi bilan hansirab chiqib keldi:

– Hozir bu yerga oliy zotlar qadam ranjida qilurlar. Taxtiravon qayerda?

Savdarboshi mulla Fazliddinga yordam soʻraganday qilib qaradi. Zira beqasamdan yupqa toʻn kiygan mulla Fazliddin qoʻrchiboshi qarshisida qoʻl qovushtirib:

- Ma'zur tuting, janobi bek, - dedi.

¹ Borgoh – podshohning xos chodiri.

 $^{^{2}}$ Xirgoh – podshohning taxti qoʻyiladigan va qabul marosimlari oʻtkaziladigan chodir.

- Xo'sh?

Mulla Fazliddin shu hujrani qurishda gʻishtlarni zambilga solib, koʻtartirib chiqmoqchi boʻlgan, ammo ilojini topolmagan edi. Chunki bu tik qoyaga odam faqat bitta-bitta boʻlib, goho qoʻli bilan qoyaga suyanib chiqishi mumkin edi. Taxtiravonni esa toʻrt kishi toʻrt tomonidan koʻtaradi, uning ichida podshoh yoki malikalar oʻtiradi.

– Biz tajriba etib koʻrdik, bu qoyaga taxtiravon koʻtarib chiqish mumkin emas, – dedi mulla Fazliddin. Qoʻrchiboshi uch tomoni devorday tik qoyatosh boʻlgan, faqat bir tomonidan yolgʻiz odam zoʻrgʻa oʻtib keladigan toqqa durustroq qaradi-yu, taxtiravon ishlatish fikridan qaytdi.

Savdarboshiga xoʻmrayib:

– Bu yerda ortiqcha odam boʻlmasin! – deb buyurdi. Hujra atrofidagi sahn torroq boʻlsa ham qoyaning shimol tomonida – uyday baland toshlar ortida kichkina maydoncha bor edi. Soqchilardan ikkitasi oftobachi va savdarboshi bilan birga oʻsha yoqqa oʻtib turishdi. Boshqa savdarlar pastga tushib ketishdi. Qoʻrchiboshi mulla Fazliddinga qarab:

- Janobi me'mor, siz yoʻlni yaxshi bilursiz, podshohga peshvoz chiqing, - deb buyurdi.

Qoidaga binoan qoʻrchiboshining oʻzi ham pastga qaytib tushib, podshoh bilan birga chiqishi kerak edi. Ammo bu toqqa ikki qayta ustma-ust tushib chiqish benihoya qiyin. Buni sezgan oʻrta yashar qoʻrchiboshi ikkita soqchini mulla Fazliddinga qoʻshib pastga tushirib yubordi-yu, oʻzi hujra yonidagi silliq tosh kursiga oʻtirib, terlab ketgan yoʻgʻon boʻyinlarini arta boshladi. Mulla Fazliddin Buratoqqa har kuni necha qaytadan tushib-chiqib oʻrganib qolgan. Uning oyogʻidagi ixcham moʻkkisi toshdan toshga yengil oʻtib boradi. Ammo koʻngli notinch. Hozir podshoh va uning

beklariga duch kelishi kerakligi, ular bilan muomala qilishning qiyinligi qalbiga tahlika soladi.

Bobur mirzo va uning odamlari togʻning kunchiqish tomonidan otliq aylanib oʻtib, qoyatoshga janubdan vaqinlashdilar-da, mazoratdan vuqoriroqda otdan tusha boshladilar. Shunda mulla Fazliddin bek va navkarlarga qoʻshilmay, alohida toʻp boʻlib kelayotgan ayollarni koʻrib qoldi. Yuvosh qora otda oʻtirgan va oppoq kiyingan oʻrta yashar ayol - Boburning onasi Outlug' Nigor xonim edi. Gulibodom rangli sho'x, oʻynoqi otda qirmizi ipak qabo¹ kiygan Xonzoda begim kelmogda edi. Mulla Fazliddin uni shoʻx ot ustida chavandoz yigitlarday yaxshi oʻtirganidan ham tanidiyu, vujudi birdan qizib ketganday boʻldi. Koʻnglidagi boyagi bezovtalik ustiga olovli bir hayajon qoʻshilib, yuragi qinidan chiqquday hapriqib ketdi. Mulla Fazliddin oʻzida birdan yuz bergan bu oʻzgarishni birovga sezdirib qoʻyishdan qoʻrqib, podshohni kutib olayotgan mulozimlarning panasiga oʻtdi-da, bosh egib, qoʻl qovushtirib turdi. Shunda tizzalari ham galtirayotganini sezib, «Xudoyo oʻzing sharmanda qilma!» degan soʻzlarni dilidan oʻtkazdi.

2

Bobur mirzoning opasi Xonzoda begim mulla Fazliddinni koʻpdan beri hayratga solib keladi. Bundan toʻrt yil muqaddam mulla Fazliddin Hirotdan kelib Umarshayx mirzoning Andijondagi chorbogʻida koʻshk qura boshlagan kezlarida Xonzoda begim oʻn olti yoshda edi. Asilzoda qizlar orasida eng koʻhligi boʻlgan Xonzoda begim bir marta erkakcha kiyinib, ot minib,

¹ Qabo – asilzoda ayollar kiyadigan uzun yengli ustki kiyim. Kamzulga oʻxshash.

inisining oʻsmir mulozimlari bilan chavgon¹ oʻynagan. Mulla Fazliddin buni koʻrib bir hayratga tushgan edi. Oradan ikki yil oʻtgach, mulla Fazliddin Andijon arkidagi toʻrxonaning ba'zi naqshlarini yangilash uchun chaqirildi. Shunda oʻn sakkiz voshli Xonzoda begimni ravonda kanizlar orasida setor chalib oʻtirgan paytida yana bir koʻrdi-yu, oʻz koʻzlariga zoʻrgʻa ishondi. Chunki bir vaqtlar yigitcha kiyinib chavgon oʻynagan o'sha qiz endi setorda shunchalik nafis, shunchalik mayin kuy chalar, uning oʻzi ham shu qadar nafosatga toʻlib oʻtirar ediki, mulla Fazliddin beixtiyor uning sehriga berilib, gʻalati boʻlib ketdi. Keyin mulla Fazliddin devorga xomaki naqsh chizayotganda, Xonzoda begim uning oldiga kelib, ishini qiziqib tomosha qila boshladi. Mulla Fazliddinning qoʻlidagi pargor hayajondan yerga tushib ketdi.

– Ajoyib naqsh chizgan edingiz, koʻzim tegdimi, mavlono? – dedi Xonzoda begim aybni oʻziga olganday boʻlib.

Mulla Fazliddin pargorni² yerdan koʻtarar ekan:

- Yoʻq, aksincha, begim, sizning nazaringiz tushgan naqsh yanada yaxshiroq chizilgay!
 - Men eshitdimki, mavlono musavvir ham emishlar.
- Aslida me'morlar musavvirlik san'atidan xabardor boʻlmoqlari darkor.
- Undoq boʻlsa mening suratimni chizib koʻring!
 Kutilmagan bu taklifdan choʻchigan mulla Fazliddin atrofga alanglab qaradi. Toʻrxonada boshqa hech kim yoʻq. Shunday boʻlsa ham ovozini pasaytirib dedi:
 - Bajonidil chizar edim... Faqat...
- Xavotir olmang, mavlono, men sir saqlashga qodirmen!

¹ Chavgon – hozirgi xokkey oʻyiniga oʻxshaydi. Faqat ochiq maydonda ot minib oʻynaladi.

² Pargor - sirkul.

– Agar men chizgan surat narigi dunyoda jon talab qilsa, qaydan topurmen, begim?

Mulla Fazliddin bu soʻzlar bilan shariat surat chizishni man etganini, agar qoʻlga tushsa joni xavf ostida qolishini aytmoqchi edi. Xonzoda begim uning ochiq aytolmagan fikrini tushundi-yu, jilmaydi:

- Agar suratim uchun sizdan jon talab qilsalar, menga ayting, men oʻz jonimni bergaymen!

...Mulla Fazliddin poʻlat sandiqda yashirib yurgan suratni mana shu gaplardan keyin chizishga jur'at etgan edi. Shundan keyingi toʻpolonlarda u Xonzoda begimni uzoq vaqt uchratolmay yurdi.

Nihoyat, bultur kuzda mana shu Buratogga Xonzoda begimning o'zi kelib qoldi. Bobur Samarqandga ketishda oʻz onasi va egachisiga «Oʻshdagi hujradan xabar olursizlar», deb tayinlab qoʻygan ekan. Mezon ovida Oʻshga mehmon boʻlib kelgan Xonzoda begim bitta kanizi bilan Buratogga chiqdi. Mulla Fazliddin oʻsha paytda yolgʻiz shogirdi bilan ishlamoqda edi. Har bitta gʻishtni, yogʻochni, har bir koʻza suvni pastdan olib chiqqunlaricha tinkalari qurib ketardi. Marmar yoʻnib sangkorlik qilishga sangtarosh yoʻq. Sirlangan koshin olishga pul yoʻq. Bu hammasi mulla Fazliddinni juda qivnab qoʻvgan. Lekin bu mushkulotlarni Xonzoda begimga qandoq aytadi? Begimning marvarid qadalgan ipak toqisidan¹ tortib uchi qayrilgan qizil etikchasigacha butun borlig'i shunday nafis ko'rinar, bu samoviy goʻzallik oldida tosh va gʻishtdan gap ochish juda erish tuyilardi. Biroq Xonzoda begim mulla Fazliddindan boʻlajak hujraning rejasi chizilgan tarhni soʻrab oldi. Qogʻozga qarab turib:

- Gumbazini koshin bilan bezatmoqchi boʻlibsiz, koshiningiz yetarlikmi? - dedi.

Mulla Fazliddin endi dardini aytishga majbur boʻldi. Bu qiz me'morlik san'atidan ham xabardor boʻlib, anchagina kitob mutolaa qilgan ekan.

¹ Toqi - choʻqqisimon zaifona bosh kiyim.

– Bobur mirzo zafar bilan qaytsalar, Xudo rahmati otamning oʻsha orzularini roʻyobga chiqarurlar, – dedi. Oʻshanda yana oʻzingiz bosh boʻlursiz, mavlono!

Dunyoda hali hech bir tovush mulla Fazliddinga bunchalik yoqimli tuyilmagan edi. Xonzoda begim har gal uni «mavlono», deb ulugʻlash bilan goʻyo porloq bir istiqbol va'da qilganday boʻlardi. Podshoh oilasidan me'morchilik san'atini shunchalik biladigan, qadrlaydigan ittifoqdosh topilgani mulla Fazliddinning koʻnglini koʻtaribgina qolmay, qalbida gʻalati bir zavq va dadillik uygʻotdi.

U sirpanchiq qoyatoshga koʻtarilishdan koʻra tushish qiyinligini bilar edi. Shuning uchun Xonzoda begimni pastga kuzatib tusha boshladi. Xalq «qilkoʻprik» deb nom qoʻygan tor va xatarli tosh soʻqmoqdan oʻtayotganlarida, Xonzoda begimning ovogʻidagi tagi silliq charmdan tikilgan etigi tovib ketdi. Xonzoda begim muvozanatini yoʻqotib, yonida borayotgan kaniziga qoʻl choʻzdi. Ammo kaniz ham zo'rg'a kelayotgan edi, ikkovi barobar chayqalib ketdi. Kaniz qoʻrqib chinqirib yubordi. Ular pastdagi chaqir toshlarga yiqilib tushadigan boʻlganda, mulla Fazliddin oldinga sakrab oʻtib, ikkovini ikki qoʻli bilan quchoqlab tutib qoldi. Yoshgina kaniz qoʻrqqanidan mulla Fazliddinning yelkasiga yopishib oldi. Kiyikday chaqqon Xonzoda begim yigitning yelkasidan tutib, oʻzini tez oʻngladi va unga sekin rahmat aytdi. Shu payt mulla Fazliddin oʻz yuzida Xonzoda begimning iliq nafasini his qildi. Qizning yuzidami, lablaridami, gul atriga oʻxshamaydigan, ammo undan ham yoqimliroq, sirliroq bir hid bor edi. Mulla Fazliddin shu hidni oldi-yu, Xonzoda begimning shoh qizi ekanligini go'yo unutdi. Qizning salqin, yumshoq qoʻlidan ushlab naryog'i tekis ketgan so'qmoqqa chiqqunlaricha qoʻyib yubormadi. Besh-oʻn qadamlik masofada oddiy me'mor bilan malika orasidagi farq go'yo yo'qolib ketdi,

ular bir-birlariga faqat zabardast yigit-u goʻzal qiz boʻlib tuyildilar. Lekin undan narida yana kanizlar, jilovdorlar, savdarlar oraga tushib, Xonzoda begimni qurshab olib ketdilar. Mulla Fazliddin gʻalati bir tush koʻrib uygʻongan odamday hayratlanib qolaverdi.

Ertasi kuni Xonzoda begim yordamga yuborgan ikkita norgʻul yigit mulla Fazliddinga kerakli yuklarni pastdan tashib chiqa boshladi. Oradan bir hafta oʻtgach, tuyaga ortilgan koshinlar ham yetib keldi. Xonzoda begim yubortirgan har bir narsada mulla Fazliddin uning oʻzini koʻrganday boʻlardi. Poʻlat sandiqdagi suratni oqshomlari yolgʻiz qolganda qoʻliga olib uzoq-uzoq tikiladi. Qiz sirgʻanib ketgan mana shu togʻning toshlaridan Xonzoda begimning oʻshandagi iliq nafasi va sirli hidi hamon kelib turganga oʻxshardi. «Nahotki bu muhabbat boʻlsa? – derdi mulla Fazliddin oʻziga-oʻzi. – Yoʻq, zinhor! Mendagi tuygʻu – begʻaraz ilohiy bir mehrning nishonasi, xolos. Boshqacha boʻlishi mumkin emas!»

Hozir yana Xonzoda begim yaqinlashib kelayotganini koʻrib, sarosimaga tushib qolgan mulla Fazliddin oʻzining mana shu e'tiqodida mahkam turishga tirishar va ayollar tomondan nigohini olib qochardi.

3

Bobur mirzo otdan tushganda boʻyi oʻsib, katta yigitlarga tenglashib qolgani bilindi. Qadam olishi ham xiyla salmoqli. Taxtga oʻtirganidan beri oʻtgan soʻnggi uch yil uni juda tez ulgʻaytirgan, koʻz qarashlari koʻpni koʻrgan odamlarnikiday vazmin. Faqat xipcha qomati va hali uncha toʻlishmagan yelkalari endi oʻn besh yoshga kirganini eslatib turardi.

Ammo toqqa chiqishda Boburning oʻsmirligi juda ish berdi. U hammadan oldinda toshdan-toshga yengil koʻtarilib borar, goh onasiga, goh opasiga yuqoridan qoʻl choʻzib yordamlashib qoʻyardi. Beklar va mulozimlarning koʻpchiligi pastda qolishdi. Yoʻl tor, hujra kichkina boʻlganligi uchun hozir birinchi navbatda podshoh oilasi va Boburga eng yaqin kishi boʻlgan eshik ogʻa Qosimbek chiqishmoqda edi. Qavchin urugʻidan chiqqan Qosimbek toʻladan kelgan barvasta kishi edi, togʻning yarmiga chiqquncha nafasi boʻgʻilib, qiynalib qoldi. Bobur buni koʻrib, tekisroq bir tosh ustida toʻxtadi. Qosimbek ham toʻxtab, orqada kelayotgan mulla Fazliddinga yuzlandi:

– Janobi me'mor, bu toshlardan zinapoya tarashlash xotiralariga kelmabdir-da.

Mulla Fazliddin pastroqda toʻxtab qoʻl qovushtirdiyu, yengil bir ta'zim bilan javob berdi:

– Agar zoti oliy amr bersalar, zinapoya tarashlash imkoni bor.

Qosimbek yuqoriga yuz oʻgirib, Boburga savol nazari bilan qaradi. Bobur kulimsirab:

- Ajabo! dedi endi yoʻgʻonlasha boshlagan oʻsmir ovozi bilan. - Togʻ choʻqqisiga ham zinapoya bilan chiqurlarmi? Soddaroq odam boʻlgan Qosimbek taklifi oʻrinsiz chiqqanini sezdi-yu, izzat-nafsga bormay, gapni kulgiga burdi:
- Amirzodam, lutf qildilar. Kaminani bu terlabhansirashlardan zinapoya ham qutqarolmas edi.

Endi Qutlugʻ Nigor xonim ham kuldi:

- Qosimbek janoblari haqdir. Ot-ulov oʻtolmaydigan bu choʻqqilarga shoh ham piyoda chiqur, malika ham!
- Hatto, xonzodalar ham! deb Bobur opasiga qarab shoʻx kulimsiradi.

Shunaqa hazil-huzullar bilan hujraga yetib bordilar. Niliy gumbazli jajji bino koʻklam quyoshida shunday nafis jilolanib koʻrindiki, Boburning dili birdan ravshan tortib ketdi. Atrofdagi tabiatning goʻzalligi, bahor va togʻlar ayvonga ishlatilgan naqshlarni, gumbazdagi koshinlar rangini allanechuk juda ochib koʻrsatar edi.

Qosimbek Boburni, uning onasi va opasini tavoze bilan ichkariga kuzatib qoʻydi-yu, oʻzi marmar zinapoya oldida qoʻl qovushtirganicha qoldi. U ayollar bor joyga podshohdan ishora boʻlmaguncha kirmas edi. Mulla Fazliddin Qosimbekdan beriroqqa – ayvon tagiga kelib turdi. Hujra eshigi yongʻoq yogʻochidan oʻymakor qilib, zar bilan ishlangan edi. Bobur goʻzal oʻymakorliklarga, devor va shift bezaklariga bir-bir koʻz tashlab chiqdida, hujraning eshigini ochdi. Onasi bilan opasiga yoʻl berib, keyin oʻzi ichkariga kirdi.

Hujraning ichi qorongʻi boʻlmasa ham qoidaga binoan gʻarb tomonidagi mehrobga sham yoqib qoʻyilgan edi. Kunduzgi yorugʻlik qarshisida koʻzga zoʻrgʻa tashlanayotgan sham yogʻdusi yon-veridagi gulgun naqshlarga tushib, elas-elas jilvalanardi.

Bu hammasi Boburda gʻalati bir zavq uygʻotdi. U sham yonidagi toʻq-qizil naqshlarni Xonzoda begimga koʻrsatib:

- Islimi gulxan shumi? - deb soʻradi.

Xonzoda begim bir ukasiga, bir naqshga qaradi-yu, shoʻx jilmaydi:

- Bir qoshiq qonimdan kechsangiz, ayturmen.

Bobur ham kulimsirab:

- Kechdim, aytingiz, - dedi.

Xonzoda begim oʻngga qayrilib, eshik tepasidagi qip-qizil naqshlarni koʻrsatdi.

– Islimi gulxan mana bu. Siz naqshi lolani bunga oʻxshatmishsiz, amirzodam.

Xonzoda begim koʻrsatgan naqshlar haqiqatan qip-qizil olov tillarini eslatar, uning eshik tepasiga naqshlanishi ham bejiz emas edi. «Keluvchiga ergashgan balo-qazoni olov olib qoladi», degan qadimiy e'tiqod va kelin-kuyovni eshik oldiga yoqilgan olovdan aylantirib olib oʻtish odatlari Boburning esiga tushdi. U opasiga tan bergan kabi qarab:

- Siz haqsiz, men sahv qilibmen, - dedi.

Shunda Qutlugʻ Nigor xonim gap qoʻshdi:

- Bobur mirzoning sahvlari uzrlik. Chunki bu hujrada naqshi lola ham xuddi gulxandek yonib koʻrinur!

Onasining lutf qilib aytgan soʻzlari Boburning hujradan olgan zavqini yana bir darajada oshirdi.

Uchovlari ayvonga qaytib chiqar ekanlar, pastda turgan mulla Fazliddin Boburning chehrasi ochilib ketganini koʻrdi. Bobur zinapoya oldida turgan Qosimbekka qarab:

- Buratogʻga juda munosib! - deb qoʻydi.

Buratogʻni Bobur yoshligidan yaxshi koʻrar edi. Tekis vodiyning oʻrtasiga tushgan bu baland togʻ odamlarni hayratlantirish uchun yaratilganga oʻxshardi. Goʻyo u ulkan togʻning bir parchasini ilohiy bir kuch shunday koʻtarib olib kelgan-u tomosha uchun sayhon joyga chiroyli qilib oʻrnatib ketgan. Mana shunday toqqa munosib boʻlish hujra uchun juda katta sharaf ekanini sezgan Qosimbek bir chetda qoʻl qovushtirib, sukut saqlab turgan me'morni chaqirdi. Bobur podshoh boʻlgandan beri oʻz koʻnglidan chiqarib qurdirgan birinchi imorati juda kichik boʻlsa ham unga aziz va gʻanimat tuyildi. Bu hujra togʻ qirrasida shunday joziba bilan uzoq vaqt turishini istab, me'morga savol nazari bilan qaradi:

- Togʻda qor-yomgʻirlar koʻp boʻlur. Hujra uzoq vaqtga bardosh berurmikin?

Ayvonda turgan Qutlugʻ Nigor xonim bilan Xonzoda begim ham me'morga koʻz tikishdi. Mulla Fazliddin hayajonlanganidan tizzalari bukilib-bukilib ketmoqda edi. U qoʻlini ta'zim bilan koʻksiga qoʻyib:

– Inshoollo, bardosh berur, – dedi. Qosimbek uning gapini tasdiqlab:

- Ha, qirq-ellik yil yaxshi turur¹, - deb qoʻydi.

«Qirq-ellik yil» degan soʻzlar mulla Fazliddinga ozor bergani uning Qosimbekka qisqa bir koʻz tashlab qoʻyganidan sezildi. Shu payt mulla Fazliddin oʻz yuziga kimningdir mayin nigohi tushganini his qildi. Boshini koʻtarsa, Xonzoda begim yuziga yopilgan yupqa oq harir parda orqali mulla Fazliddinga qarab turibdi. Mulla Fazliddinning butun vujudi olov seli ichida qolganday boʻldi. U hozir siri fosh boʻlishi mumkinligini sezib, yana ta'zimga bosh egdi. Shunda Xonzoda begim Boburga izoh berdi:

- Amirzodam, Xudo xohlasa, bu hujra koʻp avlodlarni koʻrgay. Qarang, qor-yomgʻir tegadigan joylari sangkorlik qilingan. Poydevori qoyatoshga mahkam

¹ Chindan ham, O'shdagi bu hujra to'rt yuz yildan ortiq mustahkam turdi. Togʻ tepasida oqarib koʻringani uchun xalq uni «Oq uy» deb ataydigan boʻldi. Asrlar oʻtishi bilan ta'magir shayxlar bu binoni «Sulaymon paygʻambar tomonidan qurilgan gadim joy» deb e'lon gildilar, tarixdan bexabar odamlarni bunga ishontirib, nazr-niyoz undirish vositasiga aylantirdilar. Yigirmanchi asrning oʻrtalarida akademik Ibrohim Moʻminov Oirg'iziston olimlari bilan hamkorlikda tarixiy haqiqatni tiklab, bu hujrani Bobur mirzo qurdirganini ilmiy jihatdan asoslab berdilar. Oq uyning peshtoqiga buni bildiradigan marmar vodgorlik oʻrnatildi. Ammo Bobur nomining bunday ulugʻlanishi mustabid shoʻro mafkurachilarining qahrini keltirdi. Ular hujraning zivoratgoh boʻlganini bahona qilishib, dinga qarshi kurash shiori ostida 1963-yilda Oq uyni askariy qismlar yordamida portlatib buzib tashladilar. Lekin hujraning mustahkam qoyatoshga oʻrnatilgan poydevori butun qolgan edi. Uning tasviri tushirilgan suratlar bor edi. Adolatparvar odamlarimiz orasida Bobur mirzo qurdirgan bu ajoyib obidani qayta tiklash niyati yillar oʻtgan sari kuchayib bordi. Saksoninchi villarning oxirida milliv uvgʻonish shabadalari esa boshlagan davrda O'sh shahrining o'zbek, qirg'iz va boshqa millatlarga mansub vakillari Oq uyni qayta tiklash uchun maxsus jamg'arma tashkil qildilar. Bu jamg'armaga Bobur mirzoning barcha muxlislari tomonidan toʻplangan mablagʻlar hisobiga Oq uy tarixiy asliga mos goʻzal shaklda gayta tiklandi. (Muallif)

oʻrnatilgan. Mulla Fazliddinning mahoratlari baland – Hirot bilan Samarqand me'morlaridan ta'lim olmishlar. Mulla Fazliddin Xonzoda begimning maqtovini ishga oid oddiy gaplardek qabul qilmasa, koʻnglidagi nozik hislarni sezdirib qoʻysa, oʻn jonidan biri ham omon qolmasligini sezdi. Axir joʻn bir me'morning shoh qiziga muhabbati podshoh oilasiga ham, uning beklariga ham haqoratday tuyilishi mumkin!

Xayriyatki, hukmdorlar oldida hayajonga tushish va ta'zim qilish odat tusiga kirib qolgan.

Mulla Fazliddin Xonzoda begimning iliq soʻzlariga javoban yana bir ta'zim qildi-da, yerga qarab, xuddi qilichning tigʻi ustidan yurib borayotganday ehtiyot boʻlib gapira boshladi:

– Hazrati oliyga arzim shulki, Samarqandda Ulugʻbek madrasasining devorlari uchun qanday ganch-u gilmoya, gʻisht-u koshin ishlatilgan boʻlsa, bu hujraning devorlariga ham faqir shularni ishlatmishmen. Xudodan umidim bor. Bobur mirzoning muborak nomlariga mansub bu hujra asrlar davomida mustahkam turur.

Bobur bu soʻzlardan ta'sirlanib:

– Aytganingiz kelsin, – dedi. – Hujra biz istaganimizdan ham yaxshi!

Qosimbek «qirq-ellik yil turar», deb hujraning umrini qisqa qilib qoʻyganidan endi xijolat boʻldi. Hujradan narida xarsangtosh ortida buyruq kutib turgan savdarboshiga bir qarab oldi-da, keyin me'morga oʻgirildi:

Ofarin sizga, mulla Fazliddin!
Bobur Qosimbekning gapini toʻgʻrilab:

- Mavlono Fazliddin! - dedi.

Shu bilan me'morga moʻtabar mavlonolik unvoni berilganday boʻldi. Qosimbek podshoh oldida bir necha marta ustma-ust sahv qilganini bir harakat bilan toʻgʻrilagisi keldi-yu, savdarboshiga buyurdi:

- Mavlonoga to'n keltirilsin!

Savdarboshi sarosima boʻlib pastga qaradi. Mukofot uchun olib yuriladigan toʻnlar togʻ etagidagi chodirlarda qolgan edi. Qosimbek buni sezdi-yu, oʻzining egnidagi yangi kimxob toʻnni yechmoqchi boʻlib:

– Mirzo hazratlari, ijozat bering! – dedi. Bobur uning joʻmardligiga tan bergandek, jilmayib bosh irgʻadi.

Qosimbek zar yoqali kimxob toʻnini yechib, mulla Fazliddinning yelkasiga tashladi.

– Mavlonoga bizdan bitta ot anjomi bilan in'om qilinsin, – qoʻshimcha qildi Bobur.

Mulla Fazliddin ta'zimga egilib minnatdorchilik bildirar ekan, bir necha kishining:

- Muborak! - degan soʻzlarini eshitdi.

Bu soʻzlarning orasida eng yoqimlisi – Xonzoda begimning muborakbodi boʻldi. Mavlono Fazliddin unga ikkinchi marta qarashga jur'at etolmay yerga koʻz tikib turgan boʻlsa ham, shu daqiqalarda oʻzini baxtiyor sezar edi.

4

Kechki payt hujrada Boburning yolgʻiz oʻzi qoldi. Qosimbek kerakli odamlarga: «Hujra mirzo hazratlarining xilvatgohlari boʻldi, kechasi ham oʻsha joyda tunamoqlari mumkin», deb bildirib qoʻydi. Qoʻrchilar Boburning koʻziga tashlanmaslikka tirishib, hujraning orqa tomonida qoʻriqchilik qila boshladilar.

Doimo koʻpchilikning diqqat markazida boʻlish va podshohning har bir gapi, har bir harakati kimningdir taqdiriga ta'sir qilishini unutmay hamisha ziyrak va ehtiyotkor turish Boburni juda siqiltirar edi. Yosh tanasi erkin boʻlishni, oddiy tengdoshlari kabi ochiqsochiq yayrab yurishni qoʻmsar edi. Hozir u hujra ichkarisiga toʻshalgan beqasam koʻrpachalar ustida boshiga yostiq qoʻymasdan birpas chalqancha yotdi.

Keyin agʻanab yuztuban boʻldi-da, engagini kaftiga tirab, devordagi naqshlarga tikildi. Kuni boʻyi otda yurib toliqqan boʻlsa ham dam olib yotgisi kelmas edi. Oʻrnidan sakrab turib bir-ikki marta qulochini yozib kerishdi, esnadi. Soʻng ayvonga chiqdi-da, yana atrofni tomosha qila boshladi.

Toʻrt tomon bahor nafosatiga toʻla. Havo musaffo boʻlgani uchun pastda yoqilayotgan olovning tutuni ham odatdagidan tiniqroq koʻrinadi. Oxiri qorli togʻlar bilan tutashib ketgan vodiyning koʻz ilgʻagan hamma joyi koʻkalamzor. Bir yogʻida Oʻzgan, bir yogʻida Margʻilon, uzoqlarda Isfara, Xoʻjand, Koson va Axsi – bu oʻrchinlarning¹ hammasida bogʻ-rogʻlar chaman boʻlib gullaganini Bobur goʻyo xayol koʻzi bilan koʻrib turibdi. Ulugʻvor togʻlar afsonaviy Qal'a devorlaridek atrofni oʻrab turgan bu goʻzal vodiy hozir avvalgidan xiyla osuda. Urush tugaganiga ikki yildan oshdi.

Bunday tinch, mas'ud damlarda uni qogʻoz-qalam oʻziga tortardi. Savdarlar hujraga olti oyoqlik miz² keltirib qoʻyishgan. Bobur miz yoniga oʻtirib «Vaqoye'» deb atagan xotira daftarini ochdi. Soʻnggi yozuvlari – oʻzi yaqinda koʻrgan Konibodom va Isfara haqida edi. Endi bu yozuvlarini davom ettirib, Oʻsh toʻgʻrisida bita boshladi: «Oʻsh qasobasi Andijondan toʻrt yigʻoch yoʻldir... Boratogʻning tumshugʻida tarix toʻqqiz yuz ikkida³ men bir ayvonlik hujra soldim. Bu hujra bisyor yaxshi voqe' boʻlibdur. Tamom shahar va mahalla oyogʻ ostidadur...»

Bobur Oʻshning binafshasi, lolalari, oqar suvlari, oq mavjli qizil toshlari haqida ham berilib yozayotgan edi, birdan Qosimbek eshik ogʻzida paydo boʻldi:

– Amirzodam, xayolingizni boʻlsam, ma'zur tuting. Buxorodan – Sulton Ali mirzodan maktub kelmishdir!

¹ Oʻrchin – hozirgi tuman tushunchasiga toʻgʻri keladi.

² Miz – olti oyoqlik stolcha.

³ Milodiy 1497-yil

Boburdan ishora boʻlgach, Qosimbek ichkariga kirib, oʻram qilingan oltin bogʻichli maktubni Boburga uzatdi. Bobur maktubni ochib oʻqidi-yu:

- Sulton Ali mirzo bizni Samarqand yurishiga chorlabdir, dedi.
- Bitim tuzgan edingiz-da, amirzodam. Safarga chiqmoq kerak.
- Oshiqmang, bek. Avval onam hazratlarining rizoligini olaylik.

Bobur har muhim ishda onasidan maslahat soʻrashi Qosimbekka uncha yoqmas edi. Chunki ayollar jang-u jadaldan juda bezgan edilar. Jangovar beklar esa urushsiz yursa qilichlari zanglab qoladigandek betoqat boʻlishadi.

Qosimbek Qutlugʻ Nigor xonimning chodiriga Bobur bilan birga tushib bordi.

Xonzoda begim ham onasining huzurida oʻtirgan ekan. Ular Bobur uchun dasturxon yozdirib, chinni laganda kabob keltirdilar. Kabobdan soʻng qimiz ichildi. Qosimbek moʻyloviga tekkan qimiz yuqini kafti bilan artib, soʻz boshladi:

- Amirzodam Sulton Ali mirzo bilan ittifoq tuzganlar. Bu yerdan cherik tortib bormoqqa soʻz berganmiz.
- Tangrim bizni farahli kunlarga yetkazdi, dedi Qutlugʻ Nigor xonim. – Endi shuni gʻanimat bilaylik, janob Qosimbek, Sulton Ali mirzo oʻz ogʻasi Boysunqur mirzo bilan Samarqand taxtini talashurlar. Bobur mirzo ulardan baland turmoqlari kerak. Tangriga shukr, amirzodamning Andijonda oʻz taxtlari bor.

Qosimbek bu soʻzlarga tezda javob topolmay taraddudlanib qoldi. Shunda Xonzoda begim gapga aralashdi:

- Amirzodam, Samarqand yurishining sarf-u xarojatiga Andijonda saroylar, madrasalar qursangiz boʻlur. Andijon ham Samarqanddek sayqali roʻyi zamin boʻlsa nomingiz Ulugʻbek mirzoning nomidek shuhrat qozonsa - biz mushtiparlaringizning orzuyimiz shu!

Bobur hazilomuz kulimsiradi:

– Men avval Samarqand sayqalini bir koʻrmoqchimen. Ibrat olsak, undan soʻng olurmiz.

Qosimbek Boburning soʻzlarini yoqtirib:

- Lutf qildingiz, amirzodam! deb qoʻydi.
- Lekin amirzodam Samarqandni yoshliklarida koʻrganlar, – deb e'tiroz qildi Qutlugʻ Nigor xonim.
- Besh yoshimda koʻrganim yodimda uncha qolmabdir.

Xonzoda begim kuldi:

– Bultur Samarqand azimati bilan ketib bizni koʻp sogʻintirgan edingiz-ku!

Bobur bulturgi muvaffaqiyatsiz yurishini eslab, jiddiylashdi:

– Rost, bultur toʻrt oy Samarqand atrofini kezdik. Ammo shahar darbozalari biz uchun biron marta ochilmadi. Biz bobokalonimizning poytaxtini koʻrishga munosib emas emishmiz!

Bobur bu soʻzlarni shunday kuyunib, alami kelganini yashirolmay lablari titrab aytdiki, uning hali ham juda yosh ekanligi birdan bilinib qoldi. Holbuki, u Samarqandga qoʻshin tortib borgan, agar shaharga kirsa, taxtga oʻtirishi kerak edi. Toʻgʻri, Boysunqur mirzo ham Temuriylar avlodidan boʻlib, yana tagʻin Boburdan besh yosh katta edi, demak, taxtda oʻltirishi qonuniy edi. Biroq Andijon beklari Boysunqur mirzodan yuz xil kamchilik topib, uni hamisha yomonlab gapirishar va Samarqand taxtiga faqat Boburni munosib koʻrishar edi.

Boysunqur mirzo buni bilganligi uchun Boburni Samarqandga yoʻlatmas edi. Mabodo, Bobur shaharga qoʻshinsiz, shunchaki poytaxtni koʻrish uchun kiradigan boʻlsa, Boysunqur mirzo uni tuttirib, yoʻq qilib yuborishi mumkin edi. Chunki oradagi taxt talashi va beklarning adovati ularni bir-birlariga dushman qilib qoʻygan edi.

Qutlugʻ Nigor xonim endi oʻn besh yoshga kirgan oʻgʻlining bu talashlar va adovatlarga aralashmasdan, oʻz mulkida osoyishta hukm surishini istardi. U Boburning alamdan oʻzgarib ketgan yuziga onalarcha qayishib qaradi-yu, unga joni dilini bergisi kelib gapirdi:

- Boburjon, soʻzimga ishoning, bu besh kunlik dunyo sizning kuyunishingizga arzimaydir!

Onasi oʻgʻlini podshoh boʻlmasidan oldingi nomi bilan atab, mehri tovlanib gapirgani Boburga juda yoqimli tuyildi. Bir lahza u oʻzini mehribon bir onaning begʻam, betashvish oʻgʻlidek sezdi-yu, yelkasidagi katta yuk yerga tushgandek yengil tortdi.

- Vaqti-soati kelur. Samarqand orzusiga ham yetishursiz, - deb davom etdi Qutlugʻ Nigor xonim. -Biroq hozir raiyat osoyishta umr koʻrishga mushtoq. Qanotingiz ostida Qosimbekdek tadbirkor amir-u umarongiz bor. Mana shu Oʻshdagi hujrani qurgan me'mordek hunarpeshalar sizning xizmatingizda. Endi onangiz sizdan iltimos qilur: Samarqand muhoribasini besh-olti yilga kechiktirsangiz. Barchamizga bosh boʻlib, vodiyni obod qilsangiz, Andijonda, Margʻilonda, Oʻshda katta obidalar qursangiz!

Qutlugʻ Nigor xonim podshoh oʻgʻliga koʻpdan beri bunchalik jiddiy, bunchalik qat'iy iltimos bilan murojaat qilmagan edi. Qosimbek yerga qarab, sukutga ketdi. Bobur ham bir lahza dasturxon chetida oltin jomda qizgʻish koʻrinayotgan qimizga koʻz tikib jim qoldi. Umumiy sukunatda Xonzoda begimning nafis, tiniq ovozi eshitildi:

- Amirzodam, siz Navoiyning dostonlarini yod bilursiz. Farhod qanday ajib binolar qurganini bir eslang. Men bir mungliq egachingiz doim orzu qilurmen: siz ham Farhoddek bunyodkor boʻlingiz! Dunyoda bundan ulugʻ, bundan savobli ish yoʻq! Bobur Oʻshda oʻzi qurdirgan kichik bir hujradan bugun qanchalik zavq olganini esladi-yu, onasi bilan opasining tilaklarini qoʻllab-quvvatlagisi keldi. Ammo u bunday muhim davlat ishlarini bir oʻzi hal qilolmasligini ham bilar edi. Bobur Qosimbekka koʻmak soʻragan kabi qarab:

- Chorasi topilurmikin? - dedi.

Gap Samarqand yurishini qoldirish haqida ekanini Qosimbek sezdi. Asli harbiy odam boʻlgan va juda koʻp jang-u jadallarda qatnashgan Qosimbek Bobur istagan chora topilmasligini ich-ichidan sezib turardi. Chunki Samarqand yurishi hamma nufuzli beklarning mashvaratida ma'qullangan, tayyorgarlik ishlari allaqachon boshlab yuborilgan. Katta bir toʻsiqdan oʻtish uchun butun kuchi bilan sakrayotgan otni birdan toʻxtatib boʻlmaydi, mabodo zoʻr bilan toʻxtatilganda ham ot yiqilishi, chavandozini yerga uloqtirishi mumkin. Qosimbek buni ochiq aytishga jur'at etolmadi-yu, qoʻlini koʻksiga qoʻyib:

Amirzodam, qulingiz chora topishdan ojizmen,
dedi.

Bu javob Boburga ogʻir botdi.

- Onamning iltimoslarini rad etaylikmi?

Bobur bu soʻzlarni shunday zarda qilib aytdiki, Qosimbek uning hozir onasi va opasi aytgan ishlarni qilgisi kelib turganini aniq sezdi. Soʻng u Boburning kechagina Samarqand yurishiga tarafdor boʻlib, janglarda qatnashish ishtiyoqida yonib aytgan soʻzlarini esladi-yu, ichida gʻijinib qoʻydi. Boburdagi bu oʻzgaruvchanlikni Qosimbek yoshlik gʻoʻrligidan koʻrar, xususan, bunday murakkab davlat ishlarida ayollarning gapiga kirishni katta bir zaiflik belgisi deb bilardi. Ammo Qosimbek Qutlugʻ Nigor xonim bilan ham hisoblashishga majbur, chunki yosh podshohga onasining ta'siri kuchli ekanini oʻz koʻzi bilan koʻrmoqda edi.

– Xonim hazratlarining iltimoslari menga toji sar boʻlsin, – dedi Qosimbek choʻkkalab oʻtirgan koʻyicha bosh egib. – Qulingiz aytmoqchimenkim, bunday muhim ishda barcha nufuzli beklarning rizoligini olmasak boʻlmas.

Podshoh oilasi Qosimbekka alohida ehtirom bildirganda uning nomiga «amirlar amiri» degan unvonni qoʻshib aytar edi. Hozir ham Qutlugʻ Nigor xonim:

- Janobi amirul umaro, dedi unga. Siz boshqa beklarning rizoligini olishda Bobur mirzoga koʻmak berurmisiz?
- Jonim bilan! Ammo beklarning ba'zi andeshalaridan faqir xabardormen. Gustohlik sanalmasa aytay.
 - Aytingiz, dedi Bobur.

Qosimbek yerga qarab, bir lahza oʻy surdi, hali oq tushmagan gʻayir qoʻngʻirtob soqolining uchlari sakarlot chakmonining¹ zarrin yoqasiga tegib, qayrildi. Nihoyat, Qosimbek boshini koʻtarib, Boburga qaradi-yu, Samarqanddagi ulugʻ obidalar ulkan bir davlatning kuchi va butun viloyatlarning ishtiroki bilan qurilganini, hozir oʻsha yagona davlat parchalanib ketganini, Fargʻona katta vodiy boʻlsa ham, ammo Movarounnahrning faqat bir qismi ekanini gapira boshladi. Uning nima demoqchiligini sezgan Xonzoda begim istehzoli jilmayib soʻradi:

- Janobi amirul umaro, Andijonda obidalar qurishga kuchimiz yetmaydi, demoqchimisiz?
- Oliy nasab begim, siz Samarqanddek ulugʻ shahar qurish haqida soʻz ochdingiz. Beklar ayturlarki, ulugʻ shahar bunyod etmoq uchun yana oʻsha ulugʻ davlatni tiklamoq kerak. Butun viloyatlarning kuchini bir joyga yigʻmoq kerak. Hozirgi parokandalik ulugʻ qurilishlar qilishga imkon bermagay. Qosimbekning bu gaplari

¹ Sakarlot chakmon – tuya junidan qilingan yengil, qimmatbaho chakmon.

Boburga juda mantiqli tuyildi. U onasiga qarab bundan ham mantiqliroq bir soʻz kutdi.

– Janob Qosimbek, ulugʻ obidalarni faqat Amir Temurdek sohibqironlargina qurgan emas, – dedi Qutlugʻ Nigor xonim. – Hirotda Alisherbek Ixlosiya, Unsiya otliq binolar qurmishlar, Bobur mirzoning hokimiyatlari Alisherbekning hokimiyatlaricha emasmi? Axir Alisherbek bir tojdorning musohibi¹ boʻlsalar, Bobur mirzo mustaqil davlatning podshosilar-ku!

Outlug' Nigor xonimning bu so'zlari Boburning aalbida cho'kib yotgan eng o'tli istaklarini yuzaga qalqitib chiqarganday boʻldi. Uning yoshlik ehtirosi bilan qalbiga tugib yurgan eng kuchli orzusi janglarda katta gʻalabalarga erishib yoki ajoyib she'rlar, dostonlar yozib el og'ziga tushish, so'ng Navoiydek ulugʻodamlarga tanilish va ularning maxsus e'tiborlariga sazovor bo'lish edi. Yetti oy ovora bo'lib Samarqandni ololmay kelganidan kevin, janglarda katta gʻalabalarga erishish hali ushalmaydigan bir orzu ekaniga uning koʻzi yetib qoldi. Ulugʻ shoir boʻlish orzusi ham qoʻl yetmas bir balandlikda uchib yurgan baxt qushiga oʻxshaydi. Bobur uni tutishga hali kuchi yetmasligini sezadi. Ammo hozir onasi Navoiy qurgan imoratlarni tilga olishi bilan Boburni oʻsha oʻtli orzusiga yetkazadigan boshqa bir yoʻl «yalt» etib koʻziga koʻrinib ketdi. Navoiy gurgan Ixlosiya va Unsiyalarning shuhrati ogʻizdan-ogʻizga oʻtib, Fargʻona vodiysiga yetib kelgan ekan, endi bu yerda o'n besh yoshlik podshoh oʻshanaga obidalar qurdirsa, ovozasi Hirotga ham yetib bormasmikin? Keyin, ehtimol, Navoiy ham buni eshitar, Boburning kimligini soʻrab bilar, uni orqavoratdan tanib qolar. Keyin, balki Bobur Hirotga borar yoki Navoiyning oʻzi bu tomonlarga kelishni ixtiyor qilar. Navoiy Husayn Boyqaroning saroyidan bezib yurganini Bobur ham eshitgan edi. Balki ulugʻ

¹ Musohibi - yaqin suhbatdoshi, doʻsti.

shoir Xurosondan Fargʻona vodiysiga kelib, yosh Boburga murabbiy boʻlar. Oʻyi shu yerga yetganda, Bobur juda hayajonlanib ketdi.

Koʻzlari yonib, Qosimbekka qaradi-yu:

- Onam haqlar, - dedi. - Beklarni koʻndirmoq kerak!

Boburning soʻnggi soʻzi farmondek eshitildi-yu, Qutlugʻ Nigor xonim bilan Xonzoda begimning chehralari ochilib ketdi. Ular: «Qosimbek endi yengildi», deb oʻyladilar. Ammo ulkan gavdali Qosimbek oʻzining keng yelkalari ortida zoʻr beklar turganini his qilganday hamon taslim boʻlmas edi.

- Amirzodam, farmoyishingizni ado etishdan oldin beklarning yana bir andishasini aytishga ruxsat eting.

Bobur istar-istamas bosh irgʻab, ruxsat bergan boʻldi. Qosimbek lablarini yopib turgan uzun qoʻngʻir moʻylovini qoʻli bilan ikki yonga surdi-da, kulimsirab, Xonzoda begimga qaradi:

– Begim, siz amirzodamni Farhodga yaxshi qiyos qildingiz. Beklarimiz zamon Farhodining xizmatida boʻlishdan iftixor qilurlar. Bizning orzuyimiz – Farhodimizni oʻz Shirinlariga yetkazishdir. Ammo, – deb Qosimbek birdan jiddiylashdi, – ma'lumingizkim, bizning Shirin bugun Samarqandda yogʻiy qurshovida asira kabi iztirob chekmoqdalar.

Boburning yuziga nafis qizillik yugurdi. U uyalganini sezdirgisi kelmay, boshini egdi-yu, oʻz tizzalariga koʻz tikdi.

Qosimbek juda mushkul va nozik bir gapni qoʻzgʻagan edi. Bobur besh yoshligida unga Samarqand podshosi Sulton Ahmad mirzoning oʻrtancha qizi Oyisha begimni unashtirib qoʻyishgan edi. Hozir shu qiz oʻn uch yoshga kirgan. Bobur uni yaqin yillarda koʻrgan emas, ammo koʻrganlar hammasi Oyisha begimning gʻunchadek goʻzalligini maqtab kelganini eshitgan. Oʻsha goʻzal qizcha Boburni oʻz najotkorini

kutganday kutadi, buni ham Boburga kelib aytuvchilar bor. Bobur ham oʻzining malikasiga qahramonliklar koʻrsatib yetishishni istaydi. U Oyisha begimning oʻzini eslolmasa ham, besh yoshida Sulton Ahmad mirzoga uzatilgan termizlik goʻzal bir kelinchakni yaqindan koʻrgani yodida.

«Bet ochar» degan odatga binoan, yosh kelinchakning yuzidagi pardasini pok nafasli yosh bola ochishi kerak edi. O'sha kunlarda Qutlug' Nigor xonim besh yoshli jajji oʻgʻli Boburni Samarqandga toʻyga olib borgan edi. Sulton Ahmad mirzoning oʻgʻli yoʻq edi, Boburga podshoh oilasi havas bilan qarar edi. Shuning uchun kayvonilar «yangi tushgan kelin ham mana shu sherdek oʻgʻil koʻrsinlar», devishib, bet ochishga Boburni munosib topdilar. Bu hodisaning koʻp tafsilotlari Boburning xotirasida qolmagan. Ammo oltin qoʻshib toʻqilgan harir oq pardani kelinchakning yuzidan olganda butun borlig'ini nihoyatda yoqimli bir tuygʻu chulgʻab olgani hech esidan chiqmaydi. Bu - goʻzallik tuvgʻusi ekanini u endi biladi. Termizlik kelinchak aqlni shoshiradigan darajada koʻhli boʻlganiga besh yashar bolaning fahmi yetmagan boʻlsa ham, ammo goʻdak qalbi afsonaviy bir jozibadan toʻlqinlangani yodida qolgan. Shuning uchun hozir unga Samarqanddagi qalligʻining husnini maqtaganlarida, oʻsha kelinchak esiga tushadi. Boshqa tafsilotlar oʻqigan kitoblaridagi goʻzallar tasviridan olib qoʻshiladi. Bobur Samarqanddagi qalligʻini oʻsmirlarcha bir soflik bilan gʻoyibona sevadi. Mana shu sevgilisi bugun Boburning dushmanlari asoratida ekan, u Andijonda bamaylixotir yura oladimi?

Janob Qosimbek, - dedi Qutlugʻ Nigor xonim,
kelinimizning taqdiri bizni ham iztirobga solur.
Biz onalaridan iltimos qilib kitobat yuborgan edikki,
Ovisha begimni Toshkentga egachilari Robiya begim

huzuriga joʻnatsinlar. Ehtimol, shu iltimosimiz bajo keltirilgandir?

Qosimbek ma'yus bosh egib:

- Afsus, xonim hazratlari, afsus! dedi. Qulingiz Samarqanddagi xufiyalardan kelgan bir xabarni amirzodamga koʻrsatishdan tortingan edim. Sizlarni ham xavotirlantirmoqchi emas edim...
- Nima xabar? Tinchlikmi? xavotirlanib soʻradi Boburning onasi.
- Oyisha begim onalari-yu opalari bilan birga Toshkentga yashirincha ketmoqchi boʻlganlarida, Boysunqur mirzo bilib qolib, monelik qilmishlar. Yogʻiylik maqomida qoʻpol gaplar aytmishdir. Uylari atrofiga odam qoʻymishlar. Hovlilaridan chiqarmas emishlar. Asiralar endi butun najotni Andijondan kutar emishlar!

Soʻnggi soʻzlar Boburning butun vujudini zirqiratib oʻtdi. Uning qalligʻiga qoʻpol gapirib, bechorani asiradek azoblayotgan Boysunqur mirzo shunday gʻazabini keltirdiki, ertagayoq uning ustiga qoʻshin tortib, bostirib borish va qalligʻini asoratdan qutqarish istagi Boburning qalbidagi boshqa hamma istaklarini bosib keta boshladi.

Xonzoda begim ukasidagi oʻzgarishni sezib:

– Amirzodam, iloho asiralarni qutqarish sizga tezroq nasib boʻlsin! – dedi. – Ammo najotni faqat jang-u jadal keltirurmikin? Zaifa egachingizning e'tiqodi shulki, qon toʻkilsa, adovat kuchayur. Boysunqur mirzo asiralarga battar oʻchakishur. Najot urushda emas, amirzodam, najot – sulhda!

Begim hayajonlanib aytgan bu soʻzlar Boburning koʻnglida qoʻzgʻagan boyagi gʻazabni ancha pasaytirdi. «Sulh» soʻzi qalbiga iliq tuyildi.

Xonim darhol qizining gapini quvvatlab, oʻgʻliga yuzlandi:

- Boysunqur mirzoga elchi yuboringiz, amirzodam! Oradagi adovatni yoʻqotingiz!
- Boysunqur mirzo zoʻravonlik qilsin! Men moʻminlarcha bosh egib elchi yuboray!

Bobur bu gaplarni aytar ekan, uning zoʻrlikka zoʻrlik, zarbga zarb bilan javob berish istagi naqadar kuchli ekanligi hammaga sezildi. Qosimbek undagi bu istakni qoʻllab-quvvatlashga tushdi:

- Xonim hazratlari, hozirgi zamonda zoʻravonlikka moʻminlik mutlaqo rost kelmas. Zoʻrlar orasida zoʻr boʻlmoq kerak! Alhol, Shayboniyxon Samarqandga shimoldan koʻz tikmishdir. Hisor hukmdori Xisravshoh iloj topsa, Samarqandga janubdan chang solgʻusidir. Boysunqur mirzo noshud tojdor. Poytaxtni ertamikechmi boy bergay. Agar Bobur mirzo Samarqandni tezroq egallamasalar, bobolaridan qolgan saltanat begona sulola ilkiga oʻtib ketgusidir. Xudo koʻrsatmasin, agar Shayboniyxonmi, Xisravshohmi birontasi Samarqandni zabt etsa, kuch-qudrati oshib, tez kunda Andijon ustiga ham qoʻshin tortib kelgusidir...
- Axir barcha Temuriylar birlashib ittifoq tuzsalar boʻlmasmi? - dedi Nigor xonim kuyunib.
- Barcha Temuriylarning parokanda kuchlarini yigʻib birlashtirmoq uchun ham qudrat kerak. Iste'dod kerak! Boysunqur mirzoga oʻxshaganlarda na unisi bor, na bunisi. Movarounnahrdagi Temuriylar orasida eng sohibiste'dod, sohibqudrat siymo Bobur mirzodirlar. Shuning uchun biz jonimizni amirzodam koʻzlagan ulugʻ maqsadlar yoʻliga tikkanmiz. Inshoollo, Samarqandni bu yil zabt etsak, xavf-xatarlar bartaraf boʻlgʻay. Ana undan keyin chinakam osuda davr kelur, har qancha binolar qursak oson boʻlur.

Xonzoda begim Qosimbekka tikilib soʻradi:

- Xullas, volidayi muhtaramamizning iltimoslari rad etilurmi?

Qosimbek qoʻlini koʻksiga qoʻyib, bosh egdi:

- Oulingizning gustohligini afv eting, begim, men amirzodamning ijozatlari bilan dilimda borini soʻzladim. Bobur arosatda qolib qiynalar edi. Onasi shunchalik ishontirib aytgan haqli iltimoslarni rad etishga uning tili ham bormas, koʻngli ham chopmas edi. Ammo Qosimbek uning qalbida shunday tugʻyonli hislar qoʻzgʻadiki, ulardan qutulishning ham iloji koʻrinmay qoldi. Agar u Samarqanddan yoz kechsa. narigi zo'ravonlar poytaxtni olishi, keyin Andijonga bostirib kelishi muqarrar ekani, unga hozir juda aniq sezilmoqda edi. Butun Movarounnahrda urush girdobidan qochib qutuladigan biron viloyat koʻziga koʻrinmas. Bobur qashqirlar qurshoviga tushib golgandek bezovtalanar edi. Onasining: «Sulh tuzing. binokor boʻling!» - degani «kiyikday beozor yashang» degani edi. Lekin Bobur virtgichlar orasida kivik boʻlib kun koʻrolmasligini ich-ichidan his qilar, shuning uchun atrofini gurshab kelayotgan boʻrilar bilan sher boʻlib olishishni istar edi. Buni sezib turgan Qosimbek munozarani ortiq choʻzib oʻtirgisi kelmadi.

– Amirzodam, bugun otliq sayrga chiqmoqchi edingiz, xonim hazratlarining takliflarini barcha beklar bilan kengashib koʻrurmiz. Oqshom xirgohda mashvarat oʻtkazaylik.

Xonzoda begim onasiga «yalt» etib qaradi-yu: «Hozir birgina Qosimbekka oʻtkaza olmagan takliflarimizni keyin barcha beklarga qandoq oʻtkazurmiz?» demoqchi boʻldi. Qutlugʻ Nigor xonim Boburga yana nimalarnidir aytmoqchi boʻlib ogʻiz juftladi. Ammo Bobur Qosimbekka qarab:

- Mashvarat ertaga chaqirilsin, yaxshiroq oʻylab koʻraylik, - dedi-da, oʻrnidan turdi. Soʻng Qosimbek boshliq mulozimlari bilan otliq sayrga chiqib ketdi. Oʻshning janubidagi keng tekisliklar, toʻlqinsimon qir va adirlar turli-tuman dala gullari bilan bezangan. Sap-sariq qoqilar, koʻk-qizgʻish naxoʻtaklar, nopormon er-baholar orasida uzoqdan qip-qizil gilamga oʻxshab koʻzga tashlanadigan – qiygʻos ochilgan lolaqizgʻaldoqlar edi.

Bobur olisdagi qorli togʻlarga qarab borar ekan, tizzaga chiqadigan yumshoq koʻkat ustida otlar ham mayin qadam tashlab borayotganini sezardi. Bahor nafosati hozir uning koʻzini erkalayotgan boʻlsa ham, ammo diliga ta'sir qilolmas edi. Boyagi mushkul ziddiyatlar hali ham xayolini band qilib, koʻnglida tugun boʻlib turibdi. Bobur bu chigal tugunlarni oʻzi yecholmasligini sezadi. Bu tugunlarni u istaganday yechib bera oladigan dono odam bormikin?

Uning esiga ustozi Xoʻja Abdulla tushdi. Betob boʻlib Oʻshga birga kelolmagan Xoʻja Abdulla ham Boburning Samarqandga qoʻshin tortib borishiga tarafdor edi. «Movarounnahrdagi parokandalikni tugatib, qudratli davlat tuzmaguncha katta orzularimiz roʻyobga chiqmagay!» – degan soʻzlarni Bobur ustozidan ham koʻp eshitgan. Ammo buning uchun yana urushish kerak. Urushga esa onasi qarshi. Kim haq? Bobur bu savolga javob topolmaydi.

Otliqlar uzun bir tepalikka koʻtarilganlarida Qosimbek togʻ tomonni koʻrsatib:

- Suruvlar bu qadar koʻp? - deb taajjublandi.

Bobur u koʻrsatgan tomonga koʻz yugurtirdi. Qir va adirlarning har biridan bir nechtadan suruvlar yopirilib tushib kelmoqda edi. Xoʻja Kalon degan yigirma besh yoshli qop-qora bek qoʻlini peshonasiga soyabon qilib kunbotish tomonga qaradi-yu:

- O'-ho'-o'! dedi. Bu tomonda undan ham ko'p!
- Kunchiqish tomonda ham bor!

Suruvlar gʻuj-gʻuj kelayotganiga qaraganda, yoyilib yurgan qoʻylar emas. Ana, toʻgʻridagi qirlar ortidan yana ikki suruv chiqib keldi. Soʻng uzoqdagi adirlar orasidan birin-ketin uch tavila yilqi otilib chiqdi-yu, berigi tomonga qarab selday bostirib kela boshladi. Chap tomonda yana uch-toʻrt tavila yilqi koʻrindi.

Yilqilar ham, qoʻy suruvlari ham uzoqdagi qorli togʻlardan Oʻshga qarab kelmoqda edilar. Nihoyat, togʻ tomondan tizilib tushib kelayotgan otliq askarlar koʻrindi. Shunda Bobur togʻlarga qoʻy va yilqi undirish uchun uch yuz askar bilan chopqinga ketgan Ahmad Tanbalni esladi. Qosimbek quvonib:

– Azamatlarning oʻljasi juda ulugʻ-ku! – dedi.

Xoʻja Kalon ham hayajonlanib:

- Beadad! - deb xitob qildi. - Bahodirona oʻlja!

Odatga binoan, bu behisob qoʻy va yilqilarning beshdan biri podshoh ixtiyoriga oʻtar, qolgan toʻrt qismi hamma bek va mulozimlarga taqsimlanar edi. Shuni bilgan beklar goʻyo osmondan tushayotgan bu katta boylikka qarab sevinchlarini yashirolmas edilar.

Bobur otini togʻdan kelayotgan askarlar tomonga burib, jilovini boʻshatdi. Bedov ot qushday uchib bora boshladi. Boshqalar ham Boburning ketidan ot choptirib ketdilar. Bir qir oʻtib, ikkinchisiga koʻtarilganlarida, narigilar ham bularni koʻrib, burilib kela boshladilar. Bobur baland bir joyda otini toʻxtatdi.

Askarlarning oldida kelayotgan Ahmad Tanbal zirhli kiyimda edi. Yelkasi va koʻkragini yopib turgan jibaning temiri oftobda yiltirardi. Uning boʻyniga yoy oʻqi tekkan, yarador joyini yashil mato bilan bogʻlab olgan edi. Oʻzi ozib, moʻgʻulcha yonoqlarining suyaklari yana ham boʻrtib chiqqan. U Boburdan ellik qadamcha narida otdan tushib, qoʻl qovushtirib keldi-da, yer oʻpib yukundi:

– Mirzo hazratlariga yogʻiylik maqomida boʻlgan chagraklar oʻlpon toʻlashdan bosh tortganlari uchun

oʻn olti ming qoʻylari, ikki yarim ming yilqilari jarima tarzida tortib olib kelindi!

- Chopqin talafotsiz boʻldimi?
- Mirzo hazratlari, bizning uch yigitimiz halok boʻldi, oʻn kishi yaralandi. Ammo biz yogʻiylardan buning qasdini oldik!

Ahmad Tanbal oldingi safda turgan yigitlaridan biriga ishora qildi. Ayiqtaxlit, qoʻpol bir yigit egarining ustida do'mpayib turgan xurjunni oldi-da, podshohga yaqinlashdi. Olachadan tikilgan xurjunning hammayogʻi qon edi. Ayiqtaxlit yigit Ahmad Tanbalning ishorasi bilan xurjunning har ikki koʻzini toʻldirgan narsani yerga agʻdardi. Oʻn-oʻn beshta odam kallasi koʻkatlar va lolaqizgʻaldoqlar ustiga yumalab tushdi. Bobur kallalarni koʻrgan zahoti: «Chagraklar ham bizning odamlarga oʻxshar ekan-ku!» degan oʻydan eti junjikib ketdi. Chorvador turkiy qabila boʻlgan chagraklar ham Boburning vatandoshlari ekanligiga, hammalari bir el, bir ulusdanligiga uning ishongisi kelmas edi. Chunki chagraklar uning hukmiga bo'vsunmas, yuborgan kishilarini qoʻlda qilich bilan qarshi olishardi. Mana endi oʻzlari qilichning tigʻidan oʻtib, boshlari oyoq ostida agʻanab yotibdi. Bu jonsiz boshlardan birining soqoli yoʻq, koʻk-sargʻish yuzi silliqqina, moʻylovi endi chiqa boshlagan. Bobur uning oʻn yetti-oʻn sakkiz yoshli yigit boʻlganini payqadi-yu, engagi tagidan kesilgan goʻsht aralash qonli boʻyniga qarab, koʻngli birdan behuzur boʻldi. Yordam soʻraganday, oʻng tomonidan turgan Oosimbekka qaradi.

Sulton Ahmad Tanbal ham, uning otliq askarlari ham Boburdan maqtov va mukofot kutmoqda edilar. Oʻn olti ming qoʻy, ikki yarim ming yilqi hazilakam boylik emas edi. Uch yigit oʻlgan boʻlsa, ularning qasdiga oʻn besh-yigirmata yogʻiyning boshini kesib kelish ham shu turganlarning odatiga binoan mardona

ish hisoblanar, buni taqdirlamaslik esa adolatsizlik sanalar edi.

Qosimbek Boburning yuzi oqarib ketganini koʻrib hayron boʻldi. Uning fikricha, kesik kallalar Boburga bunchalik ta'sir qilmasligi kerak edi. Bultur Samarqand urushida yosh podshoh bunday boshlarni koʻp koʻrgan edi. Odatda: «Falonchi yuzta yogʻiyni oʻldiribdi», deb quruq maqtasalar uncha ishonarli boʻlmaydi, chunki ozgina ishni koʻp qilib koʻrsatib, lof uradigan bek va navkarlar ham bor. Jangchining xizmati ishonarli boʻlishi uchun oʻldirilgan dushmanlarining boshini kesib kelib hisob berish eskidan odat tusiga kirgan.

– Amirzodam, – deb shivirladi Qosimbek. – Qulingiz soʻzlayinmi?

Bobur tasdiq ma'nosida bosh irgʻadi. Qosimbek yuzini Boburga yaqinroq keltirib, yana eshitilareshitilmas qilib soʻradi:

- Mukofotiga qilich bersak... Rozimisiz?

Boburning yarogʻbardori olib yurgan tigʻlar orasida yoyday egik katta bagʻdodiy qilich bor edi, Bobur birikki marta taqqanda juda ogʻir tuyilgan edi. Boburning nigohi shu qilichda toʻxtaganini koʻrgan Qosimbek, «tushundim», degandek bosh irgʻadi.

– Sulton Ahmad janoblari, – deb ovozini koʻtarib gapirdi Qosimbek. – Siz bahodirona zafar bilan qaytganingiz Mirzo hazratlarini behad shod qildi. Siz Bobur mirzoga nechogʻlik sodiq ekanligingizni yana bir bor isbot etdingiz. Butun mavkab¹ bugun sizlarni olqishlagʻay! Oʻshdagi qarorgohda bu oqshom sizlarning sharafingʻizga tantanali ziyofat berilur, hamma yigitlaringiz shohona in'omlar olurlar. Hozir Mirzo hazratlari Sulton Ahmad janoblariga shamshiri xos in'om etdilar!

Qosimbek bagʻdodiy qilichni yarogʻbardordan oldiyu, yerga ta'zim qilib turgan Sulton Ahmadga uzatdi.

¹ Mavkab – podshoh va uning barcha a'yonlari, yaqinlari.

Sulton Ahmad tiz choʻkib qilichni qinidan toʻrt enlikcha chiqardi-da, poʻlatidan oʻpdi, soʻng ovozi hayajondan titrab dedi:

– Mirzo hazratlari, oʻlgunimcha bu marhamatingizni unutmasmen! To umrim oxiricha sizga sodiq xizmatda boʻlgʻaymen!

Shu kuni oqshom Oʻsh qal'asining minoralari ustida, shahar atrofiga tikilgan yuzlab chodir va oʻtovlar oldida karnaylar, nogʻoralar chalindi, mash'allar yoqilib, katta tantanalar boshlandi. Ming-ming qoʻy va yilqilarni in'om tariqasida tekinga oladigan barcha beklar, navkarlar va mulozimlar bugun astoydil shodlanmoqda edilar. Podshohning hashamatli xirgohida oqshom qabul marosimi va bazm boʻldi. Sozandalar eng quvnoq kuylarini chalishdi, hofizlar eng yaxshi ashulalarini aytishdi.

Bobur xirgoh toʻrida toʻrtta oltin zina bilan chiqiladigan baland shohsupa ustida yolgʻiz oʻltiribdi. Bugun uning oʻng tomonidan oʻrin olgan eng nufuzli beklari orasida Ahmad Tanbal ham paydo boʻlgan. U kunduzgi zirhli kiyimlar oʻrniga zarbof toʻn va simobi salla kiygan, podshoh in'om qilgan oltin sopli qilichni kumush kamarga taqib olgan. Hamma uni mukofot bilan muborakbod qiladi. Tabriklarning barchasidan yoqimlisi - boya xirgohga kirganda uni Qutlugʻ Nigor xonim muborakbod qilgani boʻldi. Podshohning onasi bilan egachisi hozir katta dasturxonning narigi tomonida Ahmad Tanbalga yarim oʻgirilgan holda oʻtirib, sozandalar kuyiga quloq solishyapti. Ahmad Tanbal har zamonda ularga koʻz qirini tashlab qoʻyadi. Xonzoda begimning nafis qaddi-qomati, haftkor¹ ipak matodan kiygan kamalakday tovlanuvchi kabosi Ahmad Tanbalga bugun har qachongidan ham jozibali koʻrinadi.

¹ Haftkor – yetti xil rang.

Yosh podshohning bazmlarida ichkilik ichilmas, Bobur hali mayni ogʻziga ham olgan emas edi. Qosimbek ham ichkilikni yomon koʻrar va uni bazmlarga yoʻlatmas edi. Lekin Umarshayx mirzo davrida may ichib oʻrgangan boshqa beklar mana shunday bazmlarda Boburdan yashirib, chet-chetda ichib olishar edi.

Ali Doʻstbek degan qotma, koʻsanamo bir bek orqada sharbat koʻtarib turgan sharbatchiga sirli koʻz qisdiyu, Ahmad Tanbalni koʻrsatdi. Sharbatchi ma'noli kulimsirab, Ahmad Tanbalga yaqinlashdi va kumush koʻzachadan chinni piyolaga toʻldirib, koʻkimtir sharbat quyib berdi. Ahmad Tanbal piyolani qoʻliga olar ekan, dimogʻiga oʻtkir may hidi urildi.

- Oling, bek, ilohim Samarqandda bundan ham ulugʻzafarlarga muyassar boʻling! - dedi Ali Doʻstbek.

Ahmad Tanbal minnatdorona bosh irgʻab, mayni sipqardi-yu, keyin dasturxondagi tandirkabobga qoʻl choʻzdi.

 Mana endi Samarqand-u Buxoroni olguncha yetadigan zaxiramiz bor! – dedi shirakayf Do'stbek. – Muhoribani tezlatmoq kerak.

Ahmad Tanbalning oʻng tomonida Uzun Hasan oʻtirgan edi. Turib yurganda juda novcha koʻrinadigan bu ozgʻin odam oʻtirganda goʻyo qatlanib, kichkina boʻlib qolar edi.

- Shayboniyxon Dashti Qipchoqdan Samarqandga boʻyin choʻzarmish, – dedi Uzun Hasan.
- Tushini suvga aytsin! Samarqand bizniki boʻlur!
 dedi maydan badani qiziy boshlagan Ahmad Tanbal ovozini xiyol koʻtarib.

Uning bu soʻzlari Boburning qulogʻiga ham chalindi. Bugun togʻdan haydab tushilgan behisob qoʻy va yilqilar saroy ahlining Samarqandga yurish qilish ishtiyoqini yana ham oshirib yuborgani Boburga tobora aniq sezilmoqda edi. Ilgari ham ularning bu

ishtiyoqlariga qarshi borish qiyin edi. Ammo hozir bek va navkarlarning Samarqandga intilishi – togʻ daryosining yuqoridan pastga qarab otilishiga oʻxshardi. Bu daryoni orqaga qaytarish hech kimning qoʻlidan kelmasdi...

6

Oqish suvli joʻshqin Burasoy Oʻsh qal'asining tosh yotqizilgan poydevoriga bosh urib, koʻpirib oʻtadi. Soyning oʻng betidagi serdaraxt mahallada mavlono Fazliddin bulturdan beri istiqomat qilayotgan peshayvonlik moʻjaz bir uy bor. Uning oldidagi besholtita nok va behi daraxtlari hozir oppoq boʻlib, gullab turipti. Hovlining chetidagi bostirmaga ikkita ot bogʻlab qoʻyilgan. Berigi yoqdagi oyoqlari uzun toʻriq qashqa otni anjomlari bilan Bobur mirzo in'om etgan edi. Mavlono Fazliddin podshohning xos me'mori qilib tayinlangan, unga yaxshigina ulufa¹ belgilangan edi. Buning hammasidan mavlono Fazliddin oʻzida yoʻq xursand boʻlib yurgan edi. Biroq keyin ba'zi bir noxush xabarlarni eshitib, koʻngli gʻash torta boshladi.

Mavlono Fazliddin Andijonda qurmoqchi boʻlgan katta imoratlarini shu bu yil yozdayoq boshlash orzusida edi. Bobur mirzo koʻrsatgan marhamatlar bu orzuning roʻyobga chiqishiga yoʻl ochganday boʻlgan edi. Hatto Bobur mirzoning oʻzi uni borgohda qabul qilib, qanaqa madrasa, qanday xonaqoh va kutubxonalar qurish haqida gaplashgan, mavlononing bu haqdagi takliflarini ma'qullagan, «Xonzoda begim biz yoʻgʻimizda mutasaddi boʻlurlar, rejalarni butun tafsilotlari bilan tuzib, begimga koʻrsatursiz», degan edi. Ish ustida yana Xonzoda begim bilan uchrashishini oʻylaganda, mavlononing qalbida qoʻrquv aralash shirin bir hayajon qoʻzgʻalar edi.

 $^{^{\}scriptscriptstyle 1}$ Ulufa – maosh va turar-joy.

Biroq Bobur yaqinda yana Samarqandga qoʻshin tortib bormoqchi ekanligi, davlatning butun kuchi shunga ketib, qurilishlar noma'lum vaqtga kechiktirilishi ma'lum boʻldi. Agar Bobur Samarqandni ololmay, urushda yengilsa, unda mavlononing barcha orzulari oʻz-oʻzidan puchga chiqadi. Agar Bobur Samarqandni olsa, tabiiy, oʻsha yerda podshoh boʻlib qoladi. Keyin u Fargʻona vodiysida katta qurilishlar qiladimi, yoʻqmi? Odatda, podshohlar qayerni poytaxt qilsalar, oʻsha yer koʻproq obod boʻladi. Andijon yana poytaxt boʻlishi gumon. Demak, mavlononing bu yerda qilmoqchi boʻlgan ishlari, barcha rejalari qum ustiga qurilganday omonat.

Hozir ayvonda eski handasa va riyoziyot kitoblarini titkilab, kerakli bir jadvalni axtarayotgan mavlono mana shu narsalarni oʻylab, ta'bi tirriq boʻlmoqda edi. Bir payt darvoza ustma-ust taqilladi. Bostirmada otlarning tagini tozalayotgan keksa xizmatkor yogʻoch kuragini devorga suyab qoʻyib, darvozaga qarab oʻtdi. Birpasdan soʻng xizmatkor ayvonning oldiga qaytib keldi-yu:

- Mavlono, bir kimsa huzuringizga kirmoqchi.
- Kim?
- Kiyimi uvada, oʻzi bahaybat bir yigit. «Jiyanlari boʻlaman», dedi, ammo men sizdan beruxsat kirgazmadim.
- Jiyanim? Shoshmang-chi! deb, mavlono oʻrnidan turdi. Yalang oyogʻiga charm kavush kiyib, yarim ochiq darvozaning oldiga bordi.

Olacha toʻni ham, oyogʻidagi chang bosgan chorigʻi ham yirtilib ketgan novcha bir yigit koʻzlari yaltirab, kulimsirab unga qarab yurdi. Qadam olishi, qarashi juda tanish. Yigit:

- Mulla togʻa! - deb quchoq ochganda mavlono uning ovozini tanidi-yu:

- Tohir! Tohirjon! deb u bilan quchoqlashib ketdi. Shuncha oʻlimlardan omon qolgan jiyanim, seni zoʻrgʻa tanibmen. Bu qadar oʻzgarib ketibsen! Yuzingga ne boʻldi?
 - E, so'ramang, mulla tog'a...
- Mayli, yur, avval damingni ol. Keyin aytib berursen...

Ular ayvonga chiqar ekanlar, mavlono Fazliddin bundan salkam uch vil oldin Quvasov boʻyida boʻlib oʻtgan qonli voqealarni yana bir esladi. Oʻshanda Tohirga nayza sanchgan samarqandlik bosqinchi uni oʻldirganiga shubha qilmay ketgan edi. Onasi yolgʻiz oʻgʻlining qoniga belanib, jonsizlanib yotganini koʻrib, uni «oʻldi» deb oʻylagan va shaytonlab yiqilgan edi, bechora ona shu yotganicha qaytib turolmay, ertasi kuni vafot etdi. Tohir esa otasi topib kelgan tabiblar va dor-u darmonlar ta'sirida uch kundan keyin hushiga keldi. Nayza o'pkaning bir chetini kesib o'tgan bo'lsa ham yurak va jigar kabi nozik a'zolarga tegmagan. Tohirning voshligi va baquvvatligi ustun kelib, astasekin tuzalib ketgan edi. Qoʻni-qoʻshnilar: «Tohirga kelgan oʻlimni onasi oʻziga oldi-yu, bu tirik qoldi», devishardi. Mavlono Fazliddin o'shanda opasining qirqini oʻtkazib kelganicha, qaytib Quvaga bormagan edi.

– Otang qalay, bardammi? – soʻradi mulla Fazliddin Tohirni yuqoriga taklif qilib.

Tohir chang bosgan chorigʻi bilan koʻrpachaga chiqishdan ibo qildi-yu, poygakdagi sholcha ustiga oʻltirdi:

– Otam sizga salom aytib yubordilar. Men bir yilcha qishloqda boʻlmadim... Qarindoshlar «cholning issiq-sovugʻidan xabar olib tursin», deb bir beva kampirni olib beribdilar... Onam rahmatli esimga tushdi-yu, uyda turgim kelmadi.

Faqat onasining musibati emas, bosqinchilar bogʻlab olib ketayotganlarida Tohirdan najot kutib qichqirgan Robiya ham uning xayolidan nari ketmaydi. Qizning oʻshandagi nidosi hali ham Tohirning qulogʻiga eshitilib turganday boʻladi. U burnogʻi yili Samarqandgacha piyoda borib keldi, yoʻllarda oʻroqchilik qilib, karvonlarga qoʻshilib yurib, iloji boʻlgan joydan Robiyani qidirdi, «singlim edi, Sulton Ahmad mirzoning navkarlari olib qochib ketgan edi», deb soʻroqladi. Ammo hech qayerdan daragini topolmadi.

Sulton Ahmad mirzo oʻsha yiliyoq oʻlib, qoʻshini tarqab ketgan, bir yil davomida Samarqand taxtida ikki marta podshoh almashingan, koʻp toʻpolonlar boʻlib, it egasini tanimaydigan ahvolga kelgan edi. Jizzaxlik bir kishi Toshkent tomonlarga choʻrilar koʻp sotilganini aytib qoldi. Bultur kuzda Tohir piyoda Toshkentgacha bordi, yana har joylarda mardikorlik bilan kun oʻtkazib, Robiyani soʻroqladi, ammo hech natija chiqmadi. Zamona notinch, yurt algʻov-dalgʻov, hayot hamma joyda xuddi loyqalatilgan daryoga oʻxshab oqadi. Robiyani topish – loyqa daryoga tushib ketgan gavharni topishdek qiyin ekanini Tohir ich-ichidan sezar edi-yu, baribir umidini uzolmas edi. Mavlono Fazliddin Tohirning gaplaridan shuni payqab:

- Jiyanim, sen oʻsha bechora qizni hali ham unutolmay ikki yil izlaganing juda ajoyib bir diling borligidan dalolat berur. Men sening sadoqatingga tan berdim! Ammo sen endi oʻzingga ham jabr qilmasliging kerak. U qiz taqdirida borini koʻrgay. Agar tirik boʻlsa, balki... birov unga uylangandir. Balki farzandlik ham boʻlganlar. Axir uch yil uni tek qoʻyishlari mumkinmi? Sen oʻzing bir oʻylab koʻrgin...
- Men buning hammasini allaqachon koʻnglimdan oʻtkazganmen, mulla togʻa... Faqat men u qizning oldida oʻz gunohimni yuvmoqchimen, xolos.
 - Qaysi gunohingni?

- Oʻshanda Robiyani Andijonga qochirmoqchi boʻlganlarida, men Quvada olib qolganmen. Agar Andijonga ketganda bu falokat boʻlmas ekan.
 - Sen nima boʻlishini qaydan bilibsen, jiyanim?
- Harqalay, men uni topib, shu gunohimni yuvmagunimcha tinchiyolmaymen. Robiya, siz aytgandek, uylik-joylik boʻlib, tinchib ketgan boʻlsa, unda... mayli... Taqdirga tan berurmen. Agar hali ham najot izlab, meni kutib yurgan boʻlsa-chi? Axir men uni unutolmay yuribmen-ku! Unga ham men kerak boʻlsam-chi?

Mavlono Fazliddin bosh chayqab:

– Dil dardiga davo yoʻq ekan-da, – dedi va mavzuni oʻzgartirdi: – Yoʻqlab kelibsen, endi mehmon boʻl. Qani, dasturxonga qara...

Togʻa-jiyan birga oʻltirib shirchoy ichdilar. Keyin mulla Fazliddin Tohirning kiyim-boshlariga yana bir koʻz yugurtirdi-yu:

– Jiyanim, togʻang hozir xiyla badavlat, – dedi qoʻyniga qoʻl solib, bogʻichi popukli qora charm hamyon oldi. U hamyonni ochib, jiyaniga bir nechta oltin tanga olib bermoqchi edi. Hamyon tezda ochilavermagach, mavlono uni ochmasdan jiyaniga uzatdi. – Ma, Oʻshning rastalariga chiq, bugun juma, mol koʻp, oʻzingga kerakli kiyim-kechak ol.

Tohir hamyonni olmay turib dedi:

- Yoʻq, mulla togʻa, menga oʻzingiz sanab, qarz bering.
- Ha, xoʻp, qarz! Oʻzing keragicha ol, puldor boʻlganingda qaytarursen.
 - Unday boʻlsa, mayli.

Tohir hamyonni qoʻyniga solib chiqib ketganicha peshin kechroq oyogʻiga yangi askariy etik, boshiga moʻgʻulcha boʻrk kiyib, chakmonga oʻxshash dagʻal

yungli dagʻalani yelkasiga tashlab keldi. Uning qoʻlida qini eskirib ketgan arzon bir qilich ham bor edi. Mavlono Fazliddin hayron boʻlib:

- Nechun bunday kiyimlar olding? dedi. Qilichni ne qilursen?
- Mulla togʻa, yolgʻiz sargardon boʻlib yurish mening jonimga tegdi. Endi Samarqandga Bobur mirzoning qoʻshini bilan birga bormoqchimen.
 - Sarboz boʻlibmi?
- Ha, tavochilar askarlikka odam olayotgan emishlar...
 Jiyani Oʻshga ham shu niyat bilan kelganini mavlono Fazliddin endi sezdi-yu, undan qattiq ranjidi.
- Jinni boʻlibsen, Tohir! Hamma urushdan qochsa, sen bu ajdahoning komiga oʻz ixtiyoring bilan bormoqchisen! Bir marta nayza yeb, oʻlimdan qolganing ozmidi?
- Mulla togʻa, undan keyin men yana necha oʻlimlardan qolganimni siz bilmaysiz. Toshkentda bir moʻgʻul begi bechora kosibning qizini zoʻravonlik bilan tortib olmoqchi boʻlganda men chidab turolmadim. Oraga tushganim uchun mana, yuzimda oʻsha bekning xanjaridan chandiqlar qoldi.
 - Zamona zoʻrnikiligini hali ham bilmaysenmi?
- Bilganim uchun men oʻshanday zoʻrlar bilan zoʻr qoʻshinning safida turib olishmoqchimen, mulla togʻa. Men koʻp yurtlarni koʻrdim, turli odamlar bilan birga ishlab, birga yurdim. Bobur mirzoning tabiati pokiza, koʻngli tiyrak ekanini koʻp odam bilar ekan. «Atrofdagi podshohlardan yaxshilik chiqmasa ham Bobur mirzodan bir yorugʻlik chiqar», deb umid qilamen.

Mavlono Fazliddin yerga qarab:

– Qaydam, – dedi. – Bobur mirzo hali yoshlar. Men ham shu zotga umid bogʻlagan edim... Lekin yana urush, qon... Hammamiz tun zulmatiday intihosiz bir qorongʻilik ichida yuribmiz. Mamlakat parokanda, zolim tojdorlar qon ustiga qon toʻkurlar. Bobur mirzoning atrofidagi beklar ham rahm-shafqatni unutmishlar. Muhit shundoq gʻaddor boʻlgach, sen ham yomon beklar xizmatida yurib, oʻzingga oʻxshash jabrdiyda zahmatkashlarning kushandasiga aylanmasmikinsan, jiyanim?

- Ishoning, mulla togʻa, men yomon beklarning zulmiga ilojim boricha qarshi turgaymen!
- Bobur mirzo hukmdor boʻla turib daf qilolmagan adolatsizliklarni sen nechun daf qilursen?
- Balki Bobur mirzoning mendek navkarlari boʻlmagani uchun daf qilolmagandirlar? Balki u zotga men kerakdurmen, mulla togʻa! Men oʻzim uchun shundan ma'qul yoʻl topolmadim. Yolgʻiz yashashimning ma'nosi qolmadi. Ne qilay?

Mavlono Fazliddin jiyanining yuziga tikilib qaradiyu, uni niyatidan qaytarib boʻlmasligini sezdi. Tohir bundan uch yil oldin Quvasoy koʻprigini buzib, yov qoʻshiniga katta talafot keltirgan paytlarda tarix daryosining qudratli oqimiga tortilmaganmidi? Endi umrbod oʻsha oqimdan chiqolmasdan, tarixiy voqealarning ichida yurishga mahkum etilganmikin? Harqalay, jiyanining soʻnggi gaplari mavlononi oʻylantirib qoʻydi. U birpas jim turgach:

- Tavochiga uchradingmi? dedi.
- Uchradim. «Oting yoʻq ekan, piyoda qoʻshinga olamiz», dedi. Men piyoda yurib oʻrganib qolganmen, mulla togʻa.
- Ammo jangda eng koʻp talafot piyodalar orasida boʻlur, buni bilursenmi?
- Mayli-da, qirq yil qirgʻin boʻlsa ham ajali yetgan oʻlgay.
 - Bas!

Mulla Fazliddin bu haqda boshqa gaplashmadi. Ertalab nonushtadan keyin xizmatkoriga aytib, bostirmada turgan har ikkala otni ham egarlatdi. Tohirga oyoqlari uzun jiyron otni koʻrsatib:

– Sen mana shuni min, – dedi. – Men sening piyoda askar boʻlishingni oʻzimga munosib koʻrmasmen.

Mulla Fazliddin oʻzi Bobur in'om qilgan toʻriq qashqani mindi. Soʻng ikkovlari Boburning qarorgohiga otliq yoʻl oldilar.

Odatdagiday, Bobur huzuriga kirish uchun eshik ogʻadan ruxsat olish kerak. Togʻa-jiyan sakkiz burchakli ulkan oq oʻtovdan beriroqda otliq kelayotgan Qosimbekni koʻrdilar va uning hurmatiga otdan tushib qoʻl qovushtirdilar.

- Janobi amirul umaro, jiyanim ham Bobur mirzoga sodiq xizmat qilish orzusida keldi,
 dedi mavlono Fazliddin.
 Ijozat bersangiz, amirzodaning huzuriga kirsak.
- Amirzodam hozir behad banddir, mavlono. Balki, iltimosingizni menga aytursiz?..
- Jiyanim Tohir... amirzodamning xos navkarlari qatoriga olinishini oʻtinib soʻramoqchi edim.

Qosimbek Tohirning barvasta gavdasiga va yuzidagi chandiqqa qaradi-yu:

- Yigit, askariy xizmatda boʻlganmisen? - dedi.

Qosimbekning «sensirab» gapirgani Tohirga uncha yoqmadi. Loqayd tovush bilan:

- Hali boʻlgan emasmen, - dedi.

Mavlono Fazliddin oraga tushdi:

- Janobi amirul umaro, jiyanimiz asli dehqon boʻlsa ham, lekin tabiatida jangovarlik bor. Esingizda boʻlsa, Quvaning koʻprigida yogʻiylarimiz juda katta talafot koʻrib, oʻzlari sulh taklif qilgan edilar. Oʻshanda bizga gʻalaba keltirgan azamat yigitlarning biri mana shu Tohir!
- Gʻalaba keltirgan?! ishonqirmay soʻradi Qosimbek. Qanday qilib?

Mavlono Fazliddin Quvada oʻz koʻzi bilan koʻrgan voqealarni Qosimbekka qisqacha soʻzlab berdi. Uning hikoyasiga qaraganda, jangovar beklar va navkarlar eplay olmagan yovning belini oddiy «yalangoyoqlar» sindirgan boʻlib chiqardi. Qosimbek bunga ishongisi kelmadi.

– Quvada gʻalabani Tangrim oʻzi bizga in'om qilgan, mavlono! – dedi Qosimbek.

Bu gapga qarshi chiqib boʻlmas edi.

- Albatta, bularning koʻngliga shu ishni Xudo oʻzi solgan. Lekin oʻshandagi jasorati uchun yogʻiylar Tohirga nayza sanchib, uni ogʻir yarador qildilar. Jiyanim naq bir oʻlimdan qoldi, janob Qosimbek!
- Shundoqmi? deb Qosimbek endi Tohirga iliqroq nazar bilan qaradi. – Samarqanddagi yogʻiylarimizda qasding bormi, yigit?
 - Ha, o'chim bor.

Qosimbek ketida sukut saqlab turgan tavochiga oʻgirildi:

– Bu yigitni Chilmahram togʻi etagida askariy mashq oʻtkazayotgan navkarlar qatoriga qoʻshing! – Soʻng u mulla Fazliddinga izoh berdi. – Jiyaningizning mashqi yetilsin, harbiy muomalani oʻrgansin. Undan soʻng amirzodam lozim koʻrsalar, xosnavkarlari qatoriga olurlar.

Tohir mavlono Fazliddin bilan quchoqlashib xayrlashdi-da, otiga mindi va tavochining ketidan Chilmahram togʻiga qarab yoʻl oldi.

7

Beklarning mashvaratida Samarqand yurishini ramazon oyida boshlashga, tayyorgarlik ishlarining asosiy qismini Oʻshning oʻzidayoq bitirib ketishga qaror qilindi.

Bobur onasining soʻzini erda qoldirganidan xijolat boʻlib, Qutlugʻ Nigor xonimning koʻziga

tashlanmaslikka tirishardi. Safar tayyorgarliklaridan boʻshagan paytlarda oʻz chodirida yolgʻiz oʻtirib kitob oʻqirdi.

Bugun namozigar kechroq Bobur «Vaqoye'» nomli daftarga otasining oʻlimi haqida yozayotgan edi, yasovul kirib, Qutlugʻ Nigor xonim bilan Ali Doʻstbekning chodirga kirishga ijozat soʻrayotganlarini aytdi. Bobur daftarini yopib, onasini eshik oldida qarshi oldi va toʻrga oʻtqazdi.

Qutlugʻ Nigor xonimning rangi xiyol oʻchgan. Uning peshonasidan yuqorida – sochining farq ochilgan joyida Bobur bir tutam oqargan soch tolalarini koʻrdi. Endi qirq yoshga kirgan onayizor kampirlardek odmi kiyinar va qaddini egibroq yurar edi. Bobur onasiga allanechuk rahm qilib past tovush bilan gapirdi:

- Onajon, soʻzim yerda qoldi, deb kuyunmang. Nasib boʻlsa, Samarqanddan qaytganda hamma aytganlaringizni qilurmen.
- Xudoning xohishi shunday boʻlsa, biz bandalar qanoat qilgaymiz. Iloho, yaxshi niyatlaringizga yeting, shoh oʻgʻlim!

Ali Do'stbek baquvvat qo'llarini fotiha uchun ochib:

- Ilohi omin! - dedi.

Soʻng katta-katta panjalarini qop-qora silliq yuziga, soqolsiz uzun iyagiga surtdi.

Yuzi moʻgʻulcha boʻrtgan bu chayir koʻsa odam Boburning buvisi Eson Davlat begimga amakivachcha boʻladi. Shu sababli oʻz nomiga «togʻoyi» degan soʻzni unvondek qoʻshib aytadi va Qutlugʻ Nigor xonimga akalarcha mehribonchilik koʻrsatib yuradi. Hozir ham koʻrpachalar ustiga oʻtirganlaridan keyin Ali Doʻstbek Qutlugʻ Nigor xonimga «Gapni ochaymi?» deganday bir qarab oldi. Xonim tasdiq ma'nosida

¹ «Vaqoye'» – «Chindan yuz bergan voqealar», demakdir. «Boburnoma» dastlab shunday deb atalgan.

bosh irgʻagach, Ali Doʻstbek tomoq qirib, siporish bilan soʻz boshladi:

- Amirzodam, volidangiz ikkovimiz nozik bir muammoda sizning maslahatingizni olgani keldik. Muhtarama egachingiz Xonzoda begim hozir yigirma yoshdalar. Ayni uzatiladigan paytlari. Begim oy desa oydek, kun desa kundek, oqila-yu foziladirlar. Shu vaqtgacha munosib kuyov uchramay dogʻda edik. Volidangiz ham, togʻoyingiz ham vaqt oʻtib ketayotganidan iztirobda edik.
- Yana bir-ikki yil uyda oʻltirib qolsa, «qari qiz» deb kulurlar, dedi Qutlugʻ Nigor xonim. Opasining taqdiriga oid bunaqa gaplarni Bobur ilgarilari ham eshitgan edi. Ammo bugun Doʻstbekning gaplariga qaraganda, qandaydir kuyov topilganga oʻxshardi. Bobur shuni bilgisi kelib, oʻsmirlarcha qiziqish bilan soʻradi:
 - Kim bizga pochcha boʻlmoqchi?

Roʻyi-rost berilgan bu savol, Doʻstbekni shoshirib qoʻydi. U yana gapni aylantirdi:

– Sizdek oliy zotga «munosib pochcha boʻlurmen», deb hech kim jur'at qilib aytolmas. Ammo umarolaringiz orasida asilzoda beklar bor. Chunonchi, Sulton Ahmadbek. Yigirma besh yoshga kirgan norgʻul yigit. Chopqunga borib, bahodirona zafar bilan qaytdi. Beklar orasida obroʻsi baland. Yonida uch zabardast inisi bor. Uch yuz navkari bilan hammasi sizga to oʻlguncha sodiq xizmat qilmoqchilar.

Bobur hali oila nimaligini, kuyov-kelin qanday boʻlishini bilmasa ham opasi Xonzoda begimni Ahmad Tanbalning yoniga qoʻyib tasavvur qildi-yu, ikkovini bir-biriga toʻgʻri keltirolmadi. Soʻng onasiga qarab:

- Siz rozimisiz? - dedi.

Qutlug' Nigor xonim og'ir tin olib:

- Nachora! - dedi. - Xonzoda begim tojdor, taxt-dor kuvovlarga munosib qiz. Ammo hozirgi notinch

zamonada qani biz istagan kuyov? Biz togʻoyingiz bilan surishtirib bildik. Sulton Ahmadbekning avlod-ajdodi asilzodalardan ekan. Bobokalonlari Joʻjixon, Chingizxonlarga qon-qarindosh boʻlgan sultonlar ekan. Hozir Tilba Sulton nomlik ogʻasi Toshkentda togʻoyingiz Mahmudxonda sohibixtiyor eshik ogʻa ekan. Endi bu Ahmadbek kuyov boʻlsa, oraga ogʻasi tushib, togʻoyingiz Mahmudxon bilan sizni yaqinlashtirarmikin? Shunday nufuzli bek sizga kuyov boʻlib, butun urugʻlari-yu navkarlari bilan qanotingiz tagiga kirsa, ishingizning rivoji yaxshiroq boʻlurmikin?

- Shubhasiz, shunday boʻlur! - dedi Doʻstbek chuqur e'tiqod bilan.

Bobur nima deyishini bilmay yelka qisdi: yosh oʻsmir oʻzidan katta opasini kimga erga berish haqida oʻylashdan ham tortinar edi. Ammo onasi va togʻasi bu ishni uning podshohlik hukmi bilan amalga oshirishni istardilar.

- Begimning oʻzlari uchun ham yaxshi boʻlur, deb davom etdi Doʻstbek. Agar boshqa bir yurtdagi tojdorga tushsalar, onalaridan yiroqda boʻlurlar, amirzodamday suyukli inilarining himoyalaridan uzoqlashurlar.
- Ha, undan koʻra yonginamda boʻlgani afzal, dedi Qutlugʻ Nigor xonim. Xonzoda mening toʻngʻich qizim, maslahatgoʻyim, Ahmadbekka bersak, koʻz oʻngimda mening yolgʻizligimni bilintirmay yurur.

Bobur bu borada oʻzi bilmaydigan koʻp narsalarni onasi yaxshi bilishini oʻyladi-yu:

- Onam rozi boʻlsalar, boʻldi, - dedi.

Do'stbek quvonib ketdi:

Haq gapirdingiz, amirzodam, juda haq! Ona roziXudo rozi, deb bejiz aytmaganlar!

Qutlugʻ Nigor xonim hamon xomush edi. Bobur buning sababini sezganday boʻlib:

- Begimning oʻzlari nechuk? - deb soʻradi.

Qutlug' Nigor xonim og'ir tin olib:

- Begim rozi emaslar, dedi. Eshitib koʻp yigʻ-ladilar.
- Bunday paytlarda yigʻlash qizlarning azaliy odati,deb kulib qoʻydi Doʻstbek.
- Ammo, Xonzoda begimning ahvolidan men xavotirdamen, amirzodam, dedi Qutlugʻ Nigor xonim.
 «Oʻzimni oʻldiramen», degan soʻzlarini eshitib qoldim.
 - Nahot? dedi Bobur ham birdan xavotirga tushib.
- Egachingiz sizni jondan aziz koʻrurlar, Mirzo hazratlari, soʻzingizni ikki qilmaslar, - dedi Doʻstbek. - Volidayi muhtaramangiz bilan ikkalamiz sizdan iltimos gilgani keldik. Xonzoda begimni huzuringizga chorlab, nasihat qiling. Davlatingizning manfaatlari uchun egachingiz rizolik bermoglari kerak. Sulton Ahmadbek oraga odam qoʻygan. Butun urugʻlari bilan sizning marhamatingizga muntazir. Rad javobi ularni sizdan... sovitib qoʻyishi mumkin. Soʻngra, agar Xonzoda begim rizo boʻlmay, yana uch-toʻrt yil uyda oʻltirib qolsalar, «kuyov topilmabdir, qari qiz boʻlibdir», deb yogʻiylaringiz malomat qilurlar. Bunday gaplar podshoh oilasining sha'niga mutlaqo to'g'ri kelmas. Agar Xonzoda begim sizga yaxshilik istasalar, rizo boʻlmoqlari kerak. Buni endi begimga faqat siz tushuntirursiz. Mirzo hazratlari!

Bobur boshini changallab bir lahza jim qoldi. Bunday nozik, bunday chigal ishga umrida birinchi duch kelishi. Begona boʻlsa ham bir sari edi, gaplashishi osonroq boʻlardi. Oʻzining jonajon opasi. Bobur Xonzoda begim bilan bu toʻgʻrilarda gapirishishdan ham iymanadi. Lekin bu yoqda onasi mushkul ahvolga tushib, yordam kutib oʻtiribdi. Bu yoqda opasi joniga qasd qilmoqchi emish.

– Mayli, – dedi Bobur onasiga ma'yus koʻz tashlarkan, – begim kelsinlar, oʻzim bir soʻzlashay.

Qutlug' Nigor xonim tez o'rnidan qo'zg'alib:

– Hozir... hozir borib ayttirib yuborurmen, – dedi va chodir eshigiga yoʻnaldi.

Doʻstbek yirik tishlarini ochib, mamnun kulimsiradiyu, chodirdan orqasi bilan yurib chiqa boshladi. Eshik oldida ta'zim qildi-da:

- Amirzodam, siz shohsiz, sizning hukmingiz vojib,- deb Boburni dadilroq boʻlishga undab ketdi.

* * *

Bobur qator shamlari lipillab yonayotgan ikkita oltin qandil oraligʻida sadaf bilan bezatilgan bejirim mizga koʻkragini tirab, kitob varaqlab oʻltirganda Xonzoda begim chodir eshigidan sekin kirib keldi. Egnida sidirgʻa sariq atlas koʻylak. Hazin tovush bilan salomlashib, Bobur taklif qilgan zarbof koʻrpacha ustiga xastalardek boʻshashib oʻltirdi.

Uning qovoqlari shishinqiraganini koʻrgan Bobur:

- Muncha gʻamginsiz, begim? dedi.
- Amirzodam, men huzuringizga najot izlab keldim!

Xonzoda begimning soʻlgʻin yuziga koʻzlaridan yosh sirgʻalib tushdi. Bobur yaqindagina yayrab-yashnab yurgan opasini hozir bu ahvolda koʻrib, yuragini bir narsa timdalab oʻtdi. Onasi uning zimmasiga yuklab ketgan vazifa qanchalik mushkul ekanini u endi astoydil his qildi. Taqdir uning boshiga solayotgan mushkulotlar ozmidi, ustiga bu ham qoʻshildi? Bobur kuyunib gapira boshladi:

– Men oʻzim bu falakning dastidan najot izlaymen, begim. Yechilmas muammolar biri ustiga biri qoʻshilur. Shu asnoda nahotki siz ham mening mushkullarimni koʻpaytirmoqchi boʻlursiz?

Xonzoda begim ukasining oʻzi chindan ham yordamga muhtojligini, yoshiga nomunosib ishlar uni juda qiynab yuborganini sezdi-yu, koʻzini tez artdi. Boyagidan tetikroq ohang bilan gapira boshladi:

- -Amirzodam, men bir gap eshitdim. Rostmikin?
- Qaysi gap?
- Ahmad Tanbal togʻdan bir xurjun odam kallasini olib tushganmish...

Bobur oʻtgan kuni koʻrgan kesik kallalarni, xususan, hali soqoli oʻsib ulgurmagan yosh yigitning goʻshti chiqib yotgan qonli boʻynini esladi-yu, birdan seskanib tushdi.

- Jang oʻlimsiz boʻlmas, deb Bobur goʻyo oʻzinioʻzi bosmoqchi boʻldi. – Yogʻiy ham biznikilarni oʻldirmishdir. Bu – eski odat. Siz buni unuting, begim.
- Bunisini unutsam, omiligi, johilligi bor. Men umrimni fozil kishi bilan oʻtkazish orzusida edim. Ahmad Tanbal qoʻli qon, berahm odam. Amirzodam, nahotki siz meni unga munosib koʻrursiz?
- Sizga munosib yigit, balki yetti iqlimda ham yoʻqdir. Ammo... sabablarini onam aytgandirlar... Men ham... majburmen!

Xonzoda begim qandilda lipillab yonayotgan shamlarga qarab turib, Ahmad Tanbalni koʻz oldiga keltirdi-yu, oʻsha badqovoq yigit bilan bir yostiqqa bosh qoʻyishini oʻylab, eti junjikib ketdi:

- Men bu bekdan qoʻrqamen!
- Biz bor ekanmiz, siz hech kimdan qoʻrqmang, begim. Men sizga zarracha zulm oʻtkazishlariga yoʻl qoʻymasmen.
- Meni ma'zur tuting, amirzodam. Ammo egachingizni xohlamagan odamiga zoʻrlab uzatsalar, shuning oʻzi katta bir zolimlik boʻlmagaymi?

Bu mantiqli soʻzlar Boburni dovdiratib qoʻydi:

– Zolimlik... Ha, falakning oʻzi zolim! Men ham har kuni suymagan odamlarim bilan muomala qilurmen. Xohlamagan ishlarimga meni aralashtirurlar. Davlat

manfaatlarini oʻylab oʻzimni-oʻzim majbur qilurmen. Boshqa ilojim yoʻq!

Bobur oʻz yoshiga yarashmaydigan bu soʻzlarni qanchalik qiynalib aytayotgan boʻlsa, koʻngliga yoqmaydigan, ammo muhit, vaziyat talabi bilan majburan ado etadigan ishlarni undan ham ortiq azoblar bilan qilishi sezilib turardi. Bobur bu mushkul ahvoldan chiqishning yoʻlini topolmay ich-ichidan ezilib yurganini Xonzoda begim endi payqadi-yu, ukasiga rahmi keldi.

Boburning podshohligini unutib, uni kichikligida erkalatib suygan paytlarini esladi.

- Boburjon, dedi, siz yolgʻiz inim, pushtipanohimsiz, men siz uchun jonimni ham ayamaymen! Agar sizga chindan ham shu zarur deb ishonsam, hozirgi gapingizga ham rizo boʻlur edim. Lekin men sizning kuyrak koʻnglingizni bilurmen. Agar men umrbod bebaxt boʻlib qolsam, keyin siz hozirgidan ortiqroq iztirob chekursiz!
 - Xudo xohlasa, bebaxt boʻlmassiz.
- Koʻnglim sezib turibdir, agar shu odamga tushsam, bebaxt oʻturmen. Boburjon, egachingizning soʻziga ham ishoning. «Davlat manfaatlari» deb oʻzingizni koʻp ezmang. Siz bilan biz uchun ham bu umr gʻanimat. Oʻz koʻnglimizga ham ishonishimiz kerak! Koʻngil toza boʻlsa, kishini aldamaydir!

Xonzoda begim shunday bir samimiyat bilan yonib gapirmoqda ediki, uning qalbidagi olov goʻyo Boburning qalbiga ham oʻtdi. Shafqatsiz beklar muhiti va podshohlik majburiyatlari yosh Boburning qalbini qahraton qishning muzlariday siqib yotar edi. Xonzoda begim esa oʻzining olovli nafasi bilan goʻyo shu muzlarni eritar, Boburning qalbiga bahor mayinligi, yoshlik erkinligi yana qaytib kelayotganday, eti jimir-jimir qilardi. Xonzoda begim yana koʻzlariga yosh oldi:

– Boburjon, sizning dilingiz begʻubor, siz nodir iste'dodli fidokor yigitsiz! Bu beklar oʻz manfaatlarini ham «davlat manfaatlari» deb koʻrsatishga oʻrganib qolganlar. Bular sizning yoshligingizdan foydalanurlar. Ammo siz suymagan ishni «davlat manfaatlari uchun» deb qildirmoqchi boʻlganlarida, koʻnglingizga ham bir quloq soling. Eng mahram doʻstingiz – sizning musaffo qalbingizdir. Siz bu doʻstingizga ishoning, jonim!

Xonzoda begim oʻtirgan koʻyicha ukasiga qoʻl choʻzib, yigʻi aralash iltijo qildi:

– Men sizning pok qalbingizdan adolat izlaymen! Qalbingiz nima buyursa, siz menga shuni buyuring! Men rozimen!

Bobur sakrab oʻrnidan turdi-yu, opasining qoʻllaridan olib, uni oʻrnidan turgʻazdi:

– Yigʻlamang, bas! – dedi. Ammo Boburning oʻzi ham koʻngli erib, koʻz yoshini zoʻrgʻa tutib turardi. – Siz menga barcha beklarimdan yaqinroqsiz. Bir tugʻishgan yagona egachimsiz. Siz tufayli ne ogʻirlik kelsa, mayli, koʻtaray! Xotirjam boʻling! Toki bormen, suymagan odamingizga uzattirmasmen!

Xonzoda begim azbaroyi quvonganidan ukasini mahkam quchib, peshonasidan, koʻzlaridan oʻpdi.

SAMARQAND

ZAFAR VA KULFAT

1

Boburning qoʻshini Samarqandni butun yoz va kuz boʻyi qamal qildi. Boysunqur mirzo yetti oy shahar darvozalarini berkitib yotdi-yu, axiri ochlik va tanqislikka bardosh berolmay, sovuq qish kechalaridan birida yaqin odamlari bilan Samarqanddan yashirincha chiqib, Hisor tomonga qochdi.

Shaharda qolgan beklar bundan xabar topganlaridan keyin qal'a darvozalarini ochtirdilar. Boburning uch mingga yaqin qurolli kishilari zafar kuyini chalib, qoʻsh nogʻoralar va karnaylar sadosi ostida shaharga kira boshladilar.

Bobur besh yasharligida koʻrganlari yaxshi esida qolmagan ekan. Samarqandning har yer-har yeridan moviy togʻlar kabi koʻkka boʻy choʻzib turgan ulugʻvor gumbazlarning qaysisi Ulugʻbek madrasasiniki ekanini, qaysisi Bibixonim madrasasiga mansubligini yonida borayotgan Qosimbekdan soʻrab bildi. Faqat arkka yaqinlashganda, chap tomonda koʻringan ulkan obidaning Amir Temur maqbarasi ekanini jangchining dubulgʻasiga oʻxshash gumbazning afsonaviy goʻzal taram-taramlaridan tanidi. Qancha davrlar oʻtsa ham, boʻyoqlari xuddi bugun surilganday yap-yangi turgan bu ajoyib binolar, ularning tantanavor koʻrinishi va oftobda gʻalati tovlanishi Boburning qalbidagi zafar zavqiga yana zavq qoʻshardi.

Ark joylashgan balandlikka koʻtarilayotganlarida Bobur oʻng-u soʻlda koʻringan ayvonli uylar va hovlilarga koʻz tashladi-yu, birdan oʻzining asira qalligʻi Oyisha begimni esladi. Ajab emaski, begim mana shu uylardan birida darcha tirqishidan gʻoliblarga qarab turgan boʻlsa. U bechora endi barcha azob-uqubatlardan qutulib, Samarqand qizlari orasida eng moʻtabari boʻlishini, hamma uni «yosh podshohimizning qalligʻi», deb e'zozlashini bilarmikin? Bobur otini Qosimbekning otiga yaqinlashtirib, past ovoz bilan soʻradi:

 Asirlardan xabar olishga odam tayinlandimi?
 Qosimbek bu savolning yashirin ma'nosiga tezda tushunolmadi:

- Amirzodam, gaysi asirlarni aytursiz? Bobur otasi tengi Qosimbekning oldida qalligʻini tilga olishdan uvalar edi. U allanechuk ivmanib qovogʻini solganidan Qosimbek gap nimadaligini fahmladi-vu: - Ha, asiralarmi? - deb, Bobur aytolmagan soʻzni oʻzi aytdi. -Bu ishga Noʻyon Koʻkaldoshni tayin etganmen. Avvalo Sulton Ahmad mirzoning farzandlaridan xabar olinur. Qulingiz aytganmen. Kechqurun No'yon sizga axborot berur. Ark ichiga kirdilar. Bu yerdagi eng ulkan va salobatli bino - toʻrt qavatli Koʻksarov edi. Koʻksarovda juda koʻp fojialar boʻlgan, talay shahzodalar shu yerda oʻldirilgan. Shuning uchun Samarqandning soʻnggi tojdorlari Koʻksaroyda turmas edilar, faqat mashhur Koʻktosh ustiga chiqib, tantana bilan taxtga oʻtirish marosimini oʻtkazar edilar. Bobur ham arkning oʻng tomonida joylashgan Boʻstonsaroyga tushdi.

Oqshom Boʻstonsaroyda qandillar yondirilganda Bobur oʻtirgan xonayi xosga Noʻyon Koʻkaldosh kirib keldi. Zar bilan naqshlangan bu xona juda sovuq edi. Ular ikkovi poʻstinlarini va telpaklarini yechmasdan koʻrpacha ustida oʻtirib, gaplasha boshladilar.

Noʻyon Koʻkaldoshning ovozida iliq bir hayajon sezildi. Bobur podshoh boʻlganidan beri ulugʻ beklar atrofini oʻrab olib, Noʻyon Koʻkaldoshday tengdoshlari ancha chetga chiqib qolgan edi. Bugun oralari yana

ilgarigiday yaqin boʻlib qolganidan quvongan Noʻyon toʻlqinlanib soʻzlay boshladi:

– Amirzodamning nomlaridan oltin bilaguzuklar, asl matolar, subhoni oʻriklar¹, lavzinalar² olib bordik. Ulugʻ xolangiz Mehr Nigor xonim peshvoz chiqdilar...

Bobur oʻz onasini esladi. Mehr Nigor xonim – Qutlugʻ Nigor xonimning tugʻishgan opasi va Sulton Ahmad mirzoning katta xotini edi. Oyisha begimning onasi yoshligida oʻlib ketgan, uni farzandsiz Mehr Nigor xonim tarbiyalab oʻstirgan, hozir ham unga ona oʻrnida gʻamxoʻrlik qilar edi. Shuning uchun Mehr Nigor xonim Boburga ham xola-yu, ham boʻlajak qaynona edi.

- Ozib ketibdilar, deb davom etdi Noʻyon. Oshliqdan³ juda qiynalmishlar. «Qahatchilik boʻlib, pulga oshliq topilmay qoldi», deydilar. «Zogʻora nonga ham zor» boʻldik, deb yigʻlab yubordilar. Oʻtin-choʻplari ham yoʻq ekan. «Sovuqda diydirab oʻltiribmiz» deydilar.
 - Boysunqur mirzo shu qadar noinsoflik qilibdirmi, a?
- Mirzoning oʻzi ham oxirgi paytlarda qorni toʻyib taom yemagan boʻlsa kerak, amirzodam. Yetti oy qamalda yotish osonmi? Koʻchalarda ochdan oʻlgan odamlarning oʻliklari yotibdi. Faqir-u bechoralar ochdan oʻlmaslik uchun eshak goʻshtini, it goʻshtini yeyishgacha yetib bormishlar... Biz bundan bexabar ekanmiz. Darhol qaytib kelib, Qosimbek qavchinga uchradim. Bir arava un, guruch, bir arava oʻtin, oʻnta qoʻy oldik. Keyin hammasini yana oʻzim eltib topshirdim. Shunda meni ichkari uyga taklif qildilar.

Noʻyon Koʻkaldosh sirli kulimsirab, bir lahza taraddudlanib turdi. Bobur uning hozir Oyisha begim haqida gapirmoqchi ekanini sezib, sabrsizlandi:

- Soʻzlang, Noʻyon, soʻzlang!

¹ Subhoni oʻrik - danagi oʻrniga magʻiz solingan oʻrik.

² Lavzina – bodom qoʻshib ishlangan shirinlik.

³ Oshliqdan- bu yerda: don, un ma'nosida.

– Tillakori uyda Oyisha begim yuzlariga oq ipak parda yopib qarshimdan chiqdilar... – Noʻyon bir toʻxtab oldi. Oyisha begim uning koʻziga juda kichkina, norasida oʻsmir qizchadek koʻringan edi. U buni Boburga aytishga jur'at etmadi. – Juda nozik koʻrindilar. «Xush kelibsiz», dedilar. Ovozlari shunday mayin, shunday sof.

Bobur Andijondan Oyisha begimni oʻylab kelib, endi koʻrisholmasligi, balki sabrsizlik qilgan kabi qiz tomonni ham ranjitishi unga bedavo bir dard boʻlib tuyildi.

Noʻyon Koʻkaldosh bu dardga dori topmoqchiga oʻxshab qoʻyniga qoʻl soldi-yu, jajjigina oq ipak xaltacha oldi.

– Oyisha begimning nomidan sizga buni Mehr Nigor xonim berib yubordilar.

Bobur xaltachani qoʻliga olganda ichida hech narsa yoʻqday tuyildi. Bogʻichini ochib, xaltachani kaftiga sekin agʻdargan edi, ikki dona gavhar tushdi. Har biri guruchdan sal kattaroq, ammo xiyla salmogʻi bor. Jilosi nafis va ulugʻvor.

- Sirtiga ham qarang, - dedi Noʻyon.

Nozik munchoqlar bilan bezatilgan xaltachaning sirtiga kashtaga oʻxshatib tikilgan chiroyli ipak yozuvni Bobur endi koʻrdi. «Najotkorimizga» degan birgina soʻz unga butun bir muhabbatnomadek shirin tuyildi. Oyisha begim bu ipak yozuvni oldindan tika boshlagan boʻlsa kerak. Aks holda, Noʻyon borgan zahoti tikib ulgurmas edi. Demak, u Boburning najot keltirishiga ishongan!

– Amirzodam, qoʻlingizdagi gavharlarning tarixini eshiting, – deb davom etdi Noʻyon. – Bular Sulton Ahmad mirzoning sallalariga qadalgan asl gavharlardan ekan. Uning mungliqlari tilak bildirdilarki, Sulton Ahmad mirzoning shu gavharlari siz bilan birga yana

Samarqand taxtiga chiqsin-u, sizning aziz boshingizda yuz yil bezavol porlab tursin!

Sulton Ahmad mirzo tilga olinganda Boburning koʻngli bir xira tortdi. Ammo uning qoʻlidagi gavharlar shunday musaffo tovlanar ediki, ularda porlagan goʻzal nur qalligʻining koʻzlaridan nishona berib turganga oʻxshardi.

– Mayli, mungliqlar tilagandek boʻlsin! – dedi Bobur Noʻyonga.

Soʻng sekin qarsak chalib, dastorpechni chaqirtirdi. Dastorpech bu gavharlarni Boburning tantanali marosimlarda oʻraydigan sallasiga qadab qoʻydi.

Shu oqshom Bobur gʻoyibona mehr qoʻygan qalligʻini koʻrgisi kelib, gʻazal yoza boshladi:

Jamoling vasfini, ey oy, necha eldan eshitgaymen Ne kun boʻlgʻay visolingga meni dil xasta etgaymen?

2

Qish chillasi avjida. Izgʻirinli yellar esadi. Qoʻloyoqlariga kishan solingan, kiyimlari yirtiq mahbuslar Samarqandning Registon maydonida sovuqdan qaltirab, shahar qozisining hukmini tinglaydilar.

Ishonchli amaldorlarning aniqlashlariga qaraganda, bular Bobur mirzoga xiyonat qilganlar – qamal paytida unga maxfiy odam yuborib, «kechasi kelinglar, darvozani ochib berurmiz», deganlar. Boburning bir dasta botir navkarlari Gʻori Oshiqon oldidan qal'aga oshib oʻtganda, xiyonatchilar ularni dushmanlariga tutib berganlar.

- Biz emas! Tutib berganlar qochib ketmishlar! - yigʻlamsirab qichqirdi mahbuslardan biri. Ammo uning soʻziga hech kim e'tibor bermadi. Farmoni oliyga binoan jallod ularning qoʻllarini orqalariga bogʻlab, maxsus chuqur oldiga choʻkkalatib qoʻydi-

da, boʻgʻizlariga xanjar tortdi. Qatl etilganlarning issiq qoni maydonning toshlariga sachrab, sovuqda hovur chiqarib bugʻlanar edi.

Kechasi boʻralab yoqqan qor buning hammasini bekitib, borliqni oppoq qilib ketdi. Ertasi kuni tushdan havo yumshab, gumbazlarning qorlari erib tusha boshladi.

Peshin namozidan keyin Bobur mirzo otlanib Samarqand rastalarini aylanishga chiqdi. Yonida eshik ogʻa Qosimbek, Ahmad Tanbal va Xonquli degan yana bir bek orqaroqda navkarlar bilan kelishmoqda. Shaharning qayerida nima borligini yaxshi biladigan samarqandlik keksa shoir Javhariy ularga yoʻl koʻrsatib, oldinda boryapti.

Ulugʻbek qurdirgan ulkan gumbazli xonaqodan oʻtganlaridan keyin Javhariy kunchiqish tomondagi koʻchani koʻrsatdi.

- Amir Alisher Samarqandga kelganlarida, mana shu koʻchadan koʻp oʻtar edilar. Mazkur koʻchaning oxirida Alisherbekning ustozlari faqih Abdullays istiqomat qilur edi. Uylari hali ham bor.
- Siz Mir Alisherning suhbatlarida boʻlganmisiz? soʻradi Bobur.
- Ha, yoshimiz Alisherbek bilan teng edi, ammo faqir u zotni ustoz oʻrnida koʻrur edim, mudom ash'orlarimni oʻqib berib, maslahat olur edim. Unutmagan ekanlar, «Majolisun nafois» nomli kitoblarida faqirni ham tilga olmishlar.

Soqollari oppoq, qoshlariga ham oq tushgan Javhariy hozir Boburning havasini keltirdi. Qani u ham Navoiyning nazari tushgan shoirlardan boʻlsa! Ammo Bobur hali mashq she'rlar yozishdan nariga oʻtgan emas, ularni birovga koʻrsatishga uyaladi. Shunday boʻlsa ham katta shoir boʻlish orzusini hech tark etmaydi. Mana shu orzuning ta'sirida bugun Bobur oʻziga yoʻl koʻrsatuvchilikka Samarqandning

mashhur beklarini emas, Navoiyni koʻrgan moʻtabar shoirni taklif qilgan edi.

Javhariy ularni novvoylar mahallasiga boshladi. Koʻchalar allanechuk huvillagan. Bosilmagan qor otlarning tizzasiga chiqadi. Soya joylarda izgʻirin yuzni yalab oʻtsa ham, oftob tushib turgan paxsa devorlar va tom boʻgʻotlari erigan qordan hoʻl boʻlib borar edi.

Bobur tomlarga qaradi. Birortasi kuralmagan. Tom kurayotgan bironta odam koʻrinmaydi. Novvoylik rastasiga kelsalar, qator doʻkonlarning hammasi yopiq. Boburning taajjubi ortib, Javhariyga qaradi:

- Mavlono, novvoylar koʻchib ketganmilar?
- Mirzo hazratlari uch oydirki, rastaga non chiqmaydi. Chunki un yoʻq. Qamalda koʻp novvoylar ochdan oʻlib ketdi. Odamlar holdan toygan. Tomga chiqib, qor kurashga ham madorlari yoʻq.

Bobur bunga sababchi boʻlgan odamdek oʻngʻaysizlanib, Qosimbekka qaradi. Qosimbek esa shoirga kesatibroq gapirdi:

- Novvoylarning tirik qolganlari ham bordir, mavlono?
- Albatta, bor. Lekin yordamga muhtoj. Qani, endi amirzodam buyursalar-u novvoylarga un berilsa. Rastalar yana ochilsa, Samarqandning mashhur nonlaridan odamlar toʻyib yesa.

Bobur Javhariyning aytganini qilmoqchi boʻlayotganini sezib, Qosimbek buning oldini olishga intildi:

– Amirzodam, bizda ham oshliq oz qoldi. Qoʻshinga zaxira kerak. Rastalarga hozir un berolmasmiz. Balki keyinroq...

Keksa shoir Boburga umid bilan qarab turibdi... Shu payt uning qora movut chakmonimi, xiyol egik yelkasimi, kalta qirqilgan soqolimi, nimasidir Boburga Navoiyning Behzod chizgan rasmini eslatdi. Bobur mavlononi noumid qilsa, Navoiyning umidini ham

oqlolmaydiganday boʻldi. U Qosimbekka buyruq ohangida gapirdi:

- Biz unni rastalarga emas, novvoylarga bermogʻimiz kerak. Ishonchli bir kishi nazorat qilsin, novvoylar non yopib, bizning nomimizdan ochlarga tarqatsinlar. Besh-olti qop un bilan qoʻshin zaxirasiz qolmas. Jizzaxga yuborilgan karvon erta-indin oshliq olib qaytgusi!
- Saxovatingizga ofarin, Mirzo hazratlari! deb Boburning soʻzlariga faqat Javhariy quvonch bildirdi. Semiz toʻriq aygʻirning jilovidan tortib turgan Ahmad

Tanbal mavlonoga qarab poʻngʻilladi:

- Amirzodam Boysunqurdan qolgan ochlarning qaysi biriga oshliq yetkazsinlar? Biz bularni boqishga keldikmi?

Ahmad Tanbal, «amirzodam» deb, goʻyo Boburga jon kuydirib gapirgan boʻlsa ham, aslida Boburning hozirgi buyrugʻidan noroziligi sezilib turardi.

Ahmad Tanbal Oʻshda Xonzoda begimga odam qoʻyib niyatiga yetolmaganidan beri Boburga qarshi adovati avvalgidan oʻn hissa ortiq bir kuch bilan xuruj qilmoqda edi.

– Janob Ahmadbek, – dedi Bobur. – Biz Samarqandni boqish uchun kelmagan boʻlsak, talash uchun ham kelgan emasmiz!

Tanbal kecha zargarlarni talatganini eslab, koʻzlari bir bejo boʻldi. Ammo oʻzini osoyishta koʻrsatib:

– Soʻzingiz toʻgʻri, Mirzo hazratlari, – dedi. Biroq shuncha jang-u jadal bilan olgan shahrimizdan ozgina oʻljador boʻlishga nahotki haqimiz yoʻq? Axir gʻoliblarning oʻlja olishi ota-bobolarimizdan qolgan rusum-ku!

Tanbalning gapi navkarlar orasida turgan Xonqulibekka juda yoqib tushgani uning kulimsirab, bosh irgʻaganidan bilindi. Koʻpchilik navkarlar ham Ahmad Tanbalni haq deb bilar edi. Samarqanddan durust oʻlja

ololmagan beklarning barchasi norozi boʻlib yurgani ma'lum edi. Shu tobda Bobur oʻzini ikki oʻt orasida qolganday sezdi. Beklar-u navkarlarning koʻngliga qaray desa, bu yoqda raiyat ocharchilikdan oʻlyapti. Raiyatni ochlik changalidan qutqazay desa, beklar-u navkarlar: «Bular nega bizning nasibamizga sherik boʻladi?» deb dod soladi.

Bobur Qosimbekka umid bilan koʻz tikdi-yu:

- Ocharchilikka faqat Boysunqur mirzo sababchimi? - dedi. - Agar biz shaharni yetti oy qamal qilmasak, bu baxtsizlik boʻlmasligi mumkin edi-ku!

Qosimbek Boburning Tanbal qarshisida yakkalanib qolishini istamadi-yu, munozarani tezroq tugatishga tirishdi:

– Amirzodamning soʻzlari qulingizga sari toj boʻlsin! Ertagayoq novvoylarga un berib, ochlarga non yoptirib tarqatishni men oʻz zimmamga olurmen!

Bobur Qosimbekka minnatdorona koʻz tashlab:

- Gap tamom, dedi. Soʻng Javhariyga yuzlandi. Qani endi sahhoflar¹ rastasiga oʻtaylik. Javhariy ularni qingʻir-qiyshiq bir koʻchaga boshlar ekan, Ahmad Tanbal, qovoq-tumshugʻi osilib, Boburning ketidan ergashdi. Keng bir sahnga chiqdilar. Yopiq turgan sahhoflik doʻkonlari koʻrindi. Ikki doʻkon oraligʻidagi ikki tavaqalik darvoza ichidan avval qandaydir shovqin eshitildi, soʻng oyoq yalang, bosh yalang bir kampir dod solib chiqdi:
- Voy bolamni oʻldirganlar kun koʻrmasin! Och qolib, shishib oʻlsin!

Kampirning ketidan oʻrta yashar ozgʻin bir erkak yugurib chiqdi-yu, otliqlarni koʻrib, qoʻrqqanidan bir lahza angrayib turib qoldi. Kampir hamon bor ovozi bilan baqirib qargʻardi:

 $^{^{\}mbox{\tiny 1}}$ Sahhof – muqovachi. Kitob savdosi bilan sahhoflar shugʻullangan.

- Dushmanning oʻzi qamalda qolib oʻlsin! Iloyo mening bolamday ochdan oʻlsin! Oʻlsin!!!

Javhariy otini erkak kishi tomonga burib:

- Mulla Qutbiddin, nima boʻldi? - deb soʻradi.

Mulla Qutbiddin endi hushini yigʻib, kampirga qarab chopdi. Ozgʻingina, madorsiz kampirni sudrab hovliga olib kirib ketdi-da, entikib qaytib chiqdi. Qoʻl qovushtirib otliqlar tomonga kelar ekan:

– Afv etgaysizlar, – dedi. – Ogʻamning zaifasi farzand dogʻidan telba boʻlib qoldi.

Bechoraning oʻgʻilchasi ochlikdan kunjara yegan ekan, shishib oʻldi.

Ogʻir sukunatda Boburning:

– Yana bu shoʻrliklardan oʻlja olmoqchi boʻlurlar! – degan kinoyali soʻzlari eshitildi-yu, Ahmad Tanbal bilan Xonqulibekka oʻqday tegdi.

Mulla Qutbiddin Samarqandning taniqli sahhoflaridan edi. Mavlono kim kelganini sahhofga sekin aytdi. Mulla Qutbiddin koʻpdan beri ochilmagan doʻkonini shosha-pisha ochdi. Bobur otdan tushib, mavlono bilan birga doʻkonga kirdi. Mulla Qutbiddin bisotida bor eng nodir kitoblarni bir-bir olib, changlarini artib, Boburga koʻrsata boshladi. Qimmatbaho zarhal muqovalar ichida Mahmud Koshgʻariy, Abdurahmon Jomiy... Sharafiddin Ali Yazdiyning Behzod suratlari bilan bezangan «Zafarnomasi»... Abdurazzoq Samarqandiy... Ha, mana. Navoiyning «Mezonul avzoni». Bu kitobni Bobur koʻpdan beri soʻroqlab yurgan edi. U oltinga topilmaydigan ajoyib kitoblarning koʻpligini koʻrib, afsonaviy xazinaga kirib qolganday hayajonlanar, nuqul:

- Yana ne bor? Yana? - deb soʻrardi.

Mulla Qutbiddin ham biri-biridan noyob kitoblarni uning oldiga qalashtirib tashladi. Mashhur xattotlar katta pullar evaziga koʻchirgan, har bir varagʻiga nafis bezaklar ishlangan bu qoʻlyozma kitoblarning har

biri bir necha ming dinor turishini Boburning yonida turgan Qosimbek ham bilar edi. U Samarqand xazinasi ship-shiydam ekanini, Andijondan olib kelingan oltinlar esa koʻpga bormasligini oʻylab qarab turardi. Nihoyat, Bobur ajratib olgan kitoblar oʻndan oshganda, Qosimbek sekin shipshidi:

- Amirzodam, hozir xizonachi yoʻq...

Kitoblardan boshqa narsani unutgan Bobur Qosimbekning shamasini tushunmadi.

– Xizonachini yuborurmiz, – dedi va tanlagan kitoblarini sahhofga koʻrsatdi: – Hammasini hisoblab qoʻying. Kitobdor bilan xizonachi pulini toʻlab, olib keturlar.

Mulla Qutbiddin qoʻl qovushtirib:

- Bosh ustiga! dedi-yu, ammo uning nimanidir aytolmay, taraddudlanayotgani Boburga sezildi.
- Ne tilagingiz bor, mullo? Ayting, tortinmang. Kitoblaringiz bebaho!

Bobur bu kitoblar uchun mol-dunyosini ayamaydiganday koʻrindi. Sahhof dadillanib:

– Mirzo hazratlari, – dedi. – Hozir pulga oshliq topilmaydi. Bolalarim, «non» deb yigʻlab, har kuni yurak-bagʻrimizni ezurlar. Agar iloji boʻlsa, ozgina un...

Boburning koʻz oldiga boyagi telba kampir keldi-yu, sahhofning muhtojligini oldinroq sezmagani uchun oʻzidan koyindi. Qosimbekning novvoylik rastasidagi e'tirozlari esiga tushib, unga hech nima demadi. Yana beklarning jinini qoʻzgʻamaslik uchun sahhofga kerakli narsani saroy oshpazidan berib yuborishni koʻngliga tugdi. Sahhofga past tovush bilan:

- Gʻam chekmang, - dedi. - Tilagingiz amalga oshur. Xavr!

Bobur tashqariga chiqdi. Ahmad Tanbal hamon otidan tushmay oʻshshayib turar edi.

Shu kuni shomda kitoblarni olib ketishga kelgan kitobdor va savdarlar sahhofga soʻragan pulini berishdi-yu, uning uyiga bir qop un va bitta semiz qoʻy tushirib ketishdi.

Ertasi kuni novvoylik rastasiga Qosimbekning navkarlari bir arava un olib kelganliklari, qor tagida sovib yotgan tandirlarga oʻt qalanib, issiq non hidi atrofga taralgani, otliq jarchilar podshoh nomidan ochlarga non ulashilishini e'lon qilgani hammaning qulogʻiga borib yetdi. Novvoylik rastasiga kelib, xushboʻy bugʻdoy nonining ta'midan koʻzi charaqlab ochilayotgan ochlar Boburdan nechogʻlik mamnun boʻlsalar, tamagir bek va navkarlar: «Bizning ogʻzimizdan olib, avboshlarga berdi!» – deb, yosh podshohdan shunchalik norozi edilar. Samarqanddagi ochlik va tanqislikdan bezgan bir qism jangchilar Andijonga qaytib ketishga intila boshladilar.

3

Tandirdan uzilgan nonlarni qopga solib chiqib, ochlarga ulashayotgan navkarlardan biri - Tohir edi. Avval u ham: «Menga nayza sanchib, onamning oʻlimiga sabab boʻlgan yogʻiylarga xizmat qilgani kelganmi men?!» deb achchiqlandi-yu, lekin uvada kiyingan, bo'yinlari qiltiriqday bo'lib qolgan och o'smirlarga, chollarga, ayollarga ko'zi tushganidan kevin hovuri bosildi. Ichkaridan ola qopda issiq non koʻtarib chiqar ekan: «Balki bu ayollarning orasida Robiya ham bordir? - deb oʻylandi. - Yoki Robiyani koʻrgan-bilganlar uchrab qolar?» Tohirning boshida tulki telpak, egnida pochapo'stin, so'nggi oylarda mudom otliq yurib, qadam olishi xiyla oʻzgargan. Uzangiga oʻrganib ketgan oyoqlari yerda avvalgiday ravon odimlay olmaydi. Ammo qoʻllari chavandozcha bir chaqqonlik bilan qopga tez tushib chiqadi. Koʻzlari loʻq ochlar Tohirning oʻzini emas, non ulashayotgan qoʻllarini koʻrishadi, xolos. Ularning koʻpi imillab,

kichik-kichik qadam tashlab juda sekin harakat qilishadi. Yoʻllarida kichkina ariq yoki doʻnglik uchrab qolsa, oʻtolmay toʻxtab qolishadi. Baquvvatroqlari suyab, koʻmaklashib oʻtkazib qoʻyishadi.

Tohir odamlarning har birini sinchiklab koʻzdan kechiradi. Nahotki, ularning orasida Robiyani koʻrganbilgan birorta odam boʻlmasa? Ana, bir ayol toʻn yopinib, yarim oʻgirilib turibdi. Tohir uning yonidagi kampirga qarab:

- Xolalar, oralaringda andijonlik yoki quvalik ayollar bormi? - deb soʻradi.

Kampir tojikcha talaffuz bilan:

- Undoqlar yoʻq, aylanay, - dedi.

Tohir yuzlab marta aytgan soʻzlarini takrorlab:

- Singlimni izlab yuribman, dedi. Sulton Ahmad mirzoning askarlari Quvadan olib qochib ketganiga toʻrt yil boʻldi.
 - Bechora! deb qoʻydi kampirning yonidagi ayol.

Nariroqda nonga koʻz tikib turgan bir kishi sabrsizlanib yoʻtaldi. Tohir non ulashishda davom etar ekan, oʻttiz besh yoshlardagi, siyrak malla moʻylovli novcha bir kishining qarshisida toʻxtadi.

- Siz ilgari navkar boʻlganmisiz?

Yuzi shishinqiragan bu odam xavotirli tovush bilan:

- Ha, dedi.
- Qachon?
- Koʻp jil boʻldi.
- Andijonga borganmisiz?
- Joʻq... berirogʻidan qaytkanmiz.

Bu odamning talaffuzi oʻshanda Robiyani qopga solib olib ketgan «joʻq»chi yigitlarni eslatdi-yu, Tohirning vujudi qaltirab ketdi. Ehtimol, bu oʻsha bosqinchilarning biridir? Tohir orqasiga oʻgirilib, novvoyxona tomonda turgan sherigini chaqirdi. Qopning tagida qolgan nonlarni unga berdi-yu, malla

moʻylovli kishini bilagidan olib, bir chetga boshladi. U odam qoʻrquvdan boʻshashib, kalovlanib, toʻxtab qoldi:

- Ukajon, men bir bechora odamman! Meni qoʻyib jubaring! Nongʻa kelib edim... Nongʻa!...

Tohir kalavaning uchini shu odam topib berishi mumkinligini sezib, muloyimroq gapirishga tirishdi.

- Non olasiz. Sizga koʻproq non beramen. Menga rostini ayting. Sulton Ahmad mirzoga navkar boʻlganmisiz?
 - Boʻgʻanmen.
- Andijondan beridagi Quvaning koʻprigidan oʻtganmisiz?
- Qaysi koʻprik? Sinib ketib, bizni xarob qilgʻan koʻprikma?
- Xuddi oʻzi! dedi Tohir gʻazab aralash quvonch bilan. Mana, oʻsha bosqinchi! Tohir unga hozir xanjar ursa bir alamdan chiqar edi. Ammo Robiya nima boʻladi? Buni oʻldirsa, Robiyani kimdan soʻroqlab topadi?

Tohir malla moʻylovli yigitni yoqasidan olib qahr bilan silkitdi:

- Robiya qani? Ayt tezroq!

Ochlikdan darmoni ketib, zoʻrgʻa yurgan yigit Tohirning siltalashidan toʻkilib, parchalanib ketadiganga oʻxshardi. U nafasi ichiga tushib:

- Qa-qaysi Rokiya? dedi.
- Rokiya emas, Robiya? U qizni Quvadan olib qochib qayoqqa olib bordilaring? Hozir qayerda?

Rostini aytmasang, kallangni olamen! Ayt!

– Uka! Ukajon! Men Robiya degan qizni koʻrganim joʻq. Oʻldirsang, mayli, oʻldir, lekin mendan bekorga gumonsirama, oʻshanda men qiz obqochadigan ahvolda emas edim. Tugʻishgan ukam koʻprikdan jigʻilib, suvgʻa ogʻib oʻldi. Qamishlarning orasidan uch kun qidirib oʻligini topolmadim. Balchiq jutib ketgan ekan.

Tohir oʻsha koʻprikni oʻzi buzganini esladi, malla moʻylovli yigitning koʻzlari yoshlanganini koʻrdi-yu, uning yoqasini qoʻyib yubordi.

Robiyani qopga solayotgan «joʻq»chi yigitlardan biri ikkinchisini «Juman» deb atagani Tohirning yodida qolgan edi. U qarshisida koʻzlari moʻltirab turgan odamga tikilib:

- Oting nima? dedi.
- Otim Mamat.
- Mamatmi yo Jumanmi?
- Uka, ishonmasangiz, mana shu mahallaning odamlarini chaqirib soʻrang. Otim Mamatligini hamma biladi. Oʻzim koʻnchi kosibman.

Tohir oʻzicha oʻylandi: «Agar ukasi Quvada balchiqqa botib oʻlgan boʻlsa, bu ham mening giribonimdan olishga haqi bor!» Shu oʻy ta'sirida Tohir jahlidan tushdi. Mamatga yana «siz»lab gapira boshladi:

- Jumanni bilarmidingiz?

Mamat peshonasini ushlab, nimanidir eslashga tirishdi:

- Toʻxtang, toʻxtang, Juman maymoq deganimiz boʻlar edi. Sheriklari bilan oʻsha yoqdan ikkita qiz obqochib kelgan, deb eshitib edim.
 - Samarqandga olib kelganmi?
- Qizlarnimi? Bunisini bilmadim. Oʻratepaning naryogʻida Oqsuv degan soy bor. Oqsuvga jetganimizda podshomiz oʻlib qoldi. Oʻshanda bir algʻov-dalgʻov boshlandi, mana haligacha bosilmaydi. Navkarlik ham jonimga tegdi, boʻshab ketdim.
 - Juman maymoq hozir qayerda?
- Bilmadim-ov. Uch-toʻrt jildan beri koʻrgan emasmen. Battarin jigit edi, oʻlib ketdima yo boshqa podshoning xizmatiga oʻtib ketdima. Podshoh ham koʻp-ku. Toshkentda Mahmudxon degani, Turkistonda Shayboniyxon degani, Hisorda yana birovi.

– Bu podsholarning urush-janjallari boshlaridan qolsin! – dedi Tohir kuyunib. – Siz bir kosib boʻlsangiz. Men bir dehqon edim. Kelib-kelib bizday zahmatkashlarni bir-birimizga dushman qilib qoʻygan zamonaning uyi kuysin!

Mamat Tohirning xanjar izi qolgan yuziga endi botinibroq qaradi:

- U qiz kimingiz boʻlar edi, uka? Singlingizmidi?
- Koʻzimning oq-u qorasi edi!

Mamat gap nimadaligini fahmlab, Tohirga xiyol hayratlanib tikildi. Soʻng uning armon toʻla koʻzlarini koʻrib, bu yigitga oʻzini allanechuk yaqin sezdi va unga tasalli bergisi keldi:

– Xudo xohlasa, toviladi! Mening tanish-bilishlarim koʻp, uka. Soʻroqlayman. Xotinimga aytaman. Ayollardan surishtiradi.

Mamatning astoydil yordam bermoqchi ekanini sezgan Tohir uni yengidan oldi-yu:

- Bu yoqqa yuring, dedi. Mamatni novvoyxonaning yoʻlagiga olib kirdi-da, ichkaridan toʻrtta non olib chiqdi.
 - Oling! Siz bu yerga nonga kelgan edingiz.

Mamat nonlarni titroq qoʻllari bilan olib, qoʻyniga tiqdi. Issiq bugʻdoy nonning hidi va taftidan ogʻirogʻir nafas olib, ustma-ust yutindi. U har qancha och boʻlsa ham Tohirning oldida darhol non kavshashdan oʻzini tutdi. Faqat nonning hididan mast boʻlganday ezmalanib, gapira boshladi:

- Nonday aziz boʻling, uka. Biz koʻrgan kunlarni hech koʻrmang. Qoʻldan berganga qush toʻymas. Jotib jesang bu non ikki kunga ham jetmaydi. Lekin men shuning kuchi bilan qishlogʻimga jetib olaman. Ana u tovning orqasida ogʻa-inilarim bor. Biz oʻzbekning qoʻyanquloq urugʻidanmiz. Qishlogʻimga jetib borsam, bir-ikki qop gʻalla tovib kelaman. Lekin boʻsh qop tik turmas ekan, uka. Bitta choʻbir otim bor edi, kuzda

soʻyib jeb qoʻydik. Piyoda ketay desam, och odam tovda jigʻilib sovuqda qotib oʻlaman, deb qoʻrqdim. Mana endi qoʻrqmasam boʻladi...

- Men sizni qayerdan topamen? dedi Tohir unga avvalgi va'dasini eslatib.
- Koʻnchilik guzarida uyim bor. Mamat polvon desangiz, hamma biladi. Bir vaqtlar polvon edik, uka. Mana endi gavdamizni zoʻrgʻa koʻtarib juribmiz.
 - Esingizda boʻlsin, qizning oti Robiya.

Mamat polvon bu nomni bir-ikki takrorlab, xotirasiga joylagach:

- Agar xabari chiqsa, sizni qayerdan tovaman? dedi.
 - Qosimbekning navkarimen. Otim Tohir.
- Xoʻp, Tohirbek, men sizni qidirib tovamen. Bizning odamlar sizga jamanliq qilgan boʻlsa, siz menga jaxshiliq qildingiz. Bu jaxshiligʻizni albatta qaytaraman. Xayr!

Tohir uning orqasidan qarab qoldi. «Quvada ukasining balchiqqa botib oʻlganiga men sababchi boʻlganimni bilsa nima qilarkin?» deb oʻylandi.

Mamat esa nariroqqa borib, shosha-pisha qoʻyniga qoʻl tiqdi-yu, issiq nondan bir burda uzib olib, tez ogʻziga soldi.

4

Andijonlik bek va navkarlar «Samarqandni olsak hamma mushkullarimiz oson boʻladi», deb oʻylagan edilar. Biroq eng katta ishkalliklar Samarqand olingandan keyin boshlandi. Uch ming kishilik qoʻshinning besh-olti ming ot-ulovi bor. Qahraton qishda qamaldan abgor boʻlib chiqqan shaharda na ochlarni toʻydirib boʻladi, na qoʻshinga oziqovqat yetkazib boʻladi, na otlarni yem-xashak bilan ta'minlab boʻladi. Shahar darvozalari ochilgan, bu

yogʻi Oʻratepagacha, bu yogʻi Qarshigacha barcha tomonlarga tuya karvonlari joʻnatilgan, bozor va rastalarni tiriltirish uchun turli choralar koʻrilayotgan boʻlsa ham poytaxtda hayot hali-beri izga tushadiganga oʻxshamas edi. Samarqand soʻnggi yillarda koʻp marta qoʻldan-qoʻlga oʻtib, dahshatli talon-torojlardan qashshoqlanib qolgan edi.

- Bu mushkulotlar koʻz ochib-yumguncha oʻtib ketgay, - deb, mashvaratlarda Boburning ustozi Xoʻja Abdulla andijonlik beklarni sabr-qanoatga chaqirar edi: - Bahor yaqin, pishiqchilikka yetsak, ogʻir kunlarni koʻrmagandek boʻlib keturmiz. Tangisliklar oʻtur, ammo bu yogʻi Qarshi-yu Shahrisabzgacha, u vogʻi Oʻsh-u Oʻzgangacha - shunday ulugʻ mamlakat qolur. Tangrim bizga shunday katta kishvarni inoyat qilgani uchun, biz Samarqandday olamshumul dorussaltanaga muyassar boʻlganimiz uchun shukronalar aytmogʻimiz kerak. Bobur mirzoning orzulari shulkim, Movarounnahr yana Ulugʻbek davridagi kabi birlashsa, poytaxt asliga qaytsa, hamma viloyatlar hamjihat-u obod boʻlsa. Amirzodamning bu orzulari siz-u bizning muqaddas maqsadimizdir. Ilohi omin, Parvardigori olam bizni bu maqsadimizga ham vetkazsin!

Bu gaplar Xonqulibek va Ahmad Tanbalga oʻxshagan beklarning gʻashiga tegsa ham, ular mashvaratga toʻplangan boshqa beklar qatori:

– Ilohim omin! – deyishib, yuzlariga fotiha tortadilar. Chetdan qaragan odam buni yakdillik belgisi deb oʻylaydi.

Ammo beklar mashvaratdan yangi bir vazifani zimmalariga olib, uy-uylariga tarqalganlaridan keyin xilvatda ikkita-uchtadan boʻlib olib, gʻiybatga tushib ketishadi:

– Xullasi kalom, Bobur mirzongiz Ulugʻbekdek ulugʻ odam boʻlmoqchi ekanlar-da, Ahmadbek? – soʻraydi Xonqulibek istehzo qilib.

Ular baxmal koʻrpa yopilgan issiq sandalning ikki chetida oʻtirib, kechki taomni birga emoqda edilar. Ahmad Tanbal qazidan bir parra olib, kinoya bilan kuldi:

- Ha, Bobur mirzoyingiz ulugʻ odam boʻlishlari uchun yana birgina narsa etmay turganmish...
 - Xo'sh?
- Bugun mashvaratda aytdilar-ku! Samarqand dehqonlari ocharchilikda urugʻlik donlarini yeb qoʻygan emishlar. Biz Qarshiga karvon yuborib, olib kelgan donlarimizni dehqonlarga qarz berur emishmiz.
 - Dard ustiga chipqon!
- Iloj qancha, Xonqulibek! Yosh podshohimiz ulugʻ boʻlishlari uchun hammasiga chidaysiz. Yana bu kishim Samarqandga kuyovlar, qalliqlari bor. Domod raiyatga oʻzlarini yaxshi koʻrsatmoqlari zarur. Bu ham etmaganday, yosh podshohimiz har haftada shoirlarni toʻplab mushoira oʻtkazmoqdalar.
 - Shoir ham boʻlmoqchilar shekilli-da!
- Ha, bizning nasibamizga qayoqdagi shoirlarni ham sherik qilganlari ana shu sababdan!

Xazinadagi oltinlarni sovurib, qator-qator qimmatbaho kitoblar olishlari ham ana shundan!

Xonqulibek soqolini gʻijimlab:

– Etak silkib, Andijonga ketay desam, ruxsat bermaydir, – dedi. – Tangri haqi, Boburingizdan toʻydim, Ahmadbek!

Ahmad Tanbal zaharxanda qilib kuldi-da, oʻrnidan turib eshikni zichlab yopdi. Joyiga kelib oʻtirgach:

– Xonqulibek, – deb tovushini pasaytirib gapira boshladi, – beklar boʻlmasa, podshohlarning ilkidan hech ish kelmaydir. Navkarning koʻpchiligi bizniki. Jangni biz qildik. Azobni biz tortdik. Endi bunday mute boʻlib, yosh yigitchadan ruxsat soʻrab oʻtirmogʻimiz ne kerak?

- Gapingiz rost! shivirladi Xonqulibek. Podsho boʻlsa oʻziga! Ruxsat bermasa bermasin, men baribir keturmen!
- Men ham bu yerda xor boʻlib yurmoqchi emasmen. Omon boʻlsam, podshoh topilur. Axsida Jahongir mirzo bor. Buxoroda Sulton Ali mirzo bor. Bularning urugʻi koʻp. Hammasiga siz-u bizdek beklar kerak. Sizga mening maslahatim – Andijonda koʻp turmang. Ilikka tushib qolursiz.
 - Axsiga boraymi?
- Ha, Axsida Uzun Hasanga uchrang. Sizni Jahongir mirzoning xizmatiga olur.
- Olurmikin? Balki Jahongir mirzo Boburga qarshi borolmas?
- Siz-u bizday beklari koʻpaysa borur! Jahongir mirzo Andijon taxtiga ishqiboz...
- ... Ikki bek shu kuni gapni bir joyga qoʻydilar-u ertasi kuni kechasi Ahmad Tanbalning ishonchli odamlari Feruza darvozasida soqchilik qilayotgan paytda Xonqulibek elliktacha navkari bilan sekin shu darvozadan chiqib qochdi. Oradan bir hafta oʻtgach, Ahmad Tanbalning oʻzi Zominga karvonni kuzatib borish bahonasi bilan navkarlarini ergashtirib ketdida, Samarqandga qaytmay, toʻgʻri Axsiga yoʻl oldi. Shundan keyin shahardan tashqariga zarur ish bilan yuborilgan bek va navkarlarning qaytib kelmaslik hollari tobora koʻpaydi. Kechalari qal'a devorlaridan oshib tushib qochayotganlar buning ustiga qoʻshildi. Qishning oxiriga borib, Samarqandga Bobur bilan kelgan bek va navkarlarning yarmi ham qolmadi.

Odami juda siyraklashib qolgan Bobur ketganlarni qaytarib kelish uchun eng sodiq beklardan birini Andijonga yubordi. Biroq oradan yigirma kun oʻtgach, bu bekni Ahmad Tanbal va uning tarafdorlari Andijon bilan Axsi oraligʻida tutib olib oʻldirganligi haqida xabar keldi.

Fargʻona vodiysida yomon bir fitna boshlanganiga endi shubha yoʻq edi.

Fitnachi beklarning bir qanchasi Xoʻja Abdullaga qoʻl berib, unga murid boʻlganliklari ma'lum edi. Bobur Qosimbek bilan maslahatlashib, oxiri Xoʻja Abdullani Andijonga yubordi.

Bobur taxtga oʻtirgan kezlarda Xoʻja Abdullaning gapiga kirgan Uzun Hasan va boshqa fitnachi beklar bu gal uning nasihatlari-yu va'dalariga mutlaqo quloq solmadilar. Nihoyat, fitnachilar Andijonga hujum qildilar. Xoʻja Abdulla boshliq sodiq beklar shahar darvozalarini berkitib, qamalda qoldilar.

* * *

Bu mudhish xabar Samarqandga yetib kelganda, Bobur qattiq betob boʻlib, Boʻstonsaroyning ikkinchi qavatidagi xobgohda isitmalab yotgan edi. Andijondan kelgan chopar oʻram qilib, soʻrgʻichlangan maktubni yasovulga koʻrsatdi-yu, ammo bermadi:

- Hazrati xonim «amirzodaning oʻz iliklariga bering», deb buyurganlar!

Bobur har kuni necha qayta: «Andijondan chopar bormi?» – deb soʻrar edi. Yasovul choparni darhol yuqoriga boshladi.

Xobgoh eshigi oldida ularni Boburning shaxsiy tabibi boʻlgan kichik jussali moʻysafid toʻxtatdi:

- Bu kitobatni avval Qosimbek oʻqimoqlari kerak. Agar xushxabar boʻlsa, keyin amirzodamga berursiz.
- Onalari, buyurganlar, ustodlari Xoʻja Abdulla ham tayinlaganlar, amirzodamning oʻzlari oʻqimoqlari kerak.
- Yomon xabar Mirzo hazratlarini xarob qilishi mumkin! – dedi tabib kuyunib. – Asli oʻzlari tumovlab tuzalish arafasida edilar. Tashvish ustiga iztirob, iztirob ustiga kulfat, hammasi qoʻshildi-yu, muolajani

oxiriga yetkazmay, turib ketdilar. Mana bugun uzlikib, ahvollari ogʻirlashib yotibdilar!

- Andijon xavf ostida. Agar tezroq bildirmasak, keyin kech boʻlur, bizdan norozi boʻlurlar!
 - Yoʻq, men hozir ijozat bermaydirmen!
 - Janobi tabib...
 - Yoʻq, yoʻq!

Bu bahs ichkarida yotgan Boburning qulogʻiga chalindi. U baland tovush bilan:

- Chopar boʻlsa kirsin! - deb buyurgandan keyin, tabib choparga yoʻl berdi.

Bobur katta tanobiy xonaning toʻrida yerdan bir gazcha baland qilib solingan parqu toʻshakda yotgan edi. Chopar to'shakdan ancha berida yukundi-da, tizzasida sirgʻalib borib, maktubni Boburga ikki qoʻllab uzatdi. Isitmaning zoʻridan boʻgʻriqib yotgan Bobur yonboshga turib, maktubni titroq qoʻllari bilan ochdi. Ichma-ich ikkita xat. Birida Xoʻja Abdullaning imzosi. Birini Qutlugʻ Nigor xonim yozgan. Ular ikkovi ham Andijonning dahshatli ahvoli, qamal tafsilotlari haqida yozishgan. Boburdan boshqa najotkorlari yoʻqligini aytishib, tezroq yetib kelishini iltijo qilishgan edi. Andijon qurshovda! Fitnachi beklar Andijon taxtiga Jahongir mirzoni oʻtkazmoqchilar. Ahmad Tanbalni lashkarboshi qilishib. Boburdan ota yurtini tortib olmoqchilar! Bobur ularni bunchalikka boradi, deb hech oʻvlamagan edi. Toʻsatdan uning ustidan bir chelak sovuq suv quyilganday boʻldiyu, a'zoyi badani muzlab, bo'shashib, boshi yostiqqa «shilq» etib tushdi. Tamom! Tanbal bilan Jahongir g'alaba qilsa, ularning tomoniga qochib o'tuvchilar yana koʻpayadi. Bobur kim bilan qoladi? Balki hozir ham Tanbal tomonga qochib oʻtayotganlar bordir? Balki Qosimbekning oʻzi ham... Kutilmaganda xayoliga kelgan bu oʻydan Bobur shunday dahshatga tushdiki, butun kuchini toʻplab, oʻrnidan sapchib turdi:

- Qosimbek qani?

Hozir kelurlar, odam yubordik, - dedi tabib muloyim tovush bilan. - Amirzodam, yoting, sizga orom kerak!

Boburning xasta xayolida birdan qilich tutgan Tanbal gavdalandi. Bobur bu qilichni tanidi. Oʻshda Tanbal shu qilichni oʻpib: «To oʻlgunimcha sodiq qulingizman», degan edi. Tanbal oʻsha qilichni hozir goʻyo Boburning boshi ustida oʻynata boshladi... Tanbalning oyogʻi ostida togʻdan xurjunga solib kelingan kallalar yumalab yotipdi. Ularning biri tanishga oʻxshadi. Qutlugʻ Nigor xonimning boshi... Bobur alahsirab koʻz oldiga keltirgan bu qoʻrqinchli xayol uni goʻyo toʻshakdan otib yubordi. U gilam ustida ichki kiyimda oyoq yalang turganicha:

- Shamshirni bering! - deb qichqirdi. - Menga shamshirni bering!

Tabib uni mahkam quchoqlab oldi:

- Amirzodam, xastasiz, yotmogʻingiz kerak... Amirzodam! - Tabib Boburni goʻyo Tanbalning qilichiga tutib bermoqda edi. Bobur uning quchogʻidan yulqinib chiqib, eshikka intildi:
- Ot keltiring! Men Andijonga boramen! Shamshir qani? Beklarga xabar bering! Tezroq tayyorlansinlar!

Tabib uning ketidan yugurdi. Dastorpech Boburning kimxob toʻnini olib borib yelkasiga yopdi, oyogʻiga kavushini berdi. Bobur kavushning bir poyini kiydiyu, ikkinchisini kiyishga toqati yetmadi. Uning boshi gir-gir aylanar, havo yetishmay, nafasi qisilar edi. Koʻz oldida hamon oʻsha qonli qilich va kesik kallalar.

- Xoin! - dedi u Tanbalga qarata. - Qonxoʻr!

Bobur ayvon eshigiga qarab chopdi. Lekin eshik oldida gandiraklab yiqildi. Tabib bilan dastorpech uni behush ahvolda toʻshakka koʻtarib kelib yotqizishdi.

Soʻng u yarim kechaga borib sal hushiga keldi. Koʻzini ochib, ogʻziga paxtadan suv tomizayotgan tabibni koʻrdi. Nazarida, tili shishib, shunday katta boʻlib ketgan ediki, butun tanasini togʻday bosib yotardi. Bobur koʻzini ochganini sezib, Qosimbek uning tepasiga keldi:

– Xayriyat-e!.. Amirzodam, bizni muncha qoʻrqitdingiz?

Bobur koʻzlari moʻltirab, nimadir demoqchi boʻldi, ammo behad ogʻirlashib ketgan tilini qimirlatolmadi.

- Endi yaxshimisiz, amirzodam?

Bobur jim. Qaraydi-yu, gapirolmaydi. Uning tildan qolganini sezgan Qosimbek koʻzidan tirqirab chiqqan yoshni koʻrsatmaslik uchun yuzini chetga burdi.

ANDIJON, XO'JAND

UVOL BO'LGAN ORZULAR

1

Tun qorongʻisi ustiga osmonni quyuq bulut qopladiyu, qal'a ichini zulmat bosib ketdi. Andijon koʻchalari tahlikali bir sukutga choʻmgan. Jimjit kechada ark darvozasining gʻiyqillab ochilgani uzoqlarga eshitildi. Darvozaxonadan tushgan xira yorugʻda arkdan chiqib kelayotgan bir toʻp qurolli otliqlar koʻrindi. Oldinda erkakcha toʻn va boʻrk kiygan, beliga kamar bogʻlab, xanjar osgan Xonzoda begim. Uning navkarlari orasida kelayotgan mavlono Fazliddin ham toʻnining ustidan harbiycha kamar bogʻlab, beliga qilich taqib olgan.

Samarqanddan qaytgan chopar Boburning hayot bilan oʻlim orasida behush boʻlib yotganini aytib bergandan keyin qal'a himoyachilarining bir qismi fitnachilar tomonga qochib oʻtib ketdi.

Qoʻrgʻon devorlarining har bir gazini qoʻriqlab turishga odam yetishmay qoldi. Qorongʻi tunda dushmanning devorga narvon qoʻyib, oshib tushish xavfi kuchaydi. Oʻn olti yoshida shoʻxlik bilan yigitcha kiyinib, chavgon oʻynab yurgan Xonzoda begim endi chinakamiga qurollanib, hayot-mamotlari qil ustida turgan qal'a himoyachilariga koʻmakka boryapti.

Quyuq qorongʻilikda otlarning taqalari koʻcha toshlariga urilib, uchqun chiqaradi. Havodan yomgʻir hidi keladi, mayin shabada esadi. Mavlono Fazliddin bahor kirganini, qal'a ichidagi bogʻchalarda oʻrik va bodom gullaganini esladi va atrofiga sinchiklab qaradi, ammo bironta oqargan narsa koʻziga chalinmadi. Tun butun borliqqa qop-qora parda tortib qoʻygan edi.

Mavlono Fazliddin mana shu shaharda qurmoqchi boʻlgan madrasa va saroy tarhini Xonzoda begimga koʻrsatib, uning maqtovini eshitgan yorugʻ kunlarini esladi-yu, yuragini armon gʻijimlab oʻtdi. Bobur Samarqandni olgani haqida xabar kelgandan keyin mavlono Fazliddin orzusi endi amalga oshishiga astoydil ishongan edi. Xonzoda begim ham uni bir necha marta oʻz huzuriga chaqirib, boʻlajak qurilishlarga qayerdan oʻrin tanlash va tayyorgarlik ishlarini qanday boshlash haqida uzoq-uzoq gaplashgan edi.

Arkdan chiqqan otliqlar qorongʻida tusmol bilan qal'aning Mirzo darvozasi tomonga borar ekanlar, mavlono Fazliddin oldinda xomush ketayotgan Xonzoda begimning oʻsha suhbatlar paytidagi ma'sum va shod qiyofasini eslay boshladi.

Odatda Xonzoda begim uni kanizlari bilan istiqomat qiladigan olti xonalik sirkor uyning tashqi boʻlmasida qabul qilar edi. Begim erkaklar bilan gaplashganda maxsus ishlangan ipak pardaning ortida oʻltiradi. Loyihaning ba'zi joylarini soʻz bilan izohlash mushkul boʻlib qolsa, Xonzoda begim oradagi pardani ochib:

- Qani, gumbaz bilan minoralar orasida nelar boʻlur? - deb soʻraydi.

Ular ikkovi ikki tomondan qogʻoz ustiga engashganlarida goh nafaslari bir-birlarinikiga qoʻshilib ketganday boʻladi. Mavlono Fazliddin Oʻshda, qoyatosh ustida birinchi marta boshdan kechirgan ajoyib tuygʻu yana borligʻini mast qiladi. U ishdan boshqa narsa haqida gap ochishga qoʻrqadi, atroflarida yuradigan kanizlarga hayajonini sezdirmaslikka tirishadi. Qutlugʻ Nigor xonim duch kelib qolsa, egilib ta'zim qilish bilan koʻzini undan yashiradi. Biroq soʻnggi marta uchrashganlarida Xonzoda begimning oʻzi toʻsatdan:

– Mavlono, nechun shu yoshgacha uylanmagansiz?– deb soʻrab qoldi.

Qiz asilzodalarga xos bir nazokat bilan oʻzini erkin tutib, kulimsirayotgan boʻlsa ham, koʻzining hayodan yaltillab ketganini mavlono Fazliddin payqadi. Mavlono siri ochilib qolishidan qoʻrqib, hazil bilan qutulmoqchi boʻldi:

- Begim, faqir dunyodan toq oʻtmoqchimen.
- Menga oʻxshabmi?
- Yoʻq, begimning toq oʻtishlariga aqlim bovar qilmaydir.
 - Ne sababdan?
- Axir siz... bu dunyoda... ne-ne shahzodalar, asilzodalar bor.
- Boʻlsa bordir. Ammo mavlono oʻzlari bilgan shahzoda-yu asilzodalarning qaysi biriga... meni munosib koʻrurlar?
- Agar boʻlsa, faqat Farhodni sizga munosib koʻrur edim.
 - Nechun faqat Farhodni?

Mavlono javob topolmay taraddudlangan edi, Xonzoda begim yana savol berdi:

- Farhod ham sizdek me'mor-u binokor bo'lgani uchundir?
 - Bunday deyishga faqirning haddim sigʻmaydir.

Mavlono ma'yus boʻlib aytgan bu soʻzlar Xonzoda begimni ham ma'yuslantirib qoʻydi. U ogʻir tin oldi-da:

Xudoyim meni nega shoh qizi qilib yaratdi ekan?
dedi. - Men ham faqir bir qiz boʻlsam, baxtimni topishim balki osonroq boʻlur edi...

Mavlono Fazliddin begimning bu soʻzlarini har eslaganda koʻngli bir daraja koʻtariladi. Demak, Xonzoda begim uning muhabbat dardini biladi. Biladigina emas, balki oʻz qalbida unga hamdardlik ham sezadi. Shoh qizi bilan oddiy me'mor orasidagi togʻday farqlar begimni ham ezadi. Agar Xonzoda begim unga astoydil koʻngil bersa, mavlono bu toʻsiqlarni yengib oʻtishi mumkin emasmikan? Oʻshda qurgan

kichik bir hujrasi uchun Bobur mirzo uni shunchalik e'zozlagan edi. Endi agar bu vodiyda katta obidalar qursa, mavlononing obroʻsi ba'zi asilzodalarnikidan kam boʻlmasligi mumkin. Bobur tanti yigit, opasini yaxshi koʻradi.

Balki ularga marhamat koʻrsatar. Bundan qat'i nazar, mavlononing mehriga Xonzoda begimning qarshi emasligi, u bilan uchrashib turishga mayli borligi – mana shuning oʻzi ham mavlononing qalbini haroratli, yorugʻ tuygʻularga toʻldirib yurar edi.

Biroq Andijon qamalda qolgandan kevin mavlononing orzu-umidlarini mana shu tun kabi qorongʻi zulmat oʻz qa'riga tortib ketdi. Barcha loyihalari keraksiz qog'ozga aylandi. Mavlono Fazliddin urushni ham, navkarlikni ham butun vujudi bilan yomon koʻrar edi. Biroq bugun arkka borib, Samarqanddan kelgan yomon xabarni eshitdi va Xonzoda begimning qurollanib chiqayotganini koʻrdi-yu, loqayd qarab turolmadi. Bu mushkul vazivatda titrab-qaltirab, taqdir zarbasini kutib oʻtirgandan koʻra, qurol bilan himoyaga chiqish yaxshiroq ekanini sezib, umrida birinchi marta beliga ailich taqdi. Mana, hozir vahimali qorongʻilikda suv quyganday jimib yotgan shaharni oralab borar ekan, bir necha qadam oldinda Xonzoda begim ham ketayotgani, mavlono uni shu navkarlar qatori himoya qilishi mumkinligi koʻngliga bir qadar taskin berardi.

Ular Mirzo darvozasiga yaqinlashganlarida, qal'a tashqarisida birdan karnay va nogʻora chalingani, yuzlab navkarlarning qichqiriqlari eshitildi. Xonzoda begim orqaga oʻgirilib:

- Yogʻiy darvozani ochmoqchi! - dedi-yu, otining boshini qoʻydi. Boshqalar uning ketidan ot choptirishdi.

Yovning bir qism kuchlari Mirzo darvozasi qarshisida gʻavgʻo koʻtarib, qal'aga yonib turgan oʻqlar otayotgan paytda boshqa bir guruh navkarlar qal'aning pana tomoniga narvon qoʻyib, sekin chiqib kelmoqda

edilar. Devor shinaklaridan birida oʻtirgan qorovul yigit buni sezib qoldi-yu, darvozaxona tepasida mash'ala yorugʻida odamlarga ish buyurib turgan Xoʻja Abdullaga qichqirdi:

– Pirim, yogʻiylar bu yoqda narvon qoʻyib chiq-moqdalar! Narvon!

Xonzoda begim navkarlari bilan oʻsha qorovul turgan joyga borib otdan tushdi. Navkarlardan biri mash'ala yoqdi. Uning yorugʻida devorga chiqiladigan zinapoya koʻrindi. Mavlono Fazliddin devor tepasidagi xatarga Xonzoda begim hammadan avval roʻbaroʻ boʻlishidan qoʻrqdi-yu, zinapoyaga birinchi boʻlib qadam qoʻydi. Shinakka yetganlarida, begimning qoʻlidagi mash'alasini oldi:

- Ehtiyot boʻling, begim, yogʻiyga koʻrinmang!

Devorga tashqaridan qoʻyilgan keng narvonlarning uchlari xiyol chiqib turar edi. Yordamchilar yetib kelganidan dadillangan boyagi qorovul yigit narvonlardan birini ikki qoʻllab itarib, agʻdarib tashlayotgan paytda pastdan zarb bilan otilgan yoy oʻqi uning koʻkragiga qadaldi. Bechora yigitni ushlab qolishga ulgurolmadilar – narvon bilan birga qal'adan tashqariga uchib ketdi.

Shinak atrofiga qirrali toshlar tayyorlab qoʻ-yilgan edi. Xonzoda begim shu toshlardan birini ikki qoʻllab oldi-yu, pastga otdi. Boshqa navkarlar ham narvon qoʻyilgan joyning pastini moʻljallab tosh ota boshladi. Pastda eshitilgan dod-voylar va ingrashlarga qaraganda, bu toshlar moʻljalga tegmoqda edi.

Shu payt qal'aning narigi chetida – Xakan darvozasi tomonda qoʻshkarnaylarning gʻat-gʻati, tabl va nogʻora tovushlari, allakimlarning gʻolibona qichqiriqlari eshitildi. Mavlono Fazliddin shovqin kelayotgan tomonga quloq solib turib, qoʻrqib ketdi. Bu galgi gʻavgʻo shahar ichida koʻtarilmoqda edi.

- Begim, quloq soling! Yogʻiy qal'aga kirganmi? Shahar ichidan bu tomonga yopirilib kelayotgan shovqindan Xonzoda begim ham seskanib ketdi.

Pastdan Noʻyon Koʻkaldosh jon-jahdi bilan qichqirdi:

– Begim, xiyonatchilar Xakan darvozasini yogʻiyga ochib bermishlar. Tezroq arkka qayting! Arkka!

Noʻyon ot choptirgancha Mirzo darvozasi tomonga oʻtib ketdi. Xonzoda begim zinapoyadan pastga chopib tushar ekan, mavlono Fazliddin qoʻlidagi mash'ala bilan uning izidan yugurdi. Otga minganlaridan keyin Xonzoda begim:

- Mash'alani tashlang! - deb buyurdi.

Mash'ala mavlononi yov oʻqiga nishon qilib berishi mumkin edi. Mavlono Fazliddin yonib turgan mash'alani yerga tashladi-yu, begim bilan birga arkka qarab ot choptirib ketdi.

Ammo ular arkka yaqinlashganlarida, bir necha yuz otliqlar oldilaridan qirqib chiqdilar va darvoza yoʻlini toʻsib qoʻydilar. Qurolli otliqlar orasida mash'ala koʻtargan navkarlar ham bor edi. Mash'ala yorugʻida beliga oltin kamar bogʻlagan, dubulgʻa va jiba kiygan Ahmad Tanbal koʻrindi-yu, mavlono Fazliddinning borligʻi muzlab ketganday boʻldi. Tanbalning qoʻshini Xonzoda begimni va uning navkarlarini darhol qurshovga oldi. Ahmad Tanbal yonidagi navkarga shoʻx tovush bilan gapirdi:

- Mash'alani yaqinroq tut! Iye, Xonzoda begimmilar? Koʻzlarimga ishonmaymen! Begim, bu ne hol? Nechun mardona kiyim kiyibsiz?
- Nomardlar koʻpayib ketgani uchun mardona kiyindim!

Tanbal bu istehzoni oʻziga olgisi kelmay kuldi:

– Qoʻrgʻonda mardlar qolmagan boʻlsa, mana, biz keldik, begim!

Tanbalning ketida turgan Uzun Hasan bu gapni yoqtirib, xaxoladi. Mash'ala yorug'i beklar orasida

ayanchli kulimsirab turgan koʻsanamo Ali Doʻstbekka tushdi. Bobur Andijonni mana shu odamga ishonib, topshirib ketgan edi. Ali Doʻstbek esa Boburni oʻlim toʻshagida yotipti, deb eshitib undan umidini uzgan edi. Boya Tanbalning qoʻshini Mirzo darvozasining oldida joʻrttaga gʻavgʻo koʻtargan, devorga narvon qoʻyib chiqmoqchi boʻlganlar ham himoyachilarni ataylab chalgʻitgan edi. Ahmad Tanbal bilan til biriktirgan Ali Doʻstbek bugun mana shu toʻpolon paytida qal'aning narigi chetidagi Xakan darvozasini yovga sekingina ochib bergan edi. Xonzoda begim buni endi fahmladiyu, Doʻstbek bilan Ahmad Tanbalga nafrati oshib, jirkanib koʻz tashladi:

- Sizlarmi mardlar?! Sizlar uchun mardlik bilan xoinlikning farqi qolmadimi?! Kechagina Bobur mirzoga sodiqmiz, deb qasamyod etganlar bugun unga shunchalar yomonlik qilmoqdasiz! Men aminmen: ertaga siz Jahongir mirzoga ham xiyonat qilursiz!

Ahmad Tanbal qilichining sopini changallab:

– Haddingizdan oshmang, begim! – dedi. – Bobur mirzo adolatsizlik qildi. Samarqand olingandan keyin Andijon Jahongir mirzoga berilmogʻi kerak edi. Bobur mirzo bermadi! Biz adolat uchun jang qilib, mana bugun gʻalabaga erishdik! Ammo siz sharm-u hayoni unutib, nechun bizni bunchalik haqorat qilmoqdasiz? Shoh qiziga yarashmaydigan bu qiliqni sizga kim oʻrgatdi? Yoningizdagi mullocha oʻrgatdimi?

Ahmad Tanbalning gʻazabli koʻzlari mavlono Fazliddinga qadaldi. Mavlono Fazliddin ham uning koʻzlariga koʻzini qadab gapirdi:

- Begim sharm-u hayodan siz-u bizga saboq berishga qodirlar! Begimning haq soʻzlarini faqat qalloblar haqorat deb tushinurlar!
- Kim qallob? deb Ahmad Tanbal qilichini sugʻurib, mavlonoga qarab ot choptirdi. Shunda Xonzoda begim otini niqtab, uning yoʻlini toʻsib chiqdi:
 - Ilm-u hunar ahliga tigʻ tortish uyat!

Ikkovining otlari bir-biriga urilib, ayqashib ketdi. Ahmad Tanbal qilichini havoda oʻynatar ekan:

 Begim, bu mullochani ma'shuqalardek himoya qilishlari uyat emasmi? – dedi. – Biz maxfiylardan eshitgan edik, ammo loyiha chizish bahonasi bilan bu mullocha begimni nechogʻlik rom qilganini bilmas ekanmiz!

Koʻpchilik oldida Ahmad Tanbal Xonzoda begimning nomiga dogʻ tushirmoqchi boʻlgani Xonzoda begimni shunchalik gʻazablantirdiki, u belidan xanjarini sugʻurdi:

– Meni badnom qilolmaysen, alamzada xoin! – deb, bor kuchi bilan Tanbalning koʻkragiga tigʻ urdi. Xanjar Ahmad Tanbalning toʻni tagidan kiygan zirhli jibasiga tegdi-da, jaranglab, sirgʻanib ketdi. Ahmad Tanbal qilichini Xonzoda begimning tepasida sermadi. Qilich zarbidan Xonzoda begimning boshidagi boʻrki uchib ketdi-yu, uzun sochlari yoyilib yelkasiga tushdi.

Shu payt orqadan oʻn toʻrt yoshli Jahongir mirzo bir toʻp mulozimlari bilan kelib qoldi. Buni koʻrgan Doʻstbek Ahmad Tanbalni ogohlantirdi:

- Ahmadbek janoblari, bas, boʻldi!

Xonzoda begim oʻgay boʻlsa ham harqalay, Jahongir mirzoning opasi edi, shoh qizini koʻpchilikning oldida sazoyi qilishga yoʻl qoʻymas edi. Ahmad Tanbal Jahongir mirzo tomonga otini burdi va oʻzini oqlamoqchi boʻlib gapirdi:

- Bu qanday hol, amirzodam? Nahotki egachingiz sizga qarshi qurol koʻtarib chiqsa? Yonlaridagi fitnachi me'mor egachingizni yoʻldan urmish, amirzodam!
- Mavlono Fazliddin sizdek xiyonatchi bekdan ming hissa sofdil, ming hissa olijanob! - dedi Xonzoda begim. - Mavlononing me'morlik san'ati Andijonning iftixori bo'lishi mumkin edi. Ammo sizdek qonxo'rlar uning orzularini uvol qildingiz! Ilohim shu orzularning uvoli tutsin sizni!

Xonzoda begim soʻnggi soʻzlarini yigʻlab aytdi-yu, otini qamchilab, ark darvozasiga qarab intildi. Biroq darvozani devordek toʻsib turgan navkarlar unga yoʻl bermadilar. Begim yoshli koʻzlar bilan orqaga – mavlono Fazliddinga oʻgirilib qaradi.

Mavlono Fazliddin belini paypaslab, qilichining sopini topdi-da, uni qinidan uquvsizlik bilan sugʻurib olib, Xonzoda begimning yoʻlini toʻsgan navkarlarga qarab intildi. Ammo Ahmad Tanbalning otliq navkarlari mavlono Fazliddinning yoʻlini toʻsib chiqdilar. Ikkitasi mavlono mingan otni jilovidan ushlab toʻxtatdi. Biri ogʻir choʻqmor bilan mavlononing bilagiga urib, qilichini qoʻlidan tushirib yubordi. Bu orada Jahongir mirzoning ishorasi bilan narigi navkarlar Xonzoda begimga yoʻl bergan edilar. Begim yolgʻiz oʻzi ark darvozasidan ot qoʻyib oʻtar ekan, yana orqaga oʻgirilib qaradi.

Navkarlar yana devordek boʻlib, darvoza yoʻlini toʻsib olgan edilar. Mavlono Fazliddin yov qoʻlida qolganini sezgan begim oʻkirib yigʻladi. Uning yigʻisiga faqat darvozaxona shifti boʻgʻiq bir nido bilan javob berdi, xolos.

Tanbalning odamlari mavlono Fazliddinni otdan tortib tushirdilar va qoʻlini orqasiga bogʻlab, piyoda haydab ketdilar.

2

Choʻqmor zarbidan jarohatlangan bilagi qattiq ogʻriyotganini mavlono Fazliddin qorongʻi bir hibs-xonada yolgʻiz oʻzi qolganda sezdi. Uni Andijonning Chaqaridagi tosh istehkom ichiga, oʻlim jazosini kutadigan mahbuslar hujrasiga qamab, eshigini tashqaridan qulflab oldilar. Bu bilan ham qanoat qilmay eshik oldiga ikkita soqchi qoʻyib qoʻydilar. Boya ark darvozasi oldida Ahmad Tanbal bilan Jahongir

mirzoning oʻzaro gaplaridan mavlono Fazliddin shuni aniq sezdiki, uni shoh qiziga tama qilishda va oliy zotlarga beadabona munosabatda boʻlishda ayblab, ertaga toshboʻron qilib oʻldirtirmoqchilar. Shu bilan Ahmad Tanbal Xonzoda begimni ham badnom qilib, bir alamdan chiqsa kerak. Bobur va uning tarafdorlari xalq orasida yomonotliq boʻlishlaridan Jahongir mirzo va uning onasi Fotima Sulton begim ham manfaatdor edilar, bu bilan ular Andijon taxtini narigilardan tortib olib, toʻgʻri ish qilganlarini isbotlaganday boʻlardilar.

Rutubatli zax hujrada qorongʻilikka tikilib oʻtirgan mavlono Fazliddin orqasiga bogʻlangan qoʻllarini beliga bosib, bilagining ogʻrigʻini toʻxtatmoqchi boʻlar, lekin ogʻriq pasayish oʻrniga tobora zoʻrayar edi. Bu hali birgina choʻqmorning zarbi... Ertaga uning ustiga doʻlday yogʻiladigan toshlarning ogʻrigʻi qanchalik dahshatli boʻlarkin? Mavlono buni koʻz oldiga keltirganda eti junjikib, oʻrnidan turib ketdi. Goʻyo u hozir hibsxonada emas, bir-biriga qarab qulayotgan ikki togʻ oraligʻida turibdi-yu, endi har ikki tomondan uchib tushgan qoyatoshlar uni ezib majaqlashi kerak. Mavlono bu balodan qutulmoqchi boʻlganday eshikka tomon intildi. Yelkasini yopiq eshikka urib, jon-jahdi bilan qichqirdi:

- Oching! Oching deyman! Oching!

Kutilmagan bu qichqiriqdan choʻchib tushgan bir soqchi qahr bilan soʻradi:

- Jin urdimi? Ne gap?
- Ilkimni yechinglar! Jonim kerak boʻlsa ertaga olursiz! Ilkim jarohatlangan! Yechib qoʻyinglar!

Soqchilar bu yerda poyloqchi boʻlib oʻtirganlaridan juda asabiy edilar. Chunki hozir boshqa gʻoliblar Bobur tarafdorlarining mol-u mulklarini talon-toroj qilib boyimoqda edi. Tun yarmidan oqqan boʻlsa ham Andijonning koʻchalari va hovlilaridan otlarning dupuri, itlarning vangillashi, ayollarning dod-voyi,

bemahal qoʻzgʻatilgan sigir va qoʻylarning ma'rashi eshitilmoqda edi. Bu yerda qolgan soqchilar qanchalik koʻp oʻljalardan mahrum boʻlayotganlarini mana shu tovushlardan payqab, ich-etlarini yeb oʻtirar edilar. Buning ustiga mahbusning asabiy gaplari qoʻshilib, ularning jahlini chiqardi. Xirillagan ovozga qaraganda, yoshi anchaga borib qolgan bir soqchi:

– Ilki jarohatlangan emish-a! – dedi. – Ertaga asfalasofilinga ketadigan haromi, bugun ilkingni oʻylab nima qilasen?

Eshik ortidagi mahbusning nafrat bilan:

- Jallodlar! - degani eshitildi.

Xirilloq soqchi oʻrnidan sapchib turib, doʻq qildi:

– Jim yot, oʻlaksa! Hozir kirib, bir jarohatingni oʻnga yetkazamen!

«Qanday kunlarga qoldim? – dedi mavlono oʻzigaoʻzi. – Odamzod shunchalik shafqatsizmi?» Oʻlim shunchalik naqd ekan, bugun mana bu maxluqlardan gap eshitib, ertaga tosh boʻronda xor boʻlib oʻlgandan koʻra, Tanbal bilan olishib, qoʻlida qilichi bilan jon bergani yaxshi emasmidi? Boya Xonzoda begimning oldida mavlono shunga qodir edi-ku! Nega taqdir uni shundan ham mahrum qildi?

Tashqarida ot taqasining hovli toshlariga urilib, qarsillagani eshitildi.

- Kim keldi? Toʻxta!

Hovliga kirib kelgan uch otliqdan biri:

– Xoʻja Abdulla, mavlono qozi yosh podshohning farmoyishi bilan keldilar! – dedi.

Kelganlar birin-ketin otdan tushdilar. Ikki soqchi uzun nayzalarini ularga toʻgʻriladilar:

Farmoyishni avval oʻnboshiga koʻrsatmoq kerak!dedi xirilloq soqchi.

Uning tepasida xiragina fonus yonib turar edi. Malla chakmon kiygan Xoʻja Abdulla soqchilarning nayzasiga qarab kelar ekan: – Oʻnboshini topolmadik! – dedi. – Nechun bu yerda sizlardan boshqa hech kim yoʻq?

Yoshroq soqchi alamli tovush bilan:

Boshqalar oʻljaning ketidan quvib ketgandir-da,
dedi.

Xoʻja Abdulla qoʻlida oʻram qilingan qogʻoz bilan ikki soqchining nayzalari qarshisiga kelib:

 Unday boʻlsa farmoyishni siz bajarmogʻingiz kerak, - dedi. - Oling, oʻqing!

Narigi ikki navkar otlarini devor tagidagi ustunga bogʻlab, oʻzlari Xoʻja Abdullaning ketidan kelmoqda edilar.

– Sizlar oʻsha joyda toʻxtangiz! – dedi xirilloq soqchi. Navkarlar toʻxtashdi. Xirilloq soqchi nayzasini koʻtarib, Xoʻja Abdullaga yoʻl berdi, soʻng uning qoʻlidagi qogʻozni ochib koʻrdi.

Qimmatbaho qogʻozdagi qisqagina yozuv tagiga shohona muhr bosilgan edi. Xirilloq soqchi muhrni chiroq yorugʻiga solib koʻrdi, ammo oʻqiyolmadi. U chalasavod edi.

- Qani, sen oʻqi-chi, deb yoshroq soqchiga berdi. Biroq unisi butunlay savodsiz edi. Qogʻozni qoʻlida aylantirib, Xoʻja Abdullaga qaradi:
 - Pirim, bu qanaqa farmoyish?
- Bu yerda yotgan nobakor juda xatarli mahbus. Uni arkka olib ketmogʻimiz kerak.

Orqada turgan navkarlardan biri qoʻshimcha qildi:

– Mavlono qozi arkda u haromini soʻroq qilmoqlari zarur!

Xoʻja Abdulla Andijonning eng mashhur qozisi va juda koʻp moʻtabar odamlarning piri ekanini soqchilar ham bilar edilar. Ular Xoʻja Abdullani bir koʻrishdayoq tanigan edilar-u, ammo uning Bobur tarafida turib jang qilganini eslab, ikkilanarlardi.

- Bu oʻzi Jahongir mirzoning farmoyishlarimi? - soʻradi xirilloq soqchi.

- Shubhalansangiz, oʻqib koʻring!
- Mahkam saqlanglar, deb buyurgan edilar-da, pirim.
- Mahkam saqlaganlaring shumi? Yuzboshi qani? Nechun faqat ikkovlon qolmishsiz? Bu nobakorning tarafdorlari koʻplashib hujum qilsa qandoq qilursiz? Yoʻq, buni tezroq arkka olib ketmoq zarur! Eshikni oching!

Yosh soqchi keksasiga qarab: «Bu qozi ham endi Jahongir mirzo tomoniga oʻtibdi-da, boʻlmasa bunchalik jon kuydirarmidi?» – demoqchi boʻldi. Biroq unisi hamon ikkilanardi:

- Biz keyin ne deymiz?
- Siz ikkovingiz hozir biz bilan birga ketursiz! dedi Xoʻja Abdulla. – Buni koʻplashib qoʻriqlab bormasak, oldirib qoʻyishimiz mumkin!

Shundan keyin xirilloq soqchi ham boʻshashdi. Nayzasini devorga tirab qoʻyib, eshikni ochdi. U ichkariga qadam qoʻyishi bilan Xoʻja Abdullaning hamrohlaridan biri yosh soqchining boshiga qora bir narsani yopib, oʻzini yerga agʻanatdi. Ikkinchi navkar xirilloq soqchining boshidagi dubulgʻasiga choʻqmor bilan qarsillatib urib, uni ichkariga qulatdi-da, ustidan bosib tushdi.

Xoʻja Abdulla hamrohlariga shivirladi:

- Oʻldirmanglar, uvollariga qolmaylik!
- Oʻldirmasak keyin bular sizni tutib berurlar! Mavlono Fazliddin jiyani Tohirning ovozini tanib:
- Jiyanim! Tohirjon! deb qichqirdi.

Qora parda ichida talvasa qilayotgan yosh yigit esa:

- Pirim, shafqat qiling! dedi. Pirim! Sizga zinhor yomonlik qilmaymiz! Qutqaring, pirim!
- Bas! deb shivirladi Xoʻja Abdulla Tohirga. Oyoq-qoʻllarini bogʻlasalaring boʻldi!

Mavlono Fazliddin Tohir bilan Xoʻja Abdullaga tomon otildi:

- Ustod!... Jiyanim!.. Najotkorlarim!..

Tohir narigilarning qoʻl-oyogʻini bogʻlash bilan ovora edi.

– Mavlono Fazliddin, qanisiz? – dedi Xoʻja Abdulla.

Xoʻja Abdulla mavlononi bagʻriga bosar ekan, uning qoʻli bogʻliq ekanini sezdi-yu, quchogʻidan qoʻymay eshikdan tashqariga olib chiqdi. Fonus yorugʻida belidan xanjarini olib, mavlononing qoʻli bogʻlangan ola chilvirni kesib tashladi.

Tohir sherigi bilan narigi ikki soqchini ichkariga qamab, eshikni qulfladi-da, togʻasining quchogʻiga otildi.

- Jiyanim, Xudo seni qaydan yetkazdi?
- Boya Samarqanddan chopar boʻlib keldim!
- Bobur mirzo sogʻmilar?
- Ha, tuzalib qoldilar. Yordamga yetib kelmoqchilar!
- Andijon qoʻldan ketganini bilurlarmi?
- Hali bilmaydilar-da!..

Xoʻja Abdulla ularga shipshidi:

- Endi jim!

Tohir togʻasining otiga mingashtirib oldi. Chaqardan sekin chiqib, qal'aning ovloq bir chetiga qarab ketdilar. Gʻoliblar hovlilarda hamon talon-toroj bilan band edilar. Toʻrtovlon uch otda qal'a devorining tagiga keldilar. Endi hamma himoyachilar tarqab ketib, devor atrofi huvillab qolgan edi.

– Mana shu yerda oshib oʻtishga qulay joy bor, – dedi Xoʻja Abdulla.

Hammalari otdan tushdilar. Tohirning sherigi xurjunidan oʻram qilingan arqon oldi. Toʻrtovlon maxsus zinapoyadan devor tepasiga chiqqanlarida, Xoʻja Abdulla mavlono Fazliddinga yondashdi:

- Mavlono, sizni darvozadan otliq chiqarish xatarli. Tanib qolurlar.
 - Minnatdormen, ustod!

Xoʻja Abdulla qoʻynidan bir narsa olib, mavlononing qoʻliga tutqazdi. Bu – ichi oltinga toʻla ogʻirgina charm hamyon edi.

- Buni sizga xonim hazratlari berib yubordilar, dedi Xoʻja Abdulla.
 - Voqeadan xonim hazratlari ham xabar topdilarmi?
- Hazrat xonim yigʻlab mendan iltimos qildilar. Ahmad Tanbal siz orqali begim-u xonimlarni sharmisor qilmoqchi ekan. Ammo biz tirik boʻlsak, Bobur mirzoning oilasiga ham, muborak nomiga ham dogʻ tushirmagaymiz!

Mavlono hamyonni olib qoʻyin choʻntagiga solar ekan:

- Men toʻgʻri Bobur mirzoning huzurlariga yoʻl olurmen! dedi.
- Mavlono, dedi Xoʻja Abdulla ma'yus tovush bilan. – Biz xonim hazratlari bilan sizga boshqa bir maslahat bermoqchi edik.

Andijonda arab tilini Xoʻja Abdullachilik yaxshi biladigan odam yoʻq edi. Bir vaqtlar mavlono Fazliddin ham shu odamdan arab tilidan saboq olgan edi va shundan beri uni ustod deb atar edi:

- Qanday maslahat boʻlsa bosh ustiga, ustod!
- Samarqandga Tohirbek borurlar.
- Men togʻamni birga olib ketsam-chi? dedi Tohir.
- Yoʻq, Tohirbek, siz choparsiz. Balki, Bobur mirzo Samarqandni tashlab chiqqandirlar... Mavlono, sizning noyob iste'dodingiz bor. Siz oʻzingizni ehtiyot qilmogʻingiz kerak. Movarounnahrdagi bu fatoratlar¹ hali-beri bosilmasa kerak. Mavlono, siz bir vaqtlar Hirotga ketish fikringiz borligini aytgan edingiz. Endi shu fikrni amalga oshiradigan payt keldi.

Hirotga bir marta borib kelgan mavlono Fazliddin notinch oʻlkalardan oylar davomida yurib oʻtiladigan behad mashaqqatli yoʻllarni koʻz oldiga keltirdi-

¹ Fatorat – alg'ov-dalg'ov.

yu, yuragini gʻam bosdi. Jarohatli qoʻlining ogʻrigʻi boya esidan chiqqan ekan, endi bu ogʻriq yangi bir kuch bilan qaytib keldi. Mavlono ogʻriyotgan bilagini changallab:

- Men Vatanni qanday tark etay, pirim? dedi.
- Hozir Alisher Navoiy yashab turgan Xuroson ham bizga Vatan emasmi, mavlono?
- Vatan, albatta... Ammo men... balki qaytib kelolmasmen. Kulbamda kitoblarim, loyihalarim qolgan, Tohir jiyan!..
- Hoziroq qaytib borib, barchasini yashirtirib qoʻyurmen, xotirjam boʻling, mulla togʻa! Mavlono Fazliddin Xonzoda begimni endi umrbod koʻrolmasligini oldindan sezayotganday yuragi uvushdi. Xoʻja Abdulla bilan Qutlugʻ Nigor xonim uni Hirotga joʻnatayotganlarining bir sababi, mavlono bilan Xonzoda begim orasidagi nozik munosabat va shunga oid past-u baland gaplar edi.

Mavlono Hirotga ketishi bilan Xonzoda begim atrofida boʻlayotgan gaplar tezroq bosilishi mumkin edi. Mavlono shuni oʻyladi-yu:

- Mayli, ustod, dedi. Men Bobur mirzoning nomlarini pok tutish uchun har ishga tayyormen. Ammo bir iltimos: xonim hazratlariga ayting, yolgʻon ovozalarga ishonmasinlar. Xonzoda begim halol-u pokizalikda benazirlar!
- Siz ham shundaysiz, mavlono, men bilurmen. Biz bunga ishonmaganimizda, jonimizni garovga qoʻyib, boyagi soqchilarni aldab yurmas edik. Men umrimda shunday ishlar qilurmen, deb hech oʻylamagan edim. Mana, Tohirbek menga dalda berdi. Ammo yogʻiylarning gʻalamisligi ham kishini majbur qilar ekan!
- Sizlar menga yangidan jon ato qildilaringiz, ustod! Endi oʻzingiz ham ehtiyot boʻling! Jiyanim, sen ham!..

- Rost, pirim ham Andijondan uzoqroq ketsalar, bexavotir boʻlur edik! - dedi Tohir.

– Hammamiz ketsak, xonim-u begimlarga kim madad berur? – dedi Xoʻja Abdulla. – Shoʻrlik mushtiparlar hozir meni kutib oʻtirgan boʻlsalar kerak.

Osmonning sharq tomonidan bir parchasi xiyol oqarib kelmoqda edi. Mavlono Fazliddin shuni koʻrib, arqonni beliga bogʻlay boshladi.

- Nasib boʻlsa hali yana koʻrishurmiz, mulla togʻa!
- Tohir, jiyanim, mening tarhlarim... Chizgan suratlarim yoʻqolib ketmasin. Sen harbiy odamsen, asrashing qiyin. Shuning uchun iloji boʻlsa hammasini Xonzoda begimga bergin.
 - Bajonidil!
- Men bu iltimosingizni Xonzoda begimga ham yetkazurmen! dedi Xoʻja Abdulla.

Ular quchoqlashib xayrlashdilar. Soʻng mavlononi beliga bogʻlangan arqon yordamida oʻn bir gazli devordan pastga tushirdilar.

Mavlono tong yorishganda Quvaning yoʻliga chiqib oldi.

Ammo qoʻrgʻon ichida qolgan Xoʻja Abdulla ertasi kuni choshgoh paytida Xakan darvozasining yaqinida turadigan bir muridining hovlisida yashirinib oʻtirganda, Ahmad Tanbalning odamlari uni qoʻlga tushirdilar. Chaqarda qoʻli bogʻliq yotgan soqchilar qattiq siquv ostida mavlono Fazliddinni kim ozod qilganini Ahmad Tanbalga aytgan edilar.

Ahmad Tanbal Xoʻja Abdulla tutilgan joyga ot choptirib kelganda, koʻchani odam tutib ketgan edi. Qoʻli orqasiga bogʻlangan koʻylakchan Xoʻja Abdulla qurolli navkarlar qurshovida sekin yurib bormoqda edi. Uning oyoqlaridan mador ketgan, rangi oʻchgan. Oq sallasi va koʻylagining oqligi oʻsiq soqolini odatdagidan qoraroq koʻrsatar edi.

Xaloyiq Ahmad Tanbalga yoʻl berib chetlandi. Xoʻja Abdullani haydab borayotganlar toʻxtadilar. Ahmad Tanbal ham otini jilovidan tortib toʻxtatdi:

- Ha, aldamchi pir! dedi. Bizga shuncha yogʻiyliklar qilganingiz ozmidi, endi soqchilarni aldab, haromi mullochani ham qochiribsiz!
- Men bir begunoh hunarpeshani adolatsiz oʻlimdan qutqardim, xolos!
- Soqchilarga yolgʻon muhrlar koʻrsatishga uyalmadingizmi, aldamchi pir?!

Oʻnlab koʻzlar Xoʻja Abdullaga tikildi. Agar Xoʻja Abdulla Tanbaldan qoʻrqib, sarosimaga tushsa, oʻzini yoʻqotib qoʻysa, gunohi boʻyniga tushganday koʻrinishi mumkin edi. Shuni oʻylab, Xoʻja Abdulla iloji boricha dadil gapirishga tirishdi:

- Men soqchilarga Bobur mirzoning muhrlarini koʻrsatdim. Chunki Bobur mirzoni Andijonning yagona podshosi deb bilurmen!
- Sen, imonsiz, muridlaringni yana aldamoqdasen! Bobur mirzo Samarqandda vafot etgan. Hozir toj-u taxt Jahongir mirzoniki!
- Musulmonlar, bu gapga ishonmang! Alhamdulilloh, Bobur mirzo tiriklar! Andijonga yana kelurlar!
- Yolgʻon! Xaloyiq, sizdek muridlarini aldab yurgan, aybini yashirmoq uchun iflos bir haromini bizdan qochirgan bu imonsiz pir toshboʻron qilib oʻldirilishi kerak! Tosh oting bunga! Savobtalab boʻlsangiz tosh oting!

Ahmad Tanbal egar ustidan uloqchilarga oʻxshab pastga engashdi-yu, uzun qoʻli bilan yerdan mushtday bir toshni oldi. Soʻng qaddini tiklab, toshni Xoʻja Abdullaga qarab otdi. Xoʻja Abdullaning keng koʻkragiga «toʻp» etib tekkan tosh oq koʻylakda changli iz qoldirib, yerga yumalab tushdi. Ogʻriqdan Xoʻja Abdullaning koʻzlari yoshlandi, nafasi qaytdi. Navkarlardan ba'zi birlari ham yerga engashib tosh qidirayotganini koʻrgan Xoʻja Abdulla nafasi titrab:

- Musulmonlar! - dedi va hamon jim turgan xaloyiqqa tikildi. Ularning orasida yigirma besh yoshlardagi gardani yoʻgʻon bir yigitni koʻrdi-yu, bir vaqtlar yolgʻon ovoza tarqatishda ayblanib oʻldirilgan mirob Darvesh govni esladi. Bu vigit oʻsha mirobning oʻgʻli edi. Xoʻja Abdulla oʻshanda vosh Boburga bir ogʻiz: «Buni gatl ettirmang!» – desa, ehtimol mirob hali tirik yurar edi. Xoʻja Abdulla oʻshanda Ahmad Tanbalga oʻxshash beklarning koʻngliga qarab, Darvesh govni qutqarib qololmagani endi qalbida armon qoʻzgʻadi. Hozir oʻzi ham oʻsha mirobning ahvoliga tushdi-ku! Nechun o'shanda loqaydlik qildi? Mirobning o'g'li otasining qasdi uchun Xoʻja Abdullaga tosh otsa, balki haqli bo'lar!.. Lekin begunoh me'morni qutqarib, oʻzi baloga qolayotgan Xoʻja Abdullaga hech kim tosh otmadi

- Musulmonlar! kuyunib takrorladi Xoʻja Abdulla.
 Men adolat yoʻlida jon berishdan qoʻrqmaymen!
 Adolat kim tomonda shuni bir oʻylab koʻringlar.
 Inini ogʻaga dushman qilganlar kimlar? Yaxshilarga baxilligi kelib, poyiga bolta urayotganlar kimlar? Bu qora kunlarni boshimizga solganlar kimlar?
 - Sen oʻzing! deb qichqirdi Ahmad Tanbal.
- Men Bobur mirzoga kichikligidan ilm oʻrgatdim, lison oʻrgatdim, men uni odil podshoh boʻlishga undadim, Movarounnahr yana birlashsin-u yurt ichki urushlardan qutulsin, dedim.

Bobur mirzo mardona ishlar qilib, Samarqand bilan Andijonni birlashtirganda men ezgu orzularimga yetganday suyungan edim. Hayhot, mamlakat yana parchalandi. Yurt vayron boʻldi! Xaloyiq, agar meni oʻldirish bilan mushkulingiz oson boʻlsa, mayli, oʻldiring!

– Toshboʻron qiling! – buyurdi Ahmad Tanbal xaloyiqqa.

Odamlar toʻpining orqarogʻidan yigʻlamsiragan tovush eshitildi:

- Shayxulislom fatvo bermaguncha, toshboʻron qilishga haqimiz yoʻq!

Keksa bir kishi:

- Pirning qargʻishidan qoʻrqamiz! - dedi.

Navkarlar ham qoʻllaridagi toshlarini Xoʻja Abdullaga otishga jur'at etolmay, Ahmad Tanbalga qaradilar. Ahmad Tanbal yuzboshiga buyurdi:

– Unday boʻlsa, qilichingni ol, kallasini kes! Boʻyniga tigʻ ur!

Barzangiday qop-qora oʻrta yashar yuzboshi kumush sopli qilichini qinidan imillabroq sugʻurdi. Xoʻja Abdulla unga tikilib, past tovush bilan dedi:

- Mirbadalbek, xushyor boʻling, mening qonim yetti pushtingizga sachraydi!

Xaloyiq orasidan qoʻrquv aralash nido eshitildi:

- Pirning qoni tutadi hammamizni!

Yuzboshining qoʻlidagi qilichi qaltiray boshladi. U Ahmad Tanbalga qarab yalindi:

- Oʻtinamen, bu ishdan meni ozod qiling!

Ahmad Tanbal unga gʻazab qilib yelkasiga qamchi urdi.

- Seni yuzboshilikdan ozod qilurmen, qoʻrqoq! Ahmad Tanbal boshqa navkarlariga buyurdi:
- Bu imonsizni darvozaxonaga haydang! Xaloyiq shu yerda qolsin! Kim bizga ergashsa, qilich bilan choping! Ayamang!

Navkarlarning bir qismi Xoʻja Abdullani darvozaxonaga haydab ketdi. Qolgan navkarlar xaloyiqning yoʻlini toʻsib, Xoʻja Abdullaning ketidan borgani qoʻymadi. Oradan yarim soat oʻtgandan keyin Ahmad Tanbal odamlari bilan arkka tomon ot choptirib qaytib ketdi. Shundan soʻng darvozaxonaga borgan odamlar Xoʻja Abdullaning shiftdagi yoʻgʻon toʻsinga osib oʻldirilganini koʻrdilar. Marhumning oq sallasi oyogʻi

tagida chuvalib yotardi, boʻyi esa tiriklik paytidagidan xiyla uzaygan edi. Odamlar uni dordan sekin tushirib oldilar. Kafan oʻrniga sallasiga oʻrab, shahidlardek koʻmdilar.

3

Ustma-ust yoqqan bahor yomgʻirlari yoʻllarini balchiq qilib vuborgan. Andiionda vuz bergan dahshatlar xabarini tezroq Samarqandga etkazish uchun lov sachratib, ot choptirib boravotgan Tohir endi Quvaga yaqinlashdi. Agar Bobur mirzo tuzalgan boʻlsa-yu, Andijonga ishonib, Samarqandni tashlab chiqsa, ahvol hozirgidan battar boʻlishi mumkin. Tohir shuni oʻylab, tagidagi bedovni qistaydi. Ammo ot qanchalik zoʻr va chopqir boʻlmasin, tizzaga chiqadigan lov uning voʻlini bogʻlavdi, tinkasini quritadi. Chopib kelayotgan ot balchiqqa yiqilib tushadi-yu, qaytib turolmasdan, burnidan qon kelib, jon beradi. Tohir uni yoʻl ustida qoldirib, egar-yuganlarini oladi-yu, Quvadan boshqa ot topadi. Ammo bir kun yurmasdan bu ot ham holdan ketib yiqiladi. Naryoqda Xoʻjand, Jizzax - vana oʻn kunlik voʻl... Tohir osmonda uchib borayotgan qushlarga havas va armon bilan qaraydi.

* * *

Biroq Tohir qush boʻlib uchganda ham endi Boburni Samarqanddan topolmas edi. Bobur xastalik toʻshagidan turgan zahoti onasi va ustozini qutqarishga shoshilib, Samarqandni allaqachon tashlab chiqqan edi. Unga kelgan axborotlarga binoan, Andijon qamali hali uzoq davom etishi kerak boʻlib, bir yilga yetarli zaxira bor edi. Shunchalik abgorligi bilan Samarqand yetti oylik qamalga chidaganda oʻn ikki ming qoʻyi bor Andijon qoʻrgʻoni Xoʻja Abdulladay dovyurak

odam rahbarligida hali besh-olti oy «qilt» etmay turishi shubhasiz tuyilardi. Shu tuygʻu bilan mingga yaqin odamlarning hammasini Samarqanddan olib kelayotgan Bobur Bulungʻur va Xaliliya¹ qishloqlaridan oʻtib, Sangzor daryosiga yaqinlashib qolgan edi.

Ogʻir xastalikdan yaqinda turgan Bobur yana uzlikib qolmasligi uchun uni toʻrt otliq mahofaga oʻtkazganlar, tagiga yumshoq parqular solganlar. Mahofaning eshik va derazalariga osilgan qizgʻish ipak pardalar yoʻlning oʻnqir-choʻnqirlarida alanga tillariday muttasil silkinib oʻynab boradi. Par yostiqqa yonboshlab oʻtirgan Bobur har zamonda bir oʻrnidan qoʻzgʻalib, mahofaning orqa tomonidagi pardani koʻtaradi-yu, uzoqlarga tikilib qaraydi.

Uning qoʻshinidan besh-olti chaqirim orqada yana bir mahofa kelmoqda edi. Bir talay otliqlar qoʻriqlab boravotgan bu koʻrkam mahofada Boburning xolasi Mehr Nigor xonim va qalligʻi Ovisha begim safar qilmoqdalar. Bobur Samarqandni tashlab ketmoqchi ekanidan Buxorodagi Sulton Ali mirzo allagachon xabar topgan va poytaxtni darhol egallash uchun Shahrisabzga kelib shavlanib turar edi. Bobur o'z raqibi Sulton Ali mirzodan yaxshilik kutmas va qalligʻini uning qoʻli ostida qoldirgisi kelmas edi. Bir vaqtlar Boysungur mirzodan qattiq jabr koʻrgan Mehr Nigor xonim va Oyisha begimlar ham endigi xavfxatarlardan tezrog gutulgilari kelar edi. Hozir ular uchun eng bexatar joy - Toshkent edi. Toshkent xoni Mahmudxon - Mehr Nigor xonimning akasi, Oyisha begimning opasi Roziya Sulton begim ham Toshkentga, Mahmudxonga tushgan. Toshkent yoʻli Jizzaxgacha Andijon voʻli bilan bir. Mana shu sabablarga koʻra, Bobur xolasi va qalligʻini butun odamlari-yu koʻchkoʻronlari bilan birga qoʻriqlab olib ketmoqda edi. Fagat urf-odatni buzmaslik uchun kuyov bilan galliq

¹ Xaliliya - hozirgi Gʻallaorol yaqinidagi qadimiy qishloq.

orasida besh-olti chaqirimlik masofa qoldirib, ikki toʻp boʻlib bormoqda edilar. Kechqurun Sangzordan oʻtib, koʻm-koʻk adirlarda tunash uchun toʻxtaganlarida ham oʻsha masofani saqlab, ikki joyga chodir va oʻtov tikdilar.

Yon bagʻirlarda lolalar ochilgan. Havo nihovatda voqimli. Bobur mavin koʻkat ustiga qadam qoʻyganda oʻzini xiyla yengil sezdi. Samarqanddan chiqayotganda vujudini zilday bosib yotgan g'am-g'ussalar endi asta-sekin tarqab ketayotganday tuyildi. Poytaxtni shuncha mashaqqatlar bilan olib, oxiri oʻz ixtiyori bilan boshqaga qoldirib ketishi unga soʻnggi yillarda qilgan barcha harakatlarini behuda koʻrsatib, ta'bini tirriq qilgan edi. Hozir mana bu koʻklam adirlarda yayrab nafas olar ekan, u onasi va ustozini qutqarish niyatida ketayotganini, bunda bir olijanoblik borligini, qalligʻini asoratdan qoʻriqlab olib borayotgani ham mardlikdan ekanini oʻyladi-yu, koʻngli bir qadar taskin topdi. Temur darvozasi deb atalgan ulugʻvor tangidan oʻtganlaridan kevin Bobur mahofaning eshigini ochib, miroxoʻrni¹ chaqirtirdi.

Miroxoʻr mahofaga jips kelganda:

- B-b-boʻz o-o-otimni kel-t-t-tiring, deb buyurdi. U sogʻayib ketganday koʻrinsa ham, ammo hali tilida oʻsha ogʻir xastalikning asorati bor edi. Uning duduqlanib gapirishidan xavotirlangan Qosimbek:
- Amirzodam, ot nechuk kerak? dedi. Minmoqchilarmi?

Bobur yana tili tutilishi mumkinligini sezib, tasdiq ma'nosida soʻzsiz bosh irgʻadi-yu, miroxoʻrga: «Aytganimni qiling!» degandek qaradi.

Mahofa yurib bormoqda edi. Miroxoʻr:

- Bosh ustiga! - deb otga ketdi.

 $^{^{\}rm 1}$ Miroxoʻr «amiri oxur» degani. Miroxoʻr – podshoh otboqarlarining boshligʻi.

Qosimbek orqaroqda kelayotgan tabibni chaqirtirdi. Kalta oq soqolli oʻsha jikkak tabib mahofaga yondashib, Boburdan hali yana uch-toʻrt kun ot minmaslikni iltimos qildi. Ammo Bobur oʻzini yaxshi his qilmoqda edi:

- B-bir-pas otl-liq yuray!
- Tilingizdan kalolat ketmaguncha sabr qiling, amirzodam!

Egar-jabduqlaridagi oltin bezaklari quyosh nurida yalt-yalt qilayotgan boʻz otni jilovdor yetaklab keldi.

Qosimbek unga:

– Qayt! – dedi-yu, Boburga mahofada tinchgina ketaverishni maslahat berdi.

U bilan tabib Boburning yana uzlikib qolishidan astoydil qoʻrqmoqda edilar. Ammo Bobur otni orqaga yetaklab ketayotgan jilovdorga kulib qaradi-yu:

- Yoʻ-yoʻq, otni k-kell-tiring! - dedi.

Soʻng Qosimbekka ham kulimsirab gapirdi:

- X-xa-vo-otir olm-mangiz!

Jilovdor otni yana mahofa oldiga etaklab keldi. Mahofa toʻxtadi. Bobur uning zinasiga oyoq qoʻyib, boʻz otning egaridan oldi-yu, bir sakrab otga mindi. Jilovdor bundan zavqi kelib jilmaydi va jilovning uchini Boburning qoʻliga tutqazdi.

Qosimbek Boburni ortdan sinchiklab kuzatib boradi, agar uning behol boʻlgani sezilsa, darhol yordamga yetmoqchi boʻladi. Ammo Jizzaxga yetib bordilar hamki, ot ustidagi Boburning behol boʻlgani sezilmadi. Kichikligidan ot minib, suyagi qotgan chavandoz soʻnggi kunlarda suvorilikni juda sogʻingan edi. Mahofaning yumshoq parqullari unga xastalik toʻshagini eslatardi. Tagidagi boʻz otning shoʻx qadam olishi va sogʻlom bir qudrat bilan oʻynoqlashi esa Boburning a'zolarida anchadan beri mudrab yotgan yoshlik kuchlarini uygʻotganday boʻlardi. U otliq yurgan sari badani yayrab, bahri-dili ochilib borardi.

Jizzaxdan naridagi koʻkalam adirlarga oʻtib tunash uchun toʻxtadilar va ikki joyga chodir tikdilar. Boburning bugun otliq yurgani va oʻzini juda sogʻlom sezayotgani haqidagi xabar xolasi bilan qalligʻiga ham yetib borgan edi.

Mehr Nigor xonimning kuyovga xola, ayni choqda, qizga ona ekani sovgʻa-salom yuborish va bordi-keldi qilish uchun qulay edi. Namozshom paytida Mehr Nigor xonimning eshik ogʻasi Bobur mirzoga sovgʻa olib keldi: chiroyli zarbof toʻn, oltin kamar, kumush dastali qimmatbaho qamchi. Toʻn – Boburning tuzalish shodiyonasi. Kamar – «kuyovning beli yana ham baquvvat boʻlsin», degan tilakni bildiradi. Qamchi – bugun Bobur otliq yurgani tufaylimikin? Yoki «Podshoh otini qamchilab, tezroq Andijonga yetsin-u yogʻiylarni savalasin!» degan ma'nosi ham bormikin? Nima boʻlganda ham Bobur bu sovgʻalardan juda ta'sirlanib ketdi.

Ertaga ular xayrlashishlari kerak. Toshkent yoʻli shimolga burilib ketadi. Bobur tomonidan ham sovgʻa yuborilishi lozim. Biroq ayollarga yoqadigan qimmatbaho matolar-u taqinchoqlarni ular qayerdan topishadi? Hammalari erkaklar. Qoʻngan joylari ham choʻl. Qosimbek shuni Boburga aytib:

- Kumush laganlarda oltin pul yubora qolsakmikin?- dedi.

Bobur esa shu lagan va oltinlarni bugun boʻsh qolgan mahofaga solib yuborishni taklif qildi.

- Mahofa ham sovgʻa boʻlsinmi? Balki ertaga oʻzingiz mahofada yurursiz, amirzodam?
- Xu-Xudo xohl-lasa, yur-masmen. Z-zaifalar yurs-sinlar.

Soʻnggi gapni Bobur buyruq ohangida aytdi, shuning uchun Qosimbek boshqa e'tiroz qilolmadi. Ertasi kuni ertalab ikki muhtasham mahofa koʻch ortilgan tuyalar-u aravalari bilan birga shimol tomonga burilib, Mirzachoʻl orqali Toshkentga yoʻl oldi. Bobur oʻz qoʻshinidan yuz kishini qoʻriqchilikka ajratgan edi, ular ham mahofalar bilan birga uzoqlashib keta boshladilar.

Andijon yoʻlidan chetroqda katta bir qorovultepa koʻrindi. Bobur yolgʻiz oʻzi shu tepaning ustiga ot qoʻyib chiqdi-da, egardan tushdi. Otining jilovidan tutganicha cheksiz choʻlda tobora kichrayib borayotgan mahofalarga ancha vaqt tikilib turdi. Goʻyo u shu turishda qalligʻi bilan xayrlashdi, unga oʻz ehtiromini bildirib, oq yoʻl tilagan boʻldi.

Bobur yuz kun Samarqandda turib, Oyisha begim bilan biror marta yuzma-yuz koʻrishgan emas. Bunga urf-odat ham yoʻl bermadi, yoshlik hayosi ham monelik qildi. Koʻksaroyda yoza boshlagan gʻazalining «Ne kun boʻlgʻay visolingga meni dil xasta etgaymen» degan satri esiga tushdi. Soʻng ot ustida kun boʻyi yoʻl yurib borayotib, xayolan oʻsha gʻazalini davom ettirdi:

Muyassar boʻlmasa boshimni qoʻymoqlik oyogʻiga, Boshimni olib, ey Bobur, oyoq yetguncha ketgaymen.

Kechqurun tunash uchun Qoʻshtegirmon degan joyda toʻxtaganlarida Bobur bu satrlarni qogʻozga yozib qoʻydi. Gʻazal – shu satrlar bilan tugallanishi kerak. Lekin oʻrtada yana uch-toʻrtta bayt boʻlishi kerak. Ularni keyinchalik, xotirjamroq paytda topmoqchi boʻldi.

* * *

Andijonda boʻlgan voqealar dahshati Tohir qiyofasiga kirib, Boburga tobora yaqinlashib kelmoqda edi.

Bobur odamlari bilan Novdan oʻtganda, Tohir Qoʻqondan oʻtib, Xodarvish choʻliga kirdi. Bobur choʻllarda olti marta tunab, yettinchi kuni kechki payt

Xoʻjandga yetganda, qora oti loyga belangan, oʻzi tanib boʻlmas darajada qorayib, ozib ketgan Tohir uning qarshisidan chiqdi. Bobur hamma bek va navkarlari bilan kelayotganini koʻrgan Tohir otdan oʻzini yerga tashlab, dod solib yigʻlab gapirdi:

- Nechun Samarqandni tashlab keldingiz, amirzodam?!

Bobur Andijon qoʻldan ketganini eshitdi-yu, nazarida, butun borliq zilzila ichida qoldi, yer-u koʻk chayqalib, silkinib ketdi. Chapda yaltirab koʻringan Sirdaryo qirgʻoqlaridan toshib, chiqa boshlaganday tuyildi.

Daryodan narida Xoʻjand togʻlari. Bu yerdan Andijon naqadar uzoq! Samarqand naqadar uzoq! Oʻgay taqdir Boburni bu yerga goʻyo aldab olib kelgan-u, birvarakayiga Samarqanddan ham, Andijondan ham mahrum qilgan! Endi uning ora yoʻlda muallaq boʻlib qolganini Andijondagi Ahmad Tanbal ham, Samarqanddagi Sulton Ali mirzo ham, Turkistondagi Shayboniyxon ham goʻyo uzoqdan koʻrib turar edilar-u «Boladay aldanibdi!» deb qah-qah urib, kular edilar. Ularning kulgilari atrofdagi togʻlardan aks sado boʻlib qaytayotganday tuyilar edi.

Tohir Ali Doʻstbekning xiyonat qilib, darvozani kechasi ochib berganini, Xoʻja Abdulla esa Boburga sadoqati tufayli shu darvozaxonaga osib oʻldirilganini aytganda, Bobur ortiq bardosh qilolmay otiga qamchi bosdi. Qayoqqa ketayotganini oʻzi ham bilmas edi. Chanqagan ot uni daryoning jar boʻlib yotgan baland qirgʻogʻiga olib keldi. Birdan Bobur Axsida jar qulashidan halok boʻlgan otasini esladi. Nazarida u turgan zamin ham hozir qulab tushmoqda edi. Bobur otini orqaga burdi. Lekin orqadagi past-u baland yerlar ham jahannam qa'riga qulab tushayotganday lopillab koʻrindi.

Bobur otining boʻynidan quchoqladi-yu, yelkalari silkina-silkina yigʻlab yubordi. Qosimbek bilan tabib chol uning yoniga keldilar. Qosimbek qaygʻu toʻla tovush bilan yigʻlamsirab gapirdi:

– Amirzodam, hammamiz ham xonavayron boʻldik. Mening mol-u mulkimni talatibdilar. Oʻgʻlim ogʻir yarador emish...

Bobur boshini koʻtardi. Koʻz yoshidan yuzi nam. Tabib uning yelkasini siladi.

- Amirzodam, shukr, onangiz, egachingiz salomat ekanlar. Koʻp kuyunmang, boshingiz omon boʻlsa, davlat topilur... Oʻzingizni ehtiyot qiling, yana xastalanib qolmang!

Bobur darvozaxonaga osilgan ustozini esladi-yu, koʻziga yana yosh quyilib keldi:

– Pirim, meni kimlarga tashlab ketdingiz? Shunday odamni osib oʻldirsalar?! Men ustozim uchun qasos olmogʻim kerak! Qasos!

Oʻrtanib gapirayotgan Boburning tili tutilmayotganidan tabib chol hayratga tushib, unga tikilib qoldi.

- Oxirgi nafasim qolguncha olishurmen!

Boburning yuzi qahr-u gʻazabdan bir oqarib, bir qizarib ketayotgan boʻlsa ham soʻzlari ravon edi. Samarqandda Boburni tildan qoldirgan kasallik – gʻoyat kuchli bir ruhiy larzaning oqibati edi. Endi undan ham kuchliroq ruhiy larza Boburning tilida qolgan duduqlikni birdan yoʻq qilib yubordi. Dushmanlariga qarshi cheksiz bir nafrat va gʻazab unga kuch-quvvat bermoqda edi.

– Xoinlar jazosini olur! Chekinish yoʻq! Odamlarni toʻplang! Hammaga ayting! Andijonga borurmiz!

Bobur otini keskin burdi-yu, parishon boʻlib tarqayotgan odamlarga qarab ketdi.

XO'JAND, MARG'ILON, ANDIJON

AMIR TEMUR SABOQLARI

1

Bobur mingan yoldor saman ot egasining iztiroblarini sezganday yugan suvligʻini asabiy chaynaydi, jilovni tortib, oldinga uchmoqchi boʻladi. Qosimbekning toʻriq qashqasi saman bilan yonma-yon yoʻrgʻalab boradi. Yoʻl Sirdaryoning baland qirgʻogʻidan kunchiqish tomonga qarab ketadi. Bobur tezroq Andijonga borib, ota yurtini Ahmad Tanbal istilosidan xalos qilishga oshiqadi. Qosimbek uni Xoʻjandda toʻxtab, kuch yigʻishga, vaziyat yetilishini kutishga undaydi.

- Amirzodam, Samarqanddan bemavrid yoʻlga chiqqan ekanmiz. Andijon choparini kutsak boʻlarkan. Endi shoshilmaylik!
- Ustozim Xoʻja Abdullani osib oʻldirgan Tanbal onam bilan egachimni sogʻ qoʻygaymi? Ularni kim qutqargay?
- Parvardigor oʻzi qutqaribdir. Hazrat onangiz bilan egachingiz Andijondan Qoʻqonga kelibdirlar.
 - Kim aytdi?
- Tohir ularni Qoʻqondan berida yoʻlda koʻribdir. Bir kecha Konibodomda tunab, keyin Xoʻjandga borurmiz deyishibdir.
 - Qoʻqon hali bizga tobe'mi?
 - Ha, shukr. Xoʻjand ham sizga xayrixoh!

Bu xabarlar Boburga xiyol taskin berganday boʻldi. Oosimbek soʻzida davom etdi:

- Onayizor sizni behad sogʻingandirlar. Mulozimlar bilan peshvoz chiqib kutib olsangiz, qanchalik shod boʻlgʻaylar. Ungacha men Xoʻjand dorugʻasi bilan soʻzlashib, sizlarga joy hozirlagaymen.

Boburning oʻzi ham oʻn oydan beri koʻrishmagan onasi va egachisining iliq mehrlariga juda tashna edi. Qosimbekning soʻnggi taklifi ma'qul tushib, mulozimlari va ikki yuztacha qoʻriqchi navkarlari bilan Xoʻjanddan Konibodom yoʻliga chiqdi.

Qayroggumdan berida tuya va xachirlarga koʻch ortgan karvon koʻrindi. Karvon ortida sandiqlar yuklangan katta gʻildiraklik qoʻqon aravalar ham kelmoqda. Ularning hammasini toʻrt-besh yuz kishilik otlig navkarlar uch tomondan goʻriglab yoʻl yurmogda. Xon qizi boʻlgan Qutlugʻ Nigor xonimning besh yuzdan ortiq xos navkari borligi Boburning yodiga tushdi. Oldingi qatordagi qoʻriqchilar orasida boʻz ot minib kelayotgan Qutlugʻ Nigor xonim Boburni sallasiga qadalgan tojdorlik belgisidan tanib, otini oʻgʻli tomon yeldirdi. Ona-bola va egachiini otlaridan tushib. quchoqlashib koʻrishar ekanlar, goh xonumondan avrilish alamlarini, goh divdor koʻrishish quvonchlarini ichlariga sigʻdirolmay, koʻzlariga dam-badam yosh olishar edi. Yana otlanib, Xoʻjandga yetgunlaricha koʻrgan-kechirganlarini bir-birlariga soʻzlab berishdi.

- Tanbal asoratidan qanday qutuldilaringiz? soʻradi Bobur onasidan.
- Mana shu qoʻriqchi navkarlarim Tanbalni biz turgan joyga yaqin keltirmadi. «Men Yunusxonning qizimen, inim Mahmudxon Toshkent tojdoridir, agar Ahmadbek bizga ziyon yetkizsa, xonlar oldida javob berur!» deb, orada turgan odamlariga aytdim. Harqalay, gapim ta'sir qilibdi, beshikast chiqib keldik.
- Afsus, men bundan bexabar qoldim! Chopar kechikdi!
- Biz ham shunisiga kuyinurmiz, Boburjon! Siz bizni deb Samarqandni jangsiz topshiribsiz!

Shu tarzda dardlashib, Xoʻjandga yetib keldilar. Shahar dorugʻasi nufuzli a'yonlari bilan qoʻrgʻon darvozasidan chiqib, Bobur va uning onasini ehtirom bilan kutib oldilar. Bu qadimiy shahar xalqi Chingizxon bilan mardona olishgan Temur Malik davridan beri moʻgʻul bosqinchilaridan koʻp jabr koʻrgan. Hozir ham Toshkentda hukmron boʻlib olgan chingiziylar Xoʻjandga xavf solib turardi. Buning ustiga Andijon ham Ahmad Tanbalday zolimlarning qoʻliga oʻtgan paytda xoʻjandliklar Bobur kabi temuriy shahzodalar himoyasiga ehtiyoj sezardi. Shuning uchun shahar dorugʻasi Boburni oliy darajada e'zozlab, Sirdaryo sohilidagi ulkan bogʻini ikki oshiyonlik qasri bilan uning ixtiyoriga berdi.

Qosimbek Boburga, uning onasi va egachisiga ikkinchi oshiyondagi eng yaxshi xonalarni tayyorlatib qoʻydi. Oʻzi bek-u mulozimlar va qoʻriqchi yigitlar bilan birinchi qavatni egalladi. Hammalari narsalarini joylashtirib, tinchiganlaridan soʻng, ikkinchi oshiyondagi katta tanobiy uyda Bobur onasi va egachisi bilan yakkama-yakka qolib, boshqalar oldida aytilmaydigan dard-u alamlarini toʻkib soldilar.

- Tole bizdan yuz oʻgirdi! dedi Bobur «uh» tortib,Tanbalning oʻn ming qoʻshini bor emish, rostmi?
- Rost! Nobakorlar sizni «Samarqandda vafot etdi», deb ovoza tarqatdilar, dedi Qutlugʻ Nigor xonim. Behush yotganingizni koʻrib kelgan choparni guvoh qilib koʻrsatib, koʻp odamni bunga ishontirdilar. Shundan soʻng tarafdorlaringiz ma'yus boʻlib, Tanbal bilan Jahongirga boʻyin egdilar.
- Qosimbek ham xato qilganki, meni behush ahvolda koʻrgan navkarni Samarqandda toʻxtatib turmagan. Buni sir tutmoq kerak edi! Hozir bizning bir yarim mingga yetar-yetmas navkarimiz qoldi. Ularning ham koʻpi vodiydagi uylariga, ahli oilasiga talpinur, Xoʻjandda koʻp turolmay tarqab ketgay. Men endi qaysi

kuch bilan Tanbalga qarshi boray? Bu ne koʻrgulikki, birvarakay ham Samarqanddan, ham Andijondan mahrum boʻldik! Ikki mulk orasida muallaq qoldik! Najot yoʻq! Atrofimiz zim-ziyo qorongʻilik! Boshi berk koʻcha!

Bobur jigarbandlariga dil yorib soʻzlar ekan, ilojsizlikdan koʻngli ezilib, ruhi qiynalar, koʻzlariga yosh quyulib kelardi.

Yaqindagina ogʻir xastalikdan turgan oʻn olti yoshlik oʻgʻlining bunchalik ezilib qiynalishlari Qutlugʻ Nigor xonimni iztirobga soldi.

- Boburjon, bolam, shukrki, sogʻ-salomat koʻrishdik! Xayriyat, tuzalib ketibsiz.
- Bil'aks, tuzalmay turganim ma'qul edi! Samarqandni tashlab chiqmas edik!

Bunday ogʻir kayfiyat bilan yolgʻiz oʻgʻli yana uzlikib yotib qolishi mumkin. Xavotirlangan ona Boburga taskin beradigan, uning koʻnglini koʻtaradigan chora izlay boshladi. Shunda qizi Xonzoda begim yordamga keldi:

- Onajon, amirzodamni mamnun qiladigan noyob bir tuhfamiz bor edi-ku!
 - Qaysi tuhfa?
- Shaxnishinning orqasidan topilgan maxfiy sandiq-chi?
- Ha, aytmoqchi! Qutlugʻ Nigor xonim oʻgʻliga yuzlanib, ovozini sirli tarzda pasaytirdi: - Boburjon, sizga atalgan buyuk bir meros topildi. Yuring, koʻrsatay!

Qutlugʻ Nigor xonim Boburni va qizini oʻzi joylashgan narigi tomondagi xonaga boshladi. Bobur onasi bilan yonma-yon borar ekan, uning boʻyi shu oʻn oy ichida xiyla oʻsganini, Bobur tez ulgʻayib oʻn olti yoshida devqomat, pahlavon yigit boʻlayotganini sezgan Qutlugʻ Nigor xonim ichida Yaratganga yana bir shukrona aytib qoʻydi. Ayvoni Sirdaryoga qaragan

bahavo, keng xonaga kirdilar. Gilamlar, beqasam koʻrpachalar toʻshalgan xonaning toʻrida silliq charm qoplangan sandiq koʻrindi. Uchovlari shu sandiqqa yaqinlashganlarida, Qutlugʻ Nigor xonim Boburga qarab dedi:

- Esingizdami, otangiz sizga «Bobokalonimiz Amir Temurdan qolgan noyob meros bor, asrab-avaylab yuribmen, katta boʻlganingizda berurmen» der edilar?
- Ha, otam bizga sohibqiron bobomiz haqida koʻp gʻaroyib hikoyalar ham aytib berganlar.
- Bobokalonlariga ixloslari zoʻr edi-da. Vafotlaridan keyin oʻshal merosni Axsidan izladim, topolmadim. Oʻtgan hafta Andijonda koʻch yigʻishtirgan paytimizda xonayi xosning devoriga osilgan turkman gilamini olsak, usti shuvalgan tuynukning izi koʻrindi... Tuynuk orqasidagi maxfiy joyga mana shu sandiq berkitilgan ekan!..

Qutlugʻ Nigor xonim namoz oʻqigan paytidagi kabi ezgu bir tovush bilan sekin:

- Bismillohir rohmanir rohiym! dedi-da, sandiqni ochdi. Undan nafis ipak matoga oʻralgan oltin sopli qilichni ikki qoʻllab olib, oʻgʻliga koʻrsatdi:
 - Sohibqiron Amir Temurning qilichlari!

Bobur quloqlariga ishonmay, koʻzlarini katta-katta ochib, qilichga tikildi:

- Rostdanmi, a?
- Yozuvlari bor! Oling, bolam, oʻqib koʻring!

Qilichning qini yengil bir ma'dan qotishmasidan quyma qilib yasalgan, ustidan oltin suvi yugurtirilgan edi. Qinning yuz tomoniga ikkita yirik yashil zumrad toshi qadalgan, ularning oralig'ida chiroyli xattotlik harflari bilan bitilgan arabcha yozuv bor edi.

Bobur qilichni onasining qoʻlidan ikki qoʻllab oldida, yozuvini koʻzlariga yaqin keltirib oʻqidi: «Bizkim, maliki Turon, podshohi Turkiston Amir Temur Koʻragon farzandimiz Mironshoh Mirzoga Toʻxtamish

bilan muhoribada koʻrsatgan jasorati uchun oʻz qilichlarimizdan birini in'om etdik».

Bobur bu qilich dastasiga Amir Temurning qoʻli tekkanini, balki Sohibqiron uni janglarda ishga solganini koʻz oldiga keltirib hayajonlanib ketdi. Toʻxtamishxon va boshqa chingiziylar bilan qilingan dahshatli janglar xayolida gavdalandi.

– Qilichning oʻzida ham bitik bor, – dedi past tovush bilan Xonzoda begim.

Bobur qilichning oltin sopidan sekin tortib, uni bir qarichcha qinidan chiqardi. Shun-da olmosday yaltiragan qisqa bir yozuv koʻziga jilvalanib koʻrindi. Amir Temurning muhridagi «Rosti-rasti», ya'ni «Kuch – adolatdadir» degan soʻzlar qilichning poʻlatiga qadama tarzida mustahkam qilib bitilgan edi.

Bu qisqa soʻzlarni oʻqiganda, negadir Boburning eti jimirlab ketdi, dilida qoʻzgʻalgan kuchli bir tugʻyondan entikdi, olmos yozuvni koʻzlariga surib, oʻpdi.

Qilich uncha ogʻir emas edi. Bobur uni beliga taqqanda, atrofidagi hamma narsa koʻziga boyagidan boshqacha – allanechuk sokin va salobatli koʻrindi.

- Onajon, siz menga yangi bir ruh ato qildingiz!
- Bobokaloningizning ruhi sizga madadkor boʻlsin, oʻgʻlim! Bu qilichni Mironshoh bahodirdan soʻng otangizning otalari Sulton Abusayid bahodir taqqan ekanlar. Inshoolloh, siz ham bobolaringizdek bahodir boʻlgʻaysiz!
 - Aytganingiz kelsin!
- Xudo rahmati Abusayid bobongiz vafot etganlaridan soʻng qolgan meroslari oʻgʻillari orasida taqsim etilur. Katta oʻgʻillar oltin-u javohir toʻla sandiqlarni talashib olurlar. Ammo sizning jannatmakon otangiz mana shu sandiqdagi qilich bilan xotirotlar bitilgan daftarlarni afzal koʻrurlar. Chunki bu xotirotlarda Amir Temur hazratlarining koʻrgan-kechirganlari bitilmishdir. Xonzoda, qizim, siz oʻqib koʻrdingiz, shekilli?

– Ha, Sohibqiron bobomiz yigitlik paytlarida chingiziylar hukmronligiga qarshi chiqqan ekanlar. El-yurt Samarqandda Temurbekni oʻz hukmdorlari, deb e'lon qilgan ekan.

Chingiziylarni yurtimizdan quvmoqchi boʻlganlar koʻp ekan. Bundan gʻazablangan Tugʻluq Temurxon bilan uning oʻgʻli Ilyosxoʻja Moʻgʻulistondan ellik ming qoʻshin bilan kelib, Temurbek tarafdorlarini qirgʻin qilurlar. Temurbekning oʻzi Qoraqum, Qizilqum sahrolarida, Hisor-u Badaxshon togʻlarida olti yil quvgʻinda yurib, kuch toʻplaydirlar.

Bobur bu hodisalar haqida otasidan ham koʻp maroqli hikoyalar eshitganini esladi. Ayniqsa, Temurbekning suyukli yosh xotini Oʻljoy Turkon ogʻa bilan eng ogʻir damlarda birga boʻlgani, goho xotinini otiga mindirib, oʻzi qum sahrosida piyoda yurganlari yosh Boburga kuchli ta'sir qilgan edi.

Shuni biladigan Xonzoda begim inisiga mehri tovlanib tikildi:

- Sizda ham Sohibqiron bobokaloningizdagi io'mardlikdan bor, amirzodam! - dedi. - O'shdagi tajovuzdan meni qutqarganingizni umrbod unutmagaymen! Boʻlajak kelinimiz Ovisha begimni siz Samarqanddan yogʻiy asoratidan xalos qilib, bizga xayrixoh Toshkentga kuzatib qoʻyibsiz. Bu ham bir joʻmardlik emasmi? Yetti ov gamal azobini tortgan samarqandliklarga oshliq tarqatibsiz, urugʻligi qolmagan dehqonlarga bahorda urugʻlik keltirib beribsiz. Bu hammasi - dilingizda adolat tuygʻusi kuchli ekanidan dalolatdir. Belingizdagi qilichga Sohibqiron bobokaloningizning: «Kuch – adolatdadir», degan hikmatlari bejiz bitilmagan. Ahmad Tanbalning o'n ming askari bo'lgani uchun u hozir «Men kuchlimen!» deb yuribdir. Ammo yolgʻonning umri qisqa! Ahmad Tanbal Andijonni aldamchilik bilan egalladi, sizni «oʻldi» deb ovoza tarqatdi. Siz sogʻ-

salomat qaytganingizni odamlar hademay bilurlar, Tanbalning yolgʻoni fosh boʻlur. Uning zolimligidan hamma bezor boʻladigan kunlar kelur.

- Ana oʻshal kunlar kelguncha sabr-bardoshli boʻling, Boburjon, – dedi onasi. – Sohibqiron bobongiz mana shu Xoʻjandga ham necha bor kelganlar. Sirdaryodan necha marta oʻtganlar, vaziyat yetilishini yillar davomida kutganlar, axiyri adolat gʻolib chiqqan kunlarga yetganlar. Siz ham yetursiz, ishoning!
- Ishondim, onajon! Siz bilan egachim mening dilimda oʻchib qolgan umid chiroqlarini qayta yondirganday boʻldilaringiz. Minba'd men doim Sohibqiron bobokalonimizdan saboq olib, ish tutgaymen!

Onasi in'om qilgan buyuk meros chindan ham Boburning dilini ravshan qilib yuborgan edi. Ular kelib tushgan bogʻda oʻriklar oppoq boʻlib gullagani endi uning koʻziga tashlandi. Daryo boʻyidagi qalin chakalakzorda bulbullar basma-bas sayrayotgani qulogʻiga chalindi. Ayvonga chiqqanda kechki shabada yuziga ipakday mayin salqinlik berdi.

2

Ammo bu ma'sud damlardan keyin kelgan kunlar, oylar, hatto yillar lomakonlik va sargardonlikda oʻta boshladi. Sohibqiron bobokalonidan saboq olib yashashga ahd qilgan Bobur buning qanchalik qiyin boʻlishini oʻz boshiga ogʻir kunlar tushganda bildi. U onasi in'om qilgan sandiqdagi xotirotlarni takror-takror oʻqib, Sohibqiron bobosini yigitlik paytidagi ismi bilan xayolida Temurbek deb atashga oʻrgandi. Temurbek yigirma besh yoshida Samarqand va Shahrisabzdagi xonumonidan judo boʻlgani va ota yurtining toʻrt tomoniga bosh urib, najot izlagani Boburning hozirgi ahvolini eslatardi.

Toʻgʻri, Temurbekka tajovuz qilgan Ilyosxoʻja va Amir Bekchiklar Ahmad Tanbaldan yuz chandon qudratliroq va xatarliroq edi. Ular Temurbekni tutib olib oʻldirish uchun minglab odamlarni safarbar etadilar. Oʻlim xavfi yillar davomida Temurbek bilan izma-iz yuradi. Qoraqum sahrosidan narida, Xiva boʻsagʻasida Temurbek oltmish yigiti bilan ming kishilik yov qurshovini qoʻlda qilich bilan yorib chiqib, qutulib ketadi.

Endi o'n yetti yoshga kirayotgan Bobur hali bunday dahshatli xatarlarga duch kelgan emas. Faqat ota yurtidan ayrilib, lomakon boʻlib yurgani va Ahmad Tanbalga bas kela oladigan kuchli qoʻshin vigʻish nihovatda mushkul boʻlavotgani uni qivnavdi. Boburning ishongan odamlari vashiriqcha Andijon-u Axsiga, Margʻilon va Oʻshga borib kelmoqda. Xayrixohlar koʻp, ammo yurak yutib maydonga chiqadiganlar kam. Boburning oʻzi ham bu yogʻi Isfara va Konibodomga, u yogʻi Zomin va Jizzaxgacha, janubda Oʻratepa, shimolda Toshkentgacha hamma jovga bir necha marta borib keldi. Bir yarim yildan beri qishni qish, yozni yoz demay yoʻl bosdi. Sirdaryodan qayta-qayta suzib o'tdi. Qishda muzni teshib cho'milgan paytlari bo'ldi. Uning o'ziga o'xshab chiniqqan yigitlari Temurbekning Hisor togʻlarida, afsonaviy gʻorlarda yashab toblangan yigitlarini eslatadi.

Biroq navkar-u sardorlari bilan bir joyda uzoq vaqt mehmon boʻlib turishga yuzi chidamaydi. Chunki haftalar, oylar davomida yuzlab odamlarga ovqat, otlarga yemish topib berish mezbonlarga juda ogʻir tushishini sezadi. Shuning uchun onasi va egachisini Xoʻjanddan Oʻratepaga, xolasi Xub Nigor xonimning uylariga keltirib qoʻydi. Oʻzi uch yuzga yaqin bek-u navkarlari bilan janubdagi togʻlarga chiqib ketdi. Ovchi deb ataladigan bir qishloq yaqiniga chodir va

oʻtovlar tikishib, ancha vaqt ov oʻljalari bilan roʻzgʻor tebratishdi.

Ovchi qishlogʻiga tor bir daradan oʻtib boriladi. Daraning tubidan suv hayqirib oqadi. Suv boʻyida besh qavatlik uyday bir bahaybat qoyatosh osmonga boʻy choʻzib turadi.

Bobur shu qoyatoshning ustini tekislatib, chodir oʻrnattirgan. Ovdan boʻshagan paytlarida chodirda oʻltirib, kitob oʻqiydi, xotira daftariga koʻrgan-kechirganlarini yozadi, she'r mashq qiladi.

Bir kun shu chodirda Bobur Mirzo Ulugʻbekning «Tarixi arbaa ulus» kitobini¹ oʻqib oʻtirganda, daraning narigi chetidan bir otliq odam jadallab kelayotganiga koʻzi tushdi.

Oti terga botgan bu otliq Margʻilondan kelgan chopar yigit edi. U Bobur qarshisida tiz choʻkib, arzini aytdi:

- Amirzodam, meni Margʻilon dorugʻasi Ali Doʻstbek togʻoyingiz yubordilar.
- Bizga xiyonat qilib, Andijonni Tanbalga yashiriqcha topshirgan togʻoyimizmi?
- Ha, togʻoyingiz bu qilgan ishlaridan hozir ming pushaymonlar. Ahmad Tanbal uning uylariga bostirib kelib, yaxshi koʻrgan qizlarini zoʻravonlik bilan haramiga olib ketibdir. Mol-mulkini talatibdir!
- Qasos qaytar ekan-da! dedi Qosimbek. Doʻstbekning oʻzi Andijonda bizning mol-mulkimizni talatgan edi.
- Janob amiral umaro, Tanbalning amaldor-u soliqchilari ham jabr-zulmni haddidan oshirib yubordi. El-yurt ularga qarshi isyon koʻtaradigan boʻlib turibdir. Ayniqsa, margʻilonliklar hozir joʻsh-u xurushga kelgan. «Bobur mirzo kelsalar qoʻrgʻon darvozalarini ochib bergaymiz!» deb, togʻoyingiz meni huzuringizga yubordilar.

¹ «Tarixi arbaa ulus» – toʻrt ulus tarixi demakdir.

- Togʻoyimiz Tanbal bilan til biriktirib, bizni unga tutib bersalar-chi?!

- Tepamizda Xudo turibdir, amirzodam! deb qasam ichdi chopar. - Hazrat momongiz Eson Davlat begim Ali Doʻstbekka yaqin qarindosh ekanlar. Momongiz yaqinda Margʻilonga boribdilar.
 - Siz momomni oʻsha yerda koʻrdingizmi?
- Ha, maslahatlarini ham oldim. «Ali Doʻstbek bilan Tanbalning yovlashgani rost!» dedilar. Momongiz sizga salom aytdilar, «Tezroq yetib kelsinlar!» deb tayinladilar.

Bobur endi hayajon bilan oʻrnidan koʻtarildi:

– Janob Qosimbek, tavakkal qilaylik! Odamlarga buyuring. Darhol koʻch yigʻishtirsinlar!

Oʻsha kuni qorongʻi tushguncha barcha oʻtovlar qatori Boburning qoyatosh¹ ustidagi chodiri ham yigʻishtirib olindi. Tuni bilan yoʻl yurib, sahar palla Xoʻjanddan berida bir-ikki soat dam oldilar-da, yana yoʻlga tushdilar. Toʻrt kunlik yoʻlni bir yarim kunda shitob bilan bosib oʻtdilar. Margʻilondan berida Isfayramsoy shovullab oqmoqda. Sahar palla edi. Soy boʻyida birpas toʻxtadilar. Bobur soy suvidan tahorat olib, ikki rakat namoz oʻqidi. Joynamoz ustida oʻltirib, Sohibqiron bobokaloniga bagʻishlab tilovat qildi, ulugʻ ajdodlar ruhidan madad soʻrab, yuziga fotiha tortdi. Soʻng tong qorongʻisida Margʻilon qoʻrgʻonining yopiq darvozasi oldiga keldilar.

Ali Doʻstbek darvoza qorovulxonasida ularni kutib oʻltirgan ekan. Darvozani toʻrt enlik ochib, qoʻrqa-pisa Boburga murojaat qildi:

- Amirzodam, Andijonda qilgan gunohlarim uchun afv soʻraymen! Tanbal hammamizni aldagan ekan!

¹ Ovchi qishlogʻi va undan pastroqdagi qoyatosh hozir ham bor. Oʻsha joyning turkiyzabon aholisi bu qoyatoshni «Boburtosh» deydi, tojikzabon aholisi esa uni «Sangi Boburxon» deb ataydi.

- Minba'd sadoqat saqlay olurmisiz? shiddat bilan soʻradi Bobur.
- Qur'oni karim oldida soʻz berurmen, umrbod sodiq qulingiz boʻlurmen, amirzodam! Faqat meni inoyatlaringizdan mahrum qilmasangiz, bas!
- Inoyatlar istaganingizdan ham ziyoda boʻlgʻusidir. Oching, darvozani!

Bu buyruqni Ali Doʻstbek darhol ado etdi. Bobur fonus yorugʻi tushib turgan darvozaxonaga kirganda, Ali Doʻstbek oʻzini uning oyogʻi tagiga tashlab yukundi. Bobur uni qoʻltigʻidan olib turgʻizdi:

- Ma'zursiz! Tanbalning sodiq odamlari boʻlsa, hozir uyquda tutdirmoq kerak!
 - Uning talonchilari uxlab yotgan joylarini bilurmen!
- Janob Qosimbek, bizning navkarlarimizga siz bosh boʻling!

* * *

Tong yorishganda Margʻilon koʻchalarida otliq jarchilar Bobur mirzoning qaytib kelganini e'lon qildilar. Tanbalning koʻpchilik odamlari qurolsizlantirilgani ham shaharliklarga ma'lum boʻldi. Butun Margʻilon ahli oyoqqa qalqdi. Shahar a'yonlari Bobur kelib tushgan koʻshkka borib, uni gʻalaba bilan qutladilar. Bozorlarda Tanbal soliqchilari uchrab qolsa, odamlar ularni tayoq bilan urib, shahardan quvdilar. Mahallalarda nogʻoralar, karnay-surnaylar yangradi. Qosimbek Bobur mirzo nomidan doshqozonlarda palov damlatib, minglab odamlarga osh ulashdi.

Kechagina Tanbal zulmidan motamsaro ahvolga tushgan Margʻilon bugun Bobur mirzo qaytgani tufayli bayram tusini oldi. Bu hodisa koʻp oʻtmay Andijon, Axsi va Oʻshlarga ham ma'lum boʻldi. Bobur mirzoning pinjiga kirib olgan Ali Doʻstbek Qosimbekning oʻrniga

sohibixtiyor eshik ogʻa boʻlish niyatida edi. U Boburni xoli topib, gapning uchini chiqardi:

- Amirzodam, kutganimdan ham ortiq inoyatlar qilmoqchi edingiz...
 - Margʻilon dorugʻaligʻi sizga yetarlik emasmi?
- Dorugʻalikni menga Tanbal bergan edi. Endi bundan kattaroq inoyatni sizdan kutmoqdamen.
- Qani, Andijon-u Oʻshlar ham bizga qayta nasib qilsa. Keyin oʻylab koʻrurmiz.
- Ittifoqo, Oʻshdan Qambarbek keldi. Oʻshliklar ham sizga muntazir emishlar.
- Ammo hozir Andijondan yomon xabar oldik. Ahmad Tanbal katta qoʻshin toʻplab, Margʻilon tomonga bostirib kelmoqda.
- Unday boʻlsa, Oʻshga Qosimbek sizdan vakil boʻlib borsin. Oʻzganga ham oʻtib, tarafdorlaringizni ishga solsin!

Ayyor Ali Doʻstbek shunday nozik paytda Qosimbekni Boburdan uzoqlashtirib, sohibixtiyor eshik ogʻa vazifasini oʻzi boshqarmoqchi edi. Lekin Bobur barcha mashaqqatlarni birga boshdan kechirgan qadrdoni Qosimbekdan ajrashgisi kelmadi.

– Janob Doʻstbek, Tanbalday yogʻiy bostirib kelayotgan paytda koʻpni koʻrgan Qosimbek yonimizda boʻlmogʻi kerak. Oʻshga boshqa bek-u navkarlarni yuborgaymiz.

Soʻzi yerda qolgan Ali Doʻstbek qovogʻini solib, toʻmtavib qoldi.

Qosimbekning oʻz odamlari bilan Margʻilonda qolgani yaxshi boʻlgan ekan. Tanbal Andijondan katta qoʻshin bilan Margʻilonga hujum qilib kelganda, barcha kuchlar birlashib himoyaga chiqdilar. Margʻilondagi bek-u navkarlar qoʻrgʻondan tashqaridagi mahallalar va qishloqlardan yigʻilgan minglab botir yigitlar yordamida Tanbal qoʻshinini uloqtirib tashladilar. Bu orada quvaliklar Tanbalga orqadan zarba berdilar.

Oʻsh va Oʻzgan xalqi ham Tanbalga qarshi isyon koʻtarib, Boburga koʻmak yubordi.

Toʻrt tomonidan oʻt ketgan Tanbal tezroq Andijon qoʻrgʻoniga qaytib borib, jon saqlamoqchi boʻldi.

U Andijonga Nosirbek degan kishini dorugʻa tayinlab kelgan edi. Ahmad Tanbal Margʻilonda Boburdan yengilib, talvasaga tushib kelayotganini eshitgan andijonliklar Nosirbekning qarorgohini oʻrab oldilar. Toʻrt tarafdan hayqiriq va xitoblar eshitila boshladi:

- Ahmad Tanbal daf boʻlsin!
- Darvozadan kiritilmasin bu zolim!
- Bobur mirzoga odam yuboring, tugʻilgan yurtigʻa tezroq qaytsin!
 - Toʻydik chingiziylardan! Bobur kelsin!
- Agar dorugʻa yana Tanbalga yon bossa, qoʻrgʻon darvozalarini biz oʻzimiz Bobur mirzoga ochib bergaymiz!

Toshgan daryoday toʻlqinlanayotgan bir necha ming kishilik izdihom Nosirbekni qoʻrqitib yubordi:

- Xaloyiq! Tinchlaning! Menga quloq soling! Oralaringizda moʻysafidlar bor! Mana, mening yonimda Shayxulislom janoblari turibdilar. Moʻysafidlar jome' masjidiga borsinlar! Qurollangan yigitlar bizga yordamga kelsinlar. Darvozalarni darhol bekitgaymiz. Tanbalni Andijonga kiritmagaymiz. Juma namozida Bobur mirzoning nomini xutbaga qoʻshib oʻqigaymiz! Keyin buning xabarini moʻtabar odamlar orqali Bobur mirzoga yetkazgaymiz. Toki ul zoti oliy Andijonga izzatikrom bilan qaytib kelsinlar. Shunga rozimisizlar?

Bu reja amalga oshdi-yu, ertasi kuni andijonliklar Bobur mirzoni qoʻrgʻon darvozasi oldida karnay va nogʻoralar chalib, kutib oldilar. U minib kelayotgan gulibodom otning oyogʻi tagiga gilam poyandozlar toʻshadilar. Bobur shodlikdan koʻzlari yoshlanib, yonida kelayotgan. Qosimbekka soʻz qotdi:

- El-yurtda adolat bor ekan-a!

– Ha, mehr-u oqibat ham kuchli ekan. Faqat yuzaga chiqishi oson boʻlmas ekan!

- Shukr, mas'ud kunlarga yetishdik!

* * *

Shu tarzda Andijondan quvilgan Ahmad Tanbal qolgan-qutgan odamlari va koʻch-koʻroni bilan Axsiga yoʻl oldi. Biroq Axsida ham Tanbalga qarshi isyon koʻtarilgan, Bobur tarafdorlari qoʻrgʻon darvozalarini egallashgan. Tanbalga sadoqat saqlab turgan Axsi dorugʻasi Uzun Hasan arkka kirib bekingan edi.

Bobur va Qosimbekning qoʻshini soʻnggi vaqtlarda besh mingdan ham oshib ketdi. Ular Andijonda koʻp toʻxtamay, Bandi Solor yoʻli bilan Axsiga yetib bordilar va arkdagi Uzun Hasanni asir oldilar.

Bu xabarni eshitgan Ahmad Tanbal mustahkam qoʻrgʻonlardan biri boʻlgan Popga qarab chekindi. Ammo u yetib borgunicha, Bobur tarafdorlari Pop qoʻrgʻonini ham berkitib, Ahmad Tanbalni darvozadan kirgizmay quvdilar.

Ahmad Tanbal Gʻova orqali Chotqol togʻlariga qarab chekindi. Uning soʻnggi umidi – katta akasi Tilba Sultondan va Toshkent xoni Mahmudxondan edi. Tilba Sulton xon saroyida soʻzi oʻtadigan eshik ogʻa ekanini Bobur bilardi. Ahmad Tanbal Fargʻona vodiysini talontoroj qilib orttirgan boyliklaridan katta bir qismini Ohangaron orqali Toshkentga, Mahmudxonga sovgʻa qilib yuborgani ham xufiyalar ma'lumotidan ma'lum edi. Lekin Mahmudxon – Qutlugʻ Nigor xonimning akasi boʻlaturib, jiyani Boburning ashaddiy dushmani Ahmad Tanbalga yon bosishi mumkin emasday tuyilardi.

Shuning uchun Bobur qoʻshini Ahmad Tanbalni Chotqol togʻi etagigacha ta'qib etib bordi. Kun sovuq, yoʻllar toygʻoq. Kechki payt Tanbal besh yuztacha askari bilan Arxiyon degan joydagi qoʻrgʻonga kirib bekindi. Bu qoʻrgʻon devorlariga shoti qoʻyib, oshib oʻtish mumkin edi.

– Kech kiryapti, qorongʻi tushmasdan tezroq harakat qilaylik! – dedi Bobur. Ammo shotilarni oʻn chaqirimcha beridagi Gʻaznayi Namangandan keltirgunlaricha gʻira-shira qorongʻi tushdi.

Kechki izgʻirinda ogʻizdan chiqqan hovur uzoqdan koʻzga tashlanadi, navkarlarning qoʻli qovushga kelmaydi, gapirganda lablari ham qiyinlik bilan harakatlanadi.

- Amirzodam, deb Ali Doʻstbek Boburga arz qildi: Qorongʻi tushib qoldi, yovni oʻzimiznikilardan ajratish qiyin boʻlgʻay. Qamalni ertalabdan boshlaylik.
- Ungacha Tanbal qochib ketsa-chi? soʻradi Bobur.
- Qochib qayoqqa borgay? Naryogʻi togʻ, dovon bekilgan!
- Tanbalning akasi Tilba Sulton Archakent dovoni orqali inisining oldiga kelib ketibdi-ku! – dedi Qosimbek.
- Ne boʻlganda ham, endi Tanbal ilikka tushmogʻi kerak! - dedi Bobur. - Arxiyon qoʻrgʻoni atrofiga chodirlar tikdiring! Ming kishi tuni bilan qorovullik qilsin! Ertadan besh ming kishi bilan devorga shotilarni qoʻyib hamla qilurmiz!
- Bosh ustiga! deb Ali Doʻstbek bu farmonni bajarishga kirishdi.

Qosimbek Bobur uchun shu atrofning eng obod va koʻrkam joyi boʻlgan Gʻaznayi Namanganda qarorgoh tayyorlata boshladi.

TOSHKENT, NAMANGAN, ANDIJON

CHINGIZIYLAR YANA HUKMRON BO'LMOQCHI

1

Qirchillama qishda samur¹ poʻstin va qunduz telpak kiygan Mahmudxon xonayi xosda eshik ogʻa Tilba Sulton bilan yakkama-yakka suhbatlashmoqda. Osmonni quyuq bulut qoplagan. Kunduz kuni boʻlishiga qaramay, xonayi xosdagi qandillarda shamlar lipillab yonmoqda. Mahmudxon sham yorugʻida Tilba Sultonning yuziga tikilib qaradi-yu, uning ozib ketganini payqadi.

Odob bilan choʻkka tushib oʻltirgan Tilba Sulton xonga tomon qaddini bukib, qoʻlini koʻksiga qoʻyib soʻzlamoqda:

- Shu sovuq kunlarda dovon oshib, Fargʻona vodiysiga ikki marta borib keldim, xon hazratlari. Archakent dovoni pastroq ekan, undan oshib oʻtib, Kosonsoyga qishda ham borsa boʻlar ekan.

Qorli dovonlardan qayta-qayta oshib oʻtish oson boʻlmagani Tilba Sultonning sovuqda qorayib ketgan koʻsanamo yuzidan, qalin lablarining u yer-bu yerini izgʻirin yorib yuborganidan bilinib turardi:

- Inim Ahmadbek butun najotni sizdan kutmoqda, xon hazratlari! Axir siz bugungi Chigʻatoy ulusining eng qudratli hukmdorisiz. Bizning yetti pushtimiz Chingizxon nasliga sodiq xizmat qilib kelmoqda. Oʻzimiz ham aslan hazrati Chigʻatoyxonning qiz avlodlaridan tugʻilganimiz sizga ma'lumdir.
- Rost, siz bilan bizning uzoq qarindoshchiligimiz bor.

¹ Samur - sobol.

- Shuning uchun inim Ahmadbek Fargʻona vodiysini Boburga emas, sizga topshirmoqchi!
 - Ammo Bobur ham bizga jiyan-da.
- Xon hazratlari, bu jiyanning sizga biron foydasi tekkani yoʻq! Otasi Umarshayx mirzo sizdan Toshkentni tortib olmoqchi boʻlib, qancha urushlar qildi? Paytini topsa, Bobur ham sizga qarshi qilich yalangʻochlagay!
- Unchalik emasdir, janob vazir. Bobur Toshkentga kelganda, juda odobli, mehr-u oqibatlik koʻringan edi.
- Tashqi koʻrinishdan shundaydir. Ammo qilayotgan ishlari batamom sizga qarshi! Men buni oʻzim borib koʻrdim, el-yurt orasida aytgan gaplarini oʻz qulogʻim bilan eshitdim, xon hazratlari!

Tilba Sulton yolgʻonni ham rostday qilib gapirishga usta edi. U Bobur aytmagan soʻzlarni ichidan toʻqib chiqara boshladi:

- Boburning oʻzi ham, tarafdorlari ham chingiziylarni «jete»¹ deb kamsitadi. «Yoʻqolsin chingiziylar! Fargʻona vodiysi Temuriylar mulkidir! Jetelarni qir!» degan baqiriqlarni Fargʻona vodiysining koʻp joylarida men oʻzim eshitdim!
- Nahotki Bobur bizga jiyan boʻlaturib shunday gaplarni aytsa?!
- Aytish ham gapmi?! Bobur Amir Temurning qilichini taqib olgan. Bu qilichni Toʻxtamishxon tormor boʻlgan paytlarda Temurbek oʻgʻli Mironshohga in'om qilgan ekan. Endi Bobur boshqa chingiziylarni ham xuddi Toʻxtamishga oʻxshatib, shu qilich bilan tor-mor qilmoqchi emish!

Mahmudxon achchiq istehzo bilan kuldi:

– Bu hammasi bekorchi xomxayol! Temuriylar Chigʻatoy ulusida yuz yildan ortiq hukm surgani yetar! Endi ularning davri tugadi! Bir yilda katta yoshlik, tajribali Temuriylardan uchtasi ketma-ket olamdan oʻtdi. Yana Boysunqur mirzo deganini Hisorda

¹ Jete – bosqinchi, talonchi demakdir.

Xisravshoh oʻldirib, taxtini egalladi. Buxoroda Sulton ali mirzo degan boʻsh-bayov bir oʻsmir hukmron edi. Shayboniyxon Buxoroni osongina undan tortib oldi.

- Shayboniyxonga siz yordam berdingiz-da, xon hazratlari! Bu odam avval temuriyzoda Sulton Ahmad mirzo xizmatida uch yuztagina navkari bilan ponsot darajasida xizmat qilib yurgan edi.
- Yordam berdik, chunki Shayboniyxon bilan ildizimiz bir. Biz sohibqironi a'zam, xoqoni muazzam Chingizxonning oʻrtancha oʻgʻli Chigʻatoyxondan tarqagan xonlarmiz. Shayboniyxon Chingizxonning katta oʻgʻli Joʻjixondan tarqagan xonlar avlodidandir. Buni bilurmisiz?
- -Yaxshi bilurmen, xon hazratlari. Ammo Joʻjixonning oʻgʻli Botuxon Chigʻatoy ulusini Oltin Oʻrdaga boʻysundirmoqchi boʻlib, sizning bobolaringizga koʻp jabr-u sitamlar oʻtkazgan! Qancha-qancha chigʻatoylarni Botuxon begunoh yasoqqa yetkazgan!
- Lekin Shayboniyxon Botuxon avlodidan emas, Shaybon ulusidandir, shuni unutmang, janob vazir! Shaybon – Joʻjixonning beshinchi oʻgʻli boʻlgan, Botuxonga qarshi turgan.
- Bunisini bilurmen, xon hazratlari! Shaybon ulusi Yoyiq bilan Irtish daryolari orasidagi yaylovlarda koʻchib yurgan. Shayboniyxonning nevara-chevaralaridan biri Abulxayrxon nomi bilan shuhrat qozongan. Hozirgi Muhammad Shayboniyxon ana oʻsha Abulxayrxonning nevarasi ekan. Otasi Shohbudoq sulton xonlik masnadiga yetisholmay oʻlib ketgan.
- Ha, rost, Shayboniyxonning asli oti Shohbaxt ekan. Uni bolaligida Abulxayrxon oʻzi tarbiyalagan ekan. Bobosi oʻlgandan keyin algʻov-dalgʻov boshlanib, Shohbaxtxon koʻp azob tortadi. Axiyri Dashti Qipchoqdan Buxoroga koʻchib kelib, jon saqlaydi.
- Tasanno, xon hazratlari! Buxoroda Temuriylar xizmatida bir bek boʻlib yurgan Shohbaxtxon sizning

koʻmagingizda qaddini tiklab, kimsan, Shayboniyxon boʻldi-ya!¹

- Lekin Shayboniyning oʻzi ham kallasi yaxshi ishlaydigan, pishiq, dovyurak odam ekan-da. Chirchiq daryosi boʻyidagi jangda jonini garovga qoʻyib, bizga qanday koʻmak bergani yodingizdami?
- Nega yodimda boʻlmasin, xon hazratlari? Oʻzim kechasi daryo boʻylariga borib vositalik qilgan edim-ku.

Xon bilan vazir ikkovlari uchun ham yoqimli boʻlgan oʻsha voqealarning tafsilotlarini eslab ketdilar.

Bu voqealarning orasida quda-andachilikning alohida oʻrni bor edi. Mahmudxonning otasi Yunusxon bir emas, uch qizini aka-uka Temuriylarga uzatgan edi. Ulardan oʻrtanchasi Ahmad mirzo – Samarqand podshosi, ikkinchi kuyov – Mahmud mirzo – Hisor hukmdori, uchinchi kuyov – Umarshayx mirzo – Fargʻona tojdori. Xonlar udumiga binoan, Yunusxon har bir qiziga mingdan ortiq moʻgʻul beklari, navkarlari, kaniz va xizmatkorlaridan qoʻshib yuborgan edi.

Ular kuyovning dargohiga oʻrnashib, kelinning xizmatini qilishar, ayni vaqtda, Temuriylarning ichki ishlariga aralashib, ularning oralarida nizo chiqishiga sabab boʻlar edilar.

Ana shu tarzda chiqqan nizolar tufayli Ahmad va Umarshayx mirzolar bir-birlari bilan Toshkentni talashib koʻp urushdilar. Qaynotalari Yunusxon ularni yarashtirish bahonasi bilan Moʻgʻulistondan Toshkentga kelib-ketib yurdi, axiri bu shaharga oʻrnashib oldi. Yunusxonning vafotidan soʻng, uning katta oʻgʻli Mahmudxon Toshkentni butunlay moʻgʻul xonlarining qarorgohiga aylantirdi.

Chingiziylar hukmronligining qayta tiklanishi koʻpchilik turonliklarni norozi qilmoqda edi. Samarqand podshosi Ahmad mirzo shu norozilar orasidan

¹ Shayboniyxon va Mahmudxon munosabatlari Mirzo Muhammad Haydarning «Tarixi Rashidiy» kitobida keltirilgan.

oltmish ming qoʻshin toʻplab, Toshkent boʻsagʻasida, Chirchiq daryosi boʻyida hal qiluvchi jangga tayyorlana boshladi. Jang arafasida Shayboniyxonning uch yuz kishilik navkarlariga Buxoro hokimi Abduali Tarxon boshchiligida juda mas'uliyatli vazifa yuklandi. Ularga qoʻshin markazida boʻlish va Ahmad mirzoning tugʻlarini, bayroqdorini qoʻriqlash topshirildi.

Oʻttiz olti yoshlik Shayboniyxon jang paytida bayroq va tugʻlar qanchalik ulkan ahamiyat kashf etishini yaxshi bilardi. Uning dili – oʻzi mansub boʻlgan sulolaning vakili Mahmudxon tomonida edi. Jang arafasida Shayboniyxon ishonchli bir xufiyasini Mahmudxon qarorgohiga yashiriqcha joʻnatdi. Bu xufiyaga quyidagi gapni aytib yubordi:

«Men ham Chingizxon naslidanmen, Temuriylarning ichki sirlarini bilurmen, agar Mahmudxon hazratlari lozim koʻrsalar, kechasi yashiriqcha Chirchiq boʻyiga kelsinlar, men bu tomondan oʻtib borurmen, ertangi jangda xonga gʻalaba keltiradigan bir rejaning maslahatini qilurmiz».

Bu xufiyaning gapi tayinlik ekanini taftish qilib bilgan eshik ogʻa Tilba Sulton uni Mahmudxon bilan uchrashtirdi. Soʻng Tilba Sulton bilan Mahmudxon yarim tunda daryo boʻyiga Shayboniyxon tayin etgan joyga bordilar. Shayboniyxon dadil yigit ekan, otni ham oqizadigan Chirchiq daryosidan kechasi suzib oʻtib keldi.

– Ahmad mirzo noshud sarkarda, – dedi u Mahmudxonga. – Uning ishongan amiri Abduali Tarxon ertaga boʻladigan jangda markazga – gʻulga tayin boʻldi. Podsho ham, uning tugʻlari, bayroqdori ham gʻulda boʻlur. Siz qoʻshiningizni daryo qirgʻogʻidan orqaroqqa olib, goʻyo chekinganday boʻlsangiz. Ular daryodan oʻtguncha, hammalari hoʻl boʻlib, saflari anchamuncha toʻzgʻiydir. Shunda men uch yuz navkarim bilan ularning bayroqdorlarini urib yiqitib, siz tomonga

qochib oʻtgaymen. Bayroq yerga tushib oyoqosti boʻldimi, qoʻshin yengilgan hisoblangay! Shunda siz hujumni kuchaytirursiz. Men ham navkarlarim bilan sizlar tomonda Ahmad mirzoga qarshi jang qilgaymen. Yogʻiyning orqasida toshqin daryo. Qochganlarining allaqanchasi suvga choʻkib halok boʻlur.

Shayboniyxonning bu rejasi Mahmudxonga ma'qul tushdi. Ertasi kuni jangda oʻsha rejaga amal qilgan Mahmudxon Ahmad mirzo ustidan gʻalaba qozondi. Shundan keyin Mahmudxon dadillanib, Oʻratepani ham Ahmad mirzodan tortib oldi-da, u yerga oʻzining qadrdoni boʻlgan moʻgʻul-dugʻlat amiri Muhammad Husaynni hokim qilib qoʻydi.

Chirchiq boʻyidagi jangda katta xizmat koʻrsatgan Shohbaxt – Shayboniyxon Mahmudxondan mukofot kutmoqda edi. Mahmudxon uni oʻz huzuriga chaqirib shunday dedi:

- Turkiston shahri hamon Temuriylar ilkida. Holbuki biz, chingiziylar, bu joylarni Chigʻatoyxondan meros olgan edik!
- Xon hazratlari, mening bobom Abulxayrxon ham Turkiston shahrini oʻziga mulk qilgan edi.
- Chunki poʻlat varaqqa bitilgan ahdnomaga binoan, xonlik masnadiga faqat Chingizxon avlodlari munosib koʻrilgan. Temurning bobokaloni Qorachor nuyon bu ahdnomaga imzo chekkan, ilohiy Tangri oldida xonlik da'vosidan voz kechgan. Doim xonlar xizmatida lashkarboshi amir boʻlib xizmat qilishga soʻz bergan. Amir Temur ham oʻzini xon deb atamaganku!
- Oʻzini xon deb atamagan-u, lekin xonlarni qoʻgʻirchoq qilib oʻynatgan! dedi Shayboniyxon alam bilan. Chingizxon naslidan boʻlgan Suyurgʻatmishxon, Mahmudxon deganlarni xoʻjakoʻrsinga oq kiygizga solib xon koʻtargan. Aslida bu xonlar uning xizmatini qilgan.

Faqat Toʻxtamishxon Temur bilan dadil olishgan, ammo omadi kelmay yengilgan. Oltin Oʻrda yer bilan yakson qilingan. Temur Moʻgʻuliston xonlariga qarshi bir emas, yetti marta yurish qilib, Chingizxon avlodlarini Chigʻatoy ulusidan butunlay siqib chiqardi. Uning oʻgʻli Shohruh bilan nevarasi Ulugʻbek chingiziylarni Turonga yoʻlatmay qoʻydi. Mana endi, oradan yuz yil oʻtgandan keyin Temuriylar davlati parchalanib, oʻzaro urushlardan batamom zaiflashdiyu, siz-u bizga omad keldi.

- Gapingiz toʻgʻri, janob Shohbaxtxon, Chigʻatoy ulusidan Temuriylarni siqib chiqarib, Chingiziylar hukmronligini qayta tiklash siz bilan bizning zimmamizga tushadir. Sayram-u Turkistonlar ham ikki yuz yil davomida Chingiziylar tasarrufida boʻlgan. Keyin Amir Temur Yassaviy maqbarasini qurib, bu yerlarga ega boʻlib oldi. Hozir ham Turkiston Temuriylarga sadoqat saqlab turibdir. Men sizga uch ming kishilik sara qoʻshin beray. Bobongiz Abulxayrxonning mulkini Temuriylardan qaytarib oling!
- Minnatdormen, xon hazratlari! Turkistonni Temuriylardan tortib olib, sizning davlatingiz tarkibiga qoʻshish mening orzuyimdir! Siz barcha Chingiziylarga rahnamo boʻlgaysiz! Mening ezgu niyatim sizning yoʻlboshchiligingizda Chingiziylarning ulugʻ saltanatini qayta tiklamoqdir!
- Mana bu niyat tahsinga sazovor, janob Shohbaxtxon. Ammo zamonlar oʻzgardi. Siz bilan biz ham Chingizxon davridagi moʻgʻullar emasmiz. Islomni qabul qildik. Turkiy til ona tilimizga aylandi. Mana, siz madrasada oʻqidingiz. Biz ham forscha, arabcha oʻrgandik. Kiyim-kechak, oziq-ovqat, uy tutish, hayot tarzi hammasi oʻtroq turkiy aholinikidan farq qilmagani yaxshi boʻldi. Chunki bu hammasi bizning Turonzaminda otgan yangi ildizlarimizga aylandi.

- Ammo oʻq ildizimiz Chingizxon naslidan ekanligimizdir! gap qoʻshdi Shohbaxtxon.
- Ha, ana shu oʻq ildizni mahkam tuting, ammo Turonzaminga otgan yangi ildizlaringizdan ham oziqlaning!
- Mening dilimdagi gapni aytdingiz, xon hazratlari. Men oʻz atrofimga Turondan ham, Dashti Qipchoqdan ham barcha turk-moʻgʻul qavmlarni yigʻmoqdamen. Bularning biri qipchoq, biri nayman, biri qoʻngʻirot, biri jaloyir, ammo hammalarini «oʻziga-oʻzi bek oʻzbek» degan chiroyli nom bilan atasam, koʻpchiligiga ma'qul tushdi. Oralarida Qur'onni menchalik yaxshi qiroat qiladigan imomlari yoʻq. Shuning uchun hammalari meni «Imomi zamon!» deb tan olurlar!
- Koʻpchilikning boshini qovushtirish uchun nimayiki zarur boʻlsa, hammasini qiling. Eng muhimi, ahillikdadir. Oʻzaro urushlar Temuriylarning boshiga yetmoqda. Siz bilan biz bir yoqadan bosh chiqarsak, Islom bayrogʻini Temuriylardan koʻra balandroq koʻtarsak, barcha musulmonlar bizga ergashgay!
- Toʻgʻri aytdingiz, hazratim! Hozir bobokalonimiz Chingizxonning mafkurasi bilan ish yuritib boʻlmagay! Endi faqat islomning sunniy mazhabi bizga mos kelur. Mahmudxon Shayboniyxonning bu fikrini ham ma'qul koʻrdi. Ularning maslakdosh ekanliklari, ayniqsa Shayboniyxonga qoʻl keldi. Mahmudxonning yordami bilan Shayboniyxon avval Turkistonni, soʻng Buxoroni noshud temuriyzoda Sulton Ali mirzodan tortib oldi. Vaziyat yetilishi bilan Shayboniyxon Samarqandni ham egallaydi. Uning homiysi Mahmudxon bundan mamnun. Shayboniyxonga rahnamo boʻlib butun Turonda, undan soʻng Xuroson-u Eronlarda ham Chingizxon avlodlarining shon-u shuhratini, davlat-u hokimiyatini qayta tiklash Mahmudxonning eng ulkan orzusidir. Buni yaxshi biladigan Tilba Sulton:

– Ilohim, ana shu orzuyingiz tezroq roʻyobga chiqsin, xon hazratlari! – deb tilyogʻlamalik qila boshladi. – Siz Sohibqiron a'zam Chingizxonning dahosini meros olgansiz. Ona tomondan Iskandar Zulqarnayn avlodlaridan ekansiz! Muhtarama volidangiz Shohbegim menga soʻzlab berdilar.

- Ha, ona tomondan bobomiz Shoh Muhammad hazratlari buyuk yunon podshosi Iskandar Zulqarnaynning Pomirda qolib ketgan avlodlaridan ekanlar. Rahmatlik otamiz Yunusxon Shoh Muhammad hazratlari bilan Badaxshonda tanishgan ekanlar.
- Qarang, xon hazratlari, Xudo suygan bandasiga qoʻsha-qoʻsha qilib berar ekan-da! Hali kelajakda Badaxshon ham sizga meros boʻlib qolgʻay. Toshkent-u Andijon-u Fargʻonalar sizga buyuk Chingizxondan merosdir. Inim Ahmadbek Fargʻona vodiysida orttirgan boyligini toʻqqiz tuyaga yuklab, sizga in'om qilib yuborgani shu boisdandir. Oltin-u javohir, kimxob-u atlas...
- Koʻrdim! Ahmadbekning saxovati durust. Lekin u haligacha norasida bir temuriyzoda Jahongir mirzo xizmatida yurgani gʻalati.
- Bu hammasi noilojlikdan, xon hazratlari. Qani edi, siz katta oʻgʻlingiz Xonikaxonni inim Ahmadbekka yordamga yuborsangiz. Birgalashib temuriyzodalarni daf qilsak. Ana unda Fargʻona vodiysi sizning oʻgʻlingizga tobe boʻlgʻay. Ahmadbek to oʻlguncha sizga-yu oʻgʻlingizga sodiq xizmat qilgʻay.
- Mana bu reja haqida oʻylab koʻrsak boʻladi, dedi Mahmudxon. Boburga avom xalq tarafdor boʻlib isyon koʻtargani, bizning odamlarni vodiyning shahar-u qishloqlaridan quvib chiqargani menga yoqmaydi!
- Siz ming bora haqsiz, xon hazratlari! Mening inim Ahmadbek oʻsha avomlarning yoʻlini toʻsib turibdir. Agar Ahmadbek magʻlub boʻlsa, bu isyonlar shunday togʻdan oshib, Toshkentga yetib kelishi muqarrar!

Bu yerda ham Temuriylar davrini qoʻmsab yurgan alamzadalar oz emas. Buni xufiyalar axborotidan ham bilursiz. Xudo koʻrsatmasin, agar ichkarida pusib yotgan gʻanimlaringiz bosh koʻtarsa, naryoqdan Bobur Amir Temurning qilichini yalangʻochlab kelsa...

- Yoʻq, yoʻq, bunga mutlaqo yoʻl qoʻymasligimiz kerak! Ayting-chi, Ahmadbek Fargʻona vodiysini bizning davlatimiz tarkibiga qoʻshmoqchi ekani – shunchaki gapmi yoki asosi bormi?
- Asosi bor! Mana, Ahmadbek oʻz ilki bilan sizga maktub yozgan! Agar uni hozirgi xavf-xatardan saqlab qolsangiz, inim umrbod sizning xizmatingizni qilgusidur. Andijon-u Axsini Temuriylar nomidan emas, sizning nomingizdan idora etishga soʻz bergan!

Mahmudxon Ahmad Tanbalning imzosi qoʻyilgan va muhri bosilgan maktubni oʻqib koʻrdi-da, oʻzining maxsus qogʻozlari saqlanadigan juzdonga solib qoʻydi.

Xonning yon berayotganini sezgan Tilba Sulton qoʻlini koʻksiga qoʻyib, iltijo qildi:

- Xon hazratlari, oʻn besh ming lashkaringiz koʻpdan beri kuch yigʻib yotibdir. Katta oʻgʻlingiz Xonikaxon ham yigit boʻlib qoldi. Ulkan gʻalabalarga erishgilari kelur...
- Qish kunida oʻn besh ming qoʻshinni boshqarish oson emas. Farmon hozirlang, Xonikaxon olti ming lashkar bilan harbiy yurishga otlansin. Ammo bu yurishning butun mas'uliyati sizning zimmangizga tushadir, janob eshik ogʻa!
 - Boshim bilan javob berurmen, xon hazratlari!
- Ana shu soʻzlaringizni ahdnoma tarzida yozib, imzo cheking!
 - Bosh ustiga!

Mazkur ahdnomaga binoan Mahmudxonning olti ming kishilik qoʻshini Ahmad Tanbalni qutqarish uchun Archakent dovonidan oshib, Kosonsoy atroflariga bostirib keldi. Arxiyon qoʻrgʻonini qamal qilayotgan Bobur endi asosiy kuchlarini Kosonsoy tomonga burishga majbur boʻldi. U Ahmad Tanbalga keladigan har qanday koʻmakning yoʻlini toʻsmoqchi, kerak boʻlsa, togʻasining oʻgʻli Xonikaxon bilan ham olishmoqchi edi.

Bu xabar Axsida turgan Qutlugʻ Nigor xonimga va uning keksa onasi Eson Davlat begimga ham yetib bordi. Onalar togʻa-jiyan orasida urush boshlansa juda koʻp begunoh qonlar toʻkilishidan iztirobga tushib, avval Axsidan Kosonsoyga bordilar, Tilba Sulton bilan Xonikaxonni yaxshilikcha Toshkentga qaytishga undab koʻrdilar. Biroq olti ming qoʻshinning kuchiga ishongan Tilba Sulton Mahmudxonning nomidan bir qancha ogʻir shartlarni oʻrtaga qoʻydi:

– Bobur mirzo qoʻshinini Andijon tomonga olib ketsinlar. Axsi bilan Sirdaryoning oʻng qirgʻogʻidagi hamma joylar avvalgiday Jahongir mirzo ixtiyorida qolsin. Ana undan soʻng biz qoʻshinni Toshkentga olib qaytgaymiz.

Qutlugʻ Nigor xonim onasi bilan Kosonsoydan Namanganga, Bobur qarorgohiga keldilar. Sakkiz burchaklik katta oq oʻtovda Bobur oʻng yoniga onasi va buvisini e'zozlab oʻtqazdi. Uning chap yonidan Qosimbek va Ali Doʻstbek oʻrin oldilar. Onalar keltirgan noxush xabardan otashin boʻlgan Bobur kuyunib soʻz boshladi:

– Biz Tanbal tufayli shuncha jabr koʻrdik, ikki yil sargardon boʻldik, xon togʻamiz bizga bironta ham navkarini yordamga yubormadi. Tanbal oʻz qilmishiga yarasha hamma joydan quvilib, tor-mor boʻlayotgan paytda xonning olti ming qoʻshini uni qutqarish uchun togʻ oshib, yetib kelibdi! Buni qanday tushunmoq kerak, hazrat momojon? Qani bu yerda adolat?!

Qutlugʻ Nigor xonim xon ogʻasining qilmishidan xijolat boʻlib yerga qaradi.

Eson Davlat begim tomoq qirib qiynalib gapirdi:

- Amirzodam, adolat siz tomonda. Lekin Mahmudxonning eshik ogʻasi Tilba Sulton oʻta mugʻambir odamda. Xonni shu odam qoʻshin yuborishga koʻndirgan. Biz Kosonsoyda ular bilan soʻzlashdik. Maqsadlari urushish emas. Iningiz Jahongir mirzo bilan sizni yarashtirib qoʻyishmoqchi.
- Men Jahongir bilan emas, Tanbal bilan olishmoqdamen. Mayli, Jahongir hali bola, uzr soʻrab kelsa u bilan yarashaylik. Ammo Tanbalni qamaldan boʻshatmagaymiz! Bu qotil oʻz qilmishlari uchun javob bermogʻi kerak!
- Biroq Tanbal Jahongirning otaligʻi-ku! Biri bilan yarashsangiz, ikkinchisi bilan ham yarashmogʻingiz kerak boʻlur, dedi Ali Doʻstbek. Bundan tashqari, Ahmad Tanbal ham Chigʻatoyxon avlodlaridandir. Xon togʻoyingiz shuning uchun uning himoyasiga katta qoʻshin yubormishdir!
- Ha, ana, kosa tagidagi nimkosa endi koʻrindi! dedi Qosimbek. Mahmudxon hazratlari Temuriylarga oʻgay koʻz bilan qaraydirlar. Amirzodam, men buni koʻpdan beri kuzatib yuribmen. Toshkentda, Buxoroda, Turkistonda sizning tarafdorlaringiz, bizga haqiqatni yetkazib turuvchi xufiyalarimiz bor. Ular Mahmudxonning Shayboniyxonga yon bosayotganligi bejiz emasligini ma'lum qilmoqdalar. Asli Chingizxon naslidan boʻlgan bu xonlar hozir Temuriylarga qarshi til biriktirganlar. Ular nafaqat Toshkent-u Fargʻonada, balki butun Turonda Chingizxon avlodlarining hukmronligini qayta tiklamoqchilar!

Bu gaplardan Qutlugʻ Nigor xonimning yuzi qizarib, koʻzlari chaqnab ketdi:

– Men ham Chingizxon naslidanmen! Siz bizni Mahmudxonga qoʻshib oʻgʻlimiz Bobur mirzodan begona qilmoqchimisiz?!

– Meni afv eting, xonim hazratlari! Siz Bobur mirzoga Amir Temur qilichini, uning ruhiy madadini yetkazib berib, olijanob ishlar qildingiz!.. Salkam ikki yil barcha sargardonliklar azobini siz amirzodam bilan birga tortdingiz. Shunchalik qiynalgan paytlaringizda Mahmudxon ogʻangiz sizga ham yon bosmadi-ku!

- Bu rost! dedi Eson Davlat begim. Mahmudxon boshqa onadan tugʻilgan. Uning onasi Shohbegim Badaxshi menga kundoshlik qilur, bizni koʻrarga koʻzi yoʻq. Ana shuning ta'sirida Mahmudxon bizga oʻgaylik qilishi mumkin. Ammo buning uchun barcha Chingiziylarni Temuriylarga dushman qilib koʻrsatishingiz notoʻgʻri, janob Qosimbek!
- Meni ma'zur tuting, «barcha xonlar» deganim yoʻq. Faqat Mahmudxon bilan Shayboniyxonni, yana Ahmad Tanbalni nazarda tutdim!
- Bular ham siz-u biz kabi turkiy tillik musulmonlarku! – deb gap qoʻshdi Ali Doʻstbek. – Ayirmachilik qilish kimga kerak?
- Ayirmachilikni biz emas, ular qilishmoqda! dedi Bobur. Men tarix kitoblarida oʻqidim. Eng qadimiy bobokalonimiz Oʻgʻizxonning Kunxon, Oyxon, Togʻxon degan oʻgʻillari boʻlgan ekan. Shulardan boʻlgan farzandlardan biri Yulduzxon deb atalgan. Qarang, hammasi turkiy nomlar! Ana shu Yulduzxonning nevarasi afsonaviy ayol Alanquva qurlos urugʻidan ekan. Qurlos barlosga qon-qarindosh. Nomi ham uyqash. Men buni Mirzo Ulugʻbekning «Toʻrt ulus tarixi» kitobida oʻqidim. Ilohiy ruhdan homilador boʻlib oʻgʻil tuqqan Alanquva turkiy qavmlarning afsonaviy onasi sanalarkan.
- Ha, rost, deb bu gapni Eson Davlat begim ma'qulladi, – otalari moʻgʻul qavmidan boʻlgan Chingizxon ham Alanquvani oʻzining momokaloni deb bilgan. Shunday boʻlgach, Chingiziylarni Temuriylarga

ashaddiy dushman deb ta'riflash adolatdan emas-da, janob Qosimbek!

- Ammo bu ikki sulola tarixda bir-biri bilan ozmuncha yogʻiylashganmi, hazrat begim? Hokimiyat uchun kurashda ogʻa-ini, qarindosh-urugʻ bir-birini ayamaganligi hech kimga sir emas-ku!
- Bobur mirzo oʻz ajdodlarining yogʻiylashgan davrlaridan emas, inoq boʻlgan davrlaridan ibrat olmoqlari kerak! dedi Eson Davlat begim. Hazrati Amir Temurning bobokalonlari Qochuvli bahodir bilan hazrati Chingizxonning bobokalonlari Qobulxon inoq boʻlish haqida ahd-u paymon qilishib, poʻlot kitobga buni oʻyib yozdirgan ekanlar.
- Xoʻp, bu ahdnomani kimlar mudom buzib kelmoqda, hazrat momo? Sohibqiron bobokalonimiz Amir Temur Joʻjixon avlodidan boʻlgan Toʻxtamishxonga qancha yaxshiliklar qilganini bilurmisiz?
 - Bilurmiz, ammo...
- Endi shoshmang! Toʻxtamishxon nechun bu yaxshiliklarga yomonlik bilan javob berdi? Nechun Amir Temur davlatiga qarshi tajovuzlar qildi? Chunki Toʻxtamishxon Oltin Oʻrdaga xon boʻlgandan keyin atrofidagi xushomadgoʻylari uni hovliqtirdi. «Siz Chingizxon naslidansiz, sizning martabangiz Temurbeknikidan baland, davlatni faqat siz boshqarishingiz kerak, Temurbek lashkarboshi boʻlib, sizga xizmat qilishi kerak!» degan aqidaga uni ishontirishdi!..
- Axiyri, bu aqida Toʻxtamishxonning boshiga yetdi, buni biz yaxshi bilurmiz, – dedi Eson Davlat begim.
- Ammo, siz bu aqidaning hali ham tirik ekanini bilmasangiz kerak, hazrat begim! deb Qosimbek Boburga yon bosa boshladi: Bizga kelgan maxfiy axborotlar bor. Tilba Sulton hazrati Mahmudxonga xushomadlar qilib, Ahmad Tanbalning hadyalarini berib, xuddi shu aqida asosida bizga qarshi qoʻshin yuborishga xonni koʻndiribdur!

– Aygʻoqchilarning axborotiga muncha inonmang, janob eshik ogʻa, – deb e'tiroz qildi Ali Doʻstbek. – Hazrati Mahmudxon Tilba Sultonning aqli bilan ish qiladigan zaif tojdor emaslar. Ul zot bugungi Chigʻatoy ulusining eng qudratli sultonidurlar!

- Bugungi Chigʻatoy ulusi? hayron boʻlib soʻradi Bobur. Toʻgʻri, ona tomondan biz ham Chigʻatoyxonga avlodmiz. Men hazrat onamni ardoqlab, boshimga koʻtarurmen. Ammo Chigʻatoyxondan ming yillar oldin Turon, Turkiston deb nomlangan muazzam zaminni hanuzgacha Chigʻatoy ulusi deb atashga hech bir asos koʻrmaymen! Axir Chigʻatoyxon Turonda biron yil yashamagan, bironta tarixiy obida qurdirmagan, biron joyni obod qilmagan! Aksincha, obod joylarni xarobaga aylantirgan, toʻgʻonlarni buzdirib, shahar-u qishloqlarni suvga bostirgan!
- Toʻgʻonlar hazrat Chingizxonning farmoni bilan buzdirilgan, shekilli, deb gap qoʻshdi Eson Davlat begim.
- Harqalay, barcha qirgʻinlar, buzgʻunchiliklarga Chigʻatoyxon ham katta ulush qoʻshgan, davom etdi Bobur. Tarix kitoblaridan oʻqidimki, Chingizxon oʻziga ham bironta yodgorlik qurdirmagan ekan. «Oʻlsam, tekis yerga dafn qilinglar, qabrim ustidan mingta ot yurib oʻtsin, toki koʻmilgan joyimni hech kim topolmasin», degan ekan. Vafot etganidan keyin xuddi uning aytganini qilishibdi. Mingta ot uning qabrini toptab oʻtibdi. Haligacha uning qabrini hech kim topolmas emish.
- E'tiqodi shunday boʻlgan ekan-da, dedi Eson Davlat begim. – Doim oʻtovda yoki otda, tabiat bagʻrida boʻlishni istarkan. Shaharlarni, qoʻrgʻonlarni yomon koʻrarkan.
- Begunoh shaharliklarni-chi? soʻradi Bobur. Tabiat bilan hamkorlik qilib choʻllarga suv chiqargan, bogʻ-rogʻlar bunyod qilgan butun oʻtroq aholini

nechun ayovsiz qirgan? Turon xalqining dodi Parvardigorga yetgan ekanki, Amir Temurdek bir najotkorni yuboribdir. «Biz Chingizxon naslidanmiz!» deb koʻkraklariga urib, maqtanib yurganlar bilsinlar! Nasl-nasab bilan maqtanish zaiflik belgisidir! Oʻzining ilkidan yaxshi ish kelmaydiganlar mudom nasl-nasablari bilan kerilurlar. Ammo odamning kimligini qilgan ishi-yu avlodlarga qoldirgan merosi koʻrsatgay. Chingizxondan, Chigʻatoyxondan, Toʻxtamishxondan qanday meros qoldi-yu, Amir Temurdan, Shohruxdan, Ulugʻbekdan qanday meros qoldi? Bir qiyoslab koʻring! Adolat kim tomonda ekani shunda darhol bilinur! Bahsga aralashmay boshini egib jim oʻltirgan Qutlugʻ Nigor xonim oʻgʻliga mehr toʻla koʻzlar bilan qaradi-da:

- Siz haqsiz, Boburjon! dedi. Bugun boʻlmasa ertaga haq joyida qaror topgay. Men shunday pahlavon, haqgoʻy, bahodir oʻgʻlim borligi bilan iftixor qilurmen. Siz oʻz nomingizga munosib sher yigitsiz. Ammo Ahmad Tanbal bilan uning ogʻasi chiyaboʻriga oʻxshaydilar. Siz oʻshalar bilan teng boʻlmang, ular tufayli xon togʻoyingiz bilan orani buzmang, sulh taklif qilishsa, yarasha qoling, bolam!
 - Qaysi shart bilan yarashaylik? soʻradi Bobur.
- Axsi Jahongir mirzoda qolsin, mayli deng. Saxiy boʻling!
- Iye, ikki yil jon chekib olishganlarimiz bekor ketgaymi? – norozi boʻlib soʻradi Qosimbek Boburdan. – Otangizdan qolgan yaxlit davlat yana parchalansinmi?!
- Agar bunga koʻnmasangiz Mahmudxon yuborgan qoʻshin bilan jang qilurmisiz?! – tahdid qilib soʻradi Ali Doʻstbek.

Qosimbek ham unga tik javob berdi:

- Agar amirzodam buyursalar, jangga tayyormiz!
- Oldinda Mahmudxon! Orqada Tanbal! Siz
 amirzodamni ikki oʻt orasiga tashlamoqchimisiz?!
 soʻradi Eson Davlat begim ham qizishib.

Bobur mirzoga nuqul xonlarni yomonlab, ikki orani buzmoqdasiz-ku, janob Qosimbek!

- Men haqiqatni aytdim, xolos, hazrat begim!
- Siz haqiqat degan narsa aygʻoqchilarning yolgʻonyashiq igʻvolaridir!

Ali Doʻstbek bu da'voni yana bir parda baland koʻtardi:

– Janob Qosimbek shu igʻvolarga tayanib, xonlarga tuhmat qilmoqdalar!

Bobur oraga tushdi:

- Janob Do'stbek! Hazrat momo! Qizishmangizlar!
 «Tuhmat!» degan gap Qosimbekka juda og'ir botdi.
 U Boburdan himoya istardi. Ammo Bobur momosi bilan Do'stbekni yanada asabiylashtirmaslik uchun Qosimbekni ochiqchasiga yoqlay olmadi:
- Janob Qosimbek, oʻylab koʻraylik, dedi. Balki biron murosa yoʻli topilar!

Qosimbek oʻzini bosolmadi:

- Men Tanbal bilan murosa qilolmagaymen! Amirzodam, menga ijozat bering, bu yerdan ketay! Sizga qachon kerak boʻlsam, chaqirtirsangiz yana kelgaymen! Ammo hozir... tuhmat balosidan Xudo asrasin! Hazrat begim, xonim hazratlari, uzr soʻraymen!

Qosimbek borgohdan choʻgʻday qizargan, asabiy bir alpozda chiqib ketdi.

Yana Qutlugʻ Nigor xonim oʻgʻliga muloyimlik bilan gap qotdi:

- Oʻylab koʻring, Boburjon! Kosonsoyda xon togʻoyingizning olti ming qoʻshini turibdir. Agar siz bu qoʻshin bilan jang qilib, uni yengsangiz... togʻoyingiz jim qarab turmagay... Orqadan yana oʻn ming, balki yigirma ming qoʻshin bilan oʻzi yetib kelgay!.. Unda ne qilursiz?..
- Men togʻoyim bilan jang qilmoqchi emasmen... Faqat Tanbalning qanday xoin ekanini xonlar ham bilsalar edi!..

Vaqt oʻtishi bilan bilib qolarlar, – dedi Qutlugʻ
 Nigor xonim. – Sizga xiyonat qilgan Tanbal xonga ham xiyonat qilmay turolmagay. Xoʻja Abdulladay pirni osib oʻldirgan qotilga qasos qaytmay qolmas!

Bobur oʻylanib jim qolganidan foydalangan Ali Doʻstbek gapni kutilmagan tomonga burdi:

- Ikki yildan buyon siz koʻp azob tortdingiz, amirzodam! Endi bu dunyoning rohatini ham koʻrishingiz kerak. Yoshingiz oʻn sakkizda, alpqomat yigitsiz. Ayni uylanadigan paytingiz. Qayligʻingiz Oyisha begim ham oʻn oltiga toʻlib, sep yigʻmoqda emishlar.

Mavzu oʻzgarganidan jonlangan Eson Davlat begim Oyisha begimni ta'riflay ketdi:

– Borib koʻrganlar mahliyo boʻlib gapirganlarini men oʻzim eshitdim! Egachilari Qorakoʻz begimning goʻzalligi ta'rifga sigʻmas edi. Oyisha begim egachisidan ham koʻhliroq boʻlib yetilibdur!

Boburning urush-janjallar qahratonidan junjikkan qalbiga birdan bahorning iliq shabadasi tekkanday boʻldi. Oʻzi yozgan gʻazalning satrlari:

«Jamoling vasfini, ey oy, necha eldin eshitgaymen? Ne kun boʻlgʻay visolingga meni dilxasta yetgaymen?»

degan savollar dilida goʻyo nay navosiga qoʻshilib eshitildi. Agar togʻasi Mahmudxon bilan yovlashsa, Toshkentdagi Oyisha begimning taqdiri nima boʻladi? Yana Samarqanddagi kabi arosatga tushadimi?

- Xudo saqlasin! dedi Eson Davlat begim. Urush boshlansa, Qayligʻingizni garovga olib, azob bergaylar! Lekin sulh tuzilsa, xon togʻangiz kelinimiz Oyisha begimni seplari bilan Andijonga xush-u xursand joʻnatmoqchi ekanlar!
- Oh, qani, yolgʻiz oʻgʻlimning toʻylarini koʻrsam! deb orziqib xitob qildi Qutlugʻ Nigor xonim.

Bobur shuncha vaqtdan beri bir koʻrishga mushtoq boʻlib yurgan qalligʻiga yetishadigan kunlarni koʻz oldiga keltirdi-yu, muloyim boʻlib qoldi. Onalar Andijonda boʻladigan toʻy shodiyonasidan el-yurt ham tinchib, bir yayrab olishini aytishdi va nihoyat Boburni Ahmad Tanbal bilan sulh tuzishga koʻndirishdi.

3

Javzo oyining iliq oqshomlaridan birida Andijon arkidagi haramda ikki oylik kelinchak Oyisha begimning xobgohida kanizlar shohona toʻshakka gul atri sepdilar. Oltin-kumush buyumlar va ipak gilamlar bilan bezatilgan tanobiy uyning eshigi oldiga chiroyli poyandoz toʻshaldi. Oyisha begimning qoʻllariga xina, qoshiga oʻsma qoʻyilgan edi. Goʻzal kelinchakning boshqa pardozlari endi tugaganda kanizlardan biri quvonib shivirladi:

- Keldilar!

Ayvonda boshiga oltin jigʻa kiygan Bobur koʻrindi. Soʻnggi yillarning tinimsiz olishuvlari uni xiyla pishitgan. Yelkalari toʻlishib, oʻn sakkiz yoshli durkun yigitga aylangan. Xobgoh oldida Boburni ta'zim bilan kutib olgan oʻn olti yoshli Oyisha begim kuyovga nisbatan kichkinagina, ingichkagina koʻrinadi. Uning boshiga kiygan serbezak baland toqisi, boʻyniga taqilgan zebigardon va marjonlar nozik qomatiga ogʻirlik qilayotgandek tuyiladi. Kanizlar ta'zim qila-qila chiqib ketdilar. Bobur ulardan ba'zilarining koʻzlari shoʻx chaqnaganini payqab, oʻngʻaysizlanadi. Kuyov haramda tunaydigan tunni kanizlar-u savdarlar oldindan bilib, maxsus tayyorgarlik koʻrishi, xobgohga shuncha odamning kirib-chiqishi unga noxush tuyiladi.

Buning ustiga Oyisha begim haddan ortiq uyatchan. U Boburni: - Marhabo, hazratim! - deb toʻrga taklif qilganda, ovozi hayodan titrab, zoʻrgʻa eshitildi.

Uyning toʻrida – harir parda ortida ikki kishilik baland toʻshak bor. Oyisha begimning uyatchanligi Boburni battar oʻngʻaysizlantirdi. U yuqoriga oʻtib oʻtirayotganda, toʻrdagi toʻshakka qaramaslikka tirishdi. Koʻzini dasturxonga tikib:

- Xushvaqt yuribsizmi, begim? deb soʻrashdi.
- Shukr.

Oyisha begim azbaroyi tortinganidan dasturxonning Boburdan eng uzoq chetiga oʻtirdi. Soʻngra oraga noqulay jimlik choʻkdi.

Oyisha begim xushsurat boʻlsa ham, hali yetilmagan norasida qiz edi. Ota-onasidan erta ajralgan bu qiz koʻp kasalga chalinib ozib ketgan. Bir vaqtlar Bobur uni koʻrmasdan oldin xayolida tasavvur etib yurgan afsonaviy parizod butunlay boshqa edi. Xayol bilan hayot orasidagi farq qanchalik katta boʻlishini Bobur endi bildi.

Urf-odatga binoan ular bir-birlarini to'ydan so'ng goʻshangada birinchi marta koʻrdilar. Ular hali biror marta hamsuhbat boʻlmaslaridan va ruhan vaqinlashishga ulgurmaslaridan oldin boshlangan jismoniy yaqinlik Boburga uyat ishdek tuyilar va uning ilgarigi musaffo tuygʻularini poymol qilayotganday boʻlardi. Shuning uchun kechalari davlat ishlari bilan boʻlib, koʻpincha oʻzining xobgohida tunab qolardi... Hukmdorlik udumiga binoan uning faqat ba'zi tunlarni xotini bilan o'tkazishi rasm-rusumga xilof hisoblanmas, Boburning otasi Umarshayx mirzo ham shunday qilardi. Lekin yosh kelin-kuyov orasida avvalgi xayoliy orzu bilan hozirgi ahvolning keskin farqidan kelib chiqqan noxush bir murakkablik borligini Ovisha begim ham payqar va oʻzini Boburga nomunosib sezib ich-ichidan iztirob chekardi. Oyisha begim oraga

tushgan noqulay jimlikda qirmizi choynakdan piyolaga choy quyib, tavoze bilan Boburga uzatdi.

Bobur piyolani olayotganda, Oyisha begimning hali uncha toʻlishmagan ozgʻin qoʻllari titrab ketganini koʻrdi.

- Rahmat, - deganda, unga oʻz ovozi ham gunohkorona tovlanib eshitildi.

Bobur bir vaqtlar xayolida ardoqlab, oyogʻiga bosh qoʻygisi kelib gʻazal yozgan qalligʻini endi bunchalik uyaltirayotgani uchun oʻzini ham gunohkor sezardi.

Choshnagir ayol chinni laganda zira hidi kelayotgan kabob koʻtarib kirdi. Yoshi ellikka borgan boʻlsa ham durrani chakkasiga qiya qilib oʻragan bu shaddod ayol kelin-kuyovdagi uyatchanlikni sezib, hazil qildi:

– Amirzodam, yigit kishi yosh kelinchakni gapga solib oʻtirishi kerak emasmi? Qiziq-qiziq hangomalardan soʻzlab bering. Samarqanddan elchilar kelgan emish. Qanday xushxabarlar bor?

Choshnagir ayol laganni kelin-kuyovning oʻrtasiga qoʻyib, kumush sovrini¹ ochdi. Oq kiyik goʻshtidan tayyorlangan toza kabobning hidi zira hidiga qoʻshilib atrofga taraldi.

– Begim, siz ham ochilibgina oʻtiring. Bunday baxtli yoshlik bir marta keladir. Zavqini surib qoling, aylanay begim, bizga oʻxshab keksayganingizda eslab yurarsiz!

Choshnagir ayol kulib, chiqib ketdi. Uning: «Zavqini surib qoling» degan soʻzlari Oyisha begimdagi uyatchanlikni kamaytirish oʻrniga battar oshirgan edi. Bobur esa bir oz dadillanib:

- Qani, begim, dedi. Lagan ustiga qoʻl choʻzdi-yu, lekin Oyisha begim kabobga qoʻl uzatishini kutdi.
 - Siz boshlang, shivirladi kelinchak.
 - Xoʻp, mana. Qani, endi, siz...

¹ Sovri – ovqat sovib qolmasligi uchun ustiga yopiladigan maxsus idish.

Shu tarzda bir oz kabob yeganlaridan keyin yana choyga oʻtdilar.

- Begim, shahringizni sogʻinganingiz yoʻqmi?

Oyisha begim endi Boburning yuziga botinibroq qaradi:

- Samarqandnimi?.. Sogʻindim.
- Agar nasib qilsa, yozda Samarqandga qaytursiz.
- Koshki edi... Biroq men... oʻzim keturmenmi?
- Yoʻq, Samarqand nasib boʻlsa, bu yerdan hammamiz koʻchib keturmiz.
 - Koʻchib?.. Andijon kimga qolur?

Bobur horg'in tovush bilan:

Hozircha Ahmad Tanbal bilan Jahongir mirzoga,dedi.

Oyisha begim hech narsaga tushunolmay taajjublanib qoldi. Bobur Andijonni qayta qoʻlga kiritguncha ozmuncha aziyat chekdimi? Endi nechuk Andijonni ixtiyoriy ravishda tashlab ketmoqchi?

– Men Samarqandni sogʻingan boʻlsam ham, – dedi Oyisha begim, – lekin sizning ota yurtingizda osuda yashashni afzal koʻrurmen!

Oyisha begim boyagi uyatchanligini unutib, ochilib gapira boshlaganida, Boburga uning yuzi avvalgidan jozibaliroq koʻrindi.

- Sizdan ham oʻtinamen, hazratim, davom etdi Oyisha begim, – koʻp azob tortgansiz. Samarqand sizga jangsiz darvoza ochmas. Endi oʻzingizga rahm qiling. Urushga bormang, oʻtinamen!
- Begim, bu yerdagi hozirgi ahvolimiz sizga ham munosib emas, menga ham.
- Nechun bunday dedingiz? Axir siz oʻz yurtingizda podshohsiz-ku.

Bobur kinoyali kulimsirab, bosh chayqadi:

- Hozir faqat nomim podshoh, - deb qoʻynidan bir varaq buklangan qogʻoz oldi-da, Oyisha begimga uzatdi.

Soʻnggi oylarda Bobur koʻngil dardlarini qogʻozga tushirishga koʻp ehtiyoj sezar va deyarli har kuni she'r mashq qilar edi. Bu qogʻozda uning shu bugun yozgan bir qit'asi bor edi. Oyisha begim qogʻozni ochib, satrlarga koʻz yugurtirdi:

Qolmadi hurmat ahli olamda, Olam-u olam ahlidan yuv ilik. Boburo, ikki podshohligʻdin Yaxshiroq bu zamonda bir beklik.

- Hazratim, she'ringiz muborak bo'lsin!
- Qulluq. Endi mening dardimni tushungandirsiz?
- Tushundim. Siz Jahongir mirzoning Axsida ikkinchi podshoh boʻlib olganidan dard chekmoqdasiz. Ilgarigi yagona davlat ikkiga boʻlingan...
- Begim, gap faqat Jahongirda emas, hozir Ali Doʻstbek bilan Ahmad Tanbal bizni oʻrgimchak toʻriday chirmab kelurlar, – dedi Bobur Oyisha begimga. – Agar biz shu oʻrgimchak toʻrini yorib chiqib ketmasak, keyin bularga yemish boʻlurmiz!
- Hazratim, Samarqandda ham yogʻiylaringiz behisob. Yana urush boshlansa...
 - Samarqandda hozir doʻstlarimiz ham oz emas.
 - Kelgan elchi sizni poytaxtga chorladimi?

Bobur elchi bilan boʻlgan gaplarni hozircha juda maxfiy tutishi zarur edi.

Samarqand beklari bilan Sulton Ali mirzo orasida nifoq kuchaygan. Mazid tarxon boshliq beklar mingdan ortiq navkarlari bilan shaharni tashlab chiqqanlar. Ular Urgutda Boburga muntazir turgan emishlar. Yaqinda Buxoroni zabt etgan Shayboniyxon endi Samarqandga koʻz tikkan emish. Agar Bobur tezda yetib bormasa, Sulton Ali mirzo poytaxtni Shayboniyxonga berib qoʻyishi aniq. Shayboniyxonning berahmliklarini koʻp eshitgan odamlar undan qoʻrqib, endi shahar

darvozalarini Boburga pinhona ochib bermoqchi emishlar. Bobur mana shu qulay paytdan foydalanib qolishni istaydi.

- Elchi bizni chorlagani rost, deb, u Oyisha begimga umumiyroq javob qildi. Ammo Sulton Ali mirzo taxtni bizga osonlikcha bermas.
 - Demak, yana urush! Yana xavf-u xatar!..
- Begim, togʻning boshi qorsiz boʻlmas, yigit boshixatarsiz.
- Hazratim boya oʻrgimchak toʻridan gap ochgan edilar. Agar siz ketsangiz, oʻrgimchak toʻrida biz qanday qolurmiz?
 - Istasangiz, sizni birga olib keturmen!
 - Jang maydonigami?

Oyisha begimning savolida ozgina kinoya ham bor edi. Buni sezgan Bobur xijolatdan xiyol qizardi.

- Urush tugaguncha onam bilan Xonzoda begim uchovlaringiz Oʻratepada turishlaringiz mumkin. Bahavo joy. Shahar hokimining xotini onamning tugʻishgan singlisi. U yerdan Samarqandga borishlaringiz ham oson.
- Oʻratepa togʻliq joymi? Yoʻllari juda yomondir? Men otliq yurolmaymen.
 - Mahofada borishingiz mumkin.

Shahar qizi boʻlgan Oyisha begim bir joyda muqim yashashni yaxshi koʻrardi, yoʻl azobini koʻtarolmas edi. Boburning soʻnggi gapiga bosh chayqab:

- Mahofadan qoʻrqamen, dedi.
- «Oʻgay taqdir menga bu borada ham kinoya qilmish!— dedi Bobur ichida. Mendek qoʻnimsiz sayyohtabiat kishiga buningdek nozig-u muqim tabiat rafiqa bermish!»

Oyisha begim hozir himoyaga muhtoj bir mushtipar qiz boʻlib koʻrindi. Bobur uning koʻnglini koʻtargisi kelib, quvnoq ohangda gapirdi:

- Otda yurolmasangiz, begim, mahofadan qoʻrqsangiz, unda men sizni... kaftimda olib yururmen!

– Kulmang, mirzo hazratlari! Men kaftingizda yurishga munosib emasmen...

Oyisha begimning soʻnggi soʻzlari Boburga allanechuk shirin tuyildi. Uning yigitlik qoni koʻpirgandek boʻlib, oʻrnidan koʻtarildi-yu:

- Yoʻq, munosibsiz! dedi.
- Kulmang...
- Munosibligingizni isbot etaymi?

Oyisha begim hurkovich kiyikdek chaqqonlik bilan oʻrnidan turdi va qochishga hozirlandi. Bobur toʻy kechasi uni mahofadan qanday oson koʻtarib tushirgan boʻlsa, hozir ham oʻshanday koʻtarib oldi. Uni toʻrdagi toʻshak tomonga olib oʻtayotib, pastki qandilda yonib turgan shamlarni puflab oʻchirdi.

Hozir shu daqiqalarda Oyisha begim Boburning koʻziga olovli jozibaga toʻlib koʻrindi. Oʻzining bu xobgohda uch-toʻrt kunda bir marta tunashi endi tushunib boʻlmaydigan anglashilmovchilikday tuyildi. «Minba'd har kuni shu xobgohga kelurmen! – deb oʻzicha ahd qildi. – Men Samarqandga ketsam, necha oy, necha haftalar ayriliqda oʻtgay. Undan koʻra Andijonda murosa-yu qanoat bilan yashayversammikin?»

* * *

Tong otdi. Kechasi Boburning rejalarini oʻzgartirmoqchi boʻlgan sehrli tuygʻular ertalab oftobdan qochgan yulduzday qayoqqadir yashirindi. Er-xotin nonushta qilib oʻtirganlarida, Ahmad Tanbal bilan Ali Doʻstbekning oʻrgimchak toʻrlari yana uning xayolini chirmab oldi. Bobur kecha elchiga «Samarqandga albatta borurmiz», deb va'da bergan, Qosimbek boshliq

sodiq kishilar yangi yurish tayyorligini boshlab ham yuborishgan edi. Bobur va'dasidan qaytishi mumkin emasligi ertalabki yorugʻlikda aniqroq koʻrinayotganga oʻxshadi.

Oyisha begim undagi xomushlikni sezib, sukut saqlab oʻtiribdi. Bobur uning yuziga botinib qaray olmay, koʻkragidagi oltin bargaklariga koʻz tashladi:

- Begim, Oʻratepaga boradigan boʻldingizmi?

Boburning yana Samarqandga yurish qilishi qat'iy ekani uning gap ohangidan sezildi.

Oldindagi bir necha oylik hijron Oyisha begim uchun behad ogʻir edi. Bu ogʻirlikni Bobur unchalik sezmayotgani Oyisha begimga xuddi bemehrlik nishonasidek tuyildi-yu, birdan alamini keltirdi.

– Hazratim, avval Samarqand sizga muyassar boʻlsin. Keyin borsam biratoʻla shahrimga borurmen. Oʻratepaga emas!

Boburning nazarida, Oyisha begim uning Samarqandni qayta egallashiga koʻp ham ishonmayotganday koʻrindi. Shuning uchun Bobur haramdan chiqib keta turib:

– Mayli, begim, – dedi sovuq ohangda: – Xudo xohlasa, shahringizda koʻrishganda bu gaplarni yana davom etkarurmiz.

SAMARQAND

HAL QILUVCHI OLISHUV

1

Boʻstonsaroyning bir chetida rang-barang toshlar bilan sangfarsh¹ qilingan marmar hovuzli hammom bor edi. Kechki payt shu hammomga Sulton Ali mirzoning haramidagi eng chiroyli qizlar choʻmilishga keldilar.

Hamomning ichida gilamlar va koʻrpachalar toʻshalgan, shohona dasturxon tuzab qoʻyilgan maxsus bir xona bor edi. Bir vaqtlar Sulton Mahmud mirzo tirikligida shu xonadan qizlar choʻmiladigan boʻlmaga maxfiy bir tuynuk ochilgan edi. Shahvoniyparastlik bilan dong chiqargan Sulton Mahmud mirzo oʻsha tuynukdan qizlarning choʻmilishini tomosha qilar edi.

Sulton Mahmud mirzo oʻlib ketganiga besh yil boʻldi. Hammomda maxfiy tuynuk borligini uning oʻn etti yashar oʻgʻli, hozir Samarqand taxtida oʻtirgan Sulton Ali mirzo yaqinda bilib qoldi. Uni bu sirdan voqif qilgan Abu Yusuf Argʻun haramga bir qancha chiroyli qizlar keltirib berib, yosh podshoning sohibixtiyor, sirdosh bekiga aylandi.

Hozir Sulton Ali mirzo qoʻlida may toʻla billur qadah bilan maxfiy tuynuk oldida oʻtiribdi. Marmar hovuzda qiy-chuv qilib choʻmilayotgan yalangʻoch qizlar uning koʻzlarini yondirib, vujudini jingak qilayotganday boʻladi. U tomogʻi quruqshaganda may hoʻplab qoʻyadiyu, ammo koʻzini tuynukdan olmaydi.

Bir payt uning bu tomoshasiga kimdir xalaqit berdi.

¹ Sangfarsh – goʻzal toshlardan gul yasash.

– Mirzo hazratlari, xufiyalar favqulodda xabar keltirmishlar.

Sulton Ali mirzo Abu Yusuf Argʻunning mayin ovozini taniydi-yu, ammo unga oʻgirilib qaragisi kelmaydi:

- Nima xabar boʻlsa onamga aytavering.
- Begim hazratlari meni sizga yubordilar, amirzodam! Sulton Ali mirzo endi Abu Yusuf Argʻunga oʻgirilib qaradi. Uning quyuq ta'zimi ham, pastki tishlari tushib ketgan kemtik ogʻzining tabassumi ham koʻziga juda yomon koʻrindi:
- Janob bek, oʻzingiz-ku, bizga mehribonchilik koʻrsatib goʻzal qizlarni peshkash qildingiz... Endi nega orom olgani qoʻymaysiz?
- Mirzo hazratlari, saltanatingiz xavf ostida! Men shuning uchun oromingizni buzishga jur'at etdim!
 - Yana qanday xavf? Onam qayerdalar?
 - Devoni xosda sizga muntazirlar.

Sulton Ali mirzo kayfini buzganlaridan achchigʻi kelib, qoʻlidagi qadahni mayi bilan marmar devorga otib urib, chil-chil sindirdi. Soʻng barvaqt semirgan yoʻgʻon gavdasi kayfdan xiyol chayqalib, tashqariga chiqdi.

Qorong'i tushib qolgan edi.

Devoni xosning kiraverishida, ellik yoshlardagi qovoqlari qalin, jingalak soqolli bir bek qoʻl qovushtirib, bosh egib turibdi. Uy toʻrida tikka turgan Zuhra begimning yuzi qahrdanmi, qoʻrquvdanmi oqarib ketgan:

– Amirzodam, siz aysh-u ishrat bilan bandsiz. Xiyonatchilar poytaxtni yogʻiyga pinhona topshirmoqchiligʻidan bexabarsiz!

Sulton Ali mirzodan norozi boʻlib shaharni tashlab chiqqan mingdan ortiq bek va navkarlar Andijondan qoʻshin tortib kelgan Bobur bilan birga Dargʻom boʻylarida fursat kutib yurganlari ma'lum edi. Ammo

Sulton Ali mirzo barcha darvozalarga eng ishonchli kishilarini qoʻyib, shaharni mahkam berkitib yotar edi. Shuning uchun onasiga zarda qilib:

- Yana nima vahima? dedi.
- Menga ishonmasangiz, mana Muhammad Sulton janoblaridan soʻrang. Bu bek hozirgina Boburning qarorgohidan qochib kelmishlar. Shahar ichidagi fitnachilar bugun kechasi Soʻzangaron darvozasini Boburga yashiriqcha ochib bermoqchi emishlar. Piringiz Xoʻja Yahyo ham sizdan yuz oʻgirib, Boburga tarafdor boʻlgan emishlar.
- Ishonmaymen! deb Sulton Ali mirzo qoʻl qovushtirib turgan Muhammad Sultonga tikildi.
- Amirzodam, gapim yolgʻon boʻlsa bugun kechasi tekshirib koʻring! Men yogʻiylaringiz bilan Dargʻom boʻyida ikki hafta yurdim. Xoʻja Yahyoning rizoligini Bobur rosa oʻn bir kun kutdi. Nihoyat, bugun ertalab Mamadali kitobdor xoʻjaning rizoligini olib boribdir. «Tun yarmida kelsinlar, shaharga kiritgaymiz», deganmish. Bobur bugun peshinda ishongan beklarini toʻplab, mashvarat oʻtkazdi. Xayriyatki, uning ishongan beklaridan biri, men sizning sodiq qulingiz edim!...

Sulton Ali mirzo qovogʻi qalin bekka endi mamnun nazar tashladi-yu:

– Oʻgʻrini qaroqchi urganday boʻlibdir! – deb xaxolab kuldi.

Uning kayf bilan beparvo kulishi Zuhra begimning gʻashini keltirdi:

- Amirzodam, har bir daqiqa gʻanimat. Xosnavkarlaringiz otlangan. Hammasi farmoyishingizga muntazir.
- Farmoyishmi? deb Sulton Ali mirzo bir lahza oʻylanib oldi. – Mayli, Bobur darvozadan kirsin. Keyin tuttirib koʻziga mil torttirmoq kerak! Toki, bizga qasd qilgani uchun abadiy koʻr boʻlib qolsin!

Abu Yusufbek oq oralagan qalin soqolining uchini tutamlab, bosh chayqadi:

- Tuttirolsak yaxshi edi-yu, ammo bu reja ancha qaltis, amirzodam. Darvozani ochsak, soʻngra yopib boʻlmas. Boburning ulkan qoʻshini bor. Qal'a ichida ham tarafdorlari koʻp. Oʻtgan safar Samarqandga kirganda, ochlarga non ulashib, dehqonlarga urugʻlik qarz berib, avomning koʻnglini ovlagan ekan. Bir yoqdan Xoʻja Yahyoning fatvosi bilan avom koʻtarilsa, tashqaridan qoʻshin kirsa...
 - Yoʻq, bu juda xatarnok! dedi Zuhra begim.
- Ha, undan koʻra tezroq Soʻzangaron darvozasiga borib, u yerdagi soqchilarni almashtirish lozim, dedi Abu Yusuf va zarhal jildga solingan bir qogʻoz keltirdi. Amirzodam, mana bu sizning muborak nomingizdan yozilgan nishon¹. Bunda fitnachi beklarning nomlari ham koʻrsatilgan. Shular bugun kechasi qoʻlga olinmogʻi lozim.
- Fitnachilarning mol-u mulklari mana bu Muhammad Sulton kabi sadoqatli beklarga olib berilsin!–deb qoʻshimcha qildi Sulton Ali mirzo.

Qovogʻi qalin bekning josuslik qilishdan maqsadi ham shu edi. U Sulton Ali mirzoga ikki bukilib ta'zim qildi:

– Oʻlgunimcha xizmatingizdamen, amirzodam. Ijozat bering, mana bu muborak farmoyishingizni bajo keltirishda faqir ham navkarlarim bilan ishtirok etay.

Bu bek fitnachilarning hovlilarini talashda bevosita ishtirok etsa, koʻproq oʻlja olishi mumkinligini sezib, shunday demoqda edi.

- Ijozat berdik.

Muhrdor chaqirtirildi va qogʻozdagi farmoyishga podshohning muhri bosildi.

– Qolgan ishni biz bajo eturmiz, – dedi Abu Yusuf Argʻun.

¹ Nishon - farmon, buyruq.

Sulton Ali mirzo til uchida:

- Men ham birga boray, dedi.
- Yoʻq, yoʻq! dedi Zuhra begim tez. U yolgʻiz farzandini qorongʻi tunda dushman koʻpayib ketgan shaharga chiqarishni istamas edi. Mirzo onasining yuzidan oʻtolmaganday boʻlib saroyda qoldi.

Soʻng ona-bola Boʻstonsaroyning ikkinchi qavatidagi ochiq ayvonga chiqib, Soʻzangaron darvozasi tomonga quloq sola boshladilar.

Tun sukunatida otlarning dupuri quloqqa baralla chalinardi. Amir Temur maqbarasidan sal nariroqda joylashgan Soʻzangaron darvozasi Boʻstonsaroyga koʻp ham uzoq emas edi. Yarim kechada Boburning ilgʻorlari darvozaga sekin yaqinlashganda, Abu Yusuf va Muhammad Sultonning navkarlari darvozaxona ustidan ularga kamondan oʻq otib, bir qancha kishini yarador qildi.

Qorongʻida devor tepasidan tusmol bilan otilgan ba'zi oʻqlar otlarga ham tekkan edi. Ogʻriqdan asabiylashgan otlarning qattiq kishnagani Boʻstonsaroyga ham eshitildi.

Darvozaxona ustidagi qoʻriqchilar Boburning odamlarini masxara qilib kulishardi:

- Mirzolaring barakni¹ xom sanabdir!
- Ha-ha-ha!
- Samarqandni endi tushlaringda koʻringlar!
- Keyin tushlaringni suvga aytursanlar?
- Ho-ho-ho!

Boburning qoʻshini orqaga qaytib ketishi bilan darvoza oldida shovqin tindi-yu, keyin shaharni u yer-bu yerida itlarning jon-jahd bilan hurgani, odamlarning achchiq faryodi eshitila boshladi. Abu Yusuf Argʻun boshliq xos navkarlar darvozani tinchitib, endi fitnachilarni ovlashga kirishganini

¹ Barak - chuchvara.

ayvonda oʻtirgan Sulton Ali mirzo shu uzuq-yuluq dod-voylar tovushidan sezdi.

– Endi tinch uxlasak boʻlur, – deb xobgohiga kirib ketdi.

Ammo Zuhra begim qandillar yonib turgan oʻz xonasiga kelib, tong otguncha uxlamay oʻtirdi. Hozirgina bir falokatning oldi olingan boʻlsa ham, ammo kelajakdagi mushkulotlar uning uyqusini qochirmoqda edi. Bobur Samarqandni yana qamal qilishi mumkin. Uning oʻtgan galgi qamali hali koʻpchilikning esidan chiqqan emas. Ichkarida Zuhra begim ishonadigan odamlar tobora kamayib boryapti. Bugun fitnachi beklar jazolansa va talansa, Sulton Ali mirzodan norozi boʻluvchilar yana koʻpayadi. Ularning boshchisi – Xoʻja Yahyo juda nufuzli ruhoniy. Sulton Ali mirzo Xoʻja Yahyoga qarshi keskin chora koʻrolmaydi. Chunki butun dindorlar Xoʻjaning tomonida. Agar Xoʻja avom xalqqa fatvo berib, butun mullolarni ishga solsa, gʻulu koʻtarilib ketishi mumkin.

Zuhra begim xayolida oʻziga tayanch izlar ekan, yaqinda Buxoroni olgan, endi Samarqandga qoʻshin tortib kelishi kutilayotgan Shayboniyxon esiga tushdi. Bundan uch kun burun darvishlardan biri Zuhra begimga Shayboniyxondan maxfiy bir xat keltirib bergan edi. Begim pardali maxsus tokchada turadigan oltin sandiqchasiga kalit solib ochdi-da, oʻsha xatni olib, qandil yorugʻida qayta oʻqiy boshladi.

Zarvaraqqa bitilgan chiroyli yozuvda Zuhra begimning aqli va husni ustalik bilan ta'riflangan, yosh umrini oʻgʻliga fido qilib ersiz yurgani alohida ehtirom bilan tilga olingan edi. Xatning eng gʻalati joyi – Shayboniyxonning Zuhra begimga gʻoyibona koʻngil qoʻyib, unga uylanmoqchi ekanini she'r bilan aytgani edi:

«Oʻgʻlingiz oʻgʻlim-u oʻzingiz yorim, Dilbar-u hamnafas-u dildorim».

Hozir shu satrlarni oʻqiyotganda, Zuhra begim zabardast bir erkakning oʻtli nafasini oʻz yuzida his qilganday boʻldi. Zuhra begim olti yildan beri mana bu toʻshakda yolgʻiz yotadi. Uning gulday umri bevalikda soʻlib boryapti. Zuhra begim tegaman, desa uni oladigan zodagonlar topilar edi. Axir u ta'rifi ketgan goʻzal qiz boʻlgani uchun Sulton Mahmudxonday podshohning suyukli xotiniga aylangan edi. Biroq oʻgʻli taxtda oʻtirgan Zuhra begim faqat oʻziga munosib podshohga tegishi mumkin, udum shunday.

Mana endi unga xaridor podshoh ham topildi. Begim Shayboniyxonning she'ridagi ikkinchi satrni yana bir bor oʻqiganda, xayoliy bir erkak uni quchib, «Dilbar yorim, dildorim!» deb erkalayotganday boʻldiyu, badani qizib ketdi.

U oʻrnidan turib, katta toshoyna oldiga bordida, oʻzining aksiga tikilib qaradi. Uyqusiz tundan koʻz ostilari xiyol koʻkarib salqigan. Ammo qoshlar – qaldirgʻoch qanoti. Qora koʻzlari uchqun sochib porlaydi. Koʻkraklar baland. Boʻyni oq marmarday silliq, lablari ehtirosli. Shayboniyxonning yoshi ellikka yaqinlashgan, xotinlari va bolalari bor, Zuhra begim buni biladi. Ammo begim oʻzining oynadagi aksiga mamnun tikilib turgan shu daqiqalarda: «Shayboniyxonning sahroyi xotinlari nima boʻlipti? – deb oʻylandi. – Men xonni oʻzimga shunday rom qilayki, hammasi ogʻzini ochib qolsin!»

Ertasiga oʻsha darvish kelib, begimning javobini olib ketishi kerak. Begim Shayboniyxonga xat yozish uchun qogʻoz-qalam oldi.

Biroq qandillarda koʻpdan beri yonayotgan shamlarning tutunidan uy sal xira tortib qolgan edi. Zuhra

begim havorang barqut darpardalarni ochdi-yu, sahar salqiniga yuzini tutib, ayvon eshigi oldida birpas turdi.

Shunda arkka yaqin bir mahalladan er kishining jon achchigʻi bilan qichqirgani eshtildi. Ayol kishining oʻkirib yigʻlagani unga joʻr boʻldi.

Abu Yusuf Argʻun bilan Muhammad Sulton hamon fitnachilarni ovlab yurgani, ularning uylarini talab boyiyotgani, allakimlar oʻq yoki tigʻ zarbidan jon berayotgani Zuhra begimning koʻz oldiga keldi. Shunda xayoli birdan boshqa yoqqa burildi.

Shayboniyxon Samarqandni jangsiz olish uchun Zuhra begimga yolgʻondakam ishq izhor qilayotgan boʻlsa-chi? Samarqandni olganidan keyin soʻzidan qaytsa-yu, Zuhra begimni mana bu qorongʻi tunda oʻkirib yigʻlayotgan ayolning ahvoliga solsa-chi?

Bu shubhadan begimning borligʻi muzlab ketdi. U orqasiga qaytib, Shayboniyxonning maktubini yana qoʻliga oldi. Xon uning shunday shubhalarga borishini oldindan sezganday, maktubning yana bir joyida she'r aytgan edi:

«Men Samarqandni sensiz netayin, Jasadi tiyrani jonsiz netayin?»

Bu satrlarning taftidan Zuhra begimning qalbiga yana iliqlik yugurdi. Shu tobda begimning oʻziga ham yorsiz Samarqand – jonsiz tanaday sovuq tuyilardi. Shayboniyxon uning bevalik hayotiga issiq jon boʻlib kirib kelishi koʻz oldida gavdalandi-yu, qalamni qoʻliga olib, xonga javob yozishga kirishdi. Satr boshidan xonning ta'rifini yuksaklarga koʻtarib:

«Hazrati imomi zamon, xalifayi Rahmon», deb yoza boshladi...

Samarqand qal'asining tashqarisidagi bogʻkoʻchalar, Ulugʻbek rasadxonasining atroflari, Obi-rahmat arigʻining boʻylari behisob qoʻshinga toʻlib ketgan. Choʻponota togʻining etaklarida, naryogʻi Zarafshon sohilida yuzlab oʻtovlar va chodirlar paydo boʻlgan.

Bu qoʻshinning sarkardasi Shayboniyxon Bogʻi Maydonga, Ulugʻbek qurdirgan mashhur Chilsutun koʻshkiga kelib tushgan edi. Shayboniyxon koʻshkning yuqorigi qavatida toʻrt tarafi ayvonlik katta uyda peshin namozini oʻqib boʻlgan ham ediki, yasovul kirib, Sulton Ali mirzo bir necha ichkilari bilan qal'adan xon huzuriga kelganini aytdi.

Shayboniyxonning kichik-kichik koʻzlari quvonchdan yaltillab ketdi.

- Sultonlarni bu yerga chorlang. Keyin mirzoni boshlab kiring.
 - Hazratim, taxtingiz pastki oshiyonda.
 - Joynamozim taxtimdan baland!
 - Lutf qildingiz, hazratim!

Yasovul ikki bukilib ta'zim qilganicha, orqasi bilan yurib chiqib ketdi. Shayboniyxon boʻtaloq junidan toʻqilgan mayin malla joynamoz chetiga qaytib oʻtirdi. Yasovul poygakdagi eshikdan Sulton Ali mirzoni boshlab kirganda, Shayboniyxon hali ham shahnishinda oʻsha joynamoz ustida oʻtirgan edi. Shahnishin pastida uning oʻn chogʻli sultonlari choʻkkalab oʻtirishibdi.

Shayboniyxon bezaksiz joʻn kiyingan edi. Sulton Ali mirzo eshikdan kirgan zahoti uning sallasiga qadalgan dur-u gavharlar, toʻniga tikilgan oltin-u marvaridlar dabdaba bilan yaltirab koʻzga tashlandi. Ammo Mirzoning koʻzlari besaranjom, semiz gavdasi boʻshashgan. U onasining va Abu Yusuf Argʻunning gapiga kirib, qal'adan qoʻshinsiz chiqib kelgan edi. Bu

yerda xonning behisob qoʻshinini koʻrib, yuragi takapuka boʻlib ketdi.

Shayboniyxon bilan avvaldan til biriktirib yurgan Abu Yusuf Argʻun Sulton Ali mirzoni xon huzuriga avrab olib kelish uchun boya tushki ovqat paytida mirzoga yaxshi koʻrgan maylaridan ancha ichirgan edi. Hozir Sulton Ali mirzo Shayboniyxonga tomon ta'zim bilan borayotganda, oyoqlari gilamda qoqinib, gavdasi gandiraklab ketdi. Abu Yusuf Argʻun suyab qolmaganda, yiqilib tushardi.

Shayboniyxon oʻrnidan turib, Mirzo bilan koʻrishar ekan, xushboʻy may hidi dimogʻiga urildi. U Mirzoning kayfi borligini darrov sezdi-yu, uni oʻgʻli Temur Sulton va kuyovi Jonibek Sultondan quyiroqqa oʻtqazishni yasovulga imo qilib buyurdi.

Shayboniyxon boshiga qizil boʻrk ustidan oq salla oʻragan, koʻk movutdan abo kiygan. Oltin tugmali abo tagidan kiygan yashil koʻylagi musulmon bayrogʻining rangini eslatadi. Joynamoz ustida oʻtirgani ham uni Xudojoʻy bir odamga oʻxshatib koʻrsatar edi. Buning hammasi Sulton Ali mirzoning vahimasini sal bosdiyu, ammo quyidan joy koʻrsatilgani uning izzatnafsiga tegdi. Boshqa sultonlar Shayboniyxonning oldida choʻkkalab oʻtirganda, Sulton Ali mirzo ataylab chordana qurib oldi. Shayboniyxonning oʻgʻli unga gʻashi kelib, qarab qoʻydi.

- Siz menga farzanddek yaqin boʻlmoqchimisiz, Mirzo? - soʻradi Shayboniyxon muloyim tovush bilan.
 - Xon hazratlari ittifoq tuzish uchun chorlabdirlar...
 - Volidayi muhtaramangiz kelmadilarmi?
 - Onam meni yubordilar.
 - Ammo oʻzlari ham kelmoqchi edilar.
 - Ayol kishi, tortinurlar.
 - Odam yuboring, Mirzo, onangiz ham kelsinlar.

Sulton Ali mirzo yonida choʻkkalab oʻtirgan Abu Yusufbekka qaradi. Abu Yusuf Argʻun darhol oʻrnidan turib, Shayboniyxonga ta'zim qildi:

– Ijozat bering, xon hazratlari, men hozir borib Zuhra begimni aytib kelay.

Bu nozik ishlarning hammasi Abu Yusuf Argʻunning harakatlari bilan bitayotganini yaxshi biladigan Shayboniyxon yasovulga buyurdi:

- Abu Yusufbekka mening eng chopqir otlarimdan birini in'om qiling!
 - Minnatdorman, hazratim!
- Bek, qaytishda Xoʻja Yahyoga ham xabar qiling. Sulton Ali mirzo kelgan joyga Xoʻja kelmasa, ora uzilur.
 - Haq gapni aytdingiz, xon hazratlari!

Abu Yusuf Argʻun bu topshiriqni bajarish uchun ketgandan keyin Shayboniyxon oʻrnidan turdi-yu, sultonlariga qarab:

- Mirzo bilan suhbatlashib oʻtiringlar, - dedi, oʻzi esa orqa eshikdan ayvonga chiqib, pastga tushib ketdi.

Sulton Ali mirzo atrofidagi sultonlarning adovatli yuzlariga qarab, ular orasida yolgʻiz qolishga qoʻrqdi va oʻrnidan turib, yon eshikka qarab yoʻnaldi. Shunda turkistonlik sultonlardan biri oʻrnidan sakrab turib, uning yoʻlini toʻsdi.

– Amirzoda, buyruq boʻdi¹, endi bizing yanimizdan ketmaysiz!

Barvasta bir navkar qoʻlini xanjarining sopiga qoʻyib, eshikka koʻndalang boʻlib oldi. Sulton Ali mirzo qopqonga tushganini endi sezdi-yu, kayfi birdan tarqab ketdi. Yuzi boʻzdek boʻlib, boyagi joyiga qaytib oʻtirdi.

Oradan bir-ikki soat oʻtgandan keyin Zuhra begim ham toʻrt kanizi bilan Bogʻi Maydonga kirib keldi. Uning boshida kelinchaklarni eslatuvchi oq harir roʻmol, peshonasiga esa tillaqosh taqilgan. Egnida xipcha belli gulgun qabo. Uning tagidan kiyilgan oq atlas koʻylagining etagi shunchalik uzunki, ikki kaniz ikki tomondan koʻtarib kelyapti.

¹ Boʻdi – «boʻldi» degani.

Zuhra begimni Chilsutunning pastki oshiyonida maxsus bezatilgan xonayi xosga boshlab oʻtayotganlarini Shayboniyxonning qirq yoshlardan oshgan katta xotini koʻrib qoldi:

– Bu ne degan yuzsiz xotin? – deb yonidagi ayolga shipshidi: – Ersiragan megajin izzatini bilib uyida oʻtirmaydimi? Sovchi borib ishni bitirgancha shoshmay turmaydimi? Iloyim kasofati oʻzidan beriga kelmasin!

Zuhra begim xonayi xosga kirganda, Shayboniyxon taxt ustida oʻtirar edi. Zuhra begim ikki bukilib ta'zim qilar ekan, Shayboniyxon u bilan taxt ustidan tushmasdan soʻrashdi.

- Xush keldingiz, begim.

Xondan boshqacha muomala kutgan Zuhra begim toʻsatdan koʻngli buzilib, koʻziga yosh oldi.

– Xon hazratlari, men oʻzimni sizga qurbon qildim. Farzandimni, xonumonim – hammasini marhamatingizga ishonib topshirdim!

Zuhra begimning yuzi oq ipak toʻr ortidan aniq koʻrinmas edi. Xon uning gavhar koʻzli oltin uzuklar taqilgan qoʻllariga qaradi. Tomirlari boʻrtib turgan bu titroq qoʻllar begimning ancha yoshga borganidan dalolat berardi. Shayboniyxon yaqinda Buxoroda nikohlab olgan oʻn toʻqqiz yoshli kichik xotinini esladi. Soʻng Zuhra begimning kattagina oʻgʻli Sulton Ali mirzo koʻz oldidan oʻtdi.

– Xotirjam boʻling, begim, Sizning maqsadingiz bizga ma'lum. Xudo xohlasa, murodingiz hosil boʻlmay qolmas.

Shayboniyxon boshqa hech narsa demadi. Yasovul Zuhra begimni xonayi xosdan olib chiqib ketdi. Uni kanizlari bilan boshqa bir kichikroq xonaga kiritib, eshiklarini tashqarisidan yopib oldilar.

Shayboniyxonning nima qilmoqchiligini hech kim tushunmas, ammo bugun Bogʻi Maydonda favqulodda bir hodisa boʻlayotganini sezgan barcha lashkarboshilar va a'yonlar Chilsutun koshonasining yon-verida ikki-uchtadan boʻlib aylanib yurishar edi. Ular orasida shoir Muhammad Solih ham bor edi. Uning ipak sallasi nozik qilib oʻralgan, kalta yengil ipak abosi oʻziga juda yopishib turadi. Yozda ham telpak kiyib yuradigan, urushdan boshqa narsani bilmay qoʻpollashib ketgan koʻchmanchi sultonlar uning ziyolicha nozik kiyinishini yoqtirmaydilar, Temuriylar xizmatida oʻtgan ogʻir oʻtmishini eslatib turishni yaxshi koʻradilar. Nayman urugʻining boshligʻi Qambarbiy bogʻda Muhammad Solihga tegishdi:

- Ha, janob shoir, Samarqanddan mirzongiz minan chechangiz¹ kelib, suyunib turibsizmi?
- Qambarbiy janoblari, Zuhra begim asli oʻzbekning nayman urugʻidan boʻlurlar. Begimni mendan oldin siz checha deyishingiz lozim.

Mangʻit, doʻrmon va qoʻshchi urugʻining sultonlari bu gapni yoqtirib, xaxolab kuldilar.

Qambarbiyning achchigʻi keldi. Muhammad Solihga oʻshqirib:

- Siz-chi? - dedi. - Siz barlos turkidanmisiz?!

Temur va Temuriylardan chiqqan barloslar Shayboniyxonning eng yomon koʻrgan urugʻi edi. Muhammad Solih Xusayn Boyqaro saroyida xizmat qilgan, Sulton Ali mirzoga ham mulozim boʻlgan, axiri mirzolardan aynib, Shayboniyxon tomoniga qochib oʻtgan edi. U Sulton Ali mirzoning harbiy sirlarini Shayboniyxonga aytib berib, Buxoro va Dabusiya qal'asining olinishiga koʻmaklashgani uchun xon uni

¹ Checha – bu yerda kelinoyi, yanga ma'nosida.

yoqtirib qolgan edi. Ammo Qambarbiy ichida uni: «Xiyonat yoʻli bilan obroʻ orttirgan beqaror turk!» deb yomon koʻrar edi.

Muhammad Solih Qambarbiyning bu nafratini oʻziga olgisi kelmay, gapni hazilga burdi:

- Janob Qambarbiy, men hozir oʻzbek turkidanmen!
- Quvlik qilmang, oʻzbek boshqa, turk boshqa!
- Lekin oʻzbekda «ota yurtim Turkiston» degan naql bor-ku, bunisiga ne deysiz?
- Voy-boʻy, dedi Koʻpakbiy, manav shoiring bizning Turkistonni ham turklarga berib jubormoqchi-ku!

Dashti Qipchoqdan chiqqan omi Koʻpakbiy Turkistonday madaniy shaharni oʻziniki qilib gapirganidan Muhammad Solihning kulgisi keldi:

- Janob Koʻpakbiy, siz avval Turkiston degan soʻzning ma'nosini tushuning! Turkiston – turklar makoni degani-ku!
- Ne demoqchisan? Biz Rum¹ turkidan tarqagʻanmizmi?
- Aksincha, Rum turklari ham Turkistonni «ota yurtim» derlar. Ular bilan bizning ildizimiz bir. Samarqand qoʻrgʻonidan berida turgan hu ana u tepalarga bir qarang. Ana oʻsha yerda bundan ming yil avval Afrosiyob degan ulkan shahar boʻlgan. Afrosiyob esa Movarounnahr turklarining afsonaviy qahramoni edi. «Uning asli oti Alp Er Toʻngʻa boʻlgan» deb, «Qutadgʻu bilig»da Yusuf Xos Hojib yozmishdir.
- Bu shoir oʻzbekning nonini yeb, nuqul turkni maqtaydi-ya!
- Janob Qambarbiy, oʻzbek, qozoq, turkman, qirgʻiz barchasi ham turkiy uluslardir. Bir otaning bolalaridek yerimiz bir, tariximiz bir. Sizlar oʻzbek urugʻlarining tarixini Oʻzbekxondan² boshlaysizlar. Bu toʻgʻri emas.

¹ Rum - Turkiya.

² Oʻzbekxon – Oltin oʻrda xoni, 1312–1342-yillarda hukmronlik qilgan, uning poytaxti Saroy Berke Volga boʻyida, hozirgi Volgograd yaqinida boʻlgan.

Nega toʻgʻri boʻlmas ekan? - oʻshqirdi Koʻpakbiy,Oʻzbekxondan tarqalgan emasmizma?

- Janob Koʻpakbiy, sizning qipchoq urugʻingiz Oʻzbekxondan ming yil oldin mashhur boʻlgan. Qoʻngʻirot urugʻining tarixi ham olti-yetti asrga boradi. Mang'it, nayman, do'rmon, qushchi urug'lari ham qadimdan beri bor. Bu urugʻlarning hammasi hozir onhazratim Shayboniyxon qoʻl ostiga birlashib, «oʻzbek ulusi» degan umumiv nom olgan ekan, sizlar bu ulusning tarixini esdan chiqarmanglar. Oʻzbek degan ism turkiy xalqlarda Oʻzbekxondan necha yuz vil oldin ham mavjud boʻlgan. Men Xorazmda oʻsmishmen. Qadimiy kitoblardan oʻqidimkim, Chingizxondan oldin shoh boʻlgan Xorazmshoh Muhammad oʻz oʻgʻillaridan biriga O'zbek deb nom qo'ymishdir. Shundan ma'lumki, bu nom yurtimizda Chingizxon kelmasidan oldin ham moʻtabar boʻlgan. Oʻzbek nomini bizning ulusimiz Oʻzbekxondan olgan emas. Aksincha, bu qadimiy nomni Oʻzbekxon bizning turkiy uluslardan olmishdir!
- Yana turkiy deydi-ya! Xon hazratlarining bobokalonlari ulugʻ Chingizxon turk boʻlmagʻan-ku!

Qambarbiy qaltis mavzuda gap ochganini sezib, hamma jim boʻlib qoldi. Chunki Chingizxonning gʻayridin boʻlganini, Buxoroning jome masjidiga ot minib kirganini Turonning koʻpchilik aholisi bilardi. Shayboniyxon bu aholini choʻchitmaslik uchun Chingizxon naslidan ekanini oshkor qilmasdan dil tubida saqlardi. Ammo xonning turkiy tilli musulmon ekanligi, islom bayroqdori boʻlib maydonga chiqqanligi katta bir siyosat shaklida ochiqchasiga targʻib qilinardi. Muhammad Solih ham ana shu siyosatga mos keladigan soʻzlarni izlab topdi:

– Janob Qambarbiy, Shayboniyxonning bobolari Abulxayrxon, otalari Shohbudoq Sulton islom dinidan bahramand boʻlishib, xoqoni a'zam Chingizxondan ham balandroq ma'naviy yuksaklikka koʻtarilganlar. Shayboniyxon hazratlari hozir ana shu yuksaklikda turib, Turonning pok musulmon xalqiga rahnamo boʻlmoqdalar!

- Ob-bo, sartting bolasi-ey, endi Turonni oʻrtaga solib, soʻzini oʻtkazmoqchi-da!
- Tarix shunday boʻlsa men ne qilay, janob Qambarbiy? Ming yillardan buyon Xurosondan naryogʻi Eron-u berigi yogʻi Turon deb yuritilur... Xon hazratlari buni yaxshi bilurlar. Imomi zamon Buxoro madrasasida tahsil koʻrganlarida juda koʻp turkiy she'rlarni yod olganlar.

Oʻzlari ham turkiy tilda gʻazallar yozganlar. Men onhazratning gʻazallaridan bir bayt keltiray, eshiting:

«Firqat otidan yiqildim, yor keldi soʻrgʻali, Ey Shayboniy, yor dardingga davo qildi yana».

- Xon hazratlarining bu she'rlari turkiycha emas, oʻzbekcha! dedi Qambarbiy.
- Lekin barcha turkigoʻy shoirlar xuddi shu tilda she'r yozganlar-ku! Agar bu oʻzbek tilida boʻlsa, demak, Navoiy ham oʻzbek tilida yozgan. Demak, kamina ham hozir sizlar bilan oʻzbek tilida soʻzlashmoqdamen. Demak, Movarounnahrning turkiy tili-yu oʻzbek tili, aslida bir til. Janoblar, endi dilimiz ham bir boʻlmogʻi kerak. Temuriylar turk-u oʻzbek deb ulusni ulusdan ajratib, xalqni parokanda qildilar, mamlakat parchalanib, xarob boʻldi. Endi imomi zamon, Iskandari soniy¹ yana shu ulusni birlashtirib, mamlakatga yagona jon ato qilmoqchilar! Ilohim hazrat xonimiz shu maqsadlariga yetsinlar!

Muhammad Solihning bu gapiga endi hech kim e'tiroz qilolmadi. Munozarada ustalik bilan gʻolib chiqqan shoir koʻshkka qarab ketdi.

¹ Iskandari soniy – Ikkinchi Iskandar, Shayboniyxonga berilgan yuksak ta'riflardan biri.

Koʻpakbiy Qambarbiyga qarab:

– Sartting bolasini koʻrdingizma? – dedi. – Bularni gap bilan jengib boʻlmaydi!

– Gap bilan yengmasak qilich bilan yengamiz! – dedi Qambarbiy. Hammalari xaxolab kuldilar.

* * *

Koʻshkdan yasovul chiqib, bogʻda muntazir turgan lashkarboshi va a'yonlarni xon hazratlari yuqorigi qavatga kengashga chaqirganini aytdi. Bogʻdagi arkoni davlat koʻshkning toʻrt burchiga minoraga oʻxshatib ishlangan va torgina yoʻlak ichidan oʻtgan zinapoyalar bilan yuqoriga koʻtarila boshladilar. Xonning oʻzi hali ham pastdagi xonayi xosda yana nimanidir kutmoqda edi. Kechki payt Samarqanddan besh-olti nafar muridini ergashtirib, Xoʻja Yahyo ham chiqib keldi. U Bogʻi Maydonga kirib otdan tushayotganda sarosima boʻlib, oyogʻi uzangi qayishiga oʻralib qoldi. Muridlari uni suyab tushirdilar.

Katta oq salla, malla saqarlot delagay kiygan Xoʻja Yahyo Shayboniyxon oʻtirgan taxtning oldigacha ta'zim qilib bordi. Qiroatga oʻrgangan jarangdor tovush bilan:

- Assalom-u alaykum, xon hazratlari, dedi. Samarqand darvozalari siz ulugʻzot uchun ochiqdur!
 Shayboniyxon Xoʻja Yahyo bilan oʻrnidan turmay soʻrashdi-yu, kinoya qilib dedi:
- Samarqand qopqalarini biz uchun siz ochib keldingizmi?
 - Hazratim, har ish Xudoning xohishi bilan boʻlur.
- Biroq sizning xohishingiz Samarqandni Boburga berish edi-ku?
- Osiy bandalarmiz, xon hazratlari. Xatolik oʻtgan boʻlsa, afv eting, huzuringizga bosh egib keldim...

Xoʻja Yahyo koʻziga yosh oldi.

Shayboniyxon yasovulga buyurdi:

- Yuqoriga olib chiqib mirzosining qaptaliga¹ oʻtirgʻizing!

Xoʻja Yahyoni olib chiqib ketganlaridan keyin Shayboniyxon oʻzining eng yaqin maslahatgoʻyi boʻlgan oltmish yoshli moʻysafid mulla Abdurahimni chaqirdi va u bilan nima haqdadir yakkama-yakka gaplasha boshladi.

Xonning shoshilmayotgani ba'zi sultonlarni taajjubga solmoqda edi. Samarqand darvozalari ochiq paytda nega poytaxtga ot qoʻyib kirmasdan, bu yerda imillab oʻtirishibdi?

3

Shayboniyxon toʻrdagi eshikdan kirganda hamma oʻtirganlar oʻrinlaridan sapchib turib, xonga egilib ta'zim qildilar. Xon shahnishinga toʻshalgan kimxob koʻrpacha ustiga chordana qurib oʻtirdi. Uning oʻng yoniga choʻkka tushgan mulla Abdurahim Qur'ondan qisqa bir oyat oʻqib, xon hazratlariga eng oliy tilaklar bildirdi-yu, nihoyat maqsadga oʻtdi:

- Imomi zamon, xalifayi Rahmonning niyatlari faqat shahar olish emas, din-u millat dushmanlarini fosh etib, siz-u bizni Muhammad alayhissalom yurgan muqaddas yoʻlga yetaklashdir. Agar faqat mol-u mulkni oʻylaydigan podshoh boʻlsa, Samarqand qopqalari ochilgan zahoti urho-ur, deb qal'aga ot qoʻyib kirur edi, karnay-surnay chaldirib, oʻz gʻalabasini tezroq xalqqa oshkor qilur edi. Ammo bizning ulugʻ xonimiz donolikda Iskandari zamon Shayboniyxon mol-u mulkdan avval insof-u imonni oʻylayurlar.
- Barhaq! deb qoʻydi mulla Abdurahimdan pastroqda oʻtirgan Muhammad Solih.

¹ Qaptali - yoni, qatori.

- Podshoh insof-u imonni unutsa, nechogʻliq murdorliklar yuz berishi, mamlakat nechogʻliq xarob boʻlishi Temuriylarning kirdikorlaridan bizga ayon. Abdullatif mirzo oʻz otasi Ulugʻbek mirzoni oʻldirtirdi. Hirotda Husayn Boygaro oʻz nevarasi Moʻmin mirzoni oʻldirtirdi. Mana hozir biz bilan oʻtirgan Sulton Ali mirzo oʻz ogʻasi Boysungur mirzoni tuttirib oʻldirmoqchi boʻlganda, ogʻasi qochib qutuldi. Keyin Boysungur mirzo bu inisini tuttirganda, koʻzini koʻr qilmoqchi boʻldi. Ammo jallodni oltinga sotib olib, bu Mirzo ham qochib qutuldi. Mirzolarning saroyida sotginlik, xivonat, buzuqlik avj oldi. Qur'oni karim mayni makruh deb qat'iy taqiqlagan. Ammo davramizda oʻtirgan mana bu vosh Mirzo jovnamoz ustida oʻtirgan imomi zamon huzuriga may ichib, shirakayf kelmish. Bu Mirzoning shahvoniyparastligi, shu yoshdan harom yoʻlga yurishligi imomi zamon xonimizga avvaldan ayon edi!

Koʻpakbiy gʻazablanib gap qoʻshdi:

- Osib oʻldirish kerak bunday Mirzoni!
- Ayb faqat bu navjuvon Mirzoda emas, deb Muhammad Solih unga e'tiroz qildi. - Buning otasi Mahmud mirzo bag'oyat imonsiz, buzuq odam edi. Samarqandda podshohlik qilganda xotinbozlikka qanoat qilmay, bachchabozlikni ham avjiga chiqargan edi. Bechora xalq chiroyli yosh o'g'lonlarini ko'chaga chiqartirishga qo'rqib, qizlarni yashirgandek ichkariga yashirar edi.
 - Oʻgʻil otasiga tortibdir-da?
 - Onasi-chi? Mirzoning onasi qalay?

Bu qaltis savoldan hamma bir lahza jim boʻlib qoldi. Chunki «Shayboniyxon Zuhra begimni nikohlab olmoqchi emish», degan ovoza koʻpchilikning esiga tushdi. Xon bu ayolga uylansa, obroʻsi tushishini boyayoq sezgan va uylanmoqchi emasligini mulla

Abdurahimga aytgan edi. Hozir mulla Abdurahim mish-mishlarni bartaraf qilishga shoshildi:

– Mirzolarning kasofati xotinlariga ham urmish. Bu Mirzoning onasi oʻz nafsi uchun yolgʻiz oʻgʻlini qurbon qiladiganga oʻxshaydi!

Mulla Abdurahimning bu gapidan keyin xonning Zuhra begimga munosabati ham koʻpchilikka ayon boʻldi. Sultonlardan biri:

 Quturgan biyaga sudratib oʻldirish kerak unday xotinni!
 dedi.

Yana biri:

- Qopga solib, eng baland minoradan tashlash kerak! - dedi.

Shayboniyxon munozaraga erk berib, oʻzi hammaning gapiga zimdan quloq solib oʻtirardi. Birbiridan qoʻrqinchli takliflar koʻpayib ketgandan keyin Shayboniyxonning ishorasi bilan mulla Abdurahim hammani jim qildi.

Xon gapirar ekan, oʻnlab kishilar uning salmoqdor, vazmin ovozidan, dona-dona qilib aytayotgan soʻzlaridan sehrlanganday qotib, quloq sola boshladi. Shayboniyxon mirzolarning insofni, imonni unutganlari, el-ulusni vayron qilganlariga yana bir talay misollar keltirdi-yu, birdan Xoʻja Yahyoga yuzlandi:

– Bu mirzolaringning piri – sizning otangiz Xoʻja Ahror edi. «Men valiyman» deb, podshohlarga hukmini oʻtkazib, juda katta boylik orttirgandi. Bizning xabarimiz bor, otangizdan sizga juda koʻp oltin qolgʻan. Otangiz oʻlgandan keyin, mana, oʻn bir yildan beri siz Samarqandgʻa ruhoniy ota boʻlib yuribsiz. Siz ham nafsga berilib, juda koʻp siym-u zar toʻplagʻansiz. Baliq boshidan buziladi. Pir qanday boʻlsa, murid ham shunday boʻladi. Qaptalingizda oʻtirgʻan mana shul shahvoniyparast yosh Mirzo sizning muridingiz, Xudo oldida siz shungʻa javob beraman deb qoʻlini olgʻansiz!

Shayboniyxon shahodat barmogʻini bigiz qilib, avval Mirzoni, soʻng Xoʻja Yahyoni koʻrsatdi-da, keyin oʻsha barmogʻini pastga qaratib silkitdi:

- Sizning yana bir muridingiz ayol boshi bilan er istab kelib, pastda oʻtiripti. Sizning qanday pirligʻingizni mana shular koʻrsatib turipti! Siz avval muridlaringizga xiyonat qilib, Samarqandni Boburga bermoqchi boʻldingiz. Keyin bular pirlariga xiyonat qilib, mening oldimga keldi. Xiyonat ustiga xiyonat! Biri u yoqqa tortsa, biri bu yoqqa tortadi! Podshoh oʻzicha-yu, din rahnamosi oʻzicha! Biri birini aldaydi. Biri birining goʻshtini yemoqchi boʻladi! Muhammad alayhissalom ham paygʻambar edilar, ham podshoh edilar, ham lashkarboshi edilar. Kim shunga qodir boʻlmasa, kim paygʻambarimizning muqaddas yoʻlidan yurmasa, mana shu pir bilan muridga oʻxshab, kofirlik jariga yiqiladi!

Shayboniyxon bu gaplarni oʻzining qoʻl ostidagi a'yonlariga ham tekkizib gapirmoqda edi. Chunki ularning ba'zisi: «Xonimiz taxt-u tojga qanoat qilmay imomi zamon, xalifayi Rahmon ham bo'lib oldilar», deb shivirlashar edi. Temuriylarning ishini koʻpdan beri kuzatib yurgan Shayboniyxon ularning saltanatlarida Xoʻia Ahror kabi diniv rahbarlar oʻzlaricha mustaqil hukmdor boʻlib olib, mirzolarning hokimiyatini ichdan zaiflashtirganini yaxshi bilar edi. Shayboniyxon xonlik hokimiyati bilan diniy hokimiyatni oʻz qoʻlida birlashtirib, Temuriylarga nisbatan katta bir ustunlikka erishmoqda edi. U Buxoroda madrasada oʻqib yurganda, shariat va tariqat ilmini yaxshi oʻrgangan, Qur'onni yod bilar edi. Hozir Shavboniyxonning qarorgohida islom dinini undan yaxshi biladigan, Qur'onni qiroat bilan o'qishda undan oʻtadigan odam yoʻq edi. Uning imomlik va xalifalik unvonlari shundan ham kelib chiqqan edi. Shayboniyxon markazlashgan ulugʻ bir davlat

tuzishga intilar ekan, bu maqsadga tezroq yetish uchun qoʻl ostidagi odamlarning ixlos va e'tiqodini ham qozonishga, ularning mafkurasini oʻziga boʻysundirib, hammasini bir dohiy atrofiga jipslashtirishga alohida e'tibor berar edi. U oʻz davrining eng zoʻr mafkurasi – diniy mafkura ekanligini yaxshi bilardi. Shuning uchun hozir oʻzi erishayotgan muvaffaqiyatlarni ham dinga va ilohiy kuchlarga bogʻlab, gapira boshladi:

– Bizning Samarqanddagi dushmanlarimiz yetti boshliq ajdarhoday zoʻr edi. Bu ajdarho ne-ne qoʻshinlarni komiga tortib, yutib yuborgan. Ammo bizning imonimiz pok, niyatimiz xolis. Olloh Taolo shu ajdarhoni inidan tortib chiqarib, bizning huzurimizga olib keldi. «Nima qilsang qil!» deb qoʻlimizga berdi. Xudoning qudrati bilan Samarqanddek shaharning qopqalari bizga jangsiz ochildi!

Samarqand urushsiz taslim boʻlayotganligi, uning podshohi va diniy rahbarlari oʻz oyoqlari bilan Shayboniyxon huzuriga kirib kelganligi naqadar ulkan bir zafar ekanini barcha a'yonlar goʻyo endi astoydil his qildilar. Bu zafarning Xudo tomonidan berilganligi esa Shayboniyxonni ularning koʻziga Xudoning nazari tushgan bir avliyo qilib koʻrsatar edi. Shayboniyxon nafasi oʻtkir valiy boʻlmasa, bu qadar murakkab, bu qadar qiyin ishni shunchalik donolik va ustalik bilan amalga oshirolarmidi?

Mulla Abdurahim oʻrnidan sakrab turib:

– Imomi zamonimiz ming yil umr koʻrsinlar! – deb olqish aytdi.

Boshqalar ham oyoqqa qalqdilar. Ustma-ust olqish yangradi:

- Iskandari soniyga ofarin!
- Hazrati valiyga ming rahmat!
- Xalifayi Rahmon dunyo turguncha tursinlar!

Hamma a'yonlar oʻrinlaridan turganlaridan keyin Sulton Ali mirzo bilan Xoʻja Yahyo ham joylaridan

koʻtarildilar. Ammo ular tirik murdadek oyoqda zoʻrgʻa turishar edi. Agar hozir Shayboniyxon mana bu olqish aytayotganlarga bir ogʻiz buyursa, ular Mirzo bilan Xoʻjani tilka-pora qilib tashlashlari aniq edi.

Xonning ishorasi bilan olqishlar tindi, hamma joyiga qaytib oʻtirdi.

- Manavi xoʻja bilan mirzogʻa, - dedi Shayboniyxon, - ming azob berib oʻldirsak haqimiz bor. Biroq insof-u imon qanchalik boʻlishini bularga yana bir koʻrsatib qoʻyaylik. Mayli, qonlaridan kechaylik, jonlari omon qolsin!

Boyatdan beri oʻlimni boʻyinlariga olib, jonlaridan umid uzib oʻtirgan Mirzo bilan Xoʻja endi birdan egilib, xonga minnatdorchilik bildirdilar. Xoʻja Yahyoning koʻngli yumshab, koʻziga hatto yosh keldi:

- Xudo umringizni bersin, xon hazratlari!..
- Biroq, dedi xon ovozini koʻtarib, janob Xoʻja Yahyo mol-u dunyoga hirs qoʻyib, tavfiqni unutgan. Imonlarini poklash uchun Makkayi mukarramaga safar qilsinlar. Xoʻjaga ertalabgacha muhlat beramiz. Kerakli narsalarini yigʻishtirib, ikki oʻgʻillari bilan birga hajga joʻnasinlar. Koʻpakbiy!
 - Labbay, xon hazratlari!
- Xoʻja Yahyoni oʻgʻillari bilan erta ertalab Samarqanddan chiqarib qoʻyishni sizga topshirdik!
 - Bosh ustiga, xon hazratlari!
- Mana bu yosh Mirzo, deb Shayboniyxon Sulton
 Ali mirzoga qarab davom etdi, bizga oʻgʻil tutingisi
 kelibdi. Mayli, dindan qaytganni yana din yoʻliga solish
 savob ish. Shahzoda Temurxon uni oʻz odamlari
 qatoriga olsinlar.

Otasiga yaqin oʻtirgan yigirma yoshli xushbichim Temurxon semiz Mirzoga nafratli bir nazar tashladi-yu, ammo xonga ta'zim qilib, buyruqni bajarajagini aytdi.

– Yaxshi boʻlsa oshini yer, – qoʻshib qoʻydi Shayboniyxon, – yomon boʻlsa boshini!

Sulton Ali mirzo vaqtincha tirik qolayotganini koʻp odam shu soʻzlardan sezdi. Endi pastki qavatda oʻtirgan Zuhra begimning taqdirini hal qilish kerak edi. Shayboniyxon bir vaqtlar Zuhra begimni juda goʻzal deb eshitib: «Oʻzimga gʻunchachi¹ qilib olarman», deb oʻylagan edi. Shuning uchun begimga yozgan xatiga bir necha satr she'r qoʻshgan edi.

Ammo uni bugun oʻz koʻzi bilan koʻrgandan keyin begimdan ixlosi qaytdi. Toʻgʻri, she'r yozib begimni aldagani koʻnglining bir chetini xira qilib turar edi. Ammo bu yerda Zuhra begimdan nafratlanib gapirgan a'yonlar u xotinning buzuqligiga xonni ham ishontirdiyu, koʻnglidagi bu xiralikni tarqatib yubordi. «Oʻzi shunday aldanishga munosib xotin ekan, – deb oʻylandi xon. – Agar hozir qoʻyib bersam, sultonlar uni quturgan biyaga sudratib oʻldiradi. Lekin men «Murodingizga yetasiz!» – dedim. Murodi – erga tegish ekan. Zoʻr bir er topib berib, soʻzimning ustidan chiqayin!»

Xonning koʻzlari davrada oʻtirgan sultonlarni oralab oʻtib, poygakroqda oʻtirgan yoʻgʻon gavdali, choʻtir yuzli qora kishida toʻxtadi. Mansur baxshi deb ataladigan bu odam tabiblik qilar edi. U childirma chalib, «koʻchiriq» qilishni ham bilar edi, «koʻtaruvchi» degan laqabi bor edi. Unga xotin chidamas – olgan xotinlari yo bir-ikki yil umr koʻrmay oʻlar yoki qochib ketar edi.

Mansur baxshi, siz xotinga yolchimay yuribsiz,
dedi Shayboniyxon.
Pastdagi begim kelinchak yangligʻ yasanib kelibdi. Shuni sizga uzatayikmi?

Mansur baxshi oʻrnidan sakrab turdi, quvonganidan ogʻzi qulogʻiga yetguday kulib, ta'zim qildi:

- Marhamatingizdan aylanayin, hazratim, jon deyman!

Hamma kulib yubordi. Shayboniyxon bu tugunni ham sulton va a'yonlarga yoqadigan bir ustalik bilan yechganidan ko'pchilik mamnun edi:

¹ Gʻunchachi - muvaqqat xotin.

- Xon hazratlari dono yoʻl topdilar!
- Mansur koʻtaruvchi endi begimni quchogʻidan qoʻymay, rosa koʻtaradi.
 - Biri biriga munosib!
- Biroq, Shayboniyxon yana soʻz boshlagan edi, oʻzaro gaplar va kulgilar darhol bosildi, – baxshining toʻyini Samarqandda qilamiz. Hammamiz shaharga tartib bilan kiramiz...

Samarqandda bir necha marta boʻlgan va qayerda nima borligini yaxshi biladigan xon qoʻshinlarning shaharga kirish va joylashish tartibini oldindan oʻylab qoʻygan edi. Hozir shuni buyruq shakliga keltirib, lashkarboshilarga aniq koʻrsatmalar bera boshladi. Shayboniyxonning besh ming kishilik qoʻshini Chorraha darvozasidan Samarqandga kirib borganda, shaharning narigi tomonidagi Soʻzangaron darvozasidan yuzlab odamlar qochib chiqib ketmoqda edilar. Bobur hozir Shahrisabzda edi. Samarqanddan qochib chiqqan uning tarafdorlari Shahrisabzga qarab shoshilmoqda edilar.

Ammo Shayboniyxonning quyunday yugurik otliqlari ularning koʻpini quvib yetib, koʻchlarini talashdi, koʻplarini ayovsiz oʻldirishdi.

Kechasi shaharda talonchilik avjiga chiqdi. Faqat Xoʻja Yahyoning hashamatli uyiga va keng hovlisiga talonchilar yoʻlatilmadi. Koʻpakbiyning yuztacha navkari Xoʻja Yahyoning hovlisini qoʻriqlab turdi. Biroq Koʻpakbiy qoʻygan maxsus odamlar Xoʻja Ahrordan qolgan boyliklar, oltin va javohirlarning qaysi sandiqlarga joylashtirilayotganini pana-panadan kuzatib, koʻz tagiga olib qoʻydilar.

Xoʻja Yahyo ikki oʻgʻli, uch xotini, oʻn beshtacha xizmatkori yordamida tuni boʻyi koʻch yigʻishtirdi. Tong otganda barcha sandigʻ-u boʻgʻchalarini, koʻch-koʻronini toʻrtta aravaga va oʻn ikki tuyaga yuklatdi. Ayollarni soyabon aravaga chiqarishdi. Xoʻja Yahyoning

oʻzi, ikki oʻgʻli va oʻnta qoʻriqchi xizmatkor yigiti eng yaxshi otlarini mindilar, Samarqand bilan gʻamgin xayrlashib, qal'adan chiqdilar. Koʻpakbiy oʻz navkarlari bilan birga Xoʻja Yahyoni Ohaklik togʻigacha kuzatib qoʻydi. Termiz yoʻliga togʻ oshib oʻtish kerak edi. Bir togʻ darasining ichida Koʻpakbiy Xoʻja Yahyoga qarab:

– Biz onhazratimning buyrugʻini bajardik, endi u yogʻiga oʻzingiz ketavering! – dedi-yu, navkarlari bilan orqaga burildi.

U koʻrinishidan Samarqandga qaytmoqchiga oʻxshardi. Ammo daradan chiqqandan kevin voʻlni oʻngga burdi, boshqa bir dara orqali Xoʻja Yahyoning oʻng tomonidan aylanib oʻtdi. Gʻira-shira qorongʻilik tushib, odam odamni yaxshi tanimaydigan payt boʻlganda, Koʻpakbiy barcha askarlari bilan yuqoridan koʻchkiday yopirilib tushdi. Qiy-chuv, dod-voylarga qaramay, Xoʻja Yahyoning oʻzini ham, ikki oʻgʻlini ham, qoʻriqchi vigitlarini ham qilichdan oʻtkazishdi. Tirik qolgan ayollar Koʻpakbiyning oʻnboshilariga boshqa oʻljalar qatorida ulashildi. Sandiqdagi javohirlar va oltinkumushlarning yarmi kechasi xonning xazinasiga eltib topshirildi. Chunki Koʻpakbiyning Xoʻja Yahyoni hajga joʻnatish bahonasi bilan togʻ ichida oʻldirishi va bovligini musodara qilishi Shayboniyxonning imoishorasi bilan qilingan edi.

Bu voqeadan xabar topgan Sulton Ali mirzo oʻlim xavfi oʻziga ham yaqinlashib kelayotganini sezdi-yu, qanday qilib boʻlsa ham qochib qutulishning payiga tushdi. Quyuq tuman tushgan kuni azonda ikki navkari bilan Feruza darvozasidan yashiriqcha chiqib, Panjakent tomonga qochdi. Biroq Temur Sulton uning ketiga qoʻygan xufiyalar bu voqeadan xabardor edilar. Sulton Ali mirzo qal'adan qochib chiqquncha, uni ataylab qoʻyib bergandilar. Chunki uning aybini boʻyniga qoʻyib qochib ketayotgan paytida tutib oʻldirmoqchi edilar. Sulton Ali mirzo Siyob boʻylariga

bormasdanoq ketidan Temur Sulton ikki yuz navkari bilan uni quvib yetdi va darhol oʻrab olib, bir qilich zarbi bilan boshini tanasidan judo qildi.

Mansur baxshiga nikohlab berilgan Zuhra begim yolgʻiz oʻgʻlining tobutda boshsiz yotgan tanasini koʻrganda, oʻzining kallasiga mushtlarini urib, dod soldi, yuzini qoʻli bilan tirnab, qonatib yubordi, koʻylagining yoqasini yirtib chinqirdi. Lekin gʻoliblar buning hammasiga: «Battar boʻl, oʻzing sababchisan!» degandek bir zaharxanda bilan qarashdi.

4

Suvlarning yuzi xazonlarga toʻlib oqadigan sershamol kuz kunlari boshlandi. Samarqanddan oʻttiz chaqirimcha sharq-janub tomonda, Panjakentdan quyida Zarafshon daryosini kechib oʻtgan ikki yuzdan ortiq qurolli suvoriylar qorongʻi tushganda, Siyob boʻyiga yaqinlashdilar. Ular yoʻllarida uchragan qishloqlarni chetlab oʻtishar, hech qayerda toʻxtamasdan, shovqin-suron koʻtarmasdan, mumkin qadar sukut saqlab kelishar edi. Ularga birda-yarim duch kelib qolgan dehqonlar qoʻrqib, oʻzlarini chetga olar edilar. Shayboniyxonning askarlari hammaning yuragini olib qoʻygan edi. Hozir Samarqand atroflarida xonning besh mingdan ortiq qoʻshini bor edi. Odamlar mana bu otliqlarni ham shu qoʻshinning bir boʻlagi deb oʻylab, ulardan balodan qochganday qochar edilar.

Biroq otliqlarning oʻzlari allanarsadan xavotiri borday ehtiyot bilan bormoqda edilar. Qorongʻida Siyobdan oʻtayotganlarida, otlarning besh-oltitasi balchiqqa tiqilib qoldi. Ularni balchiqdan chiqarishga urinib, oʻzlari loyga botgan, yuzlarini qamishlar tirnagan navkarlar achchiq ustida baland ovoz bilan soʻzlashgan edilar, tanish ovoz ularni urishib berdi:

- Muncha dodlaysiz? Yogʻiyga xabar bermoqchimisiz? Boburning ovozini tanigan bir navkar:
- Ma'zur tuting, amirzodam, dedi. Harom o'lgur ot yomon tiqildi!

Buloq suvlaridan yigʻilgan Siyob sovuq kuz kechasida bugʻlanib oqmoqda edi. Tun qorongʻisi ustiga suv bugʻlari ham qoʻshilib, balchiqni quruq yerdan ajratib boʻlmas edi. Loyga botgan otlar ancha odamni yoʻldan tutib qolayotganini koʻrgan Bobur:

- Bas, chiqarib boʻlmasa, qolsin! dedi.
 Oosimbek darhol uning soʻzini quvvatladi:
- Piyoda qolganlar mening otlarimdan olsinlar! Oti loyga tiqilgan navkarlardan biri Tohir edi.
- Togʻlarda qancha ot-u tevalar qoldi, uchmalardan oʻtib kelgan otim endi shu balchiqda qolsinmi-a? – dedi Tohir otiga achinib.
 - Oʻzimizning jonimiz ham qil ustida! dedi Bobur.

Tohir Qosimbek uchun yetaklab kelinayotgan otlardan biriga mindi. Yana ikki navkar piyoda qolgan edi. Ularga Bobur oʻzining toʻrtta otidan ikkitasini berdi. Hozir uning koʻziga ot-ulov koʻrinmas edi. Eng muhimi, uning Samarqandga yaqinlashayotganini Shayboniyxon mutlaqo sezmasligi kerak.

Bobur yozi bilan togʻlarda yurdi, Shahrisabzdan Hisorga, undan Fondaryo boʻylariga oshib oʻtdi. Samarqand beklari butun navkarlari bilan Hisor hokimi Xisravshoh tomoniga oʻtib ketdi. Andijondan Bobur bilan kelgan odamlarning koʻpchiligi Iskandarkoʻl boʻylaridan Oʻratepa orqali Fargʻona vodiysiga qaytdilar.

Jangdovullar bu xabarlarning hammasini Shayboniyxonga allaqachon yetkazgan edilar. Boburning bir necha yuz kishi bilan togʻ orasida qiynalib yurganini aniq biladigan Shayboniyxon endi uning Andijonga qaytib ketishiga yoki Oʻzgandan narida xonlik qilayotgan togʻasi Olachaxon oldiga borishiga

shubha qilmas edi. Shayboniyxon yov hujum qilishini kutmas, shuning uchun shaharda besh yuz kishilik qoʻshin qoldirib, qal'a tashqarisidagi Xoʻja Diydor degan joyni qarorgoh qilgan edi.

Shayboniyxonning bexavotir yurganidan xabar topib, Samarqandga tavakkal qilib borayotgan Bobur juda galtis bir ishga bel bogʻlaganini sezardi. Shayboniyxonning josuslari koʻpligi unga ma'lum edi. Xon oʻzini sezmaganga solib, Boburni shaharga yaqin kelguncha qo'yib berishi, keyin qurshovga olishi mumkin edi. Shahar ichidagi qo'shin ham Boburning odamlaridan ikki-uch barobar ko'p. Bobur Shayboniyxonning qoʻliga tushsa, tirik qutulolmasligini biladi. Navkarlar, beklar omon qolishi va xon askarlari safida xizmat qilib ketishi mumkin - Sulton Ali mirzoning koʻpchilik bek va navkarlarini xon oʻz lashkarlariga qoʻshib olgani hammaga ma'lum. Ammo yangi bir sulolaga asos solmoqchi boʻlgan Shayboniyxon Temuriylarni ayovsiz oʻldirishga qasd qilganini Bobur bilar edi. Shuning uchun agar biron falokat boʻlsa-yu, qutulib ketolmasa, oxirgi nafasigacha jang qilishga, xonning qoʻliga tirik tushmaslikka ahd gilib bormogda edi.

Qorongʻida yana bir talay ariqlardan oʻtdilar, kuz kirib, egalari koʻchib ketgan kimsasiz bogʻotlarni oralab borib, Samarqanddan beriroqdagi Puli Magʻoq koʻprigi oldida toʻxtadilar. Bundan ikki kun oldin toʻrtta ishonchli navkar dehqon kiyimida shu yerga yuborilgan, ular qal'a devoriga qoʻyib chiqish uchun ulkan shotilar tayyorlagan, shu bilan birga, vaziyatni oʻrgangan edilar. Oldindan tuzilgan rejaga binoan, navkarlardan yetmish-saksontasi shu yerda otdan tushdilar va shotilarni koʻtarishib, sekin Gʻori Oshiqon deb ataladigan baland jarlikka tomon piyoda ketdilar.

Bobur qolgan navkarlar bilan Feruza darvozasiga yaqin borib, daraxtzor tepalik panasida toʻxtadi.

Atrof jimjit. Uzoqdan xoʻrozning birinchi qichqirigʻi eshitildi. Osmon ola bulut. Qorayib turgan baland qoʻrgʻon koʻzga zoʻrgʻa chalinadi. Bobur yonidagi Qosimbekning yutoqib, titrab nafas olganini sezdi-yu, oʻzining ham eti ucha boshladi.

Qal'adan ajal sovugʻi esayotganday tuyilardi. Bundan to'rt oy oldin mana shunday qorong'i tunda Xoʻja Yahyo shahar darvozasini yashiriqcha ochib berishiga ishonib, dushmanning masxarasini eshitib qaytgani esiga tushdi. Undan oldin Gʻori Oshiqonga kechasi borgan yigitlarning aldanib, qoʻlga tushib halok bo'lgani ko'z oldiga kelib, qalbiga tahlika solib oʻtdi. Bobur bu gal yana aldanmaslik uchun shahar ichidagi tarafdorlarning hech biriga xabar bermasdan, faqat oʻz kuchiga ishonib, tavakkal qilib keldi. Ammo uning ikki yuz qirq kishilik bir dasta qo'shini Shavboniyxonning besh-olti ming kishilik lashkarlariga qanday bas kelishi mumkin? Yana xon qoʻshini mustahkam qal'a ichida. Tarixda bunchalik tavakkalchilik boʻlganmikin? Qoʻrgʻonga pinhon yetib oldilar. Agar Shayboniyxon ichkariga «qopqon» qoʻygan boʻlsa-chi? Bobur bu «qopqon»ga oʻz oyogʻi bilan kirib boradimi? Ba'zi beklar mana shu andishalarni aytib, Boburni galtis niyatidan gaytarmoqchi ham boʻldilar.

Ammo bu niyatdan qaytish – Andijonga shumshayib borib, yana Ali Doʻstbekka mute boʻlish degan soʻz edi. Yoki uysiz, joysiz, kuz izgʻirinlari-yu qish sovuqlarida xor-u zor boʻlib yurishlari kerak edi. Bobur mutelig-u xor-zorlikdan koʻra, bir oʻlimni boʻyniga olib, Shayboniyxonga yoʻlbarsday dadil tashlanishni afzal koʻrgan va beklarni ham shunga koʻndirgan edi. Agar ishlari chappasidan kelsa-yu, Shayboniyxonning qopqoniga tushsalar, ajal sirtmogʻi eng avval Boburning boʻyniga tushishini hammalari bilardilar. Boburning barcha harakati – yov «qopqoni»ning qopadigan joyiga tegmasdan oʻtishga qaratilgan edi. Shu yergacha

sharpalarini yovga sezdirmay keldilar. Endi bu yogʻi qandoq boʻlarkin?

Bobur butun vujudi bilan atrofga quloq solar ekan, tun sukunatida oʻz yuragining dukillab urishini baralla eshitdi. Bu dukillashda goʻyo taqdir otining dukuri ham bor edi.

* * *

Ogʻir shotilarni sekin koʻtarib, qadimiy Chaqardiza¹ qabristonini aylanib oʻtayotgan navkarlarning biri – Tohir edi. Ular qorongʻida turtina-turtina Shohi Zindaning orqa tomonidagi bahaybat bir oʻngirga yaqinlashdilar. Oʻngirning tepasi baland jar. Uning etagida gʻor ham bor. Bu vahimali joylarga kunduzlari ham hech kim kelmaydi. Oyoq osti chakalakzor. Qoʻrgʻonning devori mana shu jar ustidan oʻtadi. Shotilarni devor tagiga koʻtarib borguncha, yigitlar qora terga botib ketishdi.

Ularga boshchilik qilayotgan Noʻyon Koʻkaldosh devor tepasiga tikilib, birpas kutdi. Terak boʻyi keladigan gʻishtin devor juda enli boʻlib, uning tepasidan bir necha kishi bemalol yurib oʻtishi mumkin edi. Biroq tepada hech bir sharpa sezilmas, qorovullar sovqotib pastga tushib ketganga oʻxshardi.

Shotilarni sekin tikladilar, uchini devor qirrasiga tirab qoʻydilar.

– Qani, chiqinglar! – shivirladi Noʻyon Koʻkaldosh gʻuj boʻlib turgan navkarlarga. Ammo oʻn uch gaz balandlikdagi devor juda vahimali, undan yiqilgan odam tirik qolmasligi aniq edi.

Ehtimol, qorovullar sezib qolishar-da, chiqayot-ganlarga tosh otar, oʻq yogʻdirar? Sal itarib yuborsa ham tamom. Shuni sezgan navkarlarga birinchi boʻlib chiqish juda dahshatli tuyilardi.

 $^{^{\}mbox{\tiny 1}}$ Chaqardiza – keyinchalik «Shakarjiza» deb aytiladigan boʻlgan.

Oxiri Noʻyon Koʻkaldosh oʻzi shotining poyasiga oyoq qoʻydi-yu:

- Bir oʻlim boʻlsa hamma vaqt bor, mardona boʻlinglar, qani! - dedi.

Tohir ikkinchi shotidan chiqa boshladi. Shotilar keng, mustahkam qilib ishlangan, har biri olti-yetti kishini bemalol koʻtarar edi.

Yigitlar oldinma-keyin yuqoriga chiqar ekanlar, Noʻyon hammadan oldin devor tepasiga yetdi. Devorning usti yoʻlkaday keng, otliq yursa ham boʻladigan. Yaqin orada hech kim yoʻq. Tohir ham chiqib, oʻzini devor kungurasining panasiga oldi va pastdan chiqqan navkarni qoʻlidan tortib shivirladi:

- Bolta qani?
- Mana.

Ikkinchi navkar beliga qistirilgan boltani Tohirga olib berdi.

- Shinakka bekin! - shivirladi No'yon kimgadir.

Kungura va shinaklar boʻlmasa, devor ustidagi odamning qorasi pastdan koʻrinib qolishi mumkin edi. Shuning uchun pastdan chiqqan navkarlar shinaklarga bekinib turdilar. Hamma chiqib boʻlgandan keyin, sekin-sekin yurib, engashib, devor usti bilan Feruza darvozasi tomonga bora boshladilar.

Devorning ma'lum bir joylarida qorovulxonalar bor edi. Bir qorovulxonaga yaqin kelganlarida ichkaridan kimdir naymancha talaffuz bilan uyqu aralash:

- Irisbay, keldingma? - deb soʻradi.

Devor ustidan kelayotganlar taqqa toʻxtashdi. Tohir qoʻlidagi boltaning sopini ikki qoʻllab qisdi-yu:

- Ha, - dedi.

Ammo ichkaridagi qorovul uning ovozini tanimay hadiksiradi shekilli, uyqusi birdan oʻchib:

- Kimsan? - dedi.

Noʻyon Koʻkaldosh qorovulxonaga qarab otildi. Qorovul ichkaridan shoshib chiqayotganda koʻkragiga

gʻarchillatib xanjar sanchdi. Qorovul jon achchigʻida chinqirib yubordi. Pastdagi qorovullar ham uygʻonib ketdi.

– Tohir, toʻxtamasdan darvozaga yugur! – dedi Noʻyon Koʻkaldosh. U yigitlarning besh-oʻntasini pastda uygʻongan qorovullarni bir yoqli qilish uchun qoldirdi-yu, oʻzi boshqa navkarlarni ergashtirib, Feruza darvozasiga tomon yugurib ketdi.

Shavbonivxon bu darvozani qoʻriqlashni Fozil Tarxon bilan uning yuz ellik yigitiga topshirgan edi. Hozir bu vigitlarning koʻpchiligi uy-uyiga tarqab ketgan, darvoza gorovulxonasida yigirmatacha odam uxlab yotar edi. Ular to uygʻonib, qurol-yarogʻlarini qoʻllariga olgunlaricha bolta koʻtargan Tohir darvoza qulfiga yaqinlashdi. Otning kallasiday keladigan qulf bir-ikki zarbani pisand qilmadi. Uyi bu yerga yaqin boʻlgan Fozil Tarxon mash'ala koʻtargan vigitlari bilan darvozaxonaga yetib keldi. Ularning biri darvoza aulfiga bolta uravotgan Tohirga qarab, nayza otdi. Nayza Tohirning dubulgʻasiga yonlama tegib sirgʻalib oʻtdi-yu, darvoza yogʻochiga qadaldi. Darvozaxonada nayzabozlik va gilichbozlik boshlandi. No'yon Koʻkaldosh boshliq yigitlar koʻpchilik edi. Fozil Tarxon boʻynidan qilich yeb, otdan yiqilib tushdi.

Tohir boltani ikki qoʻllab koʻtarib, goh qulfga, goh darvoza zanjirining zulfiga urar, temirdan uchqun sachrar, ammo zoʻr qulf «qilt» etmas edi. Nihoyat, zulfin sindi-yu, zanjir sharaqlab tushdi.

Qoʻrgʻon atrofida suv toʻldirib qoʻyilgan enli choh bor edi. Chohdan darvozaga oʻtiladigan koʻprik ham maxsus zanjir bilan darvoza tomonga koʻtarib qoʻyilgan edi. Tohir darvozani ochayotganda, yigitlardan biri koʻprikning zanjirini ham boʻshatdi. Bobur va Qosimbeklar ichkaridagi olishuv shovqinini eshitib, choh labiga kelib turgan edilar. Darvoza ochilib, koʻprik tushishi bilan ular ichkariga ot qoʻyib,

qilich yalangʻochlab kirdilar. Fozil Tarxonning tirik qolgan navkarlari shahar ichiga qarab qochdilar. Oosimbek boshliq otliqlar ularni quvib ketdi. No'von Koʻkaldoshga otini keltirib berdilar. Tohir ham, boshqa piyodalar ham yana otlandilar. Bobur navkarlarning bir qismini No'yon Ko'kaldosh bilan birga Chorraha darvozasini egallashga yubordi. Oʻzi qolgan navkarlar bilan Soʻzangaron darvozasiga qarab ot choptirib ketdi. Agar darvozalar tezroq egallanmasa, tashqaridan Shayboniyxon butun qoʻshini bilan kirib kelishi mumkin edi. Feruza darvozasi oldidan boshlangan jang shovqini birpasda butun shaharni qamrab oldi. Shahar dorugʻasi Jonvafo Shayxzoda darvozasi tomonda - Xoʻja Yahyodan tortib olingan hashamatli hovlida uxlab yotgan edi. Toʻpolondan choʻchib uygʻonib, bor navkarlari bilan hovlidan otlanib chiqqunicha, Qosimbekning yigitlari Fozil Tarxonning odamlarini quvib keldi. Chorraha darvozasidan quvilgan Koʻpakbiyning navkarlari ham dorugʻa yotgan joyga qochib kelmoqda edilar. Qorongʻida yov qaysiyu oʻzining odamlari qaysi, dorugʻa ajratolmay qoldi. Uning koʻziga hamma chopib kelayotgan yov boʻlib koʻrindi. Nazarida, Samarqandga bir necha ming kishilik yov bostirib kirganga oʻxshadi.

Dorugʻa: «Behisob yovga bas kelolmayman», deb oʻylab, otini Shayxzoda darvozasi tomonga burdi. Boburning odamlari hali bu darvozaga yetib kelmagan edilar. Dorugʻa oʻz navkarlariga buyurib, darvozani ochtirdi-yu, yuztacha odami bilan xon qarorgohiga tomon ot choptirib ketdi. Sahar palla mast uyqudan qoʻrqib uygʻongan koʻpchilik samarqandliklar xon navkarlarini Boburning odamlari quvib yurganini tong yorishganda fahmladilar, Shayboniyxondan norozi kishilar juda koʻp edi. Kosiblar talangan, dehqonlarning ekinlarini koʻchmanchi qoʻshinning behisob mollari toptab tashlagan. Haj yoʻlida ikki begunoh oʻgʻli bilan

vahshiylarcha oʻldirilgan Xoʻja Yahyoning tarafdorlari qotillardan qasd olish uchun kosib va dehqonlarni qoʻzgʻatdilar. Hokimiyat oʻzgargandan keyin amalidan ajralgan ilgarigi amaldorlar:

«Shayboniyxonning odamlari Sulton Ali mirzoni ham nomardlarcha oʻldirdilar», deb xun talab qilib chiqdilar. Boburning ikki yuz-u qirq kishisi yoniga besh-olti ming kishilik qasoskor olomon qoʻshildi. Selday dahshatli olomon xonning odamlarini yashiringan joylaridan topib chiqar, koʻchada qochib borayotganlarning oldini toʻsib qurshab olar, pichoqmi, boltami, tayoqmi, toshmi, gʻishtmi, qoʻllariga nimaiki tushsa, hammasi bilan zolimlarni ura-ura oʻldirib, yanchib tashlardi. Olomon orasida avvalgi mirzalar va beklardan jabr koʻrgan odamlar ham koʻp edi, ular besh-oʻn yil oldingi qasoslarini ham endi mana bu zolimlardan olmoqda edilar.

Kun chiqayotganda shahar tashqarisida bir qism qoʻshini bilan Shayboniyxon paydo boʻldi, ammo suv toʻla chohdan beriga oʻtolmadi. Barcha darvozalar Boburning odamlari tomonidan bekitib olingan, chohlarning koʻpriklari koʻtarilgan, ichkarida intiqom davom etmoqda edi.

5

Tohir kechasi bilan uxlamay yugurib-yelib yurgan boʻlsa ham gʻalabaning shodligidan charchaganini sezmas, faqat qorni ochqab, Samarqandning novvoylik va oshpazlik rastalari dam-badam esiga tushar edi. Ertalab hamma darvozalarga qorovullar tayin boʻlgandan keyin Qosimbek Tohirga javob berdi. Tohir otiga minib, yana ikkita otliq oʻrtogʻi bilan novvoylik rastasiga keldi. Bu yerda ham bir necha yuz kishilik izdihom besh-oltita xon navkarlarini oʻrab olib, toshboʻron qilmoqda edi. Navkarlarning ba'zilari

yiqilib, tosh-kesaklar ostida jon bergan, bir-ikkitasi qoʻli bilan yuzini toʻsib dod solar, ingrar edi. Yalang boshidan qon oqayotgan, yirtilgan koʻylagi orasidan momataloq badani koʻrinib turgan, oʻzi choʻkka tushib, odamlardan shafqat soʻrayotgan yigirma yoshlardagi yigitga Tohirning rahmi keldi. U olomon orasiga ot solib:

- Xaloyiq, Bobur mirzo farmon berdilar! - deb qichqirdi. - Taslim boʻlganlarni asir olmoq kerak! Bular ham musulmon! Xaloyiq, bas qiling! Biz ham navkarmiz! Navkar aybdor boʻlmasligi mumkin! Hamma ayb bularning xonlarida! Xaloyiq, toʻxtang! Bobur mirzoning farmonini bajaring!

Odamlar Boburning nomini eshitib, otliq yigitning gapiga quloq sola boshladilar. Shunda narigi ikki otliq ham olomon orasiga yorib kirdi. Uchovlashib, toshboʻronni toʻxtatdilar.

Tohir bu yerga nega kelganini ham unutdi. Chala tirik yigitlardan uchtasining qoʻlini orqasiga bogʻlatib, asir qilib, olib ketmoqchi boʻldi.

Shunda olomon orasida turgan sargʻish moʻylovli, baland boʻyli bir kishi:

– Toʻxta, yigit, sen... Tohir emasmiding? – deb qoldi. Tohir yoʻgʻon soʻyil koʻtarib olgan bu odamga tikilib qaradi-yu, bundan uch yil oldin mana shu koʻchada ochlarga non ulashgan paytini esladi.

- Mamat ogʻa! Siz nega soʻyil koʻtarib yuribsiz? Oʻzingiz ham oʻzbek urugʻidan emasmisiz?
- E, uka, bular oʻzbekka koʻp jamanliq qildi. Mening bechora xotinim shularning dastidan oʻlib ketdi!

Mamatning koʻzlarida yosh yiltiradi. Tohir bu odam bilan Robiya haqida gaplashganini esladi-yu, unutilgan alamlari birdan yangilandi. U asirlarni narigi ikki sherigiga haydatib yuborgach, oʻzi otini yetaklab, Mamatni chetga boshlab chiqdi.

- Mamat ogʻa, men tayinlab ketgan gap esingizdami?

– Qaysi?.. Ha, ha... Aytmoqchi, bechora xotinim tirikligida bir gap eshitib kelgan ekan... Siz aytgan qiz andijonlikmidi?

- Quvalik.
- Bilmadim, ishqilib, oʻsha tomondan obqochib kelishgan ekan. Keyin turkistonlik bir savdogar tarxon sotib olib ketgan ekan.
 - Turkistongami?
- Ha, keyin shu tarxon Shayboniyxon bilan birga Samarqandga koʻchib kelipti.
 - Qiz bilanmi? Qiz tirikmi, yoʻqmi?
 - Tirik!

Tohir Mamatning soʻyil tutgan qoʻllaridan mahkam ushladi-yu, shoshilib soʻradi.

- Oti Robiyami, a, Robiyami?
- Rahmatlik xotinim otini bilmas edi.
- Oʻzini koʻriptimi? Qaerda koʻripti?
- Fozil tarxonning uyida.
- Qaysi Fozil tarxon?
- Bugun kechasi uni oʻzlaring oʻldiribsizlar-ku?
- Uyi qayerda, uyi?
- Juring, men koʻrsatib qoʻyayin!

Tohir bir sakrab, otiga mindi-yu, Mamatni orqasiga mingashtirdi. Mamat soʻyilini tashladi, Tohirning qoʻltigʻi tagidan ushlab, uni qingʻir-qiyshiq koʻchalardan boshlab bora boshladi. Otini yoʻrttirib borayotgan Tohir: «Ilohim noumid qilmagin-da, Parvardigor! – derdi ichida. – Ilohim Robiya boʻlsin-da!» U olti yildan beri Robiyani qidira-qidira, axiri, endi topilmaydi, degan fikrga kelgan va bu fikrga koʻnika boshlagan edi. Hozir chaqmoqday chaqnagan umid uning vajohatiga momaqaldiroq larzasini solyapti. Bu umidning chaqinday tez soʻnishi mumkinligi yuragini taka-puka qilardi, a'zoyi badanini zir titratardi.

– Ana oʻsha uy! – deb Mamat orqasida katta bogʻi bor ikki qavatlik gʻishtin imoratni koʻrsatdi. Darvoza lang ochiq, qurolli yigitlar ichkaridan jimjimali sandiqlar va choʻgʻday gilamlar koʻtarib chiqmoqda edilar. Yaqinroq borib, Tohir Qosimbekning navkarlarini tanidi. Ularga katta savdogar boy va Shayboniyxonning yaqin kishisi Fozil Tarxonning molmulkini musodara qilish topshirilgan edi.

Tohir darvoza oldida otdan tushdi-yu, tanish navkarlarning hayhaylashlariga e'tibor bermay, toʻgʻri ichkari hovliga yoʻnaldi. Ravonda Fozil Tarxonning qonga belangan murdasi yotipti. Yuqorigi qavatdan ayollarning yigʻi-sigʻisi eshitildi. Fozil Tarxonning xotinlari erlari uchun aza ochgan, ba'zilari boylik toʻla sandiqlardan ajralayotganlari uchun ham dodlashar, ba'zilari esa yovdan qoʻrqib yigʻlashar edi.

Tohir pastki qavatdagi ochiq eshiklarga bosh tiqib qaradi. Hech kim yoʻq. Faqat ayollarning kiyimlariyu bezaklari turibdi. Bu tarxonning nechta xotini boʻlganikin? Robiya shunga tushgan boʻlsa, uni ham xotin qilib olganmikin? Tohirning xayoliga toʻsatdan kelgan bu fikr qalbini oʻrtab oʻtdi. U ayvondan pastga sakrab tushib, hovlining oʻrtasiga keldi-yu, yuqorida yigʻlayotgan ayollarga qarata qichqirdi:

– Hey, Robiya bormi? Robi-ya! Quvalik Robiya shu yerda bormi?

Xotinlarning yigʻisi birdan tindi. Yuqoridagi qavatning ayvonidan yashil durrali bir juvonning boshi koʻrindi. Uning qosh-koʻzi Robiyanikiga oʻxshardi. Tohir yuqoriga talpinib, qaltirab:

- Robiya! - dedi. - Robiya!

Yashil durrali juvon uni koʻrdi-yu, oʻzini orqaga oldi, soʻng yana ayvon chetiga chopib keldi. Tohir endi uning baxmal nimchasini, boʻynidagi marjonlarini ham koʻrdi. Juvonga yigitning tovushi tanish tuyilar, ammo qilich va xanjar taqqan, yuzida katta chandigʻi bor, soqol-moʻylovi oʻsiq bahaybat navkar uning vahmini keltirardi. Juvon aldanishdan qoʻrqib, yana orqaga

qochdi. Tohir yuqorigi qavatga qarab chopdi, ammo sarosima boʻlganidan, ayvon chetidagi zinapoyani topolmadi. Negadir oʻpkasi toʻlib, koʻziga yosh keldi:

- Robiya, men Tohirmen! Tohir!

Yuqoridan juvonning chinqirigʻi eshitildi:

- Tohir ogʻa!

Soʻng yashil durrali juvon chochpopugini shildiratib, zinapoyadan oʻzi chopib tusha boshladi. Yuz-koʻzi Robiyaniki, ammo marjonlari, kiyimlari, yana nimasidir begona. Tohir uni koʻrib, joyida qotib qoldi. Robiya ham zinapoya oldida toʻxtadi, koʻzlarini chaqchaytirib, qoʻrquv aralash shivirladi:

- Siz Tohir ogʻamning arvohisiz!

Robiya Tohirni oʻsha nayza zarbidan oʻlib ketgan deb oʻylar, uning arvohiga bagʻishlab, duolar oʻqir edi. «Endi tirik koʻrmaymen, arvohini koʻrsam ham rozi edim», deb Xudodan astoydil soʻragan paytlari koʻp boʻlur edi. Uning shu iltimosiga farishtalar omin degan ekanmi?

- Arvohingiz ham jonimdan aziz, Tohir ogʻa!
- Men tirikmen, Robiya! Seni olti yildan beri izlab yuribmen!
- Tiriksiz?! deb, Robiya Tohirga yaqin keldi. Uning chakmonini, qilichini, qoʻllarini bir-bir ushlab koʻrdi. Tohir uni yelkasidan quchib, bagʻriga bosgan edi, Robiya uning arvoh emasligiga endi ishonib, yigʻlab yubordi: Tirik! Tirik! Xudoga shukr, tirik!

Tohir uning sariq atlas koʻylagi ustidan yelkasini silab:

- Robiyam, jonim! - dedi. - Xayriyat, oʻzing ham tirik ekansen! Men seni olti yil izladim, qayerlarda yurding? Nima boʻldi?

Robiya Fozil Tarxonning yettinchi xotini boʻlib oʻtkazgan yillarini esladi-yu, birdan orqaga siltanib, Tohirning qoʻllaridan yulqinib chiqdi: - Meni quchmang, Tohir ogʻa! Men sizga munosib emasmen!

Robiya alamli koʻzlari bilan ayvonda yotgan oʻlikka qarab qoʻydi. Fozil Tarxon uni oʻsha bosqinchilardan bir hamyon oltinga sotib olgan edi. Robiya ellikdan oshgan bu choldan hazar qilar edi. Fozil Tarxon Turkistonning Yassi shahrida uni nikohlab olgandan keyin besh-oʻn kun turar-turmas, savdo ishi bilan Buxoroga joʻnadi, u yerdan boshqa bir koʻhlik qizni olib, keyin oʻsha bilan boʻlib ketdi. Robiya olti yildan beri uning haramida bevaday yashaydi. Lekin buni endi Tohirga qanday tushuntiradi? Tohirga fotiha qilingan Robiya keyin birovga xotin boʻlgan, buning dogʻini qanday yuvish mumkin?

Robiya yuzini qoʻllari bilan toʻsib, yum-yum yigʻlay boshladi. Uning boʻynidagi marjonlari, sochiga taqilgan chiroyli kumush chochpopuklari, egnidagi atlas koʻylagi – hammasi oʻsha boy savdogarning puliga kelgan. Tohir shuni oʻyladi-yu, uning nazarida, Robiya oʻlgan eriga kuyunib yigʻlayotganday koʻrindi.

- Robiya, rostini ayt, sen eringga... sodiqmisen?!
- Meni pulga sotdilar! Zoʻrlab nikohladilar!
- Boʻlmasa nechun muncha kuyunib yigʻlaysen!
- Men sizga vafo qilolmaganimga kuyunamen! Sizni unutganim yoʻq edi, Tohirjon ogʻa! Mana, tepamiz-da Xudo turipti! Bu savdogar sizning tirnogʻingizga ham arzimas edi! Lekin meni unga qul qilib berdilar.

Tohir tishini tishiga bosib soʻradi:

- Bolang bormi?

Robiya yigʻi aralash bosh chayqadi:

- Men nomiga xotin edim... Aslida beva...

Bir vaqtlar gulday qiz boʻlgan Robiyaning oʻzini «xotin», «beva», deb atashi Tohirning borligʻini qaqshatib yubordi. Robiyaday qizga olti yildan beri «it tegmay» yurishi mumkin emasligini u ilgari ham

xayolida koʻp oʻtkazardi. «Faqat tirik topsam bas!» deb qidirardi.

Biroq Robiyani topgani bilan yoshlikdagi begʻubor, sodda baxti endi abadiy topilmasligini u ilgari bilmas edi. Badandagi ogʻir jarohat tuzalganda ham chandigʻi umrbod qolganiday, boshlariga tushgan savdoning dahshatli izi koʻngillaridan osonlikcha ketmasligini Tohir endi sezmoqda edi. Robiya ham abadiy yoʻqolgan begʻubor yoshligiga kuyunib, yigʻlamoqda edi.

– Robiya, bas! Omon qolganimizga shukr qil, qani, yur!

Tohir Robiyaning bilagidan olib, tashqariga boshladi. Qiz yigʻidan toʻxtab:

- Qayoqqa? dedi.
- Sen hali ham mening qalligʻimsen. Yur, tezroq!
- Axir men... men narsalarimni olay!
- Hech narsa olmaysen. Hammasini unut. Ikkinchi yodimga solma!

Tashqi hovliga chiqqanlarida, Robiya yuk tashiyotgan navkarlarni koʻrdi-yu:

Koʻchada... uyalamen! – dedi. – Yopinchigʻim yoʻq.
 Tohir chakmonini echib berdi. Robiya tovoniga tushadigan uzun simobi chakmonni boshiga yopindiyu, Tohirning otiga mingashib, chiqib ketdi.

Keyin Tohir Qosimbekka arz qilib, Faqih Abullays mahallasidan Shayboniyxonning odamlari tashlab ketgan durustgina bir hovlini oldi. Robiyaning iddasi oʻtgach, mahalla imomi uni Tohirga nikohlab berdi.

6

Kechasi yoqqan qalin qor har bir tomni, devorni, har bir daraxt va gumbazni mayin oq hoshiya bilan bezab chiqqan.

Bobur Boʻstonsaroyning yuqorigi qavatidan shaharga qarab turibdi. Toza qor orasidan jimjima boʻlib

koʻrinayotgan daraxt shoxlari hozir uning nazarida xuddi oq qogʻozga bitilgan nasta'liq xatiga oʻxshab ketadi. Bugun Hirotdan, Alisher Navoiydan kelgan xat ham nasta'liq¹ bilan yozilgani esiga tushdi-yu, qalbidagi quvonch va faxr tuygʻusi yangi bir kuch bilan mavjlana boshladi.

Bobur Samarqandni Shayboniyxondan tortib olgandan beri uning jasoratiga tan berib, she'r yozganlar, satrlardan abjad hisobi bilan gʻalabaning aniq sanasini chiqargan tarixnavislar koʻp edi. Alisher Navoiydan Boburga kelgan tabrik esa hammasining gultoji boʻldi. Hirot Samarqanddan qanchalik uzoq, Navoiyning diqqat-e'tiborini band qiladigan mashhur odamlar-u muhim ishlar qanchalik koʻp! Shunga qaramay, Navoiy Boburni ham bilar ekan, uning taqdiriga uzoqdan qiziqib qarar ekan, Samarqandni avval bir marta olganidan xabardor ekan. «Bu daf'a Samarqandni oʻz nomingizga munosib hamla bilan olmishsiz», debdi.

Boburning oʻtgan daf'a Samarqandni yetti oy qamal qilganda, shahar xalqi ochlikdan nechogʻliq azob tortganini Navoiy ham eshitgan boʻlsa kerak. Bunday qamallarni u Boburga munosib koʻrmagani uchun shunday deb yozganmikin?

Bobur qimmatbaho javonlariga kitoblar terib qoʻyilgan xonayi xosning toʻriga oʻtdi. Xushboʻy sandal daraxtidan ishlangan miz ustida Navoiydan kelgan oltin bogʻichli xat turipti. Bobur miz oldiga toʻshalgan zarbof koʻrpachaga oʻltirib, xatni boshqatdan oʻqishga tushdi. Har bir satr turkiy tilning goʻzal jilvalari bilan toʻlgan. Bobur birinchi oʻqishda uncha e'tibor bermay oʻtkazib yuborgan bir necha jumlaga bu gal qayta-qayta tikildi. Navoiy Boburning shoirlik

 $^{^{\}rm l}$ Nasta'liq – arab yozuvidagi husnixatning keng tarqalgan bir turi.

orzusi borligini andijonlik bir me'mordan eshitib, uni dadilroq yozishga undagan edi. Bu me'mor mavlono Fazliddin boʻlsa kerak. Agar mavlono Hirotga yetib borib, Navoiyning huzuriga kirgan boʻlsa, boshqa koʻp narsalarni ham aytib bergan boʻlishi kerak. Bobur Navoiyga yoʻllamoqchi boʻlgan javob maktubiga yaxshi bir she'rini ham qoʻshib yubormoqchi boʻldi-yu, mashqlari yozilgan qalin daftarni olib varaqlay boshladi. Koʻpchiligi yoʻlda, ot ustida xayoliga kelgan, jang-u jadallar orasida daftarga uzuq-yuluq yozib qoʻyilgan, ammo hali tugallanmagan she'rlar. Xiyonat ustiga xiyonat boʻlgan, Bobur xonumonidan ayrilgan, atrofida bironta sirdosh doʻst topolmay oʻzini nihoyatda yolgʻiz sezgan ogʻir kunlarda bir gʻazal boshlagan edi:

«Jonimdan oʻzga yori vafodor topmadim, Koʻnglimdan oʻzga mahrami asror topmadim».

Ammo bu gʻazal chala yotipti. Balki shuni bitirib yuborish kerakdir? Alisher Navoiy ham atrofidagi kishilardan koʻp bevafolik koʻrganini, hatto yaqin doʻsti Husayn Boyqaro ham uning sir-u asroriga mahram boʻlolmayotganini Bobur ishonchli bir odamdan eshitgan edi. Qani endi Bobur Navoiyning koʻnglidagini ham topib aytolsa!

Bu gʻazal Navoiyga yoqishi mumkin. Uni tezroq tugallash kerak. Bobur qogʻoz-qalam oldi.

Shu payt savdarboshi eshikdan hovliqib kirib, ta'zim qildi:

- Mirzo hazratlari, qulingizni ma'zur tuting.
- Xoʻsh? dedi Bobur norozi boʻlib.
- Xonim hazratlari qabulingizga muntazirlar.
- Onammilar? deb Bobur sakrab oʻrnidan turdi.
- Keldilarmi?

- Begimlar ham keldilar!
- Voajab! deb Bobur quvonib, eshikka tomon shoshildi.

* * *

Ular salkam olti oydan beri koʻrishmagan edilar. Qutlugʻ Nigor xonim Oyisha begim va Xonzoda begimlar bilan Oʻratepada qolgan edilar. Keyin Samarqanddan Bobur yuborgan ishonchli odamlar ularni Oʻratepadan bu yerga koʻchirtirib keldilar.

Bobur ular bilan Boʻstonsaroyning birinchi qavatidagi katta tanobiy uyda koʻrishdi. Onasi uni bagʻriga bosganda, Bobur onasining ozib, qoʻllari yengillashib qolganini sezdi. Opasi Xonzoda begim esa sovuqdan kirgani uchunmi, yuzlari choʻgʻday yonib, koʻzlari chaqnab turipti. Uzoq yoʻl uni hech qancha qiynamagandek quvnoq. Avvalgidan ham chiroyli. Bobur unga oʻng yelkasini tutib soʻrashar ekan:

- Nechun bu qadar hayal qildilaring? dedi. Necha haftadan buyon muntazirmiz!
- E, soʻramang, amirzodam, uzrli sabablarimiz bor,
 deb Xonzoda begim Oyisha begimga koʻz tashlab qoʻydi.

Bir vaqtlar Oyisha begimni koʻrmasdan sevib yurgan paytlarida uning oyogʻiga bosh qoʻygisi kelib gʻazal yozganlari endi Boburga ta'biri xato chiqqan bir tushday tuyilardi... U Oyisha begimni oylar davomida koʻrmasa ham sogʻinmasdi... Shunday boʻlsa ham u Oyisha begimga iloji boricha yaxshi muomala qilar edi. Hozir ham kichik jussali qotma kelinchakka yaqinlashib:

– Xush koʻrdik, begim! – dedi-da, unga oʻng yelkasini tutdi.

Oyisha begim ozgʻin qoʻlini uning yelkasiga qoʻyib koʻrishar ekan:

- Hazratim, gʻalabangiz muborak! - dedi.

Hamma Boburni «amirzodam», desa Oyisha begim uni yana ham ulugʻlab, «hazratim», derdi.

- Sizga ona shahringiz muborak, begim!
- Qulluq, deb Oyisha begim ta'zimga bosh egdi.
- Kelinimiz yoʻlda koʻp azob tortdilar, dedi Xonzoda begim.

Bobur xotinining beli yoʻgʻonlashib, qorni doʻppayib qolganini koʻrdi. Ajabo, Bobur ota boʻladiganmi? Koʻrishmaganlariga olti oy boʻldi. Demak, kamida olti oylik...

Oyisha begimning ozgʻin yuzida homilador xotinlarda boʻladigan dogʻlar paydo boʻlgan edi. Ilgari ham otda yurolmaydigan, mahofada boshi aylanadigan begim endi ogʻrioyoqligida qanchalik qiynalganini, unga qarab qanchalik sekin yoʻl bosganlarini Bobur oʻzicha tasavvur etdi.

– Xudo xohlasa, endi barcha mashaqqatlardan xalos boʻldilaringiz, – dedi. – Hammalaringiz uchun maxsus joylar-u jihozlar tayyorlanmishdir. Yana neki darkor boʻlsa buyurursiz. Boʻstonsaroyda kimki bor, hammamiz xizmatlaringizda boʻlurmiz!

Xonzoda begim quvnoq kulib:

- Minnatdormiz! dedi. Amirzodam bilan diydor koʻrishib, boshimiz osmonga yetdi. Endi shu osmonda suhbatingizdan bahramand qilsangiz bas.
- Kamina ham suhbatlaringizni sogʻinganmen. Sizlar joylashgunlaringizcha osmonda dasturxon hozirlanur, – deb, Bobur qoʻli bilan yuqorigi qavatga ishora qildi.

Uning osmonni payrov qilib hazillashganidan hammalari kulib oldilar.

Bobur yuqorigi qavatga chiqar ekan, qalbini toʻldirgan shodliklar orasida surnay navosidek jarangli va yoqimli bir tuygʻu yangrab eshitilayotganini sezdi. Bu uning dilida birdan uygʻonib ketgan otalik tuygʻusi

edi. Uning boʻlajak farzandini bagʻrida koʻtarib yurgan Oyisha begim yuzidagi qoʻngʻir dogʻlari bilan Boburga avvalgidan qadrdonroq tuyilardi. Buni sezgan Oyisha begim avvalgidan dadilroq muomala qilar edi. Erxotin xobgohda chiroqni oʻchirib yotganlarida, begim koʻrpani yuziga tortib:

- Men faxrlanamen, - deb shivirladi.

Bobur oʻz soʻzining ustidan chiqqanligi uchun, «endi Samarqandda uchrashamiz», deb ketib, axiri shu aytganini qilgani uchun xotini undan iftixor qilmoqda edi.

U Boburning boʻlajak farzandiga ona boʻlish bilan faxrlanishini ham aytmoqchi edi. Bobur buni tushundi-yu, homilaning necha oylik boʻlganini bilgisi keldi, ammo roʻyi-rost soʻrashga tili bormay, gapni aylantirdi:

- Endi... shodiyonasi qachon?
- Salkam uch oy bor. O'ylasam, vahmim kelur.
- Vahmni qoʻya turing. Hozir faxrdan gap ochdingizku.
- Ha, agar Xudo oʻgʻil bersa, ismini Faxriddin qoʻyurmizmi?

Oyisha begim Boburning nomi Zahiriddin ekanini oʻylab, shunga ohangdosh nom topgan edi.

Bobur mamnun tovush bilan:

– Xoʻp, oʻgʻil boʻlsa, Faxriddin, – dedi. – Agar qiz boʻlsa, Faxrinisomi?

Oyisha begim qiz boʻlishini istamas edi, chunki oʻgʻil tugʻib, taxt vorisiga ona boʻlishni orzu qilardi. Shunday boʻlsa ham Boburga:

- Mayli, dedi. Lekin men Xudodan oʻgʻil tilaganmen.
 - Aytganingiz kelsin!

Faxriddin... Faxriniso... Shu kunlarda Boburning koʻnglini toʻldirib-toshirgan iftixor tuygʻusiga bu nomlar juda mos edi.

* * *

Omad ham bir kelsa, qoʻsha-qoʻsha boʻlib kelishini Bobur endi bilmoqda edi. Samarqand uning qoʻliga oʻtgandan keyin bu yogʻi Urgut, u yogʻi Sugʻd va Dabusiya qal'asi birin-ketin Shayboniyxonning ixtiyoridan chiqib, Boburning hokimiyatini tan oldi. Mana bugun Qarshi va Gʻuzordan xushxabar keldi – bu shaharlar Shayboniyxon qoʻygan dorugʻalarni quvibdi. Boburga sovgʻa-salomlar yuborib, uning ixtiyoriga bir necha yuz navkar ham yoʻllabdi. Bobur bu navkarlarni boshlab kelgan beklarni devoni xosda qabul qilib, hammasiga sarpo kiydirdi va ulufa tayinladi.

Soʻng kecha tamomlanmay qolgan maktubining davomini yozish uchun ikkinchi qavatga koʻtarilar ekan, keng marmar zinapoyada opasi Xonzoda begimga duch keldi.

- Amirzodam, Hirotdan kitobat kelgani rostmi? Bobur toʻxtab, opasining yuziga sinovchan koʻz bilan qaradi-yu:

- Rost, hazrat Alisherbekdan, dedi.
- Muborak boʻlsin!
- Qulluq.

Xonzoda begim inisidan yana qandaydir murakkab bir xabar kutib, uning yuziga termilib qaradi. Bobur opasining koʻnglidagi dardni sezib, bir lahza taraddudlandi. Soʻng rost gapni yashirsa, yolgʻon gapirganday boʻlishini oʻyladi-yu:

– Yuring: kitobatni koʻrsatay, – dedi.

Xonzoda begim xonayi xosda Boburning qarshisida oʻtirib, Alisher Navoiyning maktubini oʻqir ekan, andijonlik me'mor tilga olingan joyiga yetganda, koʻzida yosh yiltiradi.

– Nechun koʻzingiz yoshlandi, begim? Men sizni suyuntirmoqchi edim-ku!

- Qandoq qilay, toleyim past ekan.
- Iningiz podshoh boʻla turib, nahotki sizga yordam berolmasa?
- Siz hali ham meni deb koʻp jafo chekdingiz. Agar oʻsha yili... Oʻshda men rozi boʻlsam, ehtimol keyin Ahmad Tanbal sizga buncha yogʻiylik qilmas edi.

Opasining bunchalik tantilik bilan aytgan soʻzlari goʻyo Boburni yana tanti boʻlishga undar edi. Koʻngli yaxshi tuygʻularga toʻlib yurgan shu kunlarda nahotki tugʻishgan egachisiga katta bir yaxshilik qilolmasa?

Mana, hozir ular Samarqandning muhtasham bir koshonasiga koʻchib kelishdi. Bu yerda qancha asilzoda-yu shahzodalar yashagan. Ammo koʻpchiligi iz qoldirmay ketgan. Faqat me'morlar yaratgan goʻzalliklar hali ham koʻrgan koʻzni quvontirib, yalyal yonib turibdi. Yaxshi bir me'mor – hunarsiz asilzodaning yuztasidan afzal emasmi?

- Begim, siz Tanbalning yogʻiyligi uchun xijolat chekmang. Ilon baribir ilonligini qilur edi.
 - Minnatdormen, amirzodam.
- Hazrati Alisherbek ham bizdan ulugʻ ishlar kutib kitobat yubormishlar. Nasib qilsa, biz ham umrboqiy obidalar qururmiz, hunarpeshalar yana yigʻilib kelurlar. Men bu muborak kitobatning javobini maxsus elchidan berib yuborurmen. Agar Hirotga borgan oʻsha andijonlik me'mor mavlono Fazliddin boʻlsalar, elchi topib, Samarqandga taklif qilur.

Xonzoda begimning hali yoshi qurimagan koʻzlarida endi shodlik uchqunladi. U inisiga zavq bilan tikilib shivirladi:

- Siz Movarounnahr osmonida bizning yagona umid yulduzimizsiz!
- Endi Parvardigor Shayboniyxonni tezroq daf qilsin-u yurt tinchisin, deng. Oʻshanda nafasni rostlab, Oʻshda qilgan orzularimizning ijrosiga kirishurmiz.

Mavlono Fazliddin Andijonda qurmoqchi boʻlgan me'morlik obidalarining tarhlarini, loyihalarini Xonzoda begim onasidan olib, hamon asrab yurar edi. Hozir buni Boburga aytishdan iymandi-yu:

– Amirzodam, men endi kecha-yu kunduz Xudoga iltijo qilurmen – dedi, – ilohim shu orzularimiz roʻyobga chiqsin!

Xonzoda begim ruhi koʻtarilib chiqib ketganidan keyin Bobur sandiqchadan she'r daftarini oldi-yu, kechagi mashqini davom ettirmoqchi boʻldi. Daftardagi bir matla' uning hozirgi ruhiga mosroq edi:

«Har kimki vafo qilsa vafo topqusidir, Har kimki jafo qilsa, jafo topqusidir...»

Alisher Navoiyga shu she'rni bitirib yuborsa yaxshiroq boʻlarmidi? U yana bir satr yozdi, oʻziga yoqmagandan keyin oʻchirib, yana yozdi, yana oʻchirdi, nihoyat uchinchi urinishda:

«Yaxshi kishi koʻrmagay yomonliq hargiz»

degan satrni topdi-yu, uni ich-ichidan yoqtirib, ilhom hayajonidan nafasida titroq paydo boʻldi. Nazarida, Navoiy uning yelkasi osha bu yangi satrni oʻqiyotgandek edi. U odamlarga Navoiydek koʻp yaxshilik qilgan siymoning hech qachon yomonlik koʻrmasligini istar, endi shu istagini she'riga ham singdirmoqchi boʻlardi.

Bobur toʻrtinchi satrni boshlaganda, savdarboshi eshikdan bosh egib, qoʻrqa-pisa:

- Mirzo hazratlari, dedi.
- Meni tinch qoʻying demabmidim?
- Qulingizni afv eting...
- Yana ne tashvish?
- Amirzodam buyurgan edilar. Agar mulla Binoiyni keltirsalar, darhol xabar bering, degan edingiz.

- Shoir Binoiy Shahrisabzdan kelibdirmi?
- Qosimbek janoblari keltirmishlar.

Bobur bu xabarni eshitdi-yu, yozishdan toʻxtab, qalamni miz chetiga qoʻydi. Pastdagi qabulxonaga tushib borayotganda, Binoiyning taqdiriga oid murakkab voqealar xayolidan takror oʻta boshladi.

* * *

Bobur hirotlik mashhur shoir Kamoliddin Binoiy bilan bundan uch yil oldin Samarqandga birinchi gal kelgan paytlarida tanishgan edi. Binoiyning san'atkor xattotlar tomonidan koʻchirilgan nodir bir qoʻlyozma kitobi bor ekan. Kitob yigʻishga havasmand Bobur bu kitobga juda havasi keldi. Binoiy kitobini unga sovgʻa qilmoqchi boʻldi. Bobur Binoiyning Samarqandda musofir ekanini, tanqislik tortib qiynalganini bilar edi. Shuning uchun Bobur sahhoflarni chaqirib, bu kitobning eng baland narxi qancha boʻlishini soʻradi. Sahhoflar «eng baland bahosi besh ming dirham», deyishdi. Bobur bu pulni Binoiyga yuborishga ulgurmay, qattiq betob boʻlib yotib qolgan edi.

Keyin u kasallikdan turib, Andijonga joʻnash uchun yoʻl hozirligini koʻrayotganda, «Majmuati Rashidi» deb ataladigan oʻsha kitobni koʻrdi-yu, Binoiyga hali haqini bermagani esiga tushdi. Darhol xazinachini chaqirib, besh ming dirham oltinni sanatdi, soʻng pulni kitobdorga berib, Binoiyga yubortirdi.

Bir vaqt kitobdor Binoiyni topolmay qaytib keldi. Musofir shoirning Samarqandda muqim turadigan uyi yoʻq, u bugun qayoqqadir mehmonga ketgan edi. Boburning odamlari Andijonga tezroq joʻnash va kuch yigʻish tashvishi bilan nihoyatda band boʻlganliklari uchun hozir Binoiyni qidirib yurish ularga juda malol keldi. Lekin Bobur:

– Shu qiyomatlik qarzni uzmaguncha Samarqanddan qoʻzgʻalmaymen! – deb turib oldi.

Shundan keyin savdar-u navkarlar shaharning har tarafiga ot choptirishib, nihoyat Binoiyni topdilar, unga boʻlgan voqeani aytib, besh ming dinor pulini topshirdilar.

Kishi moliga suq podshohlarni koʻp koʻrgan Binoiy oʻn olti yoshli Bobur mirzoning bunchalik halolligidan juda qattiq ta'sirlandi-yu, unga atab bir she'r yozdi. Bu she'rdan bir nusxasini xattotga koʻchirtirib, Bobur joʻnayotganda, unga esdalik qilib berib yubordi. Qirq toʻrt yoʻllik bu she'rda u Boburni koʻp maqtagan:

«Shoh sultoni Zahiriddin Bobur, Ki jahon shud zi siti adlash pur!»

- deb, goʻyo jahon Boburning adolat bobidagi shuhratidan nurga toʻlganini aytgan edi. Bobur, «Jahon qayda-yu, mening shuhratim qayda!» deb, bu satrlardagi mubolagʻadan kulgan boʻlsa ham, lekin zamonadan koʻp jabr koʻrgan Binoiy uchun shu kichik yaxshilik tufayli, ehtimol, butun jahon adolatga toʻlib koʻringandir, deb oʻyladi.

Biroq keyinchalik Samarqandga Shayboniyxon xon boʻldi va shahar shoirlarini yigʻib, bir mushoira oʻtkazdi. Bu majlisida Binoiy ham qatnashib, she'r oʻqidi. Xon uning she'rini yoqtiradi-yu, Binoiyni oʻziga mulozim qilib oladi va erishgan gʻalabalarining tarixini yozishni topshiradi. Binoiy «Shayboniynoma» degan asarini endi yoza boshlagan paytda Samarqand yana qaytadan Boburning qoʻliga oʻtadi. Shayboniyxon atrof tumanlardan ham quvilib, Buxoroga qarab chekingan kunlarda Binoiy uning qarorgohidan qochib, Samarqandga keladi. U Bobur bilan uchrashmoqchi boʻladi, lekin Qosimbek uni Shayboniyxon tarafdori deb, Boburning huzuriga kiritmay, Shahrisabzga

joʻnatib yuboradi. Bobur bu hodisadan yaqinda xabar topib, Qosimbekka:

– Chakki qilibsiz, – dedi. Mulla Binoiy – katta shoir. Oʻzi kelgan boʻlsa ruxsat bermoq kerak edi.

Qosimbek vaj ko'rsatdi:

- Katta shoiringiz Shayboniyxonni maqtab she'r yozgan.

Bobur kuldi:

– Bizni maqtab she'r yozganini bilmasmisiz? Tojdorlar maqtovni suysalar, shoir ne qilsin!

Qosimbek jiddiy turib, e'tiroz qilmoqda edi:

- Amirzodam, bu odam Shayboniyxonning xufiyasi boʻlishi mumkin.

Bobur o'ylab turib:

- Yoʻq, dedi. Hirotda Boyqaroday shohga xufiya boʻlmagan kishi Shayboniyxonga xufiya boʻlmas.
- Ammo bu shoir Xoʻja Yahyoning hovlisida turib, uning tuzini ichgan, keyin Xoʻja Yahyoni noinsoflarcha oʻldirtirgan Shayboniyxonga mulozim boʻlgan. Shu yaxshimi?
- Bu yaxshi boʻlmasa, yaxshilik qanday boʻlishini biz koʻrsatmogʻimiz kerak. Odam yuboring, mulla Binoiyni Samarqandga beshikast olib kelsinlar.

Soʻnggi soʻz farmoyish tarzida aytilgani uchun Qosimbek uni bajarishga majbur boʻlgan edi.

...Bobur pastga tushib, devonxonaga toʻrdagi eshikdan kirdi. Koʻp oʻtmay poygakdagi eshikdan Qosimbek Binoiyni boshlab kirdi.

Binoiyni Bobur bundan ikki-uch yil oldin ham bir koʻrgandi. Oʻshanda u juda salobatli edi. Hozir esa juda ozib, gavdasi allanechuk kichrayib qolgan. Toʻni ham, sallasi ham eskirib ketgan. Faqat yirik-yirik koʻzlari avvalgiday magʻrur chaqnab turibdi. Bobur unga peshvoz chiqib uy oʻrtasida qoʻl berib koʻrishdi. Oʻng yoniga Qosimbekni, chap yoniga Binoiyni oʻtqazib, hol-ahvol soʻradi. Shunda Binoiy yodaki bir ruboiy

aytib, yegulik gʻallasi yoʻqligini, kiyay desa gʻallaning qopi ham topilmasligini aytdi:

Ne gʻalla marokaz tavonam noʻshid, Ne muhmali gʻalla to tavonam poʻshid,

– degan satrlardagi nozik soʻz oʻyinini sezib, Bobur beixtiyor jilmaydi. «Muhmal» aslida noaniq degan ma'noni bildirardi. Bu soʻz bilan mulla Binoiy oʻz ahvolining noaniqligiga ishora qilmoqchi edi. Ayni vaqtda, «muhmali gʻalla» – ya'ni qop kiyadigan darajaga yetganini ham aytib, oʻz ahvoliga kinoya qilmoqda edi. «Xon huzurida topgan martabamiz shu boʻldi!» demoqchi edi.

Bobur buning hammasini tushungan ma'noda bosh irgʻadi-yu, panjasini peshonasiga tirab, bir lahza jim qoldi. Uning avzoyidan she'rga she'r bilan javob bermoqchi ekanligini sezgan Qosimbek Binoiyga «Shoshmay turing!» deganday ishora qildi. Nihoyat, Bobur qoʻlini peshonasidan oldi-yu, Binoiyga kulimsirab qaradi:

In'om-u vazifa bori buyrulgʻusidir, Muhmalga boʻyu gʻallaga uy toʻlgʻusidir.

Boburda bunchalik she'riy iste'dod bor deb oʻylamagan Binoiy bir lahza hayratlanib turdi-yu, soʻng tojikcha talaffuz bilan:

– Yana bir takrorlang, amirzodam, faqir radifini uqib olmoqchiman! – dedi.

Bobur she'rni ikkinchi aytishda ba'zi joylarini silliqlab, «gʻallaga uy» jumlasini «gʻalladin uy toʻlgʻusidir», deb toʻgʻriladi. «Boʻy» va «uy» degan ichki qofiyalar oʻziga ham yoqimli tuyilib, zavqini keltirdi.

- Tab'i nazmingizga tan berdim, amirzodam! - dedi Binoiy. So'ng u oq oralagan qalin soqolining uchlarini tutamlab, birpas javob qidirdi. Topdi shekilli, boshini tez koʻtarib, qaddini tikladi:

Bir muhmal uchun muncha inoyat boʻldi, Musta'mal agar desam nelar boʻlgʻusidir!

Binoiyning turkiy she'rga ham bunchalik ustaligi endi Boburni hayratga soldi. Bu yerda «muhmal» soʻzi uchinchi bir ma'noda ishlatilgani – Binoiy avvalgi ruboiysiga kamtarona baho berib, uni «muhmal», ya'ni «xom» deb atagani ham ajoyib edi. «Muhmal»ga «musta'mal», ya'ni «pishiq», «mukammal» soʻzining ichki qofiya qilingani ham Boburga juda yoqdi, u munshiyni chaqirib, mulla Binoiy aytgan ruboiylarni yozib olishni buyurdi.

Ikki orada boʻlib oʻtgan mushoiradan Qosimbek ham xiyla ta'sirlangan edi. U oʻsha kuniyoq Binoiyni yaxshi bir hovliga joylashtirdi, Boburning buyrugʻi bilan aravada un, guruch, bir qoʻy, issiq barra poʻstin berib yubordi. Binoiy podshoh mulozimlari qatorida ulufa ola boshladi.

Oradan ikki kun oʻtgach, yangi zira beqasam toʻn ustidan barra poʻstin kiygan Binoiy yana Boʻstonsaroyga keldi. Bobur bu gal uni ikkinchi qavatdagi mehmonxonada qabul qildi. Ular dasturxon atrofida yakkama-yakka suhbatlashdilar. Binoiy Boburning Shayboniyxon haqida savol berishini kutib, xon saroyida koʻrganlarini kinoya bilan gapirib berishga tayyorlanib kelgan edi.

Lekin Bobur Binoiyni oʻngʻaysizlantirmaslik uchun oʻtgan gal ham, bugungi suhbatda ham, Shayboniyxonni ataylab tilga olmadi. Soʻnggi kunlarda Navoiydan kelgan xatning ta'sirida yurgan Bobur Hirotdan gap ochdi. U Navoiy bilan Binoiyning oʻzaro munosabatlari haqida ba'zi bir gaplar eshitgan, endi buning tafsilotlarini bilgisi kelar edi.

Shayboniyxon tilga olinmaganidan yengil tortgan Binoiy kulib gap boshladi:

Alisherbekning quloqlari ogʻriganda, koʻk qiyiq bogʻlagan ekanlar. Buni bazzoz eshitib, koʻk roʻmolga «Nozi Alisheriy» deb nom qoʻyib sotadigan boʻldilar. Alisherbek
ulugʻ siymo, nomlariga yarashadigan ulugʻ ixtirolar qilganlar. Bachkana kishilar arzimagan narsalarga ham «Alisheriy» deb nom qoʻyib, pul ishlashlari faqirning gʻashiga tegdi. Eshagimga gʻaroyib bir egar yasatdim-u, bunga ham «Alisheriy» deb ot qoʻydim. Keyin shu egar ham mashhur boʻldi! Men bu bilan savdogarlarning bachkana gaplariga kinoya qilgan edim. Ammo igʻvogarlar buni «Alisherbekka behurmatlik» deb ovoza qildilar, ikki oraga gʻubor soldilar.

Mulla Binoiy hazilomuz boshlagan gapini hasratli tovush bilan tugatdi:

- Amirzodam, mening Alisher Navoiyga ehtiromim cheksiz! Faqir u zotning suhbatlaridan bahramand boʻlgan paytlarimni eslasam, yuragim ezilur.
- Yomon odamlar solgan gʻuborni oradan olib tashlash mumkin emasmikin?
- Men hozir shu gʻuborni tarqatish harakatidamen. Musofirotda yurib, Alisher Navoiyga atab bir qasida yozdim. Joiz boʻlsa, ba'zi joylarini amirzodamga oʻqib beray.
 - Marhamat!

Mulla Binoiy oʻzi yozgan she'riy asarlarning hammasini yoddan bilar edi. Hozir ham bir burchakka tikilib, «Majma'ul gʻaroyib» degan qasidasini yodaki ayta boshladi. Mulla Binoiy Navoiydan uzoqda uning suhbatini sogʻinib:

Be tu chun obi Dargʻamam dar gʻam, Be tu chun rudi Koʻhakam giryon¹,

- deganda Bobur zavqdan bosh irgʻab:
 - O'h! deb qo'ydi.

¹ Sensiz Darg'am suvidek dard-u g'amdamen, Sensiz Ko'hak (Zarafshon) daryosidek giryonman.

Qasida oʻqib tugatilganda, Bobur ta'sirlanganidan qasrda oʻtirganini ham unutgan edi. U atrofiga qarab, goʻyo mehmonxonaga uzoqlardan qaytib kelganday boʻldi.

- Mavlono, bu qasidani Alisherbekka nega yubormaysiz?
 - Hirotga boradigan tayinlik odam yoʻq, amirzodam.
- Biz yaqinda Hirotga elchi yubormoqchimiz. Kaminaga Alisherbekdan kitobat kelgan edi. Javobini yozib yubormoqchimen.
 - Amirzodam, qani edi, qulingizning bu qasidasini ham...
- Marhamat, xattotga berib koʻchirtirmoq zarur boʻlsa, men buyururmen. Soʻng elchidan berib yuborurmiz.

Gap shunga qaror topdi-yu, mulla Binoiy xursand boʻlib chiqib ketdi.

Bobur yana xonayi xosga kirib, chala qolgan she'rini qoʻliga oldi. Biroq endi katta shoir bilan boʻlgan uzoq suhbatdan soʻng, avvalgi she'rlari Navoiyga yuborishga munosib emasdek tuyildi. Unga ilgari joʻn tuyiladigan narsalar ham aslida juda murakkab ekani hozir juda aniq sezilayotganday boʻlardi. Hamma narsani muhit, ahli jahon murakkablashtiradi. Hirotda yashayotgan Alisher Navoiy ham, hozir Boburga koʻp narsalarni kuyunib aytib bergan Binoiy ham muhitdan, zamona ahlidan norozi boʻlganlaricha bor edi. Boburning oʻzi bu zamonadan ozmuncha jabr koʻrdimi?

Kim koʻribdir, ey koʻngil, ahli jahondin yaxshilik!

Bu haroratli satr qogʻozga tez va ravon tushdi. Bobur oʻz zehnining goʻyo qayralib, oʻtkirlashib qolganini sezib turardi. U hozir xayol koʻzi bilan Hirotdagi Alisher Navoiyni aniq koʻrayotganga oʻxshardi. Bobur muhitdan, zamonadan, faqat oʻz manfaatini koʻzlaydigan jahon

ahlidan yaxshilik kutgan odam aldanishi muqarrarligini Navoiyga aytib dardlashgisi kelardi:

Kimki ondin yaxshi yoʻq, koʻz tutma ondin yaxshilik.

Ya'ni, oʻz muhitidan baland turolmaydigan odam birovga yaxshilik qilolmaydi. Alisher Navoiyning odamlarga shuncha koʻp yaxshilik qilayotgani – Boburga uning jahon ahlidan beqiyos darajada yuksak ekanini yaqqol koʻrsatayotganday boʻlardi. U oʻz koʻnglini ham mana shu yuksaklikka undab, yana bir bayt yozdi:

Bori elga yaxshilik qilgʻilki, mundin yaxshi yoʻq, Kim degaylar dahr aro qoldi falondin yaxshilik.

Shu kuni kechasi Bobur Navoiyga atalgan maktubini ham, she'rini ham yozib tugatdi. Oradan ikki kun oʻtgach, bu maktub maxsus elchi bilan Samarqanddan Hirotga joʻnatildi. Bobur Navoiydan qish chiqquncha javob olish umidida edi. Biroq qish chiqib, endi boychechak ochilgan kunlarda Hirotdan musibatli xabar keldi: qish chillasi paytida hali Bobur yuborgan elchi yoʻlda ekanida, Alisher Navoiy vafot etgandi. Bobur oʻziga ulugʻ bir murabbiy topdim, deb suyunib yurganda, oʻgay taqdir uni bu madadkoridan ham judo qilgan edi.

7

Tepalikka uchib chiqayotgan chopqir otning tuyogʻi yerdan bosh koʻtarib, bugun-erta ochilay deb turgan lola gʻunchasini ezib-yanchib oʻtdi. Bu ot ustida oʻtirgan Shayboniyxonning koʻzlari esa pastdagi keng tekislikda chugʻurchuqday yopirilib, poyga oʻtkazayotgan otliqlarda edi. Tiniq bahor osmonining bir chetida Samarqand bilan Buxoro oraligʻining eng

mashhur qoʻrgʻoni boʻlgan Dabusiya¹ qal'asi savlat toʻkib turibdi. Kech kuzda bu qal'a ham Shayboniyxon qoʻlidan chiqib, Boburga oʻtib ketganda, qoʻshini Buxoroga chekinib, ogʻir ahvolga tushib qolgan edi. Ruhi tushgan ba'zi sarkardalar: «Esimiz borida etak yopib, Turkistonga qayta qolaylik!» deyishgan edi. Ammo Shayboniyxonning Samarqanddagi xufiyalari Boburning shoirlar va olimlar suhbatiga berilib, yangi janglarga sust tayyorlanayotganini bildirib turar edilar. Qoʻldan-qoʻlga oʻtib, juda koʻp talangan Samarqand bahorga chiqib yana ochlik va qahatchilik balosiga yoʻliqqan edi. Buning hammasi Shavboniyxonni dadillashtirdi. Yaqinda u Buxorodan Dabusiyaga qoʻshin tortib keldi. Qal'aning baland devorlariga ulardan ham baland shotilar qoʻydirdi. Qal'a himoyachilari tepadan oʻq va tosh vogʻdirishavotgan boʻlsa ham xon oʻz askarlariga tap tortmay chiqaverishni buyurdi. Odamlar o'lganqolganiga qaramay, chiqib kelayotganini koʻrgan himoyachilar tepadan katta yogʻoch bolorlar otishdi, yonib turgan yogʻlarni chiqayotganlarning boshidan quvishdi. Devor taglari oʻliklarga toʻlib ketdi. Xon navkarlari qoʻrqib, chekina boshladilar. Shunda Shayboniyxon oʻzining tugʻishgan ukasi Mahmudxonni va suyukli oʻgʻli Temurxonni butun navkarlari bilan jangga soldi. Xon ukasi va oʻgʻlini ham ayamayotganini koʻrgan jangchilar yana shotilarga yopishdilar. Yuqoridan yogʻilayotgan ajal shotiga chiqqanlarni tutday to'kayotgan bo'lsa ham, bir necha yuz kishi shovqin-suron bilan devor tepasiga chiqib bordi. Devor tepasidagi jangda ikki tomondan ham juda koʻp odam qirildi, oʻliklar tuynuklarni bekitib qoʻyganidan pastga oʻq otish mumkin boʻlmay qoldi. Xon qoʻshini son jihatdan bir necha barobar koʻp boʻlib, shotilardan

¹ Dabusiya – «Temir qoʻrgʻon» demakdir. Ziyoviddin degan joyda hozir bu qal'aning xarobalari bor.

orqama-orqa chiqib bormoqda edi. Boburdan yordam soʻrab ketgan chopar Samarqandga yetib borguncha boʻlmay Shayboniyxon Dabusiyani qonga belab axiri oldi-yu, himoyachilarni bitta qoldirmay qilichdan oʻtkazdi. Bu zafar xon qoʻshinining ruhini koʻtardi.

Endi Shayboniyxon Dabusiyani togʻday bir tayanchga aylantirib, undan Samarqand ustiga yurish tayyorligini koʻryapti.

Hozir pastda oʻtkazilayotgan poyga ham – shunchaki koʻngil ochish uchun emas, Bobur bilan boʻladigan hal qiluvchi janglarda Shayboniyxonga eng zoʻr, eng chopqir otlar tanlash uchun kerak.

Kuni kecha Samarqanddan kelgan darvish kiyimidagi bir maxfiy Boburning xotini qiz tuqqanini, otini Faxriniso qoʻyganlarini aytib bergan edi. Shayboniyxon poygada bir-biridan oʻzib, sor burgutlarday uchib borayotgan yigitlariga zavq bilan tikildi-yu, oʻzicha dedi, «Mayli, Bobur kuzdagi gʻalabasidan faxrlanib, qiziga Faxriniso deb ot qoʻysin, kerilib, she'rini yozib yotaversin! Ungacha men burgutlarimning hammasini ovga oʻrgataman».

Shayboniyxon hali hech qaysi jangga bunchalik jon-jahdi bilan tayyorlangan emas. U Boburni yengish oson emasligini sezardi. Bobur endi oʻn toʻqqizga kirgan yosh yigit boʻlsa ham nihoyatda iste'dodli, nihoyatda dovyurak sarkarda ekanini Shayboniyxon amalda koʻrdi. Hozir bu atrofdagi shahar-u qishloqlarning koʻpchiligi Boburga yon bosadi. Shayboniyxonning dushmanlari esa behisob. Sulton Ali mirzoning koʻpchilik bek va navkarlari bultur Shayboniyxonga qoʻshilgan edi, Bobur Samarqandni olgandan keyin hammasi uning tomoniga qochib oʻtib ketdi. Boburning qoʻshini kun sayin koʻpayib boryapti. Hatto Andijondagi Ahmad Tanbal ham ukasi Sulton Xalilni ikki yuz navkari bilan Boburning ixtiyoriga yuboripti. Shayboniyxon shuni eshitgandan keyin,

hozir Boburning obroʻsi juda baland ekanini, undan, hatto Ahmad Tanbal ham qoʻrqib qolganini sezdi. Bu ketishda yozga borib Boburning qoʻshini yana ham koʻpayadi. Shayboniyxon hal qiluvchi jangni tezlatmasa, keyin yutqizadi.

* * *

Shayboniyxon sultonlari bilan kengashib, erta bahorda Buxoro va Dabusiya qal'asini ishonchli odamlariga qoldirdi-yu, oʻzi Samarqand tomonga qoʻshin tortib kela boshladi. Shundan sal oldin Shayboniyxon Boburga maktub yoʻllab, uni masof urushga¹ chaqirgan, «Mardlar maydonda sinalgay, qal'ada bekinib yotish yosh bolaning ham qoʻlidan kelur!» degan mazmunda achchiq kinoyalar qilgan edi.

Nihoyat, Bobur ham Samarqanddan qoʻshin bilan keldi-yu, Saripulda² Shayboniyxon askarlaridan bir tosh berida toʻxtab, jangga tayyorlana boshladi. Bobur Zarafshon daryosi koʻrinib turgan bir joyni oʻrda qilib, atrofiga chuqur xandaqlar qazitdi, shox-shabbalardan oʻq oʻtmaydigan ihotalar yasatdi.

Shunga qaraganda, Bobur masof urushga uncha tez kirishmoqchi emas edi, orqadan yana yangi kuchlar yetib kelishini kutmoqchi edi.

Biroq Shayboniyxonning yigʻiladigan askarlari yigʻilib boʻlgan, endi uzoq Turkistondan yangi kuchlar yetib kelolmasligi aniq. Shahrisabzdan kelgan maxfiy xabar xonni iztirobga solib qoʻydi. Oʻsha yoqda Boqi tarxon ikki ming qoʻshin toʻplab, yana ming nafar askar yigʻib, keyin hammasini Boburga yordam bergani olib kelmoqchi emish. Agar bu qoʻshin ham Boburga kelib qoʻshilsa, Shayboniyxon yengilishi

¹ Masof urush – ochiq joyda yuzma-yuz olishish.

² Saripul – hozirgi Kattaqoʻrgʻon shahri yaqinidagi bir qishloq.

mumkin. Xon urushni tezroq boshlashning chorasini izlab, Bobur qarorgohida munajjimlik qilib yurgan yashirin kishisiga xabar yubordi. «Osmondagi yulduzlarga qarab, Boburni tezroq jang qilishga koʻndirsin, agar ishni choʻzsa, josusligini fosh qilib, boshini kestirgaymen!» deb munajjimga tahdid qildi.

Bu munajjim ham shoir Binoiyga oʻxshab, xon qarorgohidan Bobur huzuriga qochib borgan edi. Xon Boburning rahmini keltirish uchun munajjimni Bobur huzuriga qochirishdan oldin kaltaklatib, ogʻizburnini qon qilgan, kiyimlarini yirttirgan edi. Mavlono Shahobiddin ismli bu munajjim hozir Bobur saroyida izzat-ikromda ekani ham Shayboniyxonga ma'lum edi. Xonning yashirin topshirigʻi qalandar kiyimidagi kishi orqali munajjimga yetkazilgan kuni kechasi Shayboniyxon oʻn ming qoʻshini bilan Bobur oʻrdasiga bostirib bordi, nogʻoralar, karnaylar chaldirib, istehkom devorlari orqali oʻqlar yogʻdirdi.

Otlar xandaqlardan oʻtolmas, ammo xon askarlarining haqoratomuz qichqiriqlari oʻrdada oʻtirgan Boburga va uning odamlariga baralla eshitilardi:

- Joning boʻlsa maydonga chiq!
- Qoʻrqoqlar, kurk tovuqday moyak bosib oʻtira berasanmi?!
 - Boburingda yurak boʻlsa ulugʻxonga oʻzini koʻrsatsin!
 - Mard boʻlsa chiqsin maydonga!

Himoyada yotgan odamlarga tungi hujum va shovqin-suron ogʻir ta'sir qilishini Shayboniyxon yaxshi bilar edi. Boburning oʻrdasi atrofida uning yuzlab otliqlari urra-ur qilishib, borliqni larzaga keltirishdi, ihota qilingan shox-shabbalarga yonib turgan yoy oʻqlarini otishib, bir-ikki joyini yondirib yuborishdi. Ichkaridan ham oʻqlar otildi, achchiqlangan navkarlarning haqoratlari eshitildi, ammo xon qoʻshini bilan olishish uchun hech kim yurak yutib chiqolmadi.

Shayboniyxon Boburning kecha qoʻqqisdan maydonga qoʻshin tortib chiqolmasligini oldindan bilardi, chunki hech bir esli-hushli sarkarda bu qorongʻi tunda selday yopirilib kelgan lashkar qarshisiga tayyorgarliksiz betartib otilib chiqmasligi oʻz-oʻzidan ayon edi. Bu tungi shovqin-suron Shayboniyxonga oʻz lashkarining ruhini koʻtarish uchun kerak edi. U oʻzining hech narsadan qoʻrqmasligini, Bobur esa goʻyo tizzasi qaltirab, istehkomdan beriga chiqolmayotganini har ikki tomonga namoyish qilmoqchi, shu bilan yosh dushmanining izzat-nafsini qoʻzgʻatmoqchi edi. Ayni vaqtda, bu tungi hujum – Bobur qarorgohida ish olib borayotgan munajjimni ham dadillashtirishga qaratilgan edi.

Chindan ham bu tungi hujum Boburning izzatnafsiga qattiq tegdi. Munajjim esa osmondagi yulduzlar tartibini murakkab bir tarzda unga tushuntirib: «Hozir sakkiz yulduz siz tomonda rost turur, – dedi. – Yana ikki kun oʻtgach, bu sakkiz yulduz gʻanimingiz tomoniga ogʻib ketgay. Agar ertaindin jangga kirishsangiz, gʻalaba sizniki boʻlishidan butun falakiyot dalolat bermoqda!»

Axiri shu sabablar bir boʻlib, Bobur Shahrisabz va Toshkentdan keladigan katta koʻmakni kutib oʻtirmasdan, indin chorshanba kuni jang maydoniga chiqishga qaror qildi. Munajjim buni oʻsha aloqachi qalandar orqali Shayboniyxonga yetkazdirdi.

Shayboniyxon chorshanba kuni hayot-mamoti hal boʻlishini sezib, bor iste'dodini, butun tajribasini ishga sola boshladi. Kuni boʻyi boʻlajak jang maydonining har bir past-u baland joyini koʻzdan kechirib chiqdi, oftob qayoqdan chiqib, shamol qayoqdan esishigacha e'tibor berdi. Kechasi esa otlarni egarlatib, hamma narsani taxt qilib yotishni buyurdi, yov maydonga chiqqan zahoti darhol qulay tomonni egallashning rejasini tuzib qoʻydi. Ikki kecha deyarli uxlamadi. Yarim tunda

ham, sahar pallada ham uning oq oʻtovidan kuchli ovoz va katta ixlos bilan yodaki qiroat qilinayotgan Qur'on tovushi eshitilib turdi. Shayboniyxon joynamoz ustida sajdaga bosh qoʻyib, Xudoga munojot qilar, koʻzlariga yosh olib, «Sharmanda qilma, Parvardigor!» deb pichirlardi.

Jangdovullar azon palla Bobur qoʻshinining shoshilinch saflanayotganini va tugʻ tikayotganini aytib kelgan zahoti Shayboniyxon ham bor askarlarini oyoqqa turgʻizdi. Chavkar otda saflarni aylanib chiqdi.

- Shunqorlarim! deb jarangli ovoz bilan qoʻshinga murojaat qildi. – Bu atrofda bizning Xudodan boʻlak suyanchigʻimiz yoʻq. Ota yurtimiz uzoq, yengilsak yetolmaymiz. Birdan-bir najot –yengish! Mening Parvardigordan umidim katta. Tushimda ayon boʻldi – nasib qilsa, gʻalaba bizniki!
 - Inshoollo! dedi oʻnlab ovoz birdan.

Shayboniyxon Qur'ondan qisqa bir surani ohangdor tovush bilan ta'sirli qilib oʻqidi-yu, diniy rahbarlarga xos sirli va salobatli tarzda fatvo berdi:

Omin, Olloh-u akbar!Minglab odam birdan:

– Olloh-u akbar! – deb takbir tushirganda osmon titrab ketganday boʻldi. Shayboniyxonning valiyligiga ishonadigan, uning fatvosidan ruhlangan qoʻshin avvaldan oʻylangan aniq reja bilan yov tomonga yoʻnaldi.

Uzoq mashqlar bekor ketmagan edi. Xonning qoʻshini goʻyo bir tan-bir jon boʻlib harakat qilar, xuddi tarang tortilgan yoyday oʻrtasi xiyol oldinga chiqib borar edi.

Chap tomon daryo. Shayboniyxon qoʻshinini oʻng tomondagi kengliklardan daryo tomonga qiyalatib yoʻnaltirdi. Chunki daryo tomon nishabroq edi, bugun shamol ham janubdan esmoqda edi. Yoʻl nishab boʻlsa-yu, shamol orqadan essa, chopqir otlar yanada tezroq uchishi mumkin. Shayboniyxon bugun qoʻllamoqchi boʻlgan toʻlgʻama usuli – yashin tezligida harakatlanishni talab qiladi. Shuning uchun u otlarning chopqirini avvaldan tanlab qoʻygan, bugun esa shamolning yoʻnalishi-yu yerning nishabligini ham hisobga olgan edi.

Shayboniyxon qoʻshinining Janubdan qiyalab yaqinlashayotganini koʻrgan Bobur qoʻshini yov bilan yuzma-yuz toʻqnashish uchun oʻng qanotini oldinroq chiqarib, daryoga orqa oʻgirdi-yu, Janubga tomon burila boshladi.

Orada ikki-uch chaqirimcha masofa qolganda, Shayboniyxon xosnavkarlari, ichkilari va tugʻbardori bilan birga baland bir tepalikda toʻxtadi. Bobur ham shunaqa bir tepalikda otliq turar, uning orqasidagi daryoning suvi ertalabki quyosh nuridan tovlanib koʻrinardi.

Boburning qoʻshinlari orasida toʻra¹ koʻtargan, dastasi uzun nayzalar va oyboltalar bilan qurollangan piyodalar ham koʻp edi. Agar otliqlar ularga toʻgʻridan roʻpara boʻlsa uzun nayzalar otga yoki otliqqa sanchiladi. Shayboniyxon piyodalarning markazda kelayotganini koʻrib, oʻzining qoʻshiniga yov markazini ochiq qoldirishni, yovning ikki qanotini aylanib oʻtib, ikki biqinidan va orqadan zarba berishni buyurgan edi.

Oʻng qanotdagi Mahmud Sulton, Jonibek Sulton va Temur Sulton xonning buyrugʻiga amal qilishib, yovga bir chaqirim qolganda otlarini toʻsatdan oʻng tomonga burishdi va Bobur qoʻshinining chap qanotini aylanib oʻta boshlashdi. Shayboniyxon qoʻshinining chap qanotidagi mashhur lashkarboshilar Hamza Sulton va Madhi Sulton ham markazga tegmay, Boburning oʻng qanotini aylanib oʻtmoqda edilar.

 $^{^{\}rm 1}$ Toʻra – qalqonning bir turi. Otliqlarning qalqonidan kattaroq boʻladi.

Eng zoʻr kuchlarini markazga qoʻygan Bobur avval tuzgan rejasini shoshilinch ravishda oʻzgartira boshladi. Bobur markazga qoʻygan qoʻshinning bir qismi oʻng qanotga qoʻshilib, Shayboniyxonning chap qanotiga tashlandi.

Toʻlgʻamaning bir qaltis joyi shunda ediki, markazga tegmay oʻtgan ikki qanot bir-biridan ajralib qolishi mumkin edi. Yov ularni ikkiga boʻlib tashlashi, soʻng orqadan hujum qilib toʻlgʻama ishlatmoqchi boʻlganlarning oʻzlarini toʻlgʻab, qurshab olishi mumkin edi. Hozir Shayboniyxon qoʻshinining chap qanoti xuddi mana shu ahvolga tusha boshladi.

Ammo ana shu yerda eng yugurik otlarning tanlangani ish berdi. Boburning otliqlari oldindan girqib chiqishga ulgurmadilar. Mahmud Sulton boshliq uch-to'rt yuz chavandoz yov qo'shinining orgasiga oʻtib olishga muvaffaq boʻldi. Oʻng qanotdan Hamza Sultonning ikki yuz otlig'i ham chopqir otlarda yovni aylanib oʻtib kelib, Mahmud Sultonning vigitlariga qoʻshildi. Bobur qoʻshini kutilmaganda ham ikki yondan, ham orqadan zarba yeb, esankirab qoldi. Jon achchigʻida baqirayotgan, qilich va oʻq zarbidan yiqilayotgan, oyoq ostida majaqlanib chinqirgan vahimali ovozlar, tigʻ, nayza zarbalari, «Urho, ur!» degan nidolar otlarni ham quturtirib yuborgan edi. Bobur qoʻshinining dastlabki yasogʻi buzilib ketdi, ikki tomonning otliglari aralash-guralash boʻlib, piyodalar ustiga otda bostirib keldi. Piyodalarni endi o'z qo'shinining otliqlari ham bosib-vanchib keta boshladi.

Ochiq qolgan markazdan Bobur askarlarining bir qismi alanga tiliday otilib chiqdi-yu, Shayboniyxon turgan tepalikka hamla qilib kela boshladi. Oʻng qanotdagi Temur Sulton bilan Jonibek Sultonning yigitlari hali ham qurshovdan chiqolmas edi. Shayboniyxon tomonga bostirib kelayotgan ikki

yuzdan koʻproq otliqning raftori juda vahimali edi. Koʻpakbiyning uch-toʻrt yuz yigiti qirgʻin boʻlayotgan joydan chiqib, yov otliqlarining ketidan tushdi. Ammo oradagi masofa ancha uzoq, Koʻpakbiy yetib kelguncha berigilar Shayboniyxonni butun ichkilari bilan yanchib oʻtishi mumkin edi. Buni sezgan xonning ichkilari sarosimaga tushib qolishdi.

Yuvoshgina ot minib chiqqan mulla Abdurahim:

– Hazrati imomi zamon, vaqt oʻtdi, bexatar joyga chekinaylik! – dedi.

Shayboniyxonning rangida qon qolmagan. U ham bexatar joyga ketishni istardi. Ammo bu tepalikda u tugʻlar bilan turibdi. Agar pastga tushib ketsa-yu, askarlari oʻgirilib qarab, uni va tugʻlarni koʻrmasa, «Yengilibmiz!» – deb oʻylashadi. Xonning chekinishi – yengilish alomati boʻladi. Shuning uchun Shayboniyxon titrab-qaqshab:

- Oʻlim bor, chekinish yoʻq! deb qichqirdi. Soʻng u yuz qadamcha narida turgan xosnavkarlariga buyurdi:
- Chiq hammang! Ana u kelayotgan otliqlarning yoʻlini toʻs!

Bu xosnavkarlar xonning eng soʻnggi tayanchi hisoblanar, ular odatda yengilib qochish kerak boʻlganda xonni qoʻriqlab, olib ketish uchun saqlanar edi. Xon buyruq bergandan keyin yopirilib kelayotgan narigi yovning qarshisidan chiqib, yoylardan oʻq otaota ularga yaqinlashdilar. Xosnavkarlar narigilarga qaraganda ikki barobar oz boʻlsalar ham dadil savasha boshladilar. Naryoqdan Koʻpakbiy ham uchtoʻrt yuz otligʻi bilan yetib keldi. Endi yov ilgʻorlari qurshovda qoldi. Bir vaqt shu qurshovni oʻntacha otliq yorib chiqdi. Xuddi koʻpkari paytida uloq talashib toʻsatdan tomoshabin ustiga bostirib kelib qoladigan uloqchilarga oʻxshab, Shayboniyxon turgan tepalikka chiqib bordi. Mulozimlardan bir nechasi «gur» etib orqaga qochdi. Ammo Shayboniyxon oʻz navkarlarining

qoʻli baland kelayotganini koʻrib turar edi. Kamonga oʻq oʻrnatib, tepani qiyalab qochib oʻtayotgan yov otliqlariga qarab otdi. Oʻq hech kimga tegmagan boʻlsa ham xon shaxsan oʻzi jangga qoʻl urganini koʻrgan navkarlar avvalgidan ham qattiqroq qichqirishib, yov ilgʻorini bitta qoʻymay qirib tashladilar.

Naryoqda yov qoʻshinini oʻrab, chulgʻab, toʻlgʻama usulini xon aytganday amalga oshirayotgan sultonlar mingga yaqin yigitlari bilan Bobur turgan tepalikka yetib bordilar. Piyodalar Boburga ish bermay qoʻydi. Yaqinda Toshkentdan kelib qoʻshilgan moʻgʻul otliqlari Boburning jangni boy berayotganini sezishdiyu, oʻljasiz ketmaslik uchun egasiz qolgan otlarni jilovidan tutib, yetaklab, jang maydonidan chiqib keta boshladilar. Ba'zi moʻgʻullar esa oʻzlari bilan bir safda jang qilayotgan andijonlik va samarqandlik yigitlarni egarlaridan agʻdarib tashlab, otlarini oʻlja qilib olib qochishga tushdilar.

Bir vaqt Shayboniyxon Boburning oʻn-oʻn beshta ichkilari bilan tepalikdan tushib, daryo tomonga qarab chekinayotganini koʻrib qoldi. Bu bir hiyla emasmikin, deb tikilib qarasa, Bobur toʻlib-toshib oqayotgan daryoga ot solib kirdi. Qirgʻoqda qolgan uning bir necha yuz navkarlari Bobur ketidan intilgan yovning yoʻlini devorday toʻsib oldi. Bobur Samarqandga qarab qochayotganiga endi astoydil ishongan Shayboniyxon qoʻllarini osmonga choʻzib, hayajon bilan:

– Xudoyo, oʻzingga shukr, oʻzingga shukr! – dedi. Ammo yovi yengilib qochayotgani endi unga ozlik qiladigan tuyildi. Shu tobda u oʻz gʻalabasining yana bir daraja baland boʻlishini istardi.

Shuning uchun ortda turgan chopar tomonga oʻgirildi:

– Tez borib shunqorlarimga ayt. Boburning boshini kesib kelgan odamga boshi barobarlik oltin beraman! Chopar endi otining jilovini boʻshatib, joyidan siltanib qoʻzgʻalganda Shayboniyxon:

– Toʻxta! – dedi. U magʻlub boʻlgan Boburni asir olib, tavbasiga tayantirsa, gʻalabasining shuhrati yana bir daraja oshishini sezdi: – Shunqorlarimga yana bir buyrugʻimizni yetkiz! Boburni tirik tutib kelganga boʻyi barobarlik oltin beraman! Yo tirik, yo oʻlik, albatta, olib kelinglar!

Chopar tepalikdan ot choptirib tushib ketayotganda, Shayboniyxon koʻzlarining nam ekanini sezdi. Gʻalaba zavqidan koʻziga yosh kelganini u endi payqadi-yu, kulimsirab, kafti bilan koʻz yoshini sekin artib qoʻydi.

8

Saraton oʻtib, asad oyi kirdi. Samarqand atrofidagi bogʻlarda mevali daraxtlarning shoxlari yetilgan hosildan egilib, yerga salom bera boshladi. Shahar ichida ham mevali daraxtlar, toklar juda koʻp, ammo ular hammasi hozirdanoq ship-shiydam boʻlib qolgan. Hali sargʻaymagan koʻm-koʻk barglar orasida birorta olma, birorta shaftoli, biror shingil uzum qolmagan. Besh oydan beri qamal azobini tortayotgan shahar xalqi bor mevalarni pishar-pishmas yeb tugatgan. Qoʻrgʻonning hamma darvozalari yopiq, shahar atrofini Shayboniyxonning qoʻshini qurshab yotibdi. Ichkaridan ham hech kimni chiqarmaydi, tashqaridan yordam bermoqchi boʻlganlarning ham yoʻlini toʻsadi.

Ulugʻbek madrasasining baland tomi ustidagi tekis sahnga Boburning oq oʻtovi oʻrnatilgan, bu yerdan qoʻrgʻon devorlari, atrof mahallalar, shahar darvozalari yaxshi koʻrinadi. Bobur goho och odamlarning tom boʻgʻotlariga in qurgan musichalarni ovlab yurganini koʻradi. Qanotli qushlar sillasi qurigan ochlarga tutqich bermaydi. Shahar ichida qushlar yeydigan

don-dun, ovqat qoldiqlari ham topilmaydi. Shuning uchun bu yerdan qushlar ham oʻzini olib qochadi. Goho atrof koʻchalarda biror kishi it yoki mushuk tutib olsa, ochlar shuni ham talashib, gʻijillashib qolishadi.

Madrasaning orqa tomonida podshohning katta otxonasi bor. Ilgari bu yerda saroyning yetmishsaksonta oti boqilar edi. Hozir shulardan toʻrttaginasi qolgan. Bir qismi Saripulda qoʻldan ketdi. Koʻpchiligi soʻyib yeyildi. Biroq shu toʻrtta otga ham yemish topilmaydi. Don yuzini koʻrmaganlariga bir oydan oshdi. Pichan-u bedalar allaqachon tugagan. Atrofdagi daraxtlarning barglarini ham yulib, qoqib, ot va tuyalarga yedirishgan. Hozir bargsiz daraxtlar yozda ham xuddi qishdagiday yalangʻochlanib, koʻzga juda xunuk koʻrinadi. Ot-ulovlarga barg ham topilmay qolgandan keyin daraxtlarning qurigan yogʻochlarini randalab beradigan boʻlishgan.

Bobur otxona hovlisida yogʻoch randalayotgan Tohirni koʻrdi. Saripulda bu yigit Boburning xosnavkarlari orasida edi, daryodan oʻtishda ham, keyin ham jonbozlik koʻrsatgan edi. Bobur yaqinda uning uylanish tarixini eshitdi. Shuncha azoblar bilan qayta topib olgan xotini ocharchilikda nobud boʻlib ketmasin deb, Robiyani onasi Qutlugʻ Nigor xonimga kaniz qilib qoʻydi.

Tohir mayda qilib randalagan yogʻochni sargʻish moʻylovli Mamat suvga ivitib, yumshatmoqda edi. Shunday qilinmasa, uni ot yeyolmas edi.

Saripul jangiga Mamat ham navkar boʻlib qatnashgan edi. Oʻsha qirgʻindan eson-omon qaytgan bu yigit oʻtgan hafta qoʻrgʻon tashqarisiga meva oʻgʻirlashga chiqib, bir qulogʻidan ajralib qaytdi.

Qoʻrgʻon devoridan boʻy choʻzib, tashqariga qaragan ochlar tashqi bogʻlarda pishib, shoxlarda tiralib turgan, yerlarga toʻkilib yotgan olmalar, noklar,

shaftolilarni koʻrib, chidab turolmas edi. Kechasi el uxlaganda Mamat uch-toʻrtta eski kosib oshnalari bilan qal'a devori tagidagi obmo'ridan tashqariga chiqadi. Chohdan ham bir amallab o'tib pishgan mevalardan to'yganicha yeyishadi. Keyin qo'llaridagi xalta va xurjunlarni ham mevaga toʻldirishadi, ammo qoʻrgʻonga tomon qaytayotganlarida, shafqatsiz Koʻpakbiyning vigitlari ularni tutib olishadi. Mamat ham o'zini kosib deb tanitdi. Agar «Boburning navkariman» desa tirik golmas edi. Koʻpakbiy «meva oʻgʻirlagisi kelganlarga ibrat boʻlsin», deb tutilganlardan uchtasining burnini, ikkitasini qulogʻini kestiradi-yu, qo'yib yuboradi. Bir siqim meva uchun qilingan bu vahshiylik tufayli Mamat endi yozda ham telpagini kesik qulogʻidan pastgacha bostirib kiyadigan boʻlgan. Ba'zida u o'ziga-o'zi tasalli beradi:

– Quloqni-ku, jashirsa boʻladi, burnim kesilsa nima qilar edim?

Bobur koʻchadan oʻtayotib, goho burni kesilgan bechoralarni ham koʻrib qoladi.

U bir vaqtlar oʻzi Samarqandni yetti oy qamal qilib yotganda, odamlarning boshiga qanchalik ogʻir kulfatlar tushganini mana endi chinakam bilyapti. Oʻsha ocharchilikda sahhoflik rastasiga borganlarida, oʻgʻli kunjara yeb shishib oʻlgan, oʻzi jinni boʻlib qolgan bir kampir dushmanni qargʻab, «Ilohim oʻzi ham shu koʻyga tushsin!» – deganini Bobur endi qasoskor taqdirning hukmidek eslaydi...

Kambagʻallar kulbasidan boshlangan ochlik astasekin navkarlar, beklar qarorgohiga ham, podshoh saroyiga ham oʻrmalab keldi. Mana, oʻn kundirki, Bobur non yuzini koʻrmaydi. Un allaqachon tugagan, unga oltin-kumush idishlarda ertalab bir siqim mayiz bilan choy, kechqurun tuya goʻshtidan pishirilgan bir kosa shoʻrva yoki uch-toʻrt tuyur kabob beradilar.

Bobur oltinlari yaltiragan shohona idish-tovoqlarga termilib qaraydi-yu, hozir shularning hammasidan bir parcha nonni afzal koʻradi. Lekin non oltinga ham topilmaydi.

Oyisha begimning olti oylik emizikli qizchasi bigʻillab yigʻlaydi. Chunki ozib, madordan ketib qolgan Oyisha begimning siynasidan sut kelmaydi. Yaqinda bola koʻrgan boshqa bir onani topib, Faxrinisoni besh-oʻn kun emizdirgan edilar, falokat yuz berdi, u ona vaboga uchragan xonadondan ekan. Dahshatli kasallik Faxrinisoga yuqdi-yu, ikki kun ichida bola mumday erib, jon berdi.

Bobur kafanga oʻralgan goʻdakni yangi qazilgan qabr oldigacha koʻtarib borar ekan, uning burishgan yuzchasiga yuzini bosib, yigʻlab yubordi: «Mayli, shu vabo menga ham yuqsin-u bu azoblardan biratoʻla xalos boʻlay!» – degan alamli oʻy bilan goʻdakning sovuq lablaridan oʻpdi.

Gʻalaba kunlari dunyoga kelib, Faxriniso nomini olgan qizchani qabrga qoʻyib, ustiga tuproq tortganlarida, Bobur bir lahza oʻzini uning oʻrnida koʻrdi, hali tirik boʻlsa ham hayotining bir boʻlagi, avvalgi zafarlari-yu quvonchlari bilan birga umrbod tuproq tagida qolganini butun vujudi bilan his qildi.

Ichkarida Bobur kulfat chekib gʻam-gʻussaga botgan sari tashqarida uning dushmanlari tantana qilishmoqda edi. Bobur Hirotdagi amakisi Husayn Boyqarodan, Toshkentdagi togʻasi Mahmudxondan besh oy davomida yordam kutdi, kelmadi. Endi kelmasligi aniq. Shuni payqagan Shayboniyxon har kuni kechasi darvozalar tashqarisida nogʻora chaldiradi, karnay-surnaylar bilan shahar ahlini uygʻotadi. Soʻng xon jarchilari qoʻrgʻon tashqarisidagi koʻtarmalarga chiqib, shahardagilarni xon tomoniga oʻtishga chorlaydi, och odamlarga turli noz-ne'matlar va'da qiladi. Bobur endi urushni boy berganini sezgan

bek va navkarlar devorlardan oshib tushib, suv moʻrilaridan oʻtib, qamal balosidan qochadi.

Bir kun kechasi Boburni qoʻriqlab yuradigan qoʻrchi begi ham qal'adan yashirincha chiqib qochdi. Xos qoʻriqchilar orasida Tohir bor edi. Ertasi kuni kechasi Bobur uni oʻz huzuriga chaqirib oldi.

Tohir ozib ketganidan yelkalari puchayib qolgan, koʻzlari ichiga oʻprilib tushgan. Yuzidagi chandigʻi esa boʻrtib, goʻyo avvalgidan xiyla katta boʻlib ketgan.

- Tohirbek, dedi Bobur, Amir Temur maqbarasining hoshiyasiga arab tilida bir hikmat bitilmishdir. Bu hikmatda «Jahon sendan yuz oʻgirmasdan oldin sen jahondan koʻngil uza bilgin» deyilmishdir. Men endi jahondan koʻngil uzmoqchimen. Vabo meni olib ketsa, balki tez qutular edim. Lekin meni vabo ham chetlab oʻtdi...
- Xudo saqlasin, amirzodam! Bizning suyangan togʻimiz oʻzingizsiz!
- Suyangan togʻingiz hozir yer bilan yakson boʻlmishdir, Tohirbek! Kecha bir bayt bitmishmen:

Ey koʻngul, gar Bobur ul olamni istar, qilma ayb, Tangri uchun de, bu olamning safosi qoldimu?!

Tohir she'rdan ta'sirlanib:

- Rost, hozirgi kunlarimizda safo qolmadi, amirzodam! - dedi. - Lekin oyning oʻn beshi qorongʻi boʻlsa, oʻn beshi yorugʻ. Shukr, hali tanda jon, belda shamshirimiz bor!

Bobur oʻylanib turdi-yu:

- Endi soʻnggi ilinj yogʻiy ilkiga tirik tushmaslik! dedi. Bor kuchlarni toʻplab, qulay bir paytda qal'adan chiqaylig-u yogʻiy halqasiga hamla qilaylik! Kunimiz bitmagan boʻlsa yorib oʻturmiz, bitgan boʻlsa qilich bilan jon berurmiz!..
 - Xudo xohlasa yorib oʻturmiz, amirzodam!

– Bu sirni hozircha faqat Qosimbek bilur, siz ham sir saqlang, tayyorgarlik koʻring!

- Jonim bilan!

Tohir oʻsha kuni kechasi Qosimbekka uchrashdi. Ikkovlari qal'a devorining xokrezlari orqali tashqarini kuzatib, yovning asosiy kuchlari Ohanin, Feruza va Chorraha darvozalari tomonda joylashganini, Shayxzoda darvozasining atroflarida esa yov halqasi zaifroq ekanini aniqladilar. Navkarlar va otliqlarning eng baquvvatlarini tanlab, ularni hamlaga tayyorlay boshladilar.

Bobur Boʻstonsaroyda xonayi xosda kitoblari va qogʻozlarini koʻzdan kechirib, ularning eng keraklilarini olib ketmoqchi boʻlib saralayotganda, eshikdan Qutlugʻ Nigor xonim, Eson davlat begim va Qosimbek kirib kelishdi. Vajohatlaridan favqulodda bir gap boʻlgan.

* * *

 Amirzodam, - deb Boburning buvisi, soʻnggi yillarda ancha bukchayib qolgan Eson Davlat begim gap boshladi: - Shayboniyxon sulh taklif qilib odam yubormish!

Sulh soʻzi Boburning qulogʻiga najot ohangiday eshitildi. Ammo najotni hech qachon Shayboniyxondan kutmaganligi uchun quloqlariga ishonmay, koʻzlarini buvisi bilan onasiga tikdi. Qutlugʻ Nigor xonim negadir qattiq iztirobga tushgan. Eson Davlat begimning qoʻlida zarhal hoshiyali qogʻoz. Kampir allanarsadan xijolat chekkanday boʻlib:

– Xonning nomasi, – dedi-da, qoʻlidagi qogʻozga istar-istamas qarab qoʻydi.

Xonning nomasi nega eng avval buvisining qoʻliga kelib tushganidan Boburning taajjubi oshdi:

- Nomani kim keltirdi?

– Nufuzli bir darvish. Naqshbandiylardan. Rahmatlik Xoʻja Yahyoga qoʻl bergan moʻysafid ekan.

Bobur onasiga qaradi:

- Sizga keltirib berdimi?
- Yoʻq, deb Qutlugʻ Nigor xonim ma'yus bosh chayqadi.

Eson Davlat begim nomani Boburga uzatar ekan, uyalinqirab qoʻshib qoʻydi:

- Aslida bu noma Xonzoda begimning nomlariga kelmishdir.
 - Ajabo! deb Bobur xatni jirkanibroq qoʻliga oldi.
- Amirzodam, dedi buvisi, sizga aytishga ham uyalurmen... Shayboniyxon Xonzoda begimning ta'riflarini eshitib, gʻoyibona dard chekarmish. Nomasida bir pora she'r ham bor.

Bobur Shayboniyxonning bu yil ellik yoshga kirganini, oʻgʻillarini allaqachon uylantirib, nevaralik ham boʻlganini bilar edi. Zaharxanda bilan nomani ochar ekan, eng avval she'riy satrlarga koʻzi tushdi:

«Sifatingni eshitib, zor oʻldim, Ishqing ilkiga qiriftor oʻldim».

Boburning gʻashi kelib, nomani gilam ustiga otdi:

– Bu xon bultur Sulton Ali mirzoning onasi Zuhra begimga gʻoyibona oshiq boʻlib noma yuborganini nechun unutdilaringiz? Nahotki, ishonib boʻlsa?!

Qutlugʻ Nigor xonim uh tortdi. Eson Davlat begim esa iloji boricha sovuqqonlik bilan gapira boshladi:

– Amirzodam, boshqa vaqt boʻlsa dushmaningizning bu nomasini oʻqishga ham hazar qilur edik. Lekin hozir jonimiz qil ustida. Men-ku, yoshimni yashab, oshimni oshaganmen, besh kun oldinmi, keyinmi, baribir keturmen. Lekin siz farzandimning yolgʻiz oʻgʻli, koʻzimizning oq-u qorasi...

– Men ham taqdirimda borini koʻrurmen. Nasib qilsa yov halqasini yorib chiqurmiz!

Boburning qaltis qarorini Qutlugʻ Nigor xonim Qosimbekdan eshitgan ekan shekilli, tahlika toʻla tovush bilan gapirdi:

– Taqdir deb oʻzingizni oʻtga tashlamang, amirzodam! Bizni ham oʻylang! Siz yov tigʻiga oʻzingizni ursangiz, biz ne qilurmiz? Umr yoʻldoshingiz Oyisha begim ne qilur?

Bobur bunday xatarli jangga ayollarni olib chiqib boʻlmasligini endi oʻyladi-yu, onasining soʻzlariga javob topolmay qoldi. Bir lahzalik sukutdan soʻng Eson Davlat begim gilam ustida yotgan nomaga ishora qilib, istehzoli kulimsiradi:

– Buning kelganiga ikki kun boʻldi. Meni bilursiz, amirzodam. Koʻp balolarni koʻrib pishgan tadbirkor kampirmen. Noma keltirgan darvishni gapga soldim. Shubhalarimizni aytdim.

Darvish gasam ichdi. «Xon astovdil sulh tuzmogchi», deb birtalay dalil keltirdi. Baribir ishonmadim. «Boʻlmasa vakil yuboring, xon oʻz nivatini qoʻlida Qur'on bilan tasdiqlasin!» - dedi. Biz buni sizga aytishdan oldin oʻzimiz taftish qilmoqchi boʻldik. Rahmatlik Xoʻja Yahyoga qoʻl bergan halol-u pokiza bir mo'vsafid bor edi. O'shani darvish bilan birga xon oʻrdusiga chiqardik. Bugun ertalab qaytib keldi. Xon barcha sultonlarning oldida qoʻliga Our'on olib aytibdir: «Shuncha qon toʻkilgani yetar, endi Xonzoda begim rozi boʻlsinlar, inilariga, onalariga, boshqa odamlariga tegmaymiz, qal'adan bexavotir chiqib ketsunlar», debdi. Katta toʻy-tomosha bilan uylanmoqchi emish. Samarqand xalqiga ham avfi umumiy bermoqchi emish! Bir qancha mo'ysafidlar buni eshitib, bizdan iltimos gildilar. Nachora?

Bobur chakkalarini ikki qoʻli bilan qisib, bir lahza jim turdi-yu, soʻng birdan alami kelib gapirdi.

- Gulday Xonzoda begim nevaralik xonning haramida... Yoʻq, yoʻq! Bu insofsizlik!
- Amirzodam, deb endi Qosimbek gapga aralashdi.
 Shu ketishda Shayboniyxon Samarqandni baribir olur.
 Oʻshanda zoʻrlik bilan boʻlsa ham oʻz niyatiga yetur.

Bobur onasidan himoya kutib, Qutlugʻ Nigor xonimga yuzlandi:

– Onajon, Xonzoda begim ham sizning suyukli farzandingiz-ku. Shunday jigarbandimizni qaysi vijdon bilan oʻtga solurmiz?!

Oʻzi zoʻrgʻa turgan Qutlugʻ Nigor xonim oʻgʻlining bu gapidan kuyunib yigʻlay boshladi:

- Xudo mening boshimga bu qora kunlarni solguncha jonimni olsa boʻlmasmidi?! Xonzoda begim - mening toʻngʻichim! Yolgʻizligimni bildirmay yurgan sirdoshim, mehribonim! Men undan qandoq ayrilgaymen, ey, Parvardigor? Men shunday qizimni yogʻiy panjasiga qanday topshirurmen?!

Eson Davlat begim qizining yelkasidan silab, uning iztirobini bosishga tirishar ekan:

– Oʻzingizni bosing, bolam! – dedi. – Sizdan koʻra qizingiz aqlliroq. Xonzoda begim hamma narsani tushundi. Mushkilotlarga fahmi yetdi. Yigʻlab-siqtab, axiri koʻndi.

Bobur hang-mang boʻlib, Qosimbekka yuzlandi:

- Nahotki shu gap rost? Xonzoda begim rozi boʻldilarmi?
 - Ha, amirzodam!
- Ishonmaymen! dedi Bobur. Soʻng kaftini kaftiga asabiy urib, savdarboshini chaqirdi-yu:
- Xonzoda begimni chorlang! deb buyurdi. Keyin onasi, buvisi va Qosimbekka qarata dedi:
- Meni ma'zur tutingiz, begim bilan yakkama-yakka soʻzlashmoqchimen.

Uchovlari indamay chiqib ketishdi. Anchadan keyin yashil qabo kiygan Xonzoda begim eshikdan motamsaro bir alpozda sekin kirib keldi.

Bobur uni qarshisiga oʻtqazib, bir lahza yuziga tikilib turdi. Ilgarigi gulgun yonoqlar endi sargʻayib ichiga botgan. Lablar soʻlgʻin. Faqat yirik-yirik koʻzlarida qandaydir qat'iyat alomati bor.

- Begim, siz... Shayboniyxon taklifiga rizolik bergan emishsiz. Shu rostmi?
 - Rizo boʻlmay ne ilojim bor?
- Mening magʻlubiyatim sizni ilojsiz qoldirgani rost. Lekin iningiz hali tirik. Men asir tushmoqchi emasmen. Bir oʻlim boʻlsa, hamma vaqt bor. Ajal yetmagan boʻlsa, sizlarni olib chiqib keturmiz. Kunim bitgan boʻlsa, ilkimda qilich bilan jon berurmen. Ana undan keyin rizolik bersangiz mayli. Unda hech kim: «Oʻzi omon qolib egachisini qurbon qildi», deyolmas. Menga bunday malomatdan oʻlim afzal. Rizo boʻlmang!

Xonzoda begimning koʻziga yosh quyulib keldi. U Boburni yov halqasini jang bilan yorib chiqib ketolmasligini bilardi. Bobur bir oʻlimni astoydil boʻyniga olib, shunday deganini sezardi. U Boburni mana shu mardligi va dovyurakligi uchun ham jonidan ortiq koʻrar, oʻzini yov qoʻliga tutqazib, ukasini naqd oʻlimdan olib qolishni istardi.

Lekin u oʻzining bu niyatini Boburdan yashirishga majbur edi. Chunki Bobur, hozir oʻzi aytganday, opasini qurbon qilib qutulib ketish malomatidan oʻlimni afzal koʻrardi. Agar u Xonzoda begimning asl niyatini bilib qolsa, har qanday yoʻl bilan boʻlsa ham opasini niyatidan qaytaradi. Undan keyin najot yoʻli butunlay bekiladi!

– Boburjon, siz meni deb bevaqt oʻlimni boʻyningizga olmang. Men sizning ulugʻ istiqbolingizga ishonurmen. Sizdek nodir iste'dodlar dunyoga kam kelishini boshqalar bilmasa ham men bilurmen. Oʻzingizni ehtiyot qiling! Taqdiringizni toleyi past egachingizning taqdiri bilan tenglashtirmang!

- Nechun bunday deysiz? Hammamiz ham bu oʻtkinchi dunyoga mehmonmiz! Siz bilan men bir onaning farzandlarimiz!
- Lekin men qiz tugʻilganmen, farqimiz shunda! Yoshim yigirma beshga kirdi-yu, hamon yolgʻizmen. Men koʻngil qoʻygan odamni taqdir menga ravo koʻrmadi! Omadingiz kelib, Shayboniyxonni yengganingizda, balki mening orzularim ham roʻyobga chiqur edi! Oʻshanda, balki mening ham baxtim ochilarmidi? Yoʻq, hamma umidlarim tarixning gʻildiragi tagida yanchildi! Qachongacha dargohingizda qari qiz boʻlib yurgaymen, izzatimni bilishim kerak!
- Nahotki, siz nevaralik cholni oʻzingizga munosib koʻrsangiz?
- Munosibimni topishdan umidim uzilgan! Endi keksami, yoshmi, menga baribir!
- Bir vaqtlar Oʻshda siz menga nelar degan edingiz? «Koʻnglingizga ishoning», demagan edingizmi? Nahotki, sizning koʻnglingiz shu berahm xonga moyil boʻlsa? Bultur bu odam Zuhra begimga qanchalik noinsoflik qilganini bir eslang. Nahotki, siz shunday odam tufayli bizdan ajralib ketmoqchi boʻlsangiz?!

Xonzoda begim oʻkirib yigʻlab yubordi:

- Ne gilay?! Boshqa najot yoʻq! Yoʻq!!!
- Bir onadan tugʻilganmiz, endi taqdirimizda neki boʻlsa birga koʻrurmiz! Bizdan ajralmang! Tunda yov halqasiga hamla qilurmiz! Tayyor turing!

Xonzoda begim ham yana erkakcha kiyinib, ukasi bilan jangga kirishni butun vujudi bilan istardi. Hozir unga ham dushman asoratidan koʻra qoʻlida qurol bilan oʻlish afzal tuyilardi.

Xonzoda begim toʻsatdan shu tuygʻuga berilib:

- Qachon? - deb soʻradi.

Bobur ovozini pasaytirib:

- Shu bugun kechasi! - dedi.

Xonzoda begim bugun kechasi suyukli ukasining yov qurshovida halok boʻlishi muqarrarligini goʻyo oldindan sezdi-yu, seskanib oʻrnidan turdi:

- Bugun emas! Yoʻq, yoʻq!

Bobur ham oʻrnidan turdi:

- Begim, mening inilarcha aytgan soʻzim inobatga oʻtmasa, buni podshohlik farmoni deb biling!

Xonzoda begim indamay, Boburga yaqinlashdi. Yuzini ukasining koʻkragiga bosib, yelkalari silkinasilkina oʻrtanib yigʻladi. Shu tarzda u Bobur bilan soʻzsiz vidolashdi-yu, keyin goʻyo uning farmoniga boʻysunganday bosh egib, chiqib ketdi.

* * *

Yarim tunda Bobur, Qosimbek, Qutlugʻ Nigor xonim, Oyisha begim, Tohir xotini Robiya bilan birga, yana oʻttiz-qirq nafar bek va navkarlar Shayxzoda darvozasiga yigʻildilar. Biroq ularning orasida Xonzoda begim yoʻq. Bobur Xonzoda begimni birga olib chiqishni onasiga topshirgan edi.

Qutlugʻ Nigor xonim yigʻlayverib, ovozini oldirib qoʻygan. Uning hazin tovush bilan bergan uzuq-yuluq izohidan Bobur shuni bildiki, Xonzoda begim buvisi bilan birga Chorraha darvozasiga qarab ketgan.

Shayboniyxonning qarorgohi oʻsha tomonda. Nahotki, Xonzoda begim oʻsha niyatidan qaytmagan?

Bobur orqaroqda turgan navkarlariga oʻgirildi-yu, koʻzi Tohirga tushdi:

- Tez Chorraha darvozasiga boring! Xonzoda begimni topib, mening buyrugʻimni yetkazing! Darhol bu yoqqa yetib kelsinlar! Begim kelmagunlaricha biz qoʻzgʻalmaymiz! Shuni borib ayting!
- Amirzodam!.. deb Qosimbek Boburga e'tiroz qilmoqchi boʻlgan edi. Bobur unga quloq solmay, yana Tohirga buyurdi:

- Tezroq boring!

Shiddat bilan chopayotgan otning taqalari toshlarga qarsillab urilib, koʻchalarning tungi sukutini buzib oʻtdi. Tohir Chorraha darvozasiga yetib borganda Xonzoda begim tushgan mahofa mash'al koʻtargan otliqlar qurshovida qoʻrgʻondan chiqib ketmoqda edi.

Koʻpdan beri davom etayotgan qamal yov qoʻshinini ham toliqtirgan, hamma urush tugashini sabrsizlik bilan kutar, agar Boburning opasi xonning shartini qabul qilsa, sulh tuzilishini koʻp odam bilar edi. Endi shahardan mash'alalar yoqib, darvozani ochib chiqqan shohona mahofa va uning ichida oʻtirgan Xonzoda begim xon qoʻshiniga tinchlik alomati boʻlib koʻrindiyu, hammani uygʻotib yubordi. Sulh keltirayotgan malika sharafiga nogʻoralar va karnay-surnaylar chalindi.

Mahofa atrofiga moʻri-malaxday qoʻshin toʻplanib borayotganini Tohir ochiq darvoza orqali koʻrdi-yu, otini tez orqaga burdi. Shayxzoda darvozasi oldiga uchib borib, hamma koʻrganlarini Boburga aytib berdi.

Shodlikka toʻlib yangrayotgan nogʻora sadolari, karnayning «vah-vaha-hu-u»si, surnay navosi bu yerlarga ham eshitilmoqda edi. Boburning nazarida, Xonzoda begim qari qiz boʻlishdan qoʻrqib va ukasi dargohida tortgan kulfatlaridan bezib, Shayboniyxon huzuriga rohat-farogʻat izlab ketgan edi.

– Dunyoda sadoqat yoʻq ekan! – dedi u alam bilan va otining jilovini siltadi: – Darvozani oching!

Darvoza sekin ochildi. Choh koʻprigi tushirildi. Olti oydan beri qoʻrgʻondan chiqmagan bir dasta otligʻ-u piyoda odamlar qorongʻi tunda yuraklarini hovuchlab, choh koʻprigidan oʻtdilar.

Atrof tahlikaga toʻla. Goʻyo har daraxt ortida bir oʻlim kutib turibdi. Yoʻllarda yov jangdovullari uchrab qolishidan xavotirlanib, yoʻlsiz joylardan yurdilar,

chuqur ariqlardan oʻtdilar. Lekin biror joyda yovga duch kelmadilar.

Samarqand qoʻrgʻoniga oʻralib, uning olti darvozasini olti boshli ajdarhoday qoʻriqlab yotgan yov qoʻshinining butun diqqat-e'tibori xon qarorgohidan kelayotgan karnay-surnay tovushiga va qal'adan goʻyo sulh timsoli boʻlib chiqqan malikaga jalb boʻlgan edi. Xonzoda begim xonning shartini qabul qilgandan soʻng Boburni ta'qib etmaslik haqida butun qoʻshinga farmon berilgan edi.

Xonzoda begim hamma balolarga oʻzini tutib berib, ukasini yov qurshovidan xalos qilganini Bobur bilmasa ham Qutlugʻ Nigor xonim yaxshi bilar edi. Uzoqdagi nogʻora va karnay-surnaylar toʻy shodiyonasini eslatuvchi quvnoq kuylar chalgan sari Qutlugʻ Nigor xonimning yuragi qon boʻlib, koʻzlaridan duv-duv yosh toʻkilardi.

TOSHKENT, O'RATEPA, SO'X KO'CHKI BOSGAN BULOQ

1

Toshkent... O'n besh-yigirma yildan beri urushning sovuq nafasi tegmagan bu shahar Samarqandga nisbatan osuda havot kechirmoqda edi. Toshkent qo'rg'onining har o'n ikki darvozasidan odamlar bemalol kirib-chiqib turibdi. Boʻzsuv va Solor arigʻining bo'ylaridagi mevali daraxtlar kuz yomg'irida yuvingan. Oʻrik, olcha barglari oʻz butoqlari bilan vidolashish oldidan shafaqday qizil tus olgan. Uzoqdan koʻrinib turgan Chotqol togʻlariga qor tushgan. Qamal dahshatlarini boshdan kechirib kelayotgan Boburga Toshkentning to'kin-sochin kuzi, bag'ri kengligi, togʻdan esgan sarin shabadasi mas'ud oʻsmirlik davrini eslatdi. U oʻn olti yasharligida kelganida, Xadradan pastdagi Hazrati Ukkosha bulogʻidan suv ichgan. Oʻqchi mahallasida Toshkentning jahonga mashhur oʻq-yoylarini yasagan ustalarga oltin bezakli «Kamoni Shoshiy» buyurtma bergan, Shayxontohurga koʻmilgan bobosi Yunusxonning qabrini ziyorat qilgan edi.

Hozir u elliktacha bek va navkari bilan (qolganlari uni Oʻratepada kutib turadigan boʻlishdi) Beshogʻoch darvozasidan kirib, Qoratosh mahallasi orqali xon saroyi tomon borar ekan, yonidagi Qosimbek birdan bezovta boʻldi:

- Nechun dorugʻa peshvoz chiqmadi?

Bobur Toshkent xonining jiyani edi, oʻtgan gal kelganlarida, shahar dorugʻasi ularni qoʻrgʻondan tashqarida izzat-ikrom bilan kutib olib, saroyga boshlab borgan edi.

Bu gal biz xonumondin ayrilib, magʻlub boʻlib kelmoqdamiz, janob Qosimbek!
 dedi Bobur ma'yus kulimsirab.
 Shuning uchun ortiqcha ehtirom kutmang.

Chindan ham Mahmudxon saroyida Boburni juda sovuq qarshi olishdi. Uning navkarlarini, hatto arkka kirgizishmadi. Bunday munosabatdan Qosimbek goʻyo oʻzini izzat-nafsi toptalgan odamday his qilib, gʻururi ogʻringaniday asabiylashayotganini koʻrgan Bobur:

- Siz bilan biz Samarqandda naqd oʻlimni zimmamizga olgan edik, hatto oʻlimdan najot izlagan edik! - dedi. - Oʻshal dahshatlarning oldida bu mayda behurmatliklar hech gap emas. Kecha Oʻratepada bir bayt bitdim, aytaymi?
 - Bajonidil!
 - Eshiting:

Davlat uchun koʻngulni zor etma, Izzat uchun oʻzingni xor etma!

– Haq gapni bitibsiz, amirzodam. Bu bevafo dunyo gʻam yemakka arzimaydir!

Shu bilan ikkovlari bir-birlariga sal tasalli bergan boʻldilar-u, Bobur xonning qabulxonasiga qarab ketdi.

Qoʻliga oltin dastali hassa ushlagan, zarbof toʻn kiygan shigʻovul Mahmudxonning Shayboniyxon elchisi bilan band ekanini aytganda, Boburning qalbida birdan noxush tuygʻular qoʻzgʻaldi. U qamaldan chiqqandan soʻng ikki oycha Oʻratepada xolasinikida turgan, Shayboniyxon Mahmudxonga elchi yuborib, Movarounnahrni boʻlib olish haqida bitim tuzishga intilayotganini oʻsha yerda eshitgan edi. Mish-mishlarga qaraganda, Shayboniyxon Fargʻona vodiysini Toshkent xoniga berib, Oʻratepani oʻzi ishgʻol qilmoqchi emish. Agar shu gap rost chiqsa,

Boburning bu atrofda jon saqlaydigan joyi qolmaydi, Movarounnahrdan bosh olib chiqib ketish kerak boʻladi.

Uning bugun Toshkentga kelishidan maqsadi – togʻasini Shayboniyxonning makr-u hiylalaridan ogoh qilish va uni bosqinchilarga qarshi mudofaaga chorlash...

Bobur qabulxonada ancha vaqt muntazir turgandan keyin shigʻovul chiqib, uni xonning huzuriga boshlab kirdi. Toʻrda qimmatbaho toshlar bilan bezatilgan shatrani donalari koʻrindi. Shayboniyxonning elchisi yoʻgʻon gavdali, bahaybat Jonibek Sulton xonga ta'zim qilib turibdi. Sarg'ish yuzli, xushbichim Mahmudxon tillarang moʻylovini dikkaytirib, mamnun kulimsirayotganiga qaraganda, hozir Jonibek Sultonni shatranjda yutgan edi. Toʻrt yildan beri jiyanini koʻrmagan togʻasi shuncha uzoqdan boshiga kulfat tushib kelgan Boburni kuttirib qoʻvib, oʻzi Shavbonivxonning elchisi bilan shatrani o'vnab o'tirganida qandaydir yashirin ma'no bor edi. Mahmudxon magʻlub boʻlgan jiyanidan koʻra, gʻolib Shayboniyxonni ortiqroq hurmat qilishini elchiga sezdirib qoʻymoqda edi.

Buni payqagan Bobur Jonibek Sultonga ataylab salom bermadi, unga xuddi devorga qaraganday beparvo bir nazar tashladi-da, togʻasiga yuzlandi:

– Xon hazratlari, men sizni yogʻiylaringizning makr-u hiylalaridan ogoh qilgali keldim!

U Jonibek Sultonning chiqib ketishini kutib, bir lahza sukut qildi. Oraga tushgan noqulaylikni tarqatish uchun Mahmudxon elchiga maxsus ehtirom bildirib, uni eshik ogʻzigacha kuzatib qoʻydi. Soʻng Boburni zarbof koʻrpacha ustiga taklif qilib, oʻng yoniga oʻtqazdi:

– Xush kelibsiz, Mirzam! Koʻp otashin boʻlmang. Bu kunlar ham oʻtar. Siz hali yoshsiz, oʻn gulingizdan biri ham ochilgan emasdur.

- Mening koʻp gullarim ochilmay xazon boʻldi, hazratim. Mening bir qanotim Ahmad Tanbalning olovida kuydi-yu, ikkinchi qanotimni Shayboniyxon kuydirdi. Ilohim, endi siz shu mash'um olovlarning orasida qolmang!

Mahmudxon bu gapni sal boshqacha tushundi:

- Toʻgʻri, Tanbal bizga ham xiyonat qildi. Shuning uchun biz Tanbal elchisini emas, Shayboniyxon elchisini qabul qildik.
- Ammo siz uchun Tanbaldan koʻra Shayboniyxon yuz chandon xatarliroq, hazratim! Chunki Tanbalga Fargʻona vodiysi yetib ortadir. Ammo Shayboniyxon butun Movarounnahrni egallamoqchi. Xuroson bilan Eronni ham olmoqchi. E'tibor bergan boʻlsangiz, uning unvoni: «Xalifayi Rahmon, Iskandari soniy!». Shayboniyxon Iskandar Zulqarnayndek barcha mamlakatlarni fath etmoqchi, yana bu bilan qanoatlanmay, butun musulmon olamining diniy rahbari xalifayi zamon boʻlmoqchi!

Shayboniyxonning niyati uning unvonidan ham koʻrinib turishiga Mahmudxon ilgari uncha e'tibor bermagan edi. Hozir Boburning soʻzlari ta'sirida bir lahza oʻylanib oldi, soʻng boyagi xon elchisining soʻzlarini esladi:

- Nazarimda, Shayboniyxon bizga qarshi yurish qilmoqchi emas. Elchisining aytishicha, ular Hisorni, soʻng Xuroson bilan Eronni egallashmoqchi.
- Xon hazratlari, bu hammasi sizni gʻaflatda qoldirish uchun keltirilgan yolgʻon dalillardir! Tarixni bir eslang: qaysi fotih avval Toshkent bilan Fargʻonani olmay turib, Xuroson-u Eronga yurish qilgan? Chingizxonmi? Yoʻq! Amir Temurmi? Yoʻq! Axir butun Movarounnahrni, Samarqand-u, Toshkent-u, Fargʻonani egallamasdan, ularning kuchiga tayanmasdan turib, Xuroson-u Eronga yurish qilish ahmoqlik boʻlur-ku! Buni Shayboniyxon bilmagay deysizmi?

Shayboniyxonning Toshkentga hujum qilish ehtimoli Mahmudxonni anchadan beri tahlikaga solib kelardi. Shuning uchun u Issiqkoʻldan narida hukmronlik qilib yurgan ukasi Olachaxonni oʻn besh ming qoʻshini bilan yordamga chaqirgan. Bu qoʻshin hozir yoʻlda, biror oy ichida Toshkentga yetib keladi. Shayboniyxonning odamlari bundan allaqachon xabar topgan boʻlishlari kerakki, Toshkentga elchi yuborib, murosa yoʻlini izlab qolishdi. Mahmudxon Shayboniyxonning sarkardalik qobiliyatini yaxshi biladi va u bilan urushishni istamaydi. Jiyani Bobur esa urush boʻlishini juda naqd qilib qoʻyyapti. Nega? Mahmudxon jiyanining niyatini aniqroq bilmoqchi boʻldi:

- Xoʻsh, Mirzam, Shayboniyxonning urushishi aniq boʻlsa, biz ne qilmogʻimiz kerak?
- Shayboniyxonga qarshi turgan barcha kuchlar toʻplanib, ittifoq tuzmogʻimiz lozim!

Mahmudxon qoʻngʻir koʻzlarini Boburga sinovchan nazar bilan tikdi.

- Siz bilan ittifoq tuzaylikmi, Mirzam?
- Faqat biz emas, kichik xon dodam Olachaxon hazratlari borlar-ku.
- Ha, Olachaxonning qoʻshini bilan mening qoʻshinim birlashsa, oʻttiz ming boʻlur. Keyin biz sizning qoʻshiningiz bilan birlashurmiz - shunda qancha boʻlgʻay?

Boburning ikki yuz-u elliktagina odami qolgan edi. Buni yaxshi biladigan Mahmudxon Boburni kulgi qilmoqchi boʻlib, shu savolni bermoqda edi. Chindan ham oʻttiz ming qoʻshini bor xonlar bir dasta askari qolgan, xonumonidan ayrilgan Bobur bilan ittifoq tuzib oʻtirarmidi?

Bobur Mahmudxonni oʻziga yaqin olib, shu gapni aytganidan izza boʻldi.

– Hazratim, oʻgay taqdir hozir meni shu koʻyga soldi. Ammo biz magʻlubiyat zahrini ichishdan oldin gʻalaba

sharobini ham tatib koʻrgan edik. Shuning uchun sizga koʻnglimni ochib gapirishga jur'at etdim!

- Ochiq gapirganingiz ma'qul, albatta. Qalay, iloj bo'lsa, Shayboniyxon bilan yana olishmoqchimisiz?

Mahmudxonning savolida: «Yiqilgan kurashga toʻymaydi, chamasi-da!» degan kinoyali ma'no bor edi.

- Olishishga mening haqim bor, dedi Bobur. Chunki birda yiqilgan boʻlsam, birda yiqitganmen! Ammo siz Shayboniyxonga koʻp yordamlar bergansiz!..
- Bu rost, rost! dedi Mahmudxon. Shu tobda uning koʻnglidan: «Agar ogʻa-ini ikkovimizning oʻttiz ming qoʻshinimizga Boburni sarkarda qilib qoʻysak, jiyanimiz Shayboniyxon bilan urushib, ancha tajriba orttirgan, oʻzi ham dovyurak yigit, yengib chiqishi mumkin», degan fikr kechdi.

Mahmudxonning oʻzida sarkardalik iste'dodi yoʻq edi. Agar Bobur uning qoʻshiniga bosh boʻlib Shayboniyxonni yengsa, keyin odamlar Mahmudxonni emas, Boburni va uning iste'dodini ulugʻlaydi. Undan soʻng, Bobur Toshkentni ham togʻasidan tortib olishga haqli boʻladi. Chunki azaldan ma'lum: qoʻshin kimning qoʻlida boʻlsa, hokimiyat oʻshaniki.

Mahmudxon shuni oʻyladi-yu, oʻz qoʻshiniga Boburni sarkarda qilish fikridan darhol qaytdi.

Gapni boshqa yoqqa burib:

– Shoʻrlik Xonzoda begim... ne koʻylarga tushdi-a? – dedi. – Shayboniyxon makkor tulki-da. Xonzoda begim ona tomondan bizga avlod, ota tomondan Temuriylarga mansub. Begimni olsa, obroʻsi oshishini bilgan. Samarqandda dabdabali toʻy berib uylanganmish.

Mahmudxonning gap avzoyidan, Bobur goʻyo opasini qurbon qilib, oʻzi qutulib chiqqan edi. Bobur voqeaning boshqacha boʻlganini ayta boshlaganda, Mahmudxon ishongisi kelmay bosh chayqadi:

– Juda uyat boʻldi-da, Mirzam, hammamiz malomatga qoldik!

- Davron mening boshimga toj kiydirgan edi, dedi Bobur yana otashin boʻlib. – Endi shu toj oʻrnida ta'na toshi! Hammasidan toʻydim, xon hazratlari! Endi borsa kelmas boʻlib bosh olib ketishdan boshqa ilojim qolmadi!
- Undoq demang, Mirzam! Minba'd siz bizning aziz mehmonimizsiz. Egachim Qutlugʻ Nigor xonim sizga muntazir edilar. Zaifangiz Oyisha begim ham shu yerdalar. Borib ular bilan koʻrishing, dam oling. Ertaga Shayboniyxon elchisi sharafiga qabul marosimi oʻtkazmoqchimiz. Siz ham ishtirok eting!

Bobur xon huzuridan chiqar ekan, hamma gapi bekor ketganini, Mahmudxon Shayboniyxondan tahlikaga tushib qolganini va u bilan dadil olishishga jur'at etolmay, xushomad yoʻliga oʻtganini endi aniq sezdi. Ark hovlisidan oʻtib borayotganda, Toshkentdagi osudalik hozir unga dovul oldidan boʻladigan xatarli sukunatdek tuyildi. Yaqinlashib kelayotgan dovuldan onasi va xotinini olib chiqib ketish niyati bilan arkning toʻridagi ayollar turadigan ichki hovlilarga qarab ketdi.

* * *

Oyisha begim Toshkentga bundan ikki oy avval kelgandi. Samarqandda ilk farzandining oʻlimi ustiga qamal azoblari qoʻshilib, yosh juvon kasalmand boʻlib qolgan edi. Mahmudxonning suyukli xotini Roziya Sulton singlisiga oʻzi turgan qasrdan joy berib, uni eng yaxshi tabiblarga qaratgan va yaxshi parvarish qilib, oyoqqa turgʻizgan edi.

Bobur shuning hurmatini qilib, avval Roziya Sulton begim huzuriga kirdi. Oyisha begimga qilgan parvarishlari uchun qaynegachisiga minnatdorchilik bildirdi-yu, endi xotinini Oʻratepaga olib ketmoqchi ekanini aytdi. Laqabi «Qorakoʻz begim» boʻlgan oʻttiz

yoshlardagi bu chiroyli juvon shahlo koʻzlaridan uchqunlar sochib:

- Amirzodam, Oyisha begim sargardonlikdan toʻygan, endi uni chekka joyga yubormagaymiz! dedi.
- Taqdirimizda bori shu boʻlsa, nachora, hazrat begim?
- Meni ma'zur tuting, amirzodam, ammo har kimning taqdiri oʻz peshonasiga bitilur.
 - Biroq... kemaga tushganning joni bir boʻlmasmi?
- «Jonimiz bir» deb bechora singlimga shuncha azob berganlaringiz yetar. Ozib choʻp boʻlib keldi. Endi sogʻayganda yana sarsonlik, yana lomakonlik!

Bobur bugun mayda-chuyda behurmatliklarga bardosh berishni zimmasiga olib kelgan boʻlsa ham, lekin xonning boyagi kinoyalari ustiga qaynegachisining bu beandisha gaplari qoʻshilib, jon-jonidan oʻtib ketdi.

- Hazrat begim, maqsadingizni ochiq ayting endi singlingizni mendan ajratib olmoqchimisiz?!
- Men undoq deganim yoʻq! Siz ham sargardonlikni bas qiling, amirzodam. Endi Toshkentda muqim turing!

Bobur: «Sizga sigʻindi boʻlibmi?» degisi keldi-yu, lekin yana oʻzini bosib:

- Taklifingiz uchun tashakkur! dedi va xayrlashib chiqib ketdi. Oʻsha kuni oqshom u Oyisha begim bilan yolgʻiz qolganda, Roziya Sulton begimning gaplaridan norozi boʻlganini aytdi:
- Toʻn iligʻini egasi bilur, deydilar. Roziya Sulton begim bizni oʻzimizchalik bilmasalar kerak. Koʻp aralashmasalar yaxshi boʻlur edi.
- Ammo men egachimga hamma gapni aytib berganmen, Mirzam.
- Er-xotinning hech kimga aytmaydigan sirlari boʻlmagaymi?

Oyisha begimning ilgarigi uyatchanliklari endi qayoqqadir yoʻqolgandi. U ham opasiga oʻxshab, Boburga tik gapirdi:

– Mening egachimdan yashiradigan sirim yoʻq, Mirzam!

Bir vaqtlar Boburni ulugʻlab, «hazratim» deydigan Oyisha begim endi xonga oʻxshab, balandroqdan kelib, «mirzam» deyishi ham gʻalati edi.

Bobur kinoya bilan soʻradi:

- Demak, endi sizga men kerak emasmen, faqat egachingiz kerak?
- Nechun unday deysiz? Men hali ham sizning nikohingizdamen!
- Unday boʻlsa, men sizni bu yerdan olib keturmen. Safar tayyorgarligini koʻring!

Yoʻl azobiga chidami yoʻq Oyisha begim ozorlanib soʻradi:

- Yana Oʻratepagami? Men oʻsha yoʻllarni eslasam, koʻnglim behuzur boʻladir. Hazratim, mening jonimni yoʻl oldi! Samarqandga bejon boʻlib bormasam edim, jigarporam oʻlmas edi. Mana hozir bir yoshga kirib tetapoya boʻlib yurib ketur edi!

Oyisha begim goʻdak oʻlgan qizalogʻini eslab, koʻzlari jiqqa yoshga toʻldi. Oʻshandagi oʻlimning sovuq nafasi Boburning ham yuziga tegib oʻtganday eti uvushdi.

- Ajalga davo yoʻq ekan, begim. Lekin undan berida bir boshga necha qayta oftob tegib, necha marta kulfat tushar ekan. Yosh boʻlsak ham buni koʻp koʻrdik. Oʻlmasak, hali yana yorugʻ kunlarga yetishurmiz, farzandlik ham boʻlurmiz. Shu mushkul damlarda bir-birimizni tark etmaylik. Men bilan birga yuring.
- Birga yurgan paytlarimda siz menga qaradingizmi, Mirzam? Hamisha saltanat tashvishi-yu urushyurishlar... Men sizni deb shuncha sargardon boʻldim. Siz meni oylar davomida koʻrmasangiz ham sogʻinmas

edingiz... Balki, men sizga munosib emasdurmen?.. Suymagan xotiningizning sizga ne keragi bor?!

Bobur xotiniga koʻngilsizroq boʻlib yurgan paytlarini esladi. Hozir ham Oyisha begimni birga olib ketishga urinayotgani – uni ortiq darajada suyganidan yoki usiz yashay olmasligidan emas, balki Oyisha begimni yaqinlashib kelayotgan xavf-xatar girdobiga tashlab ketishni oʻz sha'niga munosib koʻrmaganidan edi.

- Xonzoda begimni yogʻiyga oldirganimiz ozmi? dedi Bobur. Shuning malomati ham menga yetib ortadir, begim! Endi sizni bunday balolardan uzoqqa olib ketmoqchimen!
 - Hozir men uchun Toshkentdan tinch joy yoʻq!
- Bu hammasi muvaqqat tinchlik, inoning! Koʻp oʻtmay, Shayboniyxon bu yerga ham bostirib kelur!
- Men egachimning qanoti ostida hech narsadan qoʻrqmaymen! Dargohingizdan adoyi tamom boʻlib kelib, egachimning yonida yana tirildim!
- Mening dargohimda qiynalganingiz rost. Lekin... yaxshi kunlarimiz ham boʻlgan edi-ku!.. Insof bilan bir eslang axir!..

Oyisha begimning barcha alamlari yangilanib, xotirasi loyqalanib turgan shu daqiqalarda birorta yaxshi kun esiga tushmadi.

– Dargohingizda qachon yaxshi kun koʻribmen, Mirzam! Mudom safar! Mudom tahlika! Mudom sarsonlik! Mudom bemehrlik!

Bobur Oyisha begimdan bunchalik adolatsiz gap kutmagan edi. Axir u Samarqandni birinchi marta olganida, Oyisha begim «najotkorimizga» deb sovgʻa yubormaganmidi? Keyingi gʻalabasida, «faxrlanamen» deb shivirlagan kim edi? Bobur bularni eslab oʻtirishni oʻziga ep koʻrmadi-yu, xotiniga hayrat bilan tikilib:

- Nahotki hammasini unutgansiz? dedi.
- Yoʻq, koʻrgan azob-uqubatimni umrbod unutmasmen!
- Faqat azob-uqubat?!

– Bu ozmi? Oz boʻlsa, xoʻrlanib yigʻlaganlarimni ham unutmasmen! Endi qolgan umrimni egachimning duoyi jonini qilib oʻtkazurmen. Sargardonlik bas! Xoʻrlik bas! Men ham shoh qizimen!

Bobur oltin kamariga osilgan charm hamyonini titroq qoʻllari bilan ochib, nimanidir qidirdi, ammo topolmadi. Soʻng indamay tashqari chiqdi-yu, mulozimlari turadigan xonaga oʻtdi. Dastorpech ertaga boʻladigan qabul marosimi uchun Boburning shohona kiyimlarini sandiqdan olib, dazmollamoqda edi. Oltinlar, qimmatbaho gavharlar bilan bezatilgan ipak kiyimlar Bobur hozirgina xotini va qaynegachisidan eshitgan beandisha gaplar alamini yanada oshirib koʻrsatganday boʻldi. Shuning ustiga Qosimbek Boburga roʻpara boʻlib, shikoyat qildi:

– Xon shigʻovuli ertangi qabul marosimida Jonibek Sultonni sizdan balandroqqa oʻtqazmoqchi emish! Bu ne surbetlik! Axir siz shohsiz! Nahotki dashtiy bir bekni sizdan ortiqroq e'zozlasalar?!

Qosimbek hali ham oʻzini Boburning eshik ogʻasidek tutar va uning obroʻ-izzatini himoya qilishni oʻzining burchi deb bilardi. Xon bugun Boburni qabulxonasida muntazir qilib qoʻyib, Shayboniyxonning elchisi bilan shatranj oʻynab oʻtirganda ham dashtiy sultonni jiyanidan baland qoʻygan emasmidi? Bir kunda shuncha kamsitish!.. Ertaga bunday maydachuyda kamsitishlar yanada koʻpayishi aniq. Buning hammasiga chidab, sigʻindi boʻlib yurishga bardoshi yetmasligini endi aniq sezgan Bobur:

- Yoʻq! - dedi. - Hammasidan kechdim! Janob Qosimbek, men endi shoh emasmen! Kerak emas menga xon qabuli! Bas! Uloqtiring hammasini!

Bobur dastorpechning qoʻlidagi oltin bezakli toʻnni yulqib olib, yerga otdi. Nariroqda gavhar va yoqutlar bilan bezatilgan shohona salla turgan edi. Bobur sallaga qadalgan ikkita gavhar donasini – bir vaqtlar

Oyisha begim bergan sovgʻani sitib, yulib oldi, soʻng sallani eshikka qarab otdi. Salla chuvalib ketib, bir uchi ostona ustiga uzala tushdi.

Qosimbek sarosima bilan Boburning yelkasiga qoʻlini qoʻydi:

- Amirzodam, sizga ne boʻldi? Amirzodam!

Rangida qon qolmagan Bobur hansirab, xitob qildi:

– Minba'd men bir darvish bo'lib kun ko'rmoqchimen! Janob Qosimbek, onamga ayting! Men hozir O'ratepaga keturmen! Yuz chumchuqqa bir kesak! Toj-u taxt da'vosidan voz kechdim! Kim shunga ko'nsa, men bilan yursin! Qolganlarga javob!

Bobur salladan yulib olgan ikkita gavharni siqimlaganicha ark hovlisiga chiqdi. «Suymagan xotiningiz sizga ne kerak?» degan soʻzlar qulogʻiga qaytadan eshitilib ketdi. Chindan ham yulduzi to'g'ri kelmagan begimni endi o'z ixtiyoriga qo'ygan ma'qul emasmi? Ammo bu begim endi til chiqarib, shuncha achchiq gaplarni aytishi, eridan bironta ham yaxshilik koʻrmadim, devishi, Boburning qalb varalariga sepilgan tuzdek vujudini achishtirmoqda edi. U oʻz xonasiga kirib, qogʻoz va daftarlari saqlanadigan sandiq tagidan Oyisha begim bir vaqtlar ipak bilan tikkan xaltachani qidirib topdi. Yillar davomida xaltachaning oq matosi sargʻayib, xiralashgan, ammo qizil ipak bilan tikilgan «Najotkorimizga» degan kashtasimon yozuv asliday turgan edi. Bobur gavharlarni xaltachaga solib, Oyisha begimning oldiga bordi.

– Begim, siz meni najotkor bilib, bu gavharlarni «Taxtga chiqqanda, tojga qadab chiqsinlar», deb yuborgan edingiz. Hozir mening toj-u taxtim yoʻq... Shohlik da'vosidan ham butunlay voz kechdim. Darvish boʻlib, togʻlarga chiqib ketmoqchimen. Siz esa shoh qizisiz... Oling gavharlaringizni!.. Balki yana boshqa biron... najotkoringizga sovgʻa qilursiz!

Oyisha begim xaltachani olar ekan, achchiq bilan dedi:

- Meni yana tashlab ketadigan boʻlsangiz, javobimni berib keting!
 - Shundoqmi? Ajrashmoqchimisiz?
 - Ha. Ajrashamen!
- Boʻlmasa... bugundan boshlab menga xotin emassiz! Boshingiz ochiq! Shariat boʻyicha uch taloqsiz!

2

Oʻratepaning janubidagi Turkiston tizma togʻi etaklariga bahor ancha kechikib keladi. Hamal oyining oxirlarida dalalarga endi qoʻsh chiqadi. Qorli Piryax choʻqqisining tagida toʻrt tomoni baland tepaliklar bilan oʻralgan shamolpana Dahkat qishlogʻida oʻriklar savr oyiga borib gullaydi.

Qishloqning kunbotish tomonida baland tepalikka koʻtariladigan tik voʻl - baroz bor. Baroz shunchalik balandki, uning yuqorisidan Dahkatga qaralsa, qishloq teran bir chuqurlikning tubiga joylashganday koʻrinadi. Barozdan yuqoridagi tekis dalada Tohir yalang oyoq boʻlib, hoʻkiz bilan yer haydamoqda. Samarqandda Tohirga qoʻshilib, navkar boʻlib kelgan bir qulogʻi kesik Mamat esa hali havdalmagan zovak yerga qulochkashlab urugʻ sochyapti. U ham yalang oyoq boʻlib ishton pochasini shimarib olgan. Ulardan narida uch-toʻrtta dahkatlik tojik dehqonlar ham yer haydab, ekin ekayotir. Yer yumshoq, havo yoqimli, ishning unumi yaxshi. Shuning uchun hammalarining ruhlari koʻtarinki. Shuncha vaqt jang-u jadalda yurib, dehqonchilik kasbini sogʻingan Tohir endi yayrab, yer haydaydi va birda-yarim ashula xirgoyi qilib qo'yadi.

Barozdan piyoda koʻtarilib kelgan Bobur togʻda qoʻy boqib yurgan, dalada qoʻsh haydayotgan

yosh-yalanglarga qarar ekan, bir narsadan taajjublandi. Togʻ-u toshga poyabzal chidamagani uchun kambagʻallarning koʻpisi yalang oyoq yurardi. Ust-boshlari ham yupun, lekin ruhlari tetik, qorinlari toʻyib ovqat yeyishsa, kayflari chogʻ.

Bobur oʻzini shu yoshlarga qiyos qiladi: uning ham toʻrt muchasi sogʻ, oʻzi kuchga toʻlgan yigirma yoshli yigit, qishloq yigitlaridan kamligi yoʻq. Lekin nega u bunchalik gʻamgin? Mana bu ulugʻvor togʻlar bagʻrida nega u goʻzal tabiatning tirik bir boʻlagiday yayray olmaydi? Hamma gap yalang oyoq yurishda boʻlganiday, Bobur agʻdarma etigini yechib marzaga qoʻydi-yu, haydalgan yer ustida sarpoychan yurib koʻrdi.

Tuproq baxmalday mayin, undan bahor va yoshlikning hidi keladi. Odamning tuproqdan yaratilgani haqidagi rivoyat esga tushadi.

Navkarlar va dehqonlar Boburning yalang oyoq yurganini avval hazilga yoʻyib kulishdi. Keyin Bobur etigini marzada qoldirib, Dahkatning barozidan yalang oyoq tushib ketayotganini koʻrishdi-yu, hayron boʻlishdi.

Barozning mayda toshlari Boburning tovonlariga botar, tik joylardan tushayotganda, chaqir toshlar oyogʻiga tikan boʻlib kirib ketayotganday ogʻriq qoʻzgʻar edi. Lekin Bobur tishini tishiga qoʻyib, ogʻriqqa chidab borar edi.

Barozning yarmigacha tushganda ketidan agʻdarma etikni qoʻliga olib, sakrab-sakrab Tohir yetib keldi:

– Amirzodam, etikni kiying! Toʻxtang. Bu toshlar oyogʻingizni yara qilmasin!

Bobur toʻxtab, Tohirning tovonlari qoraygan kattakatta oyoqlariga qaradi:

- Sizning oyogʻingiz jarohatsiz-ku!
- E, amirzodam, biz oʻrganib ketganmiz.
- Men ham oʻrganmoq istaymen.
- Nechun?

- Sizlarga havasim kelur, - dedi Bobur yoʻlida davom etib.

Tohir undan sal keyinroqda borar ekan, kuldi:

– Amirzodam, podshohning navkarga havasi kelishi mumkin emas.

Bobur Tohirdan xiyol ranjib:

– Siz ham menga ishonmadingizmi? – dedi. – Toshkentda podshohlik da'vosidan voz kechganimni aytgan edim-ku!

Bu hodisaga Qosimbek ham, boshqa koʻpchilik bek va navkarlar ham «achchiq ustida shunchaki aytilgan gap», deb qarashgan va oʻsha ikki yuz ellik kishining hammasi Qutlugʻ Nigor xonim bilan birga Boburning ketidan Dahkatga kelishgan edi.

Tohir ogʻir tin oldi-yu:

- Amirzodam, men sizga oʻzimdan ham ortiq ishonurmen, - dedi. - Ammo sizning shohlik tashvishidan qutulishingiz mumkin emas.
- Nechun? Axir shahzodalarning toj-u taxtsiz oʻtganlari yoʻqmi?
 - Bor. Ammo siz undaylardan emassiz.
- Ammo men toj-u taxtning bevafoligini bilganlardanmen. Shoh Jamshiddek, Iskandar Zulqarnayndek tojdorlar ham orttirgan davlat-u mol-u dunyolarini tashlab, qabrga bitta kafan bilan ketgan emaslarmi?

Tohir yaqinda togʻning narigi tomonidagi Obburdon qishlogʻiga borganlarini esladi.

Boburning toj-u taxtdan ixlosi qaytganligi behazil boʻlsa kerakki, shoh Jamshidning tilidan aytilgan tojikcha she'rni chashma boʻyidagi toshga oʻydirdi. Toʻrt satrlik bu she'rning ikki satri Tohirning esida turibdi:

Giriftem olam ba mardi-yu zoʻr,¹ Va lekin naburdem bo xud ba goʻr.

Olamni zabt etgan jahongirlarning saltanati ham omonat – oʻzlari dunyodan ketishlari bilan tugaydi. Lekin shoirning yaxshi soʻzlari toshga bitilgan harflarday asrlar davomida oʻchmaydi. Shunday ekan, Bobur qolgan umrini shoirlikka bagʻishlasa yaxshi emasmi?

- Men jon der edim-u, lekin beklar sizni qoʻymaslar,dedi Tohir.
 - Beklarga ijozat berurmiz, keturlar.

Bobur shu soʻzining ustidan chiqa olishini yalang oyoq yurish bilan isbot qilmoqchi boʻlganday, yana mayda toshlar ustidan sarpoychan yurib ketdi. Biroq uning qiynalib borayotgani mayishib yurishidan sezildi. Tohir uni quvib yetdi-yu:

- Amirzodam, etikni kiying, dedi. Yalang oyoqlikni havas qila koʻrmang. Xudo sizni hech vaqt bu koʻylarga solmasin.
 - Qaysi koʻylarga?
 - Yalangoyoqlarning ahvoliga tushmang!
 - Ajabo! Yalangoyoqlar odam emasdirlarmi?
 - Odam. Lekin siz shoh boʻlib tugʻilgansiz!
 - U holda shoh odam emasdirmi?

Tohir javob topolmay qoldi. U shoh bilan navkar orasida togʻday baland devor borligini bilar, Bobur bu devordan bir sakrab oshib oʻtmoqchi boʻlayotgani gʻalati tuyilardi. Tohirning nazarida, Bobur qayta shoh boʻlishdan umidini uzgan-u tushkunlikka uchragani uchun shu gaplarni aytyapti.

¹ «Olamni mardlik va zoʻrlik bilan oldik, lekin oʻzimiz bilan birga goʻrga olib ketmadik». Bobur 1502-yilda toshga oʻydirgan bu satrlarni oradan 452-yil oʻtgandan keyin 1954-yilda tojik olimi A.Muxtorov Obburdon qishlogʻidagi bir quduq yonidan topib oladi. Toshga bitilgan bu she'r hozir Dushanbedagi muzeyda saqlanmoqda.

– Amirzodam, agar siz shohlikdan shoirlikni afzal koʻrsangiz, unda men ham... ahli ayolim bilan tinch bir goʻshada dehqonchilik qilib, sizga sadoqat bilan umr oʻtkazgan boʻlur edim... Lekin buning iloji boʻlmas...

Bobur etigini Tohirning qoʻlidan oldi.

– Siz qayting, – dedi Tohirga. – Ammo bu gaplar oramizda qolsin. Keyin yana kengashurmiz. Boring!

Tohir barozdan qaytib chiqar ekan, Boburning unga oʻzini yaqin olib, shuncha gʻalati gaplar aytganidan koʻngli koʻtarilib, kulib qoʻydi. Biroq Bobur bir goʻshada tinchgina yashaydigan miskintabiat odamlardan emas edi. Uning yalang oyoq yurishga oʻrganmoqchi boʻlgani esa Tohirga shoirona bir shoʻxlik boʻlib koʻrinardi.

Tohir barozning tepasiga chiqqanda, orqasiga oʻgirilib qaradi. Bobur hamon etigini qoʻliga olib, pastlab bormoqda edi. Tohir uning chidamiga tan berib: «Lekin soʻzidan qaytmaydigan odati ham bor!» deb qoʻydi.

Bobur oyogʻining bir-ikki joyi qavarib shilinganini sezsa ham ogʻrigʻiga chidab, qishloqning berigi chetidagi chashma boʻyiga sarpoychan bordi. Undan narida yumshoq tuproqli soʻqmoq bor edi. Lekin qishloq odamlari uning yalang oyoq yurganini koʻrib, past-u baland gap qilishlari mumkin edi.

Unga uyini bergan qishloqning kadxudosi ham, bek va mulozimlar ham «Mirzo hazratlari» deb, Boburga hamisha ta'zim qilishar edi. Agar Bobur kambagʻal dehqonga oʻxshab sarpoychan yursa, bular oddiy yalang oyoqqa ta'zim qilganday koʻrinib, izzat-nafsga borishlari va xafa boʻlishlari mumkin edi. Shuning uchun Bobur a'yonlar uchraydigan joylardan odatdagiday etik kiyib oʻtar edi-yu, Dahkatning atrofidagi yon bagʻirlarga borgach, yana yalang oyoq boʻlib olardi. Oyogʻiga botib ozor beradigan gʻadirbudur toshlar, butalar dilini oʻrtayotgan alamli oʻylarning taftini oladiganday boʻlar edi. Kunlar oʻtishi

bilan uning tovonlari sagʻri charmiday qalinlashib tosh-poshlar, yogʻin-sochinlar kor qilmaydigan boʻlib ketdi.

* * *

Dahkatdan uch-toʻrt chaqirim quyida Qorazov deb ataladigan baland jarlar tagidan odamni oqizadigan ulkan Oqsuv yelib oʻtadi. Bu suvning oʻngga burilib, yoyilib oqadigan sokinroq bir joyida kechuv bor.

Togʻ bagʻridan qiyalab oʻtgan soʻqmoq bilan archalar orasidan yurib kelayotgan Bobur tushga yaqin Oqsuvning shu kechuvi oldidan chiqdi va daryodan oʻtib kelayotgan yigirmatacha qurolli otliqlarga roʻpara kelib qoldi. Oldinda piyozi chakmon va qizil boʻrk kiygan Qosimbek. Unga ergashib kelayotgan navkarlar ham tanish.

Bobur ularga yalang oyoq yurganini koʻrsatgisi kelmadi-yu, yoʻldan chetlanib, baland bir archaning soyasiga borib oʻtirdi.

Lekin bu orada Qosimbek ham uni koʻrib qoldi. Kechuvda qornigacha hoʻl boʻlgan otini Boburdan ancha narida toʻxtatib, tez yerga tushdi. Navkarlar ham Boburni hurmat qilib apil-tapil otdan tushdilar. Qosimbek otining jilovini navkariga berib, egilib ta'zim qilgan koʻyicha Boburga yaqinlashdi. Musibatli tovush bilan dedi:

- Amirzodam, bir qoshiq qonimdan keching! Yana bir shumxabar!...

Boburning xayoli Toshkentga ketdi. Qosimbek uch oydan beri oʻsha yoqlarda yurgan edi. Boburning togʻasi Mahmudxon Shayboniyxonning elchisi sharafiga ziyofatlar berib yurib, axiri xon bilan bitim tuzgan edi. Bu bitimga binoan Shayboniyxon Oʻratepani Mahmudxonga berib, oʻzi Hisorga qoʻshin tortib ketgan edi. Paytdan foydalangan Mahmudxon ukasi

Olachaxon bilan birga Fargʻona vodiysidagi Ahmad Tanbalga qarshi urush ochgan edi. Ular vodiyni Ahmad Tanbaldan tortib olib, Toshkent xonligiga qoʻshmoqchi edilar. Shayboniyxon avval bu niyatga qoʻshilgan edi. Nahotki endi soʻzidan qaytgan boʻlsa?!

- Ne boʻldi? Soʻzlang!
- Shayboniyxon manfurlik bilan soʻzidan qaytmishdir, amirzodam! Togʻalaringiz Fargʻona vodiysida Ahmad Tanbal bilan olti oy olishib, uni yengolmay, koʻp talafotlar berib, zaiflashib qolgan paytda Shayboniyxon bitimni buzib, kutilmaganda ketlaridan bostirib kelmishdir! Oldinda Ahmad Tanbal qoʻshini, ketlarida yolgʻon ittifoqchi Shayboniyxon qoʻshini! Togʻangiz bu ikki baloning orasida qolib tor-mor boʻldilar! Shayboniyxon uni asir olmishdir.

Bobur joyida oʻtirolmay oʻrnidan turib ketdi.

- Yo alhazar! Toshkent ham ketdimi, a?
- E, soʻramang, amirzodam! Toshkentda ikki ming qoʻriqchi askar bor edi. Olti oyga yetgulik zaxira bor edi! Qoʻrgʻonni qattiq turib himoya qilsa boʻlur edi. Biroq asir tushgan Mahmudxon behad uyatlik bir ish qilmishdir. Shayboniyxon uni qatl ettirmoqchi boʻlganda, Mahmudxon: «Qonimdan keching, ne talabingiz boʻlsa bajaray!» dedi. Shunda Shayboniyxon shart qoʻyurki, Toshkentdagi qoʻriqchi askarlaringizga buyruq yozib yuboring, toki qoʻrgʻonni jangsiz tashlab chiqib ketsinlar, ammo xazina bilan haram qoʻrgʻonda qolsin. Jon shirinlik qilib, Mahmudxon bu shartni qabul qilmishdir!
- Nahotki butun haram Shayboniylar ilkiga tushgan boʻlsa?!
- Ha, amirzodam, gʻoliblar qoʻriqchisiz Toshkentda uch kun elni talamishdir! Togʻoyingiz Mahmudxonning eng koʻhlik singlisi Davlat begim Shayboniyxonning oʻgʻli Temur Sulton haramiga uchinchi xotin boʻlib kirmishdir. Ellik uch yashar Shayboniyxonning oʻzi

Mahmudxonning oʻn olti yoshlik goʻzal qizi Moʻgʻil xonimni nikohlab olmishdir! Mahmudxonning suyukli xotini Roziya Sulton begim ilgarigi elchi Jonibek Sultonga gʻunchachi qilib nikohlanmishdir! Bultur Xonzoda begim uchun bizni shunchalar malomat qilgan Mahmudxon endi suyukli xotinini, qizini, singlisini oʻz joni uchun bunchalik sharmandali ahvolga solgani butun el-ulusning nafratini keltirmishdir!

Boburning xayoli Oyisha begimga ketdi. Undan koʻngli qolib, ajrashib ketgan boʻlsa ham, lekin bir vaqtlar ilk yoshlik mehri bilan suygan xotinining Shayboniyxon haramiga tushishi ehtimoli uni dahshatga keltirdi. Opasi Xonzoda begimning Shayboniyxon haramiga tushgani ozmi?

Bobur Qosimbekka dahshat toʻla koʻzlarini tikib soʻradi:

- Nahotki Oyisha begim... Egachim Xonzoda begimning kundoshiga aylantirilgan boʻlsa?!
- Yoʻq, amirzodam! Ne til bilan aytayki, Oyisha begim xonning amakisi – ellik besh yoshli Koʻchkinchixonga toʻqol xotin qilib nikohlanmishdir!

Bobur yuzini qoʻllari orasiga olib, nido qildi:

- O, bu ne razolat? Ne sharmandalik?!

Qora koʻzlaridan uchqunlar sochib, Boburga achchiq gaplar aytgan oʻsha Roziya Sulton begim bugun Jonibek Sultonning quchogʻida! Bu yoʻgʻon gavdali makkor bek Mahmudxon saroyida elchi boʻlib, xon bilan shatranj oʻynab, ataylab yutqizib yurgan paytlaridayoq uning suyukli xotinini koʻz ostiga olib qoʻygan boʻlsa ehtimol. Oyisha begim-chi?

Qosimbek armon toʻla tovush bilan soʻzida davom etdi:

- Koshki Mahmudxon shuncha uyat ishlar qilib, tirik qolgan boʻlsa!
 - Togʻoyim oʻldirildimi?!

- Shayboniyxon birinchi martasida uni oʻldirmagan edi. Lekin haligi sharmandaliklar bilan ruhan oʻldirgandan battar qilib Movarounnahr chegarasidan sharqqa Oltoy tomonga quvib yuborgan edi. Bundan alami kelgan Mahmudxon oʻsha yoqlarda oʻziga tarafdorlar topib, qoʻshin yigʻib, Shayboniyxondan qasd olish uchun yana Sirdaryo boʻyiga keladi. Xoʻjand yaqinida ikkinchi marta jang boʻlib, Mahmudxon yana yengiladi-yu, ikki yoshli oʻgʻli bilan asir tushadi. Bu gal Shayboniyxon Mahmudxonning oʻzini ham, yosh oʻgʻillarini ham ayovsiz qatl ettirmishdir!
 - Yo alhazar!.. Yo Rab!..

Bir vaqtlar Boburga oqibatsizlik qilib, alam oʻtkazgan yaqinlarining taqdir tomonidan bunchalik shafqatsizlarcha jazolanishi Boburni qora bosiriqday ezib, karaxt qilib qoʻydi. Bobur ulardan har qancha ranjiganda ham bunday ogʻir jazolarni ularning hech biriga ravo koʻrmas edi.

Boburning rangi quv oʻchib, yuz muskullari titrayotganini koʻrgan Qosimbek shumxabar keltirgani uchun yana bir marta uzr soʻradi. Boburning sal taftini oladigan chora qidirib:

- Amirzodam, qani, oʻtirsinlar, marhumlarning arvohiga tilovat qilaylik, - dedi.

Tizzalari boʻshashib, oyogʻida zoʻrgʻa turgan Bobur archa tagidagi boyagi joyiga qaytib oʻtirdi. Qosimbek uning qarshisiga tiz choʻkdi. Navkarlar ham birinketin choʻnqaydilar. Qosimbek shirali, yoʻgʻon ovoz bilan Qur'on suralarini ohangdor qilib aytib, uzoq tilovat qildi. Daryoday bir zaylda oqadigan bu ohanglar Boburga dunyoning bebaqoligini, oʻtib turgan har bir daqiqa umr qaytib kelmaydigan ne'mat ekanini, hayotning gʻanimatligini eslatdi-yu, u oʻzini sal bosib, yalang oyoqlarini toʻnining etagi bilan bekitib qoʻydi. Tilovat tugab, yuzlariga fotiha tortganlaridan soʻng Qosimbek navkarlarga qoʻli bilan nariroq borib turish

ishorasini qildi. Ular uzoqlashgach, Boburga yanada yaqinroq kelib, past ovoz bilan dedi:

- Shayboniyzodalar bu gʻalabalardan quturib, Andijonga koʻz tikmishlar. Bosqinchilar erta-indin Oʻratepaga ham kelurlar. Endi bu yerlarda yurish xatarli, amirzodam. Togʻoshib, Hisorga ketmoq kerak.

Hisor hukmdori Xisravshoh taxtni Boburning amakivachchasi Boysunqur mirzodan tortib olib, taxtga da'vogar boʻlmasin, deb, oʻldirtirgan edi. Bobur shuni esladi-yu:

- Mening qordan qochib doʻlga tutilishim ne darkor, janob Qosimbek? dedi.
- Mening maqsadim boshqa, amirzodam. Kamina Hisor beklari bilan bulturdan beri maxfiy muzokara olib bormoqdamen. Ularning koʻpi Xisravshohdan norozi ekan. Oʻzi bir navkardan chiqqan tagi past hukmdor. Taxtda oʻtirishga haqi yoʻq. Borsak, yaxshi beklari sizga yon bosgaylar.
- Yana taxt talashishmi? Yoʻq, janob Qosimbek! Men bu talashlardan juda toʻydim! Hozir menga tinch bir goʻsha boʻlsa, darvishona hayot kechirsam, ash'or yozsam – shuning oʻzi bas!..

Qosimbek boyadan beri koʻzini Boburning yalang oyoqlaridan olib qochmoqda edi. Shahzodaning bunday yurishi unga juda erish tuyilardi.

– Amirzodam, siz bizning taqdirimizni ham oʻylang! Ikki yuz ellikta sodiq odamlaringiz – beklar-u mulozim-u navkarlaringiz sizga omad tilab, avvalgidan ham katta martabalarga yetishingizga ishonib, togʻ-u toshda sargardon boʻlib yurishi nechun?

Qosimbekning gapi tagida: «Chindan darvish boʻlamen desangiz sizga buncha bek-u navkarlarning ne keragi bor? Nechun javobini bermaysiz?» degan ma'no yotar edi.

– Siz keltirgan mudhish xabarlardan koʻnglim vayron boʻlib turgan paytda yana bir mushkul gapni qoʻzgʻadingiz, janob Qosimbek!

- Gustohligim uchun meni kechiring!
- Ammo siz haqsiz. Men sizdek sodiq kishilarimning taqdirini ham unutmasligim kerak. Rostini ayting, janob Qosimbek, Xisravshohning oʻzi ham sizni xizmatga chorlaganmi?
- Chorlagan. Ikki qayta maxsus odam yubormishdir. Bobur Qosimbekning mardona yuziga, qirq yoshga bormasdan oq oralay boshlagan kalta soqol-moʻyloviga ma'yus bir nazar tashladi.
- Sizdan mahrum boʻlish men uchun behad mushkul! - dedi. - Otam oʻlgandan beri menga otadek gʻamxoʻrlik qildingiz. Men sizdan koʻrgan sadoqat-u yaxshilikni hali boshqa hech qaysi bekdan koʻrgan emasmen!
 - Sarafrozmen, amirzodam!
- Endi shu yaxshiliklaringiz hurmati, men sizga javob berurmen. Mayli, Hisorga boring!
- Sizni tark etib ketishga koʻnglim yoʻq, amirzodam! Birga ketaylik!
- Men oʻzim ham shohlik zanjiridan butunlay ozod boʻlishga intilmoqdamen, janob Qosimbek. Bu zanjirning bir uchi tobe odamlarga bogʻlangan boʻlsa, uning ikkinchi uchi shohning oʻziga bogʻlanur ekan! Shu sabab, tobelarni zanjirdan boʻshatmaguncha podshohning oʻzi ham zanjirband boʻlur ekan. Men endi mana shu tabiat bagʻrida zanjirsiz yashashga qasd qildim. Shuning uchun sizga javob! Boshqa bek-u mulozim-u navkarlar ham vaqt-soati bilan javob olurlar!

Bobur Qosimbek bilan xayrlashmoqchi boʻlib oʻrnidan turdi. Samarqandda suyukli opasidan, Toshkentda xotinidan ayrilgan, bugun esa shuncha mash'um xabarlar eshitib, yana eng ishongan bekidan ham ajrashishga majbur boʻlayotgan Bobur oʻzini har qancha tetik tutishga urinsa ham tizzalari bukilib, gandiraklab ketdi. Qosimbek uni quchoqlab xayrlashar ekan, koʻzlari jiqqa yoshga toʻldi.

Bobur oʻziga azob beradigan ogʻir tuygʻularni togʻlardan koʻrinadigan kengliklarga sochib yubora olsa yoki goʻzal she'riy satrlarga joylay olsa bir qadar yengil tortadi.

Ne yerda sokin oʻlay? Ne qilay? Qayon ketayin? Ne dayrdin eshigim ochilur, ne masjiddin. Necha eshikdin eshikka gado kabi yetayin?

Kuyib-yonib yozgan bu satrlari qalbining taftini olar, dunyoda uning uchun hamma eshiklar bekilganda ham bir muqaddas qopqa - she'riyat qopqasi doim ochiq ekanini ich-ichidan sezib, koʻngli koʻtarilardi. U oʻz qalbida hali sarf etilmagan qudratli kuchlar borligini, opasi Xonzoda begim Bobur bilan vidolashgan paytida: «Sizning nodir iste'dodingiz bor, bu buyuk ne'matni hayf qilmang!» degan soʻzlari koʻp esiga tushadi. Kecha mana shu Oqsuv bo'yidagi bir qishloqda to'y boʻlgan, shunda yosh bir xonanda sehrli tovush bilan Boburning «Koʻnglimdan oʻzga yori vafodor topmadim» deb boshlanadigan gʻazalini ashula qilib aytganini u oʻzi koʻchadan oʻtayotib eshitgan edi. Oʻsha daqiqalarda uning qalbidagi eng zoʻr kuch junbishga kelib, yuzaga chiqish uchun voʻl axtargan edi. Bu ichki kuch unga Dahkatning kunchiqish tomonidan uch ming gaz balandlikdagi Osmon Yaylov togʻining uchidan otilib chiqib turgan moʻjizaviy buloqni eslatdi. Jilgʻalar boʻyidan, togʻ yon bagʻrilarining tagidan koʻz ochgan buloglar koʻp. Lekin shunday yuksak togʻning eng baland bir nuqtasidan yorib chiqqan bunday gʻalati chashmani Bobur birinchi marta shu yerda uchratdi.

Janubda mangu qorga burkangan ulugʻvor Piryax choʻqqisi yaltirab turibdi. Ammo u choʻqqi bilan Osmon Yaylov togʻning orasida behad chuqur jilgʻalar, katta-katta balandliklar bor. Bu buloqning suvi oʻsha choʻqqidan tushib, yana Osmon Yaylovga chiqib kelguncha ikki oradagi chuqurliklardan ham teranroq joyga tushib, soʻng yana yuksak toqqa koʻtarilgan boʻlishi kerak. Buloq buncha kuchni qayerdan olganikin? Uni shunchalik baland joyga chiqishga, shunday toshlar orasidan koʻz ochishga nima majbur qilgan ekan? Ehtimol, ilgari uning koʻzi pastdagi togʻ kamarlarida boʻlgandir? Balki buloqning ustiga togʻ koʻchib tushib, avvalgi koʻzini bekitib qoʻygandir?

Boburga birdan oʻz hayoti ham koʻchki bosgan buloqqa oʻxshab koʻrindi. Axsida qulagan jar ham shu buloqning koʻziga tushgan. Koʻchmanchi sultonlarning Samarqanddagi gʻalabasi ham... Ichki bir kuch bilan qaynab chiqayotgan buloq koʻchkining tuproqlarini yuvib, toshlar orasidan yoʻl topib oʻta boshlaganda, Movarounnahrdagi ijtimoiy zilzilalar zarbidan yangiyangi jarlar qulaydi, qoyalar koʻchadi-da, yana shu buloqning koʻziga tushadi.

Buloq hamon tugʻilgan zaminining boshqa joylariga bosh urib, yorugʻ dunyoga olib chiqadigan yangi yoʻllar izlaydi. Agar Osmon Yaylov bulogʻi toshlar orasidan yoʻl topib, mana shunday baland qoyani yorib chiqqan boʻlsa, Bobur umidsizlanmasligi kerak. Ehtimol, uning toleyi ham mana shu buloqqa oʻxshab, baland bir nuqtadan qayta koʻz ochar. Balki bu baland nuqta she'riyatdadir?

Bir kuni peshin kechroq Bobur Osmon Yaylov bulogʻi boʻyida mana shu xayollarga gʻarq boʻlib yolgʻiz oʻtirganda, katta-katta ikkita boʻribosar itni ergashtirib, bir choʻpon yigit kelib qoldi. Oyogʻida choriq, boshida qizil hoshiyali oq qalpoq, beliga katta pichoq osib olgan, qoʻlida qizil irgʻay tayoq. U tosh ustida oʻtirgan Boburga salom berdi-yu, itlarni orqaroqda qoldirib, oʻzi buloqdan kaftida suv olib ichdi. Keyin hoʻl qoʻllarini qalami yaktagining qoʻltiqlariga arta turib, Boburga gap qotdi:

- Ha, joʻra, poshshong ziqnalik qildimi, toqqa yalang oyoq chiqibsen?

Choʻponning «sen-sen»lab gapirgani Boburning qulogʻini tirnab oʻtganday boʻldi. Ammo oʻzini bosiq tutib:

- Qaysi podshohim? deb soʻradi.
- Bobur degan bir podsho Dahkatda yurgan emish. Sen oʻshaning odamlaridanmisen?

Bobur eski kiyimlarini kiyib chiqqan, oʻzi togʻ oftobida kuyib qoraygan, ammo uning yuzida, qoʻllarida asilzodalarga xos bir nazokat borligi bilinib turardi. Choʻpon uni podshohning mulozimlaridan deb oʻylamoqda edi. Bobur oʻzini tanitgisi kelmay:

- Ha, - dedi.

Choʻpon irgʻay tayogʻiga keng koʻkragini tirab, Boburga sinovchan nazar bilan tikildi:

- Podshongga juda sodiqmisen?

Bobur miyigʻida kulib:

- Men oʻzimga sodiq boʻlsam bas, dedi.
- Podshong ham seni yomon koʻrsa kerak-da, xor qilib qoʻyibdi.

Endi Bobur choʻponning yuziga tikilib qaradi. Betiga hali ustara tegmagan yigirma yoshlardagi yigit. Lekin chuqur koʻzlari qirq-ellik yoshga kirgan va koʻp gʻam chekkan odamnikiday soʻlgʻin, keksanamo.

– Podshohimni muncha koʻp soʻroqlading, biron arzing bormi? – dedi Bobur kulimsirab.

Choʻpon qovoqlarini uyib:

- Men uni mana shu togʻda yakkama-yakka uchratmoqchimen, dedi.
 - Agar uchratsang... Ne gaping bor?

Choʻpon yigitning koʻzlari gʻazab bilan qisildi:

- Otam bilan akamning boshini ne qilgan, shuni soʻrab bilmoqchimen.
 - Boshini? Bobur-a?! Sen... sen kimsan oʻzing?
 - Chagraklardanmen!

Bobur Andijon togʻlarida yashaydigan chorvador turkiy qabila – chagraklarni eslab, hayrat bilan soʻradi:

- Bu yerda ham chagraklar bormi?
- Biz bu yerga Oʻsh tomonlardan qochib kelganmiz. Men oʻshanda oʻn toʻrt yashar bola edim. Bobur kelib, otam bilan akamning qoʻylarini, yilqilarini tortib olmoqchi boʻlgan. Choʻponlar: «Bermaymiz!» deb gʻalayon qilgan. Keyin Bobur hammasini oʻldirib, boshlarini kesib ketgan. Onam bilan borsak, oʻn beshyigirmata oʻlik yotibdi. Boshlari yoʻq. Tanasidan tanib olish qiyin boʻlarkan. Onam dam u tanani quchoqlab yigʻlaydi, dam bu tanani...

Bobur Oʻsh janubida bundan olti yil avval Ahmad Tanbalning qonli xurjunidan lolaqizgʻaldoqlar ustiga yumalab tushgan kallalarni yana koʻz oldiga keltirdi. Oʻshanda uni seskantirib yuborgan yoshgina yigitning kallasi va ustara tegmagan yuzi koʻz oldida qaytadan gavdalandi. Mana bu turgan choʻponning yuzi Boburga birdan oʻsha yuzni eslatdi-yu, kesik boʻyinning qon aralash goʻshtlari xayolida takror paydo boʻlib, borligʻini dahshatga keltirdi. U choʻponga sarosima koʻzlar bilan qarab:

– Ahmad Tanbal oʻldirgan! – dedi. – Sulton Ahmad Tanbal!

Choʻpon tayogʻini koʻkragidan olib, Boburga yaqinroq keldi:

- Sen oʻsha boshlarni koʻrganmiding?
- Ha, yaylovda... Oʻshning yaylovida Ahmad Tanbal oʻsha boshlarni keltirib koʻrsatgan. Bunga olti yil boʻldi... Choʻponlar gʻulu koʻtarib, navkarlardan uchtoʻrttasini oʻldirmishlar. Tanbal oʻshaning qasdiga bosh kesib kelgan edi!
- Tanbal emas! Menga koʻrgan odamlar aytgan! Otamning boshini Bobur kesib ketgan!

– Odamlar yolgʻon aytmishlar! Men... aniq bilamen. Bobur norasida oʻsmir edi. Toqqa Sulton Ahmad Tanbal borgan!

Bobur oʻzini oyoqlayotgan odamga oʻxshab shoshilib gapirayotgani uchun choʻpon yigit endi undan gumonsiradi. Zugʻum qilib:

– Sen oʻzing kimsen? – dedi. – Bobur sening kiming? Bu savol Boburning etini junjiktirdi. Goʻyo choʻpon hozir undan otasining xunini talab qiladigandek tuyildi. Egasining ovozidagi gʻazab va tahdidni payqagan itlar birdan irillab, Boburga tashlanishga tayyorlanishdi. Bobur oʻrnidan sapchib turdi. Qoʻli beixtiyor belidagi xanjarning sopiga bordi. Lekin uning oyoqlari yalang edi. Itlar eng avval uning oyogʻidan oladiganday koʻrindi. Shu payt u oʻzining yalang oyoq yurganidan qattiq pushaymon boʻldi.

– Nega indamaysen? – dedi choʻpon yana tahdid bilan.

Bobur oʻzini iloji boricha vazmin tutib:

- Ne deyin? Gapimga ishonmasang! dedi.
- Choʻpon itlariga oʻgirilib:
- Toʻrtkoʻz, Boʻynoq, yotinglar! dedi. Soʻng yana Boburga yuzlandi: – Xoʻsh, gaping chin boʻlsa, mening otamni Boburning oʻzi emas, Tanbal degan beki oʻldirgan. Shundaymi?
 - Shundoq.
 - O'sha bekka kim farmon bergan? Boburmi?
- Bobur bunday boʻlishini bilmagan... Yoshlik qilgan!
- Yana poshshoyingning tarafini olasan-a! Agar men hozir mana bu itlarimga «ol!» - desam, seni tilka-pora qilib tashlagay. Shunda faqat itlar aybdor boʻlgaymi? Bularni olqishlaganim uchun men gunohkor boʻlmasmenmi?

Bobur choʻponning bu gapiga e'tiroz qilib boʻl-masligini sezdi-yu, boshini quyi soldi:

- Balki sen haqlidirsen...
- Kimsen oʻzing? Ayt rostini!

Choʻponning ovozidagi tahdidni sezishib, itlar yana irillashdi. Bobur qoʻrqqanini sezsa, itlar unga tashlanadiganga oʻxshardi. U bor kuchini goʻyo koʻzlariga yigʻib, choʻponga tik qaradi-yu, dadil turib:

- Men Boburmen! - dedi.

Choʻpon quloqlariga ishonmay, uning yalang oyoqlariga yana bir qaradi:

- Nahotki podshoh Bobur sen boʻlsang?!
- Ha, men podshoh edim!
- Hozir-chi?
- Hozir... toj-u taxt da'vosidan voz kechdim. Endi faqat shoirona hayot kechirmoqchimen.
 - Shoshma, shoshma!

Oqsuv boʻyida boʻlgan kechagi toʻyda choʻpon ham bor edi. U xushovoz yosh hofizning Bobur gʻazali bilan aytgan ashulasini tinglab, gʻalati boʻlib ketgan edi. Ashula oxirida:

Bobur, oʻzungni oʻrgata koʻr yorsizki, men Istab jahonni, muncha qilib yor topmadim! –

degan satrlar uning esida qolgan edi.

Hozir Bobur bir oʻzi togʻ-u toshda yolgʻiz yurgani ham uning oʻsha baytini tasdiqlagan koʻrindi-yu, choʻpon itlariga qarab:

Yot! Boʻynoq, yot! – deb buyurdi. Itlar tinchlangach,
yana Boburga koʻz tikib soʻradi: – Shoirliging rost
boʻlsa, shu yerda yozgan she'rlaringdan birini ayt-chi?

Bobur yerga qarab oʻylanib oldi-da, boshini koʻtardi.

- Eshit:

Ne xesh meni xushlar-u ne begona, Ne gʻayr rizo mendin-u ne jonona. Har nechaki yaxshilikda qilsam afsun, Xalq ichra yomonlik bilan men afsona.

Ichki tugʻyon bilan oʻrtanib aytilgan bu satrlarning tafti choʻponning birdan yaltirab ketgan koʻzlarida aks etdi.

- Sen ham kuyganlardan ekansen, shoirliginga tan berdim! Agar shu shoirliging boʻlmasa, seni rahmatlik otam qasdiga itlarimga talatib yuborar edim! Xayr, shoir, omon boʻl!

Choʻpon itlarini ergashtirganicha chagʻatda yoyilib yurgan qoʻylariga qarab ketdi.

Bobur shu kuni Osmon Yaylovdan Dahkatga qanday tushib kelganini bilmaydi. U mash'um oʻtmishidan osonlikcha qochib qutulolmasligini, yomon beklar Boburning nomidan qilgan zolimliklarni odamlar undan koʻrishini oʻylab, vujudini yangi bir bezovtalik chulgʻab oldi. Yoshlikda beklarning ra'yiga qarab qilgan xatolari boyagi ikkita vahimali itning qiyofasiga kirib, hali ham ketidan quvib kelayotganga oʻxshardi.

Dahkatda esa uni yana bir tahlikali xabar kutib turardi. Shayboniyxon qoʻshinlari Oʻratepaga yetib kelgan, shaharga bozor qilish uchun borgan dahkatlik kadxudoni xon kishilari tutib olib kaltaklashgan.

- Bobur yashirinib yurgan joyini koʻrsatasan! deb talab qilishgan edi. Yuzlari qamchi izidan qontalash boʻlib shishib ketgan ellik yoshlardagi kadxudo tojikchalab:
- Men mehmonimni tutib beradigan ablah emas!
 dedi Boburga.
 Yovlaringizni Oqtangi degan daraga boshlab borib, adashtirib, oʻzim togʻma-togʻ qochib keldim!

Oqtangi Dahkatdan oʻttiz chaqirimcha gʻarbda edi. Xonning iskabtoparlari bugun boʻlmasa, ertaga bu yerlarga yetib kelishi muqarrar. Shayboniyxon Boburning boshini kesib kelganlarga katta oltin va'da qilgan.

Ichki hovlidan Qutlugʻ Nigor xonim chiqdi:

-Boburjon, hammamiz najotni sizdan kutmoqdamiz! Darvishona yurishlarni endi bas qiling. Hamma sizni quvgʻindagi shoh deb bilur, boshqa gapga hech kim ishonmagay. Xon kishilari ham sizni taxtga da'vo qilishi mumkin boʻlgan bir shahzoda deb izlab yururlar. Dahkatliklar ham shuncha vaqt bizga non-u tuz berdilar. Endi bu qishloqni xavf-xatardan qutqarish ham sizning burchingizdir, jonim!

Bobur agar yov bilan bu yerda toʻqnashsa, qishloq oyoqosti boʻlishini oʻyladi. Bu yerda u bilan birga yurgan onasini, bek va navkarlarini yovdan omon saqlash uchun ham, oʻzi boyagi choʻponga oʻxshash qasoskorlarning tasodifiy qurboni boʻlib ketmasligi uchun, dahkatlik kadxudoning tuzini oqlash uchun ham Bobur yana qaytadan qurol-yarogʻ taqishga va odamlariga boshchilik qilishga majbur ekanini, hozir shundan boshqa iloji yoʻqligini his qildi-yu, ogʻir «uh» tortdi:

- Shohlik taqdirimdan yalang oyoq qochib qutulolmas ekanmen! Janob Sherimbek! Siz endi Qosimbekning oʻrnida amiral umarosiz!

Boburni o'n ikki yoshida Olatogʻ tomonlarga olib qochib ketib qutqarmoqchi boʻlgan keksa Sherimbek togʻoyi quvonib, ta'zim qildi:

- Inoyatingizdan sarafrozmen, amirzodam! dedi.Buyuring!
- Odamlarimizning barchasiga amrimizni yetkazing. Koʻch-koʻronni yigʻishtirsinlar! Shu bugun kechasi Dahkatdan joʻnab ketgaymiz!
- Muborak buyrugʻingiz alhol ado etilur, amirzodam!
 Yana zirhli kiyimlar kiygan, qurol-yarogʻ taqqan
 Bobur oʻsha kecha togʻdan-togʻga oshib kun chiqish tomonga Isfaradan naridagi Soʻxga qarab ketdi.

Togʻdan tushib kelayotgan Soʻx soyi toshlarga bosh urib shovullaydi. Bobur archazor soʻqmoqdan Oynatogʻ tomonga koʻtarilib boradi. Togʻlarda koʻp yurib har qancha chiniqqan boʻlsa ham, tik soʻqmoq yoʻlda hansirab qoladi. Oynatogga yetguncha ikki-uch marta toʻxtab, nafas rostlaydi. Tabiat moʻjizasi boʻlgan bu togʻning silliq toshlarida atrof xuddi oynadagi kabi akslanib turadi. Bobur bu togga chiqqanda, uning sehrli ovnasida oʻz taqdirini koʻrishga intiladi. Qachongacha togʻdan-toqqa oʻtib, chet qishloqlarda Shayboniyxon qilichidan jon saqlarkan? Ana, yashil bogʻlarga burkangan Soʻx, Hushyor qishloqlari. Bular ham Chingiziylar xurujidan himoya istab, Boburni uch yuztacha navkari bilan yil bo'yi mehmonday e'zozlab vurishibdi. Bosqinchilarning shum qadamlari hali bu yerlarga yetib kelgan emas. Ular Sirdaryo boʻylarida va Andijon tomonlarida oʻzaro urushlar bilan band.

Bobur quyoshli kunda Oynatogʻ tepasiga chiqib, Qoʻqon tomonlarga oqib ketayotgan Soʻx soyiga tikiladi. Bu soyning suvida tillarang shu'lalar oʻynaydi. Aytishlaricha, Soʻx suvining tarkibida oltin bor ekan, shuning uchun bu suvni ichgan odamning vujudi yayraydi. Nahotki shu Oynatogʻ ham, shu tilloli soy ham – hammasi yana Chingiziylar istilosiga giriftor boʻlsa? Boburning ortidagi qorli togʻlardan sovuq shamol esadi. Uzoqdagi yashil vodiylarga osmondagi oqish bulutlarning soyasi toʻshalib yotadi.

Hozir avji bahor, Fargʻona vodiysi yashil libosda.

Ufqning harir pardasi ortida – koʻz ilgʻamas uzoqliklarda Chotqol togʻlari-yu Toshkent vohasi bor. Jizzax va Samarqandni, Margʻilon va Andijonni Bobur hozir goʻyo xayol koʻzi bilan koʻrdi-yu, bir vaqtlar shunday keng dunyoda bexavotir, erkin yurgan paytlarini eslab, yuragini armon timdaladi.

Hozir mana shu ulkan Vatanda uning osuda yashaydigan makoni, tayinli bir uyi yoʻq. Hammasi Tanbal bilan Shayboniyxonning qoʻliga oʻtib ketgan. Eshik ogʻa Sherim togʻoyi Boburni Xurosonga ketishga undaydi.

Biroq Bobur ketsa, Vatanidan umrbod ayrilishi mumkinligini goʻyo oldindan sezadi. Ilgari tugʻilgan yurtida bemalol yurganda unchalik bilinmaydigan Vatan tuygʻusi endi Vatanidan ayrilish xavfi tugʻilganda uning butun vujudini qamrab olgan. U mana shu oʻlkani necha qayta u chetidan-bu chetigacha kezib chiqqan, uning har bir chaqirimiga koʻz nurini toʻkib, yoshligini urugʻday sochib oʻtgan. Uning butun umri, butun borligʻi mana shu muazzam zaminga ildiz otgan. Endi bu ildizlarning hammasini qanday yulib olib ketadi? Buning ogʻrigʻiga qanday chidash mumkin?

Ahmad Tanbal bilan Shayboniyxon avval bir-biri bilan ittifoq tuzib, hozir bir-birining payini qirqishga tushgan. Shu kunlarda ular jang qilayotganini Bobur aniq biladi. Zora bu ikkalasi bir-birining boshini yesayu, Boburning bekilgan yoʻllari ochil-sa...

Bobur shu umid bilan Andijon tomonga maxsus odamlar yuborgan. U erta-yu kech shu odamlarning xushxabar bilan qaytishini kutadi.

Lekin yuborilgan odamlar bir yarim oydan beri qaytmayapti. Nima boʻldiykin? Kutish ogʻir. Kunlar benihoya sekin oʻtadi. Bobur nima qilishini bilmay togʻyon bagʻirlarida yolgʻiz kezgani-kezgan. Tadbirkor Qosimbek ketib qolmaganda, balki undan yaxshi bir maslahat chiqarmidi? Jonkuyar safdoshi Noʻyon Koʻkaldosh ham yoʻq – bultur Toshkentning janubidagi Ohangaronda bir nomard uni baland jardan tashlab oʻldirgan. Bir-biridan mash'um xotiralar Boburning xayolida muttasil charx uradi. U intihosiz gʻamgʻussalar qurshovidan chiqib ketishga intilib, xayolida she'r mashq qilib koʻrdi. Ammo uni bu koʻylarga solgan

dahshatli voqealarni qofiyaga solib, ohangdor qilib aytishga xushi kelmadi.

* * *

Kechki payt togʻlarga tuman tushdi. Archazor yonida xayol surib yurgan Bobur pastdagi vodiy yoʻllarini ham tuman toʻsib qoʻyganini koʻrdi-yu, soy boʻyiga keldi.

Quyuq tuman dunyoni allanechuk tor va sovuq qilib qoʻydi. Soʻx soyining yuqori-pastlari ham koʻzdan yoʻqoldi. Tezoqar togʻ daryochasining qayoqdan kelib, qayoqqa ketayotgani endi faqat uning toshlarga urilib, shovullashidan bilinar edi, xolos.

Boburning hozirgi qarorgohi mana shu soyning yaqinida – keng bir sayhonlikda edi. Balandroq bir joyda uning qizil movut chodiri bor. Chodirning oʻng yonida Qutlugʻ Nigor xonimning sakkiz burchakli oq oʻtovi turipti. Qolgan yigirma-oʻttizta oʻtov va chodirlar ularning nari-berisiga oʻrnatilgan. Sovuq tuman ichida chodir va oʻtovlar goʻyo bir-birlaridan uzoqlashib ketganday va hammasini mogʻor bosayotganday koʻrinardi.

Bobur yoʻlida uchragan odamlarning ta'zimlariga indamay bosh irgʻab oʻtdi-yu, Mamadali kitobdorning oʻtovi tomonga burildi. Bu yerda Bobur doim oʻz koʻchi bilan birga olib yuradigan kitoblari saqlanar edi. Besholti tuyaga yuk boʻladigan nodir kitoblar qalin charm qoplangan maxsus sandiq va qutilarga yogʻin-sochin oʻtmaydigan qilib joylangan edi. Keksayib qolgan boʻlsa ham hamma safarlarda Bobur bilan birga yuradigan zahil yuzli ellik besh yashar Mamadali kitobdor kitoblarni xuddi chaqalogʻini avaylaydigan onaday avaylab-asrar edi. U Boburga ta'zim qilib:

- Buyuring, amirzodam! - dedi.

Bobur tarixiy kitoblardan bir-ikkitasining nomini aytdi.

Mamadali kitobdor kitoblarga qoʻl urishdan oldin qoʻlini yaxshilab yuvadigan odati bor edi.

- Siz muntazir boʻlmang, qulingiz elturmen!

Bobur oʻtovdan chiqib, oʻz chodiriga kirdi. Oradan ancha vaqt oʻtganidan keyin Mamadali kitobdor aytilgan kitoblarni ipak matoga oʻragan holda ikki qoʻllab koʻtarib kirdi-yu, toʻrdagi miz ustiga sekin qoʻyib, orqasi bilan yurib chiqib ketdi.

Bobur mashhur sarkardalar va shohlarning hayotlari haqidagi tarixiy kitoblarni varaqlar ekan, murakkab jumlalar, jimjimador oʻxshatishlar, afsona va rivoyatlar orasidan chinakam boʻlgan va odamni ishontiradigan voqealarni izlardi. Lekin koʻpchilik kitoblarda nuqul gʻalabalar dabdabali uslub bilan kuylanardi.

Ehtimol, hozir Shayboniyxon haqida ham mana shunday dabdabali kitoblar yozilayotgandir. Bobur Binoiyning yana Shayboniyxon tomoniga oʻtib ketganidan, Muhammad Solih esa «Shayboniynoma» degan she'riy kitob yozayotganidan xabardor edi. Ular Shayboniyxonning Bobur bilan olishuvlarini qanday yozisharkin? Mana bu kitoblardagi kabi gʻolibni koʻklarga koʻtarib maqtashsa, Boburga boʻlmagan ayblarni taqib, uni yomonlashsa, keyin odamlar haqiqatni qayerdan biladi?

Bobur nuqul zafar tantanalarini kuylagan jangomalarni bir chetga surib qoʻydi. Soʻng oʻrnidan turib, oʻzining «Vaqoye'» deb atalgan xotira daftarlarini sandiqdan oldi. Qiziq: soʻnggi marta daftarga Bobur oʻzining Samarqandni Shayboniyxondan qanday tortib olganini yozgan-u keyin unga qoʻl urmagan edi. Demak, keyingi magʻlubiyat va sargardonliklarni uning oʻzi ham yozishni istamagan ekan! Ammo bular daftarga yozilmagani bilan Boburning xotirasida

muttasil takrorlanib yuribdi-ku. «Isitmani yashirsang, ichga urar», deydilar.

Bobur qilgan xatolarini daftaridan yashirgani bilan ular har kuni necha qayta yangi-yangi tafsilotlari bilan xayolidan oʻtib, qalb yarasini tirnagani-tirnagan. Bundan koʻra hamma voqealarni rostgoʻylik bilan mana bu daftarga yozsa, balki oʻshanda isitma tashiga chiqib, dili xiyol yengillashar?

Bobur daftariga Saripulda qanday magʻlub boʻlganini, keyin qanday xoʻrliklar koʻrganini yoza boshladi.

U bu ishni goʻyo oʻzi uchun, oʻz vijdoni oldida hisob bergisi kelib qilardi. Shuning uchun boya oʻqigan kitoblaridagi jimjimador, balandparvoz uslub bu yozuvlarga mutlaqo yarashmasligini sezardi. Shu sezgi ta'sirida kitoblari orasida turgan Shomiyning «Zafarnoma»sini qoʻliga olib varaqladi.

Bu kitob muqaddimasida Shomiyning Amir Temurdan qanday topshiriq olgani hikoya qilingan edi. Sohibqiron jangnomalar va tarix kitoblarida koʻp uchraydigan hashamdor takalluflarni suymas ekanlar, ortiqcha lof urishlar, mubolagʻalar ichida haqiqat yoʻqolib ketishini, dabdabali uslub chindan sodir boʻlgan voqealarning ma'no va mohiyatini odamlardan toʻsib qoʻyishini aytgan ekanlar. «Shuning uchun siz bor haqiqatni aniq ravon qilib yozing, toki uning ma'nosini avom xalq ham anglagay, xos kishilar ham maqbul koʻrgay», – deb sohibqiron Shomiyga maxsus tayinlagan ekanlar.

Afsuski, Shomiy bu topshiriqni toʻliq uddalay olmagan ekan. Amir Temur uning «Zafarnoma»sini oʻqiganda qanoatlanmaganini Bobur onasi in'om qilgan sandiqdagi boshqa qoʻlyozma manbalardan bildi. Ehtimol, shundan soʻng Amir Temurning koʻrgan-kechirganlari va yaratgan tuzuklari uning oʻz tilidan aniq, iliq va ravon uslubda bayon etilgandir?

Hozir Boburning diliga eng yaqin uslub mana shu edi. U xotira yozishda ham sohibqiron bobokalonidan saboqlar olar, boshidan kechirgan barcha hodisalarni, yutuq va xatolarini eng ishongan sirdoshiga aytib dardlashgan kabi samimiyat bilan qalam tebratardi. Faqat uning endigi sirdoshi – oʻzi-yu mana shu daftari edi. «Koʻnglimdan oʻzga mahrami asror topmadim!» deb gʻazal bitgan Bobur endi barcha koʻrgan-kechirganlarini mana shu mahramiga roz aytganga oʻxshab xotira yozardi.

Bu rozlar orasida faqat jabr-u jafolar emas, yodga tushganda koʻngilni koʻtaradigan voqealar ham yoʻq emas edi. Boshiga tushgan koʻrguliklar Boburni nihoyatda chiniqtirgan, goho yalang oyoq qor kechib yurar, ammo shamollash nimaligini bilmas edi. Shu haqdagi bir lavhani daftariga yozib qoʻydi:

«Xashtiyak kenti yaqinida mahkam zarb sovuq edikim, ikki-uch kishi sovuqning shiddatidan oʻlub edi. Manga gʻuslga ehtiyoj boʻldi. Bir ariq suvidakim chekkalari qalin muz toʻngʻib edi, oʻrtasi suvning tezligidan yax bogʻlamaydur edi, bu suvga kirib, gʻusl qildim, oʻn olti qatla suvga choʻmdim».

Oʻshandagi sovuqning ta'siri yodiga tushib, eti yana bir junjikdi, lekin oʻn olti marta muz orasiga choʻmgan boʻlsa ham, sogʻ-salomat qolgani – vujudida qanchalik pahlavonona kuch-quvvat yigʻilganidan dalolat berishini oʻylab suyunib qoʻydi.

Ammo shundan keyingi voqealarni qalamga olganda, Ahmad Tanbalga in'om qilgan bagʻdodiy qilichi aylanib kelib, Boburning joniga qasd qilgani koʻz oldida tahlikali tarzda gavdalandi.

Oʻsha yili Bobur Ahmad Tanbal bilan qaytadan jangga kirishib, Oʻsh va Oʻzganni qoʻlga kiritgan, Andijon yaqinida uning askarlariga shikast yetkazib, qoʻrgʻon ichiga chekinishga majbur qilgan edi.

Biroq kechasi Bobur qorovullikka tayin etgan navkarlar beparvolik qilib uxlab qolganmi yoki tunda Tanbal bilan yashiriqcha til biriktirganmi, harqalay, tong qorongʻisida kimdir «Yogʻiy bosdi!» deb qichqirdida, ura qochdi. Xakan arigʻi yaqinida ochiq joyda uxlab yotgan odamlar choʻchib uygʻonishdi-yu, vahima ichida tum-taraqay boʻlib ketishdi. Bobur tez otga minib, yoni-veriga qarasa, oʻntacha odami qolibdi. Nariroqda yovning jangdovullari qochganlarning ketidan oʻq otyapti:

- Toʻxta! Qaytinglar! - deb qichqirdi Bobur oʻz odamlariga. Ammo hech kim qaytmadi.

Yov jangdovullari ozdek koʻrindi. Bobur yoydan ularga qarab oʻq otdi. Jangdovullar qochdi. Bobur ularni quvish bilan boʻlib, daraxtlar orasidan chiqib kelgan yuzga yaqin otliqlarni ancha kech koʻrdi.

Tong yorishib qolgan edi. Hammadan oldinda qoʻlida qalqon tutgan, qilich yalangʻochlagan Ahmad Tanbal kelmoqda edi.

Bobur uni tanigach, otining jilovini tortib, yonveriga qaradi. U bilan faqat Tohir va yana ikkita yigit – uchtagina jangchi qolgan edi. «Toʻrt kishi bularga bas kelolmaysen, qoch!» dedi ichki bir ovoz.

Ammo shuncha xiyonatlar qilgan, doim qochib qutulib yurgan Ahmad Tanbal endi birinchi marta yuzma-yuz kelganda, undan qoʻrqib qochishga oriyat yoʻl bermadi. Oriyat oʻlimdan yomon deb, bejiz aytmagan ekanlar. Bobur darhol jilovini qoʻyib yuborib, kamoniga oʻq oʻrnatdi. Ahmad Tanbal qilichini sugʻurayotganda, Bobur uning qisiq koʻzlarini moʻljalga olib oʻq otdi. Oʻq Tanbal boshiga kiygan zirhli dubulgʻaga qarsillab urildi, uni teshib oʻtolmagan boʻlsa ham, Bobur xiyonatkor dushmanining boshiga musht tushirganday boʻldi. Bobur chapdastlik bilan yoyga yana oʻq oʻrnatib, uning bezraygan yuziga

toʻgʻrilab otdi. Tanbal yuzini qalqoni bilan toʻsishga ulgurdi.

Bobur otgan ikkinchi oʻq qalqon orqali Tanbalning yuziga urilgan tarsakidek ovoz chiqardi. Bu orada Tanbalning yonidagi kishilar Boburga ham yoydan oʻq vogʻdirdilar. Bir oʻq uning tizzasidan pastroq boldiriga qadaldi. Ahmad Tanbalning oʻzi otini «chu-chulab» qoʻlida qilichi bilan Boburga baqamti keldi. Bobur varador ovogʻining «jizillab» kuvib ogʻriganini va Ahmad Tanbalning qoʻlidagi qilich allanechuk tanish ekanini bir vaqtda his qildi. Bu - Boburning nomidan Ahmad Tanbalga in'om qilingan egik bag'dodiy qilich edi. Bu qilichni oʻpib, Boburga sadoqatli boʻlish haqida qasamyod qilgan Ahmad Tanbal nahotki endi uni egasiga qarshi koʻtarsa? Bobur buni oʻylashga ham ulgurmasdan qilich uning boshidagi dubulgʻaga kelib tushdi. Boburning koʻzlaridan goʻyo olovli uchqunlar sochilib ketdi, boshi birovning boshidek hissiz boʻlib qoldi. Oilichning tigʻi dubulg'a kivgizini kesib o'tolmagan bo'lsa ham bosh yaralangan edi. Boburning bo'yniga dubulg'a chetidan qon sirqib tushdi. Boldiridagi yaradan etigi issiq qonga toʻlmoqda edi.

Ahmad Tanbal gʻolibona hayqirib, qilichini yana koʻtardi. U endi oʻtkir qilichini Boburning zirhli kiyimlari orasidan sal-pal koʻrinib turgan boʻyniga urmoqchi va boshini kesib tushirmoqchi edi. Shu payt ortdan Tohir yetib keldi-yu, Bobur mingan boʻz otning jilovini siltab tortdi. Bedov ot oʻrnidan sakrab qoʻzgʻalar ekan, Ahmad Tanbal boʻynini moʻljallab urgan qilich Boburning yoy-oʻqlari solingan saqdogʻiga tegib, uni shart kesib tushdi.

- Amirzodam! Jilovni oling! - qichqirdi Tohir.

Oʻzi esa Boburning otiga qamchi bosdi.

Qamchi yeb oʻrganmagan uchqur bedov oldinga oʻqday otilib, egasini balo-qazodan olib chiqib ketdi. Yarador Bobur Oʻshga qaytdi, ancha kungacha boshi

gʻuvillab, oyogʻi choʻloglanib yurdi. Lekin uni yara ogʻrigʻidan ham ortiq qiynagan dard - Qosimbekning taklifi bilan Tanbalga in'om etilgan bag'dodiy qilichning aylanib kelib oʻz boshiga tushganligi edi. Qotilga kim qilich bersa, oʻzi uning tigʻiga duchor boʻlarkanmi? Biroq dunyoda adolat boʻlsa, shuncha qotilliklar, shuncha xiyonatlar qilgan Ahmad Tanbalga nega gasos gaytmaydi? Bobur shu oʻylar bilan xotira yozishga berilib ketib, qorongʻi tusha boshlaganini ham sezmadi. Savdarlar oltin qandildagi shamlarni voqdilar. Boburga kechki ovqat keltirdilar. U volgʻiz oʻtirib ovqatlandi. Xotira yozganda unga oʻz hayoti avvalgidan iliqroq va ma'noliroq tuyilgan edi. Bekor oʻtirganda esa yana oʻsha ogʻir oʻylar, sovuq pushaymonlar xayoliga bosib kela boshladi. Bobur ulardan tezroq qutulgisi kelib, yana qalamini qoʻliga oldi. Keyin yarim tungacha daftaridan bosh koʻtarmay soʻnggi yilning voqealarini yozdi.

* * *

Atrofdagi oʻtovlar jim, hamma uyquda.

Tun sukunatida otning dupuri, itlarning hurishi eshitildi. Qarorgohning chetiga qoʻyilgan qorovul zarda qilib:

- To'xta! Kimsen? dedi. O'ronni¹ ayt!
- O'ron Andijon.

Qorovulning ovozi yumshadi:

- Andijon boʻlsa kelaver. Ovozingdan Tohir chopuqqa oʻxshaysenmi?
 - Ha, Tohirmen.
 - Bemahalda yolgʻiz yuribsen?
- Meni gapga tutma. Mirzo hazratlariga shoshilinch xabar keltirdim.

¹ O'ron – parol.

Tohir qorongʻida Boburning chodirini tusmollab topdi-yu, otini beriroqdagi qoziqqa bogʻladi. U avval soqchilarni yoki mulozimlarni uygʻotmoqchi boʻlib, chodirning roʻparasidagi oʻtovga qarab oʻta boshladi. Shunda chodirning ichi yorugʻ ekanini, eshik oʻrniga tutilgan parda ochilib, Bobur chiqib kelganini koʻrdi. Tohir Boburning qarshisiga kelib yukundi. Past tovush bilan:

- Amirzodam, muntazir qilganim uchun afv eting,- dedi. - Yogʻiylaringizning urushi endi tugadi.

Bobur sabrsizlanib soʻradi:

- Xushxabar bormi? Nechun yolgʻiz qaytdingiz?
 Tohir boshini quyi solib, hazin tovush bilan dedi:
- Bir qoshiq qonimdan keching, amirzodam!..

Bobur sovuq xabarlar izgʻirinini oldindan sezganday eti uvushdi:

- Qani ichkari kiring.

Savdarlar uxlab qolgan. Bobur hech kimni uygʻotgisi kelmadi. Baland, keng chodirning toʻrida toʻrt-beshta sham lipillab, yonib turibdi.

Bobur sham yorugʻida Tohirga endi zehn solib qaradi. Chakmonining etaklariga loy sachragan. Ozib ketganidan yelkalari puchayib qolgan, koʻzlari ichiga oʻpirilib tushgan. Yuzidagi chandigʻi esa boʻrtib, goʻyo avvalgidan xiyla katta boʻlib ketgan. Lablari pirpirab, oʻpkasi toʻlib gapirdi:

– Amirzodam, Andijon ham Shayboniyxonning ilkiga oʻtdi. Behisob koʻp odam qirildi. Hamrohim qirgʻinda halok boʻldi.

Tohir shunchalik charchagan ediki, gavdasi chayqalib, oyoq ustida zoʻrgʻa turar edi. Soʻnggi umididan ham ayrilib boʻshashgan Bobur koʻrpacha ustiga oʻtib oʻtirdi-yu, Tohirni ham oʻtirishga taklif qildi.

Tohir gilam ustiga choʻkkalab oʻtirgach, Bobur undan voqeaning tafsilotini va Ahmad Tanbal nima

boʻlganini soʻradi. Tohir Andijon yaqinidagi Xoʻja Katta degan qishloqda boy bir odamga aravakash boʻlib yollangan, oʻzining kimligini bildirmay butun hodisalarni odamlardan soʻrab bilgan, boyning shahardagi do'koniga mol olib borganda, ko'p narsani oʻzi ham koʻrgan edi. Ahmad Tanbal Andijon etagida boʻlgan jangda shikast yegandan keyin qoʻrgʻonga kirib bekinadi. Qamal boshlanadi. Qoʻrgʻon ichida ochlik, kasallik va nifoq kuchayadi. Bir vaqtlar Samarqandda Boburni tashlab, Ahmad Tanbalga ergashib qochgan bek va navkarlar endi uning oʻzini tashlab, Shayboniyxon tomoniga qochib oʻtadilar. Xonning qoʻshini devorga shoti qoʻvib chiqib, qoʻrgʻonni bosib oladi. Ahmad Tanbal akasi Bek Tilba, ukalari va boshqa odamlari bilan arkka kirib bekinishadi. Biroq arkning atrofida uylar koʻp, ularga orqadan shoti qoʻyib, tomiga chiqish oson. Ahmad Tanbal arkda jon saqlayolmasligini sezadi-yu, Shayboniyxondan shafqat soʻrashga qaror beradi. «Yiqqan barcha oltinlarimni hazrati xonga moli amon tariqasida toʻlamoqchimen, umrbod xizmatlarida boʻlmoqchimen, qonimdan kechsinlar!» deb arkdan bir moʻysafidni vakil qilib chiqaradi. Ammo mo'ysafid arkka qaytib kelmay yo'q boʻladi. Xon askarlari arkning tomlari ustiga shoti qoʻyib chiqa boshlaydilar. Talvasaga tushgan Ahmad Tanbal aka-ukalari bilan birga ark darvozaxonasiga boradi. Taslim boʻlganlarini koʻrsatish uchun qilichlarini boʻyinlariga osib, darvozadan tashqariga shafqat soʻrab chiqadilar. Ark darvozasi oldida Shavboniyxonning oʻgʻli Temur Sulton turgan ekan. Navkarlariga: «Asir olma, arzimaydi, qir hammasini!» – deb buyruq beradi. Ahmad Tanbalni aka-ukalariga qoʻshib, qilich bilan chopib, burdalab tashlaydilar. Keyin boshlarini kesib, bir qopga tiqadilar-u Shayboniyxonga koʻrsatgani olib ketadilar.

Tohirning hikoyasi shu yerga kelganda Bobur:

– Yo Xudoyo tavba! – deb beixtiyor yoqasini ushladi. Soʻnggi paytlarda Boburni ezib yurgan javobsiz savollardan biriga hozir goʻyo momaqaldiroqday vahimali javob kelgan edi. Xoʻja Abdulladay mard, fidokor odamni qoʻrgʻon darvozasiga osib oʻldirgan Ahmad Tanbalning oʻzi endi oʻsha qoʻrgʻondagi ark darvozasi oldida itday xor boʻlib oʻlgan edi! Bobur in'om qilgan qilichni uning boshiga razilona urgan Tanbal endi boshqa qilichlar zarbidan burdalangan edi!

Togʻdagi chagraklarning boshini vahshiylarcha kesib, xurjunga solib kelgan Tanbalning oʻz boshini yanada vahshiyroq bir tarzda kesib, qopga solib ketgan boʻlsalar, uni, albatta xonga eltib koʻrsatganlar.

Bobur qopdan Shayboniyxonning oyogʻi tagiga yumalab tushgan tanish kallalarni koʻz oldiga keltirdi. Mahmudxonda eshik ogʻa boʻlib yurgan Tilba Sultonning yoʻgʻon boʻyinli semiz boshini Shayboniyxon tanigan boʻlsa kerak. Ammo xon Ahmad Tanbalning kallasini tanimaydi.

Shayboniyxon oʻzini shuncha ovora qilgan Ahmad Tanbalning basharasini koʻrib qoʻygisi keladi, ammo yuztuban tushgan qonli kallaga qoʻl urgisi kelmaydi. Ahmad Tanbalning qonli kallasini oyogʻining uchi bilan yumalatib oʻnglab, siyrak soqoliga, suyagi boʻrtgan keng yuziga qaraydi.

Bobur oʻzicha tasavvur etgan bu hodisadan aqli shoshib:

– Obbo! Obbo! – deb bir necha marta takrorlab qoʻydi.

Bu hodisalarda qandaydir oʻzgacha bir adolat borligini sezgan Bobur boshqa voqealarni aqliga sigʻdirolmay lol boʻlib qoldi. Shayboniyxon berahmlikda Ahmad Tanbaldan ham oʻtib tushgan-ku. Nahotki falak intiqom qilichini shunday shafqatsiz xonning qoʻliga berib qoʻysa? Bir vaqtlar Bobur orzu qil-

gan, ammo yetisholmagan ulkan maqsadga – Movarounnahrdagi parokanda viloyatlarni birlashtirib, yagona kuchli davlat barpo etish maqsadiga – endi Shayboniyxon yetishmoqdami? Nahotki buning uchun Shayboniyxonday makkor, zolim va shafqatsiz boʻlish kerak edi? Tohir Andijonda xonning buyrugʻi bilan boʻlgan qirgʻinning tafsilotini aytib berganda, Boburning sochlari tikka boʻlib ketdi. Minglarcha ayollar, oʻsmirlar, chollar Ahmad Tanbalning odamlari qatorida bekordan-bekorga nobud qilingan edi. Nahotki hozirgi zoʻrlar zamonasida yengib chiqish uchun Shayboniyxonday zoʻravonliklar qilish shart boʻlsa?!

Bobur ma'rifatli shoh bo'lishga urinib, she'r-u san'atga ko'p vaqt berib, insof-u diyonatni o'ylab, nahotki shu tufayli Shayboniyxonga yutqizgan bo'lsa?!

– Amirzodam, xon kishilari sizni soʻroqlab yurganlarini eshitdim. Aygʻoqchilari hid olib, Soʻxga kelib qolsalar ham ajab emas!

Bobur ota yurtidan batamom ajralganini endi astoydil his qildi. Ahmad Tanbalning magʻlubiyati buloqning koʻziga tushgan yangi bir koʻchki edi. Togʻning bu tomonida buloq qaytadan koʻz ochishi mumkin boʻlgan yoʻllarning hammasi bekildi. Agar Bobur tezroq togʻ oshib Xurosonga ketmasa, Shayboniyxon aylanib oʻtib, uning soʻnggi yoʻlini ham bekitadi!

Bobur iztirob ichida Tohirning oddiy bir navkar ekanligini ham unutdi-yu, unga hasrat qilib gapirdi:

– Xonumondin ayrilganimiz ozmidi? Endi Vatandin ham judo boʻlurmizmi?!

Boburning koʻzi yoshlanganini koʻrgan Tohirning ham koʻngli buzilib, lablari pirpiradi:

– Amirzodam, musofirlik gʻami mening ham yurakbagʻrimni oʻrtaydi. Bizning Quvalar ham xonning poshnasi tagida majaqlandi. Agar borsam mendan Fozil tarxonning qasdini olishlari aniq. Biz ham kindik qoni tomgan joydan ayrildik, amirzodam. Musofirlik taqdirimizda bor ekan. Soʻxda ham musofirmiz. Hisorga borsak ham, undan nariga ketsak ham shu musofirlik... Yoʻlda kelayotib oʻylanib keldim. Men sizdan ajralmayman, amirzodam!

Tohir butun najotni odil podshohdan izlaydigan dehqontabiat yigit ekanini Bobur bilardi.

- Lekin men siz kutgandek odil podshoh boʻlolmadim!
- dedi Bobur. - Kelgusida boʻlamenmi, yoʻqmi, hali noma'lum...

Oraga bir lahza sukunat choʻmdi. Tashqarida Soʻx soyi goʻyo tun sukunatidan figʻoni chiqib shovullardi.

Chodir ichida quvgʻindagi shoh bilan uning oddiy navkari yuzma-yuz oʻtiribdi. Vatandan ajralish musibati oldida ularning oralaridagi katta farq goʻyo kichrayib, ahamiyatsiz boʻlib qolgan. Boshlariga tushgan koʻrgiliklar ularning taqdirlarini bir-biriga oʻxshash qilib qoʻygan. Shuncha yil jang-u jadallarda birga yurib, qanchadan-qancha oʻlim xavflarini birga kechirgan bu ikki yigit bugun birinchi marta sirdoshlarcha ochiq soʻzlashmoqda edilar. Tohir boshqa vaqtda Boburga aytolmaydigan soʻzlarini hozir koʻngli yumshab, erib turgan paytda aytdi:

- Amirzodam, men bir navkaringiz boʻlsam ham sizga tugʻushqonimdek mehr qoʻyganmen. Botirligingizgami, shoirligingizgami, odamgarchiligingizgami, ishqilib, mening... sizga ixlosim zoʻr! Sizning shuncha xavf-u xatarlardan omon qolganingiz ham katta davlat!

Shu tobda Tohir suyukli inisiga mehri toblanib, ogʻir paytda uning koʻnglini koʻtarayotgan jonkuyar akaga oʻxshar edi. Darhaqiqat, u Boburdan yetti yosh katta edi. Bobur ham bir lahza shohligini unutib, Tohirga xuddi akasiga qaraganday qaradi:

– Meni juda koʻp xatarlardan siz olib qolgansiz. Men sizdan koʻrgan yaxshiliklarimning oʻndan birini ham qaytargan emasmen. Siz menga ogʻamdek qadrdonsiz.

- Rahmat sizga.
- Lekin hozir mening koʻnglim yer bilan yakson. Taqdir menga iste'dod bergan, kuch bergan, gʻayrat bergan, ammo nechun baxt bermagan?!
- Bu zamonda baxt oʻzi yoʻq, amirzodam! Axir sizdek nodir iste'dodlar dunyoga har kuni kelmaydiku! Nodon tojdorlardan qon yigʻlagan el-yurtimiz sizdek ma'rifatli sarkardaga mushtoq. Lekin baxil zamona gʻalabani zolim xonga berib, bizni, mana Vatanimizdan ham judo qilmoqchi. Ilohim bu baxil zamonaning bogʻlari qurib ketsin-u siz-u bizning qadrimizga yetadigan yaxshi zamonlar ham kelsin! Endi... amirzodam, bu yerdan tezroq ketish kerak. Hirot ham bizga begona yurt emas. Podshoh Husayn Boyqaro sizning qarindoshingiz. Mening togʻoyim maylono Fazliddin ham Hirotda ekan...

Bobur Xurosonga ketmay iloji yoʻqligini oʻyladi-yu, oshib oʻtishi kerak boʻlgan togʻlarni koʻz oldiga keltirdi. Uzoqdan moviy tusga kirib behad jozibali koʻrinadigan bu togʻlar tik dovonlardan, xatarli uchmalardan oʻtishi kerak boʻlgan odamga qanchalik tund va berahm koʻrinadi! Hozir Boburning tasavvurida baland choʻqqilarning asriy qorlari kafanday beharakat va sovuq, oʻlimday abadiy boʻlib gavdalandi.

- Xatarli yoʻllarda men oʻz jonimni avval Xudoga, soʻng sizga ishonib topshirmoqchimen. Bugundan boshlab siz mening qoʻrchiboshimsiz. Ichki beklarim qatorida boʻlursiz.
 - Inoyatingizdan minnatdormen, amirzodam!
- Hozir bu inoyatning sharafidan azobi koʻproq. Yoʻlda charchagansiz. Borib dam oling. Ertadan safar tayyorligi boshlanur.

Tohir ta'zim qilganicha chiqib ketdi.

Boburning uyqusi kelmas edi. U yana chodirdan chiqdi. Kunduzgi tuman tarqab ketgan, lekin osmonda bulut bor. Yulduzlar onda-sonda koʻrinib qoladi. Soʻx

soyi osmonni boshiga koʻtarib shagʻirlaydi. Tunda togʻlarning qorasi kunduzgidan haybatliroq koʻrinadi. Bobur qop-qora togʻlarga tikilib turganda yana koʻchki bosgan buloq esiga tushdi. Togʻlarning bu tomonida hamma yoʻllari bekilgan buloq endi togʻlarning naryogʻidan koʻz ochib chiqa olarmikin? Ulugʻ togʻdan narida bahaybat Pomir. Undan narida Himolay va Hindikush... Buloq bu togʻlarning hammasidan oʻtib borib, naryoqlarda qaytadan koʻz ochishi uchun qanchalik katta kuch-qudrat kerak!

TAQDIR TAQOZOSI

Ikkinchi qism

HIROT

DOVULDAN OLDINGI OSUDALIK

1

Xazonrezlik payti. Hirot bogʻlariga suv beradigan Hiriyrud daryosi va Injil anhorining qirgʻoqlariga za'faron yaproqlar toʻkilgan. Qal'a tashqarisidagi mashhur Bogʻi Jahonoro, Bogʻi Muxtor, Bogʻi Zubayda, Bogʻi Chamanlardagi uzumzor va anorzorlar voz bo'vi ko'tarib turgan mevalaridan ayrilib, yakkam-dukkam qovjiroq barglar bilan soʻppayib qolganlar. Biroq bu janubiy shaharda kuzning xazonrezlik odatiga bo'ysunmaydigan daraxtlar ham koʻp. Hirotga Qandahor tomonidan kelishda yoʻl boʻyidagi xiyobon va sayrgohlarda oʻsgan minglarcha sarvlar, sanobar¹ daraxtlari kuzda ham bahordagidek yashnab turibdi. «Husayn Boygaro hovuzi» deb atalgan ulkan toshhovuz boʻyida kumushrang jajji yaproglari gush tilini eslatadigan baland va goʻzal lisonittayr daraxtlari bor - bular ham xazon nimaligini bilmaydi.

Lisonit-tayrning barglari yara-chaqaga doriligini eshitgan Tohir hovuzdan beriroqda otdan tushdi-yu, jilovini yoshgina navkariga tutqizdi. Soʻng oʻzi hovuzning xilvatroq tomoniga oʻta boshladi. U dorivor barglardan yulib olib ketmoqchi boʻlib tepadagi shoxlarga tikilib borayotganda, qarshisidan kimdir:

¹ Sanobar – nina bargi och havorang tusdagi goʻzal qaragʻaysimon daraxt. Bizda masalan, Sayrobda uchraydi.

- Menga qarang, bek yigit! - deb qoldi.

Tohir daraxtning yoʻgʻon tanasi ortidan chiqib kelayotgan mullanamo kishini koʻrdi. Nimasidir Fazliddin togʻasini eslatib, yuragini hapriqtirdi. Ammo soqolining uzunligi-yu, yuzining keksanamo koʻrinishi Tohirni shubhaga soldi. U odob bilan:

- Labbay, - deb salom berdi.

Tohirning yuzidagi xanjar iziga tikilib turgan haligi kishi endi uning ovozini ham tanidi-yu:

- Tohir! Jiyanim! - deb qichqirib yubordi.

Tohir ham endi togʻoyisini tanib, quchoq ochganicha unga qarab otildi. Hovuzning shishaday tiniq suvida ularning akslari bir-biriga qoʻshilib ketdi.

- Vatanimning hidini olib kelgan jiyanim! Xudoga shukr, eson-omon ekansen!

Mavlono Fazliddin jiyanini quchogʻidan qoʻydi-yu, koʻzidan yuziga oqib tushgan quvonch yoshlarini artib, Tohirning kumush kamariga, beklar taqadigan qimmatbaho xanjariga va saqorlot chakmoniga endi razm solib qaradi. Tohirning boshidagi dubulgʻaning tepasida ham beklarga xos kichkina bayroqcha bor edi.

- Jiyanim, martabang oshibdimi?
- Ha, togʻa, qoʻrchibegimen.
- Muborak boʻlsin. Ilohim senga yomon beklarning ta'siri urmasin!
- Bobur mirzo ham yomon beklaridan bezgandan keyin bittasining oʻrniga meni qoʻydi... Xoʻsh, oʻzingiz qalaysiz, mulla togʻa? Kelganimdan beri qidiramen. Soʻroqlab-surishtiray desam, tanish-bilish yoʻq.

Yoshi qirqqa kirar-kirmas yuziga ajin tushgan mavlono Fazliddin ma'yus tovush bilan dedi:

– Yuribmiz... Tuproqdan tashqarida. Xudo bizni omadsiz yaratgan ekan-da, jiyanim. Bu yerga kelib, endi Navoiy hazratlarining marhamatlaridan bahramand boʻlay deganimda, u zoti oliy vafot etdilar. Katta qurilishlar Husayn Boyqaro zamonida ham

uncha-muncha boʻlib turgan edi. Mana shu yil Husayn Boyqaro ham olamdan oʻtdi. Qurilishlar taqa-taq toʻxtagan. Bizga oʻxshaganlarga yana ish yoʻq!

- Unday boʻlsa, Bobur mirzoga bir uchrang.
- Bobur mirzo ham bu yerda mehmon... Meni qabul qiladimi, yoʻqmi? Orada nozik gaplar oʻtgan.

Tohir mavlono Fazliddin bilan Xonzoda begim orasida boʻlgan murakkab voqealarning bir uchini eshitgan edi.

- Boʻlmasa, avval men u kishini xoli topib, siz toʻgʻringizda gap ochib koʻraymi, mulla togʻa?
- Mayli, buni keyin yana maslahatlashurmiz. Obbo jiyanim-ey! Men Bobur mirzoning Hirotga kelganlarini eshitganimdan beri «sen ham bormikinsen, yoʻqmikinsen», deb har bir navkarga koʻz tikib yurgan edim... Qani endi, yur, uyga boraylik! Agar senga mana bu dorivor yaproqlar kerak boʻlsa, uydan topib beraman. Bizning bogʻchada ham shu daraxtdan bor.
- Bogʻchada... bir oʻzingizmisiz yoki uylandingizmi, mulla togʻa?
- Uylanganmiz, jiyan. Navoiy hazratlari maslahat berdilar. U kishida bogʻbon boʻlgan durust bir odamning qizi bor ekan...
 - Muborak boʻlsin! Farzandlar ham bormi?
 - Ha, bir oʻgʻil, bir qiz.
- E, ajoyib-ku! Unday boʻlsa, men uyingizga toʻyonalar bilan borurmen!
- Oʻzingni koʻrganim ming toʻyonadan afzal, jiyan! Qani, yur!

Tohir bir necha qadam yurdi-yu, keyin nimanidir eslab, osmonga qaradi. Oftob ogʻib borar edi.

- Mulla togʻa, uyingiz yaqinmi?
- Yoʻq, uzoqroq. Shahar chetidagi Nazargoh mahallotida. Nima edi?
- Men hozir bir soatdan soʻng xizmatda boʻlmogʻim kerak edi. Podshoh buyurgan edi.

– Obbo!.. Undoq boʻlsa... Shu yerda birpas oʻtiraylik. Men sal diydoringga toʻyay! Oʻzing qalaysen, jiyanim, uylanganmisen?

Togʻa-jiyan hovuzdan chetroqdagi tosh kursiga borib oʻtirdilar. Tohir Robiyani qanday topganini aytib berdi-yu:

- Kobulga kelib bitta oʻgʻilcha koʻrdik! dedi. Otini Safarbek qoʻydik.
- E, xayriyat! Men bir vaqtlar hamma narsadan umidimni uzgan edim. Seni ham qayta koʻrolmasmen, deb oʻylagan edim. Bosh omon boʻlsa, hammasi oʻtar ekan... Sen bilan biz-ku, qutulib keldik-a! Andijondagilarning ahvoli ne boʻldi?
- Buni soʻramang, mulla togʻa! Shayboniyxonning qirgʻini kechalari tushimga kirsa, bosinqirab chiqamen!.. U yoqda rosa abgor boʻlib, ikki yuz qirqtagina odam bilan Xurosonga qarab joʻnadik. Hisor togʻlarining orasida rosa qiynaldik. Ot-ulovlar oʻlib-soʻyilib tamom boʻlgan. Bobur mirzo ham otini onasiga berib, oʻzi piyoda yuradi. Oyoqlarimizda choriq. Qoʻllarimizda tayoq. Turadigan joyning tayini yoʻq. Birov beri kel, demaydi. Arzimagan amaldorlar Bobur mirzoday odamga behurmatlik qilib: «Yoʻllaringdan qolmanglar, Hisordan tezroq oʻtinglar», deydi. Bizning gʻazabimiz kelib, qoʻpol gapirgan amaldorlarni chopib tashlasak, deymiz.

Lekin Bobur mirzo: «Bardosh qilinglar, tezroq Amudaryodan oʻtib olaylik», deb shoshiradi.

- Lekin shoshirganicha bor ekan-da, jiyan. Sizlardan sal keyin Shayboniyxon Hisorni ham bosibdi-ku.
- Ha, keyin bilsak, Bobur mirzo uzoqni oʻylab shunday qilgan ekanlar. Hisor podshosi Xisravshoh umrida bir mushuk bilan ham urushib koʻrmagan qoʻrqoq odam ekan. Beklarning koʻpchiligi undan norozi ekan. Bobur mirzoga maxfiy odamlar yuborib: «Keling, Hisorni sizga beraylik!» der ekanlar. Lekin

Bobur mirzo fitnaga aralashmadi. «Keling», degan haligi beklarga: «Xoqon boʻlsalaring oʻzlaring kelinglar», deb yaxshi gaplar aytib odam yubordilar.

Biz Amudaryodan bu yoqqa oʻtganda, Shayboniyxon Hisorga bostirib kiribdi. Ooʻrqoq Xisravshoh xon bilan jang qilishga yuragi betlamay, poytaxtni tashlab gochibdi. Uning oʻttiz ming goʻshini tarqab ketibdi. Oʻzingiz bilasiz, mulla togʻa, bunday paytda beklar nomi ulugʻroq bir podshoh izlab qolishadi. Bobur mirzo Shayboniyxon bilan dadil jang qilgani, birda yengilgan boʻlsa, birda uni yenggani eslariga tushadi. Ilgarigi eshik ogʻa Qosimbek oʻsha paytda Hisor qoʻshinining orasida edi. Uning Bobur mirzoga ixlosmandligini bilasiz. Xullas, ini buzilgan ariga oʻxshab tarqalgan Hisor qoʻshini Amudarvo boʻvida bizga kelib qoʻshilaverdi. Eng avval Boqibek Chagʻoniyoniy degani toʻrt yuz askari bilan keldi. Bobur mirzo unga kutganidan ziyoda hurmat koʻrsatdi. Boqibekni eng baland martabali eshik ogʻa qilib qoʻydi. Keyin Xisravshohning boshqa beklari-vu, navkarlari ketma-ket kelib bizga qoʻshilaberdi-da. Oʻzimiz darvodan ikki yuz qirqtagina odam oʻtgan edik. Bir oy ichida toʻrt mingga yetdik... Mavlono Fazliddin jiyanining soʻnggi yillarda bir qadar oʻzgarib qolganini endi aniqroq sezdi. Tohir ilgari bunchalik soʻzlay olmas edi. U gapdon asilzodalar orasida koʻp yurib, mulozimlarga xos murakkab iboralar ishlatishga oʻrgangan edi.

– Biz Kobulga kelsak, argʻin degan urugʻdan Muqimbek hokim boʻlib oʻtirgan ekan. Taxt da'vo qilishga haqi ham yoʻq, biz bilan olishadigan kuchi ham yoʻq. Kobulni bizga jangsiz berdi. Keyin Husayn Boyqarodan Bobur mirzoga xat berdi. «Cherik bilan keling, Shayboniyxonga qarshi ittifoq boʻlib chiqaylik», debdi. Otda qirq kun yurib, shuncha joydan kelsak, Husayn Boyqaro olamdan oʻtibdi.

- Bir jihatdan Kobulni poytaxt qilib, bu yerga obroʻbilan kelganlaring yaxshi boʻlibdir, jiyanim. Aks holda, Husayn Boyqaroning kalondimogʻoʻgʻillari Bobur mirzoni pisand qilmagan boʻlur edi.
- Lekin hozir hurmatimiz juda joyida. Shahar hokimini bizga qoʻshib qoʻyganlar. Hirotni aylantirib rosa tomosha qildirdi. Katta dargohlarda har kun ziyofat. Bugun kech Bobur mirzo yana saroyga borishlari kerak edi...

Tohir osmonga koʻz tashlab, oftobning ancha pasayib qolganini koʻrdi-yu, bezovtalanib oʻrnidan qoʻzgʻaldi:

- Mulla togʻa, men kech qolsam boʻlmas. Sizning uyingizga ertaga borsam maylimi? Qanday topib boramen? Shuni ayting.

Ular Tohirning otini jilovidan tutib turgan navkarning oldiga borgunlaricha mavlono Fazliddin uyining qayerdaligini Tohirga batafsil tushuntirdi. Tohir otining jilovini navkarining qoʻlidan olar ekan:

- Mulla togʻa, otingiz qani? dedi.
- Jiyanim, men piyoda yuramen.
- Uyingiz uzoq boʻlsa ham-a?
- Oʻrganib ketganmen.

Tohir togʻasining kambagʻallashib qolganini endi sezdi-yu, otining kumush bezakli yuganini mavlono Fazliddinga tutqazdi:

- Boʻlmasa mana shu ot sizniki.
- Oʻzing-chi, jiyanim?
- Otxonada mening yana ikkita otim turibdi. Mining! Tohir togʻasini qoʻymasdan otga mindirdi-yu, beliga qistirilgan qimmatbaho qamchini ham togʻasiga berdi.
- Siz Oʻshda menga mindirib yuborgan otning quluni bu, mulla togʻa. Oʻshanda meni boshdan-oyoq kiyintirgan edingiz-a, esingizdami?
- E, bosh omon boʻlsa doʻppi topiladi, jiyan! Buni eslatib oʻtirma.

«Ammo ertaga kelin ayamga ham, bolalariga ham bosh-oyoq kiyimlik olib borib, togʻamni yana bir suyuntirishim kerak!» – dedi Tohir oʻzicha.

Ikkinchi ot ustida oʻtirgan yoshgina navkar nima boʻlayotganiga unchalik tushunmasa ham, togʻajiyanga angrayib qarab turardi.

Mavlono Fazliddin xoʻshlashib, keta boshladi. Tohir navkariga qarab shipshidi:

- Farosating bormi?

Bekni piyoda qoldirib, navkarning otliq turishi chindan ham odobga toʻgʻri kelmas edi. Yosh navkar buni ertaroq sezmaganidan izza boʻlib, otdan sakrab tushdi va jilovini Tohirga tutdi:

- Afv eting, bek janoblari.

Mavlono Fazliddin oʻgirilib qaradi-yu, Tohir navkarning otida beklarcha savlat toʻkib borayotganini, navkar esa uning yonida yoʻrgʻalab piyoda ketayotganini koʻrdi. Navkardan chiqqan ba'zi beklar obroʻtalab boʻlishi mavlononing esiga tushdi. «Ishqilib, Tohir oʻshalarga oʻxshamasin-da!» deb qoʻydi ichida.

2

Bugun oʻn yetti kundirki, Bobur Hirotda Alisher Navoiy istiqomat qilgan muhtasham Unsiyada¹ yashaydi. Unsiyaning baland peshtoqlari, niliy gumbazi, oftobda jilolangan rang-barang koshinlari Boburga Samarqanddagi Ulugʻbek madrasasini eslatadi. Lekin Unsiyaning toʻrt tomonidagi toʻrtta minorasi Ulugʻbek madrasasinikidan balandroq, binoning hajmi ham kattaroq edi. Oʻzi bundan oʻn besh yilchagina oldin qurib bitirilgan, hali hamma bezaklari yap-yangi edi.

Unsiyaning ichidagi xonalardan bir qanchasini Navoiyning shaxsiy kutubxonasi egallagan. Bobur

¹ Unsiya - «Doʻstlik uyi» demakdir.

kutubxonadagi kitoblarni varaqlaganda, ularning ba'zi joylarida ulugʻ shoirning dastxatini koʻrdi-yu, Samarqandda undan olgan maktubni esladi. Navoiyni koʻrishga muyassar boʻlolmagani uchun yuragini ma'yus tuygʻular chulgʻadi.

Kutubxona eshigi oldiga chiroyli bir javonga oʻxshash katta soat qoʻyilgan. Belgili vaqtlarda bu soatning tepasidagi jajji haykalcha harakatga keladi-yu, oltin bolgʻachalar bilan ohangdor qilib zang chaladi. Bunday soat yasash gʻoyasini soatsozga Navoiyning oʻzi aytib, maxsus buyurtma bergan edi. Keyin Hirotda «Alisheriy» deb ataladigan zang chaluvchi soatlar rasm boʻlib ketgan edi.

Bobur kutubxonadan chiqar ekan, ustmaust zang chalayotgan soatga qarab turib, oʻzicha oʻylandi: «Ajab! Alisherbekning oʻzlari vafot etgan boʻlsalar ham ixtirolari tirik. Umri soniy shulmikin? Bu soat oʻz egasining ikkinchi umrini oʻlchab zang chalmoqdamikin?» Unsiyaning ich-tashida bu binoni qurgan va unda hayotining oxirgi kunigacha yashagan noyob insonning ruhi kezib yurganga oʻxshardi. Bobur Navoiyning qoʻli tekkan eshiklarni ehtiyot bilan ochar, marmar zinalarda uning koʻzga koʻrinmas izlarini bosib oʻtayotganini his qilib, mumkin qadar sekin qadam tashlar edi.

Hovlida toshhovuz boʻyidagi chinorlar tagida farrosh yigit xazon supurmoqda edi. Bobur ikki tomonida toʻq yashil shamshod daraxtlari qator turgan chiroyli yoʻlkaga burildi. Bu yerda uni Navoiyning shogirdi Xondamir va uning eng yaqin nadimlaridan¹ Sohib Doro kutib turar edilar. Hassa tayangan keksa Sohib Doro Bobur bilan koʻrishayotib:

– Amirzodam, – dedi. – Hazrat Mirning vafotlaridan beri Unsiya ruhsiz tanadek edi. Siz kelganingizdan soʻng bu tanada yangi jon, yangi ruh paydo boʻldi!

 $^{^{1}}$ Nadim – qurdosh-suhbatdosh.

Yoshi oʻttizlarga borgan tiyrak koʻzli Xondamir Boburga sinovchan nazar bilan kulimsirab tikildi: «Andijondan kelgan yigirma toʻrt yoshlik shahzoda bu mubolagʻali gapga yarasha kamtarona javob toparmikin?»

Qalbi ezgu va ma'yus tuygʻularga toʻlib turgan Bobur shoirona oʻxshatishlar qilib oʻtirgisi kelmay joʻn javob berdi:

– Mavlono, hazrat Alisherning makonlari mening oʻzimda yangi bir ruh paydo qildi. Bu yerda men san'at-u ma'rifatning hali umrimda koʻrmagan kamolotini koʻrmoqdamen.

Xondamir Boburning javobidan qanoatlangandek mamnun bosh irgʻadi. Sohib Doro ham:

– Siz haqsiz, amirzodam, – dedi. – Hazrati Mir neki yaratgan boʻlsalar, hammasida oʻzlarining oliy ruhlaridan bir nishona qoldirmishlar. Mana bu minoralarga bir nazar tashlang!

Bobur uchi osmondagi oq bulutlarga tegay deb turgan baland koshinkor minoralarga tikildi. Odatda, yuksak minoralarning odam chiqib atrofga qaraydigan usti yopiq halqasi, ya'ni shiyponchasi eng tepasida boʻladi. Unsiya minoralarida esa tepadagi halqadan tashqari oʻrta belida ham maxsus halqalar bor edi. Sohib Doro buning sababini aytdi:

- Hazrati Mir Hirot manzaralariga baland bir joydan qarab oʻtirib hordiq chiqarar edilar. Keksaygan paytlarida minora tepasidagi halqaga chiqishlari mumkin boʻlmay qoldi. Shundan soʻng me'morga oʻzlari aytib, pastroqqa ham halqa qurdirdilar.
- Iloj boʻlsa, shu halqalardan biriga biz ham chiqsak, dedi Bobur.
 - Bajonidil!

Sohib Doro Boburni Xondamir bilan birga gʻarbiy minoraga tomon boshladi. Ammo minora ichidagi tik, aylanma zinalardan chiqolmasligini aytib, oʻzi pastda qoldi. Minoraning oʻrta halqasiga Boburni Xondamir boshlab chiqdi.

Ular atrofga koʻz yugurtirishdi. Uzoqda qorli Muxtor va Iskalja togʻlari. Pastda kuz kirib, suvi jildirab qolgan Injil anhori. Uning chap sohilida mashhur Gavharshodbegim madrasasi savlat toʻkib turibdi. Navoiy qurdirgan Ixlosiya madrasasi Injilning oʻng qirgʻogʻida - Gavharshodbegim madrasasiga yuzma-yuz tushgan edi. Ixlosiyadan narida bemorlar davolanadigan, ayni vaqtda, mudarrislar yoshlarga tibbiyot ilmini oʻrgatadigan Shifoiya nomli shifoxona - madrasa. Undan narida ulkan gumbazli Xalosiya xonaqohi. Katta bir mahallaning oʻrnini oladigan joy Alisher Navoiy gurdirgan nodir obidalarga toʻlib, Hirotning salobatiga salobat qoʻshgan edi. Shaharning narigi yoqlarida ham moviy togʻlarga oʻxshab yuksalib turgan minora va gumbazlarning koʻpligi Boburga birdan Samarqandni eslatdi-yu, yuragini dard aralash sogʻinch tuygʻusi chulgʻadi.

- Mavlono, deb Bobur Xondamirga yuzlandi.
 Hirot obidalarini qurgan me'morlar orasida Movarounnahrdan kelganlari ham bormidi?
- Amirzoda, Siz Hirotda Samarqand sayqali ham borligini sezib turganga oʻxshaysiz.
 - Ha, savolimning boisi ham shu.
- Hirotning koʻp ulugʻ zotlari Samarqandda tahsil koʻrmishlar. Ular Samarqand sayqalini qalblarida olib kelmishlar, yana Movarounnahrdagi fatoratlardan bezib qochgan talay iste'dodlar Hirotga kelib, hazrat Alisherdan panoh topmishlar. U oliy zotning fazilatlari behisob edi. Lekin faqirga eng ulugʻ tuyilgan fazilatlari hazrat Mirning iste'dodshunosliklariyu, zakovatparvarliklari edi. Ulugʻ ishlarini ulugʻ iste'dodlarsiz qilib boʻlmasligini hazrat Alisher yaxshi bilur edilar. Shuning uchun hamisha el-ulus orasidan

nodir iste'dodlar izlab oʻtdilar. Yonlarida yurgan nadimlariga, musohiblariga, biz kabi shogirdlariga aytar edilarki, baxillik doim nursiz, layoqatsiz, iste'dodsiz odamlardan chiqur. Xususan, oliy jamiyatda layoqatsiz baxillar doim iste'dodlarning yoʻlini toʻsurlar, Xudodod zakovatlarini yuzaga chiqarmay, hayf qilurlar, bundan butun xalq zarar koʻrur.

Dunyodagi eng mash'um baxillik, iste'dodlarning yoʻlini toʻsguvchi baxillikdir. Dunyodagi eng oliy saxovat esa nodir iste'dodlarni yuzaga chiqaruvchi saxovatdir.

– Ayni haqiqat! – zavqlanib, xitob qildi Bobur.

Xondamir bu xitobdan ruhlanib, ovozini xiyol koʻtarib davom etdi:

- Biz biron safardan qaytsak yoki hazrat Alisherga bir-ikki kun koʻrinmay yurib, keyin huzurlariga kelsak: «Qani, xo'sh, yana qanday ajoyib iste'dod uchratdingiz?» - deb soʻrar edilar. Biz uchratgan nodir iste'dodlarning ba'zilari o'n besh-o'n olti yoshlik oʻspirinlar boʻlar edi. Hazrat Alisher: «Boʻladigan bola o'n besh voshida bosh bo'lur, bo'lmaydigan odam qirq yoshida ham yosh boʻlur», der edilar-u topilgan iste'dod o'spirin bo'lsa ham huzurlariga chorlar edilar. «Sohib Doro iste'dodli shoir Zayniddin Vosifiyni o'n besh yoshida hazrat Mirning huzuriga keltirgan edi. Hazratning saxovatlaridan bahramand boʻlgan bu yosh shoir juda tez ulgʻayib, butun Hirotga mashhur boʻldi. Ulugʻ musavvir Kamoliddin Behzod ham voshlikdan hazrat Mirning tarbiyalari bilan ulgʻaydilar. Shoir Hiloliy, xattot Sulton Ali Mashhadiy ham hazrat Alisher kashf etib, tarbiyat qilgan iste'dodlardandir. Ko'z o'ngimizda turgan Hirot so'nggi o'ttiz-qirq yil mobaynida avvalgidan oʻn barobar goʻzalroq, ulug'vorroq bo'lib ketganini barcha fozil kishilar avturlar.

- Soʻzingiz chin, mavlono. Men koʻrgan Rub'i-maskunda¹ Hirotdek shahar yoʻqdir!
- Amirzodam, bugungi Hirotni shunchalik goʻzal, shunchalik ulugʻ qilganlar el-ulus orasidan chiqqan iste'dodlar emasmi?
- Rost! Koʻz oʻngimizda turgan barcha nodir obidalarulugʻ iste'dodlar xazinasidan chiqqan gavharlardir.
- Lutf qildingiz, amirzodam. Hazrat Alisher gavharday bebaho iste'dodlar xazinasini ochgan eng ulugʻ kashfiyotchi edilar. Buni sulton Sohibqiron Husayn Boyqaro ham tan olgan edilar. Eshitgandirsiz amirzodam, hazrat Alisher bilan Husayn Boyqaroning oralariga nifoq solgan baxillar koʻp edi. Ma'lumingizkim, sulton Husayn mastlikda koʻp yomon ishlar ham qilgan edilar... Ammo ichmay yurgan ta'blari tiniq kunlarda hazrat Alisherga shundoq ehtiromlar koʻrsatar edilarki, hammamiz hayron qolar edik.

Bobur Xondamirning zavqli bir voqeani eslagandek mamnun kulimsiraganini koʻrdi-yu, uning hikoyasini kutib, yuziga tikildi.

Xondamir hali yigit yoshida boʻlsa ham koʻp oʻtirib ishlash oqibatida bir oz semirib qolgan toʻla gavdali oʻrta boʻy kishi edi. U goʻshtdor barmoqlari bilan qoshining ustini silab qoʻydi-yu:

– Hazrat Alisher «Xamsa»larini bitirib Sulton Husayn Boyqaroga oʻqishga berdilar, – deya hikoya qila boshladi. – Sulton Husayn ta'bi nazmi oʻtkir zot edilar. «Xamsa»ni oʻqib, hazrati Alisherni saroylariga chaqirmishlar, butun a'yonlari oldida tabrik aytmishlar. Sulton Husaynning yaxshi koʻrgan bebaho bir oq otlari bor edi. Miroxoʻrga: «Oʻshal otni keltiring!» – deb buyurmishlar. Mir hazratlari hayratga tushib: «Menga ot in'om qilmoqchilarmi? – deb oʻylamishlar. Otni keltirgunlaricha podshoh Mir Alisherga qarab: «Endi siz she'riyatda menga ustoz pirsiz, men sizga murid

¹ Rub'i maskun – dunyoning inson obod qilgan qismi.

boʻlmoqchimen», deganlar. Mir Alisher iztirob bilan e'tiroz gilganlarki: «Hazratim, siz podshohdirsiz, sizga men murid boʻlmogʻim kerak». Shu asnoda oq otni oltin anjomlari bilan keltirurlar. Sulton Husayn kulib turib soʻrabdilar: «Murid pirning amrini bajarmogʻi kerakmi?» Mir Alisher, albatta, deya tasdiq javob bermishlar. Shunda podshoh u oliy zotga aytmishlarki: «Boʻlmasa, mana shul otga mining!» Shohning amri vojib. Mir Alisher otga vaqinlashurlar. Oq otning bir fe'li bor ekan: Sulton Husayndan boshqa odam minmoqchi boʻlsa, belanglab qoʻymas ekan. Mir Alisher yaqinlashganda, ot belanglashga tushmish. Shunda Sulton Husayn otni jilovidan olib: «Tinch tur!» - deb oʻshqirurlar. Ot tinchlangach, hazrat Mir unga minurlar. Sarov ahli: «Endi nima boʻlarkin?» deb nafasini ichiga vutib sukutga ketmish. Sulton Husayn otning jilovini ilklaridan qoʻvmay hovli boʻvlab vurib ketmishlar. Hamma havron. Shunda podshoh ot ustidagi hazrat Alisherga ayturlarki: «Turkiy tilda birinchi boʻlib yozgan ulugʻ «Xamsa»ngiz uchun mendek Sulton Sohibqiron sizga jilovdor murid boʻlsa arzir!» Saroy ahli bu soʻzni eshitib, lol boʻlib qolmish. Hazrat Alisherning oʻzlari shu darajada mutaassir boʻlmishlarki, hushlaridan ketib qolmishlar. Kevin mulozimlar chopib borib hazratni otdan tushirib olmishlar... Ana, amirzodam...

– Fikringizga tushundim, mavlono, – dedi Bobur oʻychan tovush bilan. – Qayerdaki iste'dodlarga baxillar zavol keltirolmasa-yu, saxiylar yoʻl ocha olsa, oʻsha joy bugungi Hirot kabi kamolot choʻqqisiga koʻtarilar ekan.

Xondamirning koʻnglidagi gapni Bobur bunchalik yaxshi topib aytgani mavlonoga gʻalati ta'sir koʻrsatdi. Xondamir Boburda oʻzining maslakdoshini topganday quvonib:

- Tasanno, amirzodam! - dedi. - Oʻshal ulugʻ zotlar davrida Hirotning kamolot quyoshi osmonning eng baland nuqtasiga chiqqani rost! Lekin... afsuski, quyosh eng baland nuqtadan soʻng pastga ogʻar ekan. Soʻnggi yillarning mudhish voqealarini koʻrib, qalbimni bir vahm titratur: «Hirotning tole quyoshi asta-sekin ogʻib tushmasdan, birdan zulmat qa'riga qulab ketsa... unda ne qilgʻaymiz?

Xondamir Movarounnahrdagi toʻpolonlar va qirgʻinlar Shayboniyxonning qoʻshini bilan birga Hirotga ham yaqinlashib kelayotganini sezgani uchun shu iztirobli savolni bergan edi. Uning nazarida, bu savolga Shayboniyxon bilan yuzma-yuz olishgan Boburgina javob berishi mumkin edi.

- Iztirobingiz bejiz emas, mavlono, dedi Bobur. Hirotdagi bugungi osoyishtalik dahshatli toʻfon oldidan boʻladigan muvaqqat sokinlikni eslatur. Toshkent ham men soʻnggi marta borganimda, xuddi hozirgi Hirotga oʻxshar edi. Men ming balolarni boshdan kechirib, jahannam qa'ridan chiqib borgan edim. Marhum togʻoyim Mahmudxonga: «Bu balolar sizning ham boshingizga tushmasin, birga chora topaylik», deganimda, istehzo qilib kulgan edi. Rahmatlik siz aytgan iste'dodsiz, layoqatsiz tojdorlardan edi... Xiyla baxilligi bor edi... Mahmudxon axiri Shayboniyxonning oyogʻi tagida qandoq toptalganligi ma'lumingizdir.
- Nahotki, oʻsha hodisalar Hirotda yana takrorlansa, amirzodam?

Bobur Hirotning shimol-gʻarbida gʻubor ichida koʻrinayotgan Soqi Solmon choʻlining xira ufqiga tikilib, oʻylanib qoldi. U Hirotga Temuriylarning boshini qovushtirib, Shayboniyxonga qarshi mustahkam ittifoq tuzish uchun kelgani, bu mavzuda qariyb yigirma kundan beri muzokara borayotgani Xondamirga ma'lum edi. Bobur tezda javob beravermagach, Xondamir andisha qilib dedi:

- Amirzodam, muzokaralar maxfiy boʻlsa, faqir davlat sirlarini bilishga haqim yoʻq. Faqat...

– Mavlono, minora ustida biz faqat ikkimiz turibmiz. Mening sizdan yashiradigan sirim yoʻq. Hirot taxtida ikki ogʻa-ini birga podshohlik qilishlarini bilursiz.

– Ha, asli oʻzi taxt Badiuzzamon mirzoniki edi-yu, lekin Xadicha begimning tarafdorlari Muzaffar mirzoni ikkinchi podshoh qilib koʻtardilar. Tarixda hargiz misli koʻrilmagan hodisa.

Xondamirning bu hodisadan norozi ekanligi sezilib turardi. Bobur bosiq tovush bilan soʻzida davom etdi:

- Har ikki podshohlaringiz ham mehmondoʻstlikda. suhbatdorlikda, orasta bazm oʻtkazishda benazirlar. Ammo jang-u jadalga xohishlari yoʻqmi, harqalay, Murgʻob boʻyida uchrashganimizda gʻalati bir hodisa bo'ldi. Xonning bir pora qo'shini Xurosonning Chechektu navohisini1 bosgani toʻgʻrisida xabar keldi. Xonning oʻzi Amudarvodan narida edi. Xondan koʻra biz turgan joy Chechektuga yaqinroq edi. Men taklif gildimki, Chechektuni besh-olti yuz kishilik yogʻiy bosgan boʻlsa, darhol otlanib ularning oʻzlarini bosmoq kerak. Toki, xon qoʻshini Xurosonga osonlikcha kelolmaydigan boʻlsin. Badiuzzamon mirzo inilari Muzaffar mirzoni Chechektuga yubormogchi boʻldilar. Ma'lumingizkim, har ikkovlarining oʻz eshik ogʻalari, oʻz mulozimlari, oʻz cheriklari-vu alohida sarkardalari bor. Muzaffar mirzo jang koʻrmagan vigit. Chechektuga borishga jur'at qilmadi. «Hazrat ogʻam borsalar, biz boshqa chegaralar himoyasida bo'lurmiz», dedi. Badiuzzamon mirzo: «Men jangda nobud boʻlsam, bu taxtni yolgʻiz oʻzi egallaydimi?» deb oʻyladi nazarimda, Chechektuga borgisi kelmadi. Koʻp sansalor boʻlgandan soʻng men aytdimkim: «Ijozat bergaysizlar, men yigitlarim bilan borib, Chechektuni yogʻiydan ozod qilishga urinib koʻray». Ogʻa-ini birbirlariga qaradilar-u el-ulusdan nomus qildilar. «Siz

¹ Navohi - kichik oʻlka, tuman.

mehmonsiz» deb, meni bu niyatimdan qaytardilar. Qoʻymasdan Hirotga boshlab keldilar. Chechektu yogʻiy ilkida qoldi.

Xondamir kuyunib, «uh» tortdi:

– Bu hammasi – Xurosondan tole yuz oʻgira-yotganining nishonasi! Amirzodam, boshimiz ustida qanday balolar toʻplanayotganini bizning podshohlarimizdan koʻra siz yaxshi bilursiz. Chunki barchasini oʻz koʻzingiz bilan koʻrmishsiz. Biz bu haqda mavlono Behzod bilan ham koʻp gaplashdik. Hirotning barcha jonkuyar fozil kishilari umid koʻzini sizga tikkanlar. Xatar qanchalik kuchli ekanligiga shoyad podshohlarimizni ishontirsangiz. Barcha yaxshi kuchlar birlashsa-yu, shoyad falokatning oldini olishga muyassar boʻlsalar.

Bobur minoradan pastga tikilib:

- Bilmadim, mavlono, dedi. Bugun-erta podshohlar bilan yana shu haqda gaplashmoqchimen.
- Ilohim, kushoyishi koringizni bersin-u muzokarangiz biz istagandek tugasin, amirzodam!

Bobur tashakkur aytib, minora zinapoyasiga tomon yoʻnaldi. Pastga tushayotib, Hirot qal'asining ichidabaland tepalik ustida turgan ulkan arkka noxush nazar tashladi.

3

Kuz iliq kelgani uchunmi, Hirot tojdorlari hali ham qal'a tashqarisidagi bogʻlarda yashamoqda edilar. Shaharning shimoli-sharqidagi Qipchoq darvozasidan narida Shohruh mirzo davrida mashhur boʻlgan Bogʻi Safidda Muzaffar mirzo Bobur sharafiga katta ziyofat berdi. Hirotning eng zoʻr pazandalari tayyorlagan gʻizol¹ kaboblari, ishtaha ochuvchi nordon ocharlar², mohicha

¹ Gʻizol – kiyikning Xurosonda koʻp uchraydigan bir turi.

² Ochar – zira va sirka qoʻshib tayyorlangan goʻshtli taom.

nomi bilan mashhur boʻlgan oʻta nozik xushta'm suyuq oshlar Muzaffar mirzo oʻz mehmoni bilan oʻtirgan tillakori koʻshkning yuqorigi qavatiga ketma-ket olib chiqilmoqda edi. Sozandalar poygakroqda oʻtirib, qonun va udda, gʻijjak va nayda etni jimirlatuvchi kuylar chalishardi. Hirotning mashhur hofizlari ovozlarini uncha baland koʻtarmasdan, yurakning qat-qatiga singadigan sokin mayin tovush bilan ashula aytishar, bu hammasi Boburga juda ulugʻvor bir san'atning namunasi boʻlib tuyilardi.

Bazm avjiga chiqqanda, soqiy Bobur qarshisiga kelib, bir tizzasini gilamga tirab choʻkkaladi, soʻng yigirma yildan beri xumda kuch yigʻib yotgan va bugungi ziyofat uchun ochilgan tiniq xushboʻy maydan Boburga uzatdi. Bobur hali may ichmagan edi. Ammo hozir eshitgan kuy va ashulalarining ta'sirida birdan uning may ichgisi keldi-yu, oʻng yonidagi Qosimbekka qaradi.

Obburdonda Boburdan ajralib, Hisorga ketgan Qosimbek Qavchin bultur Kobulda barcha navkari bilan birga Bobur xizmatiga qaytib kelgan va yana uning eng yaqin maslahatgoʻyiga aylangan edi. Qosimbekning oʻzi umrida may ichmagan Xudotars kishi boʻlgani uchun Boburni ham ichkilikka yoʻlatgisi kelmas edi.

- Amirzodam, - shivirladi Qosimbek. - Badiuzzamon mirzoning chogʻir majlisida may taklif qilganlarida ichmagan edingiz. Bu yerda ichsangiz, narigi mirzo eshitib, koʻngliga olmasmikin?

Bu soʻzlar Boburni sergaklantirdi. U bitmay yotgan murakkab va chigal ishlarini esladi-yu, Muzaffar mirzoga qarab:

– Faqirni ma'zur tuting, mirzo hazratlari, – dedi. – Men umrimda may ichmaganmen!

Muzaffar mirzo Boburning may ichishdan qoʻrqayotganini sezib, qah-qah urib kuldi. Uning anchagina kayf qilgani shu beandisharoq kulgisidan bilindi:

- Amirzodam, nahotki butun Andijon-u Samarqand may zavqidan bexabar boʻlsa?
- Mirzo hazratlari, may zavqi Samarqand-u Andijonda ham keragidan ortiq. Ammo faqir boshqa zavqlardan ortmas edim. Uzrimni hazrat ogʻangiz Badiuzzamon mirzo qabul qilgan edilar... Faqir andisha qilmoqdamen...

Badiuzzamon mirzo tilga olingach, Muzaffar mirzo ham jiddiylashdi. Boburning andishasi unga asosli tuyildi-yu, soqiyga: «Bas, qistama!» ishorasini qildi. Bazmda Badiuzzamon mirzoning eshik ogʻasi Zunnunbek argʻun ham bor edi. Soqiy podshosining ishorasi bilan Boburga qoʻyilgan mayni oʻsha Zunnunbekka berdi.

Odamlarning kayfi oshgan sari bazm qizib borar, ba'zi beklar ham oʻrtaga chiqib, raqs qilishar, Mir Sarbarahna, Burxon gung degan mashhur qiziqchilarning askiyalaridan koʻtarilgan qahqahalar shiftdagi naqshlarni ham titratayotganday boʻlar edi. Husayn Boyqaroning oʻlimiga hali koʻp vaqt boʻlmagan. Hirot xavf ostida turgan ogʻir bir vaziyatda shunchalik xushchaqchaq bazm oʻtkazilayotgani Boburdan ham koʻra Qosimbekning gʻashini keltirmoqda edi. Qosimbek kulgi, shovqin orasida Boburga shivirladi:

- Bu shirakayf shoh bilan endi muzokara qilib boʻlmas. Buning ixtiyori onasi Xadicha begimda emish. Hozir begimning huzuriga chiqaylik, amirzodam.
- Ziyofat tugamasdan chiqib ketsak, behurmatlik boʻlmasmi?
- Qulingiz kelishib qoʻyganmen. Begim oʻz qasrlarida bizga muntazirlar.

Askiyachilar musobaqasi tugab, kulgilar bosilgach, Bobur Muzaffar mirzodan hazrat begimning huzurlariga borish uchun ijozat oldi. Oq marmardan qurilgan uch qavatli ulkan qasrda oʻnlab oltin qandillar yonmoqda edi. Bobur, Qosimbek, Zunnunbek va ularni boshlab borayotgan Burunduqbek zinalarga toʻshalgan mayin guldor poyandozlardan tovushsiz qadam tashlab, uchinchi qavatga koʻtarildilar. Qasrning devorlariga Shohruh mirzo oʻzining san'atkor oʻgʻli Boysunqur mirzo uchun ishlatgan goʻzal rasmlar hali ohori toʻkilmay, yap-yangi turar edi.

Xadicha begim Boburni qasrning muhtasham qabulxonasida kutib oldi va olti oyogʻi ham quyma oltindan ishlangan, ustiga yaxlit sadaf qoplangan miz yoniga oʻtqazdi.

Salobatli, xushqomat begimning orqarogʻida – qabulxonaning eng koʻzga koʻrinarli joyida bir tup atirgul yarqirab turibdi: poyalari oltindan, barglari zumraddan, toʻq qizil gullari yoqutdan. Gul shoxiga qoʻnib turgan kichkina oltin bulbulning tumshuqchasida – don oʻrnida sof gavhar jilolanib turibdi. Qabulxonaning eshik va derazalariga osilgan shohi darpardalarga ham durlar, la'llar va boshqa qimmatbaho toshlar qadalgan edi.

Faqat Xadicha begimning oʻzi qoramtir kumushrang parchadan bezaksiz kabo kiygan, uning boshidagi koʻkish toqida koʻzga uncha tashlanmaydigan siyrak marvarid donalari koʻrinar edi. Aqlni shoshiradigan bunday javohirot orasida goʻzal qiz-juvonlar qurshovida oʻtirgan ellik yoshli ulugʻsifat malika Boburni ham, Qosimbekni ham ancha dovdiratib qoʻydi. Bobur koʻngliga tugib kelgan murakkab gaplarini begimning musohabalari va kelinlari oldida qanday aytishni bilmay bezovtalandi. Xadicha begim buni sezib osoyishta kulimsiradi:

- Amirzodam, siz bizga qarindoshsiz. Shuning uchun mening kelinlarim, musohabalarim sizni ham oʻz mirzolaridek e'zozlab, suhbatingizda ishtirok etmoqchilar. Tortinmay erkin oʻtiring.
 - Mutashakkirmen!

Yuzlarida yupqa oq pardalari bor qiz-juvonlarning yuz-koʻzlari sham yorugʻida uncha aniq koʻrinmas edi. Ammo xina qoʻyilgan nafis qoʻllar, ipak kiyimlar ogʻushidagi ingichka bellar va baland koʻkraklar koʻpchilik ayollarning yosh juvonlar ekanidan dalolat berardi. Muzaffar mirzoning eng koʻhlik xotinlaridan Qorakoʻzbegim degani qaynonasining qulogʻiga labini yaqinlashtirib, yengil bir kulgi bilan allanarsa dedi. Xadicha begim ham shoʻx kulib, bosh irgʻadi-yu, Boburga yuzlandi:

- Amirzodam, Hirotning asilzoda qizlari sizga maroq bilan koʻz tikar emishlar. Shunday bahodir shoh, shunday koʻhlik yigit, shunday iste'dodli shoir haramsiz boʻydoq yashar emishsiz. Rostmi?

Bobur qip-qizarib, yerga qaradi-yu, bu toʻgʻrida gap ochilganidan ozorlanib:

- Hazrat begim, rost, dedi. Taqdir-u nasibim shundoq boʻldi.
- Taqdiringiz endi tagʻayyur topsin, amirzodam. Hirotda qolib, Muzaffar mirzoga ini boʻling. Siz ham temuriyzodalardansiz. Hirotdan sizga munosib goʻzal-u oqila qizlar topaylik, toʻy-tomosha bilan uylaning.

Muzaffar mirzoga ini boʻlish – uning tarafdoriga aylanish degan soʻz edi. Bir vaqtlar nevarasi Moʻmin mirzoning oʻldirilishiga sabab boʻlgan Xadicha begim, ehtimol, kelajakda Badiuzzamon mirzoni ham yoʻq qilish va oʻgʻlini yakka podshohga aylantirish maqsadidadir. Bobur uning oʻgʻliga ini boʻlsa, albatta, begimning bu maqsadini amalga oshirishda ishtirok etishi kerak.

Gʻamxoʻrligingizdan minnatdormen, hazrat begim,dedi Bobur.Faqat mening bir andisham bor.

- Qanday andisha, amirzodam?
- Faqirni ma'zur tuting.

Bobur sukut qilib, yerga qaradi. U gapini faqat Xadicha begimning oʻziga aytmoqchi ekanini sezgan ayollar ta'zim qila-qila chiqib ketdilar. Shundan keyin Bobur Shayboniyxonning Hirot ustiga bostirib kelishi muqarrarligi haqida, hozir toʻy-tomoshaga emas, hayot-mamot janglariga tayyorlanish kerakligi toʻgʻrisida gapira boshladi.

- Shayboniyxon Andijondan Xorazmgacha, Marvdan Turkistongacha barcha joyni olib, behisob qoʻshin toʻplamishdir. Men uning har bir jangga qanchalik astoydil shaylanishini bilurmen. Balo-qazoday bostirib kelsa, ancha-muncha cherik tit-pit boʻlib ketishini koʻrganmen! Bobur Shayboniyxonning harbiy qudratini va shafqatsizligini isbotlaydigan dalillar keltira boshladi. Xadicha begim sabrsizlanib:
- Bu baloning balogardoni nedur? Shuni ayting, amirzodam! dedi.
- Buning balogardoni barcha temuriyzodalarning birlashuvidir. Hamma viloyatlarga tavochilar yuborib, ellik-oltmish ming qoʻshin toʻplamoq kerak. Qish boʻyi bu qoʻshinni mashq qildirib, yagona bir sarkarda boshchiligida jangga tayyorlamoq kerak.
- Yagona sarkarda kim boʻlishi mumkin? dedi Xadicha begim sergaklanib.

Qosimbek «yalt» etib, Boburga qaradi. Hozir tirik qolgan Temuriylar orasida Boburdan boshqa odam bu ishni eplolmasligi uning koʻnglidan oʻtdi. Ammo qoʻshin kimniki boʻlsa, hokimiyat ham oʻshaniki ekani azaldan ma'lum. Xadicha begim oʻgʻlining hokimiyatiga hech kimni yoʻlatmasligi ham aniq.

Bobur uning koʻngli uchun: «Yagona sarkarda – Muzaffar mirzo boʻlsinlar!» demoqchi boʻldi-

yu, orqaroqda Zunnunbek oʻtirgani esiga tushdi. Zunnunbek bu gapni Badiuzzamon mirzoga yetkazsa, ikki oraga nifoq tushadi.

– Bosh sarkarda kim boʻlishini hazrat ogʻa-inilar oʻzlari hal qilmoqlari kerak, – dedi. – Bazmlarni toʻxtatib, butun e'tiborni mudofaaga qaratmoq kerak. Har bir kun gʻanimat, hazrat begim!

Xadicha begim Zunnunbek bilan Burunduqbekka murojaat qildi:

- Janob amirlar, sizlarning fikrlaringiz qalay?

Zunnunbek oʻsiq qoshlarini dikkaytirib, koʻzlarini Boburga qat'iyat bilan tikdi:

- Amirzodam, Shayboniyxonning Movarounnahrdagi gʻalabalari-yu xunxoʻrliklaridan bizni ogoh qilganlari yaxshi. Ammo Shayboniyxonning Movarounnahrda sinmagan qilichi Xurosonga kelib, albatta sinur! Men bunga aminmen, hazrat begim! Shuning uchun ortiqcha tashvish-u tahlikaga oʻrin yoʻq, deb hisoblaymen.

Zunnunbek ishonch va e'tiqod bilan aytgan bu soʻzlardan Xadicha begim darhol yengil tortdi. Bobur esa Zunnunbekka taajjub bilan tikilib dedi:

- Karomatingiz iloho toʻgʻri kelsin, janob amir! Ammo bu karomatga qanday asoslar bor?
- Bu karomatni men emas, Hirotning eng obroʻli valiylari qilmishlar.

Zunnunbek shunday deb, Xadicha begimga iymanibroq qarab qoʻydi. Bu qarashning ma'nosini tushungan Xadicha begim Boburga kulimsirab, izoh berdi:

- Hirotning Qutb nomli mashhur valiysi bor. Shu vaqtgacha Qutb nimani karomat qilgan boʻlsa, hammasi toʻgʻri chiqmish. Qutbga tushida ayon boʻlurki, Shayboniyxonning qilichini amir Zunnunbek sindirurlar. Moʻtabar munajjimlar yulduzlarga qarab, bu karomatni tasdiq qildilar. Shundan soʻng valiylar

Zunnunbekning yelkalariga muqaddas foʻta solib, nomlariga Hizabrulla unvonini qoʻshib, aytadigan boʻldilar.

«Hizabrulla» – arabcha «Ollohning arsloni», ya'ni «yengilmas botir» degani edi. Arabchani yaxshi biladigan Bobur bu unvonning ma'nosini tushunib, istehzoli kulimsiradi:

– Janob Zunnunbekda arslonning yuragi borligiga shak-shubha yoʻq. Ammo hazrat begim valiylar-u munajjimlarni tilga olganlarida, faqir Saripulda Shayboniyxon bilan masof urushga chiqqan kunlarimni esladim. Mana, janob Qosimbek ham bor edilar. Shahobiddin nomlik munajjim kechasi osmonga qarab: «Sakkiz yulduz yelkangizda rost turur, ertaga urushga kirsangiz, zafar, albatta, sizniki boʻlgʻay!» – deb valiylik qildi. Biz shunga ishonib, Shahrisabzdan keladigan koʻmakni ham kutmasdan, maydonga chiqdik... Mana, haligacha oʻshal xatomyizning azobini tortib yuribmiz.

Boburning gaplaridan Xadicha begimning yuzlari tundlashib, lablari atrofida burushiqlar paydo boʻldi. Zunnunbek esa oʻtirgan joyida asabiy toʻlgʻanib:

– Amirzodam, niyatni yaxshi qilmoq kerak! – dedi. Hirotning valiylari Samarqand munajjimlaridek nodon emaslar! Saripuldagi xatoni Hirotday ulugʻ shaharda hech kim takror etmagay!

Zunnunbek koʻzlari yonib, telbalanib gapirganini koʻrgan Burunduqbek uni bosishga tirishdi:

– Janob Zunnunbek, oliy mehmon bizga yaxshilik istab, Kobulday joydan kelmishlar. Vaziyat xatarli ekanligi rost. Shoshilinch choralar oʻylamoq kerak!

Xadicha begim bahslashuvchilarni muloyimlik bilan yarashtirib qoʻyishga harakat qildi:

– Janob Zunnunbek, vaziyat chindan ham jiddiy, beparvo boʻlmaslik kerak. Ammo janob Burunduqbek ham bir narsani unutmasinlar: magʻlubiyatni koʻp koʻrgan odamga xatar goho aslidan kattaroq koʻrinur. Amirzodam, siz koʻp tashvish chekmang. Shayboniyxon bizga tajovuz qilsa, oʻz tajovuzidan halok boʻlur!

* * *

– Xadicha begimdek koʻpni koʻrgan malika shayxlarning xushomad gapiga ishonib yurganlaridan men hayron, – dedi Bobur ertasi kuni Bogʻi Jahonoroda Badiuzzamon mirzo bilan gaplashib oʻtirganda.

Gavdasining shertaxlitligi va koʻzining qisiqligi otasi Husayn Boyqaroga oʻxshab ketadigan Badiuzzamon mirzo istehzo bilan kulimsiradi:

- Hayron boʻlmang, amirzodam. Ne qilsa ham ayol kishida, qisqa oʻylab oʻrgangan.
- Ammo bu kaltabinlikning kasofati hammaga urishi mumkin-ku, hazratim?
- Nachora? Suyukli farzandimiz Moʻmin mirzo ham shu begimning kasofatidan halok boʻlib ketdi!
- Hazratim, rahmatlik otangiz kayf ustida qilgan fojiaviy xatoni endi unuting!
- Unutolmaymen, chunki ayb marhum otamda emas edi! Sulton Sohibqiron Moʻmin mirzoni behad yaxshi koʻrar edilar, she'rlarini yod bilar edilar. Avvallari otamning menga ham mehrlari yaxshi edi. Axir men taxt vorisi edim! Xadicha begim men bilan otamni dushman qilishning yoʻlini izlar edi. Moʻmin mirzo asir tushgach, bu yoʻl topildi uni shirakayf podshohning farmoni bilan oʻldirdilar-u men bilan otamni xundor dushmanga aylantirdilar. Shundan keyin begimning oʻgʻli Muzaffar mirzo mening oʻrnimga valiahd boʻldi. Bugungi sheriki podshohlik ham ana shu begimning ixtirosi! Men aniq bilamen: begim meni muvaqqat tojdor deb bilurlar. Meni yoʻq qilib, Muzaffar mirzoni yagona podshohga aylantirishning qulay paytini poylamoqdalar!

Bobur Badiuzzamon mirzoga Shayboniyxonni eslatdi:

- Hazratim, Shayboniyxon haqida ne yangi xabarlar bor?
 - Xon Xorazmni olib, Samarqandga qaytgan emish...
- Undoq boʻlsa, xon endi Xuroson yurishiga chiqmoqchidur? soʻradi Bobur.
- Darhol-a? Xorazm yurishidan soʻng biror yil dam olmasmikin?

Badiuzzamon mirzoning tusmol gaplari – uning dushman orasidan aniq xabar yuborib turadigan maxfiysi yoʻqligidan dalolat berardi. Oʻz inisining barcha mayda-chuyda sirlarini bilib turish uchun behisob maxfiylar yuborib qoʻygan podshoh bu ishni ashaddiy dushmani Shayboniyxonga nisbatan qilmayotgani Boburni tang qoldirdi.

– Hazratim, Shaybonixonning rev-u rangini¹ faqir ozroq koʻrganmen. Xonning maxfiylari hozir Hirotda darvish, yo savdogar, yoki navkar qiyofasida yurib, barcha zarur xabarlarni Samarqandga yetkazib turgan boʻlsalar kerak.

Boburning koyinib gapirganini sezgan Badiuzzamon mirzo kinoyamuz kuldi:

- Amirzodam, siz ham shohsiz, ehtimol, sizning maxfiylaringiz Samarqanddan yangi xabar yuborgandirlar?
- Men sizni otamdek e'zozlaymen, hazratim. Gap maxfiylarda emas. Faqir tajribadan shuni bilamenki, Shayboniyxon charchagan askarlarini bosib olgan viloyatda dam olish uchun qoldirib, avvaldan dam olib yotgan qoʻshini bilan darhol yangi yurishga otlanur. Uning butun kuchi shundaki, barcha ogʻaini, qarindosh-urugʻlari bilan bir tan-bir jon boʻlib, maydonga chiqur. Biz bu xatarli yogʻiy qarshisida ichki nizolarni unutmogʻimiz kerak. Biz ham bir tan-

¹ Rev-u rang – shumlik, oʻz ishiga puxtalik.

bir jon boʻlib, yagona sarkarda boshchiligida jangga astoydil tayyorlanib kirmasak, oqibati yomon boʻlishi ehtimoldan yiroq emas.

– Yagona sarkarda, dedingizmi? Kim bizga sarkarda boʻlmoqchi, amirzodam?

Birinchilikni talashayotgan bu ikki ogʻa-ini «Menga boʻlmasa, unga ham boʻlmasin!» deyishga tayyor ekanligi Boburga hozir aniqroq sezildi. Raqib ogʻa-ini talashayotgan mamlakat ulardan faqat biriga yoki amakivachchalari Boburga tekkanidan koʻra yetti yot begonaga tekkani afzalroq. Chunki begonalar ularning bunchalik baxilligini keltirmas edi.

- Nahotki jangga ham alohida-alohida chiq-moqchisizlar? dedi Bobur.
- Nachora? Har kimning oʻz cherigi, oʻz sarkardasi bor. Men Muzaffar mirzoga ishonmaymen. Ammo siz bilan har qanday jangga birga kirishga tayyormen. Chunki sizga ishonamen. Amirzodam, siz Hirotda qoling! Neki darkor boʻlsa ayting! Muhayyo qilurmiz. Bobur ogʻa-inining faqat shu nuqtada yakdil ekanini sezdi. Jang koʻrgan Bobur butun bek va navkarlari bilan Hirotda qolsa-yu, vaqti kelib, jangga birga chiqsa, ularning mushkullari osonroq boʻladiganga oʻxshardi.

Ammo ogʻa-inining qoʻsh hokimiyati Boburga tagi chirib teshilgan kemaga oʻxshab koʻrinardi. U bu kemada qolsa paymonasi toʻlgan ogʻa-iniga qoʻshilib, gʻarq boʻlishi muqarrarligini tobora aniq his qilmoqda edi.

Ertasi kuni peshin namozidan keyin Unsiyaga Boburni koʻrish uchun kelgan mavlono Fazliddin navkar-u savdarlarning koʻch yigʻishtirayotgan va safarga hozirlanayotganlarini sezdi. Yoʻlakda togʻasiga duch kelib qolgan Tohir:

- E, xayriyat, oʻzingiz keldingiz, mulla togʻa! dedi.
- Ha, ne gap jiyanim?
- Ertaga tongda Hirotdan joʻnab keturmiz.

- Kobulgami?
- Ha, deb shivirladi Tohir. Lekin podshohlar buni bilmasinlar. Ruxsati oliy shahar tashqarisida qishlamoq uchun berildi. Hammaga: «Xurosonda qishlagaymiz», deb e'lon qilindi. Siz ham bildirmang.

Mavlono Fazliddinning ruhi tushib:

- Obbo, dedi. Bizni sagʻirdek mungʻaytirib ketar ekansizlar-da?
- Qish chiqsa, siz ham Kobulga koʻchib boring. Oʻtgan gal uchrashganingizda, Bobur mirzo oʻzlari taklif qildilar-ku.
- Koʻchib borish osonmi, jiyanim? Bir oy-qirq kunlik yoʻl... Ayolmand odammiz...

Mavlono Fazliddin xomush boʻlib, Boburning qabulxonasiga qarab ketdi. Bir vaqtlar Alisher Navoiyning qabulxonasi boʻlgan koʻrkam tanobiyning zarrin oʻymakor eshigi oldida yasovul yigit turgan edi. U ichkariga kirib, tez qaytib chiqdi-yu, eshikni ochib, mavlonoga yoʻl berdi. Uy toʻrida Bobur bilan suhbatlashib oʻtirgan kishilarni mavlono bir qarashda tanidi. Navoiyning nadimlaridan boʻlgan qirq besh yoshlardagi koʻsa odam – shoir Sulton Muhammad edi. Undan beriga mashhur xattot Sulton Ali Mashhadiy choʻkkalagan. Boburning oʻng tomonida Kamoliddin Behzod va Xondamir oʻtirishibdi.

Bobur mavlono Fazliddin bilan oʻrnidan turib koʻrishar ekan, boshqalar ham oyoqqa turdilar. Mavlono Fazliddin poygakga oʻtirmoqchi edi, yoshi undan kichikroq boʻlgan Xondamir:

– Siz oliy mehmonimizning vatandoshisiz, – deb uni oʻzidan yuqoriga oʻtkazdi.

Ma'yuslanib oʻtirgan Xondamir suhbatni toʻxtatgan joyidan davom ettirib:

– Ajab kajraftor falak bu! – dedi. – Amirzodam, siz Hirotning yuksak san'ati-yu ajoyib iste'dodlariga havasingiz kelib so'zladingiz. Biz esa bugungi Hirotga Xudo sizdek ma'rifatli, sizdek iste'dodli podshoh bermaganidan dogʻdamiz!

Bobur oʻzini shuncha izzat-ikrom bilan mehmon qilgan podshohlarning sha'niga tegadigan gap aytishni istamas edi.

Mavlono, podshohlaringiz ham ma'rifatli zotlar,
dedi.

Kalta jingalak soqoli oʻziga yarashgan nafis yuzli ozgʻin Behzod kinoya bilan dedi:

– Amirzodam, podshohlarimizning biri oftob boʻlsa, biri mohtob. Xalq orasida hozir bir she'r tarqalmish. Mazmuni shuki, Husayn Boyqaro haqiqiy podshoh edi. Uning ikki oʻgʻli ikki taxt ustida oʻtirib, biri «oymen» desa, biri «kunmen» derlar, erta-yu kech bir-biri bilan raqobat qilurlar. Bularning oʻzaro kurashlari xuddi shatranj taxtasi ustidagi shohlarning kurashlariga oʻxshaydir. Chunki bu ikkovi otalaridek haqiqiy shohlar emas, balki shatranj taxtasi ustidagi yasama shohlardir.

Bu oʻxshatish Boburning ikki podshohdan olgan taassurotlariga shu darajada mos kelar ediki, u beixtiyor kulib yubordi.

- Lekin ogʻa-inining raqobati shatranj oʻyiniga oʻxshashligi rost!
- Falokat shundaki, dedi Xondamir, bu oʻyinda ular Xurosonni boy bermoqdalar! Buni ularga soʻz bilan uqtirish esa imkondan xoli!

Shoir Sulton Muhammadning koʻzlari isyonkorona chaqnadi.

– Ularga buni soʻz bilan emas, faqat shamshir bilan uqtirish mumkin!

Xondamir eshik tomonga xavotirli koʻz tashlab qoʻydi. Bir vaqtlar Alisher Navoiydek odamga maxfiylarini yuborib qoʻygan podshohlar Boburning ketiga ham odam qoʻygan boʻlishlari mumkin edi.

Sulton Ali Mashhadiy suhbatni xatarli mavzulardan nariroq olib ketish uchun yonida turgan charm juzdonni ochdi-da, bir dasta zarvaraq oldi.

- Faqir oliy mehmonimizning gʻazallaridan bir nechasini koʻchirib kelgan edim.

Varaqlar qoʻldan-qoʻl oʻta boshladi. Xattotning ajoyib san'ati tufayli har bir harf nafis va tirik tasvirga aylangan edi. Xondamir satrlarga koʻz yugurtirib:

– O! – dedi hayrat bilan. Koʻp shoirlar «yor»ni ilohiylashtirib, butun najotni «yor» dan izlab oʻrganmishlar. Amirzodam, bu odatiy aldanishlarga qarshi isyon qilgan kabi yozmishlar:

Jonimdan oʻzga yori vafodor topmadim, Koʻnglimdan oʻzga mahrami asror topmadim... Bobur, oʻzingni oʻrgata koʻr yorsizki, men – Istab jahonni, muncha qilib yor topmadim!

- Mardona soʻzlar! dedi Behzod Boburga qarab. –
 Siz ming marta haqsiz! Odam oʻziga ham ishonmogʻi kerak!
 - Minnatdormen, mavlono.

Shoir Sulton Muhammadga ikkinchi she'rning matlayi yoqqan edi.

- Eshiting, janoblar:

Sendek menga bir yori jafokor topilmas, Mendek senga bir zori vafodor topilmas.

Mavlono Fazliddin ogʻir tin oldi:

- Hozirgina soʻzlashgan dardimizni aytmishlar! Bobur maqtovlardan xiyol oʻngʻaysizlanib:
- Janoblar, dedi, men sizlardek san'atkorlar bilan uchrashib, suhbatlashganim uchun Tangriga shukr qilamen. Faqirning qogʻozni qoralab yozgan satrlarim mavlono Mashhadiyning tengsiz san'atlari

tufayli sizlarga shunchalik manzur boʻldi. Joiz boʻlsa, gʻazallardan xotira uchun mavlonolarga bir nusxadan bermoqchimen.

- Ayni muddao! - dedi Xondamir quvonib.

Bobur gʻazallaridan ataylab uch-toʻrt nusxadan koʻchirtirgan edi. Xondamirga, Behzodga, Sulton Muhammadga oʻzlari yoqtirgan gʻazallardan bir nusxadan berdi. Ular shoir va xattotning hurmatlari uchun gʻazal bitilgan zarvaraqlarni olib, non kabi koʻzlariga surtib qabul qildilar. Bobur soʻnggi gʻazaldan bir nusxasini mavlono Fazliddinga uzatib:

– Mavlono, biz siz bilan faqat vatandosh emasmiz, hamdard-u hasratdoshmiz, – dedi.

Mavlono Fazliddin gʻazalni olib, koʻziga surtdi-yu:

- Men aminmen, Hirotda bitilgan ushbu gʻazal tez kunda Samarqand-u Andijonga ham yetib borur, dedi.
 Xudo amirzodam bilan bizni ham Vatanga sogʻ-salomat qaytgulik qilsin!
 - Aytganingiz kelsin, mavlono!

Bobur Qosimbekni chaqirtirdi va Sulton Ali Mashhadiyga gʻazallarni san'atkorona koʻchirganligi uchun oltin tugmalik kimxob toʻn kiydirdi. Soʻng u mavlonolarni hovliga kuzatib chiqdi. Hammalari xayrlashayotganlarida, me'morga qarab:

- Balki, kelgusi yilda Kobulga borursiz, mavlono? dedi. Rost, katta me'morlik obidalari qurishga hali imkonimiz yoʻq. Kobul hozir Hirotga nisbatan chekka bir viloyat. Ulugʻ san'atkorlarga makon boʻlarlik saroyimiz yoʻq. Lekin Xudodan umidimiz borki, kelgusida tole bizga ham kulib boqgay, biz ham ulugʻ san'atkorlarga makon beradigan kunlarga yetgaymiz!
- Taklifingizni bajonidil qabul qilurmen! dedi mavlono Fazliddin.
- Amirzodam, dedi Xondamir. Alisher Navoiyning dargohlarida qilgan pokiza niyatingiz ilohim roʻyobga

chiqsin! Ilohim hazrat Alisherning ruhlari hamisha sizga madadkor boʻlsin!

Bu tilakka hammalari sidqidildan qoʻshilib, yuzlariga fotiha tortdilar.

* * *

Ertalab kun chiqayotganda, Bobur xosnavkarlari va beklari bilan Hirotning tashqarisidagi keng bogʻkoʻchadan ketib borar edi. Koʻchaning ikki tomonida Hirot a'yonlarining gʻishtin devorli, koshinkor gumbazli koʻshk va chorbogʻlari bor edi. Salobatli bir bogʻhovlining baland devori yonidan oʻtayotganlarida, devor tepasidan kimdir uch-toʻrtta atirgul tashladi. Toʻq qizil rangli gullardan biri Bobur mingan saman otning oʻsiq yoliga kelib tushdi. Gulning tikanlari ot yoliga ilinib qolganini koʻrgan Bobur devor tepasiga qaradi-yu, yosh bir qizning qiygʻoch qoshlarini va qosh ustiga bostirib kiygan guldor toqisini koʻrdi. Keyin u ot yoliga ilinib qolgan gulni qoʻliga olib, labiga yaqinlashtirdi.

Uzoqda yastanib turgan Zanjirgoh togʻlarining baland choʻqqilariga qor tushgan edi. Hirotning kech kuzida nima ham boʻlib ochilgan bu gulning ajib hidi bor edi. Bobur gulning xush boʻyi dimogʻiga urilgan zahoti jilovni beixtiyor tortib, otini toʻxtatdi. Uzangiga oyoqlarini tirab, egardan boʻy choʻzdi-da, devor tepasidagi qizga tikilib qaradi. Endi unga qizning olov chaqnatib turgan qop-qora koʻzlari, bu koʻzlarga nihoyatda yarashgan gulrang yonoqlari aniq koʻrindi. Bobur bu koʻchadan avval ham oʻtgan edi. Qiz avvallari ham uni koʻrib, tanib qolgan ekanmi, koʻzlari moʻltirab va uyalib bosh egdi. Bu uning salom berganimidi yoki xayrlashganimidi? Oʻn yetti-oʻn sakkiz yoshlardagi bu qizning jozibasi-yu moʻltirab bosh egishi Boburga shunday ta'sir qildiki, u bir lahza nima qilishini

bilmay esankirab turdi. Bu orada boshqa mulozimlar ham qizni koʻrib, otlarini toʻxtatgan edilar. Boburni Muzaffar mirzoning Hirot boʻyicha dorugʻasi Yusuf Alibek kuzatib bormoqda edi. Qirq yoshlardan oshgan koʻngilchan bu bek devor tepasidagi qizni tanib kuldiyu:

– Iye, Mohimmisiz! – dedi. – Obbo, Mohchuchuk-ey, katta qiz boʻlib qolibsiz-a!

Qiz goʻyo endi oʻziga keldi, «lip» etib, boshini devor ortiga oldi-yu, koʻzdan gʻoyib boʻldi. Yuzi qandaydir ichki olovning taftidan qizargan, koʻzlari gʻalati chaqnagan Bobur Yusuf Alibekdan shoshib soʻradi:

- Kim? Kim dedingiz?
- Amirzodam, bu hovli Sulton Sohibqironning uzoq qarindoshlaridan biriga qarashli. Qizning otasi Husayn Boyqaroning nufuzli devonboshilaridan edilar. Bordikeldimiz bor edi.
 - Hozir bormilar?
 - Borlar-u, lekin... davlat ishidan chetlanmishlar.
 - Nechun?
- Bilmadim, hozirgi podshohlarimiz bilan oralari yaxshi boʻlmasa kerak. Qandahorgami, Gʻaznagami koʻchib ketish taraddudida emishlar, deb eshitdim.

Otlar yurib bormoqda edi. Bobur Mohim deb atalgan qizning tobora uzoqda qolayotganini oʻylab, koʻnglida kuchli bir armon sezdi. Yigirma kun Hirotda yurib, bu qizni nega faqat endi, joʻnab ketayotgan paytda koʻrdi?

Bobur hali ham qoʻlida ushlab borayotgan gulga qaradi. Boyagi goʻzal qiz Hirotning butun nafosatini oʻz jozibasi bilan birga mana shu gulga muattar hid kabi joylab berganga oʻxshar edi.

Bobur gulni yana bir hidladi-da, boshidagi sallasining qatiga koʻzga uncha tashlanmaydigan qilib qistirib qoʻydi. Lekin undagi nafis bir hayajonni Qosimbek zimdan kuzatib bormoqda edi. Boburga otadek gʻamxoʻr boʻlgan bu odam shunday koʻhlik

yigitga munosib bir qiz uchrashini koʻpdan beri kutib yurardi. Bobur esa koʻz ochib koʻrgan yostiqdoshi Oyisha begimning bevafoligidan qattiq ozor chekkani uchun ayol zotidan tortinar, ancha-muncha qizlarga moyillik bildirmas edi. Hirot malikasi Xadicha begim uni asilzoda xonadonlarga kuyov qilishga urinib koʻrdi. Bobur roʻyxushlik bermadi.

Marhum Sulton Ahmad mirzoning kichik qizi Ma'suma begim onasi bilan Samarqanddan Hirotga kelib qolgan ekan. Kayvoni ayollar oraga tushib, bir mehmondorchilik paytida Boburni Ma'suma begim bilan uchrashtirdilar. Qiz juda nazokatli va goʻzal edi. Ammo Qosimbek uni koʻrganda Toshkentda qolgan Oyisha begimni esladi. Chindan ham Ma'suma begim – Oyisha begimning singlisi edi. Bobur orada turgan hirotlik amma-xolalarning koʻngliga qarab, qizga moyillik bildirgan boʻldi, lekin toʻyni paysalga soldi. Qosimbek orqali shunday javob ayttirdi:

- Ma'suma begim onalari bilan Kobulga borsalar... Qizning onasi:
- Xoʻp, Kobulga borgaymiz, deb va'da berdi.

Lekin Qosimbek bu nozikkina qizning Hindikush togʻlari osha Kobulga yetib borishiga uncha ishonmasdi. Yetib borganda ham Boburning boshi ustida charx urib yurgan intihosiz mushkulotlariga bardosh berolmasa kerak, deb oʻylardi.

Ammo bogʻ koʻcha devoridan gul tashlagan Mohim ismlik olov qizning yuz-koʻzlarida nafis goʻzallikka yoʻgʻrilgan qudratli bir ohanrabo bor edi. Ana shu ohanrabo Boburni hamon oʻziga tortib turar edi.

Bogʻ koʻchadan keng dalaga chiqqanlarida, Bobur sallasi qatidagi pushti rang atirgulni sekin qoʻliga olib, yana bir hidlab koʻrdi. Shunda devordan moʻralagan qiz uning koʻz oldida qaytadan gavdalandi-yu, butun borligʻini nafis va shirin tuygʻularga toʻldirdi. «Shuncha qilib, istab jahonni yor topmadim!» degan Boburga,

balki shu qiz yor boʻlar? Nega undan bu qadar tez ayrildi? Nahotki bu qizni qayta koʻrish nasib qilmasa?

Qosimbek otini Boburning otiga yaqin keltirib, past tovush bilan soʻradi:

- Amirzodam, bu atirgul qaysi gulzorda oʻsganini surishtirib koʻraymi?..
 - Ixtiyoringiz, dedi Bobur uyalinqirab.
- Qizning otalari Husayn Boyqaroga xesh boʻlsalar, men bu xonadon bilan albatta aloqa bogʻlagaymen.

Bobur bu rejani ma'qullagan ma'noda bosh irg'adi.

– Amirzodam, agar yulduzi yulduzingizga toʻgʻri kelsa, men Mohim bonuni Hirotdanmi, Qandahor yoki Gʻaznadanmi, qayerdan boʻlsa ham, albatta, izlab topgaymen!

HINDIKUSH, KOBUL

O'LIM BILAN YUZMA-YUZ

Hirotdan uzoqlashganlari sari goʻzallik va nafosat nuriga yoʻgʻrilgan iliq tuygʻular oʻrnini Hindikush togʻining bahaybat qoyatoshlari va uning sovuq muzlariga oʻxshaydigan xavotirliklar egallay boshladi. Boburning Kobuldan chiqib kelganiga uch oydan oshyapti, lekin u yerdagi ishonchli odamlardan xabar kelmayapti. Ora uzoq – otda bir oy-qirq kunlik yoʻl. Karvon bilan Kobuldan kelgan savdogarlar noxush ovozalar eshitibdi. Goʻyo Bobur mirzo Hirot tojdorlari bilan yovlashib qolganmish, uni Ixtiyoriddin qal'asiga qamab qoʻyganmishlar.

Hisorda Xisravshohdan ajralib kelib, Bobur xizmatiga kirgan yigirma ming moʻgʻul sipohilari bu xabarga asoslanib, Kobulda oʻz hokimiyatlarini oʻrnatish harakatiga tushganmish. Moʻgʻullarning dugʻlat qavmidan boʻlgan Muhammad Husayn (avvalgi Oʻratepa hokimi) fitnachilarga bosh boʻlmoqda emish. Ammo Kobul dorugʻasi Mulla Bobo Boburga sadoqat saqlab, qoʻrgʻon darvozalarini berkitib olganmish. Agar shu gaplar rost boʻlsa, qoʻrgʻon qamalda qoladi. Ammo tashqaridan yigirma ming qoʻshin hujum qilsa, qoʻrgʻonni egallashi hech gap emas. Unda Bobur Samarqand tufayli Andijondan ayrilgani kabi, Hirot sababli Kobuldan ham ajralib, yana aro yoʻlda muallaq qolishi mumkin.

Bu xatarning oldini olish uchun Bobur Kobulga tezroq yetib borish harakatiga tushdi. Aksiga olib, qish erta boshlandi. Qavs oyidayoq togʻ etaklariga yoqqan qalin qor otlarning tizzasiga yetib bordi. Chaxcharon degan joyda Bobur beklarni mashvaratga toʻpladi.

– Dovonlar bekilgandir, – dedi Xoʻja Kalonbek. – Qandahor orqali borsak, yoʻl tekis.

Hindikushni aylanib oʻtgaymiz.

- Aylanib oʻtganingizgacha qirq-ellik kun vaqt ketgay! – e'tiroz qildi Qosimbek. – Ungacha moʻgʻullar Kobul qoʻrgʻonini egallab olsa, keyin ne qilgaymiz?
- Xudo koʻrsatmasin! dedi Bobur. Ilohim bu mish-mish yolgʻon chiqsin!
- Ammo shamol boʻlmasa terakning uchi qimirlamagay, amirzodam! Kobulga tezroq yetib bormogʻimiz shart! Toʻgʻridagi Koʻtali Zarrindan oshsak, Qandahor yoʻliga nisbatan masofa ikki barobar qisqargay. Bir oy vaqt yutgaymiz!
- Unday boʻlsa, mayli, janob Qosimbekning taklifini qabul qilaylik. Faqat dovon yoʻlini yaxshi biladigan yoʻlboshchi topish kerak.
 - Bunisi menga tan! dedi Qosimbek.

Ertasi kuni yana qor yogʻa boshladi. Bobur qoʻriqchi yigitlari bilan otlanib chiqayotganda, Qosimbek afgʻonlarning poshoyi qabilasi yashaydigan qishloqdan Sulton degan bir yoʻl koʻrsatuvchini topib keldi. Olachipor salla oʻragan, baland boʻyli, burni uzun, jingalak soqoliga oq oralagan bu odamning yuzi Boburga allanechuk tund koʻrindi. Bobur u bilan ot ustida turib, dariy tilida soʻzlashdi:

- Qishda Koʻtali Zarrindan oʻtish mumkinmi, yoʻqmi?
- Oʻtganlar bor, dedi Sulton. Ammo bu yil qor juda koʻp. Koʻchki bosib qolishidan qoʻrqmasangiz...
 - Siz qoʻrqmasangiz biz nechun qoʻrqaylik?..
- Men qishda oʻtsam, bir oʻlimni zimmamga olib oʻtaman. Ketishda uydagilardan rozi-rizolik soʻrab yoʻlga chiqaman. Qaytib kelmasligim mumkin.

Bobur Qosimbek tomonga oʻgirilib, turkiy tilda soʻradi:

- Nafasi muncha sovuq? Boshqasi yoʻqmidi?

– Boshqalari unamadi. «Dovon bekilgan, jon kerak!» deyishdi.

- Bizga jon kerak emasmi?
- E, bular shunaqa vahima qilib, qadrini oshirgay! Mana shu Sulton qishda ham Koʻtali Zarrindan oʻtgan ekan. Kadxudosi aytdi!

Sulton poshoyi soqoliga ingan qor zarralarini kafti bilan sidirib tashlar ekan, istehzoli kulimsirab qoʻydi. Bobur uning turkiychani tushunishini sezdi, ammo istehzosini yoqtirmadi. Sultonning dilida ortiqcha gʻururmi, kuduratmi, sovuq bir narsa bordek tuyildi.

- Janob Qosimbek, odamlarimizni ortiqcha xatarlarga giriftor qilmaylik. Hali ham boʻlsa Qandahor yoʻliga qaytaylik!
- Ammo vaqtni boy bersak, Kobul ilikdan ketgay, amirzodam! Siz bilan biz qancha xatarli dovonlardan oshganmiz! Hisor togʻlaridan qor boʻronlari tagida dahshatli uchmalar, sekirtmalardan oʻtib, Iskandarkoʻlga tushganimiz yodingizdami? Xudo asraymen desa, hech gap emas!
- Xayr, bu gal ham Xudo oʻzi asrasin! deb Bobur Sultonning yoʻl koʻrsatuvchi boʻlishiga rozilik berdi.

Sulton uyiga borib, chindan ham onasidan, xotini va boʻy yetgan farzandlaridan rozi-rizolik soʻrab chiqdi. Uning oʻziga toʻq, badavlat oilasi bor, sayisxonasidagi sakkizta otiga maxsus otboqar qaraydi. Bu gal qishda yoʻl koʻrsatuvchi boʻlishdan maqsadi faqat pul ishlash emas. Yoshlikdan unga tinchlik bermay kelayotgan alam va intiqom tuygʻusi uning shu ishga bosh qoʻshishiga sabab boʻldi.

U Qosimbekka rozilik berishdan oldin, dovondan oʻtmoqchi boʻlayotganlarning kimligini surishtirib bildi. Bobur – Temuriylardan ekani, Abusaid mirzo uning bobosi boʻlgani Sultonning oʻn yosharlik paytida boshdan kechirgan fojialarni esiga soldi. Sultonning ota-bobolari Shohruh mirzo bilan yaxshi hamkorlik

qilgan badavlat odamlar edi. Shohruhning oʻlimidan keyin boshlangan algʻov-dalgʻovlarda Turondan Abusaid mirzo oʻgʻli Mahmud mirzo bilan Xurosonga bostirib keldilar. Sultonning otasi Shohruh mirzodan koʻp yaxshilik koʻrgani uchun uning nevaralariga yon bosdi.

Lekin Abusaid mirzo g'olib kelib, Shohruhning koʻpchilik nevaralarini qilichdan oʻtkazdirdi. Sultonning otasi va akasini ham Shohruhiylar tomonida turgani uchun boshlarini kesdirdi. Hovlilarida bor molhollarini, onasining boʻxchalaridagi narsalarigacha talab ketishdi. Bu ham ozlik qilganday, Sultonning oʻn besh yoshlik chiroyli opasini asira qilib olib ketdilar. Keyin eshitsalar, uni Abusaid mirzo haramiga bir necha kunlik joriya qilib beribdilar... Ustma-ust kelgan bu baxtsizliklardan Sultonning onasi kasal boʻlib, votib goldi. Lekin ularning badavlat garindoshlari bor edi. Ogʻir paytda ular yordam qoʻlini choʻzdilar. Sulton yigit voshiga vetguncha zamonlar ham bir qadar tinchidi. karvonlar koʻp qatnaydigan boʻldi. Sulton karvonlarga yoʻl koʻrsatuvchilik qildi, savdo-sotiqdan ham yaxshi daromadlar olib, roʻzgʻorini butlab oldi.

Hozir qahraton qish kunida uyida oilasi bilan tinchgina oʻtirishi mumkin. Lekin Bobur ham bu yerlarga bobosi Abusaid mirzoning izidan kelganligi Sultonning dilidagi qasoskor tuygʻularni uygʻotib yubordi. Nohaq oʻldirilgan otasi va akasi, nomusi toptalgan opasi uchun mana bu Temuriyzodadan xun talab qilib qasd olishga haqi yoʻqmi? Bu ham oʻsha kelgindi fotihlarning biri-ku. Turondan kelib, bu yerlarda xoʻjayin boʻlib yuribdi. Qani, Hindikush togʻiga ham xoʻjayin boʻlib koʻrsin-chi?! Sulton oʻz xundor dushmanini eng mashaqqatli yoʻllardan boshlab boradi, uning azob tortganlarini koʻrib, bir alamdan chiqadi. Ilojini topsa, dovon yoʻllarida qor boʻronlariga koʻmib qaytadi. Shu bilan otasi va akasining ruhlari oldidagi qiyomatlik burchini bajargan boʻlmaydimi?

Sulton shu oʻy bilan sayisxonaga kirdi. Togʻlarda yaxshi yuradigan eng baquvvat qora qashqa otini egarladi. Jun xurjunga ikki haftaga yetadigan qilib qovurdoq goʻsht, yogʻliq patir va boshqa eguliklar soldirdi. Oʻzi qalin poʻstin kiyib, yana ikkita jun chakmon, issiq quloqchin, «joʻrab» deb ataladigan qalin paypoqlar oldi. Otlarga yem-xashakni ham unutmadi. Poʻstin tagidan beliga xanjar taqib oldi. Hamma yuklarini qizgʻish rangli miqti otga orttirdi-da, uni yetovga oldi.

Bobur va Qosimbek boshliq bek-u navkarlar uch yuz kishidan ortiq. Koʻpchiligining yetovda oti bor. Tuyalarga turli yuklar, chodir va yigʻma oʻtovlar ortilgan. Qish kuni bularning hammasini oziq-ovqat va yem-xashak bilan ta'minlash oson emas.

Avvalgi hokimlarning odatini yaxshi biladigan Sulton: «Bular ham aholining mol-holini zoʻravonlik bilan tortib olib, zaxira yigʻsa kerak», deb oʻyladi.

Ammo Bobur xazinachiga buyurib, hamma zaxiralar uchun oltin-kumush tanga toʻlatdi. Hatto yem-xashakni va qor kuraydigan yogʻoch kuraklarni ham tangaga sotib olishdi.

Koʻz ilgʻagan hamma joy oppoq qorga burkangan. Sulton qora qashqa otda oldinda yoʻl boshlab boradi. Bobur va Qosimbeklar uning ketidan otliq kelishmoqda. Orqada yuzlab bek-u navkarlar yetovdagi otlar va yuk ortilgan tuyalari bilan turnaqator boʻlib, tizilib yoʻl yuradi. Bir haftadan beri har kuni qor yogʻadi. Goho qalin bulutlar yirtigʻidan oftob xiragina boʻlib koʻrinadida, koʻp oʻtmay yoʻq boʻlib ketadi.

Oppoq toza qor koʻzni oladi. Soʻng yana maydalab qor yogʻishga tushadi.

Yoʻllar qor tagida koʻrinmay ketgan. Sulton bolalikdan yaxshi biladigan tepaliklar, jilgʻalar va qoyatoshlarga qarab, tusmol bilan yoʻl boshlab boradi. Togʻ etaklarida ularga bironta qoʻy suruvi, bironta qoramol uchramaydi – chorva yeydigan oʻt-oʻlanlar qor tagida qolib ketgan. Hatto kakliklar ham bu qorda don topolmay, pastliklarga tushib kelgan. Ular qalin qorda durust ucholmay qolarkan, qanotlarini yozib, qorga tiqilib qolgan kakliklardan besh-oʻntasini yigitlar yoʻl boʻyidan tutib oldilar:

– Kechqurun tunashga toʻxtaganda, kabob qilgaymiz! – deyishib, xurjunlariga joyladilar.

Togʻ oraliqlariga kirganlarida, qor otning tizzasidan balandga chiqdi. Qish chillasi qahrli, sovuqning qattiqligidan oyoq taglarida gʻarchillagan qorning tovushi togʻ yonlaridan aks sado boʻlib qaytadi. Yuqoriga koʻtarilganlari sari yurish qiyinlashadi, otulovlar burunlaridan hovur chiqarib, ogʻir-ogʻir nafas olishadi, horgʻin pishqirishadi. Bek-u navkarlarning ogʻizlaridan chiqqan hovur yogʻayotgan qorga qoʻshilib, soqol-moʻylovlarga oppoq qirov boʻlib yopishadi va hammani moʻysafidga oʻxshatib koʻrsatadi.

Qish kuni qisqa, dovonga yetib borolmadilar. Kech kirganda nina bargli bolut daraxtlari oʻsib yotgan oʻrmonda toʻxtadilar. Tekisroq joylar topib, qorini kurab tashladilar-da, oʻrmondan oʻtin kesib kelib, gulxanlar yoqdilar. Gulxan atroflarini erigan qorlardan tozalab, Bobur, Qosimbek va boshqa e'tiborli a'yonlar uchun chodirlar tikdilar. Yigit-yalanglar qori kuralgan yerlarga qalin kigizlar toʻshab oʻtirdilar. Yuklar orasida qozon-tovoqlar ham bor ekan. Kunduz kuni tutilgan kakliklardan qilingan kabobning oldi Bobur va Qosimbekka suzildi.

Gulxan olovida qovurdoqlar ham tayyorlandi.

Sulton mayxoʻrlik ham boʻlishini kutgan edi. Lekin u hamroh boʻlib borayotgan bek-u navkarlarning oʻzaro gap-soʻzlaridan shuni bildiki, yigirma besh yoshlik Bobur hali umrida may ichmagan namozxon yigit. Uning shunday qor sovuqlarida ham tahorat olib, namoz oʻqiganini safar paytida bir necha marta

koʻrgan Sulton oʻzicha taajjublanib qoʻydi. Ertasi kuni yana dovon tomonga koʻtarilib borayotganlarida, qorning qalinligi otning oʻmrovigacha chiqdi. Otlar sal ilgarilaganlaridan soʻng oyoqlari yerga tegmay, qorga botib toʻxtab qolishdi.

Qosimbek yigitlarga kurak bilan yoʻl ochishni buyurdi. Besh-olti kishi kurak olib oldinga oʻtdi. Ammo qalinligi odamning koʻkragiga chiqadigan qorni kurak bilan uddalab boʻlmas, ikki-uch qadam yoʻl ochguncha bir dunyo vaqt ketardi.

– E, bu boʻlmas ekan, – dedi Bobur. – Bir kunda ikki chaqirim yoʻl bossak qachon yetgaymiz?

Sulton oldinga oʻtdi-da, qorni tepa-tepa shibbalab, birpasda toʻrt-besh qadam yoʻl qildi.

– Buni biz tajribada koʻrganmiz, – dedi Sulton Boburga. – Yigitlaringizga buyuring, mana shunday qor tepib, yoʻl ochsinlar. Boshqa iloj yoʻq!

Qosimbek «Qandahor orqali tekis yoʻl bilan boraylik!» degan taklifga koʻnmagani va dovon yoʻlidan yurishga sababchi boʻlgani uchun Boburdan xijolat chekmoqda edi. Shu sababli oʻgʻillari Tangiberdi va Qambaralini ikki yoniga olib, hammadan oldin oʻzi qor tepishga kirishdi. Orqadan yana Tohir boshliq toʻrt-besh yigit oldinga oʻtib, qorni gʻarchillatib, shibbalashga tushdilar. Birpasda yuz qadamcha soʻqmoq yoʻl hosil boʻldi. Undan otlarni yetaklab oʻtishga toʻgʻri kelardi. Qor tepayotgan Qosimbek hansirab dedi:

– Otni zoʻr jonivor derdik, bunday qorga odam otdan ham zoʻr boʻlarkan!

Orqada yoʻl ochilishini kutib, otliq turgan bek-u navkarlar koʻpchilik edi. Bu qattiq sovuqda ularning otdan tushgilari kelmasdi, chunki otning badanidan ozgina boʻlsa ham issiqlik chiqib, suvoriyga iliq tafti urib turar, pastdagi odam boʻyi qor esa kafanday sovuq tuyilardi. Juda sekinlik bilan ilgarilab borishar, bu ketishda bir kunlik yoʻl bir haftaga choʻzilishi muqarrar

edi. Ishboshi boʻlib turgan Sulton har zamonda Bobur tomonga koʻz tashlab qoʻyardi. «Qor qamalida qolayotgan bu temuriyzoda endi ne qilarkin?» deb uni zimdan kuzatardi.

Sulton Boburning sovqotib asabiylashishini, yoʻl juda sekinlab qolganidan tajang boʻlishini, odamlariga baqirib-soʻkinib ish buyurishini, aytganini qilmaganlar boʻlsa qamchi bilan savalashini kutmoqda edi. Otasi va akasini oʻlimga buyurgan hukmdorlar qiyofasida Sulton ana shunaqa zolimlarni koʻrgan, bugun esa ulardan birining talvasaga tushishiga guvoh boʻlib, bir alamdan chiqqisi kelar edi.

Biroq Bobur jim. U oldinda qor tepayotgan keksa Qosimbekning hansirab, holdan ketib qolayotganini koʻrdi-da, indamay otidan tushdi. Oldinga oʻtib, Qosimbekning yoniga bordi:

- Bas, siz endi nafasni rostlang! - dedi, soʻng uning oʻrniga qor tepib, yoʻl ocha boshladi.

Orqada yoʻl ochilishini kutib, otdan tushmay oʻtirgan bek-u navkarlar endi bunga loqayd qarab turolmadilar. Boburning indamay, koʻp qatori ishga tushib ketgani orqadagilarga zugʻum qilib buyruq bergandan koʻra kuchliroq ta'sir qildi. Yigitlardan yigirma-oʻttiztasi apil-tapil otlaridan tushib, Bobur tomonga shoshildilar.

Balandga koʻtarilganlari sari havo siyraklashib, nafas olish qiyinlashar, qirchillama sovuq buning ustiga qoʻshilar, eng baquvvat yigitlar ham yigirma-oʻttiz qadam yoʻl ochguncha charchab, hansirab chetga chiqardi. Ikki-uch marta bu ishni qilib chiqqan odamlarning koʻpi toʻrtinchi-beshinchi daf'a qor tepishga yaramay qolardi.

Ammo Bobur eng pahlavon yigitlar qatori qaytaqayta oldinga oʻtib, bir hafta davomida odamlariga yoʻl ochib borgani Sultonni lol qoldirdi. Bek-u navkarlar oʻzaro gaplashganda:

- Amirzodamga koʻz tegmasin, alplarday pahlavonligi bor! - deb qoʻyishardi.

- Sarkardang boʻlsa, shunday boʻlsin!

Sulton ham ichida: «Xudo bu yigitga kuch-quvvatni ham, himmatni ham ayamay berganga oʻxshaydi», deb qoʻydi. Kech kirganda baland bir yalanglikka koʻtarildilar. Bundan narida dovon boshlanishi kerak edi. Lekin bu balandlikda qor boʻroni boshlandi. Qattiq shamol qor uchqunlarini yuz-koʻzga keltirib ura boshladi. Sovuqning shiddati bir necha barobar oshib ketdi.

Havoli Kutiy deb ataladigan bu baland joyda shamolpana togʻ kamarlari borligini Sulton bilardi. U kichikroq bir kamarga Qosimbekni boshlab kirdi. Ammo bu kamarga toʻrt-beshta odam zoʻrgʻa sigʻardi. Qosimbek Boburni ham ichkariga taklif qildi.

Yuzlab odam tashqarida qor boʻroni ostida diydirab turibdi. Suyak-suyaklargacha yetib borayotgan achchiq sovuqning zahriga dahshatli qor boʻronining zarbi qoʻshilyapti. Agar odamlar shu ochiq joyda tunashga majbur boʻlsa, ularning koʻpi muzlab qolishi muqarrar. Oʻlim xavfini sezgan navkarlardan biri:

- E-voh, jasadimiz qor tagida qolsa, bizni kim topib, dafn etgay? dedi.
- Qordan kafan kiygaymizmi-a? dedi ikkinchi navkar.
- Hindikush deb bejiz aytmas ekanlar! Bu togʻ odamkush toqqa oʻxshaydir!

Bobur bu navkarlarning ovozidan tanib, ularning oldiga keldi.

- Mirzoquli, niyatni yaxshi qilinglar! Xudo xohlasa, bu qor qamalidan eson-omon chiqib ketgaymiz. Mamatbek, kuraklaring bormi?
- Bor! deb Tohirning samarqandlik doʻsti Mamat otining egariga tangʻib bogʻlangan kurakni Boburga olib berdi.

Bobur eniga va boʻyiga uch-toʻrt qadam keladigan joyning qorini kuray boshladi. Mamat podshohga qor kuratib, oʻzi qarab turishga uyaldi, kurakni Boburning qoʻlidan oldi:

- Bu yerda ne qilmoqchisiz, amirzodam?
- Qordan ihota yasamoqchimen. Yertoʻla qaziydilarku. Biz qortoʻla qazisak boʻlmasmikan?
- Qani, koʻraylik... E, yoʻq, qor hali juda yumshoq ekan, uvalib tushdi...
 - Yerga yetguncha qaziylik-chi! dedi Bobur.

Qorni koʻkraklari barobar qazisalar ham, kurak yerga tegmadi:

- Ob-bo, qor boʻroni bu yerga qorni uyib tashlagan boʻlsa kerak! – dedi Mamat umidsizlanib.
- Mayli, bas, dedi Bobur va Tohir qoʻrchibegini chaqirdi: Bitta kigiz bilan joynamoz keltiring!

Koʻkrak boʻyi keladigan qor devori shamolning shiddatini biroz pasaytirganday boʻldi. Ammo tepada yana qor quyun boʻlib yogʻilmoqda edi. Tohir keltirgan kigizni oyoq ostiga toʻshadilar.

Yoshlikdan sovuq suvlarda yuvinib chiniqqan, hatto muzni teshib gʻusl qilishga oʻrgangan Bobur hozir qor bilan ramziy tahorat olgan boʻldi-da:

- Tayammum! - deb qoʻydi.

Tohir esa Mirzoquli va boshqa yigitlarga murojaat qildi:

– Beharakat turaversak, sovuqda toʻngʻib tamom boʻlurmiz! Undan koʻra amirzodamga oʻxshab qorni qazib, shamolpana joylar yasaylik. Harakatlanib tursak, sovuq urmagay!

Bu gaplarga zimdan quloq solib turgan Sulton: «Koʻraylik-chi, qani bu temuriyzodaning chidami qanchaga yetarkin?» dedi oʻzicha. Bobur esa sohibqiron bobokalonidan olgan saboqlariga binoan hayotmamoti hal boʻladigan paytlarda ikki rakat namoz oʻqib, Xudodan najot tilardi.

Hozir kigiz ustiga joynamoz toʻshab namoz oʻqir ekan, egnidagi poʻstinining yelkalari, gardishli qunduz telpagi boʻralab yogʻayotgan qordan oppoq boʻlib qoldi. Sulton buni koʻrdi-yu, Bobur panalab oʻtirgan joyni boʻron tuni bilan qorga koʻmib tashlashini oʻzicha tasavvur etdi. Dilida tugun boʻlib turgan intiqom tuygʻusi: «Qoʻyib ber, – dedi, – shahid boʻlgan otam bilan akamning oldiga bu temuriyzoda ham borsin! Qor tepib charchagan odam sovuqdan karaxt boʻlib, uyqusi eltsa, keyin qaytib uygʻonmay, ertalabgacha narigi dunyoga ketadi!..»

Lekin Boburning shunday mushkul ahvolda ham oʻzini yoʻqotmay, odamlarga dalda berayotgani, keksa Qosimbekni kamarga joylab, oʻzi koʻpchilik navkarlar qatori ochiq yalanglikda qor boʻroni tagida oʻtirgani Sultondagi insof va diyonat tuygʻusini uygʻota boshladi. Ayniqsa, Boburning namoz oʻqiyotganini koʻrganda va sajdaga bosh qoʻyib, Parvardigordan najot soʻraganini eshitganda, ichki bir ovoz «Xudodan qoʻrqmaysanmi, Sulton? – deb soʻraganday boʻldi. – Axir Xudo oldida har bir odam oʻz gunohi uchun oʻzi javob beradiku. Yomon Temuriyzodalar qilgan gunohlar uchun nechun Bobur javob berishi kerak? Axir buning oʻzi senga yomonlik qilgani yoʻq-ku. Bir hafta qor tepib, senga ham yoʻl ochib kelmadimi? Yaxshilikka javoban yomonlik qilsang, keyin qasosi oʻzingga qaytmaydimi?»

Bobur namozini tugatgandan soʻng, Sulton uning oldiga keldi:

- Hazrat shoh, tuni bilan qor boʻroni ichida muzlab qolishdan qoʻrqmaysizmi?
- Nachora? Siz bizni ogohlantirgan edingiz. Dovon yoʻli chindan xatarli ekan...
- Qosimbek oʻtirgan kamarga siz nechun kirmaysiz? Axir shohlar doim toʻrda oʻtirishi kerak-ku!
- Hayot-mamot oldida shoh-u gado barobar, janob Sulton. Qosimbek keksa odam, menga otadek aziz. Men

tashqarida qolgan bu yigitlarim bilan hayotning barcha achchiq-chuchuklarini birga tatib kelmoqdamen. Qancha xavf-u xatarlarni birga boshdan kechirganmiz. Bugun ham biz oʻlim bilan yuzma-yuz turibmiz. Shunday paytda men eng qadrdon odamlarimni tashqaridagi xatar ichiga tashlab, oʻzim qaysi yuz bilan ichkarida jon saqlagaymen?

- Hazrat, men sizni faqat podshoh deb oʻylagan edim. Lekin sizda darvishlik ham bor ekan. Bu soʻzimni koʻnglingizga olmaysizmi?
- Nechun koʻngilga olay? Shohlardan koʻra darvishlarda adolat koʻproq... Axir siz ham musulmonsiz-ku.
- Alhamdulilloh muslimman. Barcha muslimlar bir-birlariga birodardirlar. Yuring, men sizga hamma odamlaringiz sigʻadigan ulkan hovalni koʻrsatay!

Bobur quvonib, tez oʻrnidan turdi-da, Tohir bilan Mamatni chaqirdi.

- Qani, janob Sulton bilan boringlar-chi, boshqa kamarlar bor emish!

Chindan ham orqasi ulkan gʻorga tutashib ketgan ikkita kamar bor ekan. Ularga tashqarida qolgan hamma odamlar kirib, tuni bilan shamolpana, quruq joyda gulxanlar yoqib isinishdi. Ertasi kuni qor boʻroni toʻxtab, havo ochilib ketdi. Kechagi kuchli shamol qorlarni uchirib, hamma oʻngir va jarlarni qorga toʻldirgan va tekislab ketgan edi. Boʻron va sovuqning shiddatidan bu qorlar shibbalanib, qalin qatqaloq hosil boʻlgan edi. Ana shu qatqaloqdan va oʻydimchuqurlarni toʻldirib, tekislagan qorning qalinligidan Sulton ustalik bilan foydalandi, Boburni barcha odamlari bilan togʻning narigi tomoniga boshlab ketdi. Yana kuni boʻyi yoʻl yurib, kerak boʻlganda qor tepib, kechki payt Yakka oʻlang¹ degan qishloqqa yetib bordilar.

¹ Oʻlang - yaylov degani.

Bu turkiyzabon qishloq odamlari:

– Osmondan tushdilaringizmi? – deb hayron qolishdi: – Umrimiz bino boʻlib, qish chillasida bu dovondan tirik oʻtib kelgan shuncha koʻp odamni koʻrmagan edik!

Yakka oʻlangliklar Bobur va Qosimbekning oyogʻi tagiga qoʻylar soʻyib, katta ziyofatlar berishdi. Bir kecha dam olganlaridan soʻng, Sulton qaytib ketishga ruxsat soʻradi.

- Bir oʻzingiz togʻdan qanday oʻtasiz? dedi Bobur.
- Kelgan yoʻlimiz hali bekilmagandir. Otlarim borku.
- Balki, biz bilan qolursiz? Mamlakatning toʻrt tomoni togʻ. Bizga sizdek yoʻl koʻrsatuvchi doim kerak.
- Taklifingiz uchun tashakkur, hazrat shoh. Men sizdek mard podshohni umrimda birinchi koʻrishim. Uyga qaytib, barcha poshoyilarga sizning toʻgʻringizda soʻzlab bermoqchiman. Xizmatingizga kelsam ham, yuz-ikki yuzta yigitlarni boshlab kelamen. Xudo hofiz! Bobur xazinachiga buyurib, Sultonga kutganidan ham ortiq mukofotlar berib joʻnatdi.

* * *

Kobulda ularni boshqa xavf-xatarlar kutmoqda edi. Fitnachilar Boburni «Hirotda qatl etilibdi» deb ovoza tarqatganlari rost ekan. Oʻratepaning sobiq hokimi Muhammad Husayn dugʻlat fitnachilarga bosh boʻlib, Boburning oʻrniga uning amakivachchasi – marhum Mahmud mirzoning yigirma yoshlik oʻgʻli Mirzoxonni Kobul podshosi, deb e'lon qilibdi. Buning xabarini Kobulda qolgan sodiq navkarlardan Muhammad Andijoniy Langari Temur degan joyda Boburga yetkazib keldi. Ma'lum boʻlishicha, Kobul qal'asini Bobur uchun berkitib turgan Mullo Bobo va Ahmad Yusuflarning ahvoli juda ogʻir. Qoʻrgʻonni

qamal qilayotgan Mirzoxon boshliq moʻgʻullarning yigirma ming odami bor, devorlarga naqb solib borut bilan portlatib oʻtishga harakat qilishyapti. Qoʻrgʻon himoyasida ikki yuztagina odam turibdi. Ularning ham zaxiralari tugab boryapti. Shu ketishda fitnachilar ketma-ket hujum qilaversa, qoʻrgʻonni bir hafta-oʻn kunda olib qoʻyishlari ehtimolga yaqin.

- Biz Langari Temurdan Kobulga toʻrt kunda yetib borgaymizmi, a, janob Qosimbek? – soʻradi Bobur.
- Ildam yursak, uch kunda ham yetgaymiz. Ammo Qandahor yoʻli bilan kelganimizda, Kobulga yana bir oyda zoʻrgʻa yetgan boʻlardik.

Muhammad Andijoniy bu gapni ma'qullab qoʻshimcha qildi:

- Fitnachilar sizlarning qish chillasida Hindikushdan oshib kelishlaringizni mutlaqo bilmaydi, amirzodam! Axir bu aql bovar qilmaydigan ish! Shuning uchun fitnachilar asosiy kuchlarini Qandarhordan keladigan yoʻl boʻylariga joylashtirganlar. Qorovullari ham Qandahor tomonda poyloqchilik qilmoqda emish. Menga buni Mullo Bobo tayinlab aytib yubordi. «Gʻazna tomondan kelmasinlar, Manor togʻi tomondan kelsinlar», deb iltimos qildi.
- Ammo janob Qosimbek, siz uzoqni koʻzlab, dovon yoʻlini tanlagan ekansiz. Men sizning haqligingizga endi astoydil tan berdim.
- Tashakkur, amirzodam. Endi hamma gap Kobulga yogʻiylar kutmagan tomondan bilintirmay borishimizga bogʻliq. Ularni gʻaflatda bosmoq kerak!

Bobur, Qosimbek, Xoʻja Kalon va boshqa ishonchli amirlar maslahatni bir joyga qoʻyishdi. Kobul qoʻrgʻonidagi Mullo Bobo boshliq sodiq kishilariga Bobur oʻz qoʻli bilan maxfiy maktub yozdi.

«Mardona boʻling, najot yaqin, Xudo xohlasa, seshanba kuni tunda biz Manor togʻida ulkan oʻt yondirgʻumizdir. Sizlar ham arkda, eski koʻshkning

ustidakim, hozir xazinadur, ulugʻ oʻt yondiringiz, toki bilgʻaymizki, bizdan xabardor boʻlibsiz...»

Muhammad Andijoniy Boburning maktubini Kobul qoʻrgʻonidagilarga vaqtida yetkazib borgan ekan. Seshanba kuni kechasi Bobur odamlari bilan Manor togʻiga yetib, Kobul qoʻrgʻoni koʻrinadigan joyda ulkan olov yondirdilar. Koʻp oʻtmay Kobul arkida xazinaning tomi ustida ham kattakon olov yaltillab koʻrindi.

Shundan keyin Bobur odamlari bilan Kobulning shimol tomonidagi Gʻurband Tangisidan sahar palla chiqib, eng avval fitnachilarning boshliqlari uxlab yotgan qasrlarga yaqinlashdilar. Tun juda sovuq, izgʻirin shamol esadi, koʻpchilik qorovullar ham shamolpana iliq joylarga kirib ketishgan. Muhammad Husayn bilan Mirzoxon gʻaflat uyqusiga yotgan paytda qoʻrgʻon ichkarisidan Mullo Bobo va Ahmad Yusuf oʻz odamlari bilan Ohanin darvozasidan qurollanib chiqdilar. Qoʻrgʻonni qamal qilib yotgan moʻgʻullarning halqasi shimol tomonda siyrak edi, chunki ular Boburning janubi-gʻarb tomondan kelishini kutmoqda edilar. Bobur shimoldagi Gʻurband tomondan, qoʻrgʻondagilar qal'a tomondan birvarakay zarba berishib, moʻgʻullar halqasini sindirib oʻtdilar.

Kobul podshosi deb e'lon qilingan Mirzoxon qoʻrgʻon tashqarisidagi hashamatli bir qasrda uxlab yotgan paytda Boburning Xoʻja Kalonbek boshliq yigitlari qasr hovlisiga tigʻyalangʻochlab kirdilar. Mirzoxonning qoʻriqchi yigitlari ham qilichlarini qindan sugʻurdilar. Qilichbozlik jangidan bir necha navkar yaralanib yiqildi. Choʻchib uygʻongan Mirzoxon:

– Bobur bostirib keldi! – degan xabarni eshitib, oʻzini yoʻqotib qoʻydi. «Oʻldiga» chiqarilgan odamning birdan tirilib kelishi Mirzoxonni shunchalik vahimaga soldiki, u tarafdorlarini toʻplab, jang qilishni xayoliga ham keltirmadi. Qantarib qoʻyilgan egarlogʻliq bir otga sapchib mindi-da, kunchiqish tomondagi togʻlarga

qarab qochdi. Buni eshitgan Bobur Yusufbek boshliq bir toʻda yigitlarni Mirzoxonning ketidan quvgʻinchi qilib yubordi. Oʻzi Bogʻi Bihisht deb ataladigan bogʻning ikki qavatlik qasriga tomon ot surib ketdi.

Fitnachilarning boshligʻi Muhammad Husayn dugʻlat shu qasrda edi. Darvozaning tomi ustida oʻtirgan qoʻriqchilar Boburga yoydan oʻq yogʻdirdilar. Oʻqlardan biri uning poʻlot dubulgʻasiga, yana biri koʻkragidagi zirhli «chor oynaga» oʻralib, qapchib ketdi. Soʻng Bobur kamondan otgan oʻqlar tom ustidagi soqchilardan birini yerga qulatdi.

Darvozani qoʻriqlab turgan otliq moʻgʻul beklari qilich yalangʻochlab, Boburga hamla qilishdi. Ulardan biri yaqin kelib, qilich urganda Bobur oʻzini qalqoni bilan toʻsdi. Soʻng fitnachining boʻyniga shunday qilich urdiki, egardan yerga uchirib, yumalatib yubordi. Yana ikkinchi, uchinchi... beshinchisini otidan qulatdi...

Qilich yalangʻochlab kelayotgan har bir dushman unga yuzma-yuz kelgan oʻlim timsoli boʻlib koʻrinardi. Yovni qilich bilan urib yiqitganda, oʻziga chang solayotgan oʻlimni bartaraf qilganday yengil tortardi.

Boburning oʻzi tigʻ bilan yovlarini urib, yiqitib kelayotganini eshitgan Muhammad Husayn dugʻlat hovliga chiqishga ham jur'at etolmadi. Xotinlarning koʻrpa-toʻshak yigʻib qoʻyiladigan xonasiga kirib, boʻgʻjamaning ichiga yashirindi.

Mehr Nigor xonim – Boburning xolasi edi. Bultur Qutlugʻ Nigor xonim olamdan oʻtgandan beri Bobur bu xolasini ona oʻrnida hurmat qilib yurardi. Boburning odamlari ichkarilarni axtarib, Muhammad Husaynni topib chiqqanlaricha Bobur shu xolasi oldida farzanddek ta'zim qilib koʻrishdi.

Toshkentda xon boʻlgan marhum Mahmudxonning onasi Shohbegim ham shu qasrda ekan. Boburga oʻgay boʻlsa ham, harqalay momo hisoblangan Shohbegim

toʻsatdan paydo boʻlib qolgan Bobur oldida sarosima boʻlib, duduqlanib biron soʻz ayta olmadi. Bobur uning ham hurmatini joyiga qoʻyib, ta'zim-u tavoze bilan soʻrashdi.

Ichkaridan ikki yigit qoʻltigʻidan mahkam ushlab olib chiqqan Muhammad Husayn esa:

- Menda ne ayb?! deb peshgirlik qildi.
- Sizda ayb boʻlmasa nechun mendan qochib toʻshakxonaga bekindingiz? soʻradi Bobur.
 - Qilich yalongʻochlab kirganlardan qoʻrqdim, rost!
- Ammo mening oʻrnimga Mirzoxonni podshoh koʻtarganda Xudodan qoʻrqmadingizmi? Bir podshohga qarshi fitna uyushtirib, boshqa podshohni taxtga chiqarish davlat toʻntarishi ekanini bilmasmisiz? Bunday xiyonatlar uchun eng ogʻir jazolar berilishi, tanasi pora-pora qilinib, ming qiynoqlar ichida qatl etilishi sizga ma'lum emasmidi?!
- Meni... moʻgʻul beklari yoʻldan urdilar!.. Kechiring, amirzodam, kechiring deb Muhammad Husayn hoʻngrab, yigʻlay boshladi va Boburning oyogʻi ostiga oʻzini tashladi.

Soqoliga oq tushgan bu odamning Oʻratepadagi uyida Bobur koʻp marta mehmon boʻlgan, uning oʻgʻillari bilan birga oʻsgan edi. Ayniqsa, Muhammad Husaynning kichik oʻgʻli Haydar Mirzo Boburga juda mehribon, zehni oʻtkir, yetti-sakkiz yoshdayoq kitob oʻqib, she'r aytadigan zakovatli bola edi¹.

Mehr Nigor xonim ham, Shohbegim ham Muhammad Husaynning shu bolalarini oʻrtaga solib, Boburdan shafoat soʻradilar. Bobur Muhammad Husaynga nafrat bilan koʻz tashlab dedi:

– Mana shu onalar-u begunoh bolalar hurmati... Men sizning qoningizdan kechdim... Ammo endi

¹ Kelajakda Muhammad Haydar Mirzo Bobur tarbiyasini olib, ulkan adib boʻlib yetishadi va mashhur «Tarixi Rashidiy» kitobini yaratadi.

siz bilan oramiz uzildi... Koʻchingizni olib, mening qalamrovimdan chiqib keting! Tamom!

Bobur bu yerdan otlanib chiqqanda, fitnachi qoʻshinlar Kobul qoʻrgʻonining atroflarini tark etib, togʻlarga qarab chekinmoqda edi. Qamal paytida qoʻrgʻonni ajdahoday oʻrab yotgan minglab moʻgʻul askarlari endi oʻz sardorlaridan ajralib, boshi kesilgan ilondek talvasa ichida goʻyo dumalab ketmoqda edi.

Mirzoxonning ketidan yuborilgan quvgʻinchilar uni Qargʻa Buloq degan joydan tutib olib, arkda devonxonada oʻtirgan Boburning oldiga olib kirdilar. Yengil kiyingan Mirzoxon sovuqda diydirab, koʻkarib ketgan. Boburga egilib ta'zim qilayotganda, yerga gursillab yiqilib tushdi. Yigitlar uni oʻrnidan turgʻizdilar. Yigʻlab iltijo qildi:

- Meni afv eting, hazratim! Siz mening yagona podshohimsiz!
- Ammo oʻzingizni ham podshoh deb e'lon qilibdilarku!
- Meni aldadilar! «Temuriylardan Kobulda faqat Siz qolgansiz, – dedilar. – Bobur mirzo qaytib kelguncha elga bosh boʻlib turing», deb koʻndirdilar! Mana, Xudoga shukr, eson-omon qaytib kelibsiz!
- Bizga peshvoz chiqib kutib olish oʻrniga, nechun toqqa qarab qochdingiz?
- Xom sut emgan banda, vahimaga berilibmen! Ammo men moʻgʻul bek-u navkarlaridan himoya istab qochganim yoʻq. Sizning huzuringizga jang tugagandan soʻng qaytmoqchi edim. Bobur uchun ham Mirzoxonning moʻgʻul beklari tomonga qochib ketmagani yaxshilik alomati edi. Agar Mirzoxon ular tomonga oʻtib ketganda, ikki oradagi urush uzoq davom etishi, yana koʻp behuda qonlar toʻkilishi mumkin edi.
- Men sizning qahramonligingizga tan berib, tiz choʻkurmen, hazratim! deb Mirzoxon yana yukundi.

– Sizda Sohibqiron bobokalonimizning qilichi borligini bilurmen! Bu qilichga «Kuch-adolatdadir» degan muqaddas yozuv bitilganini oʻzingiz menga aytgan edingiz. Bugun siz ana shu qilich bilan bahodirona jang qilib, gʻalabaga erishdingiz. Chindan ham, kuch – adolatda ekaniga men endi astoydil imon keltirdim! Buyuring, toki umrim boricha sizga xizmat qilay!

Bobur Mirzoxonga oʻng tomonidan joy koʻrsatdi.

- Sharbat keltirilsin! - deb buyurdi.

Savdarboshi oltin kosada keltirgan sharbatdan Bobur avval oʻzi ichdi-yu, keyin Mirzoxonga berdi.

- Hozir Kobulda Temuriylardan faqat ikkimiz qoldik, dedi Bobur. Bu moʻgʻullar azaldan Temuriylar bilan olishib kelurlar. Qunduzda Shayboniyxonning qoʻshini turibdir. Ora yaqin. Kobulda xonning josuslari yolgʻon ovozalar tarqatib, meni ataylab «oʻldiga» chiqargan boʻlsalar kerak.
- Bu rost! Qunduz hokimi Qambarbiy Kobuldagi moʻgʻul beklari bilan til biriktirganini men ham sezdim.
 - Kimlar oʻsha til biriktirgan beklar?

Mirzoxon bir necha moʻgʻul beklarining nomlarini aytdi.

- Ana shularni siz bizga tutib berishingiz kerak!
 dedi Bobur.
 Boʻlmasa bular yana paytini topib, siz bilan meni Shayboniyxonga sotgaylar!
- Kemaga tushganning joni bir, hazratim! Men to oʻlgunimcha Temuriylar kemasida sobit turgaymen! Agar oʻlimga buyursangiz ham soʻz qaytarmay borurmen!

Mirzoxon devqomat yovqur yigit edi, uning tomirida ona tomondan bobokaloni Iskandar Zulqarnayn qoni ham borligiga Boburning ishongisi kelardi.

- Sizni oʻlimga buyurmoqchi emasmen. Mirzoxon, balki hamkorlikka chorlamoqchimen!..
- Jon-u tanim, butun borligʻim bilan hamkoringiz boʻlurmen, hazratim!

Mirzoxon shu soʻzining ustidan chiqib, Bobur buyurgan barcha ishlarni sidqidil bilan ado etadigan boʻldi.

Muhammad Husayn dugʻlat esa koʻch-koʻronini tuya va otlarga ortib, joʻnab ketdi va Murgʻob boʻylarida Shayboniyxonga borib qoʻshildi. Ammo oʻrgangan koʻngil oʻrtansa qoʻymas, deganlaridek, oʻsha yerda ham fisq-u fasod ishlarga bosh qoʻshgani uchun Shayboniyxon tomonidan oʻldirildi.

Oʻsha qish Bobur koʻrsatgan mardlik va dovyuraklikning mukofoti shu boʻldiki, Qosimbek Hirot chorbogʻida uchragan goʻzal qizni izlab topdi. Bobur Kobulda katta toʻy qilib, Mohim bonu ismli bu olov qizga uylandi va oradan bir yil oʻtar-oʻtmas undan ajoyib oʻgʻil koʻrdi. Baxtli istiqbol orzusi bilan bu toʻngʻich oʻgʻilni Humoyun deb atadilar.

HIROT, MARV

PAYMONASI TO'LGANLAR

1

Hirot atroflarida qish osoyishta oʻtdi-yu, avji bahor kunlarida Shayboniyxon ellik ming qoʻshin bilan Murgʻob daryosidan oʻtib, Xurosonga bostirib kirdi. Badiuzzamon mirzo bilan Muzaffar mirzo Hirotning shimolida Qorarabot va Tarnob degan joylarda ikki boʻlak qoʻshin, ikki alohida sarkarda bilan lanj bir ahvolda oʻtirgan edilar.

Shayboniyxonning Ubaydulla Sulton va Temur Sulton boshliq otliq askarlari bu ikki qoʻshinning orasiga tigʻday yorib kirdi-yu, kuchli bir zarba bilan ikki podshohni ikki tomonga uloqtirib tashladi. Mirzolar koʻpchilik bek va navkarlari bilan tumtaraqay boʻlib qochdilar. Faqat Zunnunbek argʻun oʻzining Hizabrulla boʻlishiga va Shayboniyxonning qilichini sindirishiga hali ham ishongani uchun bir necha yuz navkarini xon qoʻshini qarshisiga boshlab chiqib, oxirgi nafasi qolguncha olishdi. Ubaydulla Sultonning otliqlari hayal oʻtmay uni egardan urib tushirdilar, boshini kesib nayzaga sanchdilar-u Shayboniyxon mingan otning oyogʻi tagiga eltib tashladilar.

Jang maydonidan halloslab qochgan Badiuzzamon mirzo Hirotga hammadan oldin yetib keldi, ammo shahar ichiga kirmadi. Bogʻi Jahonoroda bir necha soat toʻxtab, otlariga dam berdi-yu, oltin-kumush va javohirlaridan koʻtarganicha oldi. Uning xotin-bolalari shahar ichida – arkda edi. Orqadan quvib kelayotgan yov tahlikasidan qoʻrqqan Badiuzzamon mirzo shahar dorugʻasini chaqirib, qal'a darvozalarini bekitib

olishni buyurdi. «Qamalda qolishdan qoʻrqmanglar, biz Qandahor tomondan qoʻshin toʻplab kelib, sizlarni xalos qilurmiz», degan quruq va'da bilan xotinlari va bolalarini qoʻrgʻon ichida qoldirib, oʻzi Janubga qarab shoshildi.

Hirotga kechasi yetib kelgan Muzaffar mirzo, hatto yengilish va qochishda ham akasi bilan musobaqalashgan kabi ish qildi. U ham shahar tashqarisidagi Bogʻi Safidda bir necha soat toʻxtab, nafasini rostlagach, eng kerakli narsalarini oldi-yu, yov yetib kelib qolishidan qoʻrqib, arkka kirmadi, onasi va xotinlarini qal'a ichida qoldirib, darvozalarni bekitishni buyurdi, u ham «Qamalda qolsalaring oʻzim kelib qutqaramen!» deganicha Astrobodga qarab qochdi.

Mirzolarni kutganidan ham oson yenggan Shayboniyxon shahardan oʻn besh chaqirimcha Sharqdagi Qahdiston degan xushhavo oʻtloqqa tushib, shohona chodirlarini tiktirdi.

Xadicha begim Hirotda bor a'yonlar va qoʻriqchi askar sarkardalarni toʻplab, qoʻrgʻon darvozalarini bekitishga urinib koʻrdi. Ammo ikki ogʻa-ini podshodan birontasi Hirot mudofaasiga bosh boʻlmasdan qochib ketganligi hammaning ruhiga yomon ta'sir qilgan, qamal azobini hech kim zimmasiga olishni istamas edi. Xonning gʻazabida qolmaslik uchun Hirotni unga jangsiz topshirishni ma'qul koʻruvchilar koʻp edi. Axiri Hirot shayxulislomi Taftazani bir necha nufuzli kishilarni yoniga olib, Hirot shahrining kalitlarini qimmatbaho sovgʻa-salomlar bilan birga xonga eltib topshirdi.

Qahdistonning orombaxsh bahor havosida ulkan gʻalabadan ta'bi ochilib yurgan Shayboniyxon endi jozibali bir ayol bilan qovushgisi kelar edi. U Hirotning eng ta'rifi ketgan goʻzal juvoni – Muzaffar mirzoning yigirma yoshlik suyukli xotini Qorakoʻz begim deb eshitgan edi. Toshkentda va Andijonda

Qorako'z begim deb ot chiqargan qiz-juvonlar qanchalik chirovlik boʻlganini xon yaxshi bilar edi. Hirotlik Oorako'z begimning asl nomi boshqa bo'lsa ham qora koʻzli goʻzallar orasida eng chiroylisi boʻlgani uchun el orasida shu ism bilan tanilgan edi. Shayboniyxon doimiy odatini qilib, bu juvonga gʻoyibona oshiq boʻlgani haqida qisqa bir gʻazal yozdiyu, shoir Muhammad Solihni oraga qo'yib, she'rini begimga vetkazdirdi. Muzaffar mirzo nomardlik qilib xotinlarini tashlab ketganidan qahri kelgan Oorako'z begim xonning g'azalini xush qabul qildi. Xadicha begim boshliq boshqa kelinlar Hirotning eng mustahkam istehkomi bo'lgan Ixtiyoriddin qal'asiga kirib bekinganlarida, Qorakoʻz begim ulardan ajralib qoldi va otasining shahar tashqarisidagi chorbogʻiga ketdi. Keyin begimni hammomda yuvintirishib, kelinlarday yasantirishdi-yu, xon yuborgan shohona mahofaga solishib Oahdistonga olib ketishdi. Kechki payt Hirotning shayxulislomi va qozisi xon qarorgohiga chagirildi.

Bugun odatdagidan yoshroq koʻrinayotgan Shayboniyxon shariat peshvolarini mahfuri gilam toʻshalgan borgohda qabul qildi. Xonning yonida turgan mullo Abdurahim Qorakoʻz begimni bugun imomi zamonga nikohlash haqida gap ochdi.

- Bugunmi? - deb shayxulislom qoziga sarosima boʻlib koʻz tashladi. Qozi bu qarashning ma'nosini tushundi.

Qorakoʻz begim Muzaffar mirzoning nikohida edi. Erining tashlab ketganiga besh kun ham boʻlgani yoʻq. Holbuki, bir musulmonning nikohidagi xotinning iddasi boʻladi, uch oy oʻtmaguncha boshqa kishiga nikohlash mumkin emas. Shariat buni qat'iyan man qilgan!

Shayxulislom xonning oyogʻi tagidagi gilamni oʻpib, shu toʻgʻrida gap boshlagan edi, xon uning soʻzini kesdi: - Shariatni bizga oʻrgatmang! Begimning hezalak eri bundan toʻrt oy oldin uch taloq qoʻygan. Siz uch oy deysiz! Begim toʻrt oy boshi ochiq yurgan! Nahotki, siz, shariat peshvolari bundan bexabarsiz?!

Xonning qahridan qoʻrqib ketgan shayxulislom oppoq soqolini mahfuri¹ gilamga surkab, yana yer oʻpdi.

- Xabardormiz, hazratim!
- Xabardormiz! dedi qozi ham gilamni oʻpib. Ular Muzaffar mirzoning bundan toʻrt oy burun achchiq ustida xotinini uch taloq qoʻyganini bilar edilar. Biroq keyin mirzo xotini bilan yana yarashganda, shayxulislom bilan qozi begimni eriga qaytadan nikohlab bergan edilar. Lekin begimning avvalgi yosh eri tilga olinganidan rashki kelib, sabr kosasi toʻlib turgan xonga buni aytish oʻlimni boʻyniga olish bilan barobar edi.

Shariat peshvolari endi bu toʻgʻrida «churq» etmasdan nikoh oʻqishga hozirlandilar...

* * *

Sallasiga la'l va gavhar bilan birga ukpar ham qadalgan Shayboniyxon kechasi begimning xobgohiga shahdam qadamlar bilan kirib ketdi. Xobgohning tashqi boʻlmasida xonning haramiga qaraydigan keksa beka, ikki bichilgan habash qul va begimga ergashib kelgan ikki kaniz navbatchilik qilib qolishdi.

Bir vaqt xobgoh eshigi shaxt bilan ochildi-yu, yelvagay toʻn kiygan, boshidagi oq shabpoʻshi² bir yonga ogʻib ketgan Shayboniyxon chiqib keldi. Uning rang-quti oʻchgan, lablari pirpiraydi.

¹ Mahfuri – gullariga she'riy baytlar qoʻshib toʻqilgan nodir ipak gilam.

² Shabpoʻsh – kechasi kiyib yotiladigan doʻppisimon yengil bosh kiyimi.

- Behayo ekan! Buzilib ketgan ekan! Bezbet!

Haram bekasi begimning kanizlari bilan birga shosha-pisha ichkariga kirdilar. Toʻshak chetida yuzini qoʻllari bilan bekitib olgan goʻzal juvon yelkalari silkinib, piq-piq yigʻlar edi. Ma'lum boʻlishicha, Qorakoʻz begim Hirotning soʻnggi podsholari yaxshi koʻradigan va oliy tabaqa ayollari «gʻalvira» deb ot qoʻygan shoʻx bir qiliq qiladi. Bu bilan u ellik olti yoshlik xonni qoyil qilmoqchi, balki uning ilhomini oshirmoqchi boʻladi. Biroq koʻp marta uylangan, qancha qiz-juvonlar bilan bir yostiqqa bosh qoʻygan xon umrida bunday qiliqlarni koʻrmagan ekan. U avval sarosimaga tushadi, keyin Qorakoʻz begimning avvalgi yosh erini eslaydi. Begim bunday qiliqlarni avvalgi eriga ham qilganlarini koʻz oldiga keltiradi-yu, hafsalasi birdan pir boʻladi va soʻkinib oʻrnidan turib ketadi.

Begim bu shoʻxlikni xonga yoqish uchungina qilganini, Hirot asilzodalari orasida bu joiz ekanini kanizlar haram bekasiga tushuntirdilar. Begimga rahmi kelgan haram bekasi xonning oldiga chiqib, uni jahlidan tushirishga tirishdi:

- Hazratim, ayb faqat bu begimda emas! Ayb unga shu qiliqni oʻrgatganlarda! Hirotda behayolar koʻp ekan.
- Bu shahar dindan qaytgan rofiziylar¹ uyasi!dedi xon ham endi gʻazabini boshqa tomonga yoʻnaltirib.
 Bu juvonning qaynonasi Xadicha begim
 bezbetlarning eng kattasi! Eng avval oʻshani tutib jazosini berish kerak.

Shayboniyxon xobgohga qaytib kirmadi. Qorakoʻz begimni tavfiq va hayo yoʻliga qaytarishni haram bekasi bilan habash qullarga topshirdi-yu, oʻzi borgohga joy soldirib yotdi. Ammo tong otguncha uxlay olmadi.

Ertalab azonda borgohdan hirgohga oʻtdi-yu, lashkarboshilardan Ubaydulla Sultonni, mulozimlardan

¹ Rofiziylar – islomning sunniy mazhabidan shia mazhabiga oʻtganlar va umuman, musulmonchilikdan chiqqanlar.

Muhammad Solihni, mavlono Binoiyni va Mansur baxshini chaqirtirdi. Eng avval jiyani Ubaydulla Sultonni soʻroqqa tutdi:

- Ixtiyoriddin qal'asi olindimi, yoʻqmi?
- Xon hazratlari, bugun-erta oling'usidir!
- Bitta buzuq xotin bekitib yotgan qal'ani shuncha lashkar bilan haligacha ololmaysan! Yo oʻzim borib olaymi?

Xonga kechasi bir balo boʻlganini hamma sezdi. Yigirma yoshli devqomat Ubaydulla Sulton ulkan gavdasini egib, xonga ikki bukilib ta'zim qildi:

- Hazratim, qal'ani shu bugun olamiz. Hozir men oʻzim borib, hamla qilamen!
- Hamla qilamen deb, lashkaring dehqonlarning ekinini toptab ketibdi. Biz Hirotga mehmon boʻlib kelganimiz yoʻq. Dehqonning hosili oʻzimizga kerak! Bogʻlarni ham ot bosmasin! Mevasini oʻzing yeysan! Sen temuriyzodalarning urugʻini qurit! Oʻshalarga xizmat qilib quturgan shialarni bos!
- Barcha aytganlaringizni bajo keltiramiz, hazratim! Ubaydulla Sulton ketishga chogʻlandi. Shunda Shayboniyxon:
- Agar qal'ani bugun oladigan boʻlsang, Mansur baxshini ham olib ket! dedi. Bu baxshi yana boʻydoq yuribdi. Bunga xotin chidamaydi. Xadicha begim shunga oʻxshagan zoʻr bir er topolmay yurgan emish. Qal'ani olsang, oʻsha xotinni Mansur baxshiga nikohlab berasan!

Semirib, avvalgidan battar yoʻgʻonlashib ketgan oʻtovday katta Mansur baxshi:

- Aynalayin sizdan, xon hazratlari! dedi. Samarqandda nikohlab bergan Zuhra begimingiz oʻlgandan beri soʻqqaboshlik jonimga tegib yurgan edi!
- Lekin sen baxshi hadeb nafsingni oʻylay berma!
 dedi xon. Hirotning eng katta boyliklari Xadicha begimning qoʻlida. Menga axboroti kelgan, bu xotin

oltindan gul yasatgan emish, barglari zumraddan emish. Gulga qoʻnib turgan bulbulning ogʻzida gavhari bor emish.

– Xon hazratlari, bunisini men sizga toptirib beraman! – dedi Mansur baxshi. – Xazinasi ham sizniki! Menga oʻzi boʻlsa bas!

Bu shoʻx gaplardan keyin Shayboniyxonning chehrasi sal ochildi-yu, Ubaydulla Sulton bilan Mansur baxshiga ketish uchun ruxsat berdi. Muhammad Solih bilan mavlono Binoiy xon qarshisida hamon qoʻl qovushtirib, oyoq ustida sukut saqlab turishardi. Qizil kimxob koʻrpacha ustida chordana qurib oʻtirgan xon Muhammad Solihga qarab:

Sen, shoir, nuqul Hirotni maqtar eding, - dedi.
Hiroting hayosini yoʻqotgan betavfiqlarning uyasi ekan-ku!

Muhammad Solih xonning boshiga kechasi qanday hangoma tushganini allaqachon payqagan edi. Shayboniyxon hozir keksalik zaifligiga chora topolmay alami kelayotgani ham sezilib turardi.

Muhammad Solih uning yarasiga tuz sepmaslik uchun gapni boshqa yoqqa burdi:

- Hazratim! Hirotning axloqini Temuriylar buzgan. Siz Temuriylarni jangda jismonan yengdingiz, endi ularni ma'nan yengmoqdasiz! Imomi zamonamizning axloqiy pokliklari hirotliklarga ibrat boʻlmogʻi kerak.
- Gapga chechansen! Lekin Hirotning axloqini shoirlar ham buzganini nega aytmaysen! Temuriylarni maqtab, behayo she'rlar yozib, lagan-lagan oltin olgan shoirlaring boʻlmagʻanmi?
- Boʻlgan, xon hazratlari. Mana mavlono Binoiyni Hirotdan ana oʻshanaqa shoirlar ketkizib yuborgan!

Shayboniyxon mavlono Binoiyga yuzlandi:

- Shundaymi?
- Shundoq, hazratim! dedi Binoiy ta'zim bilan.

– Unday boʻlsa mavlono Binoiy adolat qilichini beliga taqib, yomon shoirlardan qasdini olsin! – dedi xon. – Bizning gʻolib navkarlarimizdan ellik-oltmishtasini mavlononing ixtiyoriga bering. Temuriylarning oltinidan quturib yurgan shoirlarning mol-u mulki musodara qilinsin! Barcha oltinlarini tortib olib, xazinaga topshiring! Keyin bu shoirlarning koʻzi ochilib, tavfiq-u hayo yoʻliga qaytishi oson boʻladi!

Mavlono Binoiy bezovtalanib, Muhammad Solihga qaradi. U bir vaqtlar oʻziga alam oʻtkazgan ba'zi Hirot shoirlarini har qancha yomon koʻrsa ham, lekin yoniga askar olib, birovlarning uyini tintishni, mol-u mulkini musodara qilishni oʻziga munosib koʻrmas edi. Biroq buni xonga roʻyi-rost aytish ham mumkin emas edi.

- Hazratim, shunday ulugʻ vazifani faqirga ishonib topshirmoq niyatingizdan sarafrozmen!.. Faqat bir andisham bor.
 - Xo'sh?
- Hazratim, men umrimda qilich chopmagan keksa odammen. Yoshim ellikdan oshgan. Bu farmoni oliyni jangovar bek shoir Muhammad Solih janoblari faqirdan yuz hissa yaxshi bajarurlar! Faqir bu janobga kuchim yetganicha yordam beray!

Muhammad Solih bu ishni oʻziga yoʻlatgisi kelmadi.

- Mavlono, men Hirot shoirlarini sizchalik yaxshi bilmaymen!

Buyrugʻi sansalor boʻlayotganini sezgan Shayboniyxon, koʻzlari tahdidli yaltirab, Binoiyga tikildi.

– Ot in'om qildik – mindingiz. Toʻn in'om qildik-kiydingiz. Ulufa berdik – yoʻq demadingiz. Endi ish buyursak, yoʻq deysizmi?!

Boshqa e'tirozga oʻrin qolmadi. Olti yildan beri xon xizmatida yurgan Binoiy uning hozirgi buyrugʻini bajarishga majbur edi... * * *

Shayboniyxonning oʻng qoʻl vaziri - oltmish besh voshlik mulla Abdurahim Hirot allomalaridan oltin undirishning boshqa bir yoʻlini oʻylab topdi. Hirot atroflaridan gʻoliblarning qoʻliga tushgan oʻljalar orasida suruv-suruv qoʻvlar ham bor edi. Mulla Abdurahim shu qoʻylardan oltmishtasini Hirotning Qipchoq darvozasi tashqarisidagi bozorga haydab tushishni xizmatkorlariga buyurdi. Soʻng shaharga bir toʻp navkar yuborib, Temuriylar davrida mashhur boʻlgan Xondamirni, Boburga yaqinligi bilan tanilgan mavlono Fazliddinni, Husavn Bovqaroga atab she'rlar vozgan «koʻksa» laqablik shoir Sulton Muhammadni, vana shularga oʻxshash besh-olti kishini qoʻy bozoriga majburan olib keltirdi. Keyin mulla Abdurahimning oʻzi ham bir toʻp mulozimlari bilan bozorga oʻynogi bir argʻumogni minib kirib keldi. Mulozimlardan biri piyoda qoʻl qovushtirib turgan Xondamirga va uning hamrohlariga shunday dedi:

- Sudurlar sadri Nizomiddin Abdurahim hazratlari oʻzlarining bu qoʻylarini faqat sizlarga sotmoqchilar!

Xondamir sheriklariga: «Shu bilan qutulsak koshki!» deganday qilib qaradi-yu, keyin sudurlar sadriga ta'zim qildi:

- Bajonidil olurmiz. Narxini aytsinlar.

Mulozim ovoziga tantanali tus berib dedi:

– Bu qoʻylar – sudurlar sadrining nafasi tekkan tabarruk qoʻylardir. Sizlar Temuriylar xizmatida haromxoʻrlikka oʻrganib, buzilib ketgan odamsizlar. Bu qoʻylarni soʻyib, yeb halqumlaringni poklashlaring kerak. Shuning uchun qoʻylardan har birining narxi olti yuz dinor!

Olti yuz dinorga bitta emas, yetti-sakkizta qoʻy olish mumkin edi. Biroq qoʻylarni sudurlar sadri aytgan narxda olmaslik – uning gʻazabiga uchrash va shafqatsiz jazoga giriftor boʻlish demak edi.

Puldan qiynalibroq yurgan mavlono Fazliddin bezovtalanib soʻradi:

– Janoblar, yaqinda moli omon ham toʻlagan edikku!

Shoir Muhammad Sulton istehzoli kulimsiradi:

– Mavlono, bu noyob qoʻylarga hazratimizning muborak nazarlari tushgan ekan. Shuning uchun endi bu moli omon emas, balki moli imondir!

Mulla Abdurahim istehzoni payqab, qahri keldi va navkarlariga buyurdi:

– Bularning har biriga qoʻylardan oʻnta-oʻnta qoʻshaloqlab beringlar! Bularni Temuriylarning oltini quturtirgan! Hammasining dimogʻi juda baland! Bularni osmondan yerga tushirib qoʻyish kerak. Qoʻylarni uylarigacha oʻzlari haydab ketsin! Hech kim haydashmasin! Uylarigacha kuzatib borib, pulini undirib kelinglar. Qaysi biri buyruqni bajarmasa, mol-u mulkini musodara qilib, oʻzini zindonga tashlanglar!

Navkarlar buyruqni bajarishga kirishdilar.

Hirotda koʻpchilik taniydigan shoir, olim va me'mor issiq kunda halpillab, sertuproq, serchang koʻchalardan qoʻy haydab ketdilar. Keyin bu «tabarruk» qoʻylarning pulini qarz havola qilib boʻlsa ham, toʻlab qutuldilar.

2

Ubaydulla Sultonning bir yarim ming navkari oʻn kundan beri Ixtiyoriddin qal'asining atrofida gʻivirlar, ammo oʻq ham, shoti ham yetmaydigan balandlikdagi qal'ani olishning hech ilojini topolmas edi. Temir darvozalarga toʻpdan oʻq otib koʻrishdi, boʻlmadi. Keyin yer tagidan gʻor qazishga tushishdi.

Shuni hisobga olmaganda, Hirot hozir bir qadar tinchib bormoqda edi. Musodara qilinadigan xazinalar boʻshab qolgan, talanadigan mol-u mulklar talanib boʻlgan edi. Shayboniyxon Qahdistondan Bogʻi Jahonoroga koʻchib kelib, Hirotning mashhur san'atkorlarini oʻz huzuriga chaqirtirdi. San'at ishlarini boshqarayotgan Muhammad Solih vositachi boʻlib, Behzodni xon bilan bir-ikki marta uchrashtirdi. Xonning maslahatgoʻyi mulla Abdurahim rasm chizishni shialar va rofiziylarning ishi deb yomon koʻrsa ham Shayboniyxon Behzodning rasmlari Husayn Boyqaroni qanchalik mashhur qilganini bilar, endi bu musavvirning iste'dodidan oʻz shuhrati uchun foydalanishni istar edi. Behzodga Shayboniyxonning rasmini chizish topshirildi.

Musavvirning iltimosi bilan xonni qip-qizil kimxob koʻrpa ustiga oʻtqazdilar, uning orqasiga qora baxmal bolish qoʻydilar, beliga ingichka oltin kamar bogʻlatdilar, oldiga oltin muqovali kichik daftar, qalam va siyohdon qoʻydilar. Oʻttiz yildan beri rassomlik qilib yurib, koʻpgina podshohlarni koʻrgan va ular bilan muomala qilishni yaxshi biladigan Behzod Shayboniyxonga ham faqat maqtov yoqishini allaqachon payqagan edi:

- Hazratimni argʻumoq ot ustida qilich yalangʻochlagan paytlarida tasvirlashim mumkin. Biroq hozir sizning eng zoʻr lashkarboshi ekanligingiz hammaga ayon. Ammo olam ahli sizning koʻp yil madrasalarda oʻqigan fozil imomi zamon ekanligingizni ham suratda koʻrmogʻi kerak. Shu sababli faqir sizni muqaddas kitob-u oltin qalam bilan tasvir etmoqchimen!
 - Ma'qul, deb xon bunga rozilik berdi.

Surat tayyor boʻlgandan keyin Shayboniyxon, Muhammad Solih va boshqa bir necha mulozimlar Behzod ishlagan xonaga toʻplandilar. Mulla Abdurahim rasmga, soʻng xonga qaradi-yu, hayron boʻlib: - Hazratimning xuddi oʻzlari-ya! - dedi.

Suratda Shayboniyxonning koʻpni koʻrgan tajribali odam ekanligi koʻzga aniq tashlanib turardi. Boʻyoqlar Behzodga xos ulugʻ bir mahorat bilan xillangan edi. Oddiy odam rasmdan hech bir kamchilik topolmas, Behzod xonni izzat-ikrom bilan tasvirlabdi, deb oʻylar edi. Lekin Muhammad Solih xonning tagidagi koʻrpaning rangi qip-qizil qon rangida ekanini sezdi. Xon koʻrpa ustida emas, goʻyo qon daryosi ustida oʻtirganga oʻxshardi. Xonning beliga bogʻlangan ingichka oltin kamarning uchi chalmashgan oyoqlar tagidan xuddi qoramtir boshli sariq ilonga oʻxshab buralib turar edi. Xon suyangan qora bolish ham qora kuchlarning timsoliga oʻxshardi.

Shayboniyxonning barcha ishlaridan xabardor Behzod bu yashirin ramziy boʻyoqlar bilan nimalar demoqchi boʻlganini Muhammad Solih payqadi-yu, qoʻrqib ketdi. Agar u sezgan ma'noni xon sezib qolsa, Behzod ham omon qolmaydi, orada vositachi boʻlgan Muhammad Solih ham! Shuning uchun u suratga xomush tikilib turgan Shayboniyxonning fikrini xatarli ramziy ma'nodan uzoqroq olib ketishga intildi:

- Muhammad alayhissalom yashil rangni yaxshi koʻrar ekanlar. Imomi zamon xon hazratlari ham yashil rangni suyishlarini musavvir durust payqabdir. Qarang, hazratimning koʻylaklari yashil rangda. Suyangan devorlari ham yashil.
- Bunisi ma'qul, deb xon endi ogʻzini ochdi. Lekin... biz mavlono Behzodning boshqa suratlarini ham koʻrgan edik...

Shayboniyxon Behzod tasviridagi shertaxlit Husayn Boyqaroni esladi. Husayn Boyqaroning safarga chiqqan paytini tasvir etgan boshqa bir rasmda goʻyo bulutlar ham, osmon ham, hatto togʻ-u toshlar ham podshoning ketidan ergashib, u ketayotgan tomonga intilib borayotganday koʻrsatilgan edi. Temuriylarni

bunchalik ulugʻlagan Behzod Shayboniyxonni joʻn bir odam qilib tasvirlaganga oʻxshardi. Xon suratni koʻrganda koʻnglida qoʻzgʻalgan murakkab tuygʻularni aytishga munosib soʻz topolmadi-yu, Behzodga qarab:

- Moʻyqalamni menga bering! - dedi.

Xonning avzoyi yomonligini hamma sezdi. Behzod maxsus qalamdonda turli boʻyoqlar bilan birga turgan moʻyqalamlarni xonga ta'zim bilan tutdi. Shayboniyxon qoramtir qoʻngʻir boʻyoqqa botirib qoʻyilgan moʻyqalamni oldi. U Buxoroda madrasada oʻqib yurgan paytlarida surat chizishni ham ancha mashq qilgan, moʻyqalam tutishni sal-pal bilar edi. Behzod chizgan suratda Shayboniyxonning soqol-moʻylovi haddan tashqari qisqa va siyrak koʻrsatilgan, xonning nazarida, tasvir shuning uchun joʻnlashib ketganga oʻxshardi.

- Soqolni durustroq chizmoq kerak! deb Shayboniyxon oʻzining suratida - quloq yaqinida juda siyrak koʻrsatilgan soqolni biroz qalinlashtirmoqchi boʻldi. Ammo moʻyqalamda boʻyoq koʻproq ekan, quloq oldidagi soqol birdan kigizday qalinlashib ketdi. Behzod sogʻ tishi sugʻurib olinayotgan odamday:
 - Ih! dedi.

Ammo Muhammad Solih Behzodning bilagini ma'nodor qilib qisdi-yu:

- O! O! Hazratim moʻyqalam tekkizishlari bilan suratga yana fayz kirdi! - dedi.

U Behzodni falokatdan faqat xonni maqtab qutqarish mumkin ekanligini sezib, shunday demoqda edi, buni Behzodga ham sezdirgisi kelib:

 Mavlono, tarixiy bir hodisa yuz berdi! - dedi. Siz chizgan suratga imomi zamon, Iskandari soniy oʻz muborak qoʻllarini tekkizdilar! Buni odamlar asrlar davomida bir-birlariga aytib yurgaylar!

Behzod xonning qilgan ishini - san'atkorga ahmoqona xoʻjayinlik qilishning namunasi deb bilmoqda edi. «Shu ma'noda chindan ham buni

tarix unutmas, odamlar bir-birlariga kulib aytib yururlar», degan fikr Behzodning xayoliga endi keldi. Muhammad Solih rasmdagi ramziy ma'noni allaqachon payqaganini, endi xondan baloga qolmaslik uchun ataylab shu gaplarni aytayotganini Behzod tushundi-yu, ichki bir istehzo bilan xonga ta'zim qildi:

- Qulingiz chizgan suratga xalifayi zamonamizning nazarlari tushganidan boshim koʻkka etdi!
 - Barakalla! deb xon uni endi maqtadi.

Xonning qoʻli bilan chaplangan soqol quloq yaqiniga yopishtirib qoʻyilgan poʻstak parchasiga oʻxshar edi. Behzod ichida: «Battar boʻlsin!» dedi-yu, xon bu soqolni qanday xunuk chaplagan boʻlsa, shundayligicha qoldirdi.

3

Xadicha begim kirib bekingan Ixtiyoriddin qal'asi Ubaydulla Sultonni oʻn etti kun ovora qildi. Nihoyat, qal'a devorining otbozoriga tutashgan nochorroq bir joyini tagidan kavlab, naqb solib¹ buzib kirdilar. Qal'ani mudofaa qilib turgan ellik-oltmish yigit bitta qolmay qirib tashlandi. Qoʻlga tushgan qiz-juvonlar gʻolib qoʻshinning bek va navkarlariga ulashildi.

Xadicha begimning oʻzi haramning ichma-ich eshiklarini orqasidan tambalatib, eng toʻrdagi bir xonaga kirdi-yu, yonida qolgan kanizlarga buyurdi:

– Tantanali marosimlarda kiyadigan kiyimlarimni keltiring!

Ubaydulla Sultonning navkarlari haramning ichida tambalangan eshiklarini buzib kirgunlaricha Xadicha begim katta gavhar qadalgan binafsharang toqisini boshiga kiyib, yasanib, oxirgi eshikdan oʻzi chiqib keldi. Oltin aralash ipakdan toʻqilgan qabosi koʻzni

¹ Naqb solish – tagi kavlangan devorni olov va borut (porox) bilan portlatib qulatish.

qamashtirar edi. Qaddini tik tutib kelayotgan barvasta ayol malikalarga xos ulugʻvorlik bilan shoshilmay eshikdan chiqar ekan, qilich yalangʻochlagan, hansiragan navkarlarni uning salobati bosdi. Xadicha begim boshini magʻrur tutib, yaqin kelganda navkarlar beixtiyor oʻzlarini chetga olib, unga yoʻl berdilar. Begim ularning sarkardasini soʻradi.

Navkarlar uni hovlida otliq turgan Ubaydulla Sultonning oldiga boshlab chiqdilar. Hamon kanizlar qurshovida kelayotgan begim yengil bir ta'zim bilan shoshilmay gap boshladi:

– Sulton janoblari, taqdir ekan, biz taslim boʻldik. Endi men Shayboniyxon hazratlarining huzuriga yoʻllashingizni iltimos qilamen!

Ubaydulla Sulton beklarining orasida turgan Mansur baxshi bilan ma'noli koʻz urishtirib oldi-yu, masxaraomuz kulimsiradi:

- Xon hazratlari begimga aytadigan gaplarini bizga tayinlab yubordilar.
 - Unday boʻlsa qulogʻimiz sizda, sulton janoblari!

Ubaydulla Sultonning beklari orasida oq sallalik bir eshon ham bor edi. Ubaydulla Sultonning ishorasi bilan Mansur baxshi va eshon otdan tushdilar. Mansur baxshi zar yoqalik toʻn, qizil etik kiyib, kuyovlarday yasanib kelgan edi. Yigitlardan yetti-sakkiztasi uning atrofini kuyovnavkarlar kabi oʻrab oldilar. Shundan keyin Ubaydulla Sulton Xadicha begimga yuzlandi:

- Imomi zamonning farmoni bilan siz bugun Mansurbekning nikohiga oʻtursiz!
- Begimning oʻzlari ham bilganday yasanib chiqibdilar! deb kuldi mulozimlardan biri.

Xadicha begim qop-qora yoʻgʻon Mansur baxshining choʻtir yuziga qaradi-yu, dahshatga keldi:

- Men... men xon hazratlari bilan oʻzim soʻzlashamen!
- Xonning siz bilan soʻzlashishga vaqtlari yoʻq!

- Axir men ham podshoh oilasidanmen! Bu qanday xoʻrlik?!
- Siz rofiziylar oilasidansiz! Rofiziylarni jazolash savob!
- Sulton janoblari, sizning ham mendek keksa onangiz bordirlar. Hech boʻlmasa onaligimni hurmat qiling!..
- Mening onam siz qilgan razilliklarni qilgan emas! Qaysi ona oʻz nevarasini oʻzi oʻldirtiribdi?! Siz nevarangiz Moʻmin mirzoning oʻlimiga sabab boʻlgan xunxoʻrlardansiz!

Xadicha begimning boyagi ulugʻvor va magʻrur qiyofasi endi birdan ayanchli tusga kirdi, qaddi bukchayib, qoʻllari osilib qoldi.

Ubaydulla Sulton navkarlariga buyurdi:

– Ichkariga olib kiringlar. Endi buning koʻzini Mansur baxshi ochsin!

Xadicha begimning boʻshashib, goʻyo toʻkilib ketayotgan gavdasini ikki kaniz ikki tomonidan suyab, ichkariga olib kirib ketdilar.

Nikoh oʻqilgach, Mansur baxshi kanizlarni haramdan chiqarib yubordi-yu, Xadicha begim bilan yakkamayakka qoldi.

Tun sukunatida qandaydir mislsiz qiynoqlardan chinqirgan begimning faryodi haram atrofidagi uylarga ham eshitilib turardi. Yarim kechada Mansur baxshi oyoqda zoʻrgʻa turgan Xadicha begimni oldiga solib, haramdan chiqdi. Ikkovi oydin qal'aning bir chetiga qarab ketishdi.

- Oltin gul, - deb shivirladi Mansur baxshi. - Oltin bulbuli bor. Ogʻzida gavhari bor. Ana shuni topib bermasang, hozirgidan beshbattar qilamen. Top tezroq! Hozir jonidan boshqa narsa koʻziga koʻrinmayotgan Xadicha begim Mansur baxshini qoʻrgʻon chetidagi yashirin xazinaga boshlab keldi. Yer ostidagi bu xazinaga salqin suv saqlanadigan

sardobaning chetidagi maxfiy yoʻldan kirilar edi. Mansur baxshi qoʻlida yoqmasdan olib kelayotgan mash'alani yer tagiga tushganda yoqdi.

Yer ostida besh-oltita temir sandiq qator turibdi. Xadicha begim madorsiz qoʻllar bilan ularga birbir kalit solib, ochib koʻrdi. Ikkitasida kumush tangalar, bittasida oltin tangalar. Bittasida qilich va xanjarlarning oltin dastalari. Yana bir sandiqda ayollarning qimmatbaho taqinchoqlari. Mansur baxshi koʻzlari yonib, bu boyliklarga bir-bir qoʻl urib koʻrdi-yu:

- Oltin gul qani? - dedi. - Barglari zumrad gul qayerda?

Yer ostini agʻdar-toʻntar qilib qidirsalar ham bu gul topilmadi. Xadicha begim:

- Voh! dedi musibatli tovush bilan. Eng ishongan odamlarim ham menga xiyonat qilmishlar. Gulni oʻgʻirlab ketmishlar! Soʻnggi najotimni ham oʻgʻirlatibmen! Oh!
- Sen oh-voh deb, Husayn Boyqaroni aldab oʻrgangansen. Lekin meni alday olmaysen. Top gulni! Qani, qayerga yashirgansen?
 - Mana shu chetki sandiqda edi...
- Yolgʻon! Sen uni boshqa joyga yashirgansen! Koʻrsat oʻsha joyni!

Mansur baxshi Xadicha begimni zinapoyadan yuqoriga sardoba boʻyiga olib chiqdi.

- Meni alday olmaysen! Koʻrsat!
- Men sizni aldaganim yoʻq? Oʻzim aldandim! Mening paymonam toʻlgani rost ekan. Meni oʻgʻlim aldab ketdi! Muzaffar mirzoni deb men nimalar qilmagan edim! Oqibati shu boʻldi! Meni bu qiynoqlarga oʻgʻlim tashlab ketdi! Oʻgʻlim!!!
- Lekin sen oltin gulni oʻgʻlingga ham bermagansen! Uni oʻzing yashirgansen! Xon hazratlari menga aytdilar. «Gavhar donasini tishlab turgan bulbuli

bor», dedilar. Men bu gulni oltin bulbuli bilan xonga peshkash qilamen deb soʻz berganmen. Top hozir!

- O'g'irlatgan bo'lsam qanday topay?!
- Topmaysenmi hali? Topmaysenmi?! Mana topmasang!

Devday zoʻr Mansur baxshining bir zarbi bilan Xadicha begim suvi muzday sardobaga shaloplab qulab tushdi. Mansur baxshi uni sochidan tortib chiqarib oldi-yu, haramga tomon sudrab ketdi.

Bu qiynoqlar uch kun davom etdi, ammo oltin gul topilmadi. Xadicha begimning joni qattiq ekan, tirik qoldi. Mansur baxshini esa kelajakda boʻladigan janglardan birida ajal kutmoqda edi...

4

«Nahotki mening ham paymonam toʻlgan boʻlsa?»—degan qoʻrqinchli oʻy Shayboniyxonning xayoliga Murgʻob daryosining boʻyida toʻsatdan Shoh Ismoilning qoʻshinlari qurshoviga tushib qolgan paytda keldi.

Achchiq izgʻirin esib, qor uchqunlab turgan bu badqovoq kunda Shayboniyxon Murg'ob bo'yiga Shoh Ismoil Safaviyni ta'qib etib borib qolgan edi. Bundan bir necha soatgina oldin Shoh Ismoil bor qoʻshini bilan Marv qoʻrgʻonidan orqaga chekingan paytda Shayboniyxon oʻzining yana ulkan gʻalabaga erishishiga mutlaqo ishongan edi. Chunki Marv qoʻrgʻoni ichida koʻpdan beri kuch saqlab oʻtirgan Shayboniyxonning o'n besh ming qo'shini bor edi. Xonga kelgan aniq axborotlarga qaraganda, Shoh Ismoilning Marv qoʻrgʻonini qamal qilib, qish sovugʻida izgʻib yurgan qoʻshini oʻn ikki mingdan oshmas edi. Sovqotib, orqaga betartib chekingan lashkarga ichkarida issiggina joyda kuch toʻplab yotgan lashkar hamla qilsa - Shayboniyxonning g'olib chiqishi muqarrardek tuvilardi.

Soʻnggi yillarda Shayboniyxonning eng zoʻr istagi - Shoh Ismoil ustidan uzil-kesil gʻalaba qilish edi. Oʻzini «xalifayi Rahmon» deb e'lon qilgan Shayboniyxon musulmon olamiga yagona diniy rahbar boʻlish niyatida edi. Eron va Ozarboyjonda shia mazhabini davlat dini qilib koʻtargan Shoh Ismoil Safaviy esa oʻzini «sohibi zamon» deb e'lon qilgan edi. Demak, u ham musulmon olamiga rahbar boʻlishga intilardi. «Bir qinga ikki qilich sigʻmagay, musulmon olamiga vo men rahbar boʻlishim kerak yoki Shoh Ismoil!» Shayboniyxon shu e'tigod asosida Shoh Ismoil bilan bultur astoydil bellashmoqchi boʻldi. Hirotdan ellik ming qoʻshin bilan Eronning Kermon va Gurgon shaharlarigacha bostirib bordi. Oʻshanda Shoh Ismoil Gʻarbdagi turk sultoni Boyazid II bilan jang qilib yurgan edi. Gurgonda va ayniqsa, Kermonda shialar harakati juda ayjiga chiqqan, Shayboniyxon bu shaharlardagi shialarning boshliqlarini avovsiz qatl ettirdi, ularning masiid va ziyoratgohlarini buzdirdi, mol-mulklarini talattirdi. Bu hammasi shialar peshvosi Shoh Ismoilni darg'azab qilishi va darhol jangga otlantirishi kerak edi. Oʻsha paytda hal qiluvchi jang boʻlsa, Shayboniyxon gʻolib chiqishi muqarrar, chunki Shoh Ismoilning yarim kuchi turk sultoni bilan urushda band edi. Buni shohning oʻzi ham sezgan boʻlsa kerakki, hamma alamini ichiga yutib, Shavboniyxonga yaxshi muomala qildi, maxsus elchi yuborib, uni Movarounnahr va Xurosonning oliy hukmdori, deb tan oldi va oradagi adovatni urushsiz bartaraf qilishga istak bildirdi.

Shayboniyxonning oʻgʻli Temur Sulton, jiyani Ubaydulla Sultonlar shoh elchisiga iloji boricha yaxshi muomala qilishni, unga shirin gaplar aytib, shohga sovgʻa-salomlar yuborib, uni Samarqanddagi Sulton Ali mirzo va Toshkentdagi Mahmudxon kabi gʻaflatda qoldirishni, keyin, payti kelganda oʻshalarga oʻxshatib, yoʻq qilib yuborishni istar edilar. Lekin

orada din-u mazhab nizosi ajdahoga o'xshab og'zini ochib turardi. Shavboniyxon Xurosonda turgan oʻz qoʻshinining shialar ta'sirida shu ajdahoning domiga tortilib ketishidan qoʻrqar, «din-u imon yoʻlida murosa yoʻq, kimki shialarga qoʻl bersa, dindan qaytib, rofiziy boʻlgʻay», degan gapni koʻp takrorlardi. Endi agar Shayboniyxon oʻgʻli va jiyanining soʻziga kirib, Shoh Ismoilni tan olsa, unga yaxshi muomalada boʻlsa, shu bilan beixtivor shia mazhabini tan olgan boʻlmavdimi? Odamlar: «Xonimizning oʻzi ham rofiziylik yoʻliga kiryapti!» demaydimi? Yoʻq! Shayboniyxon oʻzining pok e'tiqodiga dog' tushirishni istamaydi! Uningcha, gʻayridindan ham rofiziylik yomon. Chunki gʻayridin hali musulmonchilikdan bexabar. Rofiziylar esa avval musulmon boʻlgan, keyin choryorlar nomiga xiyonat qilib, ulardan yuz oʻgirgan. Shayboniyxon bunday odamlarga shafqatsiz munosabatda boʻlishi kerak. Shu fikr asosida u shoh elchisini behurmat qilib qaytardi. Shohning maktubiga esa osmondan kelib javob yozdi. «Sen bir shayxning oʻgʻlisan, toj-u taxtni senga kim qoʻyibdi, belingga kashkulingni bogʻlab, qalandarligingni qilsang-chil» degan ma'noda unga kashkul va hassa «sovgʻa» qilib yubordi. Bu voqeadan kevin Shoh Ismoil turk sultoni bilan sulh tuzdi-vu. Shayboniyxonga qarshi jangga tayyorlana boshladi. Xonning Kermondagi shia masjidlarini buzdirgani ustiga endi Shoh Ismoilning elchisini behurmat qilib qaytargani qoʻshilgach, Shayboniyxondan qasos olishni istovchilarning soni koʻpayib ketdi.

Xuddi shu paytlarda Movarounnahrdan ham tashvishlixabarlar kela boshladi – koʻchmanchi sultonlar zulmiga chiday olmagan Toshkent, Fargʻona, Buxoro aholisi ularga qarshi isyon koʻtaradilar. Gʻalayonlar Samarqandda ham, Hisorda ham boʻlayotganini eshitgan Shayboniyxon Hirotdagi qoʻshinlaridan oʻttiz mingini Movarounnahrdagi sultonlarga yordamga

yubordi. Bu gʻalayonlarning sababini bilishiga vuborilgan maxsus kishilar Turkiston, Hisor va Buxoro sultonlarining oʻzboshimchalik voʻliga oʻtganlarini aniqlab keldilar. Shayboniyxon uch yildan beri Hirotda yashamoqda edi. Uning uzoqdaligidan foydalangan sultonlar oʻzlarini xon, koʻlankalari maydon bilib ish olib bormoqda edilar. Xufiyalar ularning igʻvo gaplarini ham Shayboniyxonga yetkazib turar edilar. Xususan, Ubaydulla Sulton. Koʻchkinchixon va Hamza Sultonlar Shayboniyxonning Shoh Ismoil bilan qaltis siyosat olib borayotganidan norozi edilar: «Jangni biz qilamiz, gʻalabani biz keltiramiz, xonimiz faqat yosh qizchalarni nikohiga olib, lazzatlanishni biladi, hech qaysimizning maslahatimizni olmaydi, shunday boʻlgach, biz ham bu verda istaganimizcha davron suravlik-da». Sultonlarning bu gaplari Shayboniyxonning gʻazabini aviiga chiqardi. U ichki nizolarni bir zarba bilan bartaraf qilmoqchi boʻldi-yu, Ubaydulla Sultonni Buxoro hokimligidan, Koʻchkinchixonni Turkiston hokimligidan, Hamza Sultonni Hisor hokimligidan olib tashladi va ularning oʻrinlariga boshqa itoatkor odamlarni qoʻydi. Albatta, bu keskin tadbir xon qoʻshini orasida katta obroʻga ega boʻlgan Ubaydulla Sulton va Hamza Sultonlarning tarafdorlarini gattiq norozi gildi. Movarounnahrdagi gʻalayonlar va xon saroyidagi ichki nizolardan xabar topgan Shoh Ismoil bu qulay fursatdan foydalanib qolishga intildi. Odatda, katta harbiy yurishlar bahor va yoz oylarida boshlanar, Shayboniyxon ham shohning hujumini «boʻlsa, qish o'tgandan keyin bo'lar», deb o'ylar edi. Ungacha Movarounnahrga joʻnatilgan oʻttiz ming qoʻshin Hirotga qaytib ulgurishi mumkin edi. Lekin Shoh Ismoil xon kutmagan kech kuz paytida Hirot ustiga qoʻshin tortib kelayotgani ma'lum boʻldi. Xurosonda Shayboniyxondan norozi odamlar juda koʻp, Shoh Ismoil yaqinlashsa, ular bosh koʻtarishi muqarrar.

Xonning asosiy kuchlari esa Amudaryodan narida. Shayboniyxon shoshilinch ravishda Murgʻob boʻyiga – Marv qoʻrgʻoniga chekinishga majbur boʻldi. Xonning bunday seskanib chekinishini koʻpdan beri koʻrmagan a'yonlari qattiq sarosimaga tusha boshladilar. Shunda xon ularning oʻpkasini bosadigan bitta vaj koʻrsatdi:

«Oʻsha gʻaddor rofiziylar yurtidan uzoqroq ketganimiz ma'qul. Shoh bizga ergashib Movarounnahrga yaqinroq borsin. Oʻzimizning pok mazhabli sunniylar yurtidan madad olurmiz. Ungacha oʻttiz ming lashkar yetib kelgay. Biz shohga Marvda qopqon qoʻyib, tumshugʻidan ilintirgaymiz!»

Xonning bu rejasini barcha mulozimlari va a'yonlari darhol: «Dono tadbir!» deb magtadilar. Birog ular Marv qal'asida bekinib o'tirgan paytlarida Shoh Ismoil qoʻrgʻonni qamal qilib, Shayboniyxon nomiga kinoyali maktublar yoʻlladi. «Xon yuborgan hassaga suyanib, kashkulni belimizga bogʻlab keldik, qani endi xonda yurak bo'lsa qo'rg'ondan chiqsin, shayxning oʻgʻli bilan bellashsin!» degan zaharxanda gaplar Shayboniyxonning izzat-nafsiga qanchalik qattiq tegmasin, u tishini tishiga qoʻyib, haftalar davomida qoʻrgʻonda oʻtirdi. U tajribali lashkarboshi sifatida shuni yaxshi bilar ediki, yigirma toʻrt yoshli Shoh Ismoil ganchalik urinmasin, ertami-kechmi gish sovuglari va izgʻirinlari uni iliq joy izlashga majbur qiladi. Ochiq havoda diydirab yurgan askarlar qoʻli qovushga kelmay qunishib chekinishga tushsa, ana oʻshanda Shayboniyxon issiq qoʻrgʻonda kuch toʻplab yotgan oʻz askarlarini boshlab chiqadi. Ungacha albatta Movarounnahrdagi lashkar ham kelib qoladi. Ikki tomondan berilgan zarba Shoh Ismoilni tamom qilishi anig. Ana undan keyin Eron ham Shayboniyxonniki boʻladi, naryogʻi Bagʻdodga va Makka-yu Madinaga voʻl ochiladi... Shavboniyxon chindan ham butun

musulmon olamiga xalifayi Rahmon va Iskandari soniy boʻladi!..

Xonning bu shirin oʻylarini faqat bir narsa taxir qilmoqda edi. Chopar ketidan chopar borib, Movarounnahrdagi qoʻshinni tezroq Marvga yetib kelishga undayotgan boʻlsa ham oʻttiz ming lashkar hamon Amudaryodan narida imillab yurar edi. Xon bu imillashning sababini bilardi. Qoʻshinda hali ham Ubaydulla Sulton va Hamza Sultonlarning ta'siri zoʻr. Ular hokimlikdan tushirilganliklari uchun xondan juda xafa. «Mana endi onhazratimiz bizsiz jang qilib koʻrsinlar!» degandek arazlab yurishibdi. «Lekin men boʻlmasam hammang kuchukbachchaday xor boʻlib oʻlasan-ku!» – ichida sultonlarini soʻkardi Shayboniyxon.

- Hozir butun davlatimiz, butun sulolamiz xavf ostida-ya, nahotki shuni fahmlamasanglar?

Hayot-mamoting hal boʻladigan paytda, yo shoh meni yoʻq qiladigan, yoki men shohni nest-nobud qiladigan asnoda shunday arazlab yurishlaring itlik emasmi? Sen itlar hali koʻrasenlar, shu qamaldan eson-omon qutulsak, hammangni tavbangga tayantirgaymen!»

Nihoyat, izgʻirinli sovuq kunlarning birida, Shoh Ismoil xonga yana bir maktub yoʻllab, uning qoʻrgʻondan chiqmaganini qoʻrqoqlik deb atadi, bahorda yana qaytib kelajagini bildirdi, soʻng Marvning janubi-gʻarbiy tomonidagi Mahmudi degan qishloq tomonga chekina boshladi. Shayboniyxon oʻn besh ming qoʻshinni darhol otlantirdi. Uch yuztacha navkarni qal'ada qoʻriqchilik qilish uchun qoldirdi-yu, qolganlarini qoʻrgʻon darvozalaridan tashqariga boshlab chiqdi. Uzoqda shoh askarlari chodir va oʻtovlarini aravalarga ortib, betartib chekinib bormoqda.

Shayboniyxon baland bir joyga chiqib, Amudaryo tomonga uzoq tikilib qaradi. Qani endi oʻsha oʻttiz ming qoʻshini hozir yetib kelsa! Lekin oʻsha yoqdan

otini eldirib kelgan chopar qoʻshinning hali ham Amudaryodan narida yurganini aytdi.

Shoh Ismoil askarlari hamon chekinib bormoqda. Nahotki Shayboniyxon shunday qulay fursatni boy berishi kerak? Odamlar: «Xon qoʻrqoqlik qilgan, boʻlmasa uning qoʻshini shohnikidan koʻp, dadil hamla qilsa yengar edi», deyishmaydimi? Narigi sultonlar esa: «Ana, bizsiz xon hech vaqt jang qilolmaydi!» deyishi ham turgan gap. Eh, agar shu gal xon gʻalabani narigi Ubaydulla Sulton va Temur Sultonlarsiz qoʻlga kiritsa edi, qolgan butun umri shon-shuhrat ichida oʻtmasmidi?

Xon ikkilanib turganini koʻrgan mulla Abdurahim izgʻirinda lablari koʻkarib, iltimos qildi:

- Hazratim, biz sizning ulugʻ joningizni xavfxatardan uzoqroq tutmogʻimiz darkor.

Movarounnahrdan keladigan qoʻshinni kutaylik.

Xon qahr bilan soʻradi:

- Qani oʻsha qoʻshin! Qani?!
- Qish izgʻirinida daryodan oʻtmoq mushkul. Biroq Ubaydulla Sulton bilan Temur Sultonlar hademay kelib qolurlar.
- Shoh Ismoil Tabriziga yetganda kelurmi? Agar bu it sultonlar istasa, allaqachon yetib kelmasmidi? Bu sultonlaring joʻrttaga meni yolgʻiz tashlab qoʻydi! «Hamma gʻalabani biz qoʻlga kiritamiz!» deb maqtanar emishlar, ablahlar! Men boʻlmasam gʻalabani tushlarida ham koʻrishmas edi!
 - Haq gapni aytdingiz, hazratim!
- Men mana bu shunqorlarim bilan erishganmen butun gʻalabalarga!
 Shayboniyxon shunday dediyu, jangga shay boʻlib turgan oʻn toʻrt mingdan ortiq qoʻshinning saflari orasiga ot choptirib kirdi:
 Shunqorlarim, yogʻiyning safi buzilib chekinganini koʻrdilaring. Ular son jihatdan ham bizdan oz! Oʻzlari sovuqda diydirab, holdan ketgan. Men ishonamen,

Olloh-u Taolo bizga yana bir ulkan gʻalabani in'om etgusidir! Muhammad alayhissalomning arvohlari pok sunniy mazhabidagilarni qoʻllab-quvvatlagusidir! Choryori bosafolar madadkoringiz boʻlsin, shunqorlarim. Dushman oʻz saflarini qayta tuzib ulgurmasdan yetib boringlar! Xudo omadlaringni bersin! Omin, Olloh-u akbar!

Minglab ovozlarning:

- Olloh-u akbar!
- Olloh-u akbar! degan hayqirigʻi barcha saflar boʻylab taraldi.

Koʻpakbiy va Qambarbiylar oldinda, Shayboniyxon qoʻshinning oʻrtarogʻida qizilboshlar ketidan ot choptirib ketdilar.

Ilgari xonga aniq axborotlar berib turadigan maxsus odamlar bu gal Shoh Ismoilning yolgʻondakam chekinayotganini va harbiy nayrang ishlatmoqchi ekanini bilmay qolgan edilar. Shoh Ismoil Marvni qamal qilish uchun askarlarning ozroq bir qismini boshlab borgan edi. Uning yana yigirma ming kishilik saralangan askarlari Marvdan yigirma chaqirimcha naridagi qumtepalar ortiga pistirma qilib qoʻyilgan edi.

Bunday harbiy nayrangni Shayboniyxonning oʻzi oʻn ikki yil muqaddam Buxoroning Qorakoʻl shahrida qoʻzgʻolon koʻtargan isyonchilarga qarshi ishlatgan edi. U ham qoʻshinning asosiy qismini Qorakoʻlning sharqidagi pana joylarga bekitib qoʻyib, ozgina askari bilan hujumga borgan, qal'a ichidagi isyonchilar yovning ozligidan dadillanib, tashqariga chiqqan edilar. Shunda xonning qoʻshini joʻrttaga tumtaraqay boʻlib qochgan, isyonchilar esa ularni «Yengdik» deb ketlaridan quvgan edi. Biroq qal'adan besh-olti chaqirim uzoqlashganlaridan keyin pistirmadagi xon askarlari yopirilib chiqqan va isyonchilarni qirib tashlagan edi. Keyin Shayboniyxon qal'a ichida qolganlarni ham qatl qilib, Qorakoʻlning otbozorida odam kallasidan ulkan minora yasatgan edi.

Hozir o'z kuchiga ortiq darajada ishonadigan Shavboniyxon bu hiylani boshqa lashkarboshilar unga nisbatan ham ishlatishlari mumkinligini xavoliga keltirmas edi. Shoh Ismoilning Marvga koʻrinish bergan oʻn ming chogʻlik qoʻshini Mahmudi degan joyda Murgʻob daryosi ustiga qurilgan koʻprikdan shosha-pisha oʻtib ketdi. Shoh Ismoil go'yo bu ko'prikni himoya qilib turish uchun uch yuztacha askar qoldirgan edi. Shayboniyxon koʻprikka yaqinlashgach, bu uch yuz qizilbosh xoʻjakoʻrsinga tiraqaylab qochdi. Daryodan faqat shu koʻprik orgali oʻtish mumkin edi – har ikki qirgʻoq ham baland jar, kechuv yoʻq, buning ustiga, qishki daryoning suvi juda sovuq, toʻngʻib golish hech gap emas edi. Shayboniyxonning butun qoʻshini koʻprikdan oʻtib boʻlguncha Shoh Ismoilning pistirmada yotgan kuchlari oʻzini sezdirmadi. Shayboniyxon uzoqda «qochib ketayotgan» Shoh Ismoil qoʻshinining izidan tushib, koʻprikdan ancha uzoglashgandan kevin pistirmada votgan kuchlar birdan maydonga chiqdi. Oʻqlab qoʻyilgan zambaraklar xon ustiga toʻsatdan oʻq yogʻdirdi. Toʻrt tarafni qizilboshlar tutib ketdi. Shayboniyxon oʻzining Qorakoʻlda ishlatgan harbiy hiylasini endi esladi-yu, orqada qolgan koʻprikka qarab chekindi. Ammo yogʻoch koʻprik allaqachon buzib tashlangan edi. Chekinib borgan qo'shinning bir qismi jardan daryoga qulab tushdi. Daryoning oʻzanini otlar va odamlarning oʻligi tutib ketdi. Xonning oʻzi saralangan xosnavkarlari bilan mollar qishlavdigan atrofi yopiq bir qoʻraga kirdi. Qoʻrani qizilboshlarning olov halqasi oʻrab oldi. Xonning xosnavkarlari qizilboshlar qurshovida oʻlgan-qolganlariga qaramay jang qildilar. Qoʻra darvozasining oldilari, paxsa devorlarning taglari har ikki tomondan qirilganlarning jasadiga toʻlib ketdi. Xon himoyada qattiq turganini koʻrgan Shoh Ismoil zambaraklarni qoʻraning atrofiga oʻrnattirib, devor osha oʻq ottira boshladi. Zambarak gumburlashidan hurkkan, varador boʻlib guturgan otlar bir-birlarini urib, yiqitib oʻzlarini u yoqdan-bu yoqqa tashlay boshladilar.

Qoʻra ichida dahshatli tiqilinch, ur-sur boshlandi. Shayboniyxon qoʻlida qilichi bilan odamlariga hayqirib, to'polonni bosmogchi bo'layotganda, to'pning tosh oʻqlaridan biri xon mingan otning boshiga kelib tegdi. Ot gandiraklab bir yoniga yiqildi-yu, egasini ham yerga otib urdi. Shavboniyxon oyogʻini uzangidan chiqarishga ulgurmadi - bir oyogʻi otining tagida qoldi. Shu zahoti yana bir ot surinib yiqildi-da o'mrovi bilan xonning koʻkragidan bosib tushdi. Shayboniyxon qovurgʻalari sinib, vujudi ezilib, nafas ololmay goldi-yu, hushidan ketdi. Jang tugagandan kevin xonni taniydigan qizilbosh beklardan biri uning jasadini qalashib yotgan ot va odam oʻliklari orasidan arang qidirib topdi. Abdurahim Turkistoniy, Mansur baxshi koʻtaruvchi va boshqa juda koʻp mulozimlar, navkarlar ham xonning nari-berisida oʻlib yotar edilar.

Gʻoliblar Shayboniyxonning boshini kesib, nayzaga sanchdilar-u Shoh Ismoil minib turgan otning oyogʻi tagiga eltib tashladilar. Keyin qizilboshlar Shayboniyxon qirgan shialar qasdiga uning kesik boshidan terisini shilib olib ichiga somon tiqdilar. Gʻarbda shialarni quvgʻin qilayotgan va Shoh Ismoilga alam oʻtkazgan sunniyparastlardan yana biri – turk sultoni Boyazid II edi. Shoh Ismoil Shayboniyxonning somon tiqilgan boshini turk sultoniga: «Men bilan qasdlashgan sunniylar qay ahvolga tushishini koʻrib qoʻy!» degan ma'noda «sovgʻa» qilib yubortirdi. Sunniy – shia dushmanligi shu darajaga yetgan ediki, qizilboshlar bunga ham qanoat qilmay, Shayboniyxonning bosh suyagiga oltin qoplatib, undan may ichadigan kosa yasaydilar¹.

¹ Aql bovar qilishi qiyin boʻlgan bu tafsilotlar Shoh Ismoilning dushmanlari tomonidan yozib qoldirilsa, mubolagʻa deb oʻylash mumkin edi. Lekin bu tafsilotlar Shoh Ismoilning xayrixohlari yozgan «Tarixi olam oroyi Abbosiy»da va Xondamirning «Habib us-siyari»da ham keltirilgan.

QUNDUZ. SAMARQAND

IKKI QILICH ORASIDA

1

Zarrin popuklar bilan bezatilgan oq tuyaning ustida malikalar oʻtiradigan baxmal soyabonli kajavada Xonzoda begim toʻqqiz yashar oʻgʻilchasi Xurramshoh bilan Balxdan togʻ oshib, suv kechib Qunduzga bormoqda edi. Begimni besh-oltita kanizlari, xizmatkorlari va yuzga yaqin shoh navkarlari kuzatib kelmoqda edilar.

Shayboniyxondan shunchalik shafqatsiz oʻch olgan Shoh Ismoil xonning Marvda asir tushgan xotinlaridan biri – Bobur mirzoning egachisi ekanligini eshitib, unga alohida iltifot koʻrsatgani tasodifiy emas edi.

Marvdagi voqealarni Qunduzda turib eshitgan Bobur Shoh Ismoilga maxsus maktub yoʻllab, uni Shayboniyxon ustidan erishgan katta gʻalabasi bilan tabriklagan, soʻng xon haramidagi egachisi Xonzoda begimni beshikast Qunduzga joʻnatib yuborishni iltimos qilgan edi. Boburni Shayboniyxon bilan dadil olishganligi uchun hurmat qiladigan Ismoil Safaviy endi uni oʻziga ittifoqdosh qilgisi keldi-yu, Xonzoda begimga qoʻshib, eng ishongan kishilaridan biri – Muhammadjon eshik ogʻasini Bobur huzuriga elchi qilib joʻnatdi. Xonzoda begim shohning yashirin niyatlarini bilmasa ham yana allaqanday xatarlar uni yosh oʻgʻilchasi bilan birga oʻz girdobiga tortmoqchi ekanini elas-elas sezar va noma'lum bir tahlikadan yuragi dam-badam uvushar edi.

Shohning elchisi va navkarlari butun yoʻl davomida Xonzoda begimni ham, uning oʻgʻli va kanizlarini ham

oʻz odamlari kabi astoydil avaylab va qoʻriqlab kelmoqda edilar. Ularning ayollar bilan muomaladagi odoblarini, olijanob ehtiromlarini begim koʻp marta sezdi. Shoh Ismoildan boshqa podshoh boʻlsa, Shayboniyxonday ashaddiy dushmanning norasida oʻgʻlini yoʻq qilib yuborishi, xonning xotinini oʻz haramining asirasiga aylantirishi yoki birorta bekiga nikohlab berishi mumkin edi. Shoh Ismoil shunday qilmagani, aksincha, Xonzoda begimni malikalarday izzat-ikrom qilib, yoniga moʻtabar elchilar-u oʻnlab navkarlarini qoʻshib, Boburning huzuriga yuborgani, bu jabrdiyda juvonning qalbida umrbod unutilmaydigan bir minnatdorchilik tuygʻusi uygʻotgan edi.

Xonzoda begimni butun yoʻl boʻyi sergaklantirib borayotgan noma'lum xavf goʻyo bahaybat togʻlar va oʻrmonlarda yashirinib turganga oʻxshardi. Qish endi chiqqan, togʻlarda hali qor koʻp. Baland dovonlardan, tor-tangilardan oʻtayotganlarida, Xonzoda begimning nazarida togʻdan koʻchki tushib, hammalarini bosib qoladiganday boʻlardi. Momaqaldiroqli yomgʻirlar yoqqanda, daralarning sellari begimning yonidagi oʻgʻilchasini oqizib ketadiganday vahmini keltirardi. Bir kecha Amudaryoning chap qirgʻogʻidagi oʻrmonning chetida – Surbaytal degan joyda tunadilar. Xonzoda begim oʻrmonda kiyik ovlab yurgan yoʻlbarslarning haybatli boʻkirishlarini eshitib, tuni bilan uxlay olmay chiqdi.

Ilgari Shayboniyxonning ukasi – juda koʻp xatarli janglarda oʻlmagan Mahmud Sulton mana shu Qunduzga kelganda allaqanday yomon bezgakka uchrab, bir necha kun ichida oʻlib qolgan, keyin uni Qarshiga eltib koʻmishgan edi.

Qunduzga yaqinlashganlarida, Gʻoʻri daryosi Qunduz daryosi bilan qoʻshilib, Amudaryoga qarab ketgan serqamish botqoqlik joyda nafas olish ogʻirlashib, birdan havoning rutubati kuchayib ketdi. Xonzoda begim endi oʻsha yomon bezgakni eslab, oʻgʻilchasiga yana xavotirlanib qarab qoʻydi.

U ilgari «oʻlging kelsa, Qunduzga bor», degan afgʻoncha maqol eshitgan va buni hazil gap deb kulgan edi. Endi bu maqol unga chindek tuvila boshladi. U oʻzidan ham koʻra murgʻak bolasidan - xon haramida o'n vil arosatda vashab orttirgan mana shu vagona jigarporasidan xavotirlanardi. «Bordi-yu, Bobur mirzo Qunduzda boʻlmasalar, togʻ oshib Andijonga oʻtgan boʻlsalar yoki Kobulga qaytgan boʻlsalar, unda ne gilurmiz?» derdi Xonzoda begim oʻzicha. Shu oʻy ta'sirida Pomir va Hindikush togʻlari bilan qurshalgan, Amudaryo va uning asov irmoglari boʻyiga joylashgan Ounduz vohasi Xonzoda begimning koʻziga juda badvahima koʻrinardi. Kechki payt yoʻl daryodan uzoglashib, balandlikka koʻtarilib borayotganda, qarshilaridan bir toʻp qurolli kishilar chiqib, ularni toʻxtatishdi. Soʻrab-surishtirishlardan soʻng bular -Bobur tomonidan yoʻllarga qoʻyilgan qorovullar ekani ma'lum bo'ldi-vu, Xonzoda begim birdan vengil tortdi. Qorovullarning boshligʻi mehmonlarning oldiga tushib, ularni Qunduzning baland bir joyidagi qal'aga boshlab borar ekan, endi atrof Xonzoda begimga allanechuk boshqacha koʻrinib ketdi. Moviy togʻlardan esayotgan shabada yuzini yoqimli silab oʻtdi. Amudaryo boʻyidagi oʻrmonlar uzoqdan nechogʻlik xushmanzara koʻrinishini u endi payqadi.

Qunduzning ilgarigi xonlari bahavo bir joyga qurdirgan mustahkam qal'a va uning ichidagi qasr ham Xonzoda begimga uzoqdan xiyla fayzli koʻrindi. Bu qasr ichida hozir u oʻzining suyukli inisi bilan uchrashishini oʻylaganda shodligi koʻksiga sigʻmay entikdi. Ularni kutib olgan mulozimlar Xonzoda begimni oʻgʻli va kanizlari bilan birga mehmonxonaning yaxshi bezatilgan alohida bir xonasiga kiritib

qoʻydilar-u Boburga xabar berish uchun qoʻrgʻonning toʻriga qarab ketdilar.

Anchadan keyin Xonzoda begim oʻtirgan xonaning eshigidan chiroyli soqol-moʻylov qoʻygan oʻttiz yoshlardagi yigit shoshilib kirib keldi. Begim uni Boburning mulozimlaridan deb oʻyladi, sekin oʻrnidan turib, salomiga alik oldi. Yigit unga tomon yurib kelar ekan, ovozi titrab:

- Begim, qadamingiz qutlugʻ boʻlsin! - dedi.

Bu – Bobur edi. Lekin Xonzoda begim ukasini soqol-moʻylov qoʻymagan oʻn toʻqqiz yoshli silliqqina yigit qiyofasida eslab qolgan edi. Hozir uning qarshisida turgan keng yelkali, soqol-moʻylovi tekis tarashlangan yigitning kiyimlari ham shohona emas edi: boshida bezaksiz oddiy simobi salla, egnida zira beqasam toʻn. Begim yana uni Boburning beklaridan biri deb oʻyladi-yu, hayajonlanib aytgan soʻzlariga bosiq javob qildi:

- Qulluq!

Devoni xosda yozuv-chizuv ishlarini qilib oʻtirgan Bobur opasining xabarini eshitib, xonaki kiyimda chopib kelgan edi. Xonzoda begim esa hali ham podshoh ukasining kirishini kutib, eshikka olazarak boʻlib qarar edi. Bobur opasiga angrayib qarab qoldi. Eshikdan Muhammad Koʻkaldosh degan mulozim kirganda, begim undan:

- Amirzodam qanilar? - deb soʻradi.

Muhammad Koʻkaldosh hayron boʻlib, Boburga qaradi. Bobur gap nimadaligini endi tushundi-yu, tomogʻiga bir narsa tiqilib, ovozi boʻgʻildi:

- Meni tanimadingizmi?
- Siz... Siz...
- Men Boburmen!
- Nahot?!
- Men sizning iningizmen! Gunohkor iningiz Bobur!

Xonzoda begim Boburning koʻzlarini, boburona ovozni endi tanidi-yu, oʻzini inisining bagʻriga otdi. Qoʻllarini yuzi bilan birga Boburning koʻkragiga bosdi. Bobur opasining yelkalaridan quchdi, uning sogʻinch va quvonch bilan aytgan soʻzlarini qulogʻi bilan emas, goʻyo koʻksi bilan eshitdi:

- Boburjon! Siz... Siz oʻshanda mendan ranjigansiz!.. Bilamen... Boshingizga ta'na toshlari yogʻilgan... Men... aytolmagan edim. Oʻzim uchun emas, siz uchun...
- Men ham buni keyin bildim. Siz meni qutqarish uchun oʻzingizni xonga tutib bermishsiz. Men sizdan umrbod qarzdormen!
- Oʻshal qarzingizni mana endi uzdingiz, Boburjon. Bu daf'a meni siz qutqardingiz! Agar Shoh Ismoilga yozgan nomangiz bormasa, meni ham, xon harami bilan asir tushgan ayollar qatori, biron bek yoki mulozimga tutqun qilib berur edilar. Shoh Ismoil siz tufayli meni shunchalar izzat-ikrom bilan ozod qilib, kuzatib qoʻydi. Sizdek inim borligi uchun Xudoga ming shukrlar qildim!

Xonzoda begim yuzini Boburning ko'ksidan oldi-yu:

- Hazrat onamlar qaydalar? dedi. Bultur bir shumxabar eshitdim, rostmi?
- Besh yil burun... Xasbadan¹ jon berdilar. Kobulning Bogʻi Navroʻziysigʻa qoʻydik.
 - E voh, ellikka ham toʻlmay ketibdilar-a!..
- Menga ham shunisi behad alam qildi! Saksonga, toʻqsonga kirganlar ozmi?
- Onamni gʻam-u gʻurbat ado qilgan, amirzodam! Bizni deb ozmuncha kulfat chekdilarmi!

Muhammad Koʻkaldosh gapni boshqa yoqqa burdi:

- Taqdirga chora yoʻq, begim. Mana bugun siz podshoh hazratlari bilan yana topishganingizdan hazrat onangizning arvohlari shod boʻlur! Qani, oʻtirsinlar. Fotiha oʻqiylik.

¹ Xasba - ichterlama, tif.

Zarbof koʻrpachalar ustiga oʻtib oʻtirdilar. Bu orada tashqaridan begimni koʻrish uchun kirgan Qosimbek qavchin Qutlugʻ Nigor xonimning ruhiga bagʻishlab, tilovat qildi. Keyin Xonzoda begim kanizlari orasida hammani jimgina kuzatib oʻtirgan oʻgʻilchasi Xurramshohni imlab chaqirdi.

Bolaning oq-sargʻish yuzi, koʻzining koʻkimtirligi, qisqa boʻyni va siyrak qoshlari xuddi Shayboniyxonnikiga oʻxshar edi. Bobur Shayboniyxonni koʻrmagan boʻlsa ham Xonzoda begim oʻgʻlini unga tanishtirayotganda, bolaning qiyofasida xon otasidan meros qolgan alomatlarni aniq koʻrganday boʻldi.

Xurramshoh yetti yoshga kirar-kirmas otasi uni Balx viloyatiga hokim qilib qoʻygan edi. Hokimlikni bolaga atka qilib belgilangan Madhi Sulton qilsa ham Xurramshoh oʻz qarshisida katta-katta odamlarning bosh egib, ta'zim qilishlariga anchagina oʻrgangan edi. Xonzoda begim oʻgʻliga Boburni koʻrsatib:

- Togʻoyingiz mana shu kishilar! deganda, Xurramshoh Boburning xayolidan oʻtgan narsani sezib yotsiradimi yoki uning kiyimlari joʻnligini koʻrib, nazariga ilmadimi, istar-istamas bosh irgʻab salom berdi. Ammo togʻasiga yaqin bormadi. Shunda Xonzoda begim uni yelkasidan sekin itarib, qulogʻiga shivirladi:
- Esingizni yigʻing, podshoh Bobur mirzo huzuridasiz! Shoh Ismoil shu hazrat tufayli sizni ozod qildi!

«Podshoh» va «hazrat» degan soʻzlardan bolaning koʻzlari goʻyo charaqlab ochilib ketdi. Shu payt Bobur jiyanining koʻzlari oyisinikiday yirik-yirik ekanini sezdi. Tojdorlar bilan muomala qilishning mashqini yaxshi olgan bola endi tizzachasini gilamga tirab, Bobur qarshisida yukundi, soʻng ikki qoʻlini koʻksiga qoʻyib, egilib ta'zim qilar ekan, chuchuk til bilan:

– Hazratim, men sizga... sizga xizmatqa keldim! – dedi.

Bobur uning burni ham Xonzoda begimniki kabi qirrali ekanini endi koʻrdi va bu bolaga nisbatan qalbida tutun aralashgan olovday murakkab bir iliqlik sezdi.

– Xizmatga kelgan boʻlsangiz xush koʻrdik, shahzoda, – dedi-yu, bolani qoʻlidan olib, oʻng yoniga oʻtqazdi.

Shu payt tashqaridan ellik yoshlardagi semiz haram bekasi ta'zim qilib kirdi:

- Podshoh hazratlari, Mohim begim olinasab egachingiz huzuriga kelishga ijozat soʻradilar!

Bobur Xonzoda begimga qarab, sirli bir tarzda jilmaydi. Soʻng bekasiga buyurdi:

- Ayting, kelsinlar! Mirzo Humoyunni ham ola kelsinlar.

Boburning yosh xotini Mohim begim keksa Qosimbek oʻtirgan xonaga kirishdan iymanib kelolmayotganini hamma sezdi. Qosimbek va Muhammad Koʻkaldosh Boburdan ruxsat olib, sekin eshikdan chiqdilar.

Mehmonxona oldida odam koʻp. Margʻilonlik Xoʻja Kalonbek, uning ukasi Kichik Xoʻja, quvalik Tohir koʻrchi, toshkentlik Saidxon, samarqandlik Majid barlos, Yusuf Andijoniy degan bir navkar – hammalari Vatanlarining daragini olib kelgan Xonzoda begimni koʻrmoqchi boʻlishar, ammo ichkariga kirishdan istihola qilib turishar edi. Qosimbek ularga:

- Avval haram ahli bilan koʻrishsinlar, keyin sizlarga ham ruxsat soʻrarmiz, - deb, ularni tarqatib yubordi.

2

Shaftoli gulli ipak qabosi ingichka beliga, nazokatli qaddi-qomatiga juda yarashgan bir juvon shahzodalarcha yasantirilgan uch yashar bolani qoʻlidan yetaklab, eshikdan ohista kirib keldi. Bolachaning yuz-koʻzi Boburga oʻxshashini Xonzoda

begim bir qarashdayoq sezdi-yu, tez oʻrnidan turdi. Mohim begim kelinlik nazokati bilan egilib, ta'zim qildi. Xonzoda begim unga peshvoz chiqib, avval yelkasiga qoʻllarini qoʻyib koʻrishdi. Soʻng juvonning yuzidagi nafis oq pardani sekin koʻtarib qaradi-da, uning ajib bir latofatini yurakdan his qilib, zavqi keldi. Kelinining peshonasidan, koʻzlaridan quvonib oʻpdi, soʻng shodlikdan balqigan yuzini Boburga oʻgirdi.

– Muborak boʻlsin! Bir-birlaringizga benihoya munosibsizlar! Baxtli boʻlinglar!

Kichkina Humoyun bir qoʻlchasi bilan onasining etagidan tutib, pastdan yuqoriga maroq bilan qarab turardi. Xonzoda begim uni qoʻliga koʻtarib oldi. Bola ammasini birinchi marta koʻrayotgan boʻlsa ham, bu istarasi issiq ayolni koʻpdan beri biladigandek begonasiramas edi. Xonzoda begim bolaning loʻppi yuziga yuzini qoʻyib erkalatganda, Humoyun buni yoqtirib kulimsiradi.

Xonzoda begim uni oʻzining oʻgʻilchasi oldiga koʻtarib olib bordi-da, yerga qoʻydi:

– Qani, kichkina togʻacha «katta» jiyancha bilan tanishsinlar-chi!

Uch yashar boburiyzoda bilan toʻqqiz yashar shayboniyzoda avval bir-birlariga jim tikilib turdilar. Keyin Humoyun Xurramshohning belidagi kichkina bezakdor xanjarchasiga qiziqib, qoʻl choʻzdi. Xurramshoh uning qoʻlini olib koʻrishdi-yu, ammo xanjarini bergisi kelmay orqaga chekindi. Buni koʻrgan kattalar kulib yubordilar.

Xonzoda begimning boshidan kechgan barcha dahshatlar, Qunduz yoʻlida uning yuragini titratgan noma'lum xavf-u xatarlar shu bir quvnoq kulgi bilan goʻyo uzoq oʻtmishga aylandi. Xonzoda begim iymanib, tabassum qilayotgan kelinini bir yoniga oʻtqazdi. Ikkinchi yonida xushchaqchaq kulimsirab bolalarga qarayotgan Boburni koʻrdi. Yaqinginada

oʻzlari ham mana shu togʻacha-jiyan kabi yosh bola boʻlgan paytlari esiga tushdi. Ogʻir ayriliq yillarida opauka ikkovlari ham farzandlik boʻlganlari, dushman xonadonlaridan chiqqan bu bolalar endi goʻdaklarcha bir ma'sumlik bilan tanishayotganlari qahraton qish ketidan kelgan bahordek behad yoqimli edi. Xonzoda begim keliniga yana bir qarab oldi-da, keyin Boburga shoʻx nazar tashladi:

- Tole sizga endi kulib boqibdi, amirzodam! Oʻzingizga bunchalik munosib malikani qanday uchratdingiz! Mohim begim, qayerliksiz?
 - Xurosonlik, hazrat begim.

Mohim begim Boburga: «Bogʻkoʻcha devoridan gul tashlaganimni aytib, meni uyaltirib qoʻymang yana!» degandek iltimoskorona qarab oldi. Bobur uning bu qarashidagi ma'noni sezib, zavqli jilmaydi. Soʻng Mohim begimning Husayn Boyqaroga qarindoshligi borligini, otalari bundan toʻrt yil burun Badiuzzamon mirzo bilan chiqisholmay, Gʻaznaga kelib qolishganini opasiga aytib berdi. Bobur Mohimning ota va ogʻalarini Gʻaznadan Kobulga taklif qilgan, keyin bu yerda Mohim bilan yana koʻrishib, unga uylangan edi.

- Hirot bilan Murgʻob oraligʻida Hazrati Jom degan shahar bor, koʻrganmisiz? soʻradi Bobur opasidan.
- Koʻrganmen! Ulugʻ shoir Ahmad Jomiyning nomlariga qoʻyilgan.
- Begimning ona avlodlari ana oʻshal Hazrat Jomiyga xesh ekanlar. Ustod Abdurahmon Jomiyga hamshahar ekanlar.

Bobur hazilomuz kulib, qoʻshib qoʻydi:

– Begimning oʻzlari ham shunday shoirparvar-u she'rshunoslarki, Jomiy bilan Navoiyning barcha gʻazallarini yod bilurlar. Ammo biz she'r yozsak, munaqqidlik¹ qilib, nuqsini koʻrsaturlar.

¹ Munaqqidlik - tanqidchilik.

Mohim erining haziliga hazil bilan javob berdi:

- Munaqqid boʻlmay ilojim yoʻq, chunki hazratim mening ta'rifimda koʻp mubolagʻa qilurlar!

Xonzoda begim er-xotinning hazilkashligidan zavqlanib kuldi:

- Lekin ta'rifingizda qancha mubolagʻa qilsalar ham oz!
- Minnatdormen, hazrat begim! Mohim endi hayajonli tovush bilan gapirdi: Men sizning jasoratingizni, fidoyiligingizni hazratimdan eshitib, oʻzingizni koʻrish orzusida edim. Tangrimga shukr, bugun shu orzuyim roʻyobga chiqdi. Hazrat begim, men sizni afsonaviy bir malika deb oʻylar edim. Biroq oʻzingizni koʻrdim-u sizdagi mehrigiyo afsonaviy malikalarda ham boʻlmas, deb oʻyladim! Endi uyimizning peshgohi ham, koʻnglimizning toʻri ham sizniki!

Mohim begim bu gaplarni samimiy bir ixlos bilan aytganini sezgan Xonzoda begim:

– Bizga sizdek kelin bergan Tangrimga shukr! – deb qoʻydi.

Xonzoda begim birdan Oyisha begimni esladi va uni Mohim begimga taqqoslab koʻrdi. «Bir hisobda, Boburjon avvalgi xotini bilan ajrashib ketgani ham yaxshi boʻlgan ekan», deb qoʻydi oʻzicha. Soʻng xon haramida oʻzining tortgan azoblarini eslab ketdi.

Bobur oʻttiz toʻrt yoshli Xonzoda begimning sochlariga bitta-yarimta oq oralab qolganini endi koʻrdi. Shu turishda opasi Boburga onasining endi beva qolgan oʻttiz yetti-oʻttiz sakkiz yasharli paytlarini eslatdi. Xonzoda begim ham endi beva edi. Bobur shuni oʻyladi-yu:

- Siz meni deb koʻp azob tortgansiz! - dedi. - Sizni eson-omon dargohimizga yetkazdirgan Shoh Ismoilning yaxshiligini hech vaqt unutmasmen!

Shoh Ismoil tilga olinishi bilan Xonzoda begimning chehrasi yana ochildi.

- Shohning Tojli xonim degan yoshgina, koʻhlikkina xotini bor ekan, deb hikoya qila boshladi. Shu juvon meni shoh huzuriga boshlab kirdi. «Shoh Ismoil sunniy mazhabidagilarni oʻldirib, terisiga somon tiqtirarmish» degan vahimali gaplarni koʻp eshitgan edim. «Bahaybat bir odam boʻlsa kerak», deb titrabqaltirab bordim. Qarasam, yigirma toʻrt-yigirma besh yoshli xushsurat bir yigit taxtda oʻtiribdi. Soqol qoʻygan emas, faqat uzun, ingichka moʻylovi bor. Burgut burun. Koʻzlari katta-katta. Ozariy tilda gapirdi, soʻzlarining hammasiga tushundim. Shialarning imomlari Bibi Fotimaning avlodlari boʻlgan emasmi, shuning uchun ular ayol zotini juda hurmat qilar ekanlar. Men buni yoʻlda ham koʻp sezdim.
- Lekin oʻzimizda ham ilgari ayollarga ehtirom kuchli boʻlgan, – dedi Bobur. – Samarqandda Bibi Xonim nomli madrasa qurilgan, Tuman ogʻa maqbarasi bor. Hirotda Gavharshod begim madrasasi mashhur.
- Bilmadim, u zamonlarda ulugʻ ayollar koʻp boʻlganmi yoki ularning ilm-u san'atga ishtiroklari katta boʻlganmi? – dedi Mohim begim eriga qarab. – Hozir nechukdir undoq emas-da, hazratim?
- Falakning gardishi ajib! dedi Bobur. Ayollarga munosabat hamisha ilm-u san'atga munosabat bilan rost kelur. Ilm-u san'at barq urgan davrlarda ayollarning hurmati ham baland. Chunki ilm-u san'at ayollarning ishtiroki bilangina astoydil yuksalgan. Ma'naviy inqiroz davrlarida olimlar-u san'atkorlar nechogʻlik xor boʻlsa ayollar ham shunchalik kamsitilmishdir.
- Siz aytgan shu inqiroz hozir Movarounnahrni chirmab olgan, hazratim! dedi Xonzoda begim. Koʻchmanchi xon-u sultonlar mamlakatning quruq gavdasini egallab olmishlar. Uning ruhi bilan ishlari yoʻq. Oʻlgan odamning arvohini ranjitish adolatdan emas. Shayboniyxon parokanda boʻlib yotgan

oʻlkalarni birlashtirdi. Samarqandda oʻz nomiga madrasa gurdirdi. Koʻhak¹ daryosining ustiga koʻprik gurdirdi. Savob ishlari shu boʻldi. Lekin olimlar-u san'atkorlarga muomalasi qandoq durust bo'lsa, avollarga ham shundog edi. Temuriylar avollarning nomiga madrasa-yu maqbaralar qurdirganini avtsangiz, gʻazabi kelur edi. Uningcha, Ulugʻbek ilm-u san'atga berilib, din-u imonni unutgan emish, ayollarni taltaytirib, xalq axloqini buzgan emish. Xon vozdirgan «Shayboniynoma», «Nusratnoma» degan kitoblarning birontasida birorta ayolning nomi tilga olingan emas. Shahzoda-yu sultonlarning onalari voki xotinlari haqida soʻzlash zarur boʻlib qolsa, «falonchining qizi», «falonchining xotini» deb, faqat otasi yoki erining nomini yozurlar. Chunki ayollarning nomini nomahramlar tilga olsalar gunoh boʻlur emish! Hali bu - madrasa koʻrgan ilmlik xonning davrida boʻlgan ishlar. Hozir tirik qolganlarida shu ilm ham yoʻq. Faqat dagʻal bir kuch-u bid'at-u xurofot. Ilm-u san'at ahli sultonlar zulmidan qochib, biri Xurosonga, biri Istambulga ketdi, biri Kobulga keldi. Endi butun umidimiz sizdan, Boburjon! Siz Movarounnahrning ulugʻ ruhini tiklarsiz, ilm-u ma'rifat quyoshini yurtimizga qaytarib olib borursiz deb, yoʻlingizga koʻz tikkanlar koʻp!

Bobur opasining aytganlari quruq gap emasligini bilardi. Shayboniyxon oʻlgandan keyin Samarqanddan, Buxorodan, Toshkentdan Boburga maxfiy xatlar va choparlar kelgan edi. Koʻchmanchi sultonlar zulmidan bezgan odamlar Boburni tezroq yurtiga qaytishga chorlar edilar.

– Oʻtgan hafta Andijondan xushxabar keldi, – dedi Bobur opasiga mamnun koʻz tashlab. – Fargʻona vodiysidagi barcha xayrixohlarimiz koʻchmanchi

¹ Koʻhak - hozirgi Zarafshon.

sultonlarni quvib yuboribdir. Menga kitobot keldiki, «Qorategin orqali Andijonga tezroq yetib keling, ota yurtingiz sizga muntazir!»

Xonzoda begim quvonch bilan:

- Tangrimga ming qatla shukr! dedi.
- Hazratim bizni Kobuldan Qunduzga olib kelganlarining boisi ham shuki, - dedi Mohim begim ovozini pasaytirib, - tezroq Vatanlariga qaytmoqchilar!
 - Andijongami? shivirladi Xonzoda begim inisiga.

Bobur oʻychan kulimsirab, bosh chayqadi – u Andijonga ishonchli bir kishisini yubormoqchi, oʻzi esa Hisor orqali Samarqandga yurish qilmoqchi edi. Lekin Bobur oʻzining bu niyatini tarix sahnasida paydo boʻlgan yangi bir kuch – Shoh Ismoil bilan kelishmasdan amalga oshirolmasligini sezib turardi. Chunki Shoh Ismoil koʻchmanchi sultonlarga qarshi kurashni davom ettirish va ularni Movarounnahrdan quvib chiqarish uchun Bobur bilan ittifoq tuzmoqchi edi. Bugun Xonzoda begim bilan kelgan elchining qanday niyati borligini Bobur taxminan bilar edi.

Basharti, u Shoh Ismoil taklif qilayotgan ittifoqni rad etib, Andijonga yoki Samarqandga oʻzicha yurish qilsa, shoh undan aynib, shayboniyzodalar bilan ittifoq tuzishi mumkin edi. Shayboniyxonning oʻgʻli Temur Sulton shohga elchilar va sovgʻalar yuborib, muzokara olib borganidan Bobur xabardor edi. Bu ikki zoʻr kuchga Bobur yolgʻiz bas kelolmasligi esa oʻz-oʻzidan ayon edi...

U ayollarga bu murakkab muammolarni aytib oʻtirmadi-yu, Shoh Ismoilning shoirligidan gap ochdi.

- Mirzoxon menga shohning she'rlaridan keltirib koʻrsatdi,
 dedi opasiga.
 Ta'bi nazmi baland, ozarboyjon turkiysida juda chiroyli gʻazallar bitibdir.
 Yana kamtarlik bilan «Xatoiy» degan taxallus tanlabdir.
- Katta shoirligi rost, dedi Xonzoda begim. Gʻazallarini odamlar qoʻshiq qilib aytganlarini eshitdim.

Shoh meni qabul qilganda, «Bobur podshohning shohligini ham, shoirligini ham ehtirom edyurmiz», dedi. Keyin hazratimning Hirotda kuyga solingan gʻazallaridan bir baytini yod aytib, «Choʻx yaxshi!» deb qoʻydi.

Bobur shohning bu maqtovidan koʻngli iyib, uyalingirab:

- Qaysi gʻazal ekan? - dedi.

Xonzoda begim barmoqlarini lablariga qoʻyib gʻazalni soʻzma-soʻz eslashga tirishar ekan, Mohim begim unga koʻmaklasha boshladi:

- «Mening koʻnglimki, gulning gʻunchasidek tahbatah qondir», deb boshlanurmi?
- Ha, ha, xuddi shu! deb Xonzoda begim ikkinchi satrini oʻzi aytdi: «Agar yuz ming bahor oʻlsa ochilmogʻi no imkondir».
- Shohga bu matla'ning yoqqani bejiz boʻlmasa kerak, – dedi Bobur. – U ham bizga oʻxshab, otasidan yosh qolib, quvgʻinlarga uchrab, koʻp kulfat chekkan ekan. Menga uning tarixini Mirzoxon aytib berdi. Endi Shoh Ismoil dunyoda adolat oʻrnatmoqchi emish.
- Shoh menga ham shuni aytdi, dedi Xonzoda begim. «Adolatni sunniylar oʻn ikki imom bilan birga oʻldirmishlar», dedi. Lekin oʻn ikkinchi imom– Hazrati Madhi oʻlgan emas emishlar, hozir osmondan yerga tushib, sunniylarning jazosini berar emishlar. Shuning uchun shialar shohni «sohibi zamon» deb ulugʻlar emishlar.

Bobur bu yasama e'tiqodlardan gʻashi kelib, bosh chayqadi-yu:

- Taajjub! deb qoʻydi. Marhum Shayboniyxon oʻzini «Xalifayi Rahmon, imomi zamon» deb yurib, oxiri nima boʻldi? Dinni siyosatga aylantirish ne hojat?
- Lekin shialar bilan sunniylarning adovati aslida hokimiyat talashishdan kelib chiqqan emasmi, hazratim? - dedi Mohim.

Islom tarixini yaxshi biladigan Bobur sunniylar bilan shialarning qonli kurashlarini xayolidan oʻtkaza boshladi.

Bu kurash Bobur yashagan davrdan salkam toʻqqiz yuz yil avval – Muhammad paygʻambar oʻlimi bilan boshlangan edi. Muhammad paygʻambar tuzgan davlatni kim boshqarishi kerak? Kim uning davomchisi – xalifi boʻlishi kerak?

Eng yaqin qarindoshni voris qilish tarafdori boʻlganlar Alini birinchi xalif qilib koʻtarmoqchi edilar. Chunki Ali paygʻambarning amakivachchasi edi va uning yagona farzandi Bibi Fotimaga uylangan edi. Ammo Ali choryorlar orasida eng yoshi edi. Qabila udumi, ya'ni sunnaga binoan eng yoshi ulug' va obro'si baland oʻtogʻasi musulmon olamiga bosh boʻlishi kerak edi. Shu sababli keksa Abubakirni birinchi xalif qilib koʻtardilar. Shu bilan birga Ali ham paygʻambarning toʻrt eng yaqin salaflaridan - choryorlaridan biri deb tan olindi, faqat yoshiga qarab, uni Abubakir, Umar va Usmondan keyingi toʻrtinchi oʻringa qoʻydilar. Dushmanlari avval Umarni, keyin Usmonni suiqasd bilan oʻldiradilar. Nihoyat Ali xalif boʻladi. Ammo oradan besh yil o'tar-o'tmas dushman taraf qasdmaqasdiga Alini ham oʻldirdi. Ali tarafdorlari uning oʻrniga oʻgʻillari - Bibi Fotimadan tugʻilgan Hasan va Husanni musulmon olamining boshlig'i deb e'lon qildilar. Ammo Imom Hasan kasallanib oʻldi. Imom Husan Karbalo dashtida sunniylar bilan qilingan jangda halok boʻldi. Shundan keyin xalifalik yana sunniylar qoʻliga oʻtdi-vu, Alining avlodiga mansub boʻlgan barcha imomlar birin-ketin oʻldirilaverdi. Faqat oʻn ikkinchi Imom Muhammad yoshligida sirli bir tarzda yoʻqoldi, uning oʻlik-tirigi topilmadi. Muxoliflari uni oʻgʻirlab ketib oʻldirganlari taxmin qilinsa ham, uning tarafdorlari xalq orasida «Imom Muhammad osmonga

chiqib ketgan, bir kun Imom Madhi nomi bilan qaytib tushib, dunyoda adolat oʻrnatadi», degan bir diniy e'tiqodni tarqatdilar. Adolatsizlikdan azob tortib yurgan juda koʻp sodda odamlar bu gapga ishonadilar. Shialar musulmon olamidagi barcha baxtsizliklarga Alidan oldingi uch xalifani va ularning keyingi avlodlarini sababchi qilib koʻrsatdilar. Sunniylar uzog vagt davlat tepasida turgan va musulmon dinini iuda koʻp mamlakatlarga tarqatgan hokim kuch boʻlganliklari uchun ularning zulmlaridan norozi bo'lgan ko'pgina olimlar, san'atkorlar, dehqonlar, kosiblar va boshqa turli tabaqa vakillari ham shialar tomoniga oʻtdilar. Qadimiy madaniyat markazi boʻlgan Eron va Ozarboyjonda shialarning sunniylarga qarshi kurashi tobora oʻsib bordi. Shoh Ismoil shialarning mana shu kurashidan foydalanib, davlat tepasiga keldi, tarixda birinchi marta shia mazhabini katta bir daylatning diniga aylantirdi ya sunniylarga qarshi gʻazavot e'lon qildi.

Rost, shia-sunniy adovati qanday xunrezliklarga sabab boʻlganini men Hirotda koʻrib dahshatga keldim!
dedi Xonzoda begim va bir voqeani hikoya qilib berdi.

Marvdan keyin Hirot qizilboshlar qoʻliga oʻtgach, bu yerda Shayboniyxon davrida qatagʻon qilingan shialar qasoskorona bosh koʻtardilar. Ular Hirotda Shayboniyxonning barcha ishlariga fatvo bergan sakson yoshli shayxulislom Taftazanini shialarga tutib berdilar. Shialar cholni koʻchaga – xaloyiq orasiga sudrab, olib chiqdilar va darhol sunniy mazhabidan shia mazhabiga oʻtishni buyurdilar. Taftazani bunga koʻnmadi. Shundan keyin shialar uni koʻchadagi bir daraxtga osib oʻldirdilar va jasadini daraxt bilan birga yoqib yubordilar. Buni koʻrgan xolis odamlar shiasunniy dushmanligidan bezor boʻlib, Abdurahmon Jomiy tirikligida yozib ketgan oʻtkir ruboiyni birbirlariga shivirlab aytadilar:

Ey mugʻbachayi dahr, bideh jomi mayam,¹ Ki omad zi nizoyi sunni-yu, shia qayam. Goʻyandki, Jomiyo, chi mazhab dori? Sad shukrki, sagi sunni-yu, xari shianayam!

Bu ruboiyning soʻzlari ogʻizdan-ogʻizga oʻtib, shialarning qulogʻiga ham yetib boradi. Ayniqsa, «shianing eshagi» degan ibora ularning jonini chiqaradi. Qizilboshlar bidʻatga berilgan hirotlik shialar va yosh bezorilar toʻdasini Abdurahmon Jomiyning maqbarasiga boshlab boradilar. Qabr ustiga qoʻyilgan marmar toshni koʻchirib tashlaydilar. Toshga oʻyilgan «Jomiy» soʻzidagi arabcha «¬ning nuqtasini oʻchirib, «¬ tarzida harfning yuqorisiga qoʻyadilar. Natijada ulugʻ shoirning nomi «Xomiy» deb oʻqiladigan boʻladi. Johillar bu bilan ham qanoat qilmaydilar. Jomiy maqbarasiga Navoiy oʻrnattirgan zarrin oʻymakorlik goʻzal eshikni sindirib, maqbara bilan birga yondirib yuboradilar.

Bu voqeani opasidan eshitgan Bobur gʻazab aralash hayrat bilan soʻradi:

- Nahotki Shoh Ismoil shunday jaholatga yoʻl bergan boʻlsa?
- Mening bilishimcha, bu ishdan shoh bexabar qolgan. Hirotdagi mudhish ishlarga shohning Xuroson boʻyicha noibi Najmi soniy boshchilik qilgan.
- Ne boʻlganda ham hazrati Jomiy ming marta haqlar: shia-sunniy nizolari koʻngilni ozdiradigan darajada xunuk!.. Hayhot, dunyoning ishlari hamisha chigal! Tugʻishganlardan-ku, doʻst-yor topolmadim. Endi taqdir menga Shoh Ismoildek bir mard, tanti, fozil doʻst berdi, deb suyunsam, buning ham ishkal ishlari bor ekan.

¹ Tarjimasi: Ey dunyoning yosh otashparasti, menga mayim jomini bergilki, sunniy va shia nizolaridan qusgim kelmoqda. Desalar: Jomiy, sen qaysi mazhabdansen? Yuz shukrki, sunniyning iti-yu, shianing eshagi emasman!

Mohim begim Boburning koʻngliga choʻkkan gʻuborni tarqatgisi kelib, kulimsirab gapirdi:

- Gul tikansiz boʻlmas ekan-da, hazratim!

Bobur xotinining jilmaygan yuziga tikilib qaradi-yu, oʻzining ham chehrasi ochila boshladi. Shuncha ayriliqlardan keyin sevimli opasi bilan yana uchrashgani, bu quvonchga Shoh Ismoil tufayli muyassar boʻlgani takror esiga tushdi. Qunduzda shayboniyzodalardan ixlosi qaytgan yigirma ming kishilik qoʻshin moʻgʻul beklari boshchiligida Bobur huzuriga kelgani va uning xizmatiga oʻtgani yana yodiga tushdi-yu, koʻnglini yayratib oʻtdi. Bobur koʻzini Mohim begimdan olib, opasiga qaradi:

– Endi hech bir gulning tikanidan qoʻrqmasmiz! Maqol borki, guli uchun tikani ham noiloj sugʻorilur... Shoh Ismoil shunchalik odamgarchilik qilibdi! Mayli!

Bobur oʻrnidan turdi. U shohdan kelgan elchi bilan uchrashishi kerak edi. Mohim uni eshik oldigacha kuzatib bordi. Bobur eshikdan chiqayotib, Xonzoda begimni qayerga joylashtirish va qanday e'zozlash haqida xotiniga koʻp gapirib oʻtirmadi-yu:

- Egachimni onam oʻrnida koʻrgaysiz! dedi. Shu bir ogʻiz gapdan hamma narsani anglagan Mohim ham:
- Jonim bilan! deb qoʻlini koʻksiga qoʻydi. Sizdan ham bir iltimos, hazratim.
 - Xo'sh!
- Biz tikan deb oʻylagan narsalar ogʻuli tigʻlar boʻlib chiqmasin. Ehtiyot boʻling!

Bobur xotinining hamma narsaga fahmi yetadigan ziyrak bir doʻst ekanini hozir yana bir marta sezdi-yu, unga mehri tovlanib:

- Xotirjam boʻling! - dedi.

Soʻng qalbi uchrashuv quvonchiga, mehribon ayollar nafosatiga va ma'sum bolalar zavqiga toʻlib, qoʻrgʻon hovlisiga chiqdi. Devonxonaga yaqinlashganda elchilar bilan boʻladigan muomalani koʻz oldiga keltirdi-yu: «Mol-u dunyoni ayamaslik kerak» degan niyatni koʻngliga tugdi.

3

Boburning buyrugʻi bilan Vali xazinachi bisotida bor eng qimmatbaho dur-u gavharlardan, Badaxshon la'lilari-yu oltin bezakli kiyimlardan, kamyob tigʻlar va buyumlardan shohga alohida, uning elchisiga alohida in'omlar hozirladi. Saroy bovurchilari, bakovul va yasovullar ikki kecha-yu ikki kunduz yugurib-yelib, Qunduzda hali misli koʻrilmagan shohona ziyofat va bazmga hozirlik koʻrdilar. Ulkan ziyofat uchun hisoriy qoʻylarning oʻzidan yetmish-saksontasi soʻyildi. Togʻlardan, oʻrmon va daryolardan ovlab kelingan gʻozlar, kakliklar, ohular soni bundan koʻproq edi.

Shoh Ismoilning mehmondorchiliklarini koʻp koʻrgan odamlardan biri – Boburning amakivachchasi Mirzoxon edi. U Boburga bir necha marta:

– Shoh elchilari chogʻirsiz ziyofatni ziyofat oʻrnida koʻrmaslar, – deb aytdi.

Boburning eshik ogʻasi Qosimbek esa ichkilikni juda yomon koʻrardi. Boburning oʻzi ham hali beklari bilan biror marta ichkilik bazmi oʻtkazgan emas, faqat Kobulda Mohimga uylangandan keyin xushboʻy chogʻirlardan bir-ikki marta tatib koʻrgan edi.

Hozir uning koʻnglida koʻpirib turgan quvonch bilan birga Shoh Ismoilga va shialar bilan sunniylarning dushman munosabatlariga borib taqaladigan qandaydir gʻashlik, chigallik bor edi. Bu gʻashlikni bugun faqat may bilan tarqatish mumkinga oʻxshardi. Bundan tashqari, mehmonlarning koʻngli uchun ham Boburning ichishi zarur edi. Uning amri bilan Qunduzdan topish mumkin boʻlgan eng toza chogʻirlar, eng oʻtkir maylar toptirib keltirildi.

Gulgun parchadan zar yoqali abo kiygan oʻspirin soqiylar oltin koʻzalardan oltin-kumush surohiylarga may quyib, avval Boburga, soʻng uning yonida oʻtirgan shoh elchisi Muhammadjon eshik ogʻasiga, elchidan nariga choʻkkalagan Mirzoxonga navbatma-navbat uzatdilar. Ziyofatda Bobur tomonidan yuzdan ortiq a'yonlar, beklar va mulozimlar qatnashmoqda edilar. Avvalgi ziyofatlarda Boburdan va Qosimbekdan yashirib, may ichadigan koʻpchilik beklar endi chogʻir toʻla qadahlarini qoʻllarida bemalol tutgan holda birbirlari bilan shoʻx-shoʻx koʻz urishtirishar, quvnoq iljayishar va podshohning ishorasini kutishar edi. Poygakda kichik beklar orasida oʻtirgan Tohir ham qoʻlidagi may toʻla kumush qadahga jonli bir narsaga qaraganday ehtiyot bilan qarab qoʻyardi.

Mirzoxon yonidagi elchiga shivirlab, izoh berdi:

- Oliy mehmon, siz gʻaroyib bir hodisaning guvohidirsiz. Bobur podshoh saroyida bugun birinchi marta chogʻir majlisi!.. E'tibor bering: majlisda favqulodda bir hayajon hukmron!

Boshiga qizil jigʻalik katta salla oʻragan, soqoli xina bilan boʻyab qizartirilgan burgutburun elchi Boburga maroq bilan tikildi.

Bobur qoʻlidagi qadahni uchib ketishi yoki choʻqib olishi mumkin boʻlgan notanish bir qush kabi avaylab ushlab turardi. Odamlar uning soʻzini kutayotganlarini sezib, ovozi tovlanib gapira boshladi:

– Oliy zotlar davrasida shodiyona kunlarda uzum suvidan halol-u pokiza qilib tayyorlangan chogʻir ichmoq ota-bobolarimizdan qolgan odatdir. Hayotimizda shodlikdan koʻra gʻam-u gʻurbat koʻproq edi, shuning uchun hanuzgacha chogʻir majlisiga mayl koʻrsatmadik. Hirotda Badiuzzamon mirzo bilan Muzaffar mirzodek tojdor xeshlarimiz biz uchun orasta bazmlar berib, chogʻir taklif qilganlari majlis ahliga ma'lum boʻlsa kerak. Oʻshanda ham

biz uzrlar aytib, chogʻirdan oʻzimizni tortgan edik, chunki u mahallarda may ichib, xursandchilik qilgʻudek shodmon emas edik. Tangrim bizni shod-xurram kunlarga mana endi yetkazdi. Biz bu mas'ud kunlarga Shoh Ismoil hazratlarining sharofatlari bilan yetishdik. Bugungi shod-xurramlikni bizga oliy mehmonimiz Muhammadjon eshik ogʻasi janoblari keltirdilar! Shuning uchun bizning birinchi chogʻir majlisimiz Shoh Ismoil hazratlariga cheksiz ishonch va ehtiromlarimizdan kichik bir nishona boʻlgʻay! Birinchi qadahimiz esa shohning moʻtabar elchisi Muhammadjon eshik ogʻasi janoblariga yuksak hurmatimizning isboti boʻlgʻay!

Bu soʻzlardan koʻngli iyib, chuqur koʻzlari olovlanib ketgan elchi oʻrnidan turib, Boburga egilib ta'zim qildi. Soʻng joyiga oʻtirib, qoʻlidagi chogʻirni oxirigacha sipqardi. Pastda oʻtirgan sozandalar «Sarvi navo» kuvini chala boshladilar. Dasturxonga kivik va kaklik kaboblari tortildi. Eng mazali taomlar orasida yana ikki-uch qayta may ichildi. Odamlar endi oʻzlarini boyagidan xiyla erkin seza boshladilar. Qahqaha, oʻyin-kulgi avjiga chiqdi. Quvnoq, shoʻx kuylar ketidan yana alyorlar aytildi. Nihoyat, soʻz navbati shoh elchisiga keldi. Shunda Muhammadion eshik ogʻasi yonidagi mulozimga nimadir deb shivirladi. Mulozim bosh irgʻab, von eshikdan chiqib ketdi-vu, navbatdagi quvnoq kuy tugagan paytda ustiga bir necha qavat og ipak yopilgan gandaydir sovgʻani oltin barkashga solib koʻtarib kirdi. Muhammadjon eshik ogʻasi Shoh Ismoilning Boburga berib yuborgan maktubini va oltin-kumush in'omlarini kunduz topshirgan edi. «Endi bu yana nima ekan?» deb hamma o'tirganlar oltin barkashga tikilib qoldi. Umumiy jimlikda qizilbosh bek barkashdagi sovgʻa bilan Boburning qarshisiga ta'zim qilib keldi. Boburga yaqin oʻtirgan Muhammadjon eshik ogʻasi oʻrnidan turib, gap boshladi:

– Sulton Zahiriddin Muhammad Bobur bahodir hazratlarining sohibi zamon Shoh Ismoil hazratlari ya choʻx yuksak, choʻx semimiy hurmatlari varligʻina alhol bizim ishonchimiz kamil oʻldi. Shu sebebli Shoh Ismoil hazratlari yubormish muqaddas in'omni Bobur podshoh hazratlariya topshirmogʻa ijozat vergaysiz!

Elchi oltin barkashdagi sovgʻaning ustidan ipak pardani oldi. Bobur yoqut va dur bilan bezalgan nafis oq ipak sallani koʻrdi. Sallaning tepasiga oʻn ikki imomning qonini eslatuvchi qizil jigʻa suqib qoʻyilgan edi. Salla ancha katta – Bobur oʻramlarning soni ham shahid boʻlgan imomlar kabi oʻn ikkita ekanini taxmin qilib bildi. Shialarning e'tiqodiga binoan, bu oʻramlarning har biri – bir imomning ruhi uchun muqaddas makon edi. Ichgan chogʻirdan yuzi qizarib, koʻzlari yaltillab turgan Bobur oʻzining a'yonlari orasida shivir-shivir boshlanganini payqadi-yu, kulimsirab Qosimbek tomonga qaradi. Ammo Qosimbek va undan narida oʻtirgan Xoʻja Xalifa nomli shayxulislom oltin barkashdagi dastorga jirkanib va, hatto, qoʻrqib qaramoqda edilar.

Chunki Boburning oʻzi ham, Qosimbek ham, ziyofatda oʻtirgan boshqa sunniy a'yonlar, mulozimlar ham choryorlarning hurmati uchun boshlariga toʻrt oʻram qilingan salla oʻrar edilar. Kichikligidan Olloh-u Taologa, paygʻambar va choryorlarga cheksiz ishonch va e'tiqod ruhida tarbiyalangan odamlar boshlaridagi sallalarining toʻrt oʻramida toʻrt choryorning ruhi yashaydi, deb ishonar edilar. Shialar shu choryorlarning uchtasini tan olmay haqorat qilishar, ularning oʻn ikki oʻramlik sallalari esa Abubakir, Umar va Usmonlarning avlodlariga qarshi kurashgan shia imomlarini ulugʻlar edi.

Shialikni muqaddas choryorlardan yuz oʻgirish, dindan chiqib, rofiziy boʻlish, deb oʻrgangan keksa Qosimbekka oltin barkashdagi sallaning mayin yiltirgan ipagi – ilon terisining yiltirashidek koʻrindi. Qosimbekning nazarida sallaga qadalgan yoqutlarning choʻgʻday yonishi zaharli ilonning qizgʻish koʻzlari qonga toʻlib, yonishiga oʻxshardi. Muhammadjon eshik ogʻasi Boburga yana bir marta ta'zim qildi-yu, Shoh Ismoil shaxsan berib yuborgan shu muqaddas dastorni qoʻliga olib, boshiga kiyishini undan iltimos qila boshladi. Oʻnlab koʻzlar Boburga «Ne qilarkin?» deb tikildi. Qosimbek Xoʻja Xalifaga tahlika bilan shivirlab:

 Makr-u hiyla bilan hazratimni shia mazhabiga oʻtkazmoqchilarmi? – degani Boburning qulogʻiga chalindi.

Bobur agar shu dastorni boshiga qoʻysa shia mazhabiga oʻtganday koʻrinishi mumkinligini endi payqadi. U ichgan chogʻiridan durustgina kayf qilgan edi. Hozir vaziyat unga Qosimbek qoʻrqqanchalik vahimali tuyilmas edi. Choryorlar, oʻn ikki imom ham Bobur uchun bundan toʻqqiz asr burun oʻtgan tarixiy shaxslar edi. Uzoq oʻtmishga aylangan qonli dushmanlikni bugun davom ettirish kimga kerak?

Qizilbosh bek hamon Bobur qarshisida tiz choʻkib, oltin barkashdagi sallani unga tutib turibdi. Shoh elchisi unga iltimoskorona ta'zim qilyapti. Ular orqali Shoh Ismoil goʻyo Boburga hamkorona qoʻl choʻzyapti. Bobur bu qoʻlni qaytarsa, shoh bilan orani uzishi kerak boʻladi. Keyin shayboniyzodalar shoh bilan ittifoq tuzishadi-yu, Boburning Vatanga qaytadigan yoʻllarini yana bekitishadi. Bobur esa hozir butun vujudi bilan Vataniga qaytishni istaydi. Bu istagi yoʻlida togʻ kelsa kemirib, suv kelsa simirib oʻtmoqchi boʻladi.

Bobur elchiga muloyim koʻz tashlab:

– Shoh Ismoil hazratlarining in'omlari biz uchun behad aziz, – dedi va barkashdagi sallaga qoʻl choʻzmoqchi boʻldi.

Shunda Qosimbek ogʻzini uning qulogʻiga yaqinlashtirib, xavotir bilan shivirladi:

– Hazratim, zinhor boshingizga kiymang! Zinhor! Bu soʻzlar elchiga ham eshitildi va uni ranjitgani avzoyi oʻzgarib ketganidan sezildi.

Suv quyganday jimjitlikda Bobur Muhammadjon eshik ogʻasiga mayin kulimsirab qaradi:

 Oliy mehmonimiz imomiya¹ mazhabidanlar, shundaymi?

Elchi tasdiq ma'nosida bosh irg'adi. Bobur yana o'shanday muloyimlik bilan so'zida davom etdi:

- Imomiyalar ham Muhammad alayhissalomning ummatlarimi?
 - Alhamdulillo! deb elchi darhol kalima keltirdi. Shundan keyin Bobur Qosimbek tomonga oʻgirildi.
- Siz ham Muhammad ummatimisiz, janobi amirul umaro?

Qosimbek ham kalima keltirdi-yu, oxirida:

- Hazratim, sizni iloho chohoryori bosafolar qoʻllabquvvatlasinlar! - deb qoʻshib qoʻydi.

Choryorlar tilga olinishi bilan elchining rangi oʻchib, labi asabiy pirpiradi.

- Janob Muhammadjon eshik ogʻasi! dedi Bobur tez.
- Qur'oni sharifda aytilganki, «Qulli muslimina ixvatun». Ya'ni, barcha musulmonlar ogʻa-inilardir. Biz hammamiz bir dindamiz. Demak, hammamiz ogʻa-inilardek yaqin boʻlmogʻimiz kerak. Biz sizning musulmonlik e'tiqodlaringizni hurmat qilganimiz kabi, siz ham bizning, deb Bobur ikki qoʻlini yoyib, barcha bek va mulozimlarini koʻrsatdi, musulmonlik e'tiqodlarimizni hurmat qilursiz, deb ishonamiz!

Elchi endi bir oz yumshab, ustma-ust bosh irgʻadi:

- Ushbu muqaddas armugʻon ham bizni sizlara buyuk ehtiromimiz alomatidir!

Bobur endi Qosimbekka yuzlandi:

– Hazrati Alini siz-u biz hamisha boshimiz ustida olib yuribmiz, shundoqmi?

¹ Imomiya - shia mazhabining rasmiy nomi

Qosimbek – sallasidagi toʻrt oʻramning biri – Hazrati Alining ruhiga makon ekanini oʻylab, qoʻlini koʻksiga qoʻydi:

- Shundoq, hazratim.
- Muhammad alayhissalomning yagona farzandlari boʻlgan Bibi Fotima biz uchun ham muqaddas volidadirlar, shundoqmi?
 - Shundoq, hazratim.
- Shundoq boʻlsa, Hazrati Ali bilan Bibi Fotimaning aziz avlodlari boʻlgan imomlarni biz ham e'zozlasak musulmonlikka toʻgʻri kelurmi, yoʻqmi?

Boya Boburga jon kuydirib haligi gapni uning qulogʻiga shivirlagan Qosimbek podshoni niyatidan qaytarolmasligini, shohning bu maxsus sovgʻasini Bobur qabul qilmay iloji yoʻqligini endi sezdi. U koʻpchilikning oldida Boburga tan berganday boʻlib, aslida uni yoqlagisi kelib bosh egdi:

- Podshoh hazratlari, siz haqsiz, qulingizni gustohligim uchun afv eting!

Bobur Qosimbekka mamnun koʻz tashlab:

- Ma'zursiz, dedi. Soʻng dastor solingan ogʻir barkashni tutib turaverib qoʻllari tolib ketgan qizilbosh bek tomonga oʻgirildi. Bobur dastorni dadil bir harakat bilan ikki qoʻllab barkashdan olganda, uning oʻnlab bek va mulozimlari vahima bilan: «O!» deb yuborishdi. Bobur dastorni qoʻlida tutgan holda:
- Shoh Ismoil hazratlari oʻzi muborak iliklari bilan yuborgan bu armugʻonni biz koʻzga surgaymiz! – dedi-yu, dastorni koʻzi aralash peshonasiga tekkizib oldi.

Muhammadjon eshik ogʻasining yuzi quvonchdan balqib ketdi:

- Mutashakkiram, podshoh hazratlari, mutashakkiram!

Lekin Boburning bek va mulozimlari orasida, xususan, yaqinda unga kelib qoʻshilgan moʻgʻul beklari

orasida hayrat, qoʻrquv va koyinish ohanglariga toʻla bir shovur-shuvur eshitildi.

Bu gʻovurdan Qosimbekning rangi oqarib ketdi. Muhammadjon eshik ogʻasi esa Boburni shia mazhabiga oʻtkazib, katta gʻalabaga erishganday shodlanib gapirdi:

- Podshoh hazratlari, biz umid edyurmizki, siz shoh hazratlarining buyuk madadlari ila yana Samarqand taxtiya chiqqaningizda aziz boshingizda shu muqaddas dastorni koʻrishga muyassar oʻlurmiz!
- Tangri bizni siz aytgan baxtiyor kunga yetkizsa, bu dastorni toj oʻrnida kiyurmiz. Shoh Ismoil hazratlariga shu ahdimizni borib aytgaysiz!

Bu gaplardan soʻng moʻgʻul beklari orasidagi asabiy shovur-shovur yana kuchaydi. Shoh elchisi esa Boburning dadil odamligiga, Shoh Ismoil bilan mustahkam ittifoq tuzish uchun sunniyparast beklarining har qanday qarshiliklarini yengib oʻtishi mumkinligiga endi ishondi. Mana shu ishonch Boburning shoh elchisi bilan ertasi kuni olib borgan muzokaralarini ancha yengillashtirdi.

Shoh Ismoilning Bobur bilan ittifoq tuzishdan maqsadi – Movarounnahrga u bilan birga qoʻshin tortib borish va shayboniyzodalarni birga tor-mor qilish edi. Bobur shayboniyzodalar ustidan gʻalaba qilishni nechogʻlik istamasin, Movarounnahrga oʻz qoʻshini bilan mustaqil kirib borishni istardi. Chunki agar u asosiy gʻalabani oʻzi mustaqil qoʻlga kiritmasa, Vataniga obroʻ bilan qaytolmasligini, yovlari uni «Shoh Ismoilning nayzasiga minib, kirib keldi!» deb malomat qilishlarini sezib turardi. Bobur Shoh Ismoilning Marvda erishgan gʻalabasi yetarli ekanini, endi ular dam olishlari kerakligini, shayboniyzodalarni Hisordan, soʻngra Samarqanddan quvib chiqarishni endi Bobur zimmasiga olishi kerakligini elchiga qayta-qayta aytib koʻrdi. Lekin Shoh Ismoil ham

Samarqandga intilmoqda edi, agar uning bu intilishi amalga oshmasa, Bobur bilan ittifoq tuzishning qizigʻi qolmas edi. Elchining gapidan buni sezgan Bobur muzokarani boshqa yoʻnalishga burdi.

Shoh Ismoilning askarlari togʻ yoʻllarida qiynalib, minglab chaqirim ortiqcha yoʻl yurib, Qunduz va Hisorga kelib yurishi ne kerak? Shoh qoʻshini karvon yoʻli bilan Termiz va Boysun orqali Samarqandga qarab otlansin. Bobur esa hozir Hisorga yaqin turibdi. Bir hamla bilan Hisorni koʻchmanchi sultonlar qoʻlidan tortib olishga kuchi yetadi. Keyin u Samarqandga janub tomonidan yoʻl ochadi va Shoh Ismoilning qoʻshini bilan Shahrisabz – Qarshi atroflarida uchrashadi.

Mantiqan asosli boʻlgan bu fikrga shoh elchisi e'tiroz qilolmadi-yu, Boburning taklifini qabul qildi.

Bobur elchi bilan tuzgan bu bitimni Shoh Ismoilning tasdigʻidan oʻtkazish uchun Mirzoxonni Tabrizga vakil qilib yubordi-yu, oʻzi Hindikush togʻining shimoligʻarbiy etaklariga toʻplangan qoʻshinlarini jangga tayyorlay boshladi.

Bahor oxirlab qolgan kunlarning birida Bobur Qosimbek bilan adir yoʻlidan moʻgʻul beklarining qarorgohlariga otliq ketmoqda edilar. Shunda Qosimbek Boburni yoʻldan chetroqqa boshlab chiqib, bir shumxabarni aytdi. Shoh Ismoil yuborgan shia dastorini Bobur koʻziga surib, elchiga quyuq va'dalar berganidan moʻgʻul beklari qattiq ranjigan emishlar, uni «choryorlardan voz kechib, imomiya mazhabiga oʻtdi», deb fitna uyushtirgan emishlar. Bundan besh-toʻrt yil burun Kobulda Yegu Salim, Sherquli degan moʻgʻul beklari Boburga suiqasd qilmoqchi boʻlgan paytlarida qoʻlga tushgan, Bobur ularni yaqin tarafdorlari bilan qatl ettirgan edi. Shayboniyzodalardan aynib, yaqinda Boburga kelib qoʻshilgan moʻgʻul beklarining orasida oʻsha oʻldirilganlarning urugʻdoshlari bor boʻlib, ular

kek saqlab yurgan ekanlar. Endi shu beklar yashirincha til biriktirib, Boburni Qunduzda oʻldirmoqchi yoki Kobulga quvib yubormoqchi emishlar. Uning oʻrniga Boburning qoʻlida oʻsgan togʻavachchasi, marhum Olachaxonning oʻn yetti yashar oʻgʻli Saidxonni taxtga chiqarmoqchi emishlar.

– Kimlar shunday qilmoqchi? Kimlar?! – deb Bobur gʻazabdan titrab soʻradi.

Qosimbek orqasiga oʻgirilib qaradi. Mulozim va xos navkarlar uzoqda qolgan, ovoz ularga eshitilmaydi. Shunday boʻlsa ham Qosimbek tovushini pasaytirib:

- Qambarali Salloh, Sayidali Shakma, deb bir qancha fitnachilarning nomlarini aytdi.
- Iblislar! Qachongacha bular mening yelkamga tigʻ ururlar?! Andijondagi Ahmad Tanbal ham shu toifadan edi! Bas! Hammasini tuttiring! Pora-pora qilib, goʻshtlarini quzgʻunlarga tashlaturmiz!

Qosimbek otining jilovini tortib, togʻ etaklaridagi minglab oʻtovlarga xavotir bilan koʻz yugurtirib chiqdi.

– Hazratim, qarang, bular juda koʻp. Navkarlari bilan yigirma ming!

Koʻp asrdan beri Movarounnahrda yashaydigan, turkiy tilda soʻzlashadigan, musulmon dinini qabul qilib, uning xurofotiga qattiq berilgan bu moʻgʻul beklari va navkarlarining kasbi harbiy ish edi. Qaysi podshoh ulufani koʻproq bersa, qaysi jangdan oʻlja yaxshiroq tushadigan boʻlsa, bularning koʻpini oʻsha podshoh va oʻsha jang oʻziga jalb qilar edi. Xisravshoh xizmatidan Shayboniyxonga oʻtgan, uning magʻlubiyatidan soʻng Boburga kelib qoʻshilgan bu yollanma askarlar beqarorlikka oʻrgangan edilar.

Agar Bobur fitnachi beklarni tuttirib jazolatadigan boʻlsa, ularning urugʻ-aymoqlari arazlab ketib qolishi, soʻng qasd olishning payiga tushishi aniq edi. Agar ichki urush boshlanib ketsa, keyin Bobur shayboniyzodalar qarshisida zaiflashib, yengilishi muqarrar edi. Bobur shuni oʻylaganda, qalbidagi gʻazab oʻrnini ogʻir xavotirlik tuygʻusi egalladi.

- Mudom insof-u imonga xilof xiyonatlar shu moʻgʻul beklaridan sodir boʻlur! Yana bular din-u mazhabni himoya qilmoqchilarmi?!
- Butun jaholat ana shundoq nodonlardan chiqadida, hazratim! Qulingiz ana shu johillarning kayfiyatini sezib, dastorni olmang, degan edim.
 - Lekin olmay ilojim bormidi?
- Yoʻq edi, hazratim, siz mutlaqo toʻgʻri qildingiz! Endi buni hammaga yaxshilab uqtirish kerak. Moʻgʻullarning orasida ham yaxshilari bor, fitna tayyorlanganini menga moʻgʻul avlodidan chiqqan togʻavachchangiz Saidxonning oʻzi kelib aytdi. «Hazratimdan iltimos qiling, iloji boʻlsa meni Andijonga yuborsinlar», dedi.
- Lekin Saidxon... bergan tuzimizni oqlabdir... Durust!
- Boshqa insoflik moʻgʻullar ham koʻp, hazratim. Siz bir pora yomon beklarning fitnasidan koʻp ma'yuslanmang. Faqir chorasini oʻylab qoʻymishmen.
 - Xo'sh, qani?
- Saidxon sizga sadoqatini isbot qildi. Uni xon koʻtarmoqchi boʻlgan besh-oʻnta fitnachi beklarga bir-ikki ming navkarlari bilan ruxsat beraylik. «Bor, Andijonni shayboniyzodalardan himoya qilib ol!» deylig-u hammalarini Qorategin orqali joʻnatib yuboraylik. Shu bilan biz ham fitnachilardan xalos boʻlurmiz, ular ham istagan xonlarning xizmatiga oʻtib tinchirlar.
 - Qolganlari yana bir kun xiyonat yoʻliga oʻtsa-chi?
- Qolganlari bilan keyin men oʻzim yakkama-yakka gaplashib chiqurmen. «Podshohdan gunohlaringni soʻrab oldim, bir marta shafe boʻldim, ikkinchi marta boʻlmasmen», deb tushuntirurmen. Bu ham kifoya qilmasa, shubhaliroqlarining ketiga ziyrak

xufiyalardan qoʻyib qoʻyganmen. Agar yana buzuqlik qilsalar, unda tutib keltirurmen, keyin istaganingizcha jazo berursiz!

4

Nihoyat, barcha rejalar gaplashilgan tarzda amalga oshdi-yu, Boburning moʻgʻullar bilan birgalikda yigirma besh mingdan oshadigan qo'shini yoz kunlarida Amudaryoning Panj deb ataladigan yugori ogimidan oʻtib, Koʻlob orgali Vaxsh vodiysiga yoʻnaldi. Shayboniyzodalar Shoh Ismoil qoʻshinining Termiz tomondan kelayotganini, ular Bobur askarlari bilan qoʻshilsa, yengish mushkul boʻlishini bilar edilar. Shuning uchun ular Ubaydulla Sulton boshliq bir qism qoʻshinlarini Qarshi va Samarqandda qoldirishib, asosiy kuchlarini Hisorga yigʻib keldilar. Temur Sulton, Jonibek Sulton, Hamza Sulton va Mamat Sulton boshliq o'ttiz ming otliq qo'shin cho'l va vodiylardan chiqib, baland togʻ oraliqlariga shitob bilan koʻtarilib kelmoqda edi. Ular Bobur qoʻshinini Vaxsh daryosidan oʻtkazmaslikka intilar edilar.

Biroq yuqoridan tez tushib kelayotgan Bobur butun askarlari bilan Vaxsh boʻyiga dushmanidan ancha oldin yetib bordi va Puli Sangin¹ degan koʻprikdan oʻtdi. Soʻng odam oyogʻi tegmagan tik qoyatoshlar va zovlar orasidagi bahaybat daraning dahanasini² va harbiy jihatdan qulay balandliklarni egallab oldi. Pastdan yopirilib chiqib kelgan yov qoʻshini torgina yoʻl bilan daraning ichiga kirishga jur'at etolmay toʻxtadi.

Sultonlar ot ustida turib, ancha vaqt kengashganlaridan keyin Temur Sulton boshliq oʻn mingtacha

 $^{^{\}rm l}$ Puli Sangin – «Tosh koʻprik». Hozirgi Norak shahrining yaqinida boʻlgan.

² Dahana – daraning ogʻzi, kirib-chiqiladigan joyi.

askar daraning oʻng tomoniga oʻtdi-yu, Bobur turgan balandlikka orgadan aylanib kelmoqchi boʻldi. Temur Sultonning orgadan chiqib kelib toʻlgʻama ishlatishini Saripul jangida koʻrgan Bobur uning niyatini fahmlab qoldi. Darhol Mirzoxon boshliq oʻn ming otliqni yov aylanib oʻtayotgan tomonga joʻnatdi. Aylanib o'tayotganlardan ko'ra to'g'ridan borayotganlar moʻljallangan joyga tezroq yetdilar va balandlikning Vaxsh daryosigacha borib taqaladigan hamma muhim nuqtalarini ishgʻol qildilar. Vaxsh uchurimli qoyalar orasidan shunday dahshat solib ogar ediki, uning qirgʻogʻini yoqalab oʻtib boʻlmas edi. Temur Sulton qarshisidan chiqqan askarlarning safini yorib oʻtmoqchi boʻlib, peshingacha jang qildi, lekin muxolif tomon yuqoridan tosh yumalatib, oʻq yogʻdirib, ularga yoʻl bermadi.

Ochiq choʻllarda oʻsgan, tekis vodiylarda dadil harakat qiladigan sultonlar hammayog'i bekik daralar va tik qoyatoshli togʻlar orasida juda qiynalib qoldilar. Ularning dashtiy otlari ham togʻda durust chopolmas edi. Ba'zilari tik yonadan tushayotganda togʻda yurishga moʻljallanmagan quyushqon va avillari uzilib ketar, egalari otlaridan yiqilib tushishar edi. Shunday yiqilib tushganlardan birini tutib olib, Boburning oldiga «til» tariqasida keltirdilar. Bobur «til»ni soʻroq qildirib, shayboniyzodalar orasida ularning eng iste'dodli sarkardasi bo'lgan Ubaydulla Sulton yoʻqligini, boshqalari durustroq olishishning epini topolmay, chekinishga ham jur'at etolmay, ikkilanib turganini aniqladi. Bobur yov qoʻshini saflanib turgan pastlikning yaqinida suv yoʻqligini bilar edi. Havo issiq. Kuni bo'yi yugurib-yelib charchagan odamlar va otlar hali zamon changab, suv qidirishga tushishi muqarrar. Suv esa yov turgan joydan besholti chaqirimcha orqada edi. Kech kirib, kun bota boshlaganda Bobur odamlariga: «Bugun endi jang

boʻlmadi, ertani kutamiz», deganday qilib, otidan tushdi. Tepalikda Boburning yonida turgan mingdan ortiq askarlar ham otdan namoyishkorona tusha boshladilar.

Buni daraning tashqarisidagi shayboniyzoda sultonlar koʻrib turardilar. Lekin daraning ichida – sultonlarga koʻrinmaydigan joyda Boburning asosiy kuchlari otdan tushmay, saf tortib, hujumga shaylanib turar edilar.

Tepalikda turgan Bobur yon-veridagi barcha navkarlari bilan kechki paytda otdan tushganini va navkarlar safini tarqatib yuborganini koʻrgan sultonlar «bugun chindan ham jang boʻlmaydi» deb oʻylagan boʻlsalar kerak. Ular ham saflarini buzib, ba'zilari otlarini yetaklagan holda orqaga burilishdi va suv izlay boshlashdi.

Boburga shu kerak edi. U sakrab otiga mindi-yu, dara ichida yovga koʻrinmay tayyor turgan bek va navkarlariga qarab qichqirdi:

- Yogʻiy chekindi! Zafar bizniki boʻlur! Ta'qib eting! Bu buyruq ogʻizdan-ogʻizga oʻtib, bir lahzada butun saflarga tarqaldi. «Yov qochsa, botir koʻpayadi» deganlaridek, yov chekinganiga ishongan daradagi askarlar dahana tashqarisiga sherday dadil hamla qilib chiqdilar. Bobur ham qilich yalangʻochlab, tepadagi tugʻbardorlari va xosnavkarlari bilan pastga otildi. Shayboniyzodalar dara ichidan va tepadan togʻ koʻchkisiday otilib tushib kelayotgan oʻn besh ming qoʻshin qarshisida shoshib qoldilar. Ular buzilgan saflariga qaytadan tartib berishga ulgurolmay, vahima ichida qochishga tushdilar.

Bu qochishni oʻng tomonda Mirzoxon bilan olishayotgan Temur Sultonning odamlari ham koʻrdilar-u yakkalanib, qurshovga tushib qolishdan qoʻrqib, narigi bir daraga qarab chekindilar. Bobur xosnavkarlari bilan birga yovning asosiy kuchlarini ta'qib qilib bormoqda edi. Gʻira-shira qorongʻilik tushganda uning Muhammad Sulton Doʻlday degan beki Hamza Sultonning qoʻshinini tor-mor qilib, oʻzini asir olib keldi. Xufton kechroq Xoʻja Kalon boshliq navkarlar Mahdi Sultonni ham qoʻlga tushirib keldilar.

Qorakoʻl va Andijonda boʻlgan koʻpgina qirgʻinlarning sababchilari mana shu sultonlar edi. Bobur ularni oʻlimga hukm qildi.

5

Tiniq kuz osmonida oq ipakdan ham nafis mezonlar uchadi. Samarqand bogʻlarida katta dona anorlar yetilgan, sohibi uzumlar va naqsh olmalarning eng shirinlari qolgan payt. Shaharning barcha darvozalari ochiq, kirdi-chiqdi bemalol. Oʻn kundan beri Samargandda na go'shin bor, na bir hokimiyat. Shayboniyzodalar Vaxsh boʻyida Boburdan vengilganlaridan keyin Gʻuzor va Qarshi atroflarida vana astovdil bir jang qilmoqchi boʻlib, kuch toʻplab koʻrdilar. Biroq Boysun togʻlaridan narida Bobur qoʻshiniga Shoh Ismoil yuborgan oʻttiz ming qizilbosh askari kelib qoʻshilgani ma'lum boʻlgandan keyin sultonlar ikkinchi marta magʻlubiyatga uchrashdan qoʻrqdilar-u Qarshi, Buxoro va Samarqandni jangsiz tashlab chiqdilar. Faqat ular dushmanlariga zaxira qoldirmaslikka tirishib qoʻllariga tushgan hamma ot-ulov, mol-hol, don-dunni talab olib ketdilar. Shu munosabat bilan koʻchmanchi qabilalarning yana bir talon-torojini boshdan kechirgan va ularga qarshi nafrati benihoya oshgan o'troq aholi endi butun najotni Boburdan kutib, uning yoʻliga umid bilan koʻz tika boshladi.

Bobur ittifoqdoshlari bilan Gʻuzordan Qarshiga, undan Buxoroga oʻtgan, bu qoʻrgʻonlarga ishonchli

odamlarini qoʻyib, endi Samarqandga kelmoqda edi. Bundan xabar topgan samarqandliklar Chorraha darvozasini, unga kelib kiradigan Buxoro yoʻlining ikki chetini dorpech, gilam va palaklar bilan bezatdilar. Yoʻl boʻyiga oʻnlab muvaqqat doʻkonlar qurildi, hayit kunlaridagi kabi sayil boshlandi.

Shaharning eng obroʻli odamlaridan yigirma-oʻttiz nafari qoʻrgʻon kalitlari va qimmatbaho peshkashlar bilan Boburni bir kunlik yoʻlda peshvoz oldilar. Ertasi kuni Bobur saf-saf otliq qoʻshin oldida mulozimlari bilan Samarqandga yaqinlashar ekan, yoʻlning ikki boʻyini xaloyiq tutib ketganini, hammayoq bayram tusini olganini, tom ustlarida, darvoza oldilarida karnaylar va nogʻoralar chalinayotganini koʻrdi.

Boburning Hisordagi gʻalabasi sharafiga yozilgan she'riy ta'rixlar¹, uning Samarqandga kelishini qutlaydigan satrlar xattotlar tomonidan yirik-yirik harflar bilan oq ipak matolarga yozilib, yoʻl boʻylariga, doʻkon tepalariga, qoʻrgʻon ichining koʻzga koʻrinarli joylariga osib qoʻyilgan edi. Bobur xor-zor boʻlib chiqib ketgan Vatanida bunchalik izzat-ikrom bilan qarshi olinishini xayoliga keltirmagan edi. U mavkabi bilan shaharning markaziy xiyobonidan Koʻksaroyga qarab oʻtayotganda, Ulugʻbek madrasasining baland peshtoqi va minoralari ustida qoʻshkarnaylar chalib, nogʻoralarni sayratib, quvonch bildirayotgan vatandoshlarini koʻrdi. Shunda birdan eti jimirlab, koʻziga yosh keldi. Yonida borayotgan Qosimbekka qarab:

- Ishongim kelmas, tushimmi bu, oʻngim? dedi.
- O'ngingiz, hazratim! O'ngingiz!

Xosnavkarlardan sal keyinroqda sallalariga qizil oʻtagʻalar qadalgan Shoh Ismoilning beklari Ahmadbek

¹ She'riy ta'rix – maxsus bir janr boʻlib, harflaridan abjad hisobi bilan ma'lum yil va oy kelib chiqadi.

soʻfi oʻgʻli, Shohruhbek Afshar, Muhammadjon eshik ogʻasi oʻz mulozimlari bilan bir toʻp boʻlib kelmoqda edilar. Ular ot ustida gʻoliblarga xos viqor bilan oʻtirishar, yuzlaridan: «Biz boʻlmasak, Bobur Samarqandga qaytib koʻrsin edi!» degan bir ma'no anglashilar edi.

Samarqandliklar esa butun karnay-surnaylarini Boburga qaratib chalishardi. Shoh Ismoilning bek va navkarlari xaloyiq oldidan oʻta boshlaganda, karnaylar va nogʻoralar birin-ketin tinib qolardi. Qizilboshlarning shafqatsiz ishlari va shia mazhabini zoʻrlik bilan tarqatish borasidagi harakatlari Samarqandga juda vahimali ovozalar tarzida yetib kelgan edi. Shaharning sunniy aholisi saf-saf boʻlib oʻtayotgan qurolli shialarga xavotirli, noxush nazar bilan qarashardi. Xaloyiqning sovuq munosabatidan qizilbosh beklarining qovoqlari osilib borar, Boburga koʻrsatilayotgan izzat-ikromlar ularning gʻashlarini keltirardi.

Bunday murakkab holatlar Qarshi va Buxoroda ham boʻlgan edi. Bobur vatandoshlarining mehmondoʻstlik tuygʻusini uygʻotish uchun shu kuniyoq Samarqandning maydon va koʻchalariga jarchi chiqartirib: «Shoh Ismoilning gʻoziylari bizning moʻtabar mehmonlarimizdandir!» deb e'lon qildirdi. Soʻng quvonchli ayyom munosabati bilan mehmonlarga va shahar aholisiga uch kungacha osh berishni buyurdi.

Bobur va uning odamlari bundan oʻn yil muqaddam qamalda qolib, ochlikdan intihosiz mashaqqatlar chekkan Boʻstonsaroyda, mahalla va guzarlarda, bogʻ va sayrgohlardagi yuzlab tandirlarda osiyogi nonlar, shirmoylar, patirlar yopildi, minglab tovoq oshlar tortildi, behisob koʻp qoʻylarning goʻshtlaridan qovurdoqlar, kaboblar, shoʻrvalar tayyorlandi, asil chogʻirlarga toʻla xumlar ochildi.

Bobur har kuni mehmonlari va musohiblari bilan chogʻir ichib, xursandchilik qilar edi. Toʻy-tomosha ustiga yana toʻrt tarafdan xushxabarlar kelib turardi. Andijon, Margʻilon, Oʻsh va Oʻzgan hammasi birin-ketin shayboniyzodalar hukmidan chiqib, Bobur tomoniga oʻtgan edi. Janubda Qunduz, Kobul, Gʻazna barchasi endi Boburning qalamravidagi yagona mamlakatga aylangandi. Uning nazarida, hayotining eng baxtli davri boshlangan, barcha orzulari endi bekam-u koʻst roʻyobga chiqishi kerak edi.

Biroq bu baxtning juda omonat, juda muvaqqat ekanligi eng avval masjid bilan bozorda bilindi.

* * *

Samarqand qoʻrgʻonining Ohanin darvozasi vaqinidagi ulkan marmar masjidning tekis tosh toʻshalgan sahniga yigirma ming namozxon toʻplangan. Bugungi juma namozida xutba qanday oʻqilishini koʻpchilik samarqandliklar oʻz quloqlari bilan eshitgilari keladi. Chunki: «Bobur podshoh shialar tomoniga oʻtganmish, choryorlardan yuz oʻgirib, oʻn ikki imomni tan olganmish!» degan mish-mishlar koʻpaygan, Boburni quvonib, qarshi olgan sunniy mazhabidagi odamlar, bu ovozaga ishongilari kelmas, biroq uning muxoliflari aholining asabiga tegadigan mish-mishlarni tobora koʻp tarqatishar edi. Bugun jome masjidida oʻqiladigan xutba bu ovozalarning qanchalik rost, qanchalik yolgʻonligini aniqlab berishi kerak edi - qoidaga binoan, xutbaga yoki choryorlarning nomi, yoki oʻn ikki imomning nomi, albatta, qoʻshib oʻqilar edi. Buni biladigan odamlar jome masjidining ich-tashini toʻldirib yuborgan edilar. Xutba oʻqilishiga bir soat qolganda, masjid sahnida bo'sh joy qolmadi. Shundan keyin eshik va darvozalar oldida turgan qurolli soqchilar ichkariga hech kimni kirgizmay qoʻydilar. Bir vaqt masjidning orqa eshigidan sadrlar suduri Xoʻja Xalifa, Bobur, Qosimbek va uch-toʻrt nafar qizilbosh beklar kirib kelishdi. Bobur masjidning ich-tashiga odam benihoya koʻp toʻplanganini koʻrib, yuragi iztirob bilan «shigʻ» etdi. Bu odamlar uning hozir qilmoqchi boʻlgan qaltis ishi muvaqqat bir chora ekanini tushunisharmikan?

Mana shu vaziyatda eng toʻgʻri yoʻl – shoh qoʻshinini «otang yaxshi, onang yaxshi», deb silab-siypab, Vataniga joʻnatib yuborish edi. Avvaldan kelishilgan shartlarga binoan, Bobur Shoh Ismoilni oliy hokim deb e'lon qilishi, xutbaga uning va oʻn ikki imomning nomini qoʻshib oʻqitishi, keyin shohning nomidan pul zarb qilishi kerak edi. Shu shartlar bajarilsa, Shoh Ismoilning beklari oʻz qoʻshinlarini Movarounnahrdan olib chiqib ketishga koʻnar edilar.

Yuqoridagi shartlarni xoʻjakoʻrsinga boʻlsa ham bajarib, begona qoʻshindan tezroq xalos boʻlish toʻgʻriroq ekanini Qosimbek ham, boshqa sirdosh a'yonlar ham tushungan edi. Xoʻja Xalifa ham bugungi xutbani Bobur istagan tarzda oʻqishga rozi boʻlgan edi. Rejaga binoan, Xoʻja Xalifa samarqandlik sunniy namozxonlarning gʻazabiga qolmaslik uchun choryorlarni umumiy bir tarzda nomlarini tilga olmay aytib oʻtishi, oʻn ikki imomni esa qizilbosh beklarni qoniqtiradigan ohangda nomma-nom tilga olishi kerak edi. Uzun mosh-guruch soqoli kindigiga tushadigan Xoʻja Xalifa barcha qavmlarning oldida turib, juma namozini oʻqidi-yu, keyin qoʻliga hassasini olib, masjid toʻridagi marmar zinapoyali minbarga koʻtarila boshladi.

Yigirma ming namozxon hammasi jim. Masjid sahnini toʻldirgan odamlarning hammasi goʻyo oʻzlarining sunniy mazhablarini namoyish qilmoqchi boʻlgandek boshlariga toʻrt oʻramlik sallalar oʻragan edilar. Sunniy sallalarning sanoqsiz koʻpligidan gʻashi

kelgan elchi Xoʻja Xalifaning boshidagi dastorga qaradi. Oʻramlari toʻrttadan koʻp, ammo oʻn ikkita ham emas. Sanab boʻlmaydi. Muhammadjon eshik ogʻasi Bobur va Qosimbekning boshlaridagi sallalarga qaradi. Bularning oʻramlari ham toʻrttadan koʻp, ammo oʻn ikkitadan oz. Bu sallalar shunday oʻralganki, oʻramini sanash mumkin emas. Muhammadjon eshik ogʻasi bunda qandaydir ma'no borligini sezib, sergaklandi. Nahotki Bobur Qunduzda bergan va'dasini bajarishdan bosh tortmoqchi boʻlsa?

Muhammadjon eshik ogʻasi Xoʻja Xalifaning harakatlarini sergak turib, kuzata boshladi. Masjid sahnidagi odamlar ham nafaslarini ichlariga yutib, xutbaning boshlanishini kutmoqda edilar. Umumiy jimlikda Xoʻja Xalifaning yoʻgʻon tovushi allanechuk titrab, iztirobga toʻlib eshitildi:

- Bismilla-ah-ir rohmo-onir rohim!

Minbarda turgan Xoʻja Xalifa yigirma ming sunniy namozxonning oʻziga sergaklanib tikilayotganini koʻrdi-yu, tizzasi ham qaltiray boshladi. Mana, u Olloh sha'niga, payg'ambar sha'niga bitilgan surani o'qib tugatyapti. Endi choryorlar tilga olinishi kerak. Nahotki, Xoʻja Xalifa - yoshlikdan sunniy mazhabida choryorlarga zo'r e'tiqod bilan tarbiyalangan odam endi shuncha namozxonning umidini puchga chiqarsa? Uning qarshisida yigirma ming salla turibdi. Bu sallalardan har birining qatlarida, choryorlarning ruhi yashashiga Xoʻja Xalifa bolalikdan ishonadi. Hozir namozxonlarning boshlari sabrsizlik bilan qimirlaganda, Xoʻja Xalifaga salla oʻramlaridagi arvohlar qimirlaganday tuyildi. Agar u choryorlarga hurmatsizlik qilsa, arvoh urib ketadiganday boʻldi.

Yoʻq, Xoʻja Xalifa choryorlarning arvohidan qoʻrqadi. Shuning uchun: - Choryori bosafolar Hazrati Abubakir! Hazrati Umar! - deb hozir aytishi kerak boʻlmagan nomlarini birdan xutbaga qoʻsha boshladi.

Boburning orqasida turgan minglab namozxonlarning quvonch bilan yengil nafas olgani eshitildi. Muhammadjon eshik ogʻasining esa rangi oʻchib ketdi. Uning narigi yogʻida turgan Shohruhbek Afshar qilichining sopini changallab, minbarga tomon intildi.

Shialar Abubakir, Umar va Usmonni bugungi tirik dushmanlaridek yomon koʻrishar, masjidda ularni ulugʻlagan har bir sunniyni chopib tashlagilari kelar edi. Hirotning jome masjidida choryorlarni ulugʻlagan Zayniddin degan xatibni qizilboshlar namozxonlarning koʻzlari oldida qilich bilan chopib, parchalab tashlaganini Bobur eshitgan edi. Hozir u Shohruhbekni bilagidan olib, iltimoskorona tovush bilan:

- Bek janoblari, sabr qiling, sabr! dedi. Bu orada Xoʻja Xalifa choryorlarning nomini aytib boʻldi-yu, qizilboshlar sevadigan imomlarni xutbaga qoʻsha boshladi.
- Hazrati Imom Hasan! Hazrati Imom Husayn! Hazrati Zaynaliddin Ali!

Shohruhbek Afshar bu nomlarni eshitib qoʻlini qilichining sopidan oldi-da, qatorga qaytib kirdi. Ammo orqadagi namozxonlar orasida shunday bir asabiy shovur-shuvur boshlandiki, Xoʻja Xalifa qolgan imomlarning nomini baqirib aytishga majbur boʻldi.

Orqadan kimdir:

– E, bas, bas! – deb qichqirdi. Biroq namozxonlar orasida tartib oʻrnatish uchun qoʻyilgan devqomat navkarlardan biri «bas!» deb qichqirgan odamning ogʻzini ulkan kafti bilan bekitib, boʻynidan sudrab olib chiqib ketdi.

Xatib oʻn ikki imomni nomma-nom sanab boʻlib, ularning muqaddas ishini bugun davom etti-

rayotgan sohibi zamon Shoh Ismoil Safaviyni maqtab soʻzlay boshlaganda, masjid sahni yana ham asabiyroq junbishga keldi. Faqat Xoʻja Xalifa Boburni Movarounnahrning podshosi, deb e'lon qilganda shovqin xiyol bosildi.

Xutbadan soʻng uy-uyiga tarqalgan namozxonlarning ba'zilari: «Bobur mirzo Movarounnahrning podshosi boʻldi, taxtini kelgindiga bermadi», deb tasalli topmoqchi boʻlsa, boshqalar:

– Pok mazhabimizga rofiziylik aralashdi, – deb shivirladi. – Harom boʻldik! Choryorlarning qargʻishiga qoldik! Yana qimmatchilik boʻlgay! Yana ocharchilik boshlangay!

* * *

Bobur qizilboshlarning shartlarini ado etib, ularni tezroq joʻnatib qoʻyish uchun Shoh Ismoil in'om qilgan oʻsha mashhur dastorni taxtga chiqqanda boshiga kiyib koʻrinish berdi. Soʻng Shoh Ismoilning tamgʻasi bilan bir necha ming tanga pul zarb qildirib, bu pullarni qizilboshlarning oʻzlariga tarqatdi.

Shu munosabat bilan shahar-u qishloqlarda har xil mish-mishlar avvalgidan ham koʻpayib ketdi. Goʻyo afsonaviy kitoblarda bitilgan Ya'juj-Ma'jujlar mana shu qizilboshlar emish. Bobur qizilboshlarning sallasini Koʻktoshga kiyib chiqqanda muqaddas toshning bir cheti yorilib ketgan emish. Endi Shoh Ismoil Samarqandga kelib, mana shu Koʻktoshga chiqarmish. Oʻshanda qiyomat-qoyim boshlanarmish.

Shayboniyzodalar Samarqandda qoldirib ketgan mulla va darvish kiyimidagi xufiyalar mahalla-koʻylarda, bozorlarda vahimali ovozalar tarqatib, shiasunniy nizolarini mumkin qadar alangalantirishga tirishar edilar. Bozorda narx-navo oshib ketayotganini ham shialarning kasofatidan koʻrayotgan omi kishilar

qizilboshlarga nafrat bilan qarar edilar. Bitimdagi shartlar bajarilgandan keyin qizilboshlar yurtlariga qaytib ketishga hozirlana boshladilar. Ularning besholtitasi Samarqandning Chorsusidagi atlas doʻkoniga sovgʻa sotib olish uchun keldi.

Bozor kuni. Chorsuda odam juda koʻp. Qizilbosh navkarlar yetti xil rang bilan tovlanayotgan Samarqand atlasiga xaridor boʻlib qolishdi. Mulla yoqa koʻylak kiygan semiz bazzozga qarab, toʻrt kiyimlik atlas kesishni buyurishdi.

Bazzoz yogʻoch gazni qoʻliga oldi-yu, qizilbosh navkarlarga istehzoli koʻz tashlab:

– Avval pulingni koʻrsat, – dedi. – Aqchang qandoqa? Tangang?

Katta choʻgirma kiygan bir yigit charm hamyonidan uch-toʻrtta kumush tanga olib, bazzozga berdi. Bazzoz tangalarning old tomoniga Shoh Ismoilning tamgʻasi orqa tomoniga shia imomlarining nomi zarb berilganini koʻrdi-yu, qoʻrqib ketdi. U sunniy mullalarning: «Shia puli harom, uni olgan odam choryorlarning qargʻishiga uchraydi», degan gaplarini eshitgan edi. Shuning uchun qoʻliga tangani emas, zaharli chayonlarni olganday jirkanib va shoshib tangalarni egasiga qaytardi.

Beliga qilich va xanjar taqqan devqomat qizilbosh navkar avval kaftidagi yangi kumush tangalarga, soʻng bazzozga taajjub bilan tikildi.

- Ne oʻldi?! Bu oqchada ne illat va-ar?
- Bizda bu tangalar oʻtmaydi. Hech kim olmaydi.
- Nechun olmassan? Nechun? kuyib-pishib soʻradi qizilbosh navkar.
 - Oʻtmaydi.
 - Nechun o'tmas?!

Bu savolga chetroqda turgan bezorinamo bir yigit javob berdi:

- Kelgindilarning puli harom!

– Harom?! – deb qizilbosh navkar haligi yigitga qarab intildi. Ammo u yigit oʻzini bozor toʻla xaloyiqning orasiga urdi. Shunda doʻkonlar orasidan kimdir qizilbosh navkarga tosh otdi:

- Rofiziylar, ket yurtingga! degan tovush eshitildi. Koʻzlaridan olov chaqnayotgan ikkinchi qizilbosh bazzozdan tahdid bilan choʻzib soʻradi:
 - Bizim aqchani olmas-sa-an?!

Bazzoz endi uning gʻazabidan qoʻrqib, muloyimroq gapirdi:

- Olsam, kuygaymen, mehmon. Biz eski aqchada savdo qilishga oʻtganmiz.
- Eski agcha? Shayboniyxonning agchasi kerakmi? Hozir Samarqand bozorida chindan ham Shayboniyxon chiqargan tangalar yaxshi oʻtardi. Bu tangalarga sunniylar sigʻinadigan choryorlarning nomi bitilgan edi. Savdogarlar uchun bundan ham muhimi - Shavboniyxon tangalarining vazni ogʻirroq, demak, qiymati balandroq edi. Shavboniyxon oʻlimidan uch-toʻrt vil burun Hirotdan to Toshkent va Turkistongacha boʻlgan vilovatlarda pul islohoti oʻtkazgan, raqiblaridan moliya sohasida ham ustun kelish uchun oʻz tangalarining ogʻirligini Temuriylar chiqargan tangalarning vazniga nisbatan bir dang¹ oshirgan edi. Shuning uchun hozirgacha butun Xuroson va Movarounnahr bozorlarida Shayboniyxon tangalarining xaridori koʻproq edi. Lekin bazzoz gʻazabi kelib turgan qizilbosh navkariga buni ochiq avtmadi.
 - Shayboniyxon yoʻq, oʻlgan, dedi.

Shu payt kimdir uzoqdan:

– Samarqandni boʻshat, kelgindi! – dedi-yu, doʻkon oldida turgan qizilboshga kesak otdi.

Kesak uning telpagiga tegib ushaldi-da, changi

¹ Bir dang – «oltidan bir» demakdir. Temuriylar tangasining vazni 4,6 gramm boʻlsa, Shayboniyxonning tangasi 5,2 gramm boʻlgan.

yuziga tushdi. Xaloyiq orasidan allakimlarning kulgani eshitildi. Qizilbosh navkar egri qilichini qinidan sugʻurib, kesak otgan odamni koʻzlari bilan qidirdi, ammo topolmadi. Soʻng yana semiz bazzozga yuzlandi.

Soʻzining oxirgi boʻgʻinini choʻzib soʻradi:

- Shoh Ismoilni aqchasin almas-san?

Bazzoz uning qilichidan qoʻrqib, titrab gapirdi:

- Men olsam baloga qolamen.

Qizilbosh yana bir marta:

- Almassa-an?! - deb choʻzib soʻradi-yu, keyin chetdan otilgan tosh va kesaklarning alamini ham bazzozdan olib uning yelkasiga bor kuchi bilan qilich urdi. Oʻtkir qilich bazzozning goʻshtdor yelkasini boʻynining oldidan kindigigacha kesib tushdi. Shunda ikkinchi qizilbosh ham qilichini yalangʻochladi-yu, choʻkkalab qolgan bazzozning boshini bir zarb bilan tanasidan judo qildi. Semiz bazzozning boshsiz boʻynidan sharillab otilgan qon doʻkon ichidagi atlaslar va ipak matolarga sachradi. Buni koʻrgan odamlar qiy-chuv koʻtarib, vahima ichida qocha boshladilar.

6

Shia-sunniy nizolari bunday qonli toʻqnashuvlarni tobora koʻp keltirib chiqarayotgani qizilbosh beklarni ham tashvishga solib qoʻydi. Bobur oʻzining Shoh Ismoil bilan tuzgan ittifoqiga sodiq ekanini ularga qayta-qayta uqtirib, nufuzli beklarga qimmatbaho sarupolar, otlar, oltin-kumush pullar in'om berib, nihoyat, qish chillasi chiqqanda, oʻttiz ming qoʻshinni Movarounnahrdan Eronga joʻnatib yubordi.

Shundan soʻng Samarqand ancha tinchib qoldi. Toshkent, Xoʻjand, Oʻratepa ham Shayboniylar hukmidan chiqib, Bobur tomoniga oʻtganligi haqida xushxabarlar keldi. Qizilboshlarni uch oy davomida

boqish va qimmatbaho sovgʻalar bilan kuzatish paytida ancha boʻshab qolgan xazina oʻsha shaharlardan kelgan peshkashlar bilan yana ancha toʻldi.

Samarqand bogʻlari oq-pushti bodom gullari bilan bezana boshlagan ilk bahor kunlarida Bobur bir to'p vaqinlari bilan otlanib, Ulug'bek rasadxonasi tomonga sayrga chiqdi. Oʻntacha qoʻrchi navkarlarni toʻriq qashqa ot mingan Tohir boshqarib bormoqda edi. Oq otliq Boburning ikki yonida Qosimbek bilan margʻilonlik Xoʻja Kalonbek. Ulardan orqaroqda oʻtgan hafta Hirotdan kelgan mavlono Fazliddin yuvosh qora otga minib, oʻychan kelmoqda. Ichki beklar orasida munshi ham, maktab-madrasa ishlari bilan shugʻullanuvchi bir mudarris ham bor. Otliglar Obirahmat arigʻiga yetmay, Bogʻi Maydon tomonga burildilar. Ulugʻbek zamonida juda obod va mashhur boʻlgan, bundan oʻn besh vil oldin ham favzlik turgan Bogʻi Maydon shayboniylar davrida qarovsiz qolib, ichki ariqlari bekilib ketgan, suvsizlikdan koʻpgina daraxtlar qurib qolgan edi. Ikki qavatlik naqshin ko'shk - Chinnixonaning shiftidan tomchilar o'tib, ajoyib rasmlarning anchasi oʻngib ketgan edi.

Bobur buning hammasini koʻrib chiqqach, mavlono Fazliddinga yuzlandi:

- Mavlono, biz sizni Hirotdan chorlab keltirganda yangi qasrlar, chorbogʻlar qurdirish umidida edik. Ammo olamga mashhur qadimiy obidalarimizning bu ahvolini koʻrib, oʻzingiz ham taassuf etsangiz kerak!
- Hazratim, Ulugʻbek mirzoning olamda yagona rasadxonasi ham mana shu Chinnixona kabi tashlandiq ahvoldadir, dedi mavlono Fazliddin. Kecha koʻrib koʻnglim vayron boʻldi. Oltmish yildan beri qarovsiz. Nodir asbob-olotlari talangan. Devorlaridan koshinlari, marmar toshlari koʻchirib ketilgan. Shu ahvolda tashlab qoʻyilsa, uch oshiyonlik rasadxona koʻp vaqt oʻtmay xarobaga aylanur.

- Demak, shoshilinch choralar koʻrmogʻimiz darkor, janob Qosimbek. Bizning xos me'morimiz mavlono Fazliddin qanday mablagʻ-u koʻmak talab qilsalar beraylik, Ulugʻbek mirzodan yodgor qolgan Chinnixona-yu rasadxonalar darhol ta'mir etilib, aslidek tiklansin.

Qosimbek yengil bir ta'zim bilan:

- Hazratim, amringizni jonim bilan ado etgaymen! dedi. Chinnixonani ta'mirlash uncha mushkul emas. Bogʻning koʻmilib ketgan ariqlarini ham ochgaymiz, gullar oʻstirurmiz.
- Navroʻz bayramigacha ulgurgaymisiz? soʻradi Bobur. – Bu yilgi Navroʻz bazmini mana shu Chinnixonada oʻtkazaylikmi, a, janob Kalonbek?

Ichkilik bazmlarini yaxshi koʻradigan Xoʻja Kalonbek mamnun jilmaydi:

– Dono fikr aytdingiz, hazratim! – dedi. – Samarqandda bogʻbonlar-u naqqoshlar yetarlik.

Hamma hunarpeshalarga mavlono Fazliddin sarkor boʻlurlar. Navroʻzgacha bu bogʻ obod qilinmogʻi kerak.

Mavlono Fazliddin qoʻlini koʻksiga qoʻyib, Boburga yuzlandi:

- Chinnixonani tiklash mumkin, hazratim, ammo rasadxonani ne qilurmiz?
- Uni ham tiklamoq zarur, janob Qosimbek, dedi Bobur.

Qosimbek rasadxonani tiklashdan qoʻrqardi. Chunki shayxlar soʻnggi oʻn yilliklar davomida rasadxonani dinsizlar makoni deb la'natlab, avom xalqni shunga ishontirib qoʻygan edi. Agar Bobur rasadxonani qayta tiklab, yana ishga solib yuborsa, Ulugʻbekning boshini egan qora kuchlar uning joniga ham qasd qilishi mumkin edi. Qosimbek shuni oʻylab:

Hazratim, yotgan ilonning dumini bosmaylik, dedi. - Rasadxonani ta'mirlaganimiz bilan unda ish
olib boradigan yetuk olimlarni qaydan topgaymiz?

Oltmish yildan beri keksa avlod olimlar oʻlib, yoshlari boshqa yurtlarga ketib qolmishdir.

– Ketganlarini chorlab keltirish mumkin, janob Qosimbek, – dedi Bobur va munshiga yuzlandi: – Bizning nomimizdan qadagʻalar biting.

Munshi darhol qoʻynidan daftar-qalam olib, tikka turgan koʻyicha yoza boshladi.

- Ulugʻbek yaratgan falakiyot amaliy ilmidan xabardor olimlar Hirotdami, Rumdami, Tabrizdami, qayerdaki boʻlsalar, bizning nomimizdan ularni Samarqandga taklif eting. Rasadxonani qayta ochmoqchi ekanligimizni, kimda-kim Mirzo Ulugʻbekning buyuk ishini davom ettirmoqchi boʻlsa barcha imkoniyatlarni yaratib berajagimizni ma'lum qiling. Agar kelsalar yoʻl xarajatlarini biz zimmamizga olurmiz. Bu qadagʻalarni elchilarimiz orqali Hirotga ham, Rumga ham tezda joʻnatmoq sizga topshirildi, janob munshi!

Munshi Bobur aytganlarini daftariga yozib boʻlib:

– Amringizni bajarishga darhol kirishurmen! – deya ta'zim qildi-da, Chinnixonadan pastga tushib ketdi.

* * *

Mavlono Fazliddin sarkor boʻlib, Bogʻi Maydonning koʻmilgan ariqlarini qayta kavlatishda, qurigan daraxtlarni olib tashlab, oʻrniga maysa va gullar oʻstirishda, Chinnixonani ta'mirlab orasta qilishda uncha qiynalmadi – insof bilan haq toʻlansa, ishlab charchamaydigan hunarpeshalar, bogʻbon va dehqonlar juda koʻp edi. Lekin ustalarni rasadxonaga olib borib ishlatish va uch qavatli ulugʻvor doirashakl binoning nuragan, buzilgan joylarini ta'mir etish benihoya mushkul boʻldi. Tepadan yer qa'riga tushib ketgan yarim doira shaklidagi zinapoyalarga yaqin borgan ustalar xuddi hozir jahannam qa'riga

qulab tushadigandek qoʻrqa boshlardi. Dindorlar rasadxonani: «Doʻzaxiylar makoni, kim unga kirsa jin chalib, arvoh urib ketadi!» deb, aholining katta bir qismini bunga ishontirib qoʻygan edilar. Ulugʻbekning vafotidan soʻnggi oltmish yil ichida juda koʻp maktab va madrasalar bekilgan, savodsiz johil kishilar koʻpayib ketgan, ularga mutaassib shayxlarning ta'sirlari benihoya kuchaygan edi.

Shunday boʻlsa ham mavlono Fazliddin ishsiz yurgan usta va korgarlarga¹ yaxshi haq toʻlab, dastlabki kunlari elliktacha odamni rasadxonadagi ta'mir ishlariga olib chiqdi. Ikkinchi-uchinchi qavatning shift va devorlaridagi nuragan jovlarini tuzatish uchun havozalar qurildi. Lekin oʻsha kundan boshlab rasadxona atroflarida johil galandarlar toʻdasi ham koʻpayib ketdi. Ular davra tortib, zikr tushib, «Haq do'st vo Olloh!»ni muttasil takrorlab, chorvorlarning ruhiga shak keltirganlarini arvoh urishini she'rga solib, «karomat» qila boshladilar. Bu qalandarlar orasida shayboniyzodalarning josuslari ham bor edi. Ana shu josuslardan biri korgar boʻlib yollanib, rasadxonaning ichida gʻisht tashib ishlamoqda edi. Bu josus uch-toʻrt kun ta'mirchilar ichida yurib, ularning eng dadili va Bobur mirzoga ixlosmandi, qirq besh yoshlardagi bir koshinkor usta ekanini aniqladi. Xonlar josusi manna shu ustani uchinchi qavatda havoza ustida ishlavotgan paytida kishi bilmas qilib havozadan pastga itarib yubordi. Uchinchi qavatdan tosh uyumi ustiga boshi bilan qulab tushgan usta o'sha zahoti ion berdi.

Koʻchalarda zikr tushib yurgan qalandarlar: «Ustani arvoh urdi!», «Xudo gʻazabini koʻrsatdi!» deb vaysay boshladilar. Bu falokatdan soʻng qolgan usta va korgarlar rasadxonaga kelmay qoʻyishdi. Mavlono Fazliddin ishga zor boʻlib, yarim och yurgan boshqa

 $^{^{\}scriptscriptstyle 1}$ Korgar – quruvchi ishchi.

usta va korgarlarni yollamoqchi boʻlsa, nuqul: «Rasadxonada ishlab topilgan pul harom emish! Borgan odamni arvoh urib oʻldirarmish!» degan vahimali gaplar eshitar, omi odamlar undan balodan qochganday qochar edi...

* * *

Boʻstonsaroyning tillakori qabulxonasida Amudaryo bo'yidagi Urganch va Qorako'l shaharlaridan xushxabarlar bilan kelgan bek va a'yonlar sharafiga ziyofat berilmoqda edi. Shayboniyzodalardan koʻp jabr koʻrgan bu shaharlar ham Boburni oʻzlariga oliv hukmdor deb tan olishgan va qimmatbaho sovgʻalar berib vuborishgan edi. O'z vaqtida Shayboniyxon Qorako'l va Urganchni zabt etish uchun oylar davomida jang qilgan, behad koʻp qon toʻkib, ularni olgan edi. Mana endi bu shaharlar jang-u jadalsiz elchi yuborib, Bobur tomoniga oʻtganligi unda zoʻr bir iftixor tuvgʻusini uvgʻotdi. Bobur voshlikdan koʻngliga tukkan orzusiga - butun Movarounnahrni birlashtirish, Ulugʻbek davridagi ulkan davlatni qayta tiklashga mana endi muyassar boʻlayotganidan benihoya shod. Qunduzda birinchi marta boshlangan ichkilik bazmlari Samarqandda davom etib, avjiga chiqmoqda. Erishilayotgan gʻalabalar sharafiga bek va a'yonlar navbatma-navbat ziyofat berishib, Boburni devarli har kuni taklif qilishadi, unga eng nodir, eng ajoyib maylarni ichirib, xursand qilishda bir-birlaridan oʻzishga intilishadi. Faqat Oosimbek hamon ichkilikni ogʻziga olmas, paytini topsa, Boburni ham hushyorlikka undar, mamlakat ichida qora kuchlar bosh koʻtarayotganini, shimoldagi dashtda esa shayboniyzodalar hayot-mamot jangiga tayvorlanavotganini takror-takror eslatar edi.

Lekin Bobur unga javoban soʻnggi paytda yozgan bir gʻazalidan toʻrt satr oʻqib berdi:

Yoz fasli, yor vasli, doʻstlarning suhbati, She'r bahsi, ishq dardi, bodaning kayfiyati. Yoz faslida chogʻir ichmakning oʻzgacha holi bor, Kimga bu nash'a muyassar boʻlsa bordir davlati.

Bu gʻazalga kuy bastalanib, qabul marosimlarida ham aytiladigan boʻlgan edi. Shirakayf Bobur:

– Janob Qosimbek! – dedi. – Eshitdingizmi, Samarqand maktablarida bolalar men ixtiro qilgan xat bilan juda tez savodxon boʻlmoqda emishlar. Mana, mudarris janoblaridan soʻrang...

Boshida salla-yu qoʻlida may toʻla qadah bilan ta'zim qilib turgan mudarris:

– Janob Qosimbek, – dedi, – xalqimizni jaholat panjasidan qutqarib olishda hazratim ixtiro qilgan Xatti Boburiy ajoyib bir vosita boʻlishi aniq! Qur'on xati garchi biz uchun aziz, ammo zer-u zabarlari, shikasta usullari savod chiqarishga behad mushkul. Xatti Boburiy esa zer-u zabarsiz, oʻrganishga oson.

Qosimbek Boburning bundan uch yil oldin Kobulda ixtiro qilgan xati Sirdaryo boʻyidagi Sigʻnoqdan topilgan qadimiy turkiy yozuvga asoslanganini bilar edi. Arab yozuvini «Qur'on xati muqaddas», deb hisoblaydigan ruhoniylar islom dinidan oldin tarqalgan qadimiy yozuvlarni qattiq qoralab, topilgan joyida oʻchirib tashlashni buyurar edilar. Bobur esa buni jaholat hisoblar, qadim zamonda ixtiro qilingan turkiy yozuvning¹ dinga aloqasi yoʻqligini aytar, Xatti Boburiyni shuning uchun xalq orasida tarqatmoqchi boʻlar edi.

¹ Bu yozuv aslida Oʻrxun-Yenisey runik yozuvining Bobur davrida Sigʻnoqgʻa yetib kelgan bir turi boʻlishi kerak.

Ichkilik bazmi paytida bu murakkab mavzularda gapirishni yoqtirmaydigan Qosimbek oradan ikki kun oʻtgach, devoni xosda oʻtirgan Boburning huzuriga mavlono Fazliddin bilan Xatti Boburiyni tarqatib yurgan mudarrisni boshlab kirdi.

Ularning uchovi ham allanarsadan juda bezovta ekanini sezgan Bobur:

- Tinchlikmi, janoblar? dedi.
- Hazratim, dedi mudarris. Xatti Boburiyni targʻib qilib, maktab ochgan bir maktabdorni avboshlar toshboʻron qilib oʻldirmishlar.
- Oʻldirmishlar?! deb Bobur oʻrnidan turib ketdi. Bu ne jaholat, janob Qosimbek? Bizga qarshi gʻulumi?!
- Hazratim, mutaassib shayxlar bilan qalandarlar hamma joyda bizga qarshi ish olib bormoqdalar. Rasadxonada bir usta havozadan yiqilib oʻlgandan beri ta'mir ishlariga odam yollash mumkin boʻlmay qoldi. Masjidda va'z aytgan mullalar Xatti Boburiyni «Shoh Ismoil yuborgan shialar xatti» deb e'lon qilgan emishlar. Shu ovoza butun shaharga tarqalib, oxiri haligi maktabdorning toshboʻron boʻlishiga olib kelmishdir.
- Bu yolgʻon ovozani tarqatganlarni nega hibsga olmadingiz? – qahr bilan soʻradi Bobur. – Axir bu xatning Shoh Ismoilga mutlaqo aloqasi yoʻq-ku.
- Xoʻja Xalifa shuni masjidi jomeda minbarga chiqib aytmoqchi boʻlgan ekan, «Yolgʻon! Kofirlar xati harom! Qur'on ursin sen Xalifani!» deyishib, johillar uni minbardan tortib tushirmishlar. Agar Tohirbek boshliq soqchilarimiz Xoʻja Xalifani qutqarib qolmasalar, johillar uni ham oʻldirishlari mumkin ekan. Avboshlardan yigirma-oʻttiztasini hibsga oldik. Ammo Xoʻja Xalifaga qarshi va'z aytgan mullalar Xoʻja Ahrori valiyning avlodlaridan ekan. Ularni sizdan bemaslahat hibsga olishga jur'at etmadim. Bobur ahvolning naqadar jiddiylashib ketganini endi sezdi.

Xoʻja Ahror avlodini hibsga olish – yonay deb turgan olovni puflab alangalatish bilan barobar edi.

- Qoʻshinning kayfiyati ham yaxshi emas, hazratim, deb davom etdi Qosimbek. Hozir ichak uzildi payt, narx-navo koʻtarilgan. Shayboniyzodalar chiqargan oltin-kumush tangalarning vazni biz chiqargan tangalar vaznidan ortiq boʻlganligi uchun ularning bozori chaqqon. Bek-u navkarlar ulufani oshirishni talab qilmoqdalar. Ularga ulufa oshirilsa, xazinada pulimiz yetmas.
 - Undoq boʻlsa taklifingiz nedur?
- Taklifim shuki, hazratim, beklarni darhol mashvaratga toʻplab, favqulodda choralar koʻrmoq lozim.
- Bilamen, beklar dashtda izgʻib yurgan shayboniyzodalarga qarshi urushmoq qasdidalar. Yangi viloyatlar olinsa, bek-u navkarlar oʻljador boʻlurlar. Besh oydan beri Samarqandda jangsiz turib qilichlari qonsiragan.
- Ularning kasblari urush boʻlgandan soʻng bekor turgilari kelmaydi-da. Hozir shayboniyzodalar shimoldan Buxoroga yaqinlashib kelmoqda emishlar.
 - Aniq axborot bormi?
- Koʻrgan odam kelib aytdi. Sarkardalari Ubaydulla Sulton emish. Oʻn ming qoʻshini bor emish. Buni Samarqanddagi shayx-u qalandarlar ham eshitgan boʻlsalar kerak. Shayboniyzodalar tashqarida jonlangan sari ichkarida bular bizni «Shiaga sotilgan rofiziylar!» deb xalqqa yomonlab, qora kuchlarni qoʻzgʻatmoqdalar.

Bobur mavlono Fazliddin bilan mudarrisga afsusli bir nazar tashladi-da:

– Janoblar, ma'rifat muammolarini bu ahvolda hal etolmaydigan koʻrinamiz, – dedi. – Xatti Boburiyni maktabda oʻqitish hozircha toʻxtatilsin. Rasadxonani

ham keyinroq tiklagaymiz... Biz endi butun e'tiborni harbiy ishlarga berishga majburmiz.

Mudarris bilan mavlono Fazliddin ma'yus qiyofada orqalari bilan yurib chiqib ketdilar. Qosimbek bilan Bobur Ubaydulla Sultonga qarshi Buxoro tomonga qoʻshin tortib borishning maslahatini qila boshladilar...

* * *

Buxoroga hujum qilgan Ubaydulla Sultonning oʻn ming kishilik qoʻshini Boburning Samarqanddan oʻttiz ming qoʻshini bilan kelayotganidan xabar topib, Qizilqum sahrosiga qarab chekindi. Bobur qoʻshini Buxoro atrofida to'xtab, dushmanning yana qaytib kelishini kutishi mumkin edi. Lekin dushman askarlari son iihatdan uch barobar kam boʻlgani uchun Bobur uni dadil ta'qib etishga qaror berdi-yu, qo'shinini qumtepalar orasiga boshlab kirdi. Ubaydulla Sultonga shu kerak edi. Bobur qoʻshinining eng sadoqatli qismi togʻlik joyda yaxshi jang qilib oʻrgangan, otlari choʻlda, qumtepalar orasida durust chopolmaydigan jangchilar edi. Bundan tashqari, shia-sunniy ziddiyatlari Boburga Qunduzda qoʻshilgan yigirma ming kishilik moʻgʻul qoʻshinining ruhiga yomon ta'sir qilgan edi. Ularning orasiga kirib borgan sunniyparast mullalar: «Boburshoh shialar bilan ittifoq tuzib, pok mazhabini bulgʻadi, endi paygʻambarimiz uni emas, sunniyni pok tutgan shayboniyzodalarni qoʻllab-quvvatlagay», degan e'tiqodga ko'plarni ishontirgan edilar.

Barxanlar ichida zambarak ortilgan aravalar qumga botib, otlar yaxshi chopolmay, Bobur qoʻshinining safi chuvalib ketdi. Paytdan foydalangan besh mingga yaqin qunduzlik moʻgʻullar Ubaydulla Sulton tomoniga qochib oʻtib ketdi. Qizilqumda koʻp yurib, uning past-u balandini biladigan, Koʻli Malik¹ degan joyda otliq jang uchun eng qulay oʻrinlarni egallab yotgan Ubaydulla Sultonning qoʻshini yana toʻlgʻama usulini ishlatib, Bobur qoʻshinining ikki qanotini bukdi-yu, orqasiga oʻtib oldi. Toʻrt tomondan berilayotgan zarbalar ustiga besh ming xoinning birdan yov tomoniga oʻtib ketishi jang taqdirini bir necha soatdayoq hal qilib qoʻydi.

Bobur Qizilqumda magʻlubiyatga uchrab, qolganqutgan askarlari bilan Samarqandga, undan Hisorga chekinib borganda, qarshisidan Shoh Ismoil yuborgan Najmi Soniy oltmish ming qizilbosh askari bilan tahdidli suratda chiqib keldi.

Ogʻizda Najmi Soniy Boburga yordamga kelgan edi. Biroq aslida u Boburga jazo bermoqchi edi. U qizilbosh qoʻshinlarining Samarqanddan tez qaytarib yuborilganidan norozi edi. Bobur Movarounnahrda mustaqil davlat tuzayotganini, uning shialarga yon bosishi - muvaqqat choraligini xufiyalar Shoh Ismoilga allaqachon yetkazgan edilar. Shoh Ismoil Movarounnahrga oid hamma ishlarni Najmi Soniyga ishonib topshirgan edi. Najmi Soniy shayboniyzodalarni bartaraf qilgandan kevin Boburni ham hokimiyatdan chetlatishi va Samarqand taxtiga boshqa ishonchli odamni oʻtgazib, Movarounnahrda gizilboshlar hokimiyatini uzil-kesil barqaror qilishi kerak edi. Bu reja gattig sir tutilar, Bobur bilan ittifog hozircha davom etar, ammo kalondimogʻ Najmi Soniy Boburni ham, uning o'n mingtagina qolgan askarlarini ham nazar-pisand qilmasligi oshkora sezilar edi.

Boburni ikki tomondan chirmab kelgan ikki dahshatli qilich Gʻijduvonda bir-biriga zarb bilan urildi. Najmi Soniydan ixlosi qaytgan Bobur shayboniyzodalarning

 $^{^{\}scriptscriptstyle 1}$ Koʻli Malik – hozir qurib qolgan Buxoro viloyatining Xayriobod degan joyida.

qoʻli baland kelayotganini sezdi-yu, qonli qilichlar orasidan chiqib, yana Hisor tomonga chekindi. Bosqinchi qoʻshin sarkardasi Najmi Soniy Gʻijduvon jangida oʻldirildi. Qizilboshlar tor-mor boʻldi, oltmish ming qoʻshinning bir qismi oʻldi, bir qismi asir olindi, omon qolib qochganlarini esa gʻoliblar Amudaryogacha quvib bordilar va daryoga choʻktirib yubordilar.

7

Bundan bir yarim yil avval Xonzoda begim yolgʻiz oʻgʻilchasi bilan Balxdan Qunduzga kelayotganda, uning yuragini titratgan noma'lum xavf-xatarlar goʻyo mana shu ogʻir chekinish paytini kutib yotgan ekan.

Tun yarmidan oshgan edi. Boysun orqali Hisorning Qoratogʻiga chekinib kelgan Bobur yetti ming askar va ugʻrugʻi¹ bilan sayhon bir oʻtloqda tunamoqda edi. Xonzoda begim oʻgʻli va kanizi bilan uxlab yotgan oʻtov Boburning chodiriga yonma-yon edi.

Saharga yaqin birdan toʻpolon koʻtarildi. Xonzoda begim otlarning tasir-tusir qilib chopishi va itlarning asabiy hurishidan choʻchib uygʻondi. Gʻazabli tovushlar:

- Ur! Ur!
- Rofiziylarni ayamay qir! deb qichqirar edi.

Xonzoda begim sapchib turdi. Oʻtov toʻrida xira qorachiroq lipillab yonmoqda edi. Begim qattiq uxlab yotgan oʻgʻli Xurramshohni quchoqlab oyoqqa turgʻizdi.

– Yogʻiy bosdi! Yogʻiy! – deb, oʻgʻliga etigini kiydirib, toʻnining yengiga qoʻllarini tiqayotganda oʻtovning kigiziga allanarsa «tars» etib urildi. Yoy oʻqining charxlangan uchi kigizni kesib oʻtdi, lekin qanoti kigiz juniga oʻralib turib qoldi. Qoʻrqib ketgan Xonzoda begim oʻgʻlini bagʻriga bosdi.

¹ Ugʻrugʻ – oila a'zolari, koʻchlari.

Bu yil oʻn birga qadam qoʻygan Xurramshohning boʻyi onasining yelkasidan oshib qolgan edi. U uchi pastga osilib qolgan yoy oʻqiga qiziqib qarab turardi.

Tashqaridan Boburning sarosimali tovushi eshitildi:

– Toʻfangandozlar qani? Xoʻja Kalonbek! Toʻfang otilsin! Qosimbek! Tohirbek! Haramga qarang! Bolalar tezroq olib chiqilsin! Toʻfang!

Oʻsha zamonning chaqmoqli miltigʻi boʻlgan toʻfang yaqin bir joyda gumburlab otildi. Bobur qizilboshlar bilan ittifoq boʻlib orttirgan bir narsasi – oʻsha davrning eng zamonaviy quroli boʻlgan mana shu toʻfanglar edi. Hali juda kam tarqalgan toʻfanglar faqat Boburning xosnavkarlarida bor edi.

Bir nechta toʻfangning ustma-ust otilgani eshitildi. Xonzoda begim endi sal dadillanib, oʻgʻlining toʻni ustidan bejirim xanjarchasi osilgan kamarini ham bogʻlatdi. Xurramshoh oʻtovning bir chetiga oʻntacha vov oʻqi solingan kichkina soqdogʻini osib qoʻvgan edi. Onasining qoʻlidan chiqib shu soqdogʻini elkasiga osdi-da, kamonini qoʻliga oldi. Onasini vahimaga solgan jang bolada qoʻrquv aralash maroq uygʻotgan edi. U kichikligidan jangovar ruh bilan o'sgan, tezroq katta boʻlib, urushda botirliklar koʻrsatgisi kelar edi. Samargandda turgan paytlarida Xurramshoh Bobur togʻasining Buxoro tomonda qilgan janglariga gatnashmogchi boʻlib, onasining oldidan gochib ham ketgan edi. Lekin Bobur uni bek atkasiga qo'shib yoʻldan qaytarib yuborgan edi. Xonzoda begimning Boburga qoʻygan mehri oʻgʻliga ham yuqqan edi. Bolaga dars beradigan va harbiy mashq oʻrgatadigan kishilar hammasi Boburning ixlosmandlari edilar. Xurramshoh onasidan va murabbiylaridan Bobur haqida iuda koʻp yaxshi gaplar eshitar, oʻzi ham togʻasini har koʻrganda, unga bolalarcha joʻshqin bir mehr va ishonch bilan qarar edi. U togʻasini ogʻir ahvollarga solayotgan shayboniyzodalarni - garchi

oʻzining Shayboniyxonga oʻgʻil boʻlishini bilsa ham – kun sayin yomon koʻrib borar edi. Uning tasavvurida, hozir Bobur qarorgohiga hujum qilib kelgan, «Ur, qir!» deb qichqirayotganlar ham oʻsha koʻchmanchi sultonlar edi. Xurramshoh soqdogʻida bor oʻqlarini togʻasining mana shu dushmanlariga qarab otgisi keldi-yu, oʻtov eshigini ochib chiqa boshladi.

- Hoy, shahzoda, to'xtang!

Xonzoda begimning keksa kanizi yugurib borib bolani kamaridan tutdi-da, ichkariga tortdi. Bola qarshilik qilib kirmadi. Uni uzoqda boʻlgan janglarga yubormagan edilar. Endi jang oʻzi Xurramshoh yotgan joyga yetib kelganda yana qoʻyishmaydimi?

- Qoʻyvoring meni! Hazrat togʻoyimga koʻmak beramen! Qoʻyvoring!

Bu orada Boburning xos navkarlari toʻfang ota-ota, yov otliqlarini ayollar va bolalar yotgan oʻtovlardan uzoqqa surib tashlagan edilar. Tohir Xonzoda begimning oʻtovi oldiga ikkita ot yetaklab keldi:

- Hazrat begim! Shahzoda! Tezroq chiqinglar!
 Xonzoda begim sandiq va boʻxchalariga qaradi.
- Koʻch-koʻronlar qolurmi?
- E, jon omon boʻlsa, buyum topilur! Chiqing tezroq! Hazratim buyurdilar!

Xonzoda begim kanizi bilan chiqquncha Xurramshoh otlarning kichikroq koʻringan bittasiga minib oldi.

Osmonda sakkiz kunlik oy bor edi. Shuning yorugʻida oq oʻtovdan besh yashar Humoyunni bagʻriga bosib chiqqan Mohim begim koʻrindi. Ot ustida turgan Qosimbek tez engashib, bolani onasining qoʻlidan avaylab oldi-da, yelkalarini chakmoni bilan oʻradi.

Begimning yonida oʻn yashar oʻgʻilchasi Safarni qoʻlidan yetaklab kelayotgan Robiya ham bor edi. Tohir oʻgʻli bilan xotinini tez bir biyaga mingashtirdi. Qosimbek boshliq ellik-oltmishta xosnavkarlarga ayollar va bolalar mingan otlarni oʻrtaga olib, Janub tomonga yoʻnaldilar.

Uch tomonni yov halqasi oʻrab olgan, faqat Janub tomon ochiqroq edi. Toʻfang gumburlashi, yarador boʻlganlarning dodlashi, otlarning pishqirishi va kishnashi orasidan kimlarningdir asabiy baqiriqlari eshitilardi:

- Hammamiz shu podshoning kasofatiga qoldik!
- Shialarga sotilib bizni xarob qildi!
- Yoʻqolsin Bobur!
- Urugʻini qurit! Qir hammasini!

Xonzoda begim hech narsaga tushunolmay yonida borayotgan Qosimbekdan soʻradi:

- Bu qanaqa yogʻiy?
- Oʻzimizdan oʻt chiqdi, begim! Burnogʻi yil Qunduzda shayboniyzodalardan bizga qochib oʻtgan moʻgʻul beklari isyon koʻtardi! Quzgʻunlar hazratimni uyquda tutib oʻldirmoqchi ekanlar. Xayriyat, Tohirbekning qoʻrchilari payqab qolibdi!
 - Falokat ustiga falokat!
- Ha, bular bizdan ikki barobar koʻp. Hammasi oldindan tayyorlanib chiqqan! Oʻrtada yuringlar, oʻrtada!

Shu payt isyonchi otliqlar Janub tomonga ham chopib oʻtdilar. Oʻsha tomondan Boburning ovozi eshitildi:

– Ustod Ali! Toʻfangandozlarni oldinga boshlang! Oldinga!

Toʻfanglardan otilgan oʻqlar jiba va dubulgʻalarni bemalol teshib oʻtar, shuning uchun fitnachilar toʻfang qarshisida turish berolmas edi. Bobur toʻfanglar va eng ishongan xosnavkarlari yordamida yov halqasini Janub tomondan yorib oʻtmoqchi, soʻng Bobotogʻning sharqidagi Hisor qal'asiga yetib olmoqchi edi. Biroq fitnachi beklar uni qal'aga oʻtkazmoqchi emas edilar – ular bu mustahkam qoʻrgʻonni oʻzlari egallash maqsadida isyon koʻtargan edilar.

Uch-to'rt marta o'q otilgandan keyin to'fanglarning quvurlari qizib ketib, ish bermay qoʻydi. Yov saflari Sharq tomonda sal siyraklashganini koʻrgan Bobur Xoʻja Kalonbek boshliq mingtacha navkarini oʻsha tomonga tashladi. Xosnavkarlar qurshovida borayotgan Xurramshoh goho qilichlarning bir-biriga shaqshuq urilganini eshitib qolardi. Bu tungi jang unga juda qoʻrqinchli tuvilsa ham u vahimani yengishga tirishardi. Togʻasiga shunday paytda suiqasd qilgan xoinlarning hech bo'lmasa bittasini soqdog'idagi oʻqlari bilan otib viqitgisi kelar edi. Yov qurshovini vorib oʻtavotganlarida, bolalar va ayollarni oʻrab borayotgan navkarlar ham jangga tushishga majbur boʻldilar. Shunda Xurramshoh ularning yoniga kirdiyu, otining jilovini qoʻyib yuborib, kamonidan ustmaust uchta oʻq otdi. Xonzoda begim tungi toʻpolonda uni bir lahza koʻzdan voʻqotib qoʻvdi. Kevin bolaning navkarlar vonida oʻq otavotganini koʻrib, otini unga tomon choptirdi. U oʻgʻliga yetib borgan ham ediki. qarshidan otilgan bir daydi oʻq bolaning oʻng biqiniga «shart» etib sanchildi. Xurramshoh ingrab, kamonini qoʻlidan tushirib yubordi va egardan ogʻib, tusha boshladi.

– Voy, bolam! – deb Xonzoda begim qichqirib, oʻgʻliga tomon intildi.

Tohir ham shu yaqin joyda edi, otidan sirgʻalib tushayotgan Xurramshohni ushlab qoldi, soʻng uni egari ustiga koʻtarib oʻtqazdi.

Bola behush edi. Tohir bilan Xonzoda begim uni Boburning ovozi kelayotgan tomonga olib chopdilar. Bu tomonda yov qolmagan, Xoʻja Kalonbekning navkarlari podshoh uchun yoʻl ochib, uning ketidan haram ahlini ham olib oʻta boshlagan, orqadan ta'qib etishga uringan dushmanlarning esa yoʻlini toʻsgan edilar.

Bobur Hisor qoʻrgʻonidan voz kechib, Vaxsh vodiysi tomonga yoʻl olganini sezgan fitnachilar uni boshqa ta'qib etmay, orqaga qaytdilar va shohona chodirlar ichida egasiz qolgan boyliklarni talashga tushdilar.

Tong yorishib qolgan edi. Bobur yarador jiyanini qoʻliga olar ekan, uning biqinidan issiq qon oqayotganini sezdi.

- Tabibni chaqiring! - qichqirdi u. - Tabib!

Podshohning xos tabibi bolani chakmon ustiga yotqizib, yarasiga dori qoʻyib bogʻladi. Xurramshoh hamon hushiga kelmas, faqat oʻqtin-oʻqtin ingrar edi. Uning biqiniga sanchilgan oʻq oʻpka va qorin oraligʻidagi pardani yirtib, ichki a'zolariga yomon zarar yetkazgan edi. Tabib unga mumiyoyi asildan suv bilan ichirmoqchi boʻldi. Biroq behush bolaning tomogʻidan suv ham, dori ham oʻtmadi. Xonzoda begim buni koʻrdi-yu, bolasini quchoqlab, qichqira boshladi:

- Xurramjon! Yolg'izim! Xurramim!

Bolaning koʻzlari ola-kula boʻlib, bir ochildi, keyin qorachiqlari tepasiga qarab ketdi-yu, kipriklari yarim yumuq holda toʻxtab qoldi.

Bobur bolaning jon berganini sezdi-da, opasini quchoqlab, jasadning tepasidan olib ketmoqchi boʻldi. Lekin Xonzoda begim uning qoʻlidan yulqinib chiqdi. Oʻgʻlining oʻlganiga ishongisi kelmas edi. U bolasini quchoqlab, dast koʻtardi-yu, dod solib, yana uni chaqira boshladi:

- Xurram! Xurramjon, qanisan? Qanisan, bolam! Bolam qani?!

Bobur hoʻngrab yigʻlar ekan, bolani opasining qoʻlidan oldi-da, yana chakmon ustiga yotqizdi. Qosimbek bolaning yarim ochiq qolgan koʻzlarini yummoqchi boʻlib, qoshlarini siladi, kipriklarini yotqizishga urinib koʻrdi. Lekin kipriklar yotmadi, murgʻak koʻzlar yarim ochiqligicha qoldi. Xonzoda begim oʻgʻlining oʻlganiga endi ishondi-yu, oʻzining chakkalariga musht urib yigʻladi:

– Seni bu yerlarga olib kelmay onang oʻlsin, bolam! Seni asrab qololmagan onaginang oʻlsin!!!

Bobur opasining musht boʻlib tugilgan qoʻllarini ikki qoʻliga oldi-da, yuzini yuziga qaratdi.

Qargʻash kerak boʻlsa, meni qargʻang!
 dedi.
 Siz yana mening kasofatimga qoldingiz!
 Ajalda adolat boʻlsa, bu begunoh boladan avval men gunohkorni olsin edi!
 Buni ikki qilich orasiga men olib kirdim!
 Sizlarni din-u mazhab balosiga men giriftor qildim!

Qosimbek Boburning yelkasidan quchoqladi. U burnogʻi yil Qunduzda moʻgʻul beklarining Boburga qarshi fitnasi ilk bor ma'lum boʻlganda, oraga tushib, xato qilganini, bugungi gʻilu – oʻshanda kesib tashlanmagan yaraning patosi ekanini oʻyladi:

– Gunohkorni izlasangiz, hammamiz ham aybdormiz, hazratim! Dunyo oʻzi shundoq yaratilgan boʻlsa biz qandoq qilaylik?!

Xonzoda begim yana oʻgʻilchasining jasadini quchoqladi:

– Toʻydim bu dunyodan! Bas! Toʻydim! Meni bolam bilan birga koʻminglar!..

Xurramshohning jasadini archadan yasalgan tobutga solib, shu kuni kechgacha qoʻlma-qoʻl koʻtarib bordilar. Keyin uni Pomir togʻining etaklaridagi koʻkalam bir tepalikka koʻmdilar-u qabri ustiga oq bayroqcha qadab qoʻydilar.

Tirik murdaga oʻxshab qolgan Xonzoda begimni bir amallab Qunduzga, undan soʻng Kobulga olib ketdilar.

KOBUL

TOSHGAN DARYO O'ZAN IZLAYDI

1

Kechki payt Kobul qal'asining janubidagi koʻldan bir toʻp oʻrdak uchdi. Koʻl boʻyidagi boʻliq oʻt-oʻlanlar orasida pisib oʻtirgan mirzo Humoyun kamondan ketma-ket ikkita oʻq otdi. Osmonga koʻtarilib borayotgan tumshugʻi uzun oʻrdaklardan biri toʻpidan ayrilib, pastlay boshladi, soʻng qanotlarini majolsiz yoyib, koʻlning narigi chetiga qulab tushdi.

Koʻlning oʻsha tomonida podshohning sakkiz eshkakli, soyabonli kemasi yurgan edi. Humoyun bu yoqdan to otlanib, atkasi va mulozimlari bilan koʻl sohilini aylanib oʻtib borgunicha kemadagilar oʻq tekkan oʻrdakni suvdan olib, qirgʻoqqa chiqdilar. Ular orasida Bobur ham bor edi. Humoyun oʻzi otgan oʻrdakni otasi qoʻliga olib qarayotganini koʻrdi-yu, otidan sakrab tushdi va ancha berida ta'zim qilib toʻxtadi.

Bobur oʻrdakning toʻshiga qadalib qolgan yoy oʻqini keskin bir harakat bilan sugʻurib oldi-yu, oʻgʻliga koʻzlarini suzib qaradi:

- Bu oʻq senikimi?

Humoyun otasinnig kayfi borligini sezdi. Bobur soʻnggi paytlarda koʻp ichadigan boʻlgan, bugun ham ulfat beklari bilan kemada chogʻir ichib oʻtirgan edi. Humoyun koʻl va uning atroflari podshohning daxlsiz, xos yerlari ekanini esladi. Otasi oldida odobsizlik qilib qoʻyganday koʻzlari javdirab:

- Hazratim, - dedi, - afv eting, bemavrid oʻq otmishmen.

– Ammo oʻqni yaxshi otmishsen, – deb Bobur oʻgʻliga endi kulimsirab gapirdi. – Ma, haloling boʻlsin!

Humoyun chap qoʻlini koʻksiga qoʻyganicha, oʻng qoʻli bilan ovini otasidan oldi-yu, mulozimlaridan biriga berdi. Boburdan orqaroqda turgan koʻzlari katta-katta ozgʻin qora yigit – Hindubek tigʻiz oq tishlarini ochib kuldi:

- Amirzodam merganlikda hazrat otalariga tortmishlar.

Shirakayf Xoʻja Kalonbek bu gapga darhol qoʻshildi:

- Padari buzrukvorga munosib oʻgʻil!

Bobur esa bir chetda jim qoʻl qovushtirib turgan Qosimbekka mamnun nazar tashladi. Yoshi oltmishdan oshib, eshik ogʻaliq lavozimidan ketgan Qosimbek hozir Humoyunga atkalik qilmoqda edi. Boburning oʻziga shuncha yil sodiq xizmat qilgan bu odam endi boʻy yetib kelayotgan Humoyunni ham otalarcha mehr bilan tarbiyalayotgani bilinib turardi.

 Janob Qosimbek Humoyunga merganlikdan yaxshi ta'lim bermishlar, - dedi Bobur. - Biroq amirzodam chayandozlikda nechuklar?

Qosimbek Humoyunga «javob bering» deganday qilib qaradi. Humoyun koʻzlari goʻyo ilhom bilan yonib:

- Hazratim, ijozat bering, dedi-da otlarni qoʻli bilan koʻrsatdi. Bobur uning soʻnggi yillarda oʻrgangan chavandozlik mashqlaridan birini koʻrsatmoqchi ekanini sezdi.
 - Qani, qani, dedi maroq bilan.

Humoyunning yoshi oʻn uchga borib, boʻyi otasining boʻyiga yetay deb qolgan. Yurish-turishi ham Boburning oʻsmirlik paytini eslatar edi. Qosimbekning ishorasi bilan navkarlar ikkita yuvoshroq otni bir chetga yetaklab chiqdilar-da, yonma-yon tutib turdilar. Humoyun oʻzining seryol qora qashqa otiga sakrab mindi, jilovni keskin burib, xiyol orqaga ketdi. Soʻng narigi ikki otga shitob bilan yaqinlashdi-da,

jilovini qoʻyib yubordi. Otlar jips kelganda ikkinchi otning egaridan ikki qoʻllab tutganicha, egardan egarga sakrab oʻtdi. Shunda uchinchi ot joyidan qoʻzgʻalib ketdi. Humoyun mingan otining jilovini tez qoʻlga olayotib, uchinchi otning yuganidan tutgan navkariga:

- Mahkam ushlang! - dedi.

Soʻng tagidagi otni narigisiga jips keltirdi-yu, ikkinchi egardan uchinchisiga sakrab oʻtdi.

Shirakayf beklar davrasidan:

- Ofarin! Tasanno! - degan xitoblar eshitildi.

Humoyun hansirab, otdan tushdi-da, otasi tomonga kela boshladi. Bobur oʻzining oʻsmirlik paytida Andijon chorbogʻida egardan-egarga sakrab oʻtolmay oyogʻi yerga tapillab tushganini esladi-yu:

- Tangrim Humoyunni yomon koʻzdan asrasin,
 dedi. Chavandozlikda bizdan oʻtadigan koʻrinadir.
- Hazratim, mirzo Humoyun har ishda sizdan ibrat olishga intilurlar, dedi Qosimbek.

Bobur oʻngʻaysizlanib, bosh chayqadi:

- Mening shahzodaga ibrat boʻlgudek holim yoʻq.
 Humoyun otasining ma'yus yuziga taajjub bilan tikildi.
- Nechun, hazratim! Atkam menga barcha janglaringizni aytib berdilar. Rustam-u Suhroblar ham, Goʻroʻgʻli-yu Alpomishlar ham sizchalik koʻp jang koʻrgan boʻlmasalar kerak!
- Jang hisob emas, amirzodam, jangning natijasi hisob, dedi Bobur oʻzining magʻlubiyatlarini eslab.

Lekin Humoyun uchun eng muhimi – otasining mislsiz dahshatlarga duch kelib, barcha oʻlimlarni yengib oʻta olgani va hamma qirgʻinlardan omon chiqqani edi. Boburga astoydilt ixlos qoʻygan Qosimbek: «Hazratimga duo ketgan, u kishini oʻq olmaydi, tigʻ kesmaydi», derdi va bu sodda e'tiqodini Humoyunning qalbiga ham singdirgan edi. Humoyun otasining Kobul bilan Hirot oraligʻidagi baland togʻlardan odam zoti oʻtolmaydigan

qahraton qish kunlarida yurak yutib oʻtganini, koʻpchilik bek va navkarlar holdan ketib, otlar ham yurolmaydigan boʻlib qolgan paytlarda Bobur oʻzi oldinga chiqib, koʻkragigacha qorga botib, hammaga yoʻl ochib borganini, oʻshanda uning qulogʻini sovuq olib, yuzi koʻmirday qorayib, tanib boʻlmas ahvolga kelganini Qosimbekdan yaqinda eshitgan edi.

Humoyun oʻsha paytlarda boʻlgan bir gʻalati hodisani otasidan tasdiqlatib olgisi keldi:

- Hazratim, Kobul chorbogʻida Doʻst degan bir pahlavon navkar sizni tanimay qilich bilan chopgani rostmi?
- Rost. Keyin tanib qolib, qilichini tashlab qochdi. Shukrki, hech shikast yetmadi. Boʻlmasa Doʻst pahlavon tigʻ urgan odam hargiz tirik qolmagay edi.
- Xudoning qudratini qarang-a! dedi eshik ogʻa Muhammad Doʻlday xushomad ohangi bilan.

Humoyun uning kayfdan qizarib, koʻpchib turgan yuziga noxush nazar tashladi-yu, yana otasiga yuzlandi. U faqat otasi bilan gaplashishni istardi. Bobur toʻgʻrisida Qosimbekdan va boshqa odamlardan shuncha gʻaroyib hikoyalar eshitib oʻsgan bola endi uning oʻzi bilan yurakdan yaqinlashishni istardi.

Lekin Bobur doim davlat ishi-yu yozish-chizish bilan band boʻlar, boʻsh qolganda, beklari chogʻir majlisini boshlashar, Humoyunga esa ular hali hamsuhbat boʻlolmaydigan yosh bola deb qarashar edi. Biroq Humoyunda otasi bilan suhbatlashish ishtiyoqi kun sayin ortib bormoqda edi.

- Hazratim, bultur Sind daryosining boʻyida yoʻlbars bilan olishgan ekansiz...
 - Qaydan bildingiz?
- Hazratimning xonayi xoslarida yoʻlbars terisini koʻrdim.

Bobur orqasida turgan beklarga ishora qildi:

- Yoʻlbarsni biz koʻplashib engganmiz.

Hindubek kulib e'tiroz qildi:

- Hazratim boʻlmaganlarida biz yoʻlbarsga roʻbaru boʻlolmas edik.

Humoyun Hindubekning gapini ma'qullagan kabi bosh irgʻadi va otasiga bolalarcha sof bir iftixor bilan qarab qoʻydi. Bobur Buxoro atroflarida va Hisorda boshiga tushgan kulfatlarni hamon unutolmas, oʻshandagi magʻlubiyatlar alami avvalgilariga qoʻshilib, yuragini haligacha timdalar, dunyo g'amlarini xavolidan uzoglashtirish uchun ham u tez-tez chogʻir ichar edi. Uning ruhi tushib, oʻz taqdiridan ixlosi qaytib yurgan mana shu kunlarda oʻgʻli otasi qilgan vaxshi ishlarni bunchalik e'zozlab, tilga olishi Boburga gʻalati ta'sir koʻrsatdi. Bir lahza u oʻzini oʻsmir oʻgʻlining koʻzi bilan koʻrganday boʻldi. Humoyun faxr bilan tilga olgan voqealar chindan ham boʻlgan voqealar ekanligi toʻsatdan Boburning koʻnglini koʻtardi. Shu daqiqagacha unga butun hayoti qopqorong'i bir tun bo'lib tuyilgan bo'lsa, endi u bu tunga go'yo Humoyunning ko'zi bilan qaradi-yu, qorong'i osmonning u yer-bu yerida yulduzlar miltillayotganini koʻrdi.

Humoyun otasi bilan yakkama-yakka gaplashgisi kelib, ovozini pasaytirib:

– Hazratim, – dedi, – in'om qilgan devoningizdagi barcha she'rlarni yod olmishmen. Lozim ko'rsangiz imtihon qiling.

Bobur orqaroqda jim turgan bek va mulozimlarga oʻgirilib qaradi. Ular Boburning oʻgʻli bilan gapini tezroq tugatishini va kemaga qaytishini kutmoqda edilar. Lekin Boburga endi chogʻir majlisidan koʻra oʻgʻli bilan birga boʻlish yoqimliroq tuyila boshladi.

– Janoblar, – dedi u beklariga yuzlanib, – bugun bizga kema sayri bas. Endi mirzo Humoyun bilan she'r mashg'uloti o'tkazmoqchimen. Ot keltirilsin!

Bobur otlangandan keyin Humoyun ham otiga quvonch bilan sakrab mindi. Ota-bola yonma-yon

Kobul arkiga qarab yoʻl oldilar. Qosimbek va boshqa mulozimlar orqaroqda odob saqlab jim bormoqda edilar.

Bobur kemada ichgan chogʻirning tafti va karaxtligi uning yaltiragan suzuk koʻzlaridan bilinar edi.

– Qani, amirzoda, eshitaylik, – dedi u Humoyunga kayf aralash kulimsirab qararkan.

Otasi birga ketayotganidan oʻzida yoʻq quvongan Humoyun Boburning devonidan yod olgan bir ruboiyni shoshilibroq oʻqidi:

Ozar ila necha guftigoʻ qilgʻaysiz, Ozurda boʻlurni justijoʻ qilgʻaysiz. Munchaki koʻngullarga yetishdi ozor, May bila magarki shustishoʻ qilgʻaysiz.

Humoyun bu she'r bilan otasining may ichish sababini tushunishligini va hozir kayfi borligi ham uzrli ekanini aytmoqchi edi, Bobur buni fahmladi-yu:

- Ma'qul, ma'qul, deb kuldi. Faqat avvalgi ikki satrning vaznini buzibroq oʻqiding. Aftidan, sen bu satrlardagi kinoyani yaxshi fahmlamagansen.
- Qandoq... kinoya? deb bu satrlarni kamoli jiddiyat bilan oʻqigan Humoyun taajjublandi.
- Kinoyaki, odamlar bir-birlariga ozor beradigan gapni koʻp gapirurlar. Goho ozor beradigan narsani oʻzimiz justijoʻ qilib topurmiz. Undan keyin bu ozorni koʻngildan may bilan yuvmoqchi boʻlib ichishga ruju qilurmiz.

Otasi oʻzining may ichishiga kinoya bilan qarashini Humoyun endi sezdi va yana hayron boʻldi:

- Nechun shunday?

¹ Guftigo' - gaplashish.

² Justijo' - qidirish.

³ Shustishoʻ – yuvish, ya'ni may bilan dil gʻuborini yuvish.

- Sening yoshingda buning sababini tushunib boʻlmas. Men ham oʻttiz yoshimgacha chogʻirga ehtiyoj sezgan emasmen. Sen qalaysen?.. Koʻnglingda chogʻirga ishtiyoq bormi?

Humoyun uyalib, bosh chayqadi. Soʻng otasining ichkilikdan shishgan qovoqlariga jiddiy bir qarab oldi-da:

- Men chogʻirni yomon koʻramen, - dedi.

Oʻn uch yoshida Bobur oʻzi ham ichkilikdan hazar qilishini esladi-yu, oʻgʻlining javobini ma'qullab bosh irgʻadi.

- Xoʻsh, nelarni yaxshi koʻrursen?
- Menmi? deb Humoyun bir lahza oʻylanib oldi. Uning yaxshi koʻrgan narsalari koʻp edi: – Safarda yurishni, sayohatni yaxshi koʻrurmen, yaxshi kitob boʻlsa erta-yu kech oʻqigim kelur...

«Bu jihatlari menga oʻxshabdir», dedi Bobur ichida va oʻgʻlining qamchi dastasini tutgan qoʻllariga qaradi. Humoyunning yuz-koʻzi ham, qoʻllari ham Boburnikidan qoraroq edi. Balki Janubda tugʻilib oʻsayotgani uchun shundaydir? Lekin panjasining shakli otasinikiga juda oʻxshash. Bobur oʻgʻlining bilagidan olib:

- Qani, kaftingni och, - dedi.

Humoyun qamchini taqimiga qistirdi-da, kaftini otasiga ochib koʻrsatdi. Bobur uning kaftidagi chiziqlarga qaradi-da, keyin oʻz panjasini ochib, oʻgʻlining kaftiga kaftini yonma-yon tutdi. Katta va kichik har ikki kaftdagi koʻndalang chiziqlar birbirining aynan takrori edi. Otasiga oʻxshashni judajuda istaydigan Humoyun mamnun jilmaydi. Bobur chuqur tin oldi-da:

- Ilohim, men koʻrgan balolarni sen koʻrmagin! dedi.
- Lekin men sizning barcha ishlaringizni oʻrgan-moqchimen.

Boburning yaxshi-yomon ishlari xayolidan aralash-quralash boʻlib oʻta boshladi. Berahm muhit uni ham shafqatsiz boʻlishga oʻrgatardi. Mana shu Kobul viloyatining oʻzida xirilchi qabilasiga mansub talay odamlar karvon yoʻllarida talonchilik qilganliklari uchun Bobur askarlari tomonidan ayovsiz oʻldirilgan, hazora qabilasining oʻnlab jangovar yigitlari chopqin paytida qirib tashlangan edi... Bobur bu qonli lavhalarni umr kitobi boʻlmish «Vaqoye'»ga birmabir yozib borar edi. Ammo hali balogʻatga yetmagan va olamga bolalarcha musaffo bir ishonch bilan qarayotgan Humoyunni bunday shafqatsizliklardan mumkin qadar uzoq tutgisi kelardi.

- Sen hushyor boʻl, dedi Bobur, mening havas qilib boʻlmaydigan ishlarim ham bor!
 - Qaysi ishlaringiz, hazratim?
 - Qaygʻuli, fojiali ishlarim. Butun taqdirim...
 - Buni bir gʻazalda ham aytmishsiz.

Humoyun yana yoddan otasining satrlarini ayta boshladi:

Har yongʻaki azm etsam, yonimda borur mehnat, Har soriki yuzlansam, oʻtrumgʻa kelur qaygʻu, Yuz javr-u sitam koʻrgan, ming mehnat-u

gʻam koʻrgan,

Osoyishi kam koʻrgan mendek yana bir bormu?

She'rning gʻamgin va sehrli ohangidan ta'sirlangan Bobur:

- Yaxshi oʻqiding, dedi oʻgʻliga. Istaymenki, men koʻrgan qaygʻular-u shafqatsizliklarni ilohim sen koʻrmagin.
- Xoʻp, hazratim, men faqat siz bilgan ajoyibotlarni bilsam bas!

Ota-bola suhbatga berilib, arkka qanday yetganlarini sezmay qoldilar. Keyin ular darichalari Shohi Kobul togʻiga qarab ochiladigan xushhavo xonayi xosda oʻtirganlarida, Humoyun qoʻliga qogʻoz va qalam oldiyu, otasi ixtiro qilgan Xatti Boburiy harflari bilan bir bayt she'r yozdi:

Turklar xatti nasibing boʻlmasa, Bobur, ne tong, Boburiy xatti emasdur, xatti Sigʻnoqiydurur¹.

Bobur soʻnggi daf'a Samarqandda yuz bergan mash'um voqealarni va Xatti Boburiyni maktabda bolalarga oʻrgatgan muallimning toshboʻron qilib oʻldirilishini eslab, «uh» tortdi. Bir vaqtlar Ulugʻbekni halok etgan yovuz kuchlar uning rasadxonasini qayta tiklamoqchi boʻlgan Boburni ham dinsizlikda va rofiziylikda ayblab, hatto qoʻshinning koʻp qismini shunga ishontirgani Qizilqumdagi magʻlubiyatga zamin yaratgan edi. Shundan beri Bobur oʻzi ixtiro etgan xatni joriy etish fikridan butunlay qaytgan edi.

- Senga buni qaysi mualliming oʻrgatdi? soʻradi Bobur Humoyunning yozuviga koʻz yugurtirib.
 - Mirbadal xattotdan oʻrgandim...

Humoyunning yozuvida xato boʻlmasa ham, lekin hali bu xatga qoʻli oʻrganmaganligidan harflar notekis chiqqan edi.

- Senga manzurmi?
- Juda! Belgilari oz. Tez yozish mumkin. Oʻqishi joʻn.
- Unday boʻlsa koʻproq mashq qil. Minba'd menga maktub yozsang, shu xat bilan bitgin. Men ham senga shu xat bilan javob yozurmen. Maxfiy tutmoq oson boʻlur.

Humoyun podshoh otasi bilan maxfiy xatlar yozishini koʻz oldiga keltirdi-yu, koʻnglida yana issiq

¹ Sigʻnoq – Turkistondan shimolroqda Sirdaryo yaqinida joylashgan qadimiy shahar.

bir iftixor tuygʻusi mavj urdi. Otasiga mehri toblanib, uning koʻngliga yoqadigan yana bir ish qilgisi keldi.

- Hazratim, lozim boʻlsa, endi musiqadan bir imtihon qilib koʻring.

- Qani, qani!

Humoyun savdarboshiga afgʻon rubobini keltirishni buyurdi. Soʻng dur va sadaf bilan bezatilgan, togʻlar sadosini eslatuvchi ulugʻvor tovush beradigan bagʻri keng rubobni sozlab, avval navo yoʻlida bir kuy chaldi, keyin savtga oʻtdi. Bobur qulogʻiga juda yoqimli tuyilgan bu savtni darhol tanidi.

«Chorgoh savti» deb atalgan bu kuyni bultur Boburning oʻzi bastalagan edi. Humoyun buni ham izlab topibdi-da! Yoki murabbiylari unga ataylab otasi yozgan she'rlarni yodlatib, otasi bastalagan kuyni oʻrgatib, shu yoʻl bilan podshohdan tahsin eshitmoqchimikinlar?

Murabbiylarda shunday bir xushomad boʻlganda ham Humoyunning oʻzi kuyni samimiy ixlos bilan chalayotgani bilinib turardi. Bola oʻzining boyagi soʻzini – otasining ijodidan ibrat olishga havasi zoʻrligini hozir chindan isbot qilmoqda edi. Bobur oʻgʻli chalayotgan goʻzal kuyga quloq solib turib, koʻngli zavqli tuygʻularga toʻlib ketdi. Endi oʻzining hayoti ham unga eng yorugʻ va tiniq tomonlari bilan koʻrina boshladi. Axir u ham bir vaqtlar Humoyun kabi begʻubor, musaffo yoshlik damlarini boshdan kechirmaganmidi? Uning hayoti ham tiniq bir buloq boʻlib oqmaganmidi? Keyin bu buloqning ustiga jarlar qulab, uni loyqalatdi. Lekin hali bu buloq qurigan emas, uning obi-hayoti Humoyunning qalbini ham obod qilgani mana hozir bilinib turibdi.

Bobur oʻzi bilan oʻgʻlining orasida ajib bir bogʻlanish borligini bugun birinchi marta aniq sezdi. Otaning hayoti oʻgʻlining hayotida aynan takrorlanmasa ham, lekin yangi bir tarzda davom etishi mumkinligiga, agar oʻgʻil astoydil otaga sodiq boʻlsa, unga tortsa, otaning umri oʻgʻilning umriga ulanib ketishiga Boburning endi koʻzi yetdi. Shunday boʻlgach, Humoyunni atkasi, onasi va murabbiylari Boburga ixlosmand qilib tarbiyalaganlari, unga otasining fazilatlarini saralab olib berishga intilayotganlari katta bir ne'mat emasmi? Boburning oʻzi ham oʻgʻliga faqat fazilatlarini ravo koʻradi-ku. Faqat shundagina oʻgʻil u qilgan xatolarni qilmasligi, u tortgan azoblarni tortmasligi mumkin. Fazilatlar... Bobur oʻz fazilatlarini bugun oʻgʻli orqali allanechuk saralangan holda koʻrib, koʻngli koʻtarildi, oʻziga birdan hurmati ortdi.

Keyin u Humoyunning atkasi Qosimbekni saroyga chaqirtirib, unga bosh-oyoq sarupo va ot in'om qildi. Shahzodaning boshqa murabbiylari va muallimlari ham katta-katta hadyalar oldilar.

- Senga ne in'om qilay, ayt! - deb Bobur oʻgʻliga kulimsirab tikildi.

Humoyun kitob yigʻishni yaxshi koʻrardi. Uning alohida boʻlmani egallagan xos kutubxonasidan tashqari, xobgohida ham kitob toʻla javonlar bor edi. Toʻshagining bosh tomoniga xushboʻy sandal daraxtidan ishlangan javon qoʻyilgan, otasining she'riy devoni javonning alohida tokchasida yolgʻiz turar edi.

– Yana yangi she'riy kitoblar yozsangiz, – dedi Humoyun otasiga uyalinqirab, koʻz tashlarkan, – mana shu alohida tokcha sizning asarlaringiz bilan toʻlsa... Oʻgʻlingizning tilagi shu!

Bobur zavq bilan qah-qah urib:

– E-ha, sening bu tilagingni oʻrinlatmoq uchun men bir umr mehnat qilmogʻim kerak-ku!.. – dedi. – Mayli, «yaxshi niyat – yarim davlat» derlar. Bugundan boshlab sen uchun bir she'riy kitob boshlagaymen. Qani, daftaringni ber...

Humoyun muqovasi oltin suvi bilan ziynatlangan, nafis varaqlariga hali hech narsa yozilmagan yangi daftarini otasiga ikki qoʻllab tutdi. Bobur xona toʻridagi

miz yoniga kelib oʻtirdi-yu, birdan oʻgʻliga mehri toblanib, hayajon ichida:

«Jigarim bilan jonimga payvand farzandim!» – deb yozdi.

Oʻzidagi otalik mehri va Humoyundagi farzandlik sadoqati tojdor otalar va valiahd oʻgʻillar orasida juda kam uchraydigan nodir tuygʻular ekanini, Ulugʻbek bilan Abdullatif orasida boʻlib oʻtgan fojialarga solishtirganda, u oʻz oʻgʻlidagi samimiy hislarni qanchalik qadrlashi, qanchalik asrab-avaylab, kamolga yetkazishi zarurligini shu lahzada butun vujudi bilan his qildi. Qalbini toʻldirgan otalik tuygʻusi she'riy ohang bilan qogʻozga tusha boshladi:

«Davlat-u baxt bila Humoyun boʻl, komron boʻl, jahonda yuz tuman obroʻyi izzat koʻr!»

Bobur yozishdan toʻxtab, oʻrnidan turdi:

– Davomini keyin bitgaymen!.. Kitobning nomi sening ismingga qofiya boʻlgʻusidir!..

Bobur oʻsha yili yozib tugallagan she'riy kitob – «Mubayyin» – Humoyunning nomiga chindan ham qofiyadosh edi. U oʻgʻlining daftariga bitgan ezgu tilaklarini ham shu kitobga she'riy satrlar shaklida joylab, hammasini san'atkor xattotga koʻchirtirdi-da, Humoyunga taqdim qildi.

Humoyun shu vaqtgacha otasidan olgan sovgʻalar orasida eng ulkani va bebahosi – mana shu she'riy kitob ekanini sezib, uni qayta-qayta koʻzlariga surdi...

U arab tilida yozilgan, murakkab fiqx kitoblarini tushunolmay qiynalib yurar edi. Otasi taqdim qilgan «Mubayyin» fiqxning qonun-qoidalarini ravon turkiy tilda goʻzal masnaviylarda ifodalab, Humoyun uchun ham darslik vazifasini bajarar, ham unga she'riy zavq berardi. Eng muhimi, uning otasiga boʻlgan mehri, ixlosi shu kitob tufayli yangi bir kuch bilan oʻsib borardi.

Humoyun oʻn besh yoshga kirganda, uning kitob javonida otasining yana bir asari – aruz ilmiga ba-

gʻishlangan «Muxtasar» paydo boʻldi. Humoyunning endigi istagi – otasining oʻsmirlik yillaridan beri yozib yurgan «Vaqoye'» nomli kitobini oʻqish edi. U otasining eng katta, eng maroqli asari mana shu ekanini onasi Mohim begimdan eshitgan edi.

Humoyun oʻn olti yasharligida otasi unga Badaxshon viloyatini berib, askar va savdari bilan Kobuldan kuzatib qoʻydi. Humoyun togʻlar orasida otasi bilan xayrlashayotganda, oila a'zolari oʻzaro «Boburnoma» deb atay boshlagan oʻsha «Vaqoye'» kitobidan bir nusxa koʻchirtirib yuborishni iltimos qildi.

Oʻgʻlining boshqa koʻp iltimoslarini soʻzsiz qabul qilgan Bobur bu gal yerga qarab bosh chayqadi:

- Hali u kitob bitgan emas. Oʻlda-joʻlda yotgan asarni koʻchirtirib boʻlmas.
 - Qachon bitkurursiz, hazratim? Men intizormen! Bobur oʻgʻlining yuziga xomush nazar bilan tikildi.
- Koʻp intizor boʻlma. Chunki u kitobning bitishi uchun mening umrim tugashi kerak.

Humoyun seskanib tushdi:

- Nechun bunday deysiz?
- «Boburnoma»ning davomi ancha vaqtdan beri yozilmay yurar edi. Qizilboshlar bilan tuzilgan ittifoq, Bobur Vataniga begona qoʻshinni boshlab borib, magʻlubiyatga uchraganlari... buni yozish u yoqda tursin, hatto eslashdan ham yuragi bezillar edi. Nahotki umr kitobining soʻnggi bobi shu boʻlsa? Bobur eng yirik asarini bu tarzda yozib tugatolmasligini sezardi. Uni koʻngildagidek tugallash uchun esa oʻsha magʻlubiyatlar zahrini yuvib ketadigan katta gʻalabalarga erishishi kerak edi. Mana endi oʻgʻli Humoyun ulgʻayib, yoniga kiryapti.

U Humoyunning soʻnggi gapdan iztirobga tushganini sezib:

– Mening soʻzimdan tashvishlanma, – dedi. – Men «Vaqoye'»ni umrim boʻyi yozmoqchi boʻlganim

uchun shunday dedim. Orzuyim borki, uning kelgusi boblariga sening ham yaxshi ishlaring bitilgay. Zora oʻzim ham... bu kitobning poyoniga yorugʻ yuz bilan etsam.

- Hazratim, undoq boʻlsa, ilohim «Boburnoma»ni yana ellik yil yozing, yuz yil yozing!
- Oʻshangacha kutishga sabr-toqating eturmikin?– deb kuldi Bobur.

Humoyun jiddiy turib:

– Tangrim oldida ont ichib aytamenki, sabr-toqatim umrim yetgunicha yetur! – dedi.

2

Kobul daryosining boʻyida Bobur egachisi Xonzoda begim uchun qurdirgan Bogʻi Dilkushoning koʻk marmar koʻshkida mavlono Fazliddin choʻkka tushib oʻtiribdi. Undan pastroqda mavlononing soqol-moʻylovi koʻzga koʻrinib qolgan oʻgʻli odob bilan qoʻl qovushtirib, yerdan koʻzini olmay, sukut saqlaydi.

Nafarmon qabo kiygan, yuziga oq harir parda tutgan Xonzoda begim siniq tovush bilan toʻxtab-toʻxtab soʻzlaydi:

- Hammadan koʻra.. oʻlgan odamga qiyin ekan, mavlono. Oʻlgan qaytib kelmas ekan... Tiriklar... ohvoh qilib, ming kuyib-yonsalar ham, axiri bir kun... tasalli topar ekanlar. Mana, oʻzimdan qiyos...
- Begim, bu zamonda tiriklarga ham oson emas. Mening Andijondan bosh olib chiqib ketganimga yigirma uch yil boʻldi. Shundan beri sizning boshingizga qancha kulfatlar tushdi! Biz qancha balolarni koʻrdik.

Xonzoda begim Andijonda qolib ketgan yoshlik yillarini koʻz oldiga keltira boshladi. Mavlono Fazliddin oʻshanda qanchalik koʻhlik yigit boʻlganiga hozir ishonish qiyin. Azob-uqubatlarga toʻlib-toshgan soʻnggi oʻn yilliklar uning boʻyinlariga ham ajinlardan toʻr solib ketgan, qoʻllarini suyakday qotirib, tomirlarini boʻrttirgan, yelkasini bukchaytib, oltmish yoshlik moʻysafidga oʻxshatib ketgan. Holbuki, u endi ellik uch yoshga kirgani Xonzoda begimga ma'lum edi. «Oʻzim-chi?» deb begim har kuni koʻzguda koʻradigan aksini xayolidan oʻtkazdi.

Xonzoda begimning old tishlaridan uch-toʻrttasi tushib ketib, lablari burisha boshlagan, sochi siyraklashib, kulrang tusga kirib qolgan edi. Goʻzal yoshliklari endi hech qachon qaytib kelmasligi, umrlarining eng yaxshi yillari ochilmay soʻlgan gulday umrbod xazon boʻlganligi Xonzoda begimning yurak-bagʻrini timdalab oʻtdi.

- Mavlono, oʻgʻlingiz necha yoshdalar?
- Yigirma birda, begim.

Xonzoda begim halok boʻlgan Xurramshohning tirik boʻlsa hozir yigirma ikki yoshga kirishini esladi. Bu yoʻqotishning unutilmas alami keyingi dardi ustiga qoʻshildi-yu, koʻziga yosh quyilib keldi:

– Ishqilib, oʻgʻlingizning umri uzoq boʻlsin. Men koʻrgan musibat sizning boshingizga hech vaqt tushmasin, mavlono. Men endi tirik qolmayman degan edim. Yolgʻiz oʻgʻlimning ketidan ketaman degan edim. Lekin jonim qattiq ekan.

Mavlono begimning yigʻisidan sarosimaga tushib, oʻgʻliga bir qarab oldi. Soʻng begimning xayolini boshqa yoqqa burish uchun oʻzining boshiga tushgan azobuqubatlardan soʻzlashga tushdi:

– Hirotlar ham juda notinch boʻlib ketdi, begim. Shoh Ismoil shaharni olib, sunniylarni quvgʻin qildi. Keyin yana shayboniyzodalar shaharni bosib olib, shia tarafdorlarini qatagʻon qildi. Shia mozorlarini ochirib, Marvda Shayboniyxonni oʻldirtirgan ruhoniylarning suyaklarini toʻplarga solib ottirdilar. Keyin koʻp oʻtmay, Hirotni yana qizilboshlar ulardan tortib olishdi. Qasd olish qaytadan boshlandi. Hammayoq algʻov-dalgʻov.

Kamoliddin Behzod Hirotdan Tabrizga shoh saroyiga xizmatga olib ketildi. Mavlono Xondamir shahardagi toʻpolonlardan bezib, ota yurtlaridagi uzoq bir qishloqqa chiqib ketdilar. Bizga oʻxshagan musofirlarning ahvoli bundan ham battar boʻldi... Oʻgʻlimiz Aloviddin Hirotda sangtaroshlik san'atini oʻrgangan edi. Lekin san'at bilan kimning ishi bor? Axiri, shoir Muhammad Sulton bilan maslahatni bir joyga qoʻydig-u Bobur mirzodan panoh istab, Kobulga keldik.

Bu gaplar davomida Xonzoda begim koʻz yoshlarini artib, oʻzini ancha bosib oldi:

– Kelib behad yaxshi qilgansiz, mavlono... men sizga bir omonatingizni qanday qaytarishni bilmay yurgan edim.

Mavlono Fazliddin koʻzlari pirpirab:

- Qaysi omonatim? - dedi.

Xonzoda begim ma'yus kulimsirab:

– Hozir, – dedi-yu, oʻrnidan koʻtarildi va toʻrdagi oʻymakor eshikdan ichkariga kirib ketdi.

Koʻp oʻtmay u bir xizmatkorga oq ipak matoga oʻralgan narsani koʻtartirib, qaytib chiqdi.

Begimning ishorasi bilan xizmatkor haligi narsani mavlono Fazliddinning oldiga qoʻydi-da, ta'zim qila-qila orqasi bilan yurib, chiqib ketdi.

- Mavlono, ochib koʻring, - dedi Xonzoda begim.

Mavlono Fazliddin oʻramni sekin ochdi-yu, chetlari sargʻayib ketgan chizmakashlik qogʻozlarini koʻrdi. Soʻng ularni avaylab, varaqlar ekan, oʻzining Andijonda qurmoqchi boʻlib, Xonzoda begim bilan bamaslahat chizgan loyihalarini tanidi. Yigitlik orzulari xayolida qaytadan uygʻonib, koʻzlari chaqnab ketdi. Andijonda qurilmay qolgan obidalarning loyihasini shuncha yildan beri asrab olib yurgan Xonzoda begim unga hozir oʻsha oshiqlik paytidagidek nafis va jozibali koʻrindi. Oʻshda, qoyatosh ustida noxosdan begimning

belidan olgan paytidagi shirin tuygʻulari uygʻondi-yu, yuragini zavqqa toʻldirdi:

– Hazrat begim, siz menga jonimni qaytarib bergandek boʻldingiz! Moʻjizani qarang! Orada shuncha yillar! Shuncha yoʻllar! Shuncha togʻ-u daryolar!

Mavlono Fazliddinni toʻlqinlantirgan zavq va quvonch Xonzoda begimga ham oʻtdi. Uning tovushida shodlik jarangi eshitildi:

- Rostdan, bu loyihalar menga qoʻshilib juda koʻp balolarni boshdan kechirdi. Men qancha joyga borgan boʻlsam, bular ham bisotlarim-u javohirlarim orasida men bilan sargardon boʻlib yurdi. Faqat oxirgi marta Qunduzdan Samarqandga joʻnaganimizda, togʻlar-u daryolardan koʻp yuk olib oʻtib boʻlmadi. Sandiqlarimdan bir qismi Qunduz qoʻrgʻonida qoldi. Shular ichida bu loyiha ham qolgan ekan. Samarqandga borib koʻp achindim. Yoz kelsa, Qunduzga odam yuborib olib keltirmoqchi edim... Keyin haligi falokatlar boʻldi... Qunduzga qolgani yaxshi boʻlgan ekan. Boshqa sandiqlarimning hammasi Hisorda fitnachi moʻgʻullarning ilkida qoldi... Mavlono, qarang-chi, hamma varaqlari joyidami?

Shunday deb, Xonzoda begim yuzidan harir pardasini boshi ustiga koʻtarib qoʻydi-yu, loyihalarga tikilib qaradi.

- Hammasi joyida! dedi mavlono Fazliddin uning yuziga minnatdorona koʻz tashlab. – Samarqandda faqir sizning huzuringizga kirishga jur'at etolmagan edim.
- Oʻzim sizni chorlamoqchi boʻldim. Ammo loyihalar Qunduzda qolganligi uchun andisha qildim...

Mavlono Fazliddin Andijonda Xonzoda begimning suratini ham chizganini, hozir loyihalar orasida oʻsha surat yoʻqligini begimga eslatgisi kelib:

- Balki... Suratlar yoʻqolib ketgandur? - dedi.

Xonzoda begimning yuziga nafis qizillik yugurdi:

- Hali ham musavvirlik qilmoqdamisiz, mavlono?
- Hazrat begim, koʻp yil mashq qilinmasa qoʻl musavvirlikdan chiqib qolar ekan... Hozir faqat me'morlik bilan mashgʻulmen.
- Andijonda chizgan suratlaringizni men alohida saqlamoqdamen, - deb Xonzoda begim mavlononing oʻgʻliga iymanib koʻz tashladi.

Boʻy yetib qolgan bu yigit oldida oʻzlarining yoshlik muhabbatlarini eslatuvchi suratni Xonzoda begim ataylab olib chiqmaganini mavlono Fazliddin endi sezdi.

– Lutfan siz haqsiz, hazrat begim... Oʻsha suratlar endi umrbod sizniki boʻlgʻay!

Buni juda istab turgan Xonzoda begim:

- Saxovatingizdan toabad minnatdormen! - dedi.

Mavlono Fazliddin qoʻlini koʻksiga qoʻyib, odob bilan bosh egdi. Soʻng gapni yana ochiq turgan eski loyihalari ustiga burdi:

– Men endi bularni Hirotda oʻrgangan yangiliklarim bilan toʻldirgaymen. Ana undan soʻng bemalol amalga oshirsam boʻlur... faqat... bu madrasa-yu qasrlar qayerga qurulmogʻi mumkin? Andijon... uzoqda qoldi. Kobulgami?

Xonzoda begim ma'yus bosh chayqadi:

– Kobul – biz orzu qilgandek qudratli davlat emas, mavlono. «Ulugʻ me'morlik obidalari qurmoq uchun ulkan davlatning qudratiga suyanmoq kerak» deganlar haq ekanlar. Nachora?..

Mavlono Fazliddin oldida ochiq turgan tarhlarga gʻamgin koʻz tikib:

- Ha, taqdir bizni notavon qilib yaratmishdir, - dedi. Ovozi keksalarnikidek gʻijirlab eshitilganini oʻzi ham sezdi-yu, qoʻshib qoʻydi: - Men endi qarib qoldim. Qirgʻinlar, toʻpolonlar, fatoratlar bilan umrim oʻtdi. Lekin nahotki bu hammasi uzluksiz

dayom etayersa? Axir bir men emas, oʻnlab zakovatli olimlar, hunarpeshalar, shoirlar jaholat dovuli bilan Movarounnahr-u Xurosondan quvilmishlar. Ilgari qora kuchlar bizni Andijondan guvsalar, Samarganddan panoh topar edik. Samargand johillari kun bermasalar, Hirotdan najot izlar edik. Endi Andijon-u Samargand ham, Buxoro-yu Hirot ham - barchasi koʻchmanchi sultonlar-u diniy adovatlar dovulidan zir titramoqda. Dovul uchirgan xazonday Vatanidan quvilgan gancha ma'rifatli olim-u san'atkorlar, gancha nodir iste'dodlar behuda hayf bo'lib ketmoqdalar. Bizning Vatandan avrilishimiz - daryoning oʻzanini yoʻqotib, dasht-u biyobonga toshib, chiqib ketishiga oʻxshaydir. Amudaryo bir vaqtlar shu kuyga tushgan ekan-u to oʻziga yangi yoʻl solib, boshqa bir dengizga borib qoʻyilguncha u yoqdan-bu yoqqa bosh urib, toshib vurgan ekan. Biz ham umr boʻvi u yoqdan-bu yoqqa bosh urib, munosib oʻzanimizni topolmaymiz. Endi bu kajraftor falak hech boʻlmasa farzandlarimizga rahm qilsin! Biz boʻlmasak, bular oʻzlariga munosib oʻzan chopib, yangi bir madaniyat dengiziga borib quvilsinlar!

Umr boʻyi oʻz ijodiy rejalarini amalga oshirolmay, kuyib yurgan iste'dodning bu alamli nidosi Xonzoda begimni titratib yubordi.

- Mavlono, faqat siz emas, Bobur mirzo ham oʻzanini yoʻqotgan daryodek bezovtalar!
 - Bilamen, taqdir ul hazratga ham oʻgaylik qilmishdir!
- Ammo Bobur mirzo sargardon boʻlib yurgan iste'dodlar daryosini bir joyga yigʻmoqchilar, nasib boʻlsa, ilm-u san'atning yangi bir dengizini barpo qilmoqchilar.
- Biz uchun soʻnggi umid hali ham Bobur mirzodirlar. Shuning uchun oʻgʻlim bilan Kobulga keldik.

- Qayerga joylashdilaringiz, mavlono?
- Jiyanim Tohirbeknikiga tushdik. Oʻzi safarda ekan...

Ota-bola ikkovlari ham eski kiyim kiyishgan, ranglarini juda oldirib qoʻyishgan. Ularning moddiy jihatdan ham qiynalib yurganlarini sezgan Xonzoda begim yana oʻrnidan turib, ichkari xonaga kirib ketdi. Qabosining choʻntagidan kalit olib, tokchada turgan poʻlat sandiqni ochdi. Inisi Bobur mirzo Xonzoda begimga eng nufuzli a'yonlari qatori ulufa tayinlagan edi. Har oyda xazinadan charm hamyonga solingan ming dinor oltin kelib turar edi. Xizmatkorlar begimga berilgan mulkning ekin-tikini bilan tirikchilik oʻtkazishardi. Begimning bir oʻziga koʻp pul ketmas, shuning uchun xazinadan kelgan oltin toʻla hamyonlarning anchasi poʻlat sandiqda taxlanib turar edi.

Xonzoda begim mavlono Fazliddinning kichikroq bir hovli va ot sotib olishi, kiyim-kechagi, uch-toʻrt oylik tirikchiligi uchun qancha pul ketishini chamalab koʻrdi-da, ming dinorlik hamyonlaridan ikkitasini oldi. Soʻng ularni boyagi xizmatkorga berib, oltin barkashda koʻtartirganicha ota-bolaning oldiga qaytib chiqdi. Mavlono Fazliddin hamyonni koʻrib, xijolat cheka boshladi. Xonzoda begimdan pul olish unga ogʻir edi.

Mavlono, bu hamyonlar Bobur mirzoning xazinalaridan kelmishdir. Oʻzlari boʻlmaganliklari uchun ulufalarini men sizga topshirmoqchimen. Biri
oʻgʻlingiz Aloviddinga. Marhamat! Olingiz!

Aloviddin qoʻlini koʻksiga qoʻyib, endi birinchi marta ogʻiz ochib gapirdi:

- Rahmat, hazrat begim, biz sizdan behad minnatdormiz!

Uning yoqimli tovushi va soʻzlarni mayin talaffuz qilishi mavlono Fazliddinning yigitlik paytini eslatar edi... Shu tufayli ota-bola ikkovi ham begimga benihoya aziz koʻrinardi. Amudaryo tomondan togʻ oshib uchib kelgan turnalar Kobulning ustidan janubi-sharq tomonga oʻtmoqda edilar. Arkning tillakori ayvonida Mohim begim bilan nonushta qilib oʻtirgan Bobur turnalarning qisqa va sirli tovush bilan «qurey»lashini eshitdi-yu, oʻrnidan turib, ayvon chetiga bordi va osmonning ovoz kelayotgan tomoniga tikildi... Koʻkda egilib-chayqalib kelayotgan bir shoda qora marjonni koʻzlari bilan qidirib topgandan keyin turnalarning tovushi unga goʻyo aniqroq eshitila boshladi.

Goʻzal va tiniq «qur-ey», «qur-ey»larda qandaydir horgʻinlik ohanglari borga oʻxshardi va turnalarning uzoq-uzoqlardan uchib kelayotgani esga tushar edi. Balki ular shu kelishda Andijonning ustidan uchib o'tirgandirlar? Yoki Toshkent va Samarqand atroflaridagi sokin suvlar bo'yiga qo'nib, dam olgandirlar? Bu o'ydan Boburning qalbini alamli bir sogʻinch tuygʻusi chulgʻab oldi. Hatto shu turnalar koʻrib kelayotgan joylarni u endi borib koʻrolmaydi. Koʻli Malikda va Gʻijduvonda yengilib, Hisorda fitnachilar xiyonatidan abgor boʻlib qaytganiga, mana, o'n uch yil bo'lyapti. Bobur shundan beri qaltis harbiy yurishlardan oʻzini tiyib yuribdi. Moʻgʻul beklarining xiyonatlarini Qunduzdayoq bila turib, yana oʻshalarga va qizilboshlarga tavakkalchilik bilan suyanib, ish qilgani uning Vataniga qaytadigan barcha yoʻllarini bekitib tashlagan edi. Turnalarning uzoqlashib, soʻnib borayotgan tovushlari ta'sirida Boburning koʻngliga: «Endi tugʻilib-oʻsgan yurtingga umrbod qaytolmaysan!» degan alamli o'y keldi-yu, yuzi birdan tundlashdi. Orgasiga oʻgirilib, savdarboshiga chogʻir keltirishni buvurdi.

Mohim begim dasturxon yonidan Boburga tomon kelar ekan:

– Hazratim, ertalabdan chogʻir? – deb taajjublandi. Hozir farzandlaringiz salomga kelurlar... Ana, mirzo Hindol atkalari bilan kelmoqdalar.

Boshiga kichkina ipak salla oʻragan, murassa' kamariga kichkina qilich taqilgan sakkiz yoshli mirzo Hindol ayvonning baland zinapoyasidan kattalarday qoʻl qovushtirib, ta'zim qilib chiqdi. Otasi buni koʻrib, beixtiyor jilmaydi. Hindolni yelkasidan quchib erkalatdi, keyin uni yoniga olib, zarbof koʻrpacha ustiga oʻtirdi.

- Qilich taqib olibsiz, amirzodam, jangga bormoqchimisiz? - deb hazillashdi.

Hindol katta-katta koʻzlarini chaqnatib, Mohim begimga bir qarab oldi. Mohim begim «Ayting!» deganday bosh irgʻadi. Shunda Hindol burro til bilan otasiga:

- Meni ham olib boring, dedi.
- Qayerga?
- Hin... Hindistonga.
- Hindistonda nima qilmoqchisiz?
- Yoʻl... yoʻlbarsni koʻramen...
- Ana xolos! deb Bobur kuldi. Biz sizga Hindol ismni bersak, siz faqat Hind yoʻlbarsini tomosha qilmoqchisiz xolosmi?

Bola qizarib:

- Yoʻq, - dedi va jajji qilichining sopini qisimiga oldi. - Agar yoʻlbars... «yeyman» desa, men mana shu qilich bilan uni uramen!

Bobur Hindolni yana yelkasidan quchib erkalatdi:

- Barakallo! Unday boʻlsa, sizni Hindistonga, albatta olib borurmiz...

Shu payt ayvon zinapoyasidan oltin koʻzachada chogʻir olib chiqayotgan sharbatchi koʻrindi. Mohim unga qoʻli bilan «Qayting!» ishorasini qildi. Sharbatchi Boburga qoʻrqa-pisa koʻz tashladi-da, uning oʻgʻli bilan ovunib, chogʻirni esidan chiqarganini sezdi va

zinadan sekin qaytib, tushib ketdi. Bobur Hindoldan xat-savodni qanchalik oʻrganganini, qanaqa she'rlar yod bilishini soʻradi.

- Men qur'on oyatlaridan yod bilurmen. Qul huvallohu Ahad...
- Hindolning she'rga unchalik ishi yoʻq, deb izoh berdi Mohim begim. – Bunga oʻyin boʻlsa, yoydan oʻq otsa, ot chopsa bas. Kitobga xushi yoʻq.
 - Balki yoshi kichik boʻlgani uchundur?
- Gulbadan bundan uch yosh kichik. Ammo savodi Hindoldan yaxshi. Hozir koʻrursiz... Qizcha kitobga shunchalik oʻchki, taajjubdan yoqamni ushlaymen.

Bobur o'ychan tovush bilan:

- Nahot Hindol oʻsha togʻalariga tortsa? - dedi.

Boburning bu soʻzlarida qanchalik murakkab ma'no borligini faqat Mohim begim tushunardi. Chunki Hindol Mohim begimdan emas, Boburning kichik xotini Dildor ogʻachadan tugʻilgan edi. Shariat beradigan ruxsat boʻyicha Bobur ham uch xotinlik boʻlib olgan, avloddan-avlodga o'tib kelayotgan bu berahm odat Mohim begimni qanchalik ezmasin, alamini ichiga yutib, chidab kelar edi. Boburning ikkinchi xotini Gulruh begimdan Mirzo Komron va Mirzo Askariy otliq ikki oʻgʻil tugʻildi. Bular Humoyundan keyingi taxt vorislari edilar. Gulruh begim shu sababli Mohim begimga kundoshlarcha sovuq muomala qilar edi. Uch xotin Kobulning uch chekkasida har biri alohida koʻshkda tursa ham bir-birlarining ahvollaridan xabardor edilar. Dildor ogʻacha besh yilda ikki qiz tug'di. Mohim begim esa uch marta farzand dog'ini boshdan kechirdi.

Uning Humoyundan keyin tuqqan ikki oʻgʻil, bir qizi birin-ketin oʻlib ketdi. Keyin umuman boʻyida boʻlmay qoldi. Buning hammasidan Mohim begim juda qattiq kuyib yurganini sezgan Bobur unga qanday tasalli berishni bilmas edi. Bir kuni mana shu ayvonda

oʻtirganlarida, Mohim begimning oʻzi: «Dildor ogʻacha yana homilador emishlar, – deb qoldi. – Men kuyib ado boʻldim. Endi Dildor ogʻacha shu gal oʻgʻil tugʻsa ham, qiz tugʻsa ham, agar menga bersangiz oʻz farzandimdek tarbiyalab oʻstirar edim».

Dildor ogʻacha oʻz farzandini kundoshiga ishonib topshirishini tasavvur qilib boʻlmas edi. Lekin Mohim begim Humoyunni qanchalik yaxshi tarbiyalaganini hamma bilar, uning yana farzand oʻstirish ishtiyoqi zoʻrligini Bobur ham sezar edi.

Dildor ogʻacha Kobulning Bogʻi Yoʻngʻichqasida mana shu Hindolni tuqqanida, Boburning maxsus farmoni bilan uch kunlik chaqaloqni arkda turadigan Mohim begimning tarbiyasiga keltirib berdilar. Bu bolani toʻqqiz oy qalbi tagida koʻtarib yurgan Dildor ogʻacha: «Oʻgʻlimdan tiriklay judo boʻldim», deb ancha vaqt yigʻlab-siqtab yurdi. Bobur unga:

«Azaldan udum shundoq, – deb vaj koʻrsatdi. – Podshoh oilasida oʻgʻillarni katta xotin tarbiyat etmogʻi kerak. Mohim Humoyunni qandoq voyaga yetkazdi, koʻrdingmi? Hozir Badaxshonda eng obroʻlik hokim! Xudo xohlasa, Mohim Hindolni ham shundoq voyaga yetkizgusidir!»

Mohim begim Hindolni oʻz farzandidan ham ziyoda tarbiya qilayotgani Boburga ma'lum edi-yu, lekin bolaning togʻa avlodlari johil va ma'rifatsiz odamlar edi. Dildor ogʻacha Hisor va Samarqandda koʻp yomon ishlar qilgan Sulton Mahmud mirzoning avlodlaridan edi. Shayboniyxon tomonidan oʻldirilgan Sulton Ali mirzoga ham xeshligi bor edi. Bobur Samarqandda soʻnggi gal gʻalaba bilan borganda va qizilboshlar bilan may ichib yurgan kunlarida Dildor ogʻachaning husnini, xususan, dutor chalib, ashula aytgandagi shirin ovozini yoqtirib qolib, kayf ustida uni haramiga olgan edi. Buning hammasidan xabardor boʻlgan

Mohim begim Boburning «Hindol ma'rifatsiz togʻalariga tortmasin, tagʻin!» degan hadigini tarqatishga intildi:

- Hazratim, Humoyunning koʻp fazilatlari Hindolda ham bor. Qalbi toʻla mehr. Ishonamenki, Hindol ham sizga tortgay. Egachingiz Xonzoda begimdan eshitganmen. Siz ham mana shu yoshda «urushurush» oʻynashni behad yaxshi koʻrar ekansiz.

Bobur yana Hindolga yuzlandi:

- Men senga kitoblar sovgʻa qilsam oʻqurmisen?
- Oʻqu... oʻqurmen! deb Hindol tutilibroq javob berdi.

Bobur munshini chaqirib, Kobul kutubxonasidan Hindolga kerakli kitoblarni Mohim begimga keltirib berishni buyurdi. Shundan keyin savdarboshi ichki xonadan bolaning boʻy-bastiga moslab ishlangan oltin dastali Kamoni Shoshiy olib chiqdi. Chiroyli soqdoqda oʻn ikkita oltin bezakli yoy oʻqi ham bor edi. Bunday chiroyli oʻq-yoyni birinchi marta koʻrayotgan bola nodir sovgʻani qoʻliga olganda koʻzlari quvonchdan yaltirab ketdi.

– Ana, tirandozliqni mashq qil, ammo kitob oʻqishni ham unutma! – deb tayinladi Bobur.

Hindol ta'zim bilan otasiga qulluq qilib, zinapoyadan pastga tushib ketdi. Oradan sal oʻtmay, ayvonning ichki eshigidan ellik yoshlardagi enaga ayol kichkina Gulbadanni qoʻlidan yetaklab chiqdi. Bu istarasi issiq ayol – Tohirning xotini Robiya edi. Avvallari Qutlugʻ Nigor xonim xizmatida boʻlgan Robiya hozir Mohim begim huzurida besh yashar Gulbadanga enagalik qilmoqda edi.

Bobur oʻz oilasiga yigirma toʻrt yillik qadrdon boʻlgan Robiyaning ta'zim bilan bergan salomiga alik olib, u bilan iliq soʻrashdi. Soʻng qizchasi Gulbadanga yuzlandi. Qoʻgʻirchoqday yasantirilgan jajji qizchaning qosh-koʻzi beixtiyor Dildor ogʻachani eslatdi.

Gulbadanni ham oʻsha goʻzal juvon tuqqan edi. Mohim begim Hindolni onalarcha suyib parvarish qilayotganini yillar davomida kuzatib yurgan Dildor ogʻacha bu ayolning tantiliga qoyil boʻlgan va Gulbadanni unga oʻzi farzandlikka bergan edi. Bu ikki ayol endi kalondimogʻ Gulruh begimga qarshi goʻyo bolalar orqali ittifoq tuzgan edilar. Gulruh begim esa bir emas, ikki oʻgʻli boʻy etib kelayotganidan behad magʻrurlanar, Komron mirzo va Askariylarni taxt vorisi Humoyunga qarshi raqobat tuygʻusi bilan tarbiyalar edi. Shu sababli Bobur ham Gulruh begimdan koʻp ranjir, lekin oradagi kundoshlik balosini butunlay daf qilish qoʻlidan kelmas edi.

Murgʻak qizchasini koʻrgan zahoti esiga tushgan bu murakkabliklar Gulbadanning egilib ta'zim qilishi va shirin «assalomi» bilan xayolidan uzoqlasha boshladi. Bobur qizchasini qoʻlida koʻtarib olib, peshonasidan oʻpdi, soʻng dasturxon oldiga kelib, uni tizzasiga olib oʻtirdi.

Dasturxon toʻla noz-ne'matlarni, Odinapurdagi¹ Bogʻi Vafoda oʻsgan chiroyli norinjlarni² koʻrsatib:

- Ne yeysan? - deb soʻradi.

Gulbadan odob bilan bosh chayqadi – u podshoh otasining oldida ovqat chaynab oʻtirishdan iymanar edi. Lekin dadasining zar qoʻshib toʻqilgan qimmatbaho abosidagi tugmalar uni juda qiziqtirib qoʻydi. Bu tugmalardan birining yuz tomoniga kichkina qilib yoʻlbars shakli oʻyilgan. Yoʻlbarsning koʻzlari oʻrniga zigʻirdan ham kichik yoqut donalari oʻrnatilgan. Ikkinchi oltin tugmaning yuzida afsonaviy bir qush qanotlarini yozib, tumshugʻida kichkina gavharni olib, uchib boryapti. Umrida bunday gʻalati tugmalarni koʻrmagan qizcha ularning bittasini qoʻlchasi bilan sekin ushlab koʻrdi.

¹ Odinapur – Afgʻonistonning janubidagi shahar, hozirgi Jalolobod

² Norinj- apelsin.

- Senga tugmalar ma'qulmi? deb soʻradi dadasi, Gulbadan «ha», deb jilmaydi. Bobur qizchasi ushlab koʻrgan yuqorigi tugmani yulib olmoqchi boʻlib bir tortdi. Lekin tugma juda mahkam tikilgan ekan, uzilmadi.
- Hazratim, ne qilmoqchisiz? hayratlanib soʻradi Mohim begim. - Qoʻying, tugmani uzmang, axir bu sizning shohona libosingiz!
- Hechqisi yoʻq. Zargarga buyursalar, yana bitta shundoq tugma yasab bergay.

Bobur kamariga osilgan qindan kichkina qalamtarosh oldi-yu, oʻsha tugmani ipidan qirqib olib, qizchasiga berdi:

– Lekin yoʻqotma. Bu qush – Humo. Ilohim senga baxt keltirsin.

Gulbadan quvonib va hayajonlanib:

- Rahmat, hazrati... oli... dedi-yu, lekin jumlaning oxirini uncha kelishtirolmadi.
 - Meni ota deya qol, qizim.

Gulbadan onasi Mohim begimga savol nazari bilan qaradi. Mohim «Ha, ayt!» degandek bosh irgʻadi. Shunda Gulbadan qoʻlchalari bilan otasining boʻynidan quchdi-da:

- Otajon! - deb uning yonogʻidan oʻpdi.

Bobur koʻpdan beri his qilmagan bolalarcha bir poklik va ma'sumlik borligʻiga goʻyo nur boʻlib taraldi.

- Guli, - dedi Mohim begim, - endi hazrat otangga bitta hikoya aytib bergin.

Gulbadan sekin otasining tizzasidan pastga tushdida, xuddi muallimga javob berayotgan talabadek tik turib, toshbaqa va chayon haqidagi mashhur hikoyatni aytib berdi. Xususan, toshbaqa chayonga yaxshilik qilib, uni daryodan oʻtkazib qoʻymoqchi boʻlganda, chayon unga zahar solishga tirishganini, soʻng bu yomonligi uchun daryoga choʻkib oʻlganini shunday kelishtirib aytdiki, Bobur zavq qilib kuldi-da:

– Siz soʻzlab berganmidingiz? – deb Mohimdan soʻradi.

– Yoʻq, oʻzi «Toʻtinoma»ni bemalol fahmlab oʻqidi. Besh yoshga yetmay, savod chiqargan qizchani men birinchi koʻrishim.

- Gulbadanga koʻz tegmasin, zehn-u muhofazasi benazir.
- Sa'diyning «Guliston»idan xiyla hikoyatlarni yod bilur. Ash'orga uncha oʻch emas. Ammo nasriy hikoya xotirasiga soʻzma-soʻz naqshlanib qolur. Bogʻda, koʻchada koʻrganlarini ham kelishtirib hikoya qilur. Men oʻzimcha orzu qilurmenki, Gulbadan shoira boʻlmasa ham hazrat otalarining nasrnavisligini meros olsa ne ajab?
- O, nasr yozmoq uchun qanchalik koʻp savdolarni boshdan kechirmoq kerak, Mohim!

Gulbadan ota-onasining gaplariga yaxshi tushunayotganday sergaklanib, quloq solmoqda edi. Uning katta-katta shahlo koʻzlarida qandaydir umid, ayni vaqtda, xavotirlik borga oʻxshardi. Goʻyo uning otasidan kutgan umidlari puchga chiqsa koʻngli qattiq ozorlanishini sezib, xavotirlanayotgandek koʻrinardi.

- Zukko qizim, hazrat onang sendagi ajib bir qobiliyatni yaxshi payqabdir. Agar Gulining nasrga ishqi zoʻr boʻlsa, – deb Bobur Mohim begimga qarab davom etdi, – «Vaqoye'»ning osonroq boblaridan beray, xattot qizchamizga bir nusxa koʻchirib bersin.
- Men ham sizdan shuni iltimos qilmoqchi edim. Guli turkiy tilni hazrat otalarining kitoblaridan oʻrgangani yaxshi. Men, ojizangiz, orzumandmenki, faqat Humoyundek oʻgʻillaringiz emas, Gulbadandek qizlaringiz ham tarixda sizga munosib nom qoldirsalar¹.

¹ Oldinroqqa ketib aytish mumkinki, Mohim begim Gulbadanni chindan ham Bobur nasri ruhida tarbiyaladi. Gulbadan begim voyaga yetganda, «Boburnoma»ning eng yaxshi fazilatlaridan ibrat olib, oʻzining mashhur «Humoyunnoma» asarini yozdi. Oʻsha zamonlarda ayollarni kamsituvchi diniy aqidalarga qarshi borib yozilgan «Humoyunnoma» tariximizning nodir madaniy obidalaridan biriga aylandi.

Bu soʻzlarning samimiyligini butun vujudi bilan sezgan Bobur noxosdan toʻlqinlanib ketdi. Mohim begim kundoshi Dildor ogʻachaning bir emas, ikki farzandini shunchalik mehr bilan tarbiyalashi va ularning kelajagiga shu darajada jon kuydirishi uchun qancha katta bardosh, tantilik, bagʻri kenglik kerak boʻlganikin? Bobur yoshi qirqdan oshgan sari kelajak avlod haqida koʻp oʻylar, farzandlar, ayniqsa, shu yoshda odamning hayotida hal qiluvchi kuchlardan biriga aylanishini sezardi. Shu sababdan ham Mohim begimning birgina Humovunni emas, mana, Hindol bilan Gulbadanni ham otalariga sadoqatli va mehroqibatli farzandlar qilib tarbiyalayotgani xotin kishining oʻz eriga qilishi mumkin boʻlgan eng ulugʻ yaxshiligi ekanini hozir butun borlig'i bilan his qildi. Bobur podshohlik udumiga yon berib, Mohim begimning ustiga vana ikki xotin olgan boʻlsa ham Mohim buni bagʻri kenglik bilan kechirgani, yana oʻzini unga shunchalik fido qilayotgani - tengsiz bir muhabbat va sadogatning nishonalari emasmi? Bobur tez oʻrnidan turib, koʻrpachada oʻtirgan Mohim begimning ustiga engashdi-yu, sochidan, peshonasidan, yuzidan o'pa boshladi.

 Mohim, siz mening benazir malagimsiz! – deb ehtiros bilan shivirladi: – Men shoh boʻlsam ham ulugʻ qalbingiz oʻtrusida qulmen!

Mohim ham tez oʻrnidan koʻtarildi. Gulbadan otaonasiga iymanib qarab turganini koʻrdi-yu, atrofga olazarak boʻlib koʻz tashladi.

Robiya ularni xoli qoldirib, ichkariga kirib ketgan. Savdarboshilar ham yoʻq. Bobur Mohim begimning koʻzlaridan ham oʻpib:

– Buyuring, – dedi, – neki istasangiz men bajo keltiray!

Mohim begim uyalib shivirladi:

- Gulbadanga javob beraylik...

Bobur yana savdarboshini chaqirdi va Gulbadanga Hindistondan keltirilgan toʻtiqushlarni hadya qilishni buyurdi.

Chiroyli oltin qafaslarga solingan toʻtiqushlarning kamalakday tovlangan patlari Gulbadanning e'tiborini oʻziga tortdi. Toʻtiqushlar soʻzlashni bilar edi, kattarogʻi shangʻi tovush bilan:

- Assalom, begim! - dedi.

Gulbadan bundan zavq qilib, bolalarcha soddalik bilan:

- Assalom, to'ti! - dedi.

Shunda hammalari beixtiyor kulib yubordilar. Gulbadan dadasining oldiga chopib keldi, bu ajoyib sovgʻasi uchun uning qoʻlini oʻpdi. Bu orada ichkaridan chiqqan Robiya qizchani sekin qoʻlidan oldi-da, toʻtiqush solingan qafas bilan birga zinapoyadan pastga olib, tushib ketdi.

Bobur va Mohim begim ikkovlari ichkari xonaga yoʻnaldilar. Katta tanobiy uyning toʻridagi shahnishinga eroniy gilamlar va zarbof koʻrpachalar toʻshalgan edi. Bobur Mohim begimning xipcha belidan quchib, oʻsha tomonga boshlab borar ekan:

- Hali ham kelinchaklik paytlaringizdagidek sarv qomatsiz, Mohim, dedi.
- Chunki siz men uchun hamon yigirma yoshlik yigitsiz!

Mohim begim shunday deb, ichki uyning ochiq eshigidan koʻrinib turgan shohona toʻshaklariga olovli bir nigoh tashlab oldi. Bugungi ehtirosli tun, ikkovlari xuddi alanga tillaridek goh butun borliqlari birlashib, goh yana ajrashib, soʻng qaytadan olov mavjida birlashib, ikki tan bir vujudga aylangan paytlari xayoliga titroq solib oʻtdi. Oʻsha daqiqalarda Mohim erining qulogʻiga: «Siz mening koʻz ochib koʻrgan yagona yorimsiz, sochingizdan-tirnogʻingizgacha butun borligʻingiz menga jonimdan ham aziz, endi

sizni boshqa hech kimga bermasmen!» deb shivirlagan edi. Boburning hozir uni oʻpib: «Men shoh boʻlsam ham sizning ulugʻ qalbingiz oʻtrusida qulmen!» degani Mohimning oʻsha tungi soʻzlariga javobdek eshitildi. Bu soʻzlar va oʻpichlar Mohim begimning borligʻini shunday yayratib yubordiki, yoshi oʻttiz yettiga borgan boʻlsa ham hozir yigirma yoshli juvondek husni jamoli ochilib, koʻzlaridan oʻt chaqnab, shoʻx ohangda soʻradi:

- Men hozir neki tilasam bajo keltirurmisiz?

Bobur Mohimning yangi bir koʻshk qurib berishini yoki katta xarajatlar uchun xazinadan qoʻshimcha oltin soʻrashini kutgan edi. Uning bunaqa istaklarini soʻzsiz bajargisi kelib turgan Bobur:

- Sizdan mol-u jonni ayamasmen, buyuring! dedi. Mohim bir lahza taraddudlanib turdi-yu, past va jiddiy tovush bilan dedi:
- Sizdan mol-u jon emas, farzandimiz Humoyunni... Kobulga qaytarishingizni iltimos qilmoqchimen.

Bobur ham endi jiddiylashib:

- Nechuk? dedi. Butunlay Kobulga qaytsinmi?
- Ha, sizdan o'tinamen!
- Mohim, Humoyun yonimizda boʻlishiga men ham tashnamen. Biroq shimoliy chegaralarimizni Humoyundek ishonchli odam qoʻriqlab turmasa, shayboniyzodalarni oʻzingiz bilursiz...
- Bilganim uchun tun-u kun xavotirdamen. Ikki yildan beri Humoyun Badaxshonda. Men uni shunchalik sogʻinamenki, turgan xonalariga kirsam, oʻqilgan kitoblarini varaqlasam, koʻzimga yosh kelur.
- Mohim, siz bilursizki, tojdorlar-u valiahdlarga ona boʻlishning mashaqqati behisob... Shukr qiling, mening rahmatlik onam tortgan azoblarni Xudo sizning boshingizga solgan emas. Humoyun mirzoning ishlari juda taraqqiyda. Badaxshonlik sodiq yigitlardan toʻrt-besh mingi uni asrab-avaylab yururlar. Shayboniyzodalar ham biz bilan murosa

qilishga majbur, chunki hozir ular ichki nizolarni tinchitolmay, oʻzlari bilan oʻzlari ovora.

– Undoq boʻlsa, Badaxshonga endi Komron mirzoni yubora qoling. Axir u kishi ham oʻn oltiga kirdilar. Gulruh begim doim oʻgʻillarining er yigitga aylanganidan faxrlanib gapirurlar.

Bobur xotinlarining orasidagi raqobatni juda yomon koʻradi. Chunki kundoshlik raqobati bolalarga ta'sir qilsa, ular bora-bora bir-birlariga dushman boʻlib qolishlari mumkinligini bilardi.

- Siz Gulruh begimning gapiga e'tibor bermang degan edim-ku, Mohim!
- E'tibor bermay ilojim yoʻq, hazratim! Chunki Gulruh begimning ikki oʻgʻli ham yonlarida. Men boʻlsam uzoqdagi Humoyunni sogʻinib, qon yuturmen!
- Obbo!.. Mayli, men sizning tilagingizni bajo keltiramen, deb soʻz berdim. Soʻzimda turmogʻim kerak. Humoyunni juda sogʻingan boʻlsangiz, ikki-uch haftadan soʻng uni, albatta koʻrursiz.
- Qayerda koʻrurmen? ovozi titrab soʻradi Mohim.– Kobuldami?

Bobur ovozini pasaytirib:

- Odinapurda, - dedi.

Odinapur Hindiston chegarasiga yaqin joyda edi, Mohim begim Boburning oʻsha joyda qoʻshin toʻplayotganini eshitgan edi. Aftidan, Humoyunning Kobulga kelib yurmasdan, bor qoʻshini bilan Badaxshondan toʻgʻri Odinapurga oʻtib borishi harbiy maqsadlarga muvofiqroq kelar edi. Mohim begim endi xavotirli ovoz bilan soʻradi:

- Hazratim Humoyunni ham Hind yurishiga olib bormoqchilarmi?

Sir saqlanayotgan mavzuda gap ochilgani uchun Bobur atrofga koʻz tashlab, bir lahza jim quloq soldi. Ayvonda ham, ichki uylarda ham ikkovlaridan boshqa odam yoʻq edi.

- Siz bilursiz, men Movarounnahrdan umidimni uzganimdan beri yorugʻ bir istiqbolni Hindiston tomondan izlamoqdamen. Oʻn yildan beri bir necha qayta ishonchli odamlarimni Hindga elchilikka yubordim.
 - Oʻzingiz ham Hindga toʻrt qayta borib keldingiz-ku.
- Lekin toʻrt martasida ham Dehliga yetolmadim. Laxoʻr atroflaridan qaytdim.
- Hindda Vatanlarini jon-jahd bilan himoya qiladigan botir yigitlar koʻp ekan-da.
- Ha, xususan, rajput yigitlari jasur qilichboz kelurlar.
- Ular jangda nechogʻlik beomon ekanini biz ham eshitdik. Shuning uchun har gal Hind yurishiga ketganingizda xavotirlik olovida qovrilib, tunlarni uyqusiz oʻtkazurmen. Har ikki tomondan qancha begunoh odamlar jang qilib, halok boʻlgani xayolimdan nari ketmaydi. Hatto Bajur qoʻrgʻonida oʻldirilgan uch ming yogʻiyning boshidan kalla-minora yasatibsizlar!
 - Siyosat uchun... zarur boʻldi.
- Ammo bunday siyosat sizdek siymo uchun ma'zur emas, hazratim! Shakkokligim uchun meni kechiring! Hind yurishi endi bas!
- Yoʻq, bas qilolmasmen. Hindiston rojalari menga elchi yubormishlar. Ular Ibrohim Lodining¹ zulmidan bezor emishlar. Mamlakatlari vayron, uluslari parokanda, oʻzaro urushlardan hamma bezgan. «Hindda qudratli davlat tuzib, qadimiy madaniyatni tiklamoq uchun bizga sizdek ma'rifatli tojdor kerak» deb, panjoblik Davlatxon oʻz oʻgʻli Dilovarxonni bizga vakil qilib yuboribdir.

Mohim begim Boburning Davlatxon bilan ittifoq tuzganini bilar edi. Boburni Ibrohim Lodi zulmiga qarshi chorlayotganlar orasida hindistonlik mashhur

¹ Ibrohim Lodi – afgʻon qabilalaridan chiqqan podsho.

roja Sangram Sinx ham bor edi. Bundan uch kun oldin Bobur shu rojaning elchisini qabul qilgan, lekin unga nima javob berganini hali koʻpchilik bilmas edi. Mohim eriga mayin tikilib:

- Bir savolga ijozat bering, dedi.
- Marhamat.
- Rano Sinx bilan ham ittifoq tuzdingizmi? Bobur tasdiq ma'nosida bosh irg'adi.
- Men Hindga borsam, uni talab kelish uchun emas, balki umr boʻyi intilib yetisholmayotgan orzularimni oʻsha yerda roʻyobga chiqarish uchun bormoqchimen! Hozir shu maqsadga yetishish uchun qulay fursat keldi.
- Biroq bu maqsadingiz yoʻlida dahshatli bir chohqonli urush bor!
 - Biz bu chohdan ot sakratib oʻtmogʻimiz mumkin.
- Hazratim, siz ot sakratib oʻtganingizda ham, bu chohga ming-ming beva-yu sagʻiralarning koʻz yoshlari toʻkilgay! Begona yurtning onalari-yu bevalari siz bilan urushda oʻlgan farzandlari-yu erlarining oʻlimini kechirarmikinlar?
- Oʻshal onalar-u bevalarning farzandlari-yu erlari parokanda yurtning ichki urushlarida ozmuncha halok boʻlmoqdami? Ibrohim Lodi goh Panjob bilan, goh Gvalior bilan, goh Bangola bilan jang qilur. Narigilar ham bir-birlari bilan taxt talashib urushurlar. Har yili qirq-ellik ming navkar bu oʻzaro urushlarda behuda halok boʻlmoqda. Mamlakat bizning Movarounnahrdek xarob. Bu toʻpolonlardan bezgan hind beklari qochib kelib mendan panoh topdilar. Shulardan biri Hindubek besh yildan beri mening nufuzli amirlarim qatorida yurganini bilursiz. Ular ham meni Hind sari chorlaydirlar, mamlakatni obod qilishni, ilm-u ma'rifatni yuksaltirishni oʻylaydilar.
- Agar bunday ma'rifatli podshoh oʻz yurtlaridan chiqsa edi, ulugʻ davlat tuzish yoʻlida noiloj toʻkiladigan qonlar osonroq unutilmogʻi mumkin edi. Ammo

boshqa yurtdan borgan fotihlarning toʻkkan qonlari fotihlik qilichidan yetgan dil yaralari asrlar davomida unut boʻlmagʻay, tuzalmagʻay! Men ana shundan xavotirdamen, hazratim!

Mohimning soʻnggi soʻzlari Boburning dilidagi eng ogʻriydigan yarani tirnaganday boʻldi. U ozorlanib, oʻrnidan turdi:

- Taqdir qilichi bizning dilimizni ozmuncha yaraladimi? Qani bu yaralarning unut boʻlgani? Qani tuzalgani?!

Bobur kaftini kaftiga qahr bilan urib, savdarboshini chaqirdi:

– Men boya ayvonda chogʻir keltirishni buyurgan edim! Nechun keltirmadi?

Uning avzoyi keskin oʻzgarganini, hozir savdarboshi kirsa, biron jazo olishi mumkinligini Mohim begim sezdi-yu, tez oʻrnidan turdi.

- Hazratim, chogʻir ichgingiz kelsa, marhamat, men saqlab qoʻymishmen, deb ipak parda bilan toʻsilgan tokchadan oltin koʻzacha toʻla may va ikkita nafis chinni piyola oldi. Boshqa tokchada guldor dasturxon bilan bir lagan norinj turgan edi. Dasturxonni apiltapil shahnishinga yozib, norinjni unga qoʻydi-da, Boburni taklif qildi. Koʻzachadan chinni piyolaga xushboʻy mayni quyar ekan:
 - Ijozat bersangiz, men hozir soqiylik qilsam! dedi.
 Bobur oʻtirar ekan, ijozat ma'nosida bosh irgʻadi.
 Mohim piyolaga yarmidan oshiribroq may quydi-yu,

Monim piyolaga yarmidan oshiribroq may quydi-yu chap qoʻli koʻksida, oʻng qoʻli bilan Boburga uzatdi:

– Oling, hazratim, sizga uzoq umr, baxt-u saodat yor boʻlgʻay!

Piyoladagi tiniq xushboʻy ichimlik Mohimning qoʻli bilan birga xiyol titrab turibdi. Bobur piyolani olar ekan, xotini iliq bir gap kutayotganini sezdi. Lekin hozir uning qalbida qandaydir sovuq izgʻirin xuruj qilmoqda edi. Harbiy va siyosiy ishlarning qorboʻroni

xayollarini chirmab, goh hazora qabilalari bilan boʻlgan qonli toʻqnashuvlarga olib ketar, goh Panjobga bogʻliq chigal muammolar, goh karvon yoʻllarida talonchilik qilgan qaroqchilarning tashvishlari esiga tushar, goh ogʻir zambaraklarni sinovdan oʻtkazish paytida ularning yoʻgʻon mis quvuri yorilib ketgani va toʻpchilardan besh kishi oʻsha joyda halok boʻlgani koʻz oldiga kelar edi. U sovuq izgʻirin changalidan chiqib ketishga va avvalgi iliq ruhiy holatiga qaytishga intilib, dardli tovush bilan dedi:

- Mohim, uzoq umr-u baxtli hayot men uchun ushalmaydigan orzu boʻlsa kerak.
- Nechun? Agar Tangrim nasib qilsa, ushalishi hech gap emas. Ilohim nasib qilsin!
 - Aytganingiz kelsin...

Bobur mayni sipqordi-yu, piyolani Mohim begimga qaytarib berdi. Norinjdan bittasining poʻchogʻini qoʻli bilan archib, yarim pallasini edi. Soʻng Mohim begimga «Yana quying!» ishorasini qildi.

Ikkinchi piyoladan keyin vujudiga mayin bir iliqlik taraldi, boyagi sovuq izgʻirin xayolidan uzoqlashganday boʻldi-yu, Mohimga koʻnglini ochib gapirgisi keldi.

– Bu amirlar, elchilar, ittifoqdoshlar-u yogʻiylar, yana yuz xil davlat ishlari qalbimni yuz boʻlak qilib, yuz tomonga tortadir, Mohim! Goho mening koʻnglim ham parchalanib ketgan, oʻzaro urushlarda azob tortayotgan mamlakat kabi algʻov-dalgʻov boʻladir! Hayotimda goʻyo shunday bir qutb borki, unga barcha amirlar-u elchilar, chopqinlaru urushlar toʻplanmishdir. Bu qutbda men sovuqqonlikka oʻrganmishmen, chunki siyosat bobida odamlarga xuddi shatranj taxtasi ustidagi piyoda-yu sipohiylarga qilgan shafqatsiz muomalani qilmasang, ularni aqlu farosat, hisob-u kitob bilan idora etmasang, murodga yetolmassen. Ammo bu shafqatsiz siyosatning sovuq izgʻirinidan oʻzim toʻngʻib keturmen. Soʻng may ichib,

isingim kelur. Bu sovuq qutbda she'r yozishga ham hafsalam qolmas!

- Oʻshal noxush qutb oʻtrusida boshqa iliq makoningiz yoʻqmi, hazratim?
- Bugun... mana hozir yana bir marta payqadimkim... men uchun olamda eng iliq qutb – Siz, Humoyun, Gulbadan... Sizlar bilan boʻlganda tuygʻularim joʻshib, ijod qilgim kelur.
- Undoq boʻlsa, doim biz bilan birga boʻling! Bundan biz ham behad baxtiyor boʻlurmiz!
- Qani edi!.. Ammo buning uchun men davlat ishlaridan butunlay voz kechmogʻim kerak.
- Butunlay voz kechishingizga hojat yoʻq, hazratim. Axir siz Kobulda katta davlat barpo etdingiz. Qunduzdan Qandahorgacha, Badaxshondan Sind daryosigacha boʻlgan parokanda oʻlkalarni bir markaz atrofiga birlashtirdingiz. Kobul oʻz tarixida birinchi marta shunday ulkan mamlakatning poytaxtiga aylandi. Bu yerda siz yangi koʻshklar qurdirdingiz, yangi bogʻlar barpo etdingiz, yangi ariqlar qazdirib, koʻp joylarni obod qildingiz. Shu hammasi siz uchun aziz emasmi?
- Noshukrlik boʻlmasin, men Kobulda koʻp mas'ud kunlarni koʻrdim. Biroq katta orzularimni roʻyobga chiqarishga hamon ojizmen. Shu menga tinchlik bermaydir. Kobul atrofidagi koʻp joylar hali qalamiy¹ emas, sayfiy². Ana, Gʻaznida necha asrdan beri buzilib yotgan ulugʻ band bor. Mahmud Gʻaznaviy bandi derlar. Agar shu band³ tiklansa, choʻl boʻlib qolgan katta bir vodiy yana yashnab ketgay. Men shu bandni tuzattirmoqchi boʻldim. Lekin sarfini

 $^{^{1}}$ Qalamiy – amri farmon bilan soliq toʻlaydigan qalamrav yerlar.

² Sayfiy – hali boʻysunmagan, qilich kuchi bilan soliq toʻlaydigan yerlar.

³ Band – suv omborining toʻgʻoni.

hisoblab koʻrsam, xazinam yetmas ekan... Bu ahvolda men Kamoliddin Behzoddek ulugʻ iste'dodlarni qaysi davlatimga taklif etamen? Behzodni Shoh Ismoil Tabrizga olib ketmishdir. Chunki hozir shoh mendan qudratliroq. Qanchadan-qancha ilm-u hunar ahli, me'morlar-u muhandislar bor, agar chorlasam, koʻplari kelurlar. Lekin... Kobulga oʻzi kelgan me'mor mavlono Fazliddinga munosib ish topib berganim yoʻgʻ-u boshqalarni qandoq chorlay?

Mohim begim Boburning Hindistonga intilishiga naqadar koʻp va murakkab sabablar borligini sezib:

– Xorazmlik vatandoshingiz Beruniy ham Hindistonga borgan – dedi. – Hazratim, siz uning «Hindiston» otliq kitobini qanday oʻqiganingiz esingizdami?

Bobur Gʻaznidan topib kelingan bu kitobning eski arab tilidagi nusxasini qiynalib oʻqigan boʻlsa ham mazmunini juda yoqtirgan edi.

- Ha, Hind hayotini Beruniychalik teran tahlil etgan olim kam boʻlsa kerak. Beruniy ham mening Hindni koʻrish ishtiyoqimni oshirdi.
- Bilamen. Hindda sizni ohanraboday oʻziga tortgan yana bir siymo Xisrav Dehlaviydir.
- Soʻzingiz chin, Mohim. Men Dehlaviyning koʻp ash'orlarini «Muxtasar» kitobimda keltirmishmen. Dehlaviyning otasi amir Mahmud Qarshi bilan Shahrisabz oraligʻida yashagan lochin ismli turkiy qabiladan edi. Men buni yaqinda bildim. Lochin qabilasi Chingizxon istilosidan qochib, Hindga borib qolgan ekan. Xisrav Dehlaviy Davlatnoz ismli hind muslimasidan tugʻilmishdir.
- Hazratim, dedi Mohim Boburga muloyim tikilib,
 siz ham shoirsiz, ham olimsiz. Men orzu qilardimki,
 barcha el-uluslar sizni ham Beruniydek, Dehlaviydek
 faqat yaxshi soʻzlar bilan tilga olsalar.

Bobur Mohim begimning botinib aytolmagan soʻzlarini tushundi-yu, yuzi tundlashdi. Xayolida yana oʻsha sovuq izgʻirin qoʻzgʻaldi.

- Siz mening podshoh ham ekanimni nechun eslatmoqchi emassiz?
- Chunki men sizni ijodingiz olovi yongan iliq qutbda muqim turishga chorlamoqchimen!
- Men ijod qutbida umrbod qolmoqchi boʻlib, Dahkatda, Osmon Yaylovda yalangoyoq yurganimda nechun uchramadingiz? Endi kech!.. Podshohni barcha el-uluslar faqat yaxshi soʻzlar bilan tilga olishi – ushalmaydigan bir orzu. Men odamlarning maqtoviga ham, ta'na-yu malomatiga ham rosa toʻyganmen!

Bobur yaqinda yozgan bir gʻazalidan ikki satrini joʻn soʻzga oʻxshatib ohangsiz, aytdi:

- Ulusning ta'n-u ta'rifi¹ menga, Bobur, barobardur, bu olamda oʻzimni chun yomon-yaxshidan oʻtkardim.
- Rost, bizning hech birimiz dunyoning achchiq-chuchugini sizchalik koʻp tatib koʻrgan emasmiz... Olamning berahm dagʻal jabr-u jafolarini bunchalik koʻp koʻra turib, shu qadar nafis she'rlar bitishingiz, shunchalik nazokatli ohangda kuylashingiz meni doim bir moʻjizadek hayratga solur. Hazratim, siz ulugʻ shoirlar davrasidan joy olmogʻingiz kerak. Men goho qoʻrqamenki, jahongirlik, fotihlik sizning shoirligingizga soya tashlab qoʻymasmikin?
- Hind yurishidan voz keching, demoqchimisiz?!
 Mohim begim Boburni bu niyatidan qaytarolmasligini endi aniq sezdi.
- Hazratim, hech boʻlmasa Humoyunni Kobulda qoldiring! Axir siz Hindga ketsangiz, kimdir Kobulni boshqarishi zarur-ku!
 - Men yoʻgʻimda Kobulni siz idora etgaysiz, begim!
- Nahot! Axir men ayol kishimen! Shariatga binoan xotinning mavqeidan oʻgʻillarning mavqeyi balandroq

¹ Ta'n-u ta'rif – ta'nasi-yu maqtovi.

boʻlur. Kobulda oʻgʻillaringiz mirzo Komron bilan mirzo Askariy borlar.

Bobur bu muammoni birpasda sovuqqonlik bilan hal qildi:

- Mirzo Komronga Qandahorni bergaymen. Askariy ikkalasi shu hafta Qandahorga keturlar. Qandahor bu yerdan otda bir haftalik yoʻl. Oʻgʻillari ketsa, Gulruh begimning hovuri pasayib qolishi aniq.
- Kobul mening xos shahrim, deb davom etdi Bobur. – Uni hargiz oʻgʻillarga bermasmen, faqat sizga topshirib ketgaymen! Qosimbek qavchin xizmatingizda boʻlur. Barcha haram ahli men yoʻgʻimda sizga boʻysungʻusidir!

Kutilmagan bu inoyatdan Mohim begim endi hayajonga tushdi. Podshoh oʻz xotiniga bunchalik katta ishonch bildirishi juda kam uchraydigan hodisa edi. Ayniqsa, butun haram, hatto Gulruh begim ham Bobur yoʻgʻida Mohim begimga boʻysunishi, bunga xalaqit berishi mumkin boʻlgan mirzo Komron va mirzo Askariylarning Qandahorga joʻnatilishi Mohim begimni qiynab yurgan ishkal tugunni birdan echib yuborgandek yengillik berdi:

- Hazratim, inoyatingizdan boshim koʻkka yetdi! Ammo bilursizki, ojizangiz hokimlikka tashna emasmen.
- Kimki hokimlikka tashna boʻlmasa, men oʻshal zotga koʻproq ishonib hokimiyat bergaymen. Barcha tashqi ishlarga Qosimbek mutasaddi boʻlgʻay. Hindol yoningizda. Siz uning nomidan ham amr-u farmon bersangiz, shariatga mos kelur.

Mohim begimning boyagi iztirobli oʻylari bir lahzaga boʻlsa ham xayolidan uzoqlashdi.

Boburning katta ishonchi qalbiga shunchalik yoqib tushgani begimning oʻzini ham xiyol taajjublantirdi. Qandahorga hokim boʻlish Komron mirzoga ham yoqib tushishini oʻyladi. Bobur ikki tomonni ham tinchitadigan nozik bir siyosat yurgizayotganini begim endi sezdi. Odamlardagi ichki manfaat tuvg'usini bexato topib, shu tuygʻuga suyangan holda ularni mohirona boshqara bilish katta bir san'at ekani, Bobur yillar davomida mana shu san'atni qanchalik yaxshi egallaganini begim hozir juda yaqindan koʻrdi va goʻyo oʻz tajribasidan oʻtkazdi. Komron mirzoni Qandahorga joʻnatish, Mohim begimga Kobul ixtiyorini berish boshqa koʻp amir-u beklarning koʻnglidagini topib, oʻrinlarini almashtirish - bu hammasi shatrani donalarini ularga juda mos keladigan bir mahorat bilan surish va oʻrinlarini almashtirishga oʻxshab ketardi. Shunday boʻlsa ham Bobur Mohim begimning koʻnglidagi eng nozik dardni paygab, uni kundoshi Gulruh begimning qoʻli yetmaydigan yuksak martabaga munosib koʻrgani behad voqimli edi.

- Hazratim, sizning ulugʻ ishonchingiz mening tanimga yangi bir jon ato qildi! Biroq... ne qilayki, men dunyodagi barcha ne'matlardan, hatto oʻz jonimdan ham siz bilan Humoyunni ortiq koʻrurmen. Siz hozir rahnamolik san'atida benazirsiz. Shunday boʻlsa ham fotihlarning gʻanimi koʻp boʻlur. Hindda beadad el. Beadad yogʻiy. Oʻylasam vahmim kelur!
- Jang xatarsiz boʻlmas. Siz muncha iztirobga tushmoqdasiz, Mohim? Sizga ne boʻldi?
- Men Humoyun uchun ham iztirob chekmoqdamen... Hech boʻlmasa Humoyun Kobulda qolsin, sizdan oʻtinamen, hazratim!

Bobur Mohim begimga endi ozorlanib, koʻz tashladi: nahotki u «erim xatarli jangda oʻlsa ham oʻgʻlim yonimda tirik qolsin» demoqchi?

– Humoyun taxt vorisi, – dedi Bobur ranjigan tovush bilan. – Shuning uchun qoʻshinda men bilan birga borishi shart... Eskidan odat shundayligini nechun unutdingiz?

Bu odatning ma'nosi shu ediki, agar uzoq yurtdagi jangda podshoh halok bo'lsa, taxt vorisi darhol qo'shinga bosh bo'lishi kerak edi, aks holda, qo'shin boshqa da'vogarlar tomoniga o'tib ketishi mumkin edi. Bobur bu odatni eslatish bilan «men agar olamdan o'tsam, o'rnimga Humoyun qolishini istab, uni birga olib ketmoqchiman», demoqchi edi.

Mohim begim Boburning gapidagi bu ma'noni fahmladi-yu, iztirobi battar oshdi. Nazarida, Bobur Hindistondan umrbod qaytib kelolmaydiganday, oldindagi yurish «borsa kelmas» yurish boʻladiganday tuyildi. Mohim begimning yuragi ezilib, koʻzlari jiqqa yoshga toʻldi.

 E Xudoyim! Dunyo nechun bunday beomon yaratilgan? Qachon bexatar kunlarga yetgaymiz? Bobur jim edi.

LAXO'R. PANIPAT. DEHLI

YANGI QIRG'OQLAR

1

Qoʻshin ilgarilagan sari oʻrmon qalinlashib borar edi. Chinorday baland ban'yan daraxtlarining ochiq ildizlari shoxlaridan pastga osilib tushib, yerga kirib ketgan. Yoʻgʻon chirmovuqlar daraxtdan daraxtga oʻtib, hammayoqni oʻrab-chirmab tashlagan. Oyoq tagida oʻsiq butalar. Havo dim va rutubatli.

Ot ustida kelayotgan Bobur yengil shohi koʻylak kiygan boʻlsa ham terlab-pishib ketgan. U ban'yanlarning shamoldan shovullayotgan baland shoxlariga termilib qaraydi. Tepada esib turgan shamol changalzor oʻrmon ichida borayotganlarga shabadasini ham tekkizolmaydi. Oʻrmondan maymunlarning shoʻx qiy-chuvlari eshitilib turadi. Goho tovuslarning «qoʻ-oʻ-oʻv» deb keskin va noxush ovoz bilan qichqirgani quloqqa chalinadi.

Bir payt oʻrmon ichida tuya yetaklab, piyoda ketayotgan navkarlardan allaqaysisining jon achchigʻi bilan chinqirgani eshitildi. Soʻng safdan-safga:

- Ilon chaqibdi!
- Koʻzoynakli ilon! degan shivir-shivir tarqaldi.

Toʻp ortilgan aravalar tomondan oti loyga botgan usta Aliqul tashvishlanib chiqib keldi-yu, Boburga arz qildi:

– Podsho hazratlari, ogʻir toʻplarni bu changalzor oʻrmondan oʻtkazib boʻlmas! Oyoq tagi loy! Toʻp ortilgan aravalar hammasi tiqilib qoldi!

Bobur orqaroqda kelayotgan Tohirga oʻgirilib qaradi:

- Rahnamoni chorlang, bek!

Yoʻlboshlovchi La'l Chand oldinda fil minib bormoqda edi. Tohir uni chaqirib kelganda, Bobur mingan saman ot fildan hurkib asabiy pishqirdi. La'l Chand filini toʻxtatib, uning qulogʻiga bir nima degan edi, fil xartumini yuqoriga choʻzib, pastga tushirib qoʻydi. La'l Chand kaftlarini bir-biriga qoʻyib, koʻzi aralash peshonasiga tekkizdi-da, Boburga ta'zim qildi. Bobur unga forscha gapirdi:

- Bu yoʻl bizga toʻgʻri kelmadi. Boshqa yoʻl topish kerak.
- Hazrat oliylari, boshqa yoʻllarni suv bosgan. Bu yer Panjob. Beshta daryomiz bor. Hammasi toshgan.
- Panjobda aravalar oʻtadigan yoʻl koʻp deb eshitganmiz. Bu yoʻlda aravalar tiqilib, yurolmay qoldi. Biz adashdikmi?
- Adashganimiz yoʻq, hazratim. Aravalar qayerda tiqildi?.. Ruxsat bering, fil bilan chiqaray. Bugun yursak, ertaga yaxshi yoʻllarga chiqamiz. Laxoʻr yaqin.
- Filni boshlab boring, aravalarni chiqarib bersin, dedi Bobur usta Aliqulga. Kichkina jussali ozgʻin La'l Chand togʻday baland qora filga yana uning xartumi yordamida mindi. Soʻng filning supraday katta quloqlariga tizzalari bilan niqtab, qoʻlidagi uchi qayrilgan temir xilla kajak yordamida uni oʻng-u soʻlga yoʻnaltirib, toʻp ortilgan aravalarga qarab ketdi. Tuyalar tortolmay qolgan aravalarni fil birpasda balchiqdan chiqarib berdi. Aravalarning birida oyogʻini ilon chaqqan navkar koʻmkoʻk koʻkarib, ingrab yotibdi. Uning tirik qolishi gumon boʻlsa ham yalang oyogʻining ilon zahar solgan joyiga dorivor barglar qoʻyib bogʻlashgan, zahar badanga koʻp tarqalmasligi uchun tizzasini ola chilvir bilan tangʻib tashlashgan edi.

Aravalar qoʻzgʻaldi. Fil mingan yoʻlboshlovchi yana oldinga oʻtib ketdi. Yoʻl yurganlari sari rutubat kuchayib, nafas olish ogʻirlashib borar edi.

Kun ogʻganda Ravi daryosi tomondan yuztacha gurolli odami bilan Hindubek chiqib keldi. Xos navkarlar uni yaxshi bilishardi. Asli dehlilik sipohiylardan boʻlgan Hindubek Ibrohim Lodi bilan kelisholmay bundan yetti yil oldin Kobulga borgan va Boburning xizmatiga kirgan edi. Qirq yoshlardan oshgan bu yigit Boburning Hindistonga qilgan avvalgi yurishida koʻp jasorat koʻrsatgan edi. Boburga uning dovyurakligi bilan birga Vatanidagi ichki parokandalikni tugatish yoʻlida koʻp qon toʻkmaslikka, iloji boʻlgan joylarni jangsiz olishga astovdil intilishi ham juda ma'qul tushgan edi. Hindubek turkiy, forsiy tillarni ham mukammal oʻrgangan, ilmli, ma'rifatli, dilkash kishi boʻlganligi uchun Boburning eng yaqin musohib beklari qatoriga kirgan edi. Bundan oldingi yurishda Kashmirdan oqib keladigan Jilom daryosi boʻyidagi Bhira Hindubekning harakatlari bilan jangsiz olinganda, Bobur bu obod vilovatga Hindubekning oʻzini hokim tavinlab. Kobulga qaytib ketgan edi. Hozirgi yurishda Bobur Laxoʻrni ham qon to'kmasdan jangsiz olish umidida edi va Hindubekni vositachi qilib, Laxo'r amirlari bilan muzokara olib bormoqda edi. Bobur Hindubekni uzoqdan tanidi va u bilan yakkama-yakka gaplashish uchun otini voʻldan chetroqqa burdi. Hindubek otdan tushib, ta'zim qildi.

- Soʻzlang, bek!
- Hazratim, Davlatxonning avzoyi buzuq. Meni tuttirmoqchi boʻlganini sezib qochib keldim.
- Nechun? Axir Kobulga oʻgʻli Dilovarxonni yuborib, biz bilan ittifoq tuzgan edi-ku. Men uni otam degan edim! Qancha yaxshiliklar qilgan edim.
- Davlatxon hammasini unutgan. Beliga ikkita qilich taqib olgan. Men buning sirini oʻgʻli Dilovarxondan soʻrab bildim. Bir qilichni Dehli sultoni Ibrohim Lodiga qarshi taqqan emish. Ikkinchi qilichni sizga qarshi.
 - Oʻgʻillari ham yogʻiylik maqomidami?

– Dilovarxon sizga xoqon, kelib mulozamat qilmoqchi, Laxoʻrni jangsiz bermoqchi. Otasi meni tuttirmoqchi ekanini Dilovarxon aytib, bir falokatdan qutqardi. Lekin katta oʻgʻli Gʻozixon otasi tomonida.

- Olamxon-chi?
- Olamxon Ibrohim Lodi bilan olishib, magʻlub boʻlgandan beri qayta urushishga jur'ati yoʻq. Laxoʻrga borganingizda chiqib mulozamat qilishga soʻz berdi. Agar Gʻozixon shikast yesa, koʻpchilik beklar boʻyin egurlar, Laxoʻr jangsiz olinur. Lekin... hazratim, nechun Laxoʻrga bunday yomon yoʻllardan bormoqdasiz?
- Panjoblik ittifoqdoshlarimiz peshvoz chiqargan rahnamo bizni shu yoʻlga boshladi.
- Qani oʻshal rahnamo? Ijozat bering, men bir taftish qilib koʻray.

Fil mingan yoʻlboshlovchini yana chaqirib keldilar. La'l Chand filini changalzorga yaqinroq bir joyda toʻxtatdi va yana juftlangan qoʻlini peshonasiga qoʻyib, egilib salomlashdi. Hindubek ham kaftini juftlab, peshonasiga tekkizdi-da, oʻzini osoyishta tutib, hindcha gapirisha boshladi:

- Asli qayerliksiz?
- Agralikman, sohib.
- Panjobga qanday kelib qolgansiz?
- Ish izlab kelganman.
- Shunday zoʻr filingiz bor ekan, Ibrohim Lodi sizga ish topib bermadimi?
- Ibrohim Lodi xasis. Butun mamlakatning oltinlarini yigʻib, xazinasiga yashirib qoʻygan. Qurilishga sarflash yoʻq. Odamlarni ishlatib, rozi qilish yoʻq! Bezor boʻldik!
- Toʻgʻri aytasiz, dedi Hindubek. Men ham Lodilarning zulmidan qochib kelganman. Iskandar Lodi¹ mening otamni sarkashlikda ayblab, quturgan filning oyogʻi tagiga tashlab oʻldirgan.

¹ Iskandar Lodi – Ibrohim Lodining otasi. 1517-yilda oʻlgan.

Filbon Hindubekka maroq bilan tikildi-yu:

- Kshatriylardanmisiz?¹ dedi.
- Ha, asli otim Indri. Bobur hazratlari Hindubek deb atadilar. Bu nom hammaga ma'qul boʻldi. Xoʻsh, sizning otingiz nima?
 - La'l Chand.
- Siz ham Ibrohim Lodining zulmidan qochib kelgan ekansiz. Endi bu zulmdan bizni kim qutqaradi, deb oʻylaysiz?
 - Xudo.
 - Bandalaridan-chi?

La'l Chand o'ylanib qoldi:

- Davlatxonmi? dedi Hindubek.
- Davlatxon saxiy odam. Gʻozixon ham Ibrohimdan yaxshi.

Hindubek ovozini pasaytirib soʻradi:

- Rostini ayting, siz bu qoʻshinni nega bu yoʻldan boshlab boryapsiz?
 - Gʻozixon aytgan yoʻl shu.
- Gʻozixon nega oʻtib boʻlmaydigan yomon yoʻldan yurgin degan, bilasizmi?
 - Bular uchun yaxshi yoʻl shu.
 - Nega? Bular sizga nima yomonlik qildi?
- Bitta zolim podshoh Ibrohim bizga ozmidi? Yana bittasi kelyapti!
 - G'ozixon seni aldagan!

La'l Chand filini changalzor tomonga keskin burdiyu, qichqirdi:

– Bular bosqinchilar! Bular Bajur qoʻrgʻonida uch ming yigitimizni qilichdan oʻtkazgan! Shaharqishloqlarimizni talatgan!

La'l Chand shunday deyar ekan, filini choptirib, o'rmon ichiga qarab qochdi.

¹ Kshatriy – hindlardagi asosiy toʻrt tabaqaning biri, harbiylar.

– Hazratim, bu rahnamoni tuttiring! Bu yogʻiy kishisi! Sizni xarob qilmoq uchun yomon yoʻlga boshlagan!

– Tuting uni! – qahrlanib qichqirdi Bobur. – Nobakorni oldidan toʻsib chiqing! Tez!

Otliqlar filning ketidan intildilar. Ulardan uchtasi katta banan daraxtini aylanib oʻtib, filning yoʻlini toʻsib chiqdilar. Filbon qoʻlidagi temir kajak bilan filni qattiq xillalab, bir narsa deb qichqirdi. Fil otlarning birini oyogʻi bilan tepib yiqitdi, ikkinchi otning boʻyniga xartumini oʻrab, siltab itqitib yubordi. Buni koʻrgan uchinchi otliq daraxt panasiga qochib, zoʻrgʻa qutulib qoldi.

Qahri kelgan fil bahaybat tovush bilan na'ra tortib, yoʻlida uchragan yoʻgʻon chirmovuqlarni uzib oʻtar, katta-katta shoxlarni qarsillatib sindirar va otliqlar kirolmaydigan qalin changalzorda tobora uzoqlashib borar edi.

- Oʻqlang! - deb qichqirdi Bobur.

La'l Chand filning ulkan boʻyniga bagʻrini berib, uning baland sagʻrisi va quloqlari panasida biqinib yotar edi. Orqadan yogʻdirilgan yoy oʻqlarining koʻpini daraxtlarning shoxlari va chirmovuqlar oʻtkazmadi. Uch-toʻrtta oʻq shoxlar orasidan oʻtib filning orqasiga urildi, lekin poʻlatday qattiq va qalin fil terisiga botolmay, yerga uchib tushdi. Usta Aliqulning toʻfangdozlari miltiqlarini oʻrmonga toʻgʻriladilar. Biroq barqandozlar chaqmoq chaqib, to miltiq piltasini yondirgunlaricha La'l Chand mingan fil yoʻgʻon va qalin daraxtlar panasiga oʻtib, koʻzga koʻrinmay ketdi. Fil zarbasidan yiqilgan har ikki ot yerdan turolmay uyalab yotar, ularning ustidagi navkarlar oʻlgan boʻlmasa ham oyoq-qoʻllari shikastlangan edi.

Yaradorlar aravaga olinsin! - buyurdi Bobur.- Bizni adashtirib halok qilmoqchi boʻlgan nobakor

jazolanmogʻi kerak! Toʻfangandozlar otlanib, oʻrmonni aylanib oʻtsinlar!

Toʻfangandozlar shosha-pisha otlanib, aylanma yoʻl izlay boshladilar. Ammo hammayoq changalzor, botqoqlik edi.

- Qani, Hindubek, endi bizga siz rahnamolik qiling!
- Bosh ustiga, hazratim!

Hindubek kechki payt ularni keng bir koʻkalamzor vodiyga boshlab chiqdi. Behad charchagan Bobur shu koʻkalamzorga chodir tikdirdi.

Oʻrmonda kiyimlari tirnalib yirtilgan, otlari loyga belangan toʻfangandozlar La'l Chandni topolmay qaytdilar. Shuning ustiga Laxoʻrdan amir Davlatxon, uning oʻgʻli Dilovarxon ellik-oltmishta mulozim va navkarlari bilan Boburning qarorgohiga yaqinlashishdi. Dilovarxonning avvaldan xayrixohligini yaxshi biladigan Bobur xirgohda uni oʻrnidan turib kutib oldi va oʻng tomonda oʻtirgan e'tiborli beklari orasidan joy koʻrsatdi.

- Janob Dilovarxon, padari buzrukvoringiz nechun ittifoqni buzib, bizga yogʻiylik maqomida qilich qayramishlar?
- Hazrati oliylari, otamni ogʻam Gʻozixon yoʻldan urdi. «Yot qoʻshin kelsa Laxoʻr bizdan ketadi, bular ham bizga Ibrohim Lodiyday dushman», deb ishontirdi.
- Shuning uchun Davlatxon aldamchi rahnamo yuborib, bizni oʻrmon ichida adashtirgan ekan-da?
- Ammo bu fitnadan otamning xabarlari yoʻq,
 hazrati oliylari! Bu Gʻozixonning ishi. Agar otam
 shunday qilganlarida bu yerga oʻzlari kelmas edilar.
 Laxoʻrda qon toʻkilmasin deb, sizdan inoyat istab keldilar.
- Bizning inoyatlarimizga faqat siz munosibsiz,
 janob Dilovarxon! Ammo otangiz qilmishlariga
 yarasha jazo olgusidir! Bobur shigʻovulga yuzlandi:
 Davlatxon soʻnggi paytlarda bellariga ikkita qilich

taqib yurgan emish. Qani, oʻsha qilichlarini biz ham bir koʻraylik... Har ikki qilichni boʻyniga osib kiritinglar!

Koʻp oʻtmay ikki zoʻr navkar oppoq soqolli keksa Davlatxonni ikki bilagidan mahkam ushlab chodirga olib kirdi. Chol navkarlarning qoʻlidan boʻshamoqchi boʻlib asabiy siltanar, uning boʻyniga osilgan ikkita uzun qilich koʻkragiga urilib selanglar edi. Davlatxon Boburga alam bilan tikilib dedi:

- Podshoh hazratlari, men asir olingan emasmen, oʻzim keldim! Bu qanday shafqatsizlik?
- Siz mendan elchi boʻlib borgan Hindubekni tuttirmoqchi boʻlibsiz! Agar niyatingizga yetganingizda Hindubek omon qolmas edi! Keyin biz ham changalzorda balchiqqa botib, Gʻozixonning qopqonida jon berarmidik? Bizga shafqat qilganlaring shumi? Shafqatsizlarga biz ham shafqatsizmiz! Bobur shigʻovulga buyurdi: Bu odam oilasi bilan birga Laxoʻrdan Bhiraga badargʻa etilsin. Bhiraning Milvat qoʻrgʻonida hibsda saqlansin!

Boʻshashib hech narsa deyolmay qolgan Davlatxonni olib chiqib ketdilar.

2

Kuz va qish oʻtib borayotgan boʻlsa ham, daraxtlar yashil libosini echmas, «dun» deb ataladigan bagʻri keng, sayhon Hind vodiylari yil boʻyi bahordagiday koʻkalam boʻlib turar edi. Jamna daryosi boʻylab Janubga tomon harakat qilib borayotgan Bobur qoʻshini Dehlidan ellik chaqirimcha shimoldagi Panipat shahriga kelib toʻxtadi. Dehli sultoni Ibrohim Lodi yuz mingga yaqin askar va bir yarim ming harbiy fil bilan Agra tomonidan yaqinlashib kelmoqda edi. Ibrohim Lodi shu fillari va askarlari bilan bultur Dehli boʻsagʻasida Olamxon, Dilovarxon va boshqa dushmanlarining qirq ming kishilik qoʻshinini tor-mor keltirgandi.

Boburning qoʻshini esa oʻn ikki mingdan oshmas edi. Yovning son jihatidan begiyos darajada ustunligi koʻpchilik bek va navkarlarning qalbiga gʻulgʻula solar edi. Agar magʻlub boʻlishsa, atrof hammasi notanish yerlar, begona yurt, qayerda jon saqlashadi? Ichki beklar orasida yurgan Tohir koʻproq Boburning harbiy tajribasiga va usta Aliqul boshliq toʻfangandozlar va toʻpchilarning qurollariga umid bogʻlagan edi. Jahonda hali juda kam tarqalgan bunday qurollar Ibrohimning qoʻshinida yoʻq edi. Bobur oʻzida yoʻq harbiy fillar hujumini mana shu qurollar kuchi bilan bartaraf qilish fikrida ekanini Tohir bilar edi. Ular Panipat shahri bilan Jamna daryosining oralig'idan to'fang va toʻp otish uchun qulay boʻlgan bir joyni topishdiyu, yaqin-yiroqlardan olib kelingan barcha aravalarni yarim doira shaklida saf qildirishdi. Yetti yuzdan ortiq arava bir-biriga zanjirday mahkam tirkishlar¹ bilan bogʻlandi. Aravalarning oldi va oralariga yoy oʻqi oʻtmaydigan temir qalqonlar oʻrnatildi. Toʻfangandozlar va toʻpchilar shu qalqonlar ortiga bekinib, oʻq otishni mashq qildilar.

Aravalar baland bir tepalikning etagiga – oldi nishab joyga keltirildi. Ular oʻz-oʻzlaridan yurib ketmasligi uchun gʻildiraklarning tagiga yogʻoch toʻsiqlar tirab qoʻyildi. Harbiy mashqlar oʻtkazilgan kuni Bobur aravalar ortidagi tepalikda otliq turib, gʻildiraklar oldidagi yogʻoch toʻsiqlarni birvarakayiga olishni va barcha aravalarni barobar yurgizib koʻrishni buyurdi.

Mulozimlar qatorida yurgan Tohir aravalar safining narigi chetiga ot choptirib borib, sarkardaning buyrugʻini Mustafo toʻpchiga yetkazdi. Hamma piyodalar, toʻpchilar, zarbzan va barqzanlar² buyruqni

 $^{^{\}rm l}$ Tirkish – hoʻkizning xom terisidan eshilgan arqonsimon narsa.

 $^{^{2}}$ Barqzan – chaqmoq chaqib, miltiqning piltasini yondiradigan odam.

bajarishga hozirlandilar. Hammaga koʻrinadigan joyda turgan usta Aliqul:

- Aravalar surilsin! - deb qichqirdi.

Aravalar ba'zisi hadeganda oʻrnidan jilmadi, ba'zilari esa birdan tezlab ketdi. Aravalar safi egri-bugri boʻla boshladi, ora-oraga bogʻlangan tirkishlardan bir qanchasi uzildi, temir qalqonlar qulab tushdi.

– Toʻxtang! – buyurdi Bobur. – Mashqni takrorlating, janob Aliqulbek, toki birorta tirkish uzilmasin, birorta qalqon ham qulamasin!

Odamlar terlab-pishib aravalarni yuqoriga sudrab chiqa boshladilar.

Bu ogʻir ishdan ba'zi navkarlar oʻzlarini chetga olsa, oʻnboshilar ayamay soʻkar, hatto urar edilar.

 Mashq paytida navkarni ayamang, - dedi Bobur Aliqulbekka. - Hozir ayasangiz jangda magʻlub boʻlib oʻlib ketur.

Bobur tepalikdan tushib, daryo tomonga yoʻl oldi. U yoqda fil oʻtolmaydigan chuqur xandaqlar qazilgan, endi ba'zi joylarga shox-shabba bosib, ihota yasashmoqda edi. Xizmati yuzasidan Boburga ergashib, uni qoʻriqlab yuradigan Tohir xandaqlar va shox-shabbalarga qarab oʻzicha oʻylandi: «Shuncha tayyorgarliklarga yarasha yogʻiy toʻgʻrimizdan kelsa yaxshi-ya! Agar shaharni aylanib o'tib orgadan kelsa hammasi behuda-da!» Biroq shaharning narigi tomoniga borib kelgan chigʻdovullar u yoqdagi botqoqlik va changalzorlardan katta qoʻshin oʻtolmasligini aniqlab keldilar. Oʻng tomonda Jamna darvosi. Chapda Panipat shahrining aholisi tigʻiz mahallalari. Ibrohim Lodi bu mahallalarni qo'shiniga toptatib, shahar oralab kelmas. Demak, uni faqat toʻgʻridan kutish mumkin. Lekin salkam o'n barobar katta kuch bilan kelayotgan yovga bu aravalar-u xandaglar turish berarmikin?

Bir vaqtlar Kobulda Andijon va Quvalarni eslasa yuragi eziladigan Tohir endi Kobulni eslasa yuragi sogʻinchdan orzigadi. Kobulda uning oʻn besh vil istiqomat qilgan uyi bor, xotini Robiya, madrasada oʻqivotgan oʻgʻli Safarbek, yolgʻiz togʻasi mavlono Fazliddin bor. Oldindagi jang tahlikasidan koʻngli bezovta boʻlib yurgan Tohir: «Ishqilib oʻlim boʻlmasinda, - deydi oʻzicha. - Agar shu gal ham tirik qolsam, sipohiylikni bas qilardim-da. Yosh ham ellikka borib qoldi. Qachongacha begona yurtlarda tentirab vuramen? Safarbek katta vigit boʻlib qoldi, bu vil madrasani xatm qilib¹, muhandis² boʻladi. Keyin boshini ikkita qilib qo'ysam... Yo Xudo! O'g'limning toʻyini koʻrish menga nasib qilganmikin-a? Robiyani yana koʻrarmikinman-a?» Yurakka gʻulgʻula soluvchi bu iztirobli oʻylarni ichkilik bir oz bosar edi. Tohir koʻpdan beri beklar davrasida yurib, koʻnglining chigalini ichkilik bilan tarqatishga anchagina odatlanib golgan edi. Hindistonda uzum kam, shuning uchun chogʻir tangis, lekin mahva degan daraxtning bargidan olinadigan o'tkir aroq uchrab turar edi.

Ibrohim Lodi bilan jang boʻlishidan bir kun oldin Tohir shu aroqdan koʻproq ichgan edi. Sahar palla badani tirishib uygʻondi. Ogʻzi taxir, boshi loʻqillab ogʻriydi. U yoq-bu yoqqa agʻdarilib, yana uxlamoqchi boʻlib koʻrdi, lekin uxlay olmadi. Shundan keyin turib, sopol koʻzaning tagida qolgan aroqdan uch-toʻrt qultum ichdi-da, sabuhiy qildi. Shu payt birdan dovullar va nogʻoralar chalinib, hammani saflanishga chorlay boshladi. Chigʻdovullar Ibrohim Lodining bostirib kelayotgani haqida xabar bergan edilar. Sabuhiydan yana kayf qila boshlagan Tohir etigi bilan jibasini ancha vaqt imillab kiydi. Bir qulogʻi Samarqandda kesilgan Mamat soʻnggi yillarda Tohirning otboqariga aylangan, lekin eski qadrdonligi va bir-ikki yosh kattaligi tufayli goh uni koyib ham qoʻyar edi.

¹ Xatm qilish - tugatish.

² Muhandis – injener.

Sahari mardondan ichib nima qilar edingiz, bek!deb poʻngʻilladi Mamat.

– Gapni koʻpaytirmay, koʻk otni tezroq keltiring! – buyurdi Tohir.

Soʻnggi yillarda xiyla ozib, yuz-koʻzlari avvalgidan ham ortigrog bo'rtib golgan Mamat otlar bog'langan tomonga chopib ketdi. Yov yaqinlashib kelayotgani haqidagi xabardan koʻp odam jonsarak boʻlib u yoqdan-bu yoqqa yugurmoqda edi. Mamat kechasi yechilib ketgan koʻk otni tutib olguncha ancha ovora bo'ldi. Odatda, ot kechasi egarlangan holda qolsa, ayili, qorinbogʻi boʻshatib qoʻyilardi. Toʻpolonda Mamat shoshilib ayilni mahkamlashni xayolidan qochirdi. Tezroq Boburning huzuriga yetib borishi kerak bo'lgan Tohir uzangini izlab oʻtirmadi-yu, otning boʻvnidan olib, ustiga sakrab mindi. Shunda egar bir chayqaldi. Tohirning kayfi boʻlmaganda ehtimol, egarning yaxshi urilmaganini tez sezgan boʻlardi, otdan tushib, avilni mahkamlab olar edi. Lekin u egarda chayqalganini sabuhiydan koʻrdi-da, oyoq tirab, otni tez orqaga burdi. Anchadan beri boquvda yotib kuchi tanasiga sig'may ketgan ko'k bedov orga oyoglariga tikka turib, ogʻzidan koʻpik sochib, burildi. Shunda birdan egar ogʻib otning qorniga tushdi-yu, Tohir yelkasi bilan yerga gursillab yiqildi.

Mamat chopib kelib, bir qoʻli bilan otning jilovidan oldi va ikkinchi qoʻli bilan Tohirni suyab turgʻizdi. U Tohirni kayfi borligi uchun yiqildi deb oʻylab, kulib gapirdi:

- Tohirjon, bek boʻldingiz-u ichadigan hunar chigʻardingiz-da! Bu sabilni koʻp ichmang demaganmidim!

Tohir yumshoq yerga yiqilgani uchun hech qayeri lat yemadi. Lekin katta jang arafasida shunday ahmoqona yiqilishi unga mash'um bir falokatning xabarchisidek tuyildi. U qahr bilan soʻkinib, Mamatga egarni koʻrsatdi.

- Ayilni kim boʻshatib qoʻygan edi?

Mamat kechasi ot dam olsin deb boʻshatib qoʻygan ayilini ertalab mahkamlamaganini endi payqadi.

- Toʻpolonda esimdan chiqibdi-ya! Hey, men xomkalla!

Mamat endi oʻzidan kulib, ayilni torta boshladi. Tohirning aroqdan loyqalangan tasavvurida Mamat uni yiqitib, ustidan kulish uchun ayilni ataylab boʻshatib qoʻyganday koʻrindi. Ilgari ikkovi ham navkar boʻlgan paytlarida Tohir bunday hazillarga kulib ketaverar edi. Lekin hozir...

– Sen mening bek boʻlganimga baxilliging kelib shunday qilgansan! – deb u birdan Mamatni sensirab soʻka boshladi: – Sen menga oʻlim tilaganingmi bu?

Tohir gʻazabdan titrab, belini paypasladi-yu, qamchisini qidirdi. Qamchi yerda yotar edi. Gunoh qilgan navkarlarni soʻkish, urish beklar orasida keng tarqalgan odat edi. Bu odat Tohirga ham ozmi-koʻpmi yuqqan edi. Lekin u oʻttiz yillik qadrdoni Mamatga hali biror marta musht koʻtarmagan edi.

Mamat yerda yotgan qamchinni olib, Tohirga uzatdi:

- Mang, gunohim uchun qamchilang, lekin bunday gaplarni aytmang! Men sizga oʻlim tilaydigan baxillardan emasmen!

Mamat yana Tohirdan kulayotganday, oʻzini undan olijanobroq qilib koʻrsatayotganday tuyildi.

Tohir:

- Shunday kunda yiqitganing - oʻlim tilaganing emasmi? - dedi-yu uning peshonasi aralash boshiga qulochkashlab musht urdi.

Mamat uch-toʻrt qadam nariga uchib ketdi va koʻzi tinib, yerga oʻtirib qoldi. Peshona suyagi Tohirning qoʻliga toshday qattiq tegdi, bosh barmogʻi «qirs» etdi-yu, oʻtkir bir ogʻriq miyasiga chiqib bordi. «Boshmaldoq sindi-yov! – dedi Tohir ichida. – Qilich tutadigan oʻng qoʻlning

boshmaldogʻi... Bunga ham mana shu sababchi!» Bu oʻydan uning gʻazabi yana bir darajada oshdi. Oʻrnidan turishga intilayotgan Mamatni chap qoʻli bilan ham urib, yerga yiqitdi.

Orqadan yetib kelgan barvasta bir yigit oraga tushdi.

– Qoʻying, bek ogʻa, bir marta kechiring! Mamat ogʻa siz uchun jonini beradi-ya! Ayilni men boshqatdan tortib beray! Mana, hozir, hozir...

Tohir ayili tortib bogʻlangan otga minganda qattiq ogʻriyotgan qoʻliga tikilib qaradi. Bosh barmogʻi shishib ketgan, qimirlatsa, ogʻrigʻiga chidab boʻlmas edi.

«Mendan omad ketdi!» oʻyladi Tohir mulozimlar toʻplanayotgan tomonga ot choptirib borar ekan.

Uning ketidan ergashgan yigirmatacha otliq navkarlari orasida peshonasi gʻurra boʻlgan, yuzi boʻzday oqargan Mamat ham bor edi. Bek ming urib-soʻkkanda ham navkar uning ketidan qolmasligi kerak edi.

* * *

Jamna daryosining chap tomonidan chiqqan oftob nayza boʻyi koʻtarilganda yov qoʻshinining tigʻiz saflari aniq koʻrina boshladi. Oxiri ufqqa borib taqalgan behisob koʻp qoʻshinning har yer-har yeridan harbiy fillarning ulkan gavdalari choʻqqilarga oʻxshab chiqib turardi. Eng katta oq filning ustida oʻtirgan Ibrohim Lodi atrofga xuddi tepalik ustidan qarayotgandek hammayoqni bahuzur koʻrar edi.

Bobur bir-biriga bogʻlab tashlangan aravalar ortidagi tepalikda turib, yovning yaqinlashishini kutmoqda. Uning oʻng qanotiga oʻgʻli Humoyun javobgar edi. Xoʻja Kalonbek, Hindubek kabi eng sinalgan beklar barcha navkarlari bilan Humoyunning ixtiyoriga berilgan. Markazni toʻpchilar va toʻfangandozlar egallagan. Har ikki qanotning ikki chetida toʻlgʻama uchun ajratilgan otliqlar tayyor turibdi. Ibrohimning harbiy fillar himoyasiga

tayanib urushadigan qoʻshinida piyodalar koʻpligi va saflar tigʻiz boʻlishi ma'lum edi. Bunday hollarda Shayboniyxon tajribadan oʻtkazgan toʻlgʻama usuli qoʻl kelishini Bobur yaxshi bilardi. U ham Shayboniyxonga oʻxshab toʻlgʻamaga ajratilgan askarlarga otlarning eng chopqirlarini saralab bergan edi.

Tohir ichki beklar va xos navkarlar bilan birga podshohdan orqada turibdi. Boburning ikki yonini aloqachi beklar, yasovullar va choparlar egallaganlar. Bobur ularga ish buyurar ekan, ovozi ichki bir kuch va ishonch bilan jaranglab eshitilardi. «Shu odamning panohida necha qirgʻinlardan omon chiqding, – dedi Tohir oʻziga-oʻzi tasalli berib. – Bobur mirzo bor ekan, senga hech nima qilmaydi».

Daryo bilan shahar oraligʻini toʻldirib, vahimali qora bulutga oʻxshab kelayotgan Ibrohim Lodining qoʻshini qarshisida harakatsiz tek turib kutish ogʻir edi. Koʻpchilik bek va navkarlar fursatni boy berib qoʻyayotgandek sabrsizlanishar, lekin Bobur:

– Hech kim buyruqsiz qoʻzgʻalmasin! – deb hammani qattiq tutib turardi.

Ibrohim Lodi Boburning qoʻzgʻalmasdan kutib turganini, ikki orada yuzlab aravalardan yasalgan mustahkam devor va chuqur xandaqlar borligini koʻrdi-yu, qoʻshinini toʻxtatdi. Lashkarboshilarni chaqirib, asosiy zarbani yovning oʻng qanotiga berish va shahar tomondan aylanib oʻtish haqida buyruq berdi. Biroq yuz ming qoʻshinga to yangi buyruqni tarqatib, uni shahar tomonga burguncha ancha vaqt oʻtdi.

Bobur darhol mana shu vaqtdan foydalandi. Uning buyrugʻi bilan toʻlgʻamaga ajratilgan ikki ming otliq joyidan qoʻzgʻaldi. Chopqir otlar yov qoʻshinining ikki qanotiga tegmay oʻtdi-yu, bexavotir kelayotgan orqadagi otliqlar va piyodalarga hamla qildi. Humoyun boshliq toʻrt ming otliq oʻng tomondan yovning

yoʻlini toʻsib chiqdi. Chap qanot ham jangga tushdi. Markazdagi aravalarning ora-orasidan toʻplar ustmaust oʻq yogʻdira boshladilar.

Toʻrt tomondan yashin tezligida birvarakayiga qilingan hamlani tepadan kuzatib turgan Tohir Boburning sarkardalik tajribasiga oʻzicha qoyil boʻlib qoʻydi. U harbiy san'atni faqat doʻstlaridan emas, dushmanlaridan ham oʻrgangan edi. Bobur toʻp va miltiq ishlatishning ahamiyatini birinchi marta ittifoqdosh Shoh Ismoilga qarab bilgan boʻlsa, toʻlgʻama ishlatishda ashaddiy yovlari Shayboniyxon va Ubaydullaxonning tajribasini oʻzlashtirgan edi. U achchiq magʻlubiyatlar jarayonida orttirgan barcha harbiy tajribalarini bugun goʻyo yagona bir mushtga tugib, maydonga ustalik bilan tashladi-yu, tashabbusni darhol qoʻlga oldi.

Boburning butun rejasi – yov qoʻshinini toʻrt tomondan oʻrab olishga va qanotlarini ichkariga qayirib tashlashga qaratilgan edi. Lekin oʻrab olingan yov Bobur qoʻshiniga nisbatan yetti-sakkiz barobar koʻp edi, chopqir otlar bahaybat fillarning bir zarbasidan yumalab, yiqilib ketardi. Shu sababli Ibrohim Lodi askarlari hali oʻngda, hali soʻlda Bobur qoʻshinining halqasini yorib chiqardi. Bobur yonida turgan aloqachi beklar va yasovullarni ketma-ket jang maydoniga choptirar, yovning qoʻli baland kela boshlagan qanotlarga markazdan koʻmak yubortirar edi. U markazni yovga ataylab ochiq qoldirmoqda edi, chunki hali harakatsiz turgan aravalar va toʻfanglar markazga qoʻyilgan edi.

Ikki tomondan va orqadan ustma-ust zarba berilavergandan keyin Ibrohim Lodining asosiy kuchlari va harbiy fillari markazga tashlandilar. Shunda Bobur aravalarning gʻildiraklari tagidagi yogʻochlarni olishni buyurdi. Yetti yuz arava joyidan qoʻzgʻalib, yov qoʻshinining roʻparasidan chiqdi. Aravalar ustidan

toʻplar, ora-oradan esa toʻfanglar yaqin kelib qolgan yovga oʻq ota boshladi. Toʻplarning gumburlashi, miltiglarning qarsillashi, borut tutuni, har qanday qalqonni teshib oʻtadigan olovli oʻqlar zarbasi va yana buning hammasi behisob aravalar shakliga kirib, oʻzoʻzidan yurib kelayotgani yov qoʻshinini dahshatga keltirdi. Fillar yarador boʻlib boʻkira boshladi. Filbonlar talvasaga tushib, fillarni orqaga burdilar. Orqada esa gʻuj-gʻuj otliglar-u piyodalar bir-biriga aralashib ketgan edi. Itar-itar, ur-sur boshlandi. Yaralanib guturgan fillar otliglarni vigitib, pivodalarni bosib-vanchib oʻta boshladi. Toʻplar va miltiglar hamon oʻq otmoqda. Toʻp oʻqi tekkan fillardan bir qanchasi piyodalar ustiga agʻanab tushdi. Orqadan kelayotgan otlar va fillar oʻzlarini toʻxtatolmasdan agʻanab yotgan fillarga surinib yiqilishardi. Ketma-ket bir-birini itarib, surib kelganlari oldin yiqilganlarning ustiga qulashar va oʻtib boʻlmavdigan toʻsiqqa aylanishardi. Bu qiyomat uryiqitdan qochib qutulushning ilojini topgan filbonlar-u otliglar jon-jahdlari bilan qochishga tushdilar. Orqada toʻlgʻama ishlatgan otliqlarning safi ancha siyraklashib qolgan edi. Fillar bu safni birpasda yorib oʻtdilar-u Dehli tomonga intildilar.

Tepalik ustidan buning hammasini koʻrib turgan Bobur:

- Yogʻiy Dehlini bekitmoqchi! - dedi va aloqachi beklari turadigan oʻng tomonga oʻgirildi.

Biroq aloqachi beklar, choparlar va yasovullar hammasi birin-ketin jang maydoniga maxsus topshiriqlar bilan yuborilganicha qaytib kelishmagan edi. Ehtimol, ularning ba'zilari oʻlgandir yoki yaralangandir – jang busiz boʻlmaydi. Bobur otini burib, ichki beklari va navkarlari tomonga yuzlandi. Shunda uning koʻzi Tohirga tushdi. Tohir maxsus farmonlarni hamisha yaxshi ado etib kelganini esladi:

- Tohirbek, Ibrohim Lodi qochdimi yoki jang maydonida qoldimi, shuni aniqlamoq kerak. Agar qochgan boʻlsa, xossa tobindan quvgʻinchi yuborgaymiz.

Tohir chang-tutunga burkanib, jahannam boʻlib yotgan jang maydoniga koʻzi javdirab qaradi-yu, singan boshmaldogʻini eslab, ovozi qaltirab dedi:

- Bosh ustiga, hazratim!

Shu payt jang boʻlayotgan tomonda oyogʻiga oʻq tegib, uzangisidan qon sirqib oqayotgan bir yasovul ot choptirib keldi.

- Hazratim, zafar bizniki! dedi u hansirab. Yogʻiy qochdi!
 - Ibrohim ham qochdimi?
- Qochgan fillar orasida Ibrohimning oq filini koʻrdim! Qochdi!
- Boʻlmasa darhol iziga tushmoq kerak! Tohirbek, siz toʻxtang! Janob Qosimtoy mirzo!
- Labbay, hazratim! deb qirq yoshlardagi norgʻul bek safdan oldinga chiqdi. Turkistonda tugʻilib-oʻsgan bu bekning Ulugʻbek mirzoga uzoq qarindoshchiligi bor edi. U oʻn besh yildan beri Bobur huzurida xizmatda edi.
- Agar Ibrohim Lodi Dehli yoki Agraga yetib, bu qal'alarni bekitsa, muhoriba-yu muhosara qaytadan boshlanur, dedi Bobur Qosimtoy mirzoga. Holbuki, biz Dehli bilan Agrani jangsiz olish umididamiz. Yogʻiyning bizga hamla qilish ehtimoli endi bartaraf boʻldi. Janob Qosimtoy, xossa tobindan ming kishini oling. Beklardan Bobochuhra... Tohirbek navkarlari bilan... Ibrohimni quvlanglar. Agar Dehlida toʻxtamay yana qochsa, Agragacha ketidan qolmanglar, toki bu shaharlarni berkita olmasin. Ketlaringizdan biz izmaiz yetib borurmiz!
- Farmoni oliyga jonimiz fido! dedi Qosimtoy mirzo.
- Siz bizning ilgʻorimizsiz. Tangrim yoringiz boʻlsin! Yenging-u yengilmang!

- Omin!

Shunday gʻolibona jangda ilgʻor safda boʻlish Tohirning koʻnglini koʻtardi-yu, singan boshmaldogʻining ogʻrigʻi ham sezilmay qoldi. U navkarlarini yoniga olib, jang maydoniga hammadan oldin kirib keldi.

Oftob tikkaga kelgan. Kun issiq. Chekinayotgan yov besh-olti boʻlakka boʻlinib ketgan.

Ba'zilarini Humoyunning odamlari, ba'zilarini Xoʻja Kalonbekning navkarlari ta'qib etmoqda. Lekin ularning otlari ertalabdan beri u yoqdan-bu yoqqa chopib, charchab qolgan. Tohirlarning tobinda¹ dam olib turgan otlari jangdan toliqib qolgan otliqlardan oʻtib, yovga birpasda yetib oldi.

Yengilgan qoʻshin boʻlinib-boʻlinib qochayotgan boʻlsa ham choʻgʻi juda katta ekani Tohirga yaqin borganda bilindi. Har toʻpda yetti ming-sakkiz ming keladigan qoʻshin. Ularga nisbatan quvib kelayotganlarning toʻpi juda kichik. Yovning har toʻpida qator-qator fillar kelayapti. Lekin ular orasida oq fil yoʻq. Balki Ibrohim fildan tushib, ot minib ketayotgandir? Qosimtoy bilan Tohir oʻzaro maslahatlashishdi-yu, yovning kichikroq koʻringan bir toʻpini ikki yonidan aylanib oʻtib, oldilaridan toʻsib chiqishdi va bir suruv filni egalari bilan asir olishdi. Ularning orasida Ibrohim Lodi yoʻq edi.

Qosimtoy filbonlarni hind tarjimon orqali soʻroq qila boshladi.

– Ayt, Ibrohim Lodining qaysi toʻpda ketayotganini koʻrsatib bersa, ozod qilamen!

Filbonlardan biri orqada qolgan jang maydonini koʻrsatib, kuyib-pishib allanarsa dedi:

– Ibrohim mingan fil yaralanib yiqilgan emish, uning oʻzi oʻlganmish, – dedi tarjimon.

Lekin Qosimtoy bunga ishonmadi:

¹ Tobin - zaxira.

- Bizning odamlar Ibrohimning qochganini koʻrgan. Soʻra, rostini aytsin, boʻlmasa boshi kesilgay!

Birinchi filbon yana avvalgi gapini takrorladi. Chindan ham Ibrohim jang maydonida oʻlgan edi. Lekin Qosimtoy filbonning gapidan koʻra boya Boburga axborot bergan yasovulning gapiga koʻproq ishonar edi. Qosimtoy siqishtira bergandan keyin boshqa bir filbon tusmol bilan Ibrohimning daryo boʻylab ketib borayotgan katta toʻpda ekanini aytdi. Uchinchi bir filbon oʻng tomonda ketayotgan toʻpni koʻrsatdi.

Oosimtov hamma filbonlarni fillari bilan birga maxsus navkarlarga topshirib, Boburning ixtiyoriga vubordi. Kevin darvo boʻvlab chekinayotgan toʻpning ketidan tushdilar. Bu toʻpda fil mingan, ot mingan va Lodi qoʻshinining eng jangovar qismi hisoblanadigan rajputlar koʻp edi. Qosimtoy daryo tomonda, Bobobek bilan Tohir oʻngdan aylanib oʻtib, ularning yoʻllarini to'sib chiqdilar. Rajputlar ta'qib etayotganlarning nisbatan oz ekanligini koʻrdilar-u kamonlariga o'q o'rnatib, qilich yalang'ochlab, dadil jang qila boshladilar. Tohir kamoniga oʻq oʻrnatib otayotganda, singan barmogʻining jonsizlanib, ishlamay qolganini sezdi. Oʻqning uchini boshqa barmoqlari bilan tutib. kamonni tortib otdi. Oʻq qilich yalangʻochlab kelayotgan qora bir odamning koʻzi aralash yuziga tegdi. Oʻq egan rajput bir qoʻli bilan yuzini changallab, otdan vigilib tushdi. Bu orada polvontaxlit bir rajput Tohirga yaqin kelib qoldi. Tohir kamoniga qayta oʻq oʻrnatishga ulgurmasligini sezdi-yu, qilichini sugʻurdi. Rajput polvoni oltita keskir tigʻi bor chakra degan qurolini koʻtardi. Tohir uning chakra tutgan qoʻliga qarab qilich sermadi. Qilich chakraga qarsillab tekkanda Tohirning singan boshmaldogʻidan badaniga shunday ogʻriq tarqaldiki, vujudi zirqirab ketdi. Shishib ketgan boshmaldoq qilichning dastasini qoʻlidan qanday chiqarib yuborganini bilmaydi.

Faqat qilich yerga uchib tushganini koʻrib, belidan xanjarini olmoqchi boʻldi, lekin ulgurmadi. Olti tigʻli keskir chakra uning boʻyni va oʻng yelkasiga shunday bir zarb bilan urildiki, kiftidan engagigacha hamma joyini qiymalab tashlaganday tuyildi. Tohir koʻzi tinib, otning yoli ustiga koʻkragi bilan tushganda chakraning yana bir zarbasi uning zirhli kiyimiga qarsillab urildi. Tohir dahshatli ogʻriq ichida: «Endi bu meni otdan yiqitmaguncha qoʻymaydi! – deb oʻyladi. U otdan yiqilsa jasadi tuyoqlar tagida qanday majaqlanishini tasavvur qildi-yu: – Tezroq hushimdan ketsam edi!» – dedi.

Shu payt Mamat yetib kelib, dastasi uzun oyboltani chakra koʻtargan rajputning qoʻliga urdi. Chakra yerga tushib ketdi. Mamat qonga belanib, egardan sirgʻalib tusha boshlagan Tohirni tez oʻngarib oldi-yu, jang maydonidan qochib chiqdi.

3

Dehliga otasidan oldin kirib kelgan Humoyun Jamna daryosining oʻng qirgʻogʻidagi qizil devorli ulkan qal'ani jangsiz egalladi. Ibrohim Lodining qal'adagi xazinalarini muhrlab, ishonchli posbonlarga topshirdi-da, uch yuztacha xos navkari bilan shaharni aylanishga chiqdi.

Unda-bunda uchraydigan past-baland tepaliklarni hisobga olmaganda, Dehli – koʻkalam bir tekislikka joylashgan va chetlarini koʻz ilgʻamaydigan katta shahar edi. Tigʻiz joylashgan uylar, mahalla-koʻylar behisob, lekin koʻchalarda odam kam – notanish fotihlardan choʻchib, uylaridan chiqmay oʻtirganlar koʻp.

Humoyun qaysi koʻchadan oʻtmasin, besaranjom bir sinchkovlik bilan eshik-derazalar tirqishidan, devor tepalaridan qarab turgan oʻnlab koʻzlarni koʻradi. Muqaddas daryo hisoblangan Jamna boʻyida

toʻp-toʻp odamlar dafn marosimi oʻtkazmoqdalar. Ular oʻliklarni xushboʻy oʻsimlik moyi sepilgan oʻtinlar ustiga qoʻyib kuydiradilar-u kulini sekin daryoga oqizadilar. Narigi dunyoga oid bu ish bilan boʻlib, bu dunyoning tashvishlariga, hatto shaharni egallayotgan begona qoʻshinga ham koʻpda e'tibor bermaslikka tirishadilar.

Chorsu bozorida bilaklariga va boʻyinlariga shodashoda gul osgan yalangoyoq bolalar, ayollar koʻrinadi. Hatto soch-soqoli oqargan ba'zi bir keksalar ham bilaklariga qizgʻish-sariq rangli gulshodalar solib olishgan edi.

- Bu Chandin Chouk bozori, deb izoh berdi Humoyunning yonida borayotgan Hindubek. – Oydin Chorsu degan ma'nosi bor.
 - Bugun hayitmi, gul koʻp? soʻradi Humoyun.
- Ha, bahorgi ekinlarning unib chiqishini qutlab oʻtkaziladigan hayit. Hindistonda hayit koʻp. Biron oy hayitsiz oʻtmaydi.
- Gʻaroyib el! dedi Humoyun oʻychan kulimsirib. Eski bir qasrning tom va devorlari ustida oyoqqoʻllari uzun maymunlar bemalol sayr qilib yurar edi. Yuzlari, qoʻllari qora, qorinlari sargʻish, boshqa hamma joylari oqish-kulrang. Jajji maymun bolalari tomdan banan va nim daraxtlarining shoxlariga sakrab oʻtishar, bir-birlari bilan quvlashib, daraxtdan yerga ham tushishar edi. Qasrning ich-tashida odamlar yuribdi, lekin maymunlar bilan hech kimning ishi yoʻq.

Humoyunning ketidan borayotgan yuzboshining koʻzlari birdan ovchilik ehtirosi bilan yona boshladi. U kamonini qoʻliga olayotganini koʻrgan Hindubek:

– Maymunning uvoli yomon boʻladi, – dedi. – Buni ovlagan odam baxtsizlikka uchragay.

Humoyunning oʻng yonida borayotgan Xoʻja Kalonbek kulib soʻradi:

- Sigirni ham shunaqa e'zozlashimiz kerakmi, janob Hindubek?
- Neki tansiq boʻlsa, elga aziz koʻrinur, dedi Hindubek. Bu yerning issiq iqlimida sigir asrash oson emas.
- Harqalay, deb Humoyun Hindubekka yon bosdi,
 podsho hazratlari maxsus farmon chiqardilarki, hind xalqining azaliy udumlariga hurmat bilan qaralsin,
 el-ulusning nafsoniyatiga tegadigan harakat sodir boʻlmasin.

Xoʻja Kalonbek oʻng qoʻlini koʻksiga qoʻydi:

- Amirzodam, bu farmoni oliy biz uchun qonun! Men faqat Hindubekka sal tegishdim.
- Bekning gustohligi ma'lum-ku, deb endi Hindubek ham Xoʻja Kalonga hazil qildi.

Oldinda baland darxtlar orasidan boʻy choʻzib chiqib turgan yonlari qirrador minora koʻrindi.

- Qutb Minora! - dedi Hindubek.

Humoyun minora oldida otdan tushdi, soʻng beklar bilan minoraning tepasiga chiqdi.

Minoradan yuz qadamcha narida terak boʻyi keladigan yolgʻiz bir qora ustun koʻrindi. Ustun atrofida odam koʻp edi.

- Bu nedur? soʻradi Humoyun Hindubekdan.
- Bu ustun yaxlit temirdan yasalgan. Bilganlarning aytishicha, uch yuz yildan beri turgan emish. Kimki ustunni quchib, ilkini bir-biriga tekkizolsa, oʻylagan murodi hosil boʻlar emish.

Shu vaqtgacha oʻzini bosiq tutib kelayotgan Humoyun endi oʻsmirlarcha bir qiziqish bilan:

– Qani koʻraylik! – dedi va chaqqonlik bilan zinadan chopib tushib ketdi.

Temir ustun atrofidagi odamlar shahzodani koʻrib, oʻzlarini chetga oldilar.

- Janob Hindubek, qani, ustunni ne tavr quchish kerak?

Ustunning tepasi va pasti qorayib ketgan. Faqat oʻrtasi – behisob odamlarning qoʻl va yelkalari tekkan joy oppoq boʻlib, ma'dani yiltirab chiqib turar edi. Hindubek ustunga teskari turib, yelkasini unga tiradida, qoʻllarini orqaga choʻzdi. Ustun ancha yoʻgʻon edi. Hindubek uni teskari quchib qoʻlini bir-biriga choʻzdi, lekin yetkizolmadi. Butun kuchi bilan chirandi, bari bir qoʻli qoʻliga tegmadi. Buni koʻrganlar xaxolab kula boshladilar. Humoyun ham kula-kula Hindubek uddalay olmagan ishni qilib koʻrdi. Lekin u ham qoʻlini qoʻliga tekkizolmadi. Bek va navkarlar-u yana besholtitasi kuch sinab koʻrdi. Shulardan faqat bittasi – qoʻllari uzun, oʻzi ozgʻin samarqandlik yigit – ustunni teskari quchib, qoʻlini qoʻliga tekkazishga muvaffaq boʻldi.

Humoyun unga bir siqim kumush tanga mukofot berdi.

* * *

Dehlida toʻp-toʻp boʻlib aylanib yurgan gʻoliblar orasida yogʻli oʻlja izlayotganlari ham bor edi. Sind daryosining boʻyidan Bobur askarlariga qoʻshilib kelgan Yor Husaynbek ilgari Xaybar dovonining janubida yoʻltoʻsarlik qilgan qaroqchilardan edi. Hozir uning navkarlari shahar chetidagi bir ibodatxonaga kirishib, hindlar sigʻinadigan Xudolarning haykallariga oʻrnatilgan qimmatbaho toshlarni koʻchirib olishga tushdilar.

Devorlari oq-sargʻish marmardan ishlangan ibodatxonada keksa bir barahman¹ koʻzlariga yosh olib, buddaning ulkan tosh haykalidan najot soʻramoqda. Ibodatga kelgan ayollar, chollar, oʻsmirlar, Xudolari oldida bosh egib, jim turishibdi.

¹ Barahman – hindlarning ruhoniysi.

Yor Husaynbekning navkarlari esa toʻrt qoʻllik Xudo Shivaning baland haykaliga narvon qoʻyib chiqishgan, Shivaning peshonasiga katta qizil xolga oʻxshatib oʻrnatilgan yoqutni xanjar bilan kavlab olishga urinishardi.

Shu hodisaning ustiga kelib qolgan Humoyun narvondagi navkarga qahr bilan qichqirdi:

– Podshoh hazratlari nomidan buyuramen. Haykalga tegma! Tush pastga!

Yor Husaynbek nimqorongʻi ibodatxona ichida Humoyunni avval tanimadi:

Kofirlarning haykalini himoya qiladigan podshong
oʻzingga! – dedi-da, narvondagi navkarga buyurdi: –
Olaver!

Navkar xanjar bilan haykalning peshonasini kavlashda davom etdi. Shunda Humoyun otgan yoy oʻqi uning bilagiga tegdi. Xanjar yerga tushib ketdi. Navkar bilagini changallaganicha orqaga oʻgirildi.

Yor Husaynbek qilichini sugʻurib:

– Kim u? – deb oʻshqirdi-yu, Humoyun tomonga hamla qildi.

Hindubek ham qilichini sugʻurib, oldinga chiqdi:

– Siz Yor Husaynbek boʻlsangiz, bu oliy zot Bobur podshohning oʻgʻillari mirzo Humoyundirlar!

Yor Husaynbek bu gapga ishongisi kelmay, Humoyunga koʻzlarini olaytirib tikildi. U eng avval Humoyunning egnidagi argʻuvoniy toʻnni tanidi. Yoqalariga durlar qadalgan bu toʻn – Boburniki edi. Humoyun Panipat jangi arafasida Ibrohim Lodining Hamidxon degan lashkarboshisi bilan olishib, uni yenggan, uch yuzdan ortiq odamini asir olib kelgan edi. Bobur oʻgʻlining bu jasoratiga qoyil boʻlib, egnidagi shohona toʻnini oʻgʻliga kiydirgan, buni hamma beklar, shu jumladan, Yor Husaynbek ham koʻrgan edi. Oʻsha toʻn hozir ham Humoyunning egnida edi – uning

xipcha gavdasiga bir oz katta kelib, yelkalari osilibroq turar edi.

- Amirzodam, men sizni tanimabmen! Yor Husaynbek qoʻlida qilichi bilan bir qadam orqaga chekindi.
 - Qilichni topshiring! buyurdi Humoyun.
- Amirzodam, men hazrat otangizga sodiq xizmat qilgan beklardanmen!
- Ibodatxonada sugʻurilgan qilichni men podshoh hazratlariga eltib topshirishim kerak! dedi Humoyun. Siz yoʻltoʻsarlikdan tavba qilib, hazrati oliyning xizmatiga kirgan ekansiz. Bugun yana talonchilik koʻchasiga qaytmishsiz. Podshoh hazratlari ziyoratgohlarda nojoʻya harakat sodir boʻlmasin deb buyurmagan edilarmi? Nechun nazarni bunchalik past qildingiz, bek? Yogʻiy xazinalaridan barcha jangchilar oʻz ulushlarini olgaylar! Bu xazina sizga ham yetib ortgay! Ibrohim Lodining odamlari shu haykalning peshonasidagi yoqutga tegmagan ekanlar. Ular qilmagan pastkashlikni qilish bizga isnod emasmi? Oling qilichini! Mana bu nokas yigitlarni tutib, hibsga elting! Toki, boshqa yigitlarimizga ibrat boʻlsin!

Xos navkarlar bu buyruqni bajarganlaridan keyin Humoyun Hindubekka barahmanni va uning qavmlarini koʻrsatdi-da:

– Janob bek, podshoh hazratlari bizga tayinlagan gaplarni bularga tarjima qilib bering, – dedi. Bularning dini boshqa. Lekin biz barcha gʻayridinlarni bir Xudoning bandalari deb bilurmiz. Biz Hindistonga yaxshi niyatlar bilan keldik. Bu muazzam kishvarni hindlar bilan birga obod qilmoqchimiz. Kimki bizga hamkor boʻlsa, hamkorlik qilurmiz!

Hindubek tarjima qilgan bu soʻzlarni barahman va uning qavmlari bosh irgʻab, ta'zim qilib eshitdilar. Shahzoda va uning odamlari chiqib ketgandan keyin esa barahman yana buddaning haykali oldiga ibodatga kelib, butun minnatdorchiligini unga ayta boshladi. Muqaddas yoqutni olmoqchi boʻlgan nokasning qoʻlidan oʻq yeb jazolanishi buddaning irodasi bilan boʻlganiga barahman oʻz qavmlarini ishontirishi zarur edi.

4

Uzoq Sirdaryo vohalarida endi lola barg yozadigan salqin hamal oyida Jamna boʻylari avji saraton paytidagidek issiq edi. Kuni boʻyi oftobda otliq yurib badani misday qizib ketgan Bobur kechki payt salqinroq joy izlab, Jamna daryosining boʻyiga keldi.

Kunning issigʻidan tashqari peshindan soʻng ichilgan aroqning tafti ham uning ichini yondirmoqda edi. Kobulda koʻp ichib oʻrgangan beklar Panipatdagi gʻalaba sharafiga har kuni bir-ikki joyda ziyofat berishib, uni taklif qilishardi. Issiq va sernam havoda ustma-ust ichilayotgan chogʻir va aroqlar Boburning yuragini behalovat qilib, kechalari uyqusini qochirib yuborardi. Koʻp ichib yotgan kunlari ertalab turib yoʻtalsa, balgʻamga qon aralashib chiqardi.

Buni koʻrgan hirotlik xos tabib Yusufiy:

– Hazratim, oʻtinamen, ichkilikni tashlang! – deya yalinardi.

Boburning oʻzi ham uyqusiz behalovat boʻlib yotgan kechalari: «Endi tashlamasam boʻlmas», derdi. Lekin kunduz biron tashvishdan koʻngli gʻash boʻlsa yoki aksincha, kayfini chogʻ qiladigan yaxshi voqea yuz bersa, yana ichgisi kelib qolardi. Ayniqsa, ilk qadahlarni ichib, kayfi endi koʻtarilib kelayotgan paytlarda beklari bundan keyingi ichkilik majlisga taklif qilsalar osonlikcha rozilik berib qoʻyardi. Bugun peshindagi oʻtirishda ham xuddi shunday boʻlgan, «Kechasi kemada bazm qilurmiz» deb beklarni oʻzi ziyofatga taklif qilgan edi. Holbuki, tushda ichilgan mayning gʻubori haligacha tarqamasdan borligʻini lohas qilmoqda edi.

Bobur mulozimlari va xos navkarlari bilan Jamnaga yaqinlashganda, daryo boʻyidagi koʻkalam yalanglikda dafn marosimi oʻtkazayotgan barahmanlar, ayollar, keksa-yosh yuzdan ortiq odamlarni koʻrdi. Bobur dafn marosimini yaqinroqdan kuzatmoqchi boʻldi-yu, otini oʻsha tomonga burdi.

Panipatdagi jangning dahshatli tafsilotlarini eshitgan odamlar otliqlardan qoʻrqib, marosimni buzib qocha boshladilar. Bobur yaqin borganda yondirishga tayyorlab qoʻyilgan oʻlik oldida bitta motamsaro kelinchak, keksa ayol va munkaygan bir barahman chol qolgan edi. Oʻtin ustida chalqancha yotqizib qoʻyilgan jasadning peshonasini toʻfangdan merganlarcha otilgan oʻq qoraytirib teshib oʻtgan edi.

Bu rajput yigitni Bobur qayerdadir koʻrganday boʻldi. Ha, Panipat jangidan bir kun oldin Humoyun Hamidxon degan afgʻon sarkardasini yengib, uning uch yuz navkarini asir olib kelgan edi. Ibrohim Lodi bilan boʻladigan jang hali oldinda. Uning qoʻshini sakkiz barobar koʻp. Shuning tahlikasi ta'sirida Bobur asirlarga nisbatan ayovsiz bir siyosat ishlatganini esladi.

Ibrohim Lodi qoʻshinlarida toʻfang yoʻq. Asir olinganlar ham toʻfangdan odamni otib oʻldirish mumkinligini bilishmaydi. Ular koʻproq hind Xudolaridan boʻlmish Shivaning qahridan qoʻrqishadi. Rajputlarning e'tiqodi boʻyicha, agar Shiva astoydil gʻazablansa, ikki koʻzidan tashqari peshonasida uchinchi koʻz paydo boʻladi. Shiva kimgaki shu uchinchi koʻzining qip-qizil olovini sochsa, oʻt tekkan odam til tortmay oʻladi...

Bobur mana shu diniy e'tiqoddan harbiy maqsadda foydalanmoqchi boʻldi-da, asirlardan yuztasini bir chetga saf qildirdi. Ularning qarshisiga yuzta toʻfangandozni qoʻydi va yigirma qadam joydan oʻt ochishni buyurdi. Oʻsha toʻfanglardan otib oʻldirilgan asirlarning biri – peshonasidan oʻq tekkan mana shu yigit edi.

Tirik qolgan asirlar toʻfangdan otilgan olovli oʻq odamni qanday oʻldirishini umrlarida birinchi marta koʻrib, dahshatga tushdilar. Ulardan biri osmonga qoʻl choʻzib:

- O Shiva! Rahm qil, Shiva! - deb baqirdi.

Bobur vahimadan titrayotgan yuzta asirga tarjimon vositasida murojaat qildi:

– Ha, bizda Shivaning koʻziday shafqatsiz olov sochadigan qurol bor! Sizlarni hozir ozod qilgaymiz. Borib yurtdoshlaringizga aytinglar! Biz bilan urushganlar mana shu olov zarbidan halok boʻlurlar! Urushmay taslim boʻlganlar sizlar kabi omon qolurlar!

Tirik qoʻyib yuborilgan yuzga yaqin asir bu gaplarni shahar-u qishloqlarga tarqatdilar. Hozir Jamna boʻyida dafn etilayotgan jangchi yigitning yaqinlari ham uning Shiva olovini eslatadigan bir balodan halok boʻlganini eshitgan edilar.

Marhum jangchining yoshgina xotini oʻzini erining jasadi bilan birga olovga tashlab kuydirishga tayyorlanmoqda edi. Bobur sochlari yoyilib yelkasiga tushgan kelinchakning yuzida oʻlim sharpasini koʻrdiyu, hindlardagi sati odatini esladi.

Agar kelinchak tirik qolsa, umr boʻyi azadorlik kiyimida yurishi, kuniga faqat bir marta ovqat eb, boshqa er qilmay, to oʻlguncha azob-uqubatda yashashi kerak edi. Mabodo kelinchak bunday zabun hayotni oʻziga munosib koʻrmasa, sati odatiga boʻysunib, erining murdasi bilan birga olovda yonib ketishi kerak edi...

Keksa barahman jasadning tagidagi oʻtinlarga birdan oʻt qoʻyib yubordi. Maxsus moy sepilgan oʻtin lovillab yonib ketdi. Kelinchak olov ichida qolayotgan jasadga qarab bir talpindi-yu, lekin joni shirinlik qilib, orqaga chekindi.

Bobur Hindubekka yuzlandi:

- Nahotki shunday goʻzal kelinchak oʻzini olovga tashlasa? Bu ne jaholat?! Barahmanga bizning buyrugʻimizni ayting! Kelinchakni olib ketsin! Hindubek otini chu-chulab barahman bilan kelinchakka yaqinlashdi-da, hindchalab bir narsalar dedi. Kelinchak Boburga tez oʻgirilib qaradi:

– Fotihlarning podshosi shumi? Mening erimga Shivaning olovini shu odam sochganmi? – kelinchak ikki qoʻlini Bobur tomonga choʻzdi: – Agar senda Shivaning qudrati boʻlsa erimni tiriltirib ber! Oʻshanda men ham tirik qolurmen! Sen Shiva boʻlsang, endi bizga rahm qil! Tiriltir!

Hindubek bu iltijoni tarjima qilganda, Bobur sarosima boʻlib:

- Hushi joyidami? - dedi. - Men Shiva emasmen! Oʻlgan odam endi tirilmagay! Kelinchakni qutqaring!

Bu gaplarning tarjimasini eshitgan kelinchak birdan gʻazablanib qichqirdi:

- Shiva boʻlmasang, nechun yolgʻon ovoza tarqatding? Nechun mening erimni oʻldirding?! Endi mening oʻlimimga ham sen sababchi boʻlursen!

Kelinchak olovga yaqinlashar ekan, Bobur Hindubekka:

- Ushlang, ushlang! - dedi.

Hindubek ot ustidan kelinchak tomonga intilib, uni oʻngarib olmoqchi boʻldi. Ammo kelinchak Boburga qarata:

– Ket, bosqinchi! Yoʻqol! Yurtingga ket! – deb qichqirdi-da, Hindubekka chap berib, oʻzini olovga otdi va erining yonayotgan jasadini quchoqlab oldi.

Lovullab yonayotgan olov darhol kelinchakning harir kiyimlariga va yelkasida yoyilib yotgan qora sochlariga ilashdi. Bobur uning olov ichida achchiq ogʻriqdan chinqirib yuborganini eshitdi, shunda ham jangchi erining jasadini quchogʻidan qoʻymayotganini koʻrdi-yu, larzaga kelib, otini orqaga burdi.

U Jamnaning sokin qoʻltigʻida langar tashlab turgan ikki oshiyonlik kemaga tomon otini yeldirib borayotganda, orqadan esgan shamol olovda kuygan odam tanasining koʻngilni aynitadigan chuchmal hidini olib keldi. Kemaning pastki qavatida bakovul va oshpazlar podshoning tushlik taomi uchun kabob pishirmoqda edilar. Bobur kemaning «tolor» deb ataladigan boloxonasiga koʻtarilayotganda, mangʻalda pishayotgan kabobning tutuni va hidi boyagi olovning chuchmal hidini eslatdi-yu, birdan koʻnglini behuzur qildi. U bakovulga oʻgirilib:

- Mangʻalni oʻchirtiring! dedi.
- Hazratim, sizga tushlik...
- Tushlik kerak emas.
- Ammo kechqurungi ziyofat...
- Ziyofat qoldirilsin!..

Bobur gʻamgin yuz bilan tolorga bir oʻzi chiqib keldi. Hademay pastki qavatga ham jimlik choʻkdi. Shu jimlikda oʻzini olovga tashlagan kelinchakning chinqirigʻi goʻyo qayta eshitila boshladi... Panipatdagi harbiy gʻalaba bu chinqiriq ta'sirida Boburga ma'naviy magʻlubiyatdek tuyilib ketdi. Shiva haqidagi rivoyatdan siyosat uchun foydalangani ilgari harbiy ishda xatarli asnoda joiz bir choradek koʻringan boʻlsa, endi olovda yongan goʻzal kelinchak buning qanchalik gʻayriinsoniy shafqatsizlik ekanini uning koʻziga baralla koʻrsatdi. Panipat zafari... Taqdir unga shunday ulkan gʻalabani nega Movarounnahrda bermadi? Vatanida jang qilsa, hech kim uni bosqinchilikda ayblay olmas edi-ku!

Uzoqlarda qolgan Mohim begim esiga tushdi. Koʻrmaganiga olti oydan oshyapti. Soʻnggi marta suhbatlashganlarida, Mohim begim bugungi dahshatlarni oldindan sezganday, qanchalik iztirobga tushgan edi!.. Boyagi kelinchakning: «Ket,

bosqinchi! Ket!» deb qichqirgani uning qulogʻi ostidan ketmas edi.

Bobur ichida: «Yo Rab, bu ne koʻrgilik!» dedi-yu, xayolini boshqa biron narsa bilan band qilish uchun daftar-qalam oldi. Sevgan yoridan va tugʻilib-oʻsgan diyoridan uzoqda u oʻzini behad tolesiz, baxtsiz sezgan paytlari koʻp boʻlar edi. Hozir ham shu ogʻir tuygʻu yuragini chulgʻab oldi. Bobur koʻnglini daftariga boʻshatgisi kelib, birinchi satrni yozdi:

Tole' yoʻqi jonimga baloligʻ boʻldi.

U keng qirgʻoqlar orasidan tovushsiz jim oqib oʻtayotgan Jamnaga tikildi. Botib ketgan quyoshning quyuq shafagʻidan daryo suvi qizgʻish koʻrinadi. Boburning nazarida, daryo suvini shafaq emas, janglarda toʻkilgan qonlar qizartirib yuborganday tuyildi. U iztirob bilan keyingi satrlarni yozdi:

Har ishniki ayladim xatoligʻ boʻldi. Oʻz yerni qoʻyib Hind sori yuzlandim, Yo Rab, netayin, ne yuz qaroligʻ boʻldi!

* * *

Gʻira-shira qorongʻilikda oʻng qirgʻoqdan katta bir qayiq chiqib, kemaga qarab kela boshladi. Kemaning pastki qavatidan qoʻrchiboshi:

- Kim u qayiqdagi? - deb soʻraganini Bobur ham eshitdi-yu, qayiqqa tikilib qaradi.

Qayiqning oltitami-sakkiztami eshkagi bor edi.

 Mirzo Humoyun hazrati oliylarining huzurlariga ijozat soʻraydilar! – deb javob berdi qayiqdan yoʻgʻon bir tovush.

Humoyun bilan koʻpdan beri yakkama-yakka suhbatlasha olmagan Bobur bugun oʻgʻli bilan bir dardlashgisi keldi-yu, pastdan savdarni chaqirdi: - Ayting, Humoyun tolorga chiqsin!

Koʻp oʻtmay tolor zinasida vazmin qadam tovushlari eshitildi. Humoyun eshikdan kirganda, Bobur uning chaqnagan navqiron koʻzlariga, endi lab ustini qoplagan nozik moʻyloviga, kuchga toʻlib turgan xipcha, sogʻlom gavdasiga havasi kelib tikildi. Boburni qiynayotgan iztirobli tuygʻular, uni behalovat qilgan issiqlar Humoyun uchun goʻyo yoʻq edi. «Oʻn sakkiz yoshimda men ham shunday yigit edim-a, endi nimam qoldi?» degan oʻydan Boburning koʻngli qattiq ezildi.

Ota-bola koʻrishib-soʻrashganlaridan soʻng, Humoyun otasining roʻbarusiga choʻkka tushdi-da, kulimsirab qoʻynidan chiroyli sadaf quticha oldi.

- Hazratim, shuni bir ochib koʻring.

Bobur qutichani qoʻliga olib shoshilmay ochdi. Qora baxmal mato orasidan olmosga oʻxshash serjilva bir tosh yulduzday charaqlab koʻrindi. Lekin toshning yongʻoqday kattaligiga qarab, Bobur uning olmosligiga ishongisi kelmasdi. Juda koʻp xazinalarni va xilma-xil javohirlarni koʻrgan Bobur bunchalik katta olmosni hali uchratmagan, olmos donasining bu qadar ulkan boʻlishini tasavvur ham etmas edi.

- Bu qanday javohir? deb soʻradi Bobur oʻgʻlidan.
- Olmos emish.

Bobur nur jilvasiga choʻmib oʻynayotgan toshni qoʻliga olib salmoqlab koʻrdi:

- Vazni yetti-sakkiz misqol kelur. Nahot shunchalik katta olmos boʻlsa?
- Men bir muqayyimni¹ chaqirib koʻrsatdim.
 Mashhur Koʻhinur² olmosi shu, dedi. Olamda

¹ Muqayyim – javohirshunos zargar.

² Koʻhinur – «nur togʻi» demakdir. Oʻsha zamonda bu olmos – odamzod topgan olmoslarning eng ulkani boʻlgan. Olimlar Koʻhinur olmosining 1304-yildan beri borligini aniqlaganlar. Hozir bu olmos Londonda saqlanadi.

bundan katta olmos yoʻq emish. Bahosi sandiq-sandiq oltinlardan baland emish.

- Men Bangola podshosi Sulton Aloviddinda ulugʻ bir olmos bor deb eshitgan edim. Ta'rif qilgan edilarki, shu bitta olmos katta bir mamlakatning bir oylik sarf-u xarajatini koʻtargay.
- Muqayyimning aytishicha, mana bu olmosning qiymati tamomi olamning ikki yarim kunlik sarfiga barobar ekan.
 - Sen buni qayerdan olding?

Humoyun oʻngʻaysizlanib jilmaydi-yu:

- Gvalior rojasining xaylxonasida peshkash qildilar,dedi.
 - Nechun?

Humoyun voqeani hikoya qilar ekan, Bobur Gvalior viloyatida yuz yildan beri hokimlik qilib, juda katta boylik orttirgan roja Bikramadit'yaning hashamatli qasrini koʻz oldiga keltirdi. Bikramadit'ya Ibrohim Lodiga boʻysunmasdan, u bilan uzoq vaqt urush qilgan, oxiri Gvaliorni Ibrohimga berib, oʻzi Shamsobod degan joyga koʻchib ketgan va koʻp oʻtmay vafot etgan edi. Panipatdagi gʻalabadan keyin Humoyun boshliq ilgʻorlar Dehlidan oʻtib borib koʻp qasrlarni ishgʻol qildilar. Shu qasrlardan birida oʻlib ketgan oʻsha rojaning boʻy yetgan ikki qiz, bir oʻgʻli va ularning onalari yashab turgan edi.

Rojaning yigirma yoshlardagi oʻgʻli Humoyunni yaxshi qarshi oldi:

– Sizlarning dushmanlaringiz boʻlgan Ibrohim Lodi bizning ham dushmanimiz edi, uning magʻlub boʻlganidan biz shodmiz, – dedi. – Endi ruxsat beringizlar, biz Shamsoboddan ona yurtimiz Gvaliorga qaytib ketaylik.

Humoyun ham yosh roja bilan iliq muomala qildiyu, lekin Gvaliorga koʻchib ketish uchun oʻzi ruxsat bera olmasligini, podshohni kutish kerakligini aytdi. Oʻsha kecha Vays degan bir bek ellik nafar vigiti bilan rojaning gasrida tunadi. Humovunning oʻzi gasrning hovlisidagi boqqa chodir tiktirib, kechasi chodirda uxlab yotganda ichkarida koʻtarilgan toʻpolonni eshitib uygʻonib ketdi. Qoʻrchilarini yoniga olib, qasr ichiga chopib kirsa, Vaysbekning yigitlaridan biri eshik oldida qonga belanib oʻlib yotibdi. Qandillarda shamlar yonib turibdi. Ikkinchi qayatning zinapoyasida turgan oʻn sakkiz yoshli goʻzal qiz chuvalib yotgan ipak sarisini titroq qoʻllari bilan olib, valang'och velkasiga vopishga urinvapti. Rojaning o'g'lini besh-oltita navkarlar oʻrtaga olib, qoʻlidagi qilichini urib tushirishdi. Ma'lum bo'lishicha, Vaysbek rojaning shu qizini yoqtirib qolib, navkarlari yordamida oʻz boʻlmasiga kuch bilan olib keltirmoqchi boʻlgan. Qizning akasi qilich yalangʻochlab, himoyaga chiqqan. Qizni koʻtarib ketmogchi boʻlgan navkarni gilich bilan urib vigitgan. Endi buning qasdiga navkarlar yosh rojaning oʻzini oʻldirmoqchi edilar.

Humoyun gap nimadaligini surishtirib bilgach, navkarlarga:

– Rojani boʻshating! – deb buyurdi. – Oʻz singillarini bunchalik mardona himoya qilgan yigit ehtiromga sazovor. Podshoh hazratlari bunday kishilar bilan yaxshi muomalada boʻlishni buyurgan edilar. Farmoni oliyni unutgan shahvatparast Vaysbek hibsga olinsin! Qizni iliklamoqchi boʻlgan navkarlar oʻn darra kaltaklansin!

Xos navkarlar bu buyruqni bajarmagunlaricha Humoyun ularning tepasidan ketmay turdi. Bu orada zinapoyadan yosh rojaning onasi qoʻlida kichkina sadaf quticha bilan tushib keldi. U oliy tabaqaning oʻqimishli ayollaridan edi, koʻp tillarni bilardi, Humoyunga forschalab gapirdi:

- Shahzoda, mening bisotimdagi eng katta boyligim - mana shu qutichaning ichida. Menga far-

zandlarim dunyoning hamma boyliklaridan azizroq. Siz oʻgʻlimning jonini qaytarib bergandek boʻldingiz. Mana bu qutichadagi ulugʻ olmosni sizga peshkash qilaman!

- ...Voqeaning tafsili shu, - dedi Humoyun va otasiga «Bir navkarning oʻlgani-yu, Vaysbekning jazolangani uchun gap eshitmasmikinmen?» degandek termilib qaradi.

Bobur ogʻir tin oldi-yu:

- Alqissa, bu goʻzal olmos ham zoʻravonlig-u xunrezlik balosini koʻrib kelmishmi? dedi.
- Hazratim, mendan xatolik oʻtgan boʻlsa, afv eting. Men oʻyladimki, oʻz or-nomuslarini shunday bebaho olmosdan ham ortiq qadrlaydigan odamlar gʻayridin boʻlsalar ham...
- Rost, bu mamlakatda shunday or-nomusli odamlar borligini oʻylasam, mening ham koʻnglim koʻtarilur, oʻgʻlim! Ammo bizning nazari past bek-u navkarlarimiz zoʻravonlig-u talonchilik bilan hind elini bizdan choʻchitmoqdalar. Axir bizning maqsadimiz faqat mamlakat olmoq emas edi-ku. Biz Hindistonda katta davlat tuzish orzusini koʻnglimizga tugib kelgan edik. Yagona qudratli davlat barpo etilishidan hind eli ham manfaatdor emasmi? Barcha oʻlkalar birlashsa, elning tinkasini quritgan ichki urushlar toʻxtamasmi? Ulus tinchib, ilm-u san'atning ravnaqi osonlashmagaymi? Buni sezgan hindistoniylardan Dilovarxon, Hindubek kabilar biz bilan hamkorlik qilmoqdalar. Biz endi butun hind elining koʻnglini olmoqqa intilmogʻimiz darkor, oʻgʻlim!
- Hind elining koʻnglini olmoq?! taajjub bilan soʻradi Humoyun. - Qonli janglar vahimasidan qoʻrqib, shahar-u qishloqlarini tashlab qochmoqda boʻlgan ming-ming odamlarning koʻnglini biz qandoq olgʻaymiz?

Bobur Panjobda yoʻlni adashtirib, fotihlarni xarob qilmoqchi boʻlgan filbonni va boya «Ket, bosqinchi!» – deb qichqirib oʻzini olovga tashlagan kelinchakni esladi:

- Ha, bu juda mushkul muammo! Bobur miz ustida turgan sadaf qutichani qoʻliga oldi. Umidvormen, shoyad bu muammoni yechishga muyassar boʻlsak. Axir mana sen bir qancha hindistoniylarning koʻnglini olmishsen-ku. Dehliga kelgan kuning ibodatxonada bu elning muqaddas tuygʻularini himoya qilmishsen. Buning hammasiga loyiq mukofot mana shu olmosdir! Ol, haloling boʻlsin!
- Hazratim, deb Humoyun qutichani olmay qoʻlini koʻksiga qoʻydi, bu olmosni men sizga atab keltirdim.

Bobur sadaf qutichani yana miz ustiga qoʻydi-yu, ovozi xiyol tovlanib:

- Sening bu saxovating uchun Tangriga shukrlar qilamen, dedi. Panipat jangida sen menga eng birinchi boʻlib zafar keltirding, qoʻshinning ruhini koʻtarishga sababchi boʻlding. Men hali bu xizmatlaringni koʻnglimdagidek taqdirlaganim yoʻq.
- Lekin sizning avvalgi in'omlaringiz mening butun umrimga yetgulikdir, – deb Humoyun otasiga «Mubayyin»ni eslatgisi keldi. – Men ham sizga arzirlik bir armugʻon keltirish orzusida edim...
- Unday boʻlsa, mayli, men bu armugʻoningni bir marta qabul qilay. Endi shu olmos menikimi?
 - Sizniki!
- Lekin taqdir menga dunyodagi barcha olmoslardan qimmatliroq bir mukofot bermishdir. Bu mukofot mening sendek oʻgʻlim borligidir. Tojdor, taxtdor otaoʻgʻillar orasida qandoq yomon baxilliklar, qandoq razil xunxorliklar boʻlganligi senga sir emas. Men istaymenki, bu balolar sen-u menga hech vaqt yovuq kelmasin. Xudodan tilagim shuki, mendan senga,

sendan avlodlaringga saxovat-u mardlik, fidokorlig-u olijanoblik meros boʻlib qolsin. Bu fazilatlar bizni ulkan togʻ silsilasidek doimo bir-birimizga bogʻlab tursin. Ana oʻshandagina biz Hindistonga kelib, koʻzlagan ulugʻ maqsadlarimizga yetishgaymiz.

- Siz aytgan ulugʻ maqsadlar uchun oʻgʻlingiz jonini berishga ham tayyor!
- Bunga mening ishonchim komil. Shuning uchun bu noyob olmosni men faqat senga munosib koʻrurmen. Ol!

Humoyun endi oʻrnidan sakrab turdi-yu, sadaf qutichani ta'zim bilan otasining qoʻlidan olib, koʻziga surdi. Boburning boyagi behalovatligi va tushkun kayfiyati endi tarqab ketgan, koʻnglida yana yaxshi istiqbolga ishonch tuygʻusi mavj urar edi. U Humoyunga:

– Oʻtir, – dedi-da, qarsak chalib, savdarboshini chaqirdi: – Hindubekni chorlang. Xoʻja Xalifa bilan birga kirsin.

Chaqirilganlar kelguncha, Bobur Humoyunga Agradagi ahvol toʻgʻrisida gapirib berdi:

– Qoʻrgʻonni Ibrohimning onasi, oʻgʻli, Malikdod Koroniy otliq vaziri mingdan ortiq xos askarlari bilan berkitib olmishlar. «Soʻnggi odamimiz qolguncha jang qilurmiz» deb ahd qilmishlar. Bu ahdni bizning qoʻshin bir hamla bilan koʻkka sovurmogʻi mumkin. Ammo yana xunrezlik boʻlur, shahar buzilib, bizga kerakli qancha odamlar hayf ketur!

Xoʻja Xalifa va Hindubek tolorga ta'zim qilib kirishdi. Bobur ularni qarshisiga oʻtqazgach:

– Sizlar Agraga bizdan elchi boʻlib bormoqlaringiz kerak, – dedi. – Maqsad – qoʻrgʻonni jangsiz olish. Mol-u jonlari omon qolsin. Ibrohimning onasi Jamna boʻyidan pargana¹ soʻragan emish. Mayli, beraylik,

 $^{^{\}scriptscriptstyle 1}$ Pargana – kichikroq viloyat.

Ibrohimning oʻgʻli arabcha-forscha oʻrgangan ilmlik oʻspirin emish, uni saroydagi obroʻli mulozimlarim qatoriga qoʻshay. Malikdod Koroniyni tadbirkor vazir deb eshitdim. Uni Hindiston muammolari boʻyicha oʻzimga maslahatgoʻy qilib xizmatga olay. Borib, yaxshilab soʻzlashing. Yana qanday ma'qul tilaklari boʻlsa qabul qilaylik. Xullas, qirgʻin boʻlmasin, bevabechora koʻpaymasin, deb shu yoʻlni tutmoqdamiz... Ya'ni, sizlarning vazifalaringiz – qal'a olish emas, balki qal'adagilarning koʻnglini olishdir!

Ogʻir janglarning oldingi safida qon kechib yurgan Humoyun bilan Hindubek Boburning bu tadbiridan yengil tortishib, bir-birlariga mamnun qarab olishdi.

AGRA

YO HAYOT, YO MAMOT

1

Ibrohim Lodining onasi malika Bayda Panipat jangida oʻldirilgan oʻgʻli uchun aza tutib, boshdan-oyoq oq kiyinib yurar edi. Oraga qoʻyilgan odamlar unga istagan parganasini berib, Agrani jangsiz topshirishga koʻndirdilar. Malika qoʻrgʻon darvozalarining kalitini Jamna boʻyida Boburga topshirayotganda, koʻzlaridan tirqirab yosh chiqib ketdi.

Bobur bu salobatli kampirning keng peshonasi va bir-biriga qoʻshilgan qoshlarini qayerdadir koʻrganday boʻldi. Soʻng birdan Panipat esiga tushdi. Jang tugagandan keyin bir bek minglab oʻliklar orasidan Ibrohim Lodining jasadini izlab topgan va boshini kesib olib, uzun nayzaga sanchib, Boburga keltirib koʻrsatgan edi. Endi qirq yoshlarga borgan Ibrohim Lodining keng peshonasi va payvasta qoshlari ham xuddi onasinikiga oʻxshar edi.

Boburga bir lahza shunday tuyildiki, goʻyo Ibrohim Lodi toʻsatdan tirilib, onasining qiyofasiga kirib kelgan. Bobur allanechuk sarosima boʻlib:

– Malika, yigʻlamang, – dedi. – Bizdan yana qanday tilagingiz boʻlsa ayting?

Malika Bayda koʻz yoshini kafti bilan tez artdi:

- Menga boshqa ozor bermasalar boʻldi.

Bobur mulozimlari tomonga yuzlandi:

– Minba'd malikaga hech kim ozor bera koʻrmasin, hamma uni moʻtabar onamizdek ehtirom qilsin!

Mulozimlar bu topshiriqni ta'zim bilan qabul qildilar. Malika ham bosh egib, minnatdorchilik bildirgan boʻldi. Ammo uning yigʻidan namlangan koʻzlari poʻlat tigʻning sovuq jilosini eslatib nafrat bilan yaltirab ketganini hech kim koʻrmadi.

Malika Bayda oʻgʻlining kushandasini kechiradigan onalardan emas. Panipatdan mudhish xabar kelganda, malika uchun osmon oʻpirilib yerga qulaganday boʻlgan edi. U oʻgʻlini soʻnggi marta koʻrishni istar, uning jasadini oʻz qoʻli bilan tuproqqa qoʻyib, qabrini quchoqlab yigʻlasa, koʻngli xiyol taskin topadiganga oʻxshar edi. Shuning uchun malika eng ishongan odamlarini Panipatga yuborib, Ibrohimning jasadini topib kelishni buyurgan edi.

Lekin Agra bilan Panipatning orași uch-to'rt kunlik yoʻl. To oʻlim xabari Agraga yetib kelguncha, soʻng Agradan malika yuborgan odamlar Panipatga borguncha oradan bir haftacha o'tgan, ungacha oʻliklarning bir qismi koʻmdirilgan, bir qismi mechkay quzgʻunlar suyaklarigacha tozalab yeb ketgan edilar... Malika Bayda yuborgan odamlar sulton Ibrohimning jasadini topolmadilar, faqat jang kuni uning kallasini nayzaga sanchib, Boburga koʻrsatganlari haqida xabar topib keldilar... Oʻgʻlining jasadi qanday xor boʻlganini eshitgan onaning qaygʻu-alamlari avvalgidan oʻn hissa oshdi. U, hatto joynamoz ustida namoz oʻqib oʻtirganda ham: «Ibrohimjon, endi bu olamda sening qabring ham vo'q, Xudo menga jasadingni ham ko'p ko'rdi! - deb nola qilar: - Ilohim, senga oʻlim keltirgan Boburning oʻzi oʻlsin, bundan ming hissa ortiq xor boʻlib oʻlsin!» - deb garg'ar edi.

Malikaning kanizlari va xizmatkorlari koʻcha-koʻydan unga taskin beradigan gaplar topib kelishardi. Boburning askarlari yem-xashakdan qiynalib, dehqonlarning ekinlarini otlariga yedirgan ekan, dehqonlar gʻalayon koʻtarib, navkarlardan bir qanchasini bolta va panshaxalar bilan urib oʻldiribdi. Fotihlarni Hindistonning issiqlari ham juda qiynab

qoʻygan emish. Salqin togʻ havolariga oʻrgangan ot va odamlar bu yerning ayovsiz issigʻiga bardosh berolmay oʻlayotgan emish. Vabo va qora bezgak ham ularning saflarini siyraklashtirib qoʻyayotgan emish...

Malika ovozalarning qanchalik rostligini Bobur saroyida xizmatda yurgan nevarasi Bahodirdan surishtirib bilmoqchi boʻldi. Bahodir hafta-oʻn kunda kelavermagach, malika «uni saroydan chiqarishmasa kerak», deb oʻyladi-yu, kanizini podshoh mahkamasiga yubordi. «Men betobman, nevaramga ruxsat bersinlar, meni kelib koʻrib ketsin», degan ma'noda maktub yubordi.

Oʻn yetti yoshli Bahodir forschani va sanskritni yaxshi bilar, Bobur uchun zarur boʻlgan ba'zi hujjatlarni tarjima qilar edi. Saroyda boshqa tarjimonlar ham bor edi. Bahodirga koʻp ish buyurishmas edi-yu, lekin uni oʻzicha erkin ham qoʻyishmasdi. Bobur uni qattiq qoʻriqlab yurishni buyurgan edi. Bu qoʻriqchilar Bahodirni tashqi xatarlardan ehtiyot qilib yurganday koʻrinsalar ham, aslida ular shahzodani «Ibrohim tarafdorlari tomonidan uyushtirilishi mumkin boʻlgan biron fitnaga bosh qoʻshmasin» deb, sinchiklab kuzatishardi. Shu sababli Bahodirni saroydan koʻp chiqarishmasdi.

Biroq eshik ogʻa Muhammad Doʻlday malika Baydaning «Kasalman, nevaram kelib ketsin», degan mazmundagi xatini olgach, Boburning «Malikani moʻtabar onamizday ehtirom qiling» degan buyrugʻini esladi-yu, Bahodirga javob berdi. Faqat uning yoniga avvalgidan ikki barobar koʻproq navkar qoʻshdi-da, shu bugunoq qaytib kelishni tayinladi. Nevarasi kelganda, malika Bayda daryo boʻyidagi marmar koʻshkning nimqorongʻi ichki xonasida xastalarday shiftga tikilib yotgan edi. Yoʻlda issiqdan terlab-pishib kirgan nevarasiga yonidan joy koʻrsatdi-yu, majolsiz bir ahvolda oʻrnidan turib oʻtirdi. Nevarasining boʻgʻriqqan

yuzlariga qarab hol-ahvol soʻrashdi. Yoz bu yil har yilgidan ham issiq kelganini aytdi.

- Fotihlar issiqqa bardosh berolmay oʻlayotgani rostmi? deb soʻradi.
 - Birda-yarim oʻlayotganlari bor, dedi Bahodir.
- «Hindistonda turmaymiz, salqin joylarga qaytib ketamiz» deyayotganlari-chi?
- Podshohlari ketgani qoʻygaymi? Koʻpchilik uning izmidan chiqmas ekan. Oʻzi ham juda gapga usta notiq odam ekan. «Ketamiz», deb yurganlarni saroyga toʻplab, shunday bir gaplashdiki, hammasi jim boʻlib qoldi.
 - Sen otangning qotilini... maqtayapsanmi?

Bahodir eshikka xavotirli koʻz tashlab qoʻydi. U oʻzi bilan birga kelgan hamrohlaridan xavotirda edi. Buni sezgan malika ovozini pasaytirib soʻradi:

- Ketingga odam qoʻyganlarmi?
- Ha, hech kim bilan yakkama-yakka gaplasholmayman. Hamisha yon-verimda qoʻriqchilar... Yomonlasam, darrov yetkazadiganlar koʻp.
- Qoʻrqma, bu xonada faqat biz ikkalamiz... Ilgari bizga xizmat qilgan odamlardan saroyda hech kim bormi?
- Otamning vaziri Malikdod Koroniy bor... Keyin... bizning kutubxonada ishlagan toʻrtta olim ham xizmatga olindi. Bilishimcha, Bobur hindistonliklarni oʻziga el qilmoqchi, ularning ishonchini qozonmoqchi. Shuning uchun otamning barcha oshpazlarini saroyga toʻplab, toʻrttasini oʻzi uchun tanlab olibdi.
- Shu bizning oshpazlar pishirgan ovqatlarni Bobur ham yermishmi?
- Ha, koʻrganlardan eshitdim. Bobur hindistoniy taomlarni yeyish bilan ham oʻzini bizning elga yaqin koʻrsatmoqchi boʻlsa kerak.

Malika ilgari oʻzining itoatida boʻlgan oʻsha toʻrt oshpazdan birortasini qoʻlga olish mumkinligini

oʻyladi-yu kutilmagan bir bardamlik bilan oʻrnidan turib ketdi. Uning qalbini oʻrtab yurgan qaygʻu-alamlar endi birdan yangi yoʻl topganday boʻldi. Zoʻr intiqom tuygʻusi uning xayollarini bir nuqtaga toʻplab, vujudiga kuch-quvvat berganday boʻldi. «Agar Bobur oʻldirilsa, uning odamlari bu yerda turolmaydi: ketadi, mamlakat yana oʻzimizga qoladi!» degan oʻy ham uning oshpazlarini qoʻlga olish haqidagi qarorini mustahkamladi. Malika ogʻzini nevarasinnig qulogʻiga yaqinlashtirib soʻradi:

- Oʻsha oshpazlarni sen koʻrdingmi?
- Koʻrdim.
- Ularning orasida Ahmad choshnagir yoʻqmi?
 Bahodir buvisining avzoyi oʻzgarganidan allanechuk choʻchib:
- Yoʻq, dedi. Ahmad choshnagir Agradan Atovaga ketgan.

Malika Bahodirning eshikka yana xavotir bilan koʻz tashlab qoʻyganini koʻrdi-yu, kinoyaomuz iljaydi: «Bu nevaram boʻshroq, aygʻoqchisi ham koʻp ekan, sir berib qoʻysa juvonmarg boʻladi, men ham niyatimga yetolmayman», dedi oʻzicha va koʻnglidagi qaltis niyatni unga bildirmay, gapni boshqa yoqqa burdi:

- Bizga shunchalik sodiq koʻringan odamlar hozir dushmanlarimizga xizmat qilyapti-ya! E, bevafo dunyo! Malikdod Koroniy ham, oshpazlar ham hammasi sotilgan! Lekin sen... dushmanlar bilan til uchida murosa qil-u dilingni otangga sodiq tut!
- Hali ham shunday, buvijon! pichirlab dedi Bahodir.

* * *

Nevarasi ketgandan keyin malika Bayda xastalik toʻshagini yigʻishtirdi, ilgarigi figʻon chekishlar va qargʻashlarni ham bas qildi. Uning fikr-u zikri – eng sadoqatli va tadbirkor odamlarini ishga solib, Boburni

zaharlab oʻldirishga qaratildi. Malikaning atrofida fotihlardan qasos olishga tashna odamlar koʻp edi. Bobur askarlari bilan toʻqnashuvlarda birining akasi, birining inisi oʻlgan, biri ilgarigi makoni va mavqeyidan ajralib xonavayron boʻlgan... Malika ana shunday qasoskorlarning eng ishonchlilarini izlay boshladi. Bobur ishga olgan toʻrt oshpazdan birining yolgʻiz inisi Panipat jangida halok boʻlgan edi. Malika zimdan surishtirib buni bilganda, quvonib ketdi. Biroq oʻzi bu oshpaz bilan bevosita aloqa qilishni lozim topmadi. Chunki malikani hamma taniydi. Bobur odamlari sezib qolishlari mumkin.

Ilgari sulton Ibrohimning saroyida bu oshpazlar bilan birga ishlagan va ularga qadrdon boʻlib qolgan eng ishonchli odam – Atovaga ketib qolgan Ahmad choshnagir edi. Malika Agradan ancha uzoq boʻlgan Atovaga maxsus odam yuborib, Ahmad choshnagirni oʻz huzuriga taklif qildi.

Ahmad choshnagir Agradagi hovlisi va mol-u mulkidan ayrilib, fotihlarga qarshi gʻazabga toʻlib yurar edi. Malika Bayda uni oʻz parganasiga ishga oldi, uy-joy va maosh berdi, soʻng asta-sekin koʻnglidagi niyatini aytdi. Ahmad choshnagir avval «uddalay olmayman» deb qoʻrqdi. Lekin malika unga dalda berdi, «inisi Panipatda oʻldirilgan oshpaz bilan gaplashib bersang boʻldi, qolgan ishni oʻzimiz qilamiz», dedi. Ahmad choshnagir saroyga qanday kirishni bilmas edi.

Buning yoʻlini ham malikaning oʻzi topdi. Malika Bayda nevarasidan xabar olish uchun saroyga borishi mumkin edi. Malika nafis shohi va parchalardan sovgʻalar tayyorlatdi, soʻng bu sovgʻalarni Ahmad choshnagirga koʻtartirib, saroyga bordi... Malika podsho qabuliga kirib chiqquncha Ahmad choshnagir eski qadrdoni boʻlgan oʻsha oshpazni topgan va u bilan ertasi kuni saroydan tashqarida uchrashishga kelishgan edi. Oradan bir haftacha oʻtgach, Ahmad

choshnagir oshpaz bilan til biriktirganini malikaga kelib aytdi.

- U ham kelgindilarni daf qilishning yoʻlini bilmay yurgan ekan. Podshohlari oʻlsa hammasi daf boʻladi deb ishontirdim!
- Agar hamma ish oʻylaganimizday boʻlsa, otasining taxtini Bahodirjon oladi. Oʻshanda sizga katta bir pargana beramiz. Oshpaz ham katta mukofot oladi.
- Ilohim shu niyatimizga yetaylik! Vatanimiz berahm fotihlardan xalos boʻlsin!
 - Omin!

Ahmad choshnagirning saroy oshpazi bilan kelishuviga binoan, Boburning ovqatiga solinishi kerak boʻlgan zaharni malika oʻzining eng ishonchli bir kanizidan berib yuborishi kerak edi. Endi ular mana shu nozik ishni qaysi kanizga topshirishni oʻylay boshladilar...

2

Uch oydan beri muttasil koʻtarilib borayotgan jazirama issiqlar hindcha ashora¹ deb ataladigan toʻrtinchi oyga kelib, juda avjiga chiqib ketdi. Yomgʻir faslining boshlanishiga hali salkam bir oy bor. Toʻrt oydan beri nam koʻrmay qurib yotgan yer issiqning zoʻridan tars-tars yorilib ketgan.

Jamna daryosining chap qirgʻogʻiga – ilgarigi tashlandiq yerlar va chakalakzorlar oʻrniga qurilayotgan Zarafshon bogʻida hali soya joylar kam. Bobur qurilishni otliq aylanib koʻrar ekan, uzangi temirining issigʻi etikdan oʻtib, oyogʻini jizillatib, uzib olayotganini sezadi. Oltin qoplangan egarning oftobda yaltirayotgan

¹ Ashora – javzo oyiga toʻgʻri keladi. Hindistonda yoz fasli bahorda hut oyidan boshlanib, toʻrt oy davom etadi. Keyin «Pashkol» deb ataladigan yomgʻirlar fasli boshlanib, bu fasl mezon oyigacha davom etadi.

qoshini ushlaganda, choʻgʻni ushlaganday boʻlib, qoʻli kuyar edi.

Shunday boʻlsa ham u issiqdan behalovat boʻlayotganini ketidan ergashib kelayotgan beklariga sezdirmas edi. Chunki bu beklar oʻlja tushgan xazinalardan katta-katta ulushlar olgandan beri salqin joylarga ketib, rohat-farogʻatda yashashga intilishar, Agra va uning atrofida yangidan imorat qurib, bogʻ-rogʻqilishga toqatlari yoʻq edi.

Kobul va Gʻazni kabi salqin joylarga tezroq qaytib ketishning yoʻlini izlayotgan beklardan biri margʻilonlik Xoʻja Kalonbek edi.

Bobur unga uzun oq yaktak kiygan, kichkina oq salla oʻragan moʻysafid me'morni koʻrsatdi-yu:

- Tanidingizmi? dedi.
- Andijonlik mavlono Fazliddinmi?
- Ha, Kobuldan biz bilan ketma-ket kelsin deb tayinlagan edim. Sangtarosh oʻgʻli bilan yetib kelib, mana shu bogʻning tarhini chizdi. Shundoq keksa odam chidagan issiqlarga nahotki biz bardosh bera olmasak?
- Lekin mijoziga issiq toʻgʻri kelmaydigan odamlar ham bor-da, hazratim. Kechagi bodi samumda¹ mening navkarlarimdan uchtasi tap-tap yiqilib jon berdi.
- Ajali yetgan boʻlsa, samum bir sabab boʻlgan, xolos, dedi Bobur va ta'zim qilib peshvoz chiqqan mavlono Fazliddinga yuzlandi. Hormang, mavlono...
 Qani, arzingiz boʻlsa eshitgali keldik.
- Arzim shuki, hazrati oliylari, bizga fil bilan ishlaydigan filbonlar kerak. Bogʻ oʻrtasidagi marmar qasr uchun Dehalpurdan juda ogʻir toshlar olib kelmoqchimiz. Bunday toshlarni katta arobalarga faqat fillar ortib berishlari mumkin.

Bobur Panipat jangida filbonlari bilan asir olingan suruv-suruv fillarni esladi. Soʻng devonxonaga

¹ Bodi samum - eng issiq garmsel shamol.

ishga olingan hindistonlik maslahatchisi Malikdod Koroniyga yuzlandi:

- Janob Koroniy, harbiy fillarni mehnatga oʻrgatish mumkinmikin?
- Mumkin, hazratim. Fil juda ziyrak jonivordir. Filbonlardan eshitganim bor. Fillar qonli janglardan koʻra osuda mehnatga tezroq oʻrganar emishlar.
- Bizning qoʻshinlar fil yordami bilan jang qilishga odatlangan emaslar. Shuning uchun Panipatda oʻlja olingan harbiy fillarni qurilishlarda ishlatmoq mumkin. Janob Koroniy, bu farmonni shu bugunoq barcha filbonlarga yetkazing!
 - Jonim bilan.

Koroniy buyruqni tezroq bajarish uchun hozir ketmoqchi edi, Bobur uni toʻxtatdi:

- Yana shahar-u qishloqlarga maxsus tavochilar yuboring. Biz Ibrohimdan oʻlja olingan boyliklarni obodonchilik yoʻlida sarflamoqchimiz. Shuni barcha viloyatlarga ma'lum qiling. Qurilishlarda ishlash uchun sizga oʻn besh ming korgar yetarlikmi, mavlono?
- Yetarlik. Lekin hazratim marmar qasr bilan tosh voyinni¹ bir yilda qurib bitirishni buyurgan edilar. Sangkorlik – tez boʻladigan ish emas...
 - Sangtaroshlarni koʻpaytirsak-chi? dedi Bobur.
- Men ham shuni iltimos qilmoqchi edim. Hindistonning havosiga Hirot-u Samarqanddagi gʻisht-u koshindan koʻra tosh-u marmar mosroqdir.
- Hozir qurilishlarimizda qancha sangtarosh usta bor. maylono?
- Agraning oʻzida olti yuz sakson sangtarosh ishlatmoqdamiz. Sekrida, Dehalpurda, yana boshqa joylarda jami ming toʻrt yuz toʻqson bir sangtarosh...
- Bu oz emas! dedi Bobur. Bobokalonimiz Amir Temur Samarqandda eng katta imoratlar qurdirganda,

¹ Voyin – katta hovuz.

turli mamlakatlardan ikki yuz sangtarosh borib ishlagan ekan. Tarixchi mulla Sharafiddin¹ buni favqulodda maqtab ta'riflagan ekanlar. Lekin Hindiston hunarpeshalarga shu qadar boyki, biz yuzlab emas, minglab usta-sangtaroshlarni ishga taklif etishimiz mumkin. Janob Koroniy, bizning qalamravimizdagi barcha shaharlarga jarchilar chiqaring. E'lon qilsinlarki, bizning qurilishlarimizga kelib ishlaydigan korgar-u ustalarga istaganlaridan ham ziyoda haqlar toʻlanur, imtiyozlar berilur. Din-u millat ayirish yoʻq. Barcha ustalar avvalo Xudoning, undan soʻngra bizning himoyamizda boʻlurlar!

Koroniy ta'zim bilan:

– Farmoni oliyga jonimiz fido! – dedi-da, otini burib, Agra tomonga yoʻl oldi.

Boshqa bek va mulozimlar tobora kuchayib borayotgan issiqdan betoqat boʻlib, daryoda langar tashlab turgan kemalarga qarab-qarab qoʻyishardi. Ular qurilishni koʻrib boʻlganlaridan keyin podshoh bilan birga shu kemalarga chiqib dam olishlari mumkinligini bilishardi. Shuning uchun qurilishga oid gaplar tugashini sabrsizlik bilan kutishmoqda edi. Lekin Bobur me'mordan boʻlajak qasr bilan daryo oraligʻiga tushadigan marmar hammomning gumbazi va ichi qanday boʻlishini soʻradi.

- Ichi xuddi Samarqanddagi Ulugʻbek mirzo hammomidek sangfarsh qilinur, dedi mavlono Fazliddin. Lekin gumbazi mirzo hammomining gumbazidan xiyla ulugʻ boʻlur. Devorlari qizil toshdan ishlanur... Marmarning bir xosiyati shuki, yozda muzdek salqinlik berur.
- Boʻlmasa, marmar imoratlarni tezroq quringki, biz bu jaziramada kuyib, kul boʻlmaylik! – dedi issiqdan boʻgʻriqqan Kalonbek.

¹ Sharafiddin Ali Yazdiy.

 Marmar imoratlar tezroq bitsin desangiz, otdan tushib, hashar qilishing, janob bek!
 deb tegishdi mavlono.

Bobur uning javobidan mamnun boʻlib kuldi-da:

- Qalay, mavlono, issiq oʻzingizni koʻp qiynamadimi?– dedi.
- Qiynasa ham chidaymiz-da. Mana shunday katta obidalarni Andijonda quramen deb, qurolmadim. Hirotda quramen deb, qurolmadim. Chizgan tarhlarim oʻttiz yil sargʻayib yotdi. Qarangki, butun umr qilgan orzularim uzoq Agraga kelganimda roʻyobga chiqadigan boʻlib turibdir. Taqdir-u nasibam shuni taqozo qilsa, issigʻi koʻzimga koʻrinurmi? Hindistoniy ustalar salqin tutadigan meva sharbatlari-yu yengil taomlar yeyishar ekan. Men ham shunga oʻrgandim. Ertalab salqinda turib, bir paxra¹ ishlaymen. Kun qiziganda bir paxra yotib, dam olgaymen. Issiqning tafti pasaygach, yana bir paxra ishlagaymiz.
- Biz boʻlsak, erta-yu kech sergoʻsht taomlar, qazi-yu kaboblar yeyurmiz, dedi Bobur Xoʻja Kalonga qarab. Yana bu yetmagandek, olovli maylar ichurmiz.

Xoʻja Kalon ot ustida oftobning tigʻida turib, shunday terlagan ediki, yuzi va peshonasidan sirqigan ter tomchilari mosh-guruch soqolidan oqib koʻkragiga tommoqda edi. Boburning oʻzi ham har nafas olganda ichiga havo emas, olov kirayotganday boʻlardi. U me'mor bilan gapini tugatgach, otini daryodagi kemalar tomonga burdi-yu, yeldirib ketdi.

Otlar tez yurganda qarshidan shabada esganday boʻlar va nafas olish yengillashar edi. Shunin uchun Boburning ketidan boshqalar ham otlarini tez hayday boshladilar. Shu tarzda daryo sohiliga yaqinlashar ekanlar, Xoʻja Kalonning navkari mingan badaxshoniy qora ot surinib, yiqilib tushdi. Badaxshonlik navkar

¹ Bir paxra – toʻrt soat.

oyogʻini otning tagidan tortib oldi-da, yuganni silkitib, otini turgʻizmoqchi boʻldi. Ogʻzidan qon aralash koʻpik kelayotgan ot bir-ikki talpinib koʻrdi, lekin oʻrnidan turolmadi.

- Buni ham oftob urdi! dedi Xoʻja Kalon alam bilan. Koshki bu mamlakatda ot topish oson boʻlsa!
- Janobi bek, bir ot uchun muncha iztirob chekmang, men buyuray, navkarlaringiz bizning taviladan bir ot olsin, dedi Bobur.
- Gʻoyat minnatdormen, hazratim! dedi Xoʻja Kalonbek. – Lekin gap faqat otda emas. Men bu oʻlimda oʻz istiqbolimni koʻrib, iztirob chekmoqdamen!

Bobur otdan tushdi-yu, daryoda langar tashlab turgan «Osoyish» nomli ikki oshiyonlik muhtasham kemani Xoʻja Kalonbekka koʻrsatib hazillashdi:

- Hozir sizga mana bu istiqbol muntazir! Yuring!

* * *

Qayiqlarga minib kemaga yetganlarida Bobur Xoʻja Kalonbekni kemaning tumshuq tomonidagi xonayi xosga boshladi. Kema daryo boʻylab suzib borar ekan, suvning shamoli eng avval shu xonaga tegar va ajib bir salqinlik berar edi.

Savdarlar daryoda sovitilgan norinj va limu¹ sharbatidan keltirdilar. Xoʻja Kalonbek muzday norinj suvidan bir chini kosa sipqardi-yu, nafasini sal rostlab, Boburning yuziga qaradi.

- Hazratim, siz ham qorayib, juda ozib ketibsiz,
 dedi. Bizga bildirmaysizu, lekin nechogʻlik qiynalib yurganingizni boshqalar sezmasa ham men payqaymen.
- Ha, endi... Siz bilan biz oʻttiz yildan beri birgamiz. Ne ranj-u ne mashaqqatlarni boshdan kechirmadik!

¹ Limu - limon.

Oʻshal gʻam-u alamlarga nisbatan hozirgi azoblarimiz – davosini topsa boʻladigan dardlar-ku.

Xoʻja Kalonbekni yana ter bosdi. U qoʻynidan ipak roʻmolcha olib, peshonasidan koʻziga oqib tushgan terlarini artar ekan:

- Afsuski, yoshim ketib qoldi, dedi. Yigitlikda issiq-sovuqni farq qilmas edik. Hozir ellikdan oshdik... Sezib turibmenki, Hindning bodi havosidan bir haftada bir yoshga qarimoqdamen. Eski beklardan Qosimbek qavchin bor edi. Bu yil keksayib, dunyodan koʻz yumdi. Bu ahvolda men ham koʻpga bormasmen, hazratim!
- Unday demang, janob Kalonbek. Issiqqa ham odatlanurmiz.
- Movarounnahrday salqin oʻlkalardan chiqqan odam hind issigʻiga oʻrganishiga aqlim bovar qilmaydir!
- Nechun? Asli Shahrisabzning lochin urugʻidan boʻlgan Xisrav Dehlaviy Hindda yetmish yil umr koʻrmish. Bunisiga ne deysiz?

Xisrav Dehlaviy – Xoʻja Kalonbekning sevimli shoirlaridan edi. Dehlidan oʻtganlarida, Kalonbek ham Bobur bilan birga Xisrav Dehlaviyning Nizomiddin Avliyo maqbarasiga qoʻyilgan qabrini ziyorat qilgan edi. Oʻsha yerda Kalonbek Dehlaviyning «Roʻy ba Hind ovardoni sohibdilon bechiz nest!» degan mashhur satrini eslagan, «Biz ham endi Hindga kelgan sohibdillardanmiz» degandek magʻrurlangan edi. U paytda hali issiqning tafti bunchalik baland emas edi. Xoʻja Kalonbekning Hindistondan qaytib ketish istagi ham hozirgichalik kuchli boʻlmagan. Bobur Dehlaviyni eslatish bilan Kalonbekning avvalgi ahdida turolmayotganini aytmoqchi edi.

Xoʻja Kalonbek buni payqab, tomoq qirdi:

- Hazratim, Dehlaviy ulugʻ odam boʻlgan, dedi.
- Mening ulugʻ odamlarga tenglashadigan qudratim yoʻq ekan...

– Siz yana avvalgi e'tiqodlaringizga zid gapirmoqdasiz. Maqsad ulugʻ odamlarga tenglashmoq emas, balki ularning nek ishlarini davom etkazmoq edi-ku. Bizni maftun qilgan hodisa – Xisrav Dehlaviyning qalbida turkiy ulusning qudrati bilan hind elining dahosini birbiriga payvand boʻlib, ulugʻ natija berganligi emasmidi?

Xoʻja Kalonbek e'tirozga soʻz topolmay tasdiq ma'nosida bosh irgʻadi va dasturxonda turgan limu sharbatiga qoʻl choʻzdi.

Ular Dehlaviy haqida ilgari ham koʻp soʻzlashgan edilar. Laxoʻr, Dehli va Agrada Dehlaviyning hind tilida bitgan qoʻshiqlarini musulmonlar ham, otashparast va butparastlar ham toʻy-tomoshalarda kuylab yurganlarining guvohi boʻldilar. Dehlaviy Boburdan ikki yuz yil oldin oʻtgan boʻlsa ham uning gʻazallari, kuylari, qoʻshiqlari xuddi bugun bitilganday yangi va ta'sirli edi. Bobur Dehlaviyning Hindistondagi barcha ellarni ahillikka da'vat etib ketganini, agar bu mamlakat din-u millat nizolaridan baland tursa va tarix maydoniga yakdil-u yaktan boʻlib chiqsa, jahonning eng ulugʻ qit'asiga aylanishi mumkinligini ayta boshladi.

Boburning bu gaplarni aytishdan maqsadi – Xoʻja Kalonbekni Hindistonda olib qolish edi. Lekin Xoʻja Kalonbek doʻstlari davrasida chogʻir ichib oʻltirganda: «Shu bu yil Hinddan ketmasam yuzim qora boʻlsin!» – deb qasam ichgan edi. Endi u qasamxoʻr boʻlib qolmaslik uchun ham Hindistondan ketishga intilmoqda edi. U Boburning nutqi va mantiqi juda zoʻrligini yaxshi bilar, Bobur keltirgan kuchli dalillarga jim turib quloq solar, lekin e'tiroz uchun qulay payt poylar edi.

Hindning qadimiy madaniyatini Beruniy qanchalik ulugʻlab yozganini bilursiz, - soʻzida davom etdi Bobur.
Bu elda iste'dod-u salohiyat konlari hozir ham

beadad. Faqat inqirozli davrlar bu konlarni berkitib ketmishdir. Biz bu konlarni qaytadan ochmogʻimiz mumkin. Hunarmandlar behisob. «Ish topib bersangiz qilgʻaymen», deb muntazir turgan qurur-qurur¹ zahmatkashi bor. Xazinalarini oʻzingiz koʻrdingiz. Aholisi-yu boyligining ulkanligini yana shundan bilsa boʻlurki, bizda yoʻq raqamlar bularda bor. Yuz qurur – bir arb². Yuz arbni qarb derlar. Yuz qarbni nil³ derlar. Yuz nil – padam⁴. Birgina Dehli viloyatidan har yili davlat xazinasiga tushadigan daromad uch qurur-u oltmish toʻqqiz lak-u ellik ming tangadan ortiq. Bunday viloyatlar Hindistonda ozmi? Siz shu viloyatlardan qaysi birini ma'qul koʻrsangiz, shunisini beraylik.

- Hazratim, menga Gʻaznini inoyat qilsangiz, marhamatingizdan umrbod minnatdor boʻlur edim.
- Yana Gʻazni deysiz-a! Gʻaznida nechogʻlik tangdastlik bilan kun kechirganlarimiz esingizdan chiqdimi? Mahmud Gʻaznaviyning buzilgan bandini tiklaymiz deb, uddasidan chiqolmagan edik. Odam topsak, mablagʻ topilmas edi, mablagʻ topsak, yana biron narsa yetishmas edi. Bu yerda hammasi bor. Kuch-u qudrat ummonday cheksiz!
- Lekin bu ummon mendek... musofirni nomnishon qoldirmay yutib yuborishidan qoʻrqamen!

Xoʻja Kalon «mendek musofirni» deb faqat oʻzi haqida gapirayotganday koʻrinsa ham, aslida u Bobur bilan kelgan barcha vatandoshlarini nazarda tutmoqda edi. «Bu ulkan mamlakatga bir urvoq ham boʻlolmaymiz, katta xalqqa aralashib yoʻq boʻlib ketamiz, undan koʻra oladigan oʻljamizni olib, shimolga tezroq qaytib ketaylik», deb yurgan beklar yolgʻiz Xoʻja Kalon emas edi. Bobur shuni oʻyladi-yu:

 $^{^{\}scriptscriptstyle 1}$ Qurur – yuz lak, ya'ni o'n million.

² Arb - milliard.

³ Nil - trillion.

⁴ Padam - kvardillion.

- Magsad nom-nishon goldirish boʻlsa, dedi, odam shu maqsadga oʻzini fido qila bilishi kerakmi, yoʻqmi? Biz oʻrgangan salqin bogʻlar, ravon ariqlar bu yerda yoʻq. Uzum yoʻq, qovun yoʻq, yax yoʻq. Yaxshi ot voʻq. Sulton Ibrohimdek podshoning sarovida sham-u shamdon ishlatilmas ekan. Yuz-ikki yuz charogʻbon davtivlar tirik shamdon boʻlib xizmat qilar ekanlar. Chap iliklariga sepoya bor chirog'ni tutib, o'ng iliklariga yogʻ solingan kaduni koʻtarib, ulugʻlariga chirog' kerak bo'lganda o'trularida shamdonga o'xshab turar ekanlar... Men buyurdimkim, hunarmandlarga bizning shamdonlar-u qandillarni koʻrsatib, shundaylarini yasatsinlar. Bir oy oʻtmay saroyga yetgulik shamdon-u qandil tayyorlandi. Shamgarlik ham joriy etildi. Tok ektirdim, nasib qilsa hind uzumini ham ermiz. Bugun koʻrib kelgan bogʻimizning oʻrni qanchalik besafo yerlar boʻlganini koʻrgan edingiz. Oʻlmasak, ushbu yerda Samarqand-u Hirotning eng mashhur bog'-u chorbog'laridan ham go'zalroq bog'lar, ko'shklar barpo etilganini koʻrurmiz. Samarqand-u Hirotda inqirozga yuz tutgan madaniyatni biz endi hind madaniyatiga qoʻshib yuksaltira olsak... Shuning hammasi bizdan nom-u nishon bo'lib, avlodlar xotirasida qolmasmi, bek?
- Hazratim, niyatlaringizning ulugʻligiga tasanno ayturmen. Lekin Vatanimizda qilmagan nek ishlarni begona yurtda qilsak, kim buning qadriga yetur? Ne qilsangiz ham biz kelgindi fotihlarmiz. «Bular yigitlarimizni jangda oʻldirib, kishvarimizni zoʻrlik bilan olgan», deb ta'na qilmaslarmi? Paytini topganda qasos olmaslarmi?

Bobur ogʻir «uf» tortdi-yu:

- Ne qilay? - dedi. - Men shu orzularni Vatanimda roʻyobga chiqaray deb ozmuncha olishdimmi?

– Sizdan oldin Hindistonni fath etgan Mahmud Gʻaznaviy katta oʻljalar olib, kerakli hunarpeshalarni Gʻazniga olib ketib ishlatgan. Ana!...

- Nahotki siz mening Mahmud Gʻaznaviyga oʻxshashimni istarsiz?
 - Gustohligim uchun ma'zur tuting!
- Axir biz mamlakatni talab, boyliklarini-yu hunarpeshalarini olib chiqib ketadigan qaroqchilar emasmiz-ku!
- Bir she'ringizda oʻz yerimizni qoʻyib, Hind sari yuzlanganimizni yuzi qarolik deb atagan emasmidingiz, hazratim?
- Atagan boʻlsam, endi yuzimizga tekkan qaroni yuvib tashlash harakatidamen! Agar biz ham Xisrav Dehlaviydek shu mamlakatga farzand boʻlsak, butun aql-u zakovatimizni unga baxsh etsak, aminmenki, kelajak avlodlar oldida yuzimiz yorugʻ boʻlgʻusidir!

Xoʻja Kalonbek munozara yoʻli bilan Boburga soʻzini oʻtkazolmasligini endi aniq sezdi.

Hazratim, sizning metin irodangiz bor, – deb endi Boburni maqtab yumshatishga tirisha boshladi. – Sizning boshingizga tushgan kulfatlar boshqa odamning boshiga tushsa, bardosh berolmas edi. Lekin siz hammasiga bardosh beribgina qolmay, yana shunday ulkan ishlar qilmoqchisizki, bunga jahon tahsin oʻqigʻusidir. Yillar oʻtgan sari men sizning ulugʻ bir siymo ekanligingizni tobora aniq sezmoqdamen. Mana hozir ham sizning yoningizda xuddi ulkan togʻ choʻqqisining domonasidagi kichik bir tepachadek, oʻzimga-oʻzim ojiz koʻrinib ketdim.

Xoʻja Kalonbek ovozi hayajondan titrab, koʻzi alamdanmi, oʻksinishdanmi chaqnab gapirmoqda edi. Buni koʻrgan Bobur uning koʻnglini koʻtargisi kelib, Dehlaviyning bir satrini eslatdi:

- «Asli kas az kas naboshad kam chu jumla az odamand» ¹.
- Lekin besh qoʻl barobar emas, hazratim... Mening ahvolim oʻzimga ma'lum. Siz koʻtargan ulugʻ yukka yelkamni tutsam, mayib boʻlurmen. Meni besh-olti yil tirik yursin desangiz, ruxsat bering, Gʻazniga boray. Mahmud Gʻaznaviydan qolgan oʻsha eski bandni tiklatib, choʻlni obod qilay. Bu ishning butun savobini sizga bagʻishlay.

Bobur bu soʻzlarga e'tiroz qilmay, oʻylanib qoldi. Xoʻja Kalonbek koʻzlagan maqsadiga yetkazadigan yoʻlni endi topganini sezdi-yu, shosha-pisha soʻzida davom etdi:

- Hazratim, iltimosimni qabul eting! Umrimning oxirida duoi joningizni qilib orom olay. Oʻlsam, jasadimni Gʻazniga qoʻysinlar. Harna Vatanimizga yaqinroq boʻlgʻaymen.

Bobur Xoʻja Kalonbekning koʻzi namlanganini koʻrdi-yu, oʻzining Humoyunga tayinlagan bir gapi esiga tushdi: «Urushda qon kechib yuribmiz, mabodo vafot etsam, meni Kobulga eltib koʻmgin» degan edi Bobur. Xoʻja Kalonbek ketsa, ular yana diydor koʻrisha olarmikinlar? Shu oʻy ta'sirida Boburning ham koʻngli buzilib, ovozi tovlanib eshitildi:

- Ketingizdan boshqa bek-navkarlar ergashsa... men kim bilan qolgʻaymen?
- Hamma beklar bilan oʻzim gaplashurmen, «podshoh Gʻaznidagi bandni tiklash uchungina ruxsat berdilar», dermen. Hech kim menga ergashmaydigan qilib ketgaymen, bunga ishoning!

Bobur Hirotga, Tabrizga, Balxga, Andijon-u Toshkentga odamlar yuborgan, «kimda-kim bizga xayrixoh boʻlsa, Hindistonga kelsin, ulufalar berurmiz,

¹ Aslida odam odamdan kam emas, chunki hamma ham Odam Ato farzandidir.

ne istaklari boʻlsa ado eturmiz» degan qadagʻalar¹ yoʻllagan edi. Kobuldagi dorugʻalar keluvchilarning sarf-u xarajatlari uchun maxsus mablagʻlar olgan edilar.

- Boʻlmasa, siz ham... qayerdaki qizilboshlar bilan shayboniyzodalardan bezgan olim-u hunarmand, bek-u navkar koʻrsangiz, bizning nomimizdan ayting, kelsinlar! dedi u Xoʻja Kalonbekka.
- Jonim bilan ayturmen, toki mendek ketganlarning biri oʻrniga yuzi kelsin!

Xoʻja Kalonbek Boburga bu gaplarni chin dildan aytganday koʻringan edi. Ammo Hindistondan ketishga ijozat olgandan keyin Boburga oʻzini ayanch koʻrsatib yalingani uchun alami keldi. U bek doʻstlari oldida ichgan qasamini qoyillatib bajarganini hammaga namoyish qilgisi, Hindda qolayotganlarni kuydirib ketgisi keldi-yu, Agrada yashagan uyining devoriga bir bayt she'r yozib qoldirdi:

Agar bayxayri salomat guzar zi Sind kunam, Siyoro'y shavam, gar havoyi Hind kunam².

Xoʻja Kalonbekning uyiga koʻchib oʻtgan Hindubek bir kun kechki payt bu she'rni yozib kelib, Boburga koʻrsatdi va baytni oʻqigan odamlar hamma joyda shov-shuv gap qilib yurganini aytdi.

Bobur Xoʻja Kalonning «Hech kim menga ergashmaydigan qilib ketgaymen!» degan soʻzlarini esladi-yu:

– Bu kudurat nechun? – deb hayron boʻldi. – Nahotki, Xoʻja Kalon boshqa beklarning ham Hinddan ketishini istasa?

¹ Qadagʻa – chaqiriq xat.

² Yaxshilik va salomatlik bilan Sind daryosidan oʻtib olganimdan keyin agar yana Hindni havas qilsam, yuzim qaro boʻlsin.

- Bilmadim, bu yerda qolgan beklarning fidoyiligi Xoʻja Kalonbekning alamini keltirganmi?
- Ha, oʻzi shunday fidoyi boʻlolmaganining alami bu! - dedi Bobur va qarsak chalib, munshini chaqirdi.

Munshi kelguncha oʻrnidan turib, xonayi xosning u burchagidan-bu burchagiga asabiy bir tarzda borib keldi. Bir koʻngli Xoʻja Kalonning ketidan chopar yuborib, uni Gʻazni hokimligidan bekor qilishga moyil edi. Lekin shuncha yillik qadrdonidan ayrilish, keyin Gʻaznidagi vayron boʻlib yotgan bandni tiklash uchun yana boshqa odam izlash tashvishi uni bu fikrdan qaytardi. Nima qilish kerak? Xoʻja Kalonning she'ri Hindistondan ketgisi kelib yurgan bek-u navkarlarni battar qoʻzgʻatib qoʻyishi aniq. Agar bu bayt uchun Xoʻja Kalon jazolansa, she'rning ta'siri yanada oshishi aniq.

- Bu bayt devorga yozilganicha turibdimi? soʻradi Bobur Hindubekdan.
 - O'chirtirib tashladim.
- Bekor qilibsiz, bek. Siz oʻchirganingizdan soʻng bu bayt odamlarning xotirasiga yanada mahkamroq oʻrnashur, she'rning ta'sirini faqat she'r bilan kesmoq mumkin.

Qoʻlida qalam-qogʻozi bilan xipcha boʻy, oʻrta yashar munshi ta'zim qilib kirdi.

- Yozing! - buyurdi Bobur unga.

Munshi gilam ustiga choʻkka tushib, juzdonni tizzasiga qoʻydi, qogʻozni kafti bilan tekislab, yozishga tayyorlandi.

Bobur badiha ohangida gapirdi:

- Yuz shukr de, Boburki, karim-u gʻaffor Berdi senga Sind-u Hind-u kishvari bisyor.
- «Kishvar» soʻzi vaznga tushmay saktalik berganini sezdi-da, ikkinchi satrni boshqacha qilib takrorladi:

Berdi senga Sind-u Hind-u mulki bisyor. Issiqligʻiga gar senda yoʻqdur toqat, Sovuq yuzin koʻray desang Gʻazni bor.

Mushoiraning nozik qoidalariga moslab birpasda yaratilgan bu badiha Hindubekning zavqini keltirdi. U devorga sovuq gap yozib ketgan Xoʻja Kalonbekning basharasi ham Boburga nechogʻliq sovuq koʻringanini oʻzicha tasavvur etib, beixtiyor kulib yubordi. Bobur otgan oʻqining nishonga tekkanini shu zavqli kulgidan sezdi-yu, yengil bir soʻlish olib, munshiga buyurdi:

– Badihani uch nusxa koʻchiring. Bir nusxasini Xoʻja Kalonbekning ketidan joʻnatsinlar. Hindubek, bir nusxasini siz olib, Kalonbekning baytini oʻqigan bek-u navkarlarga bering. Koʻrsinlar-chi, mushoirada kim gʻolib?

Bu badihani oʻqigan koʻpchilik bek va mulozimlar Xoʻja Kalonbekni kulgi qilishib, «Sovuq yuzin koʻray desang Gʻazni bor!» deydigan boʻlishdi. Issiqdan toqatsizlanib noliydiganlarga ham: «Sovuq yuzin koʻray desang Gʻazni bor!» deb istehzo qilish rasm boʻldi.

3

Panipatda ogʻir yarador boʻlgan Tohir uch oygacha oʻrnidan turolmay yotdi. Saroydan yuborilgan tabib uning etidagi yaralarni durust muolaja qildi-yu, lekin qovurgʻa va qoʻl suyaklarining mayda-mayda boʻlib singan joylarini epaqaga keltirolmadi. Singan suyaklarning ogʻrigʻi tun-u kun tinchlik bermas edi. Tohir Agrada oʻsha eski qadrdoni Mamat bilan kichik bir hovlichada turar, «endi bu yerdan oʻligim chiqsa kerak», deb oʻylar edi. Shuning ustiga Kobuldan mavlono Fazliddin Tohirning muhandis oʻgʻli Safarbekni boshlab kelib qoldi. Ular qurilishda birga ishlaydigan hind sangtaroshlaridan soʻrab-

surishtirib, agralik bir jarrohni topib keldilar. Jarroh kambagʻalparvar odam ekanini eshitgan mavlono Fazliddin jiyanini unga tanishtirar ekan:

- Sohib Bayju, dedi. Tohir ham aslida zahmatkash bir dehqon edi. Men buning navkar boʻlishiga qarshi edim...
- Oʻshda siz haq gapni aytgan ekansiz, mulla togʻa, dedi Tohir. Men berahmlar orasida yurib berahm boʻlib ketgan ekanmen... Boʻlmasa, yigirma yillik qadrdonim Mamatga shunchalik shafqatsizlik qilarmidim? Mana, hammasining qasosi qaytdi. Hali ham Mamat odamgarchilik qildi. Boʻlmasa otlarning oyogʻi tagida qolib, majaqlanib ketardim!

Mavlono Fazliddin Mamatning bu yaxshiligini kelgan kunlari eshitgan va uni bogʻ qurilishiga ishga olgan edi. Mavlono buni tabibga forscha aralash urducha tilida hikoya qilib berdi-da:

- Jiyanim ham endi beklig-u navkarlikni tashlamoqchi, – dedi. – Siz-u bizdek tinch mehnat bilan kun koʻrmoqchi. Bunga yordam beraylik!
- Bilaman, siz bizning yurtimizga obodonchilik qilish uchun kelgansiz, sohib, - dedi Bayju, - Siz iltimos qilganingiz uchun jiyaningizga qoʻlimdan kelganicha yordam beraman!

Tabib aytganini qilib, Tohirni bir oy astoydil davoladi. Bayjuning sezgir qoʻllari qaysi suyak qayeridan qanday singanini bexato aniqlab, hammasini mohirlik bilan joy-joyiga qoʻyib chiqdi. Bir oy davomida Tohir uning kafti oqish-koʻkimtir, usti qora mayin panjalariga xuddi oʻz qoʻllariga oʻrganganday oʻrganib ketdi. Keyin tuzalib oʻrnidan turgan kuni Bayjuning shu panjalarini qoʻllariga olib, koʻziga surdi:

- Ayting, sohib, men bu yaxshiligingizni qanday qaytaray?
- Jarrohning qoʻlini shunchalik e'zozlab koʻzga surganingiz yaxshiligimning qaytgani emasmi?

- Yoʻq, men sizdan umrbod qarzdormen!
- Kim bilsin, balki men oʻzim hozir bir qarzimni uzgandirman?

Mavlono Fazliddin ham shu yerda turgan edi. U tabibning allanimani «Aytaymi, aytmaymi?» – deb ikkilanayotganini koʻrdi-yu:

- Sohib Bayju, siz nechun oʻzingizni qarzdor sezdingiz? dedi.
- Buning tarixi uzoq... Faqat iltimos qilaman, boshqa hech kimga aytmangizlar.
 - Iltimosingizni bajonidil qabul qildik!
- Mening bir filbon akam bor. Ibrohim Lodi zamonida akam Agradan ish topolmay Panjobga ketgan edi. Oʻsha yerda qoʻshinlaringiz qancha odamlarimizni qirganini eshitipti. «Bularni Vatanimga kirgizmayman», debdi-yu, qoʻshinlaringizni adashtirib, changalzor botqoqlikka boshlabdi.
- E, boʻldi, boʻldi! dedi Tohir filbon rahnamo La'l Chandni eslab. – Bizning ikkita navkarimizni filiga urdirib, mayib qilib ketgan edi... Ammo men oʻshanda uning dovyurakligiga qoyil boʻlgan edim. Bir oʻzi bir qoʻshindan qoʻrqmay olishgan edi-ya!.. Biz uni changalzor botqoqlikdan chiqolmaydi, deb oʻylagan edik. Chiqibdimi-a? Hozir tirikmi?
- Tirik, lekin endi Agraga kelishdan qoʻrqadi...
 Akam oʻsha navkarlaringni mayib qilgani... yaxshi boʻlmagan... Ehtimol, men sohib Tohirni davolaganim
 oʻsha gunohimizni yuvib ketgandir?
- Siz akangiz qilgan ishni gunoh deb atamang, sohib Bayju! – e'tiroz qildi mavlono Fazliddin. – Vatanni bunday bahodirona himoya qilish gunoh emas, balki sharafdir!
- Yaxshi soʻzlaringiz uchun rahmat, sohib! Ammo oʻsha ishi tufayli akam hamon ishsiz. Oʻz Vatanida bekinib qochib yuribdi. Bola-chaqasi och-yalangʻoch.

- Akangiz qurilishda ishlaganmi?
- Ha, fil bilan doim qurilishda ishlar edi.
- Boʻlmasa menga uchrasin, ish topib beray. Biz hatto harbiy fillarni mehnatga oʻrgatmoqdamiz-ku!
- Akam buning hammasini eshitgan. Ibrohim Lodi bekitib yotgan oltinlarni sizlar endi qurilishga sarflayotganlaringizdan mamnun. Ammo qoʻlga tushib qolishdan qoʻrqadi.
- Balki akangizning Agraga kelmagani toʻgʻridir. Bu yerda bek-u mulozimlar koʻp, tanib qolib, bir balo qilishlari mumkin. Akangiz a'yonlar kam boradigan chet joydagi qurilishga kelsin. Men juma kuni Dehalpurga boraman. Istasa, oʻsha joyga borsin.
- Sohib, sizni podsholaringiz hurmat qilar emishlar, eng katta qurilishlarning sarkori ekansiz. Podshohdan akamning gunohini soʻrab, shafoat olib berolmaysizmi? – Oʻshanda biz bexavotir yurar edik.

Mavlono Fazliddin oʻylanib turdi-yu:

- Sizni bunga ishontirolmayman, Bayju, dedi. Chunki podshohning joniga qasd qilgan odamlarni ayovsiz jazolash haqida farmon chiqarilgan. Bobur mirzo shu farmonga imzo chekkanlar. Oʻzlari sohibdil shoir, ma'rifatlik inson boʻlsalar ham podshohlik bilan fotihlik u kishini murakkab ziddiyatlarga duchor qilgan. Oʻshanda La'l Chand uni askarlari bilan adashtirib, yoʻq qilib yubormoqchi boʻlgani esiga tushsa, qahr ustida qatl ettirib yuborishi mumkin.
- Bu rost, dedi Tohir togʻasining soʻzini ma'qullab,
 Hatto men... endi saroyga xizmatga qaytishdan choʻchiymen. Bobur mirzoni chin dildan yaxshi koʻrsam ham uning shafqatsiz muhitidan uzoqroq yurgim keladi.
- Undoq boʻlsa, endi mening akam najotni faqat sizdan kutadi, mavlono Fazliddin!
- Men unga qoʻlimdan kelgan yaxshilikni qilishga tayyormen. Kelgusi juma Dehalpurga kelsin. Faqat...

oʻzini... Sizning nomingiz bilan atasin. Iloji boʻlsa qiyofasini sal oʻzgartirsin.

- Akamning oʻzi ham soch-soqol oʻstirib, tanish qiyin boʻlgan qiyofaga kirgan.
- Juda soz. Balodan hazar deydilar. Fili bilan qurilishda ishlab, oʻzini oʻnglab olsin, soʻngra yana kengashib koʻrurmiz!

Tabib Bayju akasi La'l Chandni kelgusi haftada Dehalpurga mavlono Fazliddin oldiga yuboradigan bo'lib ketdi.

4

Agrada sershamol yomgʻir fasli boshlangan saraton kunlarining birida Tohir saroyga Boburning huzuriga keldi.

Devoni xosning marmar ayvonida oʻtirgan Bobur uni zoʻrgʻa tanidi – Tohirning soch-soqoli oqarib ketgan. Yuzidagi chandiqdan tashqari, engagi aralash boʻyniga goʻyo katta bir yamoq tushgan.

- Xayriyat, tuzalib ketibsiz, deb Bobur uning koʻnglini koʻtaradigan gap izladi.
 - Ha, mulla togʻam jonimga ora kirdilar...
 - Endi qalay, avvalgi xizmatga qaytmoqchimisiz?

Tohirning oʻng qoʻli zaif, boʻyni ham durust qayrilmaydigan boʻlib qolgan, yon-veriga qaramoqchi boʻlsa, butun gavdasini burib qarar edi.

- Men endi qoʻrchilikka yaramasmen.
- Boʻlmasa ichki beklar qatorida yuravering.
- Lekin men beklikni eplolmadim... Panipatda oʻzimdan oʻtdi.
 - Nechun?

Tohir jang boʻladigan kuni azonda qanday sabuhiy qilganini, otdan qanday yiqilganini va qadrdon navkarini qanday shafqatsizlarcha urganini bir-bir aytib berdi. – Bek boʻldim, deb magʻrurlanib zolim boʻlib ketgan ekanmen. Oʻlim toʻshagida yotib oʻzimni tanidim. Menga beklik... toʻgʻri kelmas ekan, hazratim. Oʻzim ham endi mayib odammen. Ijozat bering, mulla togʻam tarhini chizgan bogʻda suvchimi, gulchimi boʻlib qolay... Bir vaqtlar Quvada kichkina bogʻchamizdagi dov-daraxtlarni sugʻorishni yaxshi koʻrar edim...

Bobur ayvonning jimjimalik marmar ustunlari ortidan suzib oʻtayotgan yomgʻir bulutlariga tikilib ogʻir xoʻrsindi. U Tohirga yaxshilik qilmoqchi boʻlib beklik unvonini bergani oxir-oqibatda yomonlik boʻlib chiqqan edi.

- Siz-ku beklarning kasofat muhitidan suvchi boʻlib qutulmoqchisiz. Lekin men qandoq qutulgaymen?
 - Bu savol Tohirni shoshirib qoʻydi.
- Siz... podshohsiz, hazratim. Beklar sizning itoatingizdalar.
- Itoatimda boʻlib itoat etdirurlar... Bularning shunday girdoblari borki, sal bexabar qolsangiz gʻarq qilib yuborurlar... Men Soʻxda sizga aytgan gaplarim esingizdami?
- Men u soʻzlaringizni hech vaqt unutmasam kerak...
- Oʻshanda, siz, umrbod huzuringizdan ketmasmen, degan edingiz-ku!
- Hazratim, men u vaqtda sogʻlom yigit edim... Hozir ahvolim bu...
- Saroyda mening xilvatxonamga qaraydigan durust odam yoʻq. Shu ishni siz olsangiz. Xilvatxona Boburning yolgʻiz oʻtirib ijod qiladigan joyi ekanini Tohir bilar, Bobur hayotining eng dilkash tomoni uning ijodida ekanini sezardi. Lekin saroyning murakkab, boʻgʻiq muhitidan koʻngli qolgan Tohir bogʻda, togʻasining yonida ishlashni istardi.
- Hazratim, qulingizni ma'zur tuting. Men bogʻda ishlaymen, deb ahd qilgan edim...

– Bogʻda ham xilvatxona boʻlur, – dedi Bobur. – Qurib bitirilsa, unga ham siz qaragaysiz. Ma'qulmi?

Endi «yoʻq» deyishning iloji qolmadi. Boburning soʻzini ikki qilib oʻrganmagan Tohir qoʻlini koʻksiga qoʻydi-yu, rozilik berdi.

* * *

Agra qal'asidagi xilvatxona devoni xos bilan podshoh oshxonasining oralig'ida edi. Bir oydan beri davom etayotgan yomg'ir fasli hali-beri tugaydiganga oʻxshamas, ba'zi kunlari besh-oʻn martadan jala quyib oʻtardi. Yogʻin-sochinli kunlarda Bobur koʻproq Agrada ishlaydi. Xilvatxona – ichma-ich qurilgan uch xonadan iborat. Bu xonalarning mayda-chuyda ishlarini toʻrtta savdar qiladi, lavozimi «oftobachi» deb ataladigan Tohir ularga boshliq. Eng ichki xonada qogʻoz, qalam va Bobur tayinlagan kitoblar turadi. Berigi xonaga dasturxon solinib, Bobur xush koʻradigan gulob, norinj sharbati, anba mevasi,¹ qayla², tanbul bargi³ va magʻzi qizil fufal yongʻogʻi qoʻyilgan.

Bir kuni Tohir dasturxonga eng toza Gʻazni chogʻiridan ham bir koʻzacha qoʻydirgan edi, Bobur:

- Chogʻir majlisi xirgohda boʻldi, bas, - dedi.

Shundan keyin Tohir xilvatxonaga ichkilikni yoʻlatmaydigan boʻldi.

Bobur ichki uyda tuni bilan ishlasa Tohir ham tong otguncha uxlamay, uning tinchini qoʻriqlab chiqar edi. Uning tashqi xonada uygʻoq oʻtirishini biladigan Bobur goho ichkaridan chiqib kelib, gʻalati savollar berardi:

- Badaxshonda archazorlarda nafis bir oʻt boʻlur edi, esingizdami? Dahkat atrofida, Osmon Yaylovda

¹ Anba – ananasning bir turi.

² Qayla – banan.

³ Tanbul bargi – apelsin bargiga oʻxshab ketadi. Fufal yongʻogʻi bilan birga ogʻizga solib chaynalsa kayf beradi, tishni mustahkamlaydi.

ham moʻl edi. Rangi havorang. Men bir daftarga yozib qoʻygan edim... Kobulda qolganmi? Yoʻq.

- Ot eydimi?
- Ha, yaxshi eydi. Boʻyi past-past, yerdan toʻp-toʻp boʻlib chiqur.
 - Betakamikin?
- Ha, ha, betaka ham derlar, lekin asli butaka! Buttalab oʻsgani uchun butaka der ekanlar. Men buning vajhi tasmiyasini¹ Badaxshonda eshitgan edim.

Bobur qidirgan soʻzini topganidan mamnun boʻlib ichkariga kirib ketdi. U Tohir bilan birga koʻrgan joylari, birga boshdan kechirgan voqealarining mana shunaqa tafsilotlarini soʻrab, aniqlab olgan kunlari Tohirning ham koʻngli koʻtarilib yurardi. U Boburning oʻz koʻrgan-kechirganlari haqida katta kitob yozayotganini eshitgan edi. Endi Tohir ham shu kitobning yozilishiga bir qadar ishtirok etayotgani uchun «harqalay, bu yerda oʻtgan kunlarim zoye ketmaydiganga oʻxshaydi», deb qoʻyardi. Bir kun tun yarimlaganda, Bobur xilvatxonadan xomush boʻlib chiqdi-yu, hazin tovush bilan bir toʻrtlik oʻqib berdi:

Koʻpdan berikim yor-u diyorim yoʻqdir, Bir lahza-yu bir nafas qarorim yoʻqdir. Keldim bul sori oʻz ixtiyorim birla, Lekin borurimda ixtiyorim yoʻqdir.

Bu satrlar Tohirning sogʻinch tuygʻularini shunday qoʻzgʻatdiki, koʻpdan beri koʻrmagan Robiyasini qoʻmsab, oʻpkasi toʻldi.

- Bolalar bilan qachon diydor koʻrisharkinmiz-a, hazratim?
- Yoʻllar hali notinch. Haram uchun xatar koʻp. Bu yoqda Rano Sango bizdan norizolarni atrofiga toʻplab, kuch yigʻmoqda emish...

¹ Vajhi tasmiyasi – shunday deb atalish sababi, etimologiyasi.

«Bizdan norizolar» degan soʻzlar Tohirga mana shu qal'a hovlisida oʻtgan kuni yuz bergan bir fojiani eslatdi. Hind ustalari, pashkol paytida yer qazib boʻlmaydi, ishni toʻxtaylik, deyishdi. Lekin sarkor bunga koʻnmadi: «Biz voyinni olti oyda qurib bitirishga soʻz berganmiz, yomgʻir fasli ikki oy davom etsa, keyin qachon ulgurgaymiz? Podsho hazratlari bizni yolgʻonchi demaslarmi? Yomgʻir pisandmas! Qaytaga salqin boʻldi! Ishlayveringlar!» Xullas, sarkor yer qazuvchilarni majbur qilib ishlata boshladi.

Muttasil yogʻib turgan yomgʻirlar yerni ivitib, hilvirlatib qoʻygan edi. Oʻtgan kuni yer qazuvchilar oʻn quloch chuqurlikdagi chohning tubida ishlayotganlarida jarday chuqur havzaning bir tomoni oʻpirilib tushdi-yu, toʻrt odamni bosib qoldi. Ularni loy aralash tuproq tagidan kavlab olgunlaricha uchtasi allaqachon jon bergan, toʻrtinchisi tirik boʻlsa ham beli sinib, mayib boʻlgan edi.

5

Xilvatxonadan sal narida – saroy oshxonasida ovqat pishirib yurgan Bahlul ismli oʻrta yashar bir oshpaz ham voyinning chohi tagida jon bergan yer qazuvchilarni koʻrgan edi. Bu fojia oshpazga Panipat jangida fotihlarning qilichidan halok boʻlgan yigirma yashar suyukli inisini eslatgan va qalbidagi intiqom tuygʻusini yana junbishga keltirgan edi. Ahmad choshnagir malika Baydaning kanizlaridan birini oraga qoʻyib, zaharni shu Bahlulga yetkazib bergan edi. Malika Baydaning yana bir kanizi kelib, rejani hozirgi pashkol kunlarda – Bobur biron yoqqa yurishga ketib qolmasidan oldin amalga oshirish kerakligini aytgan edi.

Toʻrt buklangan oq qogʻoz ichida ziravorga oʻxshab turgan zahar ikki misqolgina boʻlsa ham Bahlulga zoʻr bir poʻlat quroldek ogʻir tuyilardi. U jangda vatanini himoya qilib jon bergan inisining oʻchini shu qurol yordamida olishni va fotihlarni bu yerdan tezroq quvishni istar edi. Agar Bobur oʻldirilsa, fotihlar Hindistonda turolmay ketib qolishlariga Ahmad choshnagir Bahlulni ishontirgan edi.

Podshoh oshxonasida har bir taomni tekshirib tatib koʻradigan maxsus bakovullar boʻlar edi. Qattiq yomgʻir yogʻayotgan kuni kechqurun shu bakovullar aroq ichib, mast boʻlib qolishdi. Qozonda karundi daraxtining nordon mevasidan qoʻshib tayvorlangan mazali qayla pishib turibdi. Bobur bu qaylani yaxshi koʻrishini Bahlul bilar edi. U sekin qoʻyin choʻntagiga qoʻl solib, toʻrt buklogʻliq qogʻozni oldi. Oshxonada hech kim yoʻq. Bakovullar narigi xonada mast boʻlib, ashula aytishyapti, shamol aralash yomgʻir yogʻyapti. Bahlul zaharni qozonga solmadi - bakovullarning arogga qaylani gazak qilish odatlari bor, yeb koʻrishsa, zaharlanib, bildirib qoʻyishlari mumkin. Shuning uchun oshpaz zaharni Bobur ovqat yeydigan chinni laganga yupqa lochira non ustiga sepa boshladi. Birdan shamol tashqi eshikni qarsillatib yopti. Bahlulga kimdir kelayotganday tuvildi-yu, zaharning golganini gozon tagida vonib turgan olovga otdi. Kevin chinni lagandagi zahar sepilgan lochira ustiga tez-tez gavlani soldi.

Oradan sal vaqt oʻtgach, savdar kirdi, quyon goʻshtidan qilingan qovurdoqni va qayla solingan chinni laganni Bobur ovqat yeb oʻtirgan xoʻrakxonaga olib chiqib ketdi. Ahmad choshnagir bu zaharni ta'midan bilib boʻlmasligini, uning ta'siri asta-sekin bilinishini aytgan edi. Bahlul sir ochilguncha qoʻrgʻon darvozasidan chiqib ketish umidida edi.

Ammo u oshxona eshigidan chiqayotganda, shirakayf bakovullardan biriga duch keldi.

- Qani, quyon goʻshtidan bizga ham qoldirdingmi?

- Qayla bor, sohib.
- Yoʻq, quyon qovurdogʻi kerak!
- Qovurdoq oz edi, hammasini hazratga berib yubordim. Qayla yey qoling, gazakka yaxshi.
 - Yoʻq! Quyon koʻp edi-ku! Nega bizga qoldirmading?
 - Hammasini qovurganim yoʻq edi...
- Boʻlmasa hozir bizga quyon goʻshtidan qovurib ber! Tez!

Bakovulning yoʻgʻon gavdasi eshikni toʻsib turardi.

Oshpaz orqaga qaytdi va sarosima harakatlar bilan yogʻ dogʻlab, quyon goʻshtini qovurishga tayyorlay boshladi. Yomgʻirli tun saroyni chulgʻab olgan. Shu payt birdan xos navkarlar tabibga yugurib, bakovullar bir-birini chaqirib, oshxonaning ich-tashi toʻpolon boʻlib ketdi. Xilvatgohda oʻtirgan Tohir ham xoʻrakxonaga chopib keldi.

Bobur ustma-ust qayt qilib, yuzi koʻkarib ketgan. U nafasi qaytib, tashqariga intildi, ammo ikki qadam qoʻyguncha boʻlmay, gandiraklab yiqila boshladi. Tohir chopib borib, uni qoʻltigʻidan suyab oldi. Tabib Yusufiy Boburning narigi qoʻltigʻiga kirdi. Jonsarak boʻlib qolgan savdarlarga buyurdi.

- Ichkariga joy qiling!
- Ravonga! dedi Bobur yutoqib.

Uning koʻngli behud, boshi gir-gir aylanar, nuqul havo yetishmayotganday boʻlar edi. Boburni ravonga suyab chiqarib yotqizdilar. Tabib yurakka quvvat beradigan doridan hidlatdi.

- Sizga ne boʻldi, hazratim? Mayni koʻp ichdingizmi? Yo ma'jun aralashdimi?
- Ovqatda bir sir bor! dedi Bobur va yana koʻngli aynib, chinni toz ustiga engashdi. Oshpaz taftish qilinsin!

Shu payt qayladan yegan yana ikki mulozim Boburga oʻxshab qayt qilayotgani ma'lum boʻldi. Bakovullar qayla pishirgan Bahlulni tutib, saroyning eng qattiqqoʻl tergovchisiga topshirdilar. Tergovchi uni turli qiynoqlarga solib, soʻroq qilishga kirishdi. Bobur tuni boʻyi oʻlim bilan olishib chiqdi. Har qayt qilganda, yurak-bagʻri uzilib, parchalanib chiqayotganday ogʻrir, goho nafasi ichiga tushib ketar edi. Tabib uning tepasidan ketmay:

- Shifo topasiz, bardam boʻling! - deb tasalli berar edi. Tohir ham tabibga qarashib, tuni boʻyi mijja qoqmay chiqdi. U Boburning boshini tutar, ter bosgan yuzini, boʻyinlarini yelpir edi. Boburning zahar azobidan toʻlgʻanayotganini koʻrgan sari, oʻzi ham zahar ichganday qiynalar edi. Tong payti Bobur alahsiraganday boʻlib, Humoyun bilan Mohim begimni yoʻqlay boshladi.

Shimoliy chegaralar yana notinch boʻlib qolgani uchun Bobur Humoyunni oʻtgan oyda Badaxshonga qaytarib yuborgan edi. Mohim begim hamon Kobulda edi.

– Humoyun mirzoga chopar yuboraylikmi? – deb soʻradi Tohir.

Bobur koʻzini ochib, xiyol oʻziga kelgandek boʻldi. Chopar Kobul va Badaxshonga yetib borguncha kamida bir oy vaqt oʻtadi. Bu orada biron kor-hol boʻlsa na Humoyun, na Mohim begim yetib kelolmasliklari aniq. Bobur gʻamgin bosh chayqab:

- Foydasi yoʻq, - dedi.

Uning ahvoli tobora tang boʻlayotganini koʻrgan Tohir:

- Hazratim, bardam boʻling! deb iltijo qildi. Biz siz bilan necha oʻlimlardan qolganmiz! Dardga boʻy bermang, yengasiz!
 - Lekin... bunday falokat... birinchi uchrashi!..

Bobur behol qoʻzgʻalib, yana toz ustiga engashdi, ogʻriq zarbidan koʻzlariga duv-duv yosh keldi. Soʻng boshini yana yostiqqa qoʻyib, koʻzini yumib yotganda ravonga tergovchi kirdi.

Yusufiy unga:

- Qisqa soʻzlang, faqat axborot! - deb shipshidi.

Tergovchi Baydani ham soʻroq qilganini, narigi uchoviga shu badbaxt malika bosh boʻlganini, lekin tashqi dushmanlar bilan, jumladan, Rano Sangram Sinx bilan aloqasi borligini rad etganini, boshqa savollarga javob berishdan bosh tortganini aytib berdi.

- Mal'unlar!.. dedi Bobur yotgan joyida gʻazabdan ovozi qaltirab. – Men ularga shunchalik ishonib... ilkidin taom yesam... izzat-ikrom qilsam!..
- Hazratim, bu iblislarni ming qiynoqqa solib oʻldirmoq kerak!
- Narigi uchovini... qoidaga binoan qatl ettiring! Bayda... keyin!
 - Bosh ustiga! deb tergovchi chiqib ketdi.

Qoidaga binoan, podshohning joniga qasd qilganlar eng ogʻir qiynoqlarga solib oʻldirilardi. Oshpaz Bahlulning terisi tiriklay shilinib olindi. Jallodlar Ahmad choshnagirning avval qoʻl-oyoqlarini kesib, keyin boshini tanasidan uzib, vujudini parchaparcha qilib tashladilar. Ikki orada vositachi turgan va ustalik bilan saroyga zahar olib kirib, oshpazga bergan kanizak quturgan filning oyogʻi tagiga tashlab oʻldirildi. Malika Bayda eng qattiq hibsda saqlanar, endi odamlar uning qanday qatl etilishini kutar edi. Tabib Yusufiy Boburning hayoti uchun ikki kecha-yu kunduz tinmay kurashdi. Tohir ham ikki kecha-yu kunduz bemorning yonidan jilmay, xizmatini qildi. Nihoyat, uchinchi kun tabib:

– Xudoga ming qatla shukr, hazratim, bir oʻlimdan qoldingiz! – dedi. – Onadan qayta tugʻilganday boʻldingiz. Endi ozgina qatiq iching. Soʻngra uxlang!

Bobur bir piyola qatiq ichgach, koʻzini yumib, yostiqqa bosh qoʻydi. Lekin boshidan oʻtgan oʻlim dahshati hamon xayolidan nari ketmasdi. Uning joni shuncha vaqt qil uchida osilib turganini oʻylasa, beixtiyor vahmi kelardi. Shu qil uzilsa oʻlim deb

ataladigan zulmat qa'riga qulab tushishini ikki kun davomida muttasil his qilish unda vashash istagini kuchaytirib yuborgan edi. Hayotning bir lahzasi, bir uchquni dunyoning barcha boyliklari-yu toj-u taxtlaridan ham aziz ekanligi unga endi astoydil sezildi. Uning azobdan toliqqan vujudi hamon behol bo'lsa ham ruhida nimadir o'zgargandek va dunyo koʻziga boshqacharoq koʻringandek boʻlardi. Har bir kishining faqat bittagina umri bor ekan ya umrning har lahzasi shu qadar shirin ekan, Boburning yoshiga vetmay oʻlib ketganlarga oson tutib boʻladimi? Ibrohim Lodi undan toʻrt yosh kichik edi. Malika Bayda buni unutishi va Bobur yaxshi muomala qilgani uchungina uni kechirib, farzandi oʻrnida e'zozlashi mumkinmidi? Jangda erishgan gʻalabalari unga eng mushkul ishlarni ham oson koʻrsatib qoʻygani uchun boʻlsa kerakki, Bobur Ibrohim Lodining onasiga shunchalik ishongan va uning amrida boʻlgan oshpazlarni ishga olgan ekanda! Bu oshpazlar tayyorlagan hindcha taomlarni yeyish bilan el-ulusning koʻnglini olmoqchi boʻlgani ham, uning o'z kuchiga ortiq darajada ishonganidan kelib chiqmaganmikin? Holbuki, kechagi dushmanlarni bugun darhol do'stga aylantirish osonmi? Xususan, Baydadek farzand dogʻida kuyib yurganlar yoki oshpaz Bahluldek inisining qasdini olmoqchi boʻlganlar bilan muomalada ehtivotkorrog boʻlishi kerak emasmidi? Kobulda Mohim begim aytgan iztirobli gaplar yana uning yodiga tushdi. Begona yurtdan borgan fotihni osonlikcha kechirmasliklari, uning qilichidan paydo boʻlgan varalar asrlar davomida bitmasligi rost boʻlsa... Bobur bu mamlakat xalqining koʻnglini olishi uchun qancha koʻp yillar kerak boʻladi? Bunga uning umri yetarmikin? Umuman, bu oʻzi erishish mumkin boʻlgan magsadmi yoki sarob?..

Bu oʻylardan Bobur yana boshi berk koʻchaga kirib qolganday boʻldi, kelajak koʻziga qorongʻi koʻrinib

ketdi. Faqat tanasiga asta-sekin qaytib kelayotgan hayotiy kuchlar shu zulmatni yorib oʻtib kelayotgan yogʻdularday iliq tuyilardi. Oʻsha kecha Bobur yaxshi uxladi. Ertasi kuni tabib uning tomiridan koʻproq qon olmoqchi boʻldi.

- Zaharlangan harom qonni chiqarib yuborgaymiz, hazratim. Yana biror hafta qimirlamay yotmogʻingiz kerak.

Bobur bunga e'tiroz qildi. Busiz ham uning darmoni ketib qolgan edi. Agar tabib koʻp qon olsa, uzoq yotishi aniq. Holbuki, «Podshoh oʻlim toʻshagida yotgan emish!», «Umid yoʻq emish!» degan ovozalar tarqalgan, qulay fursat kutayotgan gʻanimlar jonlanib qolgan edi. Beklar ham Boburning tezroq koʻpchilikka koʻrinishini istar edilar.

Oradan yana ikki kun oʻtgach, Bobur tantanali marosimlarda kiyadigan kiyimlarda devonxonaga chiqdi. Baland taxtning ikki tomonida tizilib turgan yuzdan ortiq amirlar, sarkardalar, viloyat hokimlari ta'zim bajo keltirib boʻy egdilar. Bobur taxtga shoshilmay chiqib oʻtirgach, ikkita navkar malika Baydani poygakdagi eshikdan olib kirdi.

Kampir hali ham boshdan-oyoq oq kiyib, oʻgʻli Ibrohimga aza tutib yurar edi. Faqat qaddi avvalgidan bir oz bukchayganroq. Lekin koʻzlari Boburning yuziga tushganda, uning ogʻir kasalga oʻxshab sargʻayib qolganidan qanoat hosil qilganday mamnun yiltiradi.

Eshik ogʻa Muhammad Doʻlday malikani soʻroqqa tutib, suiqasdga yana kimlar ishtirok etganini surishtira boshladi.

– Suiqasd emas, bu intiqom! – dedi malika. – Podshoingiz toʻkkan qonlarning qasosi bu! Menga yordam bergan oshpaz ham, Ahmad choshnagir ham, kaniz ham botir qasoskorlar edi. Hammasi mardlarcha jon berdi. Endi navbat meniki. Men oʻgʻlimning dogʻida

kuyib, kul boʻlganman. Endi qoʻllaringdan kelsa, kulimni koʻkka sovuringlar!

Malika saroyda hamma tushunadigan forsiy tilda gapirmoqda edi. A'yonlar nafaslarini ichlariga olib, yerga qarashdi. Malika bir o'limni bo'yniga olib kelgan, endi har bir soʻzni oʻqqa aylantirib, yoviga dadil otar, Boburning gʻazabga toʻlib, jallod chaqirishini, qurolsiz onaga qarshi barcha qurollarini ishga solishini istardi. Oʻshanda ma'naviy gʻalaba malika tomonida boʻlar, uning dovyurakligi ogʻizdan-ogʻizga oʻtib, odamlarning ehtiromini qozonar edi. Buni Bobur ham sezdi-yu, oʻzini bosib, Malikdod Koroniyga qaradi.

- Bu qanday yosumanlik! dedi Malikdod Koroniy Baydaga. - Shunchalik oʻch olish niyatingiz bor ekan, a'lohazratning inoyatlarini nega qabul qildingiz?
- Niyatimga yetishim uchun shunday qilishim kerak edi!
- A'lohazrat sizni «Moʻtabar onamizdek e'zozlang!» deganlarida, yigʻlab minnatdorchilik bildirganingiz bizning yodimizdan chiqqan emas!
- Men u paytda nafratim zoʻridan yigʻlagan edim! Oʻgʻlimning kushandasiga ona boʻlishdan qiynalib koʻzim yoshlangan edi!
- Yo alhazar! Axir siz ham Muhammad ummatisiz, muslimasiz-ku! Oʻgʻlingiz bularga qarshi necha barobar katta kuch bilan chiqqanini bilmasmisiz? Bular magʻlub boʻlsa, oʻgʻlingiz yovlarining ming jonlaridan birini ham tirik qoʻymas edi. Siz sulton Ibrohimning qanchalik shafqatsiz boʻlganini bilar edingiz. Agar sizda insof-u imon boʻlsa, qoʻlida qilichi bilan ochiqchasiga jang qilgan sarkardaga yashiriqcha zahar bermas edingiz!
- Men ayol kishiman, qilich koʻtarib jang qilolmayman! Ana oʻsha zahar - mening qilichim edi. Fotihlar Panipatda ming-ming odamlarning oʻlimiga

sabab boʻldi! Bu mamlakatning yana koʻp joylariga ajal urugʻini ekdi! Men kabi minglab onalar hozir motam tutib, koʻz yoshi toʻkib yuribdi. Qanchaqancha kelinchaklar beva qolib, oʻzlarini erlarining jasadlari bilan birga olovda yondiryapti! Men bergan zahar ana oʻsha ajalning urugʻidan tayyorlangan edi! Unga beva-bechoralarning achchiq koʻz yoshlari ham qoʻshilgan edi!

Malikaning soʻnggi soʻzlari fotih beklarga ham tegib ketdi. Sersoqol bir bek oʻrnidan sakrab turib, Boburga ta'zim bilan murojaat qildi:

- Hazratim, bu yalmogʻizning tilini ogʻzidan sugʻurib olmoq kerak! Shunday mal'unligi ustiga yana buncha gap!
- Mayli, meni qiymalab tashlasinlar! deb qichqirdi Bayda. – Men qoʻrqmayman!

Bobur Baydani beklar istagandek qiynoqlarga solib oʻldirtirsa, el-ulus nima deyishini oʻylar ekan, «lop» etib Hirotdagi Xadicha begim esiga tushdi. Makkorlikda u ham Baydadan qolishmas edi, nevarasi Moʻmin mirzoning oʻlimiga sabab boʻlgani koʻpchilikka ma'lum edi.

Shunga qaramay, Shayboniyxon uni Mansur baxshining ixtiyoriga topshirib, dahshatli qiynoqlarga solgani juda koʻp odamlarning nafratini keltirgan edi. Boburning oʻzi bundan bir haftagina oldin xilvatxonada xotira yozib oʻtirganda, Shayboniyxonning bu ishini jirkanib qalamga olgan edi. «...Besh kunlik oʻtar dunyoda Shayboniyxon mundoq ablahona ishlari bilan yomon ot qozondi», – degan satrlarni oʻz umr kitobiga bitgan Bobur endi manna bu qurolsiz onaga qanday chora koʻrishi kerak? Qanday qilsa, odamlarning nafratiga emas, hurmatiga sazovor boʻladi?

Beklar hamon Baydaning oʻldirilishini talab qilmoqda edilar:

- Bu yalmogʻizni quturgan filning oyogʻi tagiga tashlab qatl ettirmoq kerak!
- Yoki oyoq-qoʻlini chirmab bogʻlab, baland minora ustiga yotqizib qoʻymoq darkor – goʻshtini quzgʻunlar yeb, koʻzlarini choʻqib ketsin!

Malikaga zimdan tikilib turgan Bobur soʻnggi takliflardan Baydaning rangi oʻchib, yuzi koʻkimtir tusga kirganini koʻrdi. Shunda Muhammad Doʻldayning ishorasi bilan beklar jim boʻldilar. Bobur malika tushunadigan forsiy tilda:

- Janob beklar taklif qilgan jazolar barchasi asosli, dedi. Biroq xiyonatchi malikaga bularning hammasidan ham ogʻirroq bir jazo bor. Bu xonimning gapiga qaraganda, hamma yetim-u yesirlar uchun joni achir emish, zaharni oʻshalarning koʻz yoshlaridan tayyorlagan emish! Biroq buning oʻgʻli Ibrohim Lodi el-ulusga ozmuncha zulm oʻtkazganmi? Ozmuncha odamni yetim-u yesir qilganmi? Ibrohim sababchi boʻlgan ichki urushlarda har yili qancha odam halok boʻlgan edi, janob Koroniy? Siz bilsangiz kerak?
- Hazratim, menda hisoboti bor: soʻnggi uch yil davomida sulton Ibrohim boshlagan ichki urushlarda bizdan yuz yigirma ming odam halok boʻlmishdir.
- Uch yilda bir yuz-u yigirma ming! xitob qildi Bobur. Ibrohim Lodi esa oʻn yildan ortiq taxtda oʻltirgan! Hindistonda odam koʻp. Yuz mingi ichki urushda halok boʻlsa, Ibrohim yana yuz mingini pulga yollagan. Agar Ibrohimning onasi boʻlmish bu xonim oʻlgan navkarlarga-yu ularning yetim-yesirlariga astoydil jon kuydirsa, nechun yuz minglab odamlarning behuda oʻlib ketishlariga yoʻl qoʻygan? Nechun oʻgʻlini bunday nojoʻya qirgʻinlardan qaytarmagan?!
- Men faqat ona edim, podshoh oʻgʻlimga amrfarmon berolmas edim! - deb malika Bayda endi oʻzini himoya qila boshladi.
- Nojoʻya ichki qirgʻinlarni toʻxtatishga amr-farmon bermoq uchun mana biz bel bogʻladik! – dedi Bobur.

- Tangridan umidimiz borki, bu ulugʻ mamlakat endi yagona markaziy davlat atrofiga jipslashgusidir. Biz Hindni obod-u qudratli qilmoq orzusidamiz. Bizga hamkor-u hamnafas hind beklari, fuzalolari, hunarpeshalari koʻp. Bizni zaharlab oʻldirmoqchi boʻlgan bu makkor xonim uchun eng ogʻir jazo shuki, biz, mana, tirikmiz! Bu xonimning oʻzi-yu oʻgʻli qilolmagan ulkan ishlarni biz qilmoqdamiz!

Malikdod Koroniy birdan yengil tortib:

- Hazratim lutf qildilar! dedi.
- Bu malika, deb davom etdi Bobur, shu daraja beva-bechoraga jonkuyar boʻlsa... Abdukarimbek!

Baydaga yaqin bir joyda oʻtirgan shigʻovul sakrab oʻrnidan turdi. Bobur unga buyurdi:

- Bu malikaning barcha mol-u dunyosini musodara qilib, Jamna boʻyida bir buq'ayi xayr¹ qurdiring. Barcha xizmatkorlari oʻsha buq'ada xizmat qilsin, malikaning butun boyligi, mol-u dunyosini yetimyesirga xayr-ehson qilib ulashsinlar.
- Bosh ustiga! deb Abdukarim bu farmonni ta'zim bilan qabul qildi.
- Malikani to umri yetgunicha tirik saqlash ham sizga topshirilur, janob Abdukarimbek!
 - Tirik?! hayron boʻlib soʻradi shigʻovul.

Boshqa a'yonlar ham taajjublanayotganini ko'rgan Bobur ovozini ko'taribroq gapirdi:

– Malika bizning bundan keyingi zafarlarimizni ham koʻrsin. Yomonlikka yaxshilik qilish mard kishining qoʻlidan kelishiga amin boʻlsin. Agar malikada vijdon boʻlsa, oʻgʻli qilmay ketgan ishlarni biz qilganimizni koʻrib, vijdoni azoblansin. Agar vijdoni boʻlmasa, ichida faqat baxillik chayonlari boʻlsa, bu chayonlar oʻzini chaqib yotaversin. Malikaga bundan oʻzga jazo munosib emasdir!

¹ Buq'ayi xayr - xayr-ehson uyi.

Bek va a'yonlarnnig pichir-pichirlari orasidan allakimning:

– Hazratim tantilik qildilar! – degan quvonchli xitobi eshitildi.

Oʻz oʻlimini ham oʻtkir bir qurolga aylantirmoqchi boʻlib kelgan malika Bayda endi bu qurolidan ayrilganini sezdi. Shu paytgacha u ajali yetganiga shubha qilmas edi. Endi birdan yana yashash umidi paydo boʻldi. Malikaning oʻlim sovugʻidan muzlagan qalbiga hayotning iliq nafasi tegdi-yu, koʻnglini boʻshashtirib yubordi.

Malika yuzini qoʻllari bilan toʻsib, yelkalari silkinasilkina yigʻlay boshladi.

SEKRI

QAYTA KOʻZ OCHGAN BULOQ

1

Boburning maxsus taklifi bilan Hirotdan Agraga kelayotgan mavlono Xondamir, shoir Shihob Muammiy va mudarris Ibrohim Qonuniy uch oyga yaqin yoʻl yurdilar.

Badvahima Xaybar dovonidan o'tib, sersuv Sind daryosidan kechib, changalzor oʻrmonlarni oralab borar ekanlar, mavlono Xondamir olamning naqadar ulkanligini endi birinchi marta astoydil his qildi. Haftalar, oylar davomida otliq safar qilib oxiriga yetib boʻlmaydigan bagʻri keng oʻlkalar hammasi endi yaxlit bir davlat boʻlib birlashganligi, Balxdan Kobulgacha, undan Laxoʻr va Dehligacha hamma joyda Boburning muhri bosilgan farmonini beto'xtov ado etishlaridan sezilar edi. Bu farmonga muvofiq Xuroson va Movarounnahrdan Bobur taklifi bilan kelayotgan ilm-u san'at ahlini, hunarpeshalarni barcha viloyat hokimlari, barcha qoʻriqchi askarlar va bekat nazoratchilari qoʻshni davlat elchilariga koʻrsatiladigan izzat-ikrom bilan kutib olib, kuzatib qoʻyishlari kerak edi. Yoʻllarda hali qaroqchilar tugatilmagan, tartib oʻrnatilmagan notinch shahar va qishloqlar bor edi. Xondamir va uning hamrohlarini bunday joylardan «badraga» deb ataladigan ikki yuz-uch yuz kishilik qoʻriqchi askarlar oʻtkazib qoʻyishardi.

Karvonsaroylarda ham ularni «podshohning xos mehmonlari» deyishib, eng yaxshi xonalarga joylashtirishar, qoʻllaridagi qogʻozlariga binoan kundalik taomlari uchun bepul guruch, goʻsht, yogʻ berishar, tagʻin mayda xarajatlari uchun maxsus ulufa ham toʻlashardi. Charchagan ot-ulovlarini almashtirishlari kerak boʻlib qolsa, yomchilar boquvdagi ot-ulovlaridan ularga birinchi navbatda berishar edi. Kobuldan Dehligacha boʻlgan minglab chaqirim yoʻl boʻyidagi karvonsaroylar va yomlar Boburning harakatlari bilan shunchalik obod va shunchalik yaxshi ishlab turar edi.

Xondamir yoʻllarda, bekatlarda Hindistonga borib kelayotgan elchilar, sayyohlar va savdogarlarni koʻp uchratardi. Bultur Agradan ellik chaqirimcha gʻarbdagi Sekri degan joyda Bobur Rano Sango bilan urushib, Panipatdagidan ham ulkanroq gʻalabaga erishgandan keyin uni astoydil tan olib, elchi yubora boshlagan podshohlar koʻpayib qolgan edi. Xondamir Laxoʻrda uchratgan qizilboshlarning elchisi Shoh Taxmasi I¹ nomidan gʻalati sovgʻalar olib bormoqda edilar. Bu sovgʻalar orasida oq tuyaning zar uqali kajavasida parvarishlab olib ketilayotgan ikkita goʻzal cherkas qizi ham bor edi. Shoh Taxmasi bu qizlarni Boburning haramiga atab yuborgan edi.

Xondamir Dehlidan shimolroqdagi bir bekatda samarqandlik va toshkentlik elchilarni ham uchratdi. Sekridagi gʻalabaning shuhrati atrof mamlakatlarga yoyilganidan keyin Bobur Hindistonda tuzgan yangi davlatni uning ashaddiy dushmanlari boʻlgan shayboniyzodalar ham tan olgan edilar. Hozir Samarqand taxtida oʻltirgan Koʻchkinchixonning elchisi Boburga Samarqandning soyaki mayizlaridan, Konibodomning subhoni oʻriklaridan, Buxoroning oʻtkir maylaridan, Movarounnahrning boshqa noyob ne'matlaridan yetti tuyaga sovgʻa-salom yuklab, yoniga ikki yuzta yaxshi otni ham tortiq qilib qoʻshib keltirgan edi. Bobur bu elchini oʻzining Jamna boʻyida qurdirgan

¹ Taxmasi I – Shoh Ismoilning oʻgʻli. 1524-yilda Shoh Ismoil vafot etgach, Taxmasi uning oʻrniga shoh boʻladi.

yangi Hasht Bihisht bogʻida xonlar oʻtiradigan oq kigiz ustiga oʻtqazib, kamoli ehtirom bilan qabul qilgan edi. Boburning qabulidan va sovgʻa-salomlaridan mamnun boʻlib qaytayotgan xon elchisi Xondamirga maqtandi:

– E, mavlono, biz Hindistonda koʻrgan xirmon-xirmon oltinlarni hali hech kim koʻrmagandir. Bobur mirzo quyma oltindan qilingan taxtda oʻltiribdir. Taxtning pastiga katta gilam toʻshalgan ekan. Viloyat hokimlari har yili beradigan oltinlarini shu gilamning ustiga keltirib toʻkdilar. Birpasda oltindan katta xirmon koʻtarildi.

Bobur shayboniyzodalarning oltinga suq odamlar ekanini bilgani uchun elchining koʻzi oldida ataylab shunday xirmon koʻtarganini Xondamir ich-ichidan sezib kuldi:

- Janob elchi bu xirmondan kapsan olmadilarmi?
- Podshoh bizga qimmatbaho sarupolar kiydirdi. Gilam ustidagi oltindan hazrat Koʻchkinchixonga atab sovgʻa berildi. Oltin tangalarni sanab ham oʻltirmadilar. Ikki yuz ellik misqolni bir kumush tosh bilan tortib berdilar-qoʻydilar.
 - Ikki orada biron shartnoma tuzildimi?
- Ha, bemalol bordi-keldi qiladigan boʻldik. Savdosotiq tiklandi. Aloqalar ilgarigidan yaxshiroq ravnaq topgʻusidir. Biz bulardan ipak, ziravor olurmiz. Bularga hoʻl-u quruq mevalar, ot-ulovlar soturmiz... Yoʻli uzoq boʻlsa ham korvonlarimiz ishtiyoq bilan kelib ketadi. Chunki Bobur mirzo butun qalamravida tamgʻa¹ soligʻini bekor qilmishlar. Oʻzbek, turkman, tojik, hind, arab, ajam, fors qoʻyingki, hamma bani bashar² bu ogʻir soliqdan xalos boʻlib, daromadlari oshibdi. Hunarmand-u savdogarlar ham shunisidan juda mamnun. Faqat Bobur podshoning bir amri bizga ma'qul kelmadi.

¹ Tamgʻa – qoʻshimcha daromad soligʻi.

² Bani bashar - odam farzandi.

- Qaysi amri? qiziqib soʻradi Xondamir.
- Butun mamlakatida may ichish man etilmishdir. Bobur mirzoning oʻzi ham «minba'd ichmaymen», deb butun el oldida tavba qilibdirlar. Bazmlari ichkiliksiz... muzdakkina! Koʻchkinchixonning elchisini koʻngilsizlantirgan bu yangilik Xondamirning ruhini koʻtardi.

Husavn Boygaroni va uning oʻgʻillarini ichkilik balosi qay darajada xarob qilgani hali mavlononing esidan chiqqan emas edi. Bundan toʻqqiz yilcha burun Bobur Hirotga ikkinchi marta borganda Xondamir uning ham mayxoʻrlikka ruju qila boshlaganini koʻrgan, «Nahotki, bu nodir siymo ham boshqa koʻp Temuriylar singari iste'dodini ichkilikka boy bersa!» deb tashvishlangan edi. Elchining hikoyasi uning mana shu tashvishini tarqatib yubordi. Xondamir bu uzoq va mashaqqatli safarga Boburni orqa qilib chiqqan edi. Yoshi ellikdan oshayotgan olim bu uzoq yurtlardan Hirotga sogʻ-salomat qayta oladimi, yoʻqmi, hali oʻzi uchun qorongʻi edi. U Bobur tufayli mana shu qorongʻilikni boʻyniga olib kelmoqda edi. Endi voʻllarda Boburning irodasi va aql-zakovatidan dalolat beradigan nimaiki uchra-sa, hammasi mavlononing qalbidagi mash'um qorong'ilikni quvayotganday bo'lar va yorugʻ bir istiqbolga ishonch uygʻotar edi.

Xondamir Agraga kelib kirganda, daryo boʻyiga qurilgan Hasht Bihisht va Zarafshon bogʻlarini, marmarlariga chiroyli gullar solib ishlangan tosh imoratlarni, tomlari maysalar bilan bezangan tillakori tolorlarni¹, chaman-chaman gullari koʻzni qamashtiradigan gulzorlarni koʻrdi. Bu ulugʻvor goʻzalliklar mavlononing kela-kelguncha koʻrgan va eshitganlariga qoʻshildi-yu, u Boburni avvalgidan boshqacha favqulodda qudratli bir qiyofaga kiritib tasavvur eta boshladi...

¹ Tolor - shiypon.

Lekin Bobur soʻnggi yillarda koʻp kasal boʻlib, juda ozib ketgan, jussasi xiyla kichrayib qolgan edi. Xondamir uning oʻzini qanchalik oldirib qoʻyganini Sekri togʻiga sayrga chiqqanlarida oftob yorugʻida juda aniq koʻrdi. Bobur Sekri togʻining moʻjazligi va tekis joyga tushganligi Oʻshdagi Buratogʻni eslatishi haqida gapirar, togʻ etagidagi koʻl ichiga qurilayotgan toshsupani qoʻli bilan koʻrsatar, pastda qulf urib oʻsgan yam-yashil bogʻ va daraxtlar orasidan koʻrinib turgan yangi imoratlar qanday barpo boʻlganini hikoya qilardi. Xondamir esa uning suyagi boʻrtib qolgan ozgʻin yuziga, koʻz atroflari va peshonasidagi qavatqavat ajinlariga, uyqusizlikdan ichiga botib ketgan qovoqlariga qarab, ich-ichidan unga kuyunar edi.

Togʻdan koʻl tomonga tushib borayotganlarida Bobur Xondamirning bu kuyunishini sezganday boʻlib:

- Mening taqdirim gʻalati, mavlono, dedi. Atrofimni obod qilganim sari oʻzim soʻlib bormoqdaman.
- Unchalik emas-u... harqalay, oʻzingizga ham koʻproq gʻamxoʻrlik qilishingiz zarurmikin?
- Zarurlikka zarur. Lekin mamlakat qanchalik ulkan boʻlsa, uni idora etish shunchalik qiyinlashar ekan. Men zoʻr bir davlat tuzish maqsadini zimmamga olganimda buning qanchalik mushkul ekanini tasavvur qilmagan ekanmen. Tun-u kun mehnat, tashvish, oʻt, olov... Xuddi harakatdagi vulqonlar orasiga tushib qolgandekmen. Koʻzlagan maqsadim amalga oshguncha umrim yetgaymi, yoʻqmi, bilmaymen.
- Niyatni butun qilmoq kerak, hazratim. Siz hali yigit yoshidasiz, alhol qirq olti yoshdasiz.
- Ammo Hindga kelganimdan beri har yili beshoʻn yillik umrim sarf boʻlgandek tuyilur. Isitma, uyqusizlik...

Xondamir Boburning Hindistonga kelib tuzgan yangi devonini bugun ertalab oʻqigan edi. Shu devondagi bir ruboiy hozir uning esiga tushdi:

Jismimda isitma kunda mahkam boʻladur, Koʻzdin uchadur uyqu chu oqshom boʻladur. Har ikkalasi gʻamim bila sabrimdek, Borgʻon sari bu ortadur, ul kam boʻladur.

Boburning uyqusiz tunlardan kirtaygan koʻzlari sal shamol tegsa yoshlanadigan boʻlib qolgan edi.

- Tabiblar uyqusizlikning davosini bilar edilar-ku?
- Hirotlik xos tabibimiz Yusufiy muolaja qilib koʻrdi. Boʻlmadi. «Sizga orom kerak» deydir. «Davlat tashvishlarini unuting», deydir. «Kechalari she'r yozmang», deydir. Ammo... davlat tepasida oʻltirib, uning tashvishini qanday unutish mumkin? Faqat she'r yozganda, ijod qilganda bu tashvish xayolimdan koʻtariladir. Lekin Agrada boʻlsam ijodga ham fursat topolmasmen. Kechasi ham, kunduzi ham davlat tashvishi... Bezor boʻlib, mana shu Sekriga chiqib keldim. Ijod uchun bu yer tinchroq... Anchadan beri masnaviy yozmoqdamen. Sanasam, bir kechakunduzda ellik bayt masnaviy bitibmen.

Bobur xastaligi ustiga koʻp ishlab, oʻzini juda toliqtirib qoʻyganini, uyqusizlikning bir sababi shu ekanini, tabib kechalari she'r yozishni man qilishi toʻgʻriligini Xondamir sezib borardi-yu, lekin buni aytishga andisha qilardi. Tabiatan orom nimaligini bilmaydigan Bobur oʻzini ayamay ishlab oʻrganib qolgan edi, u bir kunda shuncha she'r yozganidan mamnun boʻlib yurganda uni bu mamnuniyatdan ham mahrum qiladigan nasihat gap aytish mavlonoga oʻrinsiz tuyildi.

– Ishqilib, Xudo sizga quvvat bersin, – deb qoʻya qoldi.

Bobur mavzuni yangilagisi kelib:

– Mavlono, «Habib us-siyar»ni¹ necha yil yozgansiz?
– dedi.

- Oʻn bir yil. Lekin hali xatm qilgan emasmen. Xotirjamlik boʻlganda Hirotda xatm qilmoqchi edim. Lekin yigirma yildan beri sunniyparastlar bilan shiaparastlar Hirotni bir-birlaridan tortib olib, goh oʻtga urdilar, goh suvga...
- Hoʻ oʻshanda... Unsiyaning minorasida turib soʻzlashganimizda «Hirotning tole quyoshi botib ketmasmikin?» deb iztirob chekkan edingiz. Shu iztiroblar bari oʻrinli ekan-da.
- Hirotda tole ketganda Samarqand bizga quchoq ochib tursa ekan! Shia-sunniy adovati Movarounnahr bilan Xuroson-u Eronning madaniy aloqalarini uzib tashladi. Bu aloqalardan qancha avlodlar bahra olgan edi, qancha iste'dodlar kamol topgan edi. Johil sultonlar Movarounnahrni biqiq muhitga solib qo'yib, xurofot bilan bid'atga yem qilmoqdalar. Samarqanddan kelgan bir olim yigʻlaguday boʻlib aytib berdi. Obirahmat boʻyidagi uch oshiyonlik Ulugʻbek rasadxonasi vayron boʻlmishdir. Shahar hokimining parvoyiga kelmas emish. Johillar nurab yotgan rasadxonaning gʻishtlarini olib ketib, oʻz hovlilariga ishlatmoqda emishlar.
- Biz oʻzga yurtga kelib imoratlar qurganda ular oʻz yurtimizdagi obidalarni buzmoqdalar! Charxning bundan achchiq kinoyasi boʻlurmi, mavlono? Shuni oʻylasam, oʻz yerimizni qoʻyib, Hindga koʻngil berganim menga xuddi oqibatsizlikdek koʻrinadir!
- Biroq falakning gardishi shuni taqozo qilsa, odam iloj topolmas ekan-da. Mana, men ham sizdan ibrat

¹ «Habib us-siyar» – «Sevimli doʻstning tarjimayi holi» demakdir. Xondamir oʻzining bu katta asarida Arab, Eron, Oʻrta Osiyo, Xuroson tarixining olam paydo boʻlganidan to XVI asrgacha oʻtgan eng muhim davrlari haqida soʻz yuritadi.

olib, Hindga keldim-ku! Muarrix boʻlganligim uchun tarixiy zarurat bizdan zoʻr boʻlishini koʻp sezmishmen.

Bobur Xondamirning soʻnggi gapiga qiziqib, otini uning otiga yaqin yurgiza boshladi.

- Darhaqiqat, tarix alohida shaxslar irodasiga boʻysunmas ekan, dedi Bobur. Oyogʻingiz tagidagi togʻ pastga qarab koʻchsa, siz yuksakka qanchalik intilmang, togʻ koʻchkisi bilan birga pastga qulab ketar ekansiz. Endi oʻylab koʻrsam, Movarounnahrdagi koʻchkilar meni xuddi shu koʻyga solgan ekan. Biroq siz qadam qoʻygan togʻ ichdan koʻtarilib oʻsib borsa, koʻzlagan yuksakligingizga qanday koʻtarilganingizni oʻzingiz sezmay qolur ekansiz. Hindiston menga ichdan koʻtarilib oʻsib boruvchi togʻdek tuyiladir, mavlono. Shuning uchun Samarqand-u Andijonda qilolmagan ishlarimni bu yerda qilish umididamen!
- Mening nazarimda ham endigi yuksalish asri Hindga koʻchganga oʻxshaydir. Jaholat quvgan juda koʻp ilm-u san'at ahli sizdan panoh istab Hindga kelishlari bejiz emasdir. Chunki falakning gardishi oʻzgardi. Axir bir vaqtlar Xuroson-u Movarounnahr ham ichdan koʻtarilib oʻsib boruvchi togʻdek yuksalgan emasmidi? Xorazmda - Beruniy, Buxoroda - Ibn Sino, Tusda - Firdavsiy, Bolasugʻunda - Yusuf Xos Hojib - bular hammasi bir-biriga asrdosh. Shuncha zo'r siymolar chiqqan asr - bizning ulug' bir yuksalish asrimiz edi. Chingizxonning koʻchmanchi oʻrdalari bosib keldi-yu, madaniy taraqqiyotimiz iplarini bir necha asrga uzib tashladi. Ulugʻbek davrida Samarqandda, Navoiy davrida Hirotda juda koʻp madaniy daholar yana uygʻondi. Yangi yuksalishlar asri boshlandi. Lekin kajraftor falak buni ham bizga koʻp koʻrdi! Yana chingiziy sultonlar madaniy taraqqiyot iplarini uzib, chalkashtirib yubordilar... Faqir Hirotda topolmay yurgan kalavaning uchini shu yerda topgandek yengil tortmogdamen. Musofirlik juda og'ir bo'lsa ham,

lekin bashariyat yashab turgan shu keng olamda yangi daholari uygʻongan, ilm-u san'atga astoydil yoʻl ochilgan Hindning borligi qalblarga quvvat beradir... Men endi «Habib us-siyar»ning soʻnggi tahririni shu yerda, qanotingiz ostida tugallash umididamen.

- Bajonidil!.. Bizdan neki koʻmak zarur boʻlsa, tortinmay ayting.
- Faqir Hazrat Mir Alisherning kutubxonalarida koʻp yil ishladim. Husayn Boyqaro hazratlarining kutubxonalaridagi nodir qoʻlyozmalardan ham koʻp foydalandim... Endi... bu kutubxonalar Hirotda qoldi.

Xondamir Boburning ham ellik kishi ishlaydigan ulkan kutubxonasi borligini bilar, Hirotdan topilmaydigan nodir manbalar bu yerdan topilishi mumkinligiga ishonar edi. Biroq podshohning xos kutubxonasiga ancha-muncha odam yoʻlay olmaydi. Xondamir shuni oʻylab, gapining davomini aytishga iymandi.

- Siz bizni deb shuncha joydan kelibsiz-u, biz kutubxonamizni sizdan ayagaymizmi, mavlono? dedi Bobur uning iymanish sababini sezib. Abdulla kitobdorga buyurgaymen, sizga neki asar zarur boʻlsa topib bergay. Kutubxonada hindistoniy kitoblar ham koʻp. Abdulla kitobdorning ixtiyorida sanskritni yaxshi biladigan tarjimon olimlar bor. Shulardan bir-ikkitasini sizning ixtiyoringizga berurmen, neki xizmatingiz boʻlsa ado eturlar.
- Toabad minnatdormen, hazratim! Gustohlik sanalmasa, yana bir erkaligim bor...
 - Marhamat, mavlono.
- Hirotda oʻzingiz yozgan sarguzashtlaringizdan parcha oʻqib bergan edingiz. Meni maftun etgan edi. Agar shu asaringizning tayyor qismlari boʻlsa, men uchun... eng aziz, eng nodir manba boʻlur edi. Chunki siz boshdan kechirib, tadqiq etgan tarixiy voqealarni boshqa hech kim shunday yaxshi tadqiq etgan emas...

Bobur otining chimirilgan quloqlariga tikilib bir oz jim bordi. U ikki yildan beri «Boburnoma»ni boshidan qaytib koʻchirib, yaxlit bir asar holiga keltirmoqda edi. Bultur yoz issiqlari tugab, yomgʻir fasli boshlanganda juda qattiq shamol koʻtarilgan. Bobur chodirda ishlab oʻltirganda yomgʻir aralash kelgan dovul uning chodirini yiqitib, qoʻlyozmalarning oʻnlab varaqlarini uchirib ketgan edi. Butun-butun boblarni yomgʻirdovul halok qilgan edi. Ularni tiklash uchun haligacha yaxlit bir vaqt topilmas edi. Qoʻlyozmani shu ahvolda Xondamirga bersa toʻgʻri boʻlarmikin?

- Men o'ylab ko'ray, mavlono.

Bu orada ular Sekri togʻining etagidagi buloqqa yaqinlashdilar. Atrofi orasta qilib qoʻyilgan suvi muzday buloq Boburning yaxshi koʻrgan joylaridan biri edi. Shu yerda Xondamir ikkovlari otdan tushdilar.

Tiniq mavjlarga toza qumlar qoʻshilib qaynab chiqayotgan buloq sokin gulzorlarni oralab, shildirab oqmoqda edi.

– Atrof shunday sokin, – dedi Xondamir. – Koʻl boʻyida qurilishlar... Bundan ikki yil burun shu Sekrida Rano Sango bilan dahshatli janglar boʻlganini tasayyur etish mushkul.

Mana shu atroflarda boʻlib oʻtgan qirgʻinning eng tahlikali damlari Boburning tasavvurida qaytadan gavdalandi. Oʻshanda u naq oʻlimni boʻyniga olib qoʻygan edi. Zahar asorati hali ketmagan. Bobur astasekin darmonga kirib, sogʻligʻini tiklayotgan kunlarda navbatdagi hayot-mamot kurashi boshlandi. Bu gal eng jangovar rajput qoʻshinlarining sarkardasi Rano Sangram Sing toʻqson ming qoʻshin toʻplab, Boburga qarshi jangga otlandi. Holbuki, Bobur Kobulda ekanida Rano Sangram bir necha marta elchilar yuborib, uni Hindistonga taklif qilgan va Ibrohim Lodiga qarshi kurashga chorlagan edi. Rano Sangram oʻgʻli Bikramaditni oraga qoʻyib tuzgan shartnomada

«agar Bobur hazratlari bizni Ibrohim Lodi zulmidan xalos qilsalar, uni oliy hukmdorimiz deb tan olurmiz» deyilgan joyi ham bor edi.

Ehtimol, u paytda Rano Sangram Boburni «Hindiston issiglariga bardosh berolmas, oladiganini olib qaytib ketsa, mamlakat oʻzimizga qolar», deb oʻylagandir. Ammo Bobur Hindistonda mahkam oʻrnashib, ikki yildan buyon katta qurilishlar qilayotgani va ulkan bogʻlar, toshhovuzlar, qasrlar bunyod etayotgani Rano Sangramning avvalgi umidini puchga chiqardi. Surishtirib qarasa, Boburning qoʻshini hali ham oʻn besh mingdan ortiq emas. Rano Sangram esa barcha rajput roa va ranolari bilan til biriktirib, bundan olti barobar ortiq qoʻshin toʻpladi. Yana Ibrohim Lodining ukasi Mahmud Lodi ham yigirma ming suvoriy bilan unga yordamga keldi. Rano Sangram mingdan ortiq jangovar filni oldinga chiqarib, yoʻlida uchragan toʻsiqlarni parchalab, yanchib, Bobur tomonga bostirib kela boshladi. Ichkarida fitna, xiyonat. Bobur laxoʻrlik Olamxonni ikki ming qoʻshin bilan Gvalior himovasiga vuborgan edi, u odam voʻlini bexatar tomonga burib, askari bilan Panjobga qochdi. Hasanxon degan yana bir afgʻon sarkardasi olti vuz navkari bilan Bobur garorgohidan yashiriqcha chiqib, tunda dushmanga borib qoʻshildi.

Shuning ustiga Muhammad Sharif degan munajjim: «Mirrix gʻarb tomonidadir, osmondagi yulduzlar bizning magʻlubiyatimizdan darak bermoqda», deb ovoza tarqatdi. Bek-u navkarlarni vahima bosganini sezgan Bobur Sekri koʻli yaqinidagi qarorgohga besh yuzdan ortiq odamlarini yigʻdi.

Doshqozonlarda palov pishmoqda. Dasturxonlarga noz-ne'matlar, oltin-kumush surohiylar qoʻyilgan. Soqiylar xumlarda kuch yigʻib yotgan maylardan koʻzachalarini toʻldirib olishmoqda.

Ulardan biri ikkinchisiga shivirlab deydi:

- Ertaga yana qirgʻin urush boʻlarmish. Shunday paytda ichkulik bazmi koʻngillariga qanday sigʻarkin? Ikkinchi soqiy e'tiroz qiladi:
- Ichkulik odamni botir qilgay, gʻam-gʻussani unutdirgay! Xumda xosiyat koʻp.

Ba'zi beklar ham: «Jangchilarning kayfiyatini may bilan ko'tarmoq kerak!» deb, bazmning tezroq boshlanishini sabrsizlik bilan kutmoqda edilar. Hatto shahzodalardan Humoyun bilan Askariy ham xatarli urush oldidan to'yib kayf qilish umidida edilar. Bobur o'gʻillarining otadan ibrat olib allaqachon may ichishga o'tganlarini hozir yana bir ogʻrinib his qildi-yu, koʻpdan beri koʻngliga tukkan niyatini shu qirgʻinbarot arafasida amalga oshirmasa boʻlmasligini oʻyladi.

U savdarlarga buyurib ziyofat boʻladigan joydan nariroqqa kattagina chuqur qazdirdi. Chuqur yaqiniga sandiqday-sandiqday ikkita xarsangtoshni yumalatib keltirib oʻrnattirdi. Bek-u navkarlar uning nima qilmoqchiligini tushunolmay hayron edilar. Bobur oltin-kumush surohiylarga may quyishni buyurdi. Lekin dasturxon yoniga hech kimni taklif qilmadi. Oʻzi ham may toʻla oltin surohiy bilan haligi chuqur yaqinida tikka turibdi. Beklardan biri yonidagi oʻrtogʻiga:

- Bugun tik turib ichgaymiz, chamasi? - deb shivirladi.

Bobur hamma eshitadigan jarangdor tovush bilan:

– Janob beklar! Yigitlar! – deb gap boshladi. – Taklif boʻldiki, jangchilarga may ichiraylik, toki dadil boʻlib maydonga kirsinlar. Ammo boshimizdan oʻtgan, bilurmizki, may dadilligi – aldamchidir. Mast odam jangda ajal paymonasidan qanday ichganini bilmay qolur. Najot qayda? Ertangi jang biz koʻrgan qirgʻinlarning eng mushkuli-yu eng murakkabi boʻlgʻusidir. Biz sepoyalar yasadik, arobalarni zanjirlar

bilan bogʻladik, gʻalabaning barcha rejalarini tuzdik. Endi bu rejalarni eng nozik nuqtalarigacha bexato amalga oshirmasak magʻlub boʻlgaymiz. Jangda nihoyatda hushyor boʻlmogʻimiz kerak. Najot mastlikda emas, hushyorlikdadir! May ichib koʻp gunohlar qildik. Endi men hayot-mamot jangiga halqumimni poklab kirmoqchimen... Bir oʻlim har vaqt boshimizda bor. Agar ertaga kunim bitsa, bu foniy dunyodan boqiy dunyoga may mastligi bilan emas, imon pokligi-yu tan halolligi bilan ketmoqchimen!

Bobur oʻsha damda chindan ham bir oʻlimni zimmasiga olib, bek-u navkarlari bilan vidolashayotgan odamday hayajonlanib gapirgan edi. Bu koʻpchilikka juda qattiq ta'sir qildi. Bir lahzalik ogʻir jimlikdan soʻng, Bobur shu bugun bitgan masnaviy she'ridan toʻrt satrini yoddan aytdi:

Kimki oʻlmak oʻziga jazm etar, Ushbu holatta bilursenki netar. Aritur barcha gunohidan oʻzin... Tavba qildim chogʻir ichmaklikdin!

Soʻnggi satrini baland ovoz bilan aytgandan soʻng, surohiydagi mayni oyogʻi ostidagi chuqurga sepib tashladi. Soʻng surohiyni chuqur yonidagi xarsangtoshga qarsillatib urdi. Oltin surohiy xuddi uchqun sachratganday «yalt-yult» etib pachaqlandiyu, koʻkat orasiga yumalab tushdi. Bunday hodisani umrlarida birinchi marta koʻrayotgan bek-u navkarlar qoʻllaridagi maylarini nima qilishni bilmay sarosima boʻlib qolishdi. Bobur yana jarangdor, ta'sirli tovush bilan she'r aytdi:

Oltin-u nuqra surohi-yu, ayoq – Majlis olotin tamomi bul choq Hozir aylab borini sindurdum! Tark etib mayni koʻngil tindirdum!

Bek-u navkarlar hang-mang boʻlib turishibdi. Kimlardir qoʻllaridagi xushboʻy mayni chuqurga toʻkishdan qizgʻanadi. Kimlardir oltin-kumush surohiylarni xarsangga urib sindirishga jur'at etolmaydi. Balki Bobur oʻziga ep koʻrgan bu ish bek-u navkarlarga joiz emasdir? Oʻzining ta'sirli nutqlari-yu she'rlari bilan ixlosmandlarini sehrlab olishga va ortidan ergashtirishga oʻrgangan Bobur bugun har qachongidan ham ortiq e'tiqod bilan soʻzlamoqda:

– Beklar! Yigitlar! Qachongacha nafsimizga tobe boʻlurmiz? Tokay umrimizni mayga zoye eturmiz? Ichkulikning harom kayfi kimga vafo qilibdiki, siz-u bizga vafo qilgay? Oltin-u nuqraga achinmang! Surohiylarning sinigʻini miskin-u bechoralarga ulashgaymiz. Agar Tangrim bizga madad bersa, ertangi jangdan gʻolib chiqgaymiz! May toʻkilgan mana shu chuqur oʻrniga obod bir manzil-u marmar voyin qurdirgaymiz. Niyat qilaylikki, voyin zilolday buloq suviga toʻlib tursin. Voyin boʻyiga xayr-ehson uyi barpo etaylik. Toki bu uyda ichkulik bazmlarining sarf-u xarajatini, oltin-u nuqra surohiylar pulini muhtojlarga xayr-u ehson qilib ulashsinlar. Shu ezgu niyat yoʻlida kimki menga hamdam-u maslakdosh boʻlsa mayni toʻksin, sindirsin mayxoʻrlik olotini!

Bobur Humoyunga bir qarab oldi. Bu qarashning ma'nosini sezgan Humoyun:

 Hazrat otajon, men doim sizdan ibrat olishga oʻrganmishmen, – dedi. – Daf boʻlsin may-u surohiy!

Humoyun mayni chuqurga sepdi-yu, oltin surohiyni xarsangga urib sindirdi. Undan soʻng Askariy, Tohir, Hindubek... bir necha soat ichida uch yuzga yaqin bek-u mulozim qoʻlidagi qadahini xarsangga urib, may ichishdan tavba qildi. Bu hodisa oʻsha kuni

qarorgohdagi oʻn ming jangchining hammasiga ma'lum qilindi. Boburning hayot-mamot jangi oldidan chiqargan farmonida:

– Oʻz nafsini yenggan odamlar har qanday yogʻiyni yengishga qodirdirlar! – degan soʻzlar maxsus ta'kidlandi va buni isbot etadigan misollar muqaddas kitoblardan ham keltirildi.

Bu hammasi qoʻshin orasida tarqalgan vahimani bosishga va odamlarning ruhini koʻtarishga yordam berdi. Boshqa muammolar jang maydonida hal boʻldi. Zambaraklar yovning harbiy fillariga olovli oʻqlar otdilar. Zambarak oʻqlari kigiz parchalariga oʻralgan edi. Borutdan oʻt olgan kigiz parchalari fillarning ustiga olov boʻlib yogʻilardi. Olovdan choʻchigan yov fillari boʻkirib orqaga qaytar va izma-iz kelayotgan otligʻ-u piyodalarni bosib-yanchib qochib qolardi. Lekin Rano Sangramning qoʻshini behisob koʻp edi.

Erta tongdan boshlangan jang kechgacha davom etdi. Boburning oʻzi ogʻir ahvol yuz bergan joylarga ot choptirib borardi. U zaxiradagi kuchlar yordamida yovning eng xatarli hujumlarini bir necha marta qaytarishga muvaffaq boʻldi. Humoyun oʻng qanotdan, Askariy chap qanotdan yov askarlariga ustma-ust zarbalar berdi. Kechki payt Boburning buyrugʻi bilan Turdibek Turkistoniy chopqir otlarda yovning har ikki qanotini aylanib oʻtdi-da, toʻlgʻama ishlatib, orqadan qaqshatqich zarba berdi.

Olov halqasi ichida qolgan Rano Sangramning koʻziga oʻq tegdi, bir koʻzi koʻrmay qoldi. Shunda rajput soqchilari uni jang maydonidan olib chiqib qochdilar... Gʻalabadan soʻng oʻsha chuqur oʻrniga marmar voyin, uning yoniga xayr-ehson uyi qurildi. Xarsangga urib sindirilgan oltin-kumush surohiylar puli beva-yu yetimlarga, gʻarib-u muhtojlarga ulashildi...

Keyinchalik Bobur Rano Sangram Sinxning bir koʻzi oqib tushganini, oʻzi magʻlubiyat alamidan ogʻir kasalga uchrab yotib qolganini eshitdi. Hozir buni Xondamirga soʻzlab bergach:

- Gʻayridinlar uchun ham Xudo bor ekan! - dedi. - Rano Sangram biz bilan ittifoq tuzgan edi. Soʻzidan qaytib, ahdini buzganlarga Xudo oʻzi jazo berarkan! «Vaqoi'»ning maxsus bobida muhoribaning barcha tafsilotlarini yozmishmen. Xattot kitobning tayyor qismlari bilan birga shu bobni ham bugun koʻchirib boʻlgay. Oqshom hammasini sizga berurmen, mavlono. Oʻqib fikr aytursiz.

Boya javobsiz qolgan iltimosiga endi javob olgan Xondamir qoʻlini koʻksiga qoʻydi:

- Siz menga tengsiz bir ishonch bildirursiz, hazratim!
- Sizni Hirotdan chorlab keltirishdan maqsad ham ijodiy ishlar boʻyicha maslahatingizni olmoq edi.
 - Sarafrozmen!

Shu payt ot dupuri eshitildi. Yoʻlka oxirida uzoqdan ot choptirib kelgan chopar sakrab yerga tushdi va ta'zim bilan Bobur tomonga kela boshladi.

– Agrada biron shoshilinch ish chiqqanga oʻxshaydir, – dedi Bobur. – Mavlono, agar men poytaxtga ketsam, «Vaqoi'»ni sizga oqshom keltirib berurlar.

Bobur otini tutib turgan jilovdor tomonga yoʻnaldi.

2

Sekri togʻining shimoliy yonbagʻrida salqin bogʻning toʻrida joylashgan uch xonali shinam xilvatxona mavlono Xondamirga berilgan edi. Bobur oʻsha kuni Agraga joʻnab ketdi. Mavlono xilvatxonaning oʻymakor ayvoniga chiqib, undan yaxshi koʻrinadigan shishaday tiniq koʻlni tomosha qilib oʻtirganida xonayi xosning savdarboshisi Boburning qoʻlyozmasini unga olib kelib berdi. Qoʻlyozma xattot tomonidan zarvaraqlarga benihoya chiroyli qilib koʻchirilgan edi. Xondamir

uni xona ichiga olib kirib, miz ustiga qoʻydi. Tepada yonayotgan shamlarni miz ustiga yaxshi yorugʻ beradigan qilib oʻrnatgach, koʻzoynagini taqdi va asarni ehtiyot bilan varaqlab oʻqishga tushdi.

Bundan o'n yilcha avval Bobur Hirotga ikkinchi marta borganida Xondamirga «Vaqoi'»dan oʻqib bergan bobning uslubi mavlononi xiyol taajjubga solgan edi. Mana bu qoʻlyozmada ham Bobur qalamga olgan voqealar juda murakkab boʻlsa-da, muallif ularni ogʻzaki hikovaga yaqin bir tarzda xivla oddiv uslubda vozgan edi. Koʻp joylarda Xondamir hatto Boburning soʻzlash tarzini, ohangi, ba'zi bir shaxsiy xislatlarini paygab: «G'alati-ku!» - deb go'ydi. Chunki otasi Mirxond Xondamirni yoshlikdan boshqacha e'tiqodlar bilan tarbiyalab oʻstirgan edi. Bu e'tiqodga binoan, nasrnavis muarrix oʻz shaxsiy uslubini davr uslubiga bo'ysundirmog'i, o'z «meni»ni davr ummoniga qo'shib bilintirmay yubormogʻi kerak edi. Agar asarda muallif oʻzini namoyon qilaversa, bu - nokamtarlik belgisi hisoblanardi. Katta tarixiy kitoblar hukmdorlar uchun yozilar, asosiy ta'rif-u tavsif o'shalarning ishlariga berilardi. Nazokatli oʻxshatishlar, jimjimador majozlar va shoirona koʻtarinki uslub hukmdorlarga xush kelar va barcha mualliflar boʻysunadigan bir qonun hisoblanardi.

Bobur mana shu qonunni butunlay inkor etuvchi uslub bilan asar yozgani Xondamirga ortiq darajadagi bir shakkoklikdek tuyildi. Bobur oʻgʻli Humoyunga yozgan xatini ham kitobida keltirgan edi:

«...Xat bitirda takalluf qilay deysen, ul jihattin mugʻlaq¹ boʻladur. Betakalluf pok alfoz bila bit, senga ham tashvish oz boʻlar va oʻqigʻuvchigʻa ham». «Ajabo! – oʻylandi Xondamir, – betakalluf til bilan asar bitmoq Bobur mirzo uchun pok uslub belgisi hisoblanur

¹ Mugʻlaq – tushunib boʻlmaydigan.

ekan-da!» Xondamir oʻzining oʻn yildan beri yozayotgan «Habib us-siyar»ida nazokatli takalluflar koʻpligini esladi-yu, oʻzini oʻngʻaysiz sezib, oʻqishdan toʻxtadi va ayvonga chiqdi.

Osmonda sakkiz kunlik oy suzib yurar, uning nuri qarshidagi koʻlning oʻrtasida oydin yoʻlka hosil qilgan edi. Koʻlning narigi chetidan togʻ etagigacha kelgan bu nur yoʻlkasida toʻlqinlar jimir-jimiri gavhar jilvasiga oʻxshab koʻzni qamashtirardi. Lekin Xondamir shu nur oʻyinida ham Bobur tasvirlagan voqealarni koʻrar, ularning ta'sirini xayolidan uzoqlashtirolmas edi.

Sertakalluf, serbezak uslub Xondamirdan juda koʻp kuch, vaqt, mehnat talab qilar edi. Bunday jimjimador uslubda asar yozish qanchalik qiyin boʻlsa, uni oʻqib tushunish ham shunchalik qiyin edi. Bobur ikki tomonni ham bu qiyinchilikdan qutqarishga intilsa nimasi yomon? Oʻgʻliga yozgan xatida «senga ham tashvish oz boʻlar, oʻqigʻuvchiga ham» deganda u haqli emasmi? Unda Xondamirning yuksak shoirona uslubga oid e'tiqodlari puchga chiqadimi? Yoʻq, bu mumkin emas! Xondamir qaytib ichkariga kirdi-yu, oʻzining haqligiga dalil qidirib, ochiq qoʻlyozmaning davomini oʻqishga tushdi.

Hali hech bir muarrix qalamga olmagan gʻaroyib voqealar bu qadar koʻp! Xondamir kitobning mazmuni yangi va maroqli ekaniga tan bermay iloji qolmadi. Bobur oʻzini-oʻzi ochiqchasiga muhokama qilgan, oʻz xatolarini roʻyi-rost yozgan joylari ham Xondamirga juda iliq tuyildi. Oxirgi boblarida yana ajib bir xat uchradi. Bobur Agradan Kobulga yuborgan bu maktub Mohim begimga atab yozilganini Xondamir sezdi. Boburning zaharlanish tafsilotlari shu yerda bitilgan edi: «Dasturxon ustida ikki-uch marta koʻnglum barham urib qusayozdim. Oxir koʻrdumkim boʻlmas, qoʻpdum... Obxonaga borib qalin qusdim. Hargiz

oshdin soʻng qusmas edim, balki ichganda ham qusmas edim. Koʻnglimga shubha kechdi.

...Jon mundoq aziz nima emish: muncha bilmas edim, ul misra' borkim:

«Kim oʻlar holatga yetsa, Ul bilur jon qadrini».

Tengri taoloning inoyati bor ekandir, manga yangi boshdan jon bagʻishladi».

Bobur oʻz hayoti haqida bu qadar ochiqchasiga yozgani Xondamirni hayron qoldirdi. Keyingi bobda yana bir tafsilot uning e'tiborini tortdi. Ichkilikni bundan ikki yil odin tashlagan Bobur uni haligacha qaytib ogʻziga olmas edi. Buning oson boʻlmaganini Xondamir quyidagi satrlardan bildi: «Bu oʻtgan ikki yilda chogʻir majlisining orzu va ishtiyoqi behad va gʻoyat edi, andoqki, chogʻir ishtiyoqidan borlar¹ yigʻlamoq sarhadiga yetar edim».

O'z istagiga qarshi kurashib, yigʻlash darajasiga borganini ochiq yozish tojdorlar orasida misli koʻrilmagan bir sohibdillik ekaniga Xondamir ichichidan tan berdi. Ochiqchasiga aytgan mana shunaqa oddiy tafsilotlar tufayli Bobur unga oʻzi kabi bir inson farzandi boʻlib tuyildi. Ammo boshqa tojdorlar tarixiy kitoblarda oddiy odamlarga oʻxshab koʻrinishdan ganchalik choʻchivdilar! Ular el-vurtdan mumkin qadar balandda boʻlishni, oddiy insondan koʻra Xudoga yaqinroq turishni qanchalik yaxshi koʻradilar! Shuning uchun ham Xondamirdek muarrixlar podsholar haqida oddiy odamlar tushunmaydigan balandparvoz, sertakalluf tilda kitob vozishga majbur boʻladilar. Bobur oʻzi podshoh boʻlgach, bunday takalluflarni kim uchun yozadi? Hamma tomonidan qabul qilingan davr uslubining qonunlarini buzib chiqib, oʻz hayoti haqida

¹ Borlar – «ba'zi paytlar» ma'nosida.

shunday erkinlik va rostgoʻylik bilan asar yozishi – hech kimga qaram emasligi tufayli emasmikin?

Bu fikr Xondamirni Boburning uslubidagi oʻzgachalik bilan goʻyo yarashtirdi. Shundan keyin Boburga xos oddiylikning teran bir she'riy nafosati ham borligini, bu nafosat odamni sehrlab olishini sezdi. Tun yarmidan oshganda esa asarda tasvirlangan voqealarga qiziqib, uslubini butunlay esdan ham chiqardi. Tongga yaqin ozgina uxlab, soʻng yana oʻqishni davom ettirdiyu, qoʻlyozmaning oxiriga yetmaguncha undan ajralolmadi.

Bobur Sekriga uchinchi kun ertalab qaytib keldi – kunduzi havo juda issiq boʻlgani uchun yoʻlni tun salqinida bosib oʻtgan edi. U Xondamirni yana bogʻda uchratdi, ikkovi piyoda oʻsha buloq boʻyiga keldilar.

Bobur yoʻl yurib charchagan, uyqusiz oʻtgan yana bir tun yuzini juda soʻlitib qoʻygan boʻlsa ham u oʻzini xushhol tutib:

- Mavlono, mensiz dilgir boʻlmadingizmi? dedi.
- Hazratim, men tun-u kun sizdan ayrilmay suhbatingizda boʻldim, siz yozgan asar sahifalarida unutilmas damlarni boshdan kechirdim.
 - Hali oxiriga yetmagandirsiz?
- Kecha peshinda oxirgi sahifasini yopganimcha hamon uning ta'siri bilan yashamoqdamen.
 - Meni ayamang, mavlono, rostini ayting.
- Rostini aytsam, siz meni chil-chil sindirdingiz! Xondamir bu gapni shunday jiddiy turib, ichki bir dard bilan aytdiki, Bobur taajjublanib toʻxtadi:
 - Nechuk sindirmishmen, mavlono?
- Uslubingizdagi nafis bir soddalik qarshisida mening yuksak shoirona uslubim ortiqcha bir takallufdek tuyildi.
- E, takallufmi? Ammo mening ahvolim oʻzingizga ma'lum. Jumlalarni takalluf bilan bezashga fursatim yoʻq edi.

– Asli goʻzal boʻlgan yuzga ortiqcha zeb-ziynat ne hojat? Hazratim, siz adabiyotimizda hali hech kim qilmagan ulugʻ bir ishni qilmishsiz. Muborak boʻlsin!

- Minnatdormen, mavlono. Biroq hali men bu ishning yoʻqolgan sahifalarini tiklamogʻim kerak.
- Tiklashingizga aminmen. Oxiri yana boshqa nek ishlaringiz yozilgusidir. Biroq shu turishda ham men bu ulkan asaringizni turkiy tilda aytilgan yangi bir soʻzdek qabul qildim. Men aminmenki, avlodlarimiz sizning bu shoh asaringizni Alisher Navoiyning «Xamsa»si kabi e'zozlagaylar. Chunki shu vaqtgacha turkiy tilda bitilgan eng ulugʻ she'riy asar «Xamsa» boʻlsa, shu vaqtgacha turkiy tilda bitilgan eng ulugʻ nasriy asar, menimcha, «Boburnoma» boʻlgʻusidir.
- Mavlono, garchi mubolagʻa qilgan boʻlsangiz ham, dil soʻzlaringiz uchun tashakkur. Men bu asarni nihoyasiga yetkazish uchun bugun yana Sekriga qaytib keldim. Agar nuqsonlari boʻlsa ochiq ayting.
- Faqir ba'zi sahifalardagi sanalar-u nomlarda noaniqliklar uchratdim. Xususan, Hirotga Husayn Boyqaro saroyiga oid boblar xiyol tahrirtalab.
- Mana shu nuqtalarda menga sizning koʻmagingiz darkor.
- Bajonidil, hazratim. Neki noaniqlik boʻlsa, barchasini alohida qogʻozga yozib qoʻydim. Asaringiz bilan birga bermoqchimen.

Shu payt tepadan oʻtayotgan qushlar keskin hushtak chalganga oʻxshab noxush ovoz chiqargani eshitildi. Bobur osmonga qarab, qoramtir-qizgʻish kalxatlar galasi qanot qoqmay uchib borayotganini koʻrdi. Soʻng ularni Xondamirga koʻrsatib:

- Bu yirtqichlar janglardan soʻng oʻlaksa yeb mazaxoʻrak boʻlmishlar, - dedi. - Rano Sango bilan boʻlgan jangdan soʻng mana shu koʻl atroflarida, bogʻning oʻrnida oʻlib yotgan odamlar, otlar, tuyalar, fillar behisob edi. Kalxatlar qon hidini sezib, uzoqlardan gala-gala uchib kelganlari yodimda bor...

Bu xotira Boburda noxush tuygʻular qoʻzgʻaganini sezgan Xondamir:

- Nachora, hazratim, dedi. Hanuzgacha hech bir ulugʻdavlat jang-u jadalsiz barpo boʻlgan emasdir.
- Soʻzingiz chin-u, ammo... Soʻnggi yillarning voqealarini qogʻozga tushirganimda, barcha qurbonlar, toʻkilgan barcha qonlar koʻz oʻngimda shunday toʻliq gavdalandiki, uyqularim oʻchib ketdi... Bajur qoʻrgʻonida uch ming kishining qilichdan oʻtkazilgani... Panipatda bir necha yuz asirning toʻfangdan otib oʻldirilgani... Bizning odamlar ham kalla-minoralar qoʻnargani...
 - Hammasini umr kitobingizda roʻyirost bitmishsiz.
- Chunki avlodlar haqiqatni bilsinlar, bizni farishta deb oʻylamasinlar. Qilgan gunohlarimiz oʻzimizga nechogʻliq ogʻir tushganidan ogoh boʻlsinlar.

Boburning ruhida dam-badam sezilib qolayotgan ichki bir dard – faqat xastalik yoki charchoqlikdan emasligini Xondamir endi sezdi. Bobur ijodiy ishga berilgan sari uning qalbidagi shoh bilan shoirning murosa qilishi qiyinlashib ketardi.

Xondamir beixtiyor Hirotni va Alisher Navoiy bilan Husayn Boyqaro orasidagi murakkab munosabatlarni esladi. Bu ikki zot yoshlikdan bir-birlarini yaxshi koʻrar edilar, ammo podshohning shafqatsiz ishlari shoirning nafis tuygʻulariga shu darajada zid kelar ediki, Alisher Navoiy Husayn Boyqaro bilan bir shaharga, hatto bir mamlakatga sigʻishmay qoladigan va Xurosonni tashlab hajga ketishga astoydil intiladigan paytlari boʻlardi.

Hatto bir shaharga va bir mamlakatga sigʻmaydigan katta shoir bilan podshoh Boburning qalbida birga yashashga majbur ekanini va bu uni qanchalik qiyin ahvollarga solishini Xondamir hozir yaqindan

koʻrganday boʻldi. Uning yodiga Boburning: Yuz hayfki, zoye oʻtadir umri aziz, Afsuski, botil¹ boradir umri sharif! degan satrlari tushdi. «Shoir bu satrlarni podshohlik tashvishlaridan toʻyib ketgan paytda yozgan boʻlsa kerak!» degan oʻy koʻnglidan kechdi.

Bobur buloq boʻyiga choʻnqayib oʻtirib, kaftini muzday tiniq suvga toʻldirib oldi-da, uni simirib, xiyol tafti bosilganday boʻldi.

Xondamir gapni yoqimliroq mavzuga burgisi keldi:

- Hazratim, Hirotda uchrashganimizda siz oʻz hayotingizni... koʻchki bosgan buloqqa oʻxshatgan edingiz. Yodingizdami?
 - Yodimda bor.
- Faqir hozir taxmin qildimkim, Movarounnahrda koʻchki bosgan buloq balki shu yerga kelib qayta koʻz ochgandir?
- Aql bovar qilmaydir. Orada shuncha uzoq masofalar bor.
- Lekin chinakam zoʻr iste'dodlar oʻlmas buloqlarga oʻxshar ekanlar. Ularning koʻzini oʻn joyda bekitsalar, oʻn birinchi joydan yana yorib chiqar ekanlar!
- Lutf qildingiz, mavlono. Hozir ijodiy ish meni xuddi shu toza buloqdek oʻziga tortadir. Janglarning qonli sellari, saltanatning betinim toʻfonlari jonimga tegdi. Toju taxt bevafoligini koʻpdan beri sezib yuribmen. Menga vafo qilsa faqat yozgan asarlarim vafo qilgusidir. Ota yurtim Turkistonga oʻzim qaytolmasam ham, asarlarim qaytishi mumkin.
- Inshoolloh, siz ota yurtingizga zafar bilan qaytursiz. Toshkentda, Samarqand-u Hirotda sizning qaytishingizni kutib yurgan ixlosmandlaringiz koʻp.
- Ammo gʻanimlarimiz ulardan koʻproqdir, mavlono. Ular bilan jang qilib vatanga qaytguncha yana qon daryosida suzmoq kerak... Men bundan juda

¹ Botil – qalbaki yoʻldan borish, adashish.

bezganmen... Qilich bilan olingan ellar vafo qilmas ekanlar. Faqat ma'naviy zafarlar umrboqiy boʻlishini keyingi davrlar bizga koʻrsatdi.

- Hazrat Alisher ham ma'naviyatni hamma narsadan baland qoʻyar edilar. Siz chindan ul zotning buyuk ishini davom etdirmoqdasiz.
- Afsuski, hazrat Alisherdek daholar turk olamida ancha kech paydo boʻlmishdir. Jahon boʻylab ot oʻynatib, qilich topgan turk bahodirlari ming yillar davomida Chin-Mochindan Misrgacha, Hinddan Farangistongacha qanchadan-qancha qudratli davlatlar barpo etganlar. Ammo ular oʻz davlatlarini umrboqiy qiladigan turkiy alifbo-yu ona tiliga, yaxlit bir turkiy ma'naviyatni yaratishga yaxshi e'tibor bermaganlar. Qilich bilan tiklangan davlatlarning ma'naviy poydevori mustahkam boʻlmasa, ular boshqa qilichlar zarbidan tez qulab tusharkan.
- Rost, hazratim, turk olamining bu tarixiy nuqsoni haqida siz bilan Hirotda ham koʻp dardlashgan edik.
- Ana oʻshal dardlarning turtkisi bilan men Kobul-u Samarqandda turkiy alifboni tiklamoqchi boʻldim. Bundan maqsad – barcha davlat ishini turkiy tilda yuritmoq edi. Ammo... bu harakat qanday fojia bilan tugagani ma'lumingizdir.
- E-voh, shunday ulugʻ jasorat uvol boʻldi-ya! Johillar yana gʻolib keldilar!
- Ammo turkiy alifbo bilan turkiy ma'naviyatga oid orzular meni hamon tark etgan emas. Oʻgʻillarim Humoyun bilan Komron xatti Sigʻnoqiyni mukammal oʻrganibdir, menga oʻshal alifboda maktublar biturlar. Hozir men tun-u kun turkiy tilda oʻylaymen, shu tilda ijod qilmoqdamen. Chunki bizga ona suti bilan kirgan tilimiz bizning ma'naviy vatanimizdir. Turkiy tilda yozganimda ruhim yana Andijon-u Samarqandga qaytgandek taskin topur.

Ma'naviyat ohanrabosi bilan turkiy ellarni ruhan yaqin-u inoq qilish mening ezgu niyatimdir. Bu niyatga biz yetolmasak, shoyad kelgusi avlodlar yetsa!

Bobur koʻpdan beri uyqusiz yurganidanmi yoki sogʻinch hissining zoʻridanmi, koʻzlari beixtiyor yoshga toʻldi.

- Men ham Hirotni behad sogʻinib yuribmen, hazratim. Lekin... oʻzingiz aytgan edingizki, Hind ham endi biz uchun vatan. Yozgan asarlaringiz Hindning shavkatiga ham shavkat qoʻshgʻusidir. Hindda barpo qilgan ulugʻ davlatingiz esa sizni voyaga yetkazgan Movarounnahrga ham shuhrat keltirgusidir.
 - Zora shunday boʻlsa! dedi Bobur.

U Xondamir bilan kechgacha dardlashib yurdi-yu, koʻnglini boʻshatib, oʻzini ancha yengil sezdi.

Biroq kechasi yana uyqusi qochib, tong otguncha mijja qoqmadi.

AGRA

YULDUZLAR GIRDOBI

1

Yana yozning jazirama issiqlari boshlandi. Bobur goh devoniomda, goh kutubxonada ishlar, mudom ichi kuyib, sovitilgan norinj sharbati va yaxna choy ichar, lekin chanqogʻi hech bosilmas edi.

Bir kun peshin kechroq Tohir xilvatxonaga uchtoʻrt bosh oq kishmish uzum olib kirdi. Hozirgina uzib yuvilgan oltin rang kishmish donalari ustida suv zarralari yiltirab turadi. Koʻpdan beri bunday uzumni koʻrmagan Bobur taajjub bilan:

- Qaydan oldingiz? dedi.
- Oʻzimizning Hasht Bihisht bogʻimizdan. Samarqanddan keltirilgan kishmish koʻchatini oʻz ilkingiz bilan ekkaningiz yodingizdami, hazratim?

Bobur quvonib uzumdan bir boshini qoʻliga oldi. Bu yerlarning tarixida birinchi marta yetishtirilgan oq kishmish sal sersuvroq boʻlsa ham, lekin uning ta'mi Boburga Samarqandni eslatdi. Uzum yegan sari chanqogʻi bosilib, oʻzini birdan tetik sezdi.

– Buni Mohimga koʻrsatmoq kerak! – deb oʻrnidan turdi.

Bultur kuzda Kobuldan Agraga koʻchib kelgan Mohim begim bu bogʻning toʻridagi marmar koʻshkda edi. Bobur barkashdagi uzumni Tohirga koʻtartirib, gulzor yoʻlkalardan koʻshkka qarab ketdi.

Havo dim va rutubatli. Yana pashkol fasli boshlanib, osmondan bulut arimay qolgan. Barkashdagi oltinrang kishmish Boburga shu bulutlarni yorib oʻtib, uzoq

Samarqanddan yetib kelgan yorugʻ bir nurdek koʻrinardi.

Mohim begim koʻshkning ayvonida miz ustiga engashib allanarsa yozmoqda edi.

Ayvonga Tohirni ergashtirib kirgan Bobur:

- Uzumimiz pishibdi, Mohim! - dedi. - Bir tatib koʻring.

Mohim begim oʻrnidan turib, Boburni odatdagiday ta'zim bilan qarshi oldi, lekin oʻpkasi toʻlib, durust gapirolmadi. Soʻnggi ikki yil ichida yarasidan qolgan asoratlar tuzalib, qoʻllari avvalgiday ishlaydigan boʻlib ketgan Tohir uzumni ta'zim bilan Mohim begimga tutdi.

Mohim begim barkashni uning qoʻlidan olib, miz ustiga qoʻydi. Uning qovoqlari shishib, koʻzlari yigʻidan qizarganini payqagan Tohir sekin orqasi bilan yurib chiqib ketdi.

Er-xotin yolgʻiz qolganlarida Bobur:

- Sizga ne boʻldi? dedi. Yigʻlabsizmi?
- Nafasim qisildi...

Mohim begim qirq yoshga borgandan beri yuzlari toʻlishib, anchagina semirib qolgan edi. Kobulning yengil va quruq togʻ havosiga oʻrgangan begim Jamna boʻyidagi issiq kunlarda sernam dim havodan nafas olish qanchalik qiyin boʻlishini avval ham eshitgan, bir chekkasi shu sababdan toʻrt yilgacha Agraga kelmay yurgan, axiri Boburning yuzidan oʻtolmay bultur kelgan edi.

– Pashkol faslida men ham juda qiynalib nafas olurmen, – dedi Bobur. – Tashvish chekmang, oʻrganib ketursiz. Qani, uzumdan oling!

Mohim begimning hech narsa yegisi kelmas edi. Shunday boʻlsa ham kishmishdan ikki dona olib ogʻziga soldi-yu, Boburning koʻngliga boʻla:

- Yaxshi pishibdir, - dedi.

- Maktub yozmoqchi edingizmi?
- Ha, Humoyunga... Mening nafasimni pashkol emas, sogʻinch qisadir!

Toʻlib oʻtirgan Mohim begim birdan yigʻlab yubordi:

- Men hamisha Humoyunning diydoriga zormen. Siz mudom oʻgʻlimni mendan uzoqlarga yuborursiz! Kobulda ekanimda Humoyun Jamna-yu Ganga boʻylaridan boʻshamadi. Men Agraga keldim, Humoyun Badaxshonga joʻnab ketdi. Badaxshonni tinchitib qaytdi hamki, uni yana uzoq Sambxalga yubordingiz. Qayerda bir xatar boʻlsa, oʻshanga Humoyun roʻbaroʻ! Qaysi uzoq yurtda mushkul ish boʻlsa yana Humoyun! Men bu yerda xavotirlikda qon yutib iztirob chekurmen!
 - Bunchalik xavotirlanishning ne hojati bor, Mohim!
- Siz xavotirlanmaysiz, hazratim, sizning farzandlaringiz koʻp! Mening yolgʻiz farzandim qolgan! Uchtasini tuproqqa topshirib, shu birgina Humoyun bilan qolganmen!

Boburning boshqa xotinlari va ulardan boʻlgan boshqa bolalari ham borligi Mohim begimda qanchalik murakkab tuygʻular qoʻzgʻashini Bobur hozir yana bir marta sezdi. Shu payt xonaga sakkiz yoshli Gulbadan chopib kirib keldi. Boʻynidagi jajji taqinchoqlarini shildiratib, otasi qarshisida egilib ta'zim qildi. Lekin onasining yigʻlab, oʻrtanib gapirayotganini koʻrdi-yu, xavotirlanib toʻxtadi.

- Mohim, dedi past tovush bilan Bobur, Hindol bilan Gulbadan ham sizga farzand-ku, axir!
- Komron mirzo-chi, hazratim? U kishi sizning oʻgʻlingiz emasmilar? U kishi Laxoʻrda onalari bilan tinchgina yuribdilar! Nechun hamma baloga Humoyun balogardon boʻlmogʻi kerak?
- Chunki Humoyun taxt vorisi! Men qilmogʻim kerak boʻlgan mushkul ishlarni Humoyun qilib oʻrganmogʻi kerak.

– Men xavotirlanib qon yutsam mayli! Siz bunga parvo qilmaysiz, chunki boshqa xotinlaringiz bor!

Gulbadan ota-onasini hech qachon bunday mushkul va noqulay ahvolda koʻrmagan edi. U koʻzlari javdirab, nima gap boʻlayotganini tushunolmay lol boʻlib turardi. Axir hazrat onasi podshoh otasiga nihovatda mehribon edi-ku. Kobuldan ikki ov voʻl yurib, kela-kelguncha uning nomini tildan qoʻymay e'zozlab gapirar edi-ku! Hazrat otasi ham ularga Agradan peshvoz chiqib, Jaloli koʻli yaqinida kutib olmaganmidi? Charchagan otidan tushib, boshqa ot keltirgunlaricha sabri chidamagan Bobur Mohim begimning oldiga piyoda kelgan emasmidi? Soʻng suyukli xotinini e'zozlab, uni otdan tushishga qo'vmagan, o'zi esa Mohim begimning oti vonida uch chaqirimcha joyga piyoda borgan edi-ku. Buni koʻrgan odamlar: «Podshohning oʻz xotinini bu darajada yuksak izzat-ikrom bilan kutib olganini umrimizda koʻrgan emasmiz!» deganlarini Gulbadan oʻz qulogʻi bilan eshitgan edi-ku. Hozir bularga nima boʻldi?

Bobur qizchasining hang-mang boʻlib turganini sezib, tez oʻrnidan turdi, barkashdagi uzumdan bir boshini qoʻliga berdi:

– Ma, qizim, ye! – deb unga muloyim gapirib, eshikdan tashqariga yetaklab chiqdi. – Bor, endi bogʻda oʻyna.

U koʻz yoshlarini hamon toʻxtatolmayotgan Mohimning qarshisiga qaytib kelib oʻtirdi va hazin tovush bilan dedi:

– Mohim, siz mendan har qancha ranjisangiz haqingiz bor. Shariat ruxsat bergani bilan har bir musulmon uch xotin olishi shart emas edi... Mendek sayyohtabiat odam... umrining yarmidan koʻpini safarlarda, janglarda oʻtkazishini bila turib, uch xotin olishi... kechirilmaydigan bir xatolik boʻldi. Bu xotinlarning hech biri men orzu qilgandek baxtiyor boʻlolmaganini... bugun sizga qarab koʻrib turibmen... Kundoshlik alamlari... Bir-biriga oʻgay bolalarning raqobati... Ota-bobolarimizni oʻrtagan bu jahannamlar bizga daxl qilmas, deb oʻylagan edim... Yoʻq, mana, hatto sizdek suyukli yorim ham... shu jahannam azobidan koʻzyosh toʻkmoqdasiz. Majruh dilim sizni koʻrib, battar xastalandi.

Mohim begim Boburning sargʻayib qolgan kasalmand yuziga qaradi-yu, koʻz yoshini apil-tapil arta boshladi.

- Hazratim, mendan ozorlanmang. Men bir munglik ayolmen. Siz podshohsiz. Arzimni sizga aytmasam, kimga aytamen?
- Ha, men podshohmen butun balo shunda. Neki xatolik, neki gunoh qilgan boʻlsam, hammasining birlamchi sababi mening podshohligimdir. Yoshligimda podshohlik zanjiridan qutulib ketmoqchi boʻldim. Lekin meni bu zanjirdan xalos qiladigan najotkor topilmadi. Endi umidim borki, mening najotkorim Humoyun boʻlgʻusidir.

Mohim begim Boburning bu soʻzlariga ishonibishonmaganday unga termilib qaradi.

- Mohim, maktubingizni davom ettiring. Mening nomimdan ham yozing, Humoyun Agraga tezroq qaytsin. Koʻzim tirikligida toj-u taxtni egallasin. Yozing, men imzo chekurmen!
- Hazratim, Siz Humoyunni toj-u taxtga bunchalik intiq deb oʻylamang! Hech unday emas! Men faqat oʻgʻlimiz yonimizda boʻlsin demoqchi edim, xolos!
- Yozing, kelsin!.. Faqat podshoh boʻlish sharti bilan kelsin. Bu maxfiy gapni hozircha boshqa hech kim bilmasin.

Boburning niyati jiddiyligiga endi ishongan Mohim begim:

- Siz... Kobulga qaytmoqchimisiz? - deb soʻradi.

- Mabodo, olamdan koʻz yumsam, Kobulda dafn etinglar.
 - Nechun bunday deysiz?
- Sizdan yashiradigan sirim yoʻq, Mohim. Siz Kobulda «fotihlikning qasosi qaytsa, yomon boʻlur», degan edingiz. Shu gapingiz rost chiqdi. Podshohlig-u fotihlik balolari malika Bayda bergan zahar shakliga kirib, mening umrimni kemirdi. Agar men ham bor kuchimni faqat ilm-u ijodga bersam, balki Beruniydek yetmishdan osharmidim? Yoki Alisher Navoiydek oltmishga kirarmidim? Biroq mana qirq yetti yoshimda umrimning oxiri koʻrinib qoldi.
- Niyatni yaxshi qiling, hazratim! Xudo xohlasa, hali umringiz uzoq boʻlgʻusidir!
- Ne boʻlganda ham endi podshohlik bas. Qolgan umrimni ijodga sarflamoqchimen! Menga saroylar-u qasrlarning keragi yoʻq. Mana shu Zarafshon bogʻining bir goʻshasi boʻlsa bas... Ortiqcha savdar-u mulozimlar ham darkor emas. Tohir oftobachining bir oʻzi menga yetarlik. Humoyunga shu qarorimni aytib, ikkovimizning nomimizdan yozing!

Mohim begim Boburga juda ogʻir tegadigan mavzularda gap ochganidan endi qattiq pushaymon boʻldi-yu, eriga iltijo qilib:

– Meni kechiring! – dedi. – Men hech xayolimga keltirmagan gap... Bu mumkin emas! Men bunday maktubni yozolmasmen!

Bobur oʻrnidan turdi.

– Boʻlmasa men oʻzim yozgaymen, – deb koʻshkdan chiqdi.

U bogʻ oralab xilvatxonaga qarab borayotganda, gulzor yoʻlkada kichkina Gulbadanni uchratdi.

Ziyrak qizcha otasini qiynab yurgan mushkulotlarni tushunmasa ham unga ich-ichidan qayishib, hamdardlik bildirayotgandek moʻltirab qarab turardi¹.

2

Otasining maxfiy maktubi borganda Humoyun Sambxalda ogʻir kasalga chalinib toʻshakda yotgan edi. Maktubni oʻqigach odamlariga:

- Meni tezroq Agraga yetkazinglar!- deb buyurdi.

Dehliga kelguncha Humoyunning isitmasi yana oshib, kasali battar ogʻirlashdi. Uni olib kelayotgan Hindubek yoʻlda biror kor-hol boʻlishidan qoʻrqib, darhol Agraga xabar yubordi-yu, oʻzi Dehlida qolib Humoyunni eng yaxshi tabiblarga davolata boshladi. Lekin dori-darmon kor qilmas, qora bezgakka oʻxshash bir dard Humoyunni kecha-yu kunduz kuydirib, goʻyo jingak qilib tashlamoqda edi.

Agradan ikki kecha-yu kunduz otliq yoʻl yurib, Mohim begim yetib keldi. Daryo yoʻli tinchroq va salqinroq deyishib, Humoyunni Dehlida kemaga solishdi-da, oqim boʻylab, Agraga olib kelishdi.

Humoyunni taxtiravonga yotqizib, sakkiz yigit Zarafshon bogʻiga koʻtarib kirdi. Bobur rangi yerday oʻngib ketgan Mohim begimni koʻrgandayoq, yuragi «shuv» etib ketdi. Yigitlar koʻtarib kelayotgan taxtiravon uning koʻziga tobutday sovuq koʻrindi.

Humoyun tuni boʻyi alahlab behush yotdi. Faqat sahar palla koʻzini xiyol ochib, tepasida turgan otasini tanidi, oʻrnidan turgisi kelib qimirladi, lekin

¹ Boburning farzandlari orasida eng uzoq umr koʻrgan va saksonga kirgan Gulbadan begim bolaligida koʻrganbilganlarini «Humoyunnoma»da batafsil yozgan. U otasining oxirgi paytda toj-u taxtdan astoydil koʻngli qolganiga, hokimiyatni Humoyunga berib, oʻzi Tohir oftobachi bilan bir goʻshada yashamoqchi boʻlganiga dalillar keltirgan.

boshini koʻtarishga ham madori yetmadi. Otasining maxfiy maktubida yozilgan gapga rozi boʻlolmasligini aytmoqchi boʻlib:

- Biz... xizmatda... sizsiz... - «Mumkin emas!» deganday bosh chayqadi-yu, keyin yana allahlay boshladi. - Gʻulga uring... uring! Ketdi!.. Toʻxta!..

Humoyun nafasi qaytganday talvasa qilib, oʻzini u yoqdan-bu yoqqa bir-ikki otdi-yu, yana hushidan ketdi. Saroy tabiblari bu ogʻir dardga hech bir davo topolmadilar. Mohim begim yum-yum yigʻlaydi.

Bobur suyukli oʻgʻlini hadeb oʻtga-suvga solib, shu kasallikka oʻzi ham sababchi boʻlganday oʻrtanardi. Ogʻir paytlarda Bobur suyanib oʻrgangan odamlar biron chora topishni undan kutadilar. Lekin hozir u ham chorasizlikdan oʻzini qoʻyadigan joy topolmay qiynaldi.

Keksayib munkillab qolgan shayxulislom Boburning yoniga keldi:

– Hazrati oliylari, koʻp gʻam chekmang, Parvardigor gʻoyibdan shifo yuborgusidir, – dedi. – Tabiblardanki ish chiqmadi, endi Xudo yoʻliga dunyo molidan tasaddiq qilmoq kerak.

Bobur shayxulislomning niyatiga tushunolmay:

- Qaysi moldan? deb soʻradi.
- Jon omon boʻlsa javohir topilur. Oʻshal... ashxas olmos yaxshi tasaddiq boʻlgʻay.

Bobur Jamna ustida kemada oʻltirganda Humoyun keltirib koʻrsatgan olmosni esladi.

- Koʻhinurnimi?

Shayxulislom tasdiq ma'nosida bosh irgʻadi. Bobur hushini bir joyga yigʻib:

- Taqsir, kimga tasaddiq qilaylik?- deb soʻradi.

Qiymati ulkan oltin xazinalariga barobar keladigan bu olmosni oʻgʻrilardan qoʻriqlab turish uchun ham juda koʻp navkar kerak edi. Shuni biladigan shayxulislom «menga» deyishga tili bormadi. - Murtazo Ali mozoriga, - dedi. - Din yoʻliga.

Mozor va Koʻhinur olmosi bir-biriga mutlaqo qovushmaydigan narsalar edi. Dindorlarning kattasi shayxulislom boʻlganligi uchun olamni bezaydigan bu goʻzal olmos aylanib kelib uning sandigʻiga tushishi aniq. Bobur hozir mol-u dunyoni oʻylaydigan ahvolda boʻlmasa ham Humoyunga taqdim etilgan bu noyob gavharga munkaygan shayxulislom koʻz tikkani uni sergaklantirdi.

Ruhoniylar ilojini topsa, podshohdan ham baland turishga va ularning boshiga ogʻir kun tushganidan foydalanib, oʻz hukmlarini oʻtkazishga intilishlari koʻpdan ma'lum edi.

- Taqsir, nazaringizda, oʻshal olmos azizmi yoki mening jonim aziz?

Shayxulislom hang-mang boʻlib:

- Nechun unday deysiz, hazratim! dedi. Undoq olmoslarning yuztasidan sizning bir moʻyingiz azizroqdir!
- Minnatdormen! Undoq boʻlsa, men Humoyunga jahondagi barcha olmoslardan ham azizroq bir narsamni qurbon qilmoqchimen. Faqat bu qurbonni siz-u bizga oʻxshagan bandalari emas, zarur boʻlsa Parvardigorning oʻzi olsin!

Bobur oʻziga umid bilan qarab turgan odamlarning orasidan oʻtib, Humoyunning toʻshagi yoniga keldi.

- Humoyun, jigarbandim! - dedi u hamma eshitadigan tovush bilan. - Sening betoqatligʻingga men toqat keltiray. Sening shu ogʻir dardingni Xudo sendan olib menga bersin!

Behush yotgan Humoyun bu gaplarni eshitmas, lekin bemorning xobgohidagi ayollar, mulozimlar, tabiblar, ruhoniylar – hammasi Boburga quloqlarini ding qilib qarab turardilar.

Bobur umumiy jimlikda Humoyunning boshidan uch marta aylandi-yu:

- Yo, Parvardigor! - deb iltijo qildi. - Menki Boburmen, agar jon berish mumkin boʻlsa, umr-u jonimni Humoyunga qurbon qildim! Azroyil mening jonimni olsin-u Xudo Humoyunga shifo bersin!

Mohim begim yigʻidan toʻxtab, Boburga qoʻrquv aralash hayrat bilan tikilib turardi. Keksa shayxulislom esa hozirning oʻzidayoq Humoyuning sogʻayib ketishini va Boburning holsizlanib yiqilishini kutganday ancha vaqt ota-bolaga baqrayib qarab turdi. Lekin kutilgan moʻjiza yuz bermadi. Behush Humoyun alahlab, bir nima dedi-da, yana jim boʻldi.

Boburning badanidan «lop» etib olov chiqqanday boʻldi, vujudi qizib ketdi. U hamon behush yotgan Humoyunga qarab:

– Koʻtardim dardingni! – dedi-da, yelkasiga ogʻir yuk olgan odamday qaddi xiyol egilib xobgohdan chiqib ketdi...

3

Yigirma uch yoshlik Humoyunning yigit yuragi otasi koʻrsatgan ruhiy madaddan kuch olib, ogʻir kasallikni axiyri yengdi. Oradan bir hafta oʻtgach, u kasal koʻrishga kelganlarni oʻrnidan turib qabul qildi. Yana ikki kundan soʻng otasini borib koʻrish uchun xobgohidan chiqdi.

Bobur oʻgʻlini Orombogʻning toʻridagi xonayi xosda qabul qildi. Humoyun uning qarshisida tiz choʻkib, koʻziga yosh olib gapirdi:

- Hazratim, men sizning iltijongiz bilan shifo topmishmen. Oʻzimga kelganimdan beri Xudodan tilaymenki, sizning umringiz uzoq boʻlsin! Bu ulugʻ davlatni siz barpo etdingiz. Hammamizning pushti panohimiz oʻzingizsiz. Parvardigor bizga rahm qilsin!

Bobur oʻgʻlini yelkasidan olib oʻrnidan turgʻizdi:

- Mana, shukr, yuribmen-ku, oʻgʻlim. Sen koʻp xavotir boʻlma.
- Ammo shayxlar: «Hazratim oʻgʻliga kelgan ajalni oʻzlariga oldilar», deb koʻnglimga gʻulgʻula soldilar.

Bobur oʻgʻliga oʻng yonidan joy koʻrsatdi.

– Humoyun, oʻgʻlim, mardona boʻl, eng ogʻir yuklar endi sening yelkangga tushadigan koʻrinadir.

Xayriyat, tuzalib ketding. Agar mutaassib shayxlarning gapiga kirib, Koʻhinur olmosini tasaddiq qilsam, ular gʻolib chiqmasmidi? «Humoyunni biz oʻshal tasaddiq evaziga qutqarib qoldik, biz podshohdan ham zoʻrmiz!» deb tantana qilmasmidi? Imon-u e'tiqod bunday gʻarazlardan baland turmogʻi kerak-ku, axir!

- Ilohim, siz haqingizdagi karomatlari ham yolgʻon chiqsin!
- Harqalay, sen Olloh-u taologa gʻarazli shayxlar orqali emas, bevosita imon-u e'tiqoding orqali iltijo qilishga oʻrgangin. Shayxlar mudom podshohning tepasiga chiqib, unga hukmini oʻtkazishga intilurlar. Shundan ehtiyot boʻlgin.
- Toki tirikmen, bu oʻgitingizga hamisha amal qilgaymen!.. Endi... Hazratim, Sambxal chegarasida yana qonli toʻqnashuvlar boʻlmoqda emish. Ijozat bersangiz, men borib chegaralarni tinchitsam...

Bobur indamay oʻrnidan turdi-da, xonayi xosning toʻridagi sandiqni ochdi. Humoyun tik turgan holda otasiga yuzlanib qoʻl qovushtirdi.

Bobur sandiqdan oq ipak matoga oʻralgan qilichni oldi.

– Humoyun, oʻgʻlim, mening qancha umrim qolgani Xudoning oʻziga ayondir. Sohibqiron bobokalonimizning mana shu qilichini endi sen taqmogʻing kerak. Bu qilichga «Kuch – adolatdadir» degan soʻzlar bitilgan. Doim odil boʻlgin-u magʻlub boʻlmagin!

Bobur qilichni oʻgʻliga ikki qoʻllab uzatdi. Humoyun tabarruk qilichni tiz choʻkib oldi-da, uning muqaddas yozuv bitilgan joyini koʻzlariga surib oʻpdi.

– Mayli, – dedi Bobur. – Sambxal notinch boʻlsa, borib tinchitgin-u oʻrningga Hindubekni qoʻyib qaytgin. Endi davlat ishini zimmangga olmogʻing kerak...

* * *

Yomgʻir fasli oʻtib, osmon yana bulutlardan tozalandi, tunlar salqin boʻlib qoldi. Bobur uyqusiz tunlarda boqqa chiqar va yulduzlarni tomosha qilgisi kelib osmonga qarardi. Lekin tanida isitmaning balandligidan osmondagi yulduzlar joyidan koʻchib, girdobga tushib aylanib ketayotganday koʻrinar, koʻngli behuzur boʻlib, osmondan darhol koʻzini olardi.

Kunduz saroyda davlat ishlarini qilgan paytida goh shayxulislomni, goh nufuzli a'yonlarni uchratur, ular Boburga avvalgidan ham pastroq, egilib ta'zim qilishar, lekin oʻlishi muqarrar boʻlgan bemorga qaraganday musibatli koʻzlar bilan qarashar, muomalalaridagi alohida muloyimlik ham shundan dalolat berar edi. Ularning e'tiqodiga binoan, Bobur oʻz hayotini oʻgʻliga qurbon qilgan, shuning uchun Humoyun tuzalib ketgan, endi koʻzga koʻrinmas ajal qilichi

Boburning boshi ustida osilib turar edi. Ochiq aytilmaydigan, haddan ortiq mayin gaplar, ta'zim-u tavozelar ostiga yashiriladigan bu mash'um ishonch Boburga juda ogʻir ta'sir qilar, goho atrofida aylanib yurgan oʻlim sharpasini uning oʻzi ham sezganday boʻlardi.

Mezon oʻtib, qavs oyi kirganda, Boburning kasalligi battar ogʻirlashdi. Biror joyida yara yoki shish yoʻq, nuqul ichi kuyadi, isitmasi koʻtarilib, uxlay olmaydi, rangi kun sayin soʻlib boradi. Mavlono Yusufiy mamlakatning eng mashhur tabiblaridan uch-toʻrttasini chaqirtirib maslahatlashdi. Bemorning tomiridan qon olib koʻrishdi. Qonning rangi sogʻlom odamnikidek tiniq emas, allanechuk iriganga oʻxshab qolgan edi.

Tabiblar oʻzaro kengashib, «Malika Bayda bergan zaharning qonda asorati qolgan» degan xulosaga keldilar va qonni tozalaydigan dorilardan, anor suvidan koʻproq berishni buyurdilar.

Lekin bu narsalarning hech biri kor qilmadi. Bobur holsizlanib yotib qolgach, Humoyunga chopar yuborishdi.

Humoyun kelsa, otasi oʻz xobgohida baland oq toʻshakda terga botib yotibdi. Rangi sap-sariq boʻlib ketgan. Boburning bosh tomonida Xonzoda begim pat yelpigʻich bilan uning yuzini yelpiyapti. Oyoq tomonida Mohim begim gʻam-gʻussaga botib, haykalday beharakat oʻtiribdi.

Humoyun tiz choʻkib, otasining toʻshagini quchoqladi. Boburning ozgʻin qoʻlini oʻpib koʻrishdi, soʻrashdi. Soʻng otasining bu ahvoliga oʻzi sababchi boʻlganday yonib gapirdi:

- Nechun bizga bunchalik jon fido qildingiz, hazratim?

Bobur majolsiz tovush bilan:

- Sen buni oʻzingdan koʻrma, dedi. Illat qonda emish. Bilmadim... Har qanday olov ham yonib-yonib axiyri bir kun... – Bobur «oʻchadi» demoqchi boʻldi-yu, lekin ayollarni ayadi:
- Alangasi pasayadir. Men umr boʻyi ayovsiz yondim.
- Biz uchun ham kuyib-yongansiz! Endi bu qarzlarni uzishga mening butun umrim yetmagay!
- Qarzingni menga uzolmasang... farzandlaringga uzarsen...

Bobur toʻxtab-toʻxtab soʻzlayotgan boʻlsa ham koʻnglidagi gaplarini ravon aytayotgani Humoyunni umidlantirdi. U otasining soʻzini boʻlmay, jim quloq sola boshladi.

- Temuriylarning koʻpchiligi... fidoyilikni unutib... yoʻq boʻlib ketdi. Oʻgʻil otani oʻldirdi. Ogʻa iniga xiyonat qildi... Oqibatda... bari razolatning qurboni boʻldi... Undan koʻra.. yaxshilikning fidosi boʻlgan afzal emasmi?... Mana ammang Xonzoda begim... Samarqandda meni qutqarib oʻzini asoratga soldi. Bu fidoyilik meni hamisha... shunday boʻlishga undab keldi... Sen ham endi inilaring-u... avlodlaringni mardlikka... fidoyilikka oʻrgatgin.

Bobur toʻshakning orqa tomonidagi harir oq pardaning ortiga boshini burib qaradi. Parda ortida odam borligini Humoyun endi payqadi.

- Tohirbek, juzdonni keltiring, - dedi Bobur.

Shu vaqtgacha qimir etmay oʻtirgan Tohir endi tez oʻrnidan turdi-yu, tokchadagi katta charm juzdonning ichidagi yangi muqovalangan qoʻlyozmasi bilan ikki qoʻllab koʻtarib keldi.

– Badaxshonda «Vaqoye'»ni soʻragan eding, – dedi Bobur Humoyunga. – Mana, yozib tugatdim. Ol.

Togʻlar orasida Bobur: «Bu kitob bitganda, mening umrim ham tugagay!» – degani Humoyunning yodiga tushdi. U juzdon ichidagi kitobni olib, peshonasiga surib oʻpar ekan, koʻzidan tirqirab yosh chiqib ketdi. Yirik bir yosh tomchisi zarhal muqova ustiga tomib tushganini Bobur ham koʻrdi.

- Sendan iltimosim, - deb davom etdi Bobur. - Buni avlodlaring ham oʻqisin... Xatolarimni takror etmanglar. Yaxshi ishlarim... oz boʻlsa, koʻpaytiringlar. Bu kitobdan nusxalar koʻchirtirib, Samarqandga... Toshkentga... Andijonga... munosib odamlarga yuborgin... Men tugʻilgan yurt bilan aloqani uzmanglar.

Shoyad men bitgan kitoblar... ikki oradagi aloqaning rishtalari boʻlsa...

Bobur oʻgʻliga vasiyat qilayotganini sezib turgan Xonzoda begim oʻzini ortiq tutib turolmadi.

- Boburjon, men egachingiz!.. Men... men sizdan besh yosh kattamen! Bu dunyodan ketish navbati avval meniki! Siz taslim boʻlmang! Boburjon, inim!

Xonzoda begim uning podsholigini unutib, «Boburjon!» deganda, Bobur bolaligini eslab, koʻngli bir orziqdi. U beklardan ham, savdarlardan ham, begonalardan ham, hatto suyukli oʻgʻli va xotinidan ham nuqul «hazratim» degan murojaatni eshitar, koʻp ishlatilaverib, siyqa boʻlib ketgan bu soʻz uning me'dasiga tekkan edi.

Piq-piq yigʻlayotgan Mohim begim oldingi ogʻir suhbatlarni eslab:

- Mening xarxashalarim ham sizni xasta qildi,
 hazratim! dedi. Meni kechiring!
- Mohim, siz meni kechirsangiz boʻldi... Men sizdan rozimen... faqat endi meni hazratim demang...

Mohim Boburni: «Koʻz ochib koʻrgan tanho yorimsiz, jismimdagi jonsiz!» demoqchi boʻlib ogʻiz juftlab koʻrdiyu, lekin atrofidagilardan uyaldi. Yigʻi aralash:

- Xoʻp, - deya oldi, xolos.

Bobur uning aytilmagan soʻzlarini ovozidan, koʻzlaridan sezdi. Soʻng oʻgʻliga yuzlandi:

- Humoyun, men sendan ham «ota» degan soʻzni hali eshitganim yoʻq.
 - «Ota» degan joʻngina soʻzga oʻrganmagan Humoyun:
- Padari buzrukvor! deb koʻrdi. Bundan otasining koʻngli toʻlmaganini sezdi-yu: – Otajon! – dedi. – Siz saltanatni menga bermoqchi boʻlibsiz. Lekin ishoning, men bu toj-u taxtdan sizning bir nafaslik umringizni afzal koʻrurmen!
- Men sendan rozimen... Endi mendan ham rozi boʻlinglar!

Xonzoda begim rozilik soʻrashga tili bormay, oʻrtanib yigʻladi. Uning yigʻisiga Mohim begim qoʻshildi. Bu ogʻir ahvolning ustiga kirib kelgan mavlono Yusufiy Boburning koʻzlari bejo boʻlayotganini, uni qattiq ter bosganini koʻrdi.

- Endi hazratim orom olishlari kerak! deb qoʻliga oq dokani olib, Boburning yuzidan, boʻyinlaridan terlarini arta boshladi. Qiynalib nafas olayotgan Bobur bosh tomonda turgan Tohirga shivirlab:
 - Yelping!.. dedi.

Yigʻi-sigʻi bilan Boburni qiynab qoʻyganlarini endi sezgan begimlar sekin chiqib ketdilar.

Bobur Humoyunga:

– Endi eshik ogʻa bilan... a'yonlar kirsin, – dedi. – Koʻzim tirikligida... hokimiyatni senga topshiray.

Tashqarida kutib turgan Muhammad Doʻlday va boshqa nufuzli beklar kirdilar. Bobur ularning oldida podsholik tojini oʻgʻli Humoyunga topshirdi. Rozirizolik soʻrash paytida beklardan bir-ikkitasi koʻziga yosh olganday boʻldi. Lekin chiqib ketayotganlarida hammalari endi Humoyunning atrofida parvonaday aylanib, yangi inoyatlar umidida koʻzlari tama bilan yonganini Bobur koʻrib qoldi.

Xonada Tohir bilan ikkovlari qolgandan soʻng:

Endi... bek-u sultonlarga mening keragim yoʻq,
dedi. - Tohirbek, kechga... Mavlono Fazliddinni chaqirtiring.

Tohir Boburga tabib Yusufiy buyurib ketgan suyuq doridan ichirtirdi, uning qiyshayibroq qolgan yostigʻini toʻgʻrilab qoʻydi. Soʻng savdarlar xonasiga oʻtib, togʻasiga odam yubordi. Aytilgan paytga yetib kelgan mavlono Fazliddin Boburning oʻlim toʻshagida yotganini koʻrdi-yu, tugʻyon ichida:

– Hazratim, Xudo sizga quvvat bersin! – deb qoʻlidan oʻpdi.

- Men... podshohlikni Humoyunga topshirdim... Minba'd hazratim, demang, mavlono. Munosib koʻrsangiz... meni ham mavlono deng.
- Biz Navoiyni ulugʻ ijodlari uchun «hazrat Alisher» der edik. Siz turkiy adabiyotimizning Navoiydan keyingi eng ulkan siymosidirsiz. Shu sababli sizni shoir va adib sifatida «Bobur hazratlari» deyishga haqlimiz.
- Minnatdormen, mavlono... Siz Agrada, Sekrida, Dehalpurda ajib koʻshklar, oromgohlar barpo etdingiz... Xudo umr bersa men... Samarqanddagi Bibixonim madrasasidek ulugʻ bir... madrasaning tarhini sizga... chizdirmoqchi edim... Opa-singillarimizning qadrini boshimizga... koʻtarsak arzigay...

Mavlono Fazliddin Boburning soʻnggi kuchlarini toʻplab, qiynalib soʻzlayotganini sezdi-yu, uning fikrini oʻzi davom ettirdi:

– Dono soʻzlarni aytdingiz, hazratim! Chindan ham xalqimizda bu odat azaldan mavjud... Samarqandda Bibixonim madrasasidan tashqari Turkan ogʻo maqbarasi bor. Hindlarda ham ayol zotiga ehtirom zoʻr ekan, hatto sigʻinadigan Xudolari orasida ham ayollar bor... Bizning Hirot-u Samarqanddagi eng yaxshi me'morchilik an'analarimizni Hindistonning eng ezgu ajib an'analariga payvand etib, ayol zotini ulugʻlovchi bir madrasa qurish mening ham eng ezgu orzularimdandir!

Bobur mavlono Fazliddinning Xonzoda begimga boʻlgan yoshlik mehri zamona zayli bilan qanday qurbon boʻlganini esladi-yu:

– Mavlono, – dedi, – mening egachim Xonzoda begim... insoniylikda tengsizlar!.. Agar siz orzu qilgan... madrasani qurish bizga nasib boʻlsa... uni «Xonzoda begim madrasasi...» deb atasak arzir edi...

Mavlono Fazliddinning koʻzlarida yashin kabi bir olov chaqnadi:

- Hazratim, siz hozir mening koʻzimga muqaddas bir maqsadni koʻrsatdingiz! Agar bu maqsadni roʻyobga chiqarishga mening umrim yetmasa, uni farzandlarimizning diliga jo etib ketgaymen. Toki ular hind me'morlari bilan hamkorlikda xalqlarimizning ayol zotiga boʻlgan ehtiromini ulugʻ bir me'morchilik obidasida ifoda etsinlar!

Boburni ter bosdi. Uning harir oq koʻylagi qorayib tanasiga yopishib qolganini koʻrgan Tohir bezovtalanib oʻrnidan turdi:

- Mulla togʻa, hazratimni charchatib qoʻymaylik!.. Tabib «koʻp hayajonlanmasinlar!» deb tayinlagan edi...

Suhbatning tafti chindan ham baland boʻlayotganini endi sezgan mavlono Fazliddin oʻrnidan koʻtarildi:

- Hazratim, endi orom oling! Men keyin yana kelurmen!..

Bobur Mavlono Fazliddinga qarab:

– Yana bir oʻtinchim bor, – dedi. – Olamdan koʻz yumsam... Kobulda oʻzingiz tarhini chizgan bogʻ bor... Togʻ tepasida... Abadiy oromgohim... oʻsha Guzargohda boʻlsin... Ortiqcha dab-dabasiz... shoirona bir tarh chizing...

Mavlono Fazliddin oʻpkasi toʻlib gapirolmadi. Tasdiq ma'nosida bosh irgʻadi-yu, koʻzidan oppoq soqoliga oqib tushgan yoshni artib, eshikdan chiqdi.

Tohir Boburning terdan hoʻl boʻlgan ichki kiyimlarini almashtirdi. U oʻzini odatdagiday osuda tutib, kundalik xizmatlarini qunt bilan ado etar edi. Bobur chanqasa suv beradigan ham, nafasi qayta boshlasa yelpiydigan ham Tohir edi. U shu yerda boʻlsa, Bobur sokinroq yotishini mavlono Yusufiy ham bilar, shuning uchun Tohirni tun-u kun bemorning oldidan ketkizmas edi.

Bugun kechasi Bobur ichkarida hadeb behalovat boʻlavergandan keyin Tohir savdarlarni chaqirib, uni toʻshagi bilan hovlidagi usti ochiq marmar supaga chiqartirdi. Agraning kech kuzi xuddi Andijonning bahor paytlaridek salqin va mayin tuyular edi. Qop-qora osmonda yulduzlar charaqlab turibdi. Isitmasi baland Boburga yulduzlar yana girdobga tushib aylanayotganday va bir-birlariga urilib ketayotganday koʻrindi. Bobur koʻzini yumdi:

– Badanimda... qon uyushib qolayotganday... – dedi Tohirga.

Tohir uning yelkalarini, qoʻllarini, keyin oyoqlarini sekin-sekin uqalay boshladi. Bobur bundan sal yengil tortganday boʻldi-yu, koʻzini ochib yana osmonga qaradi.

Yulduzlar endi joy-joyida toʻxtab, sokin nur socha boshladi. Ana Oltin Qoziq. Uning gʻarb tomonidagi Yetti Ogʻayni yulduzlari ufqqa ogʻib tushib ketyapti. Sharqdan esa bir toʻp boʻlib Hulkar yulduzlari koʻtarilib kelyapti.

– Bizning Quvada ham Hulkar xuddi mana shunaqa boʻlib chiqar edi, – dedi Tohir.

Bobur ham bolaligi oʻtgan Andijon osmonini esladi. Mana shu Yetti Ogʻayni yulduzlari oʻsha yerda ham Oltin Qoziqni aylanib oʻtib, gʻarbga botib ketardi. Oʻsha yerda ham Yetti Ogʻayni ufqqa bosh qoʻygan sari Hulkar yulduzlari osmonning baland joylariga chiqib borardi. Bobur oʻsmirligida Hulkar yulduzlarini olmosdan yasalgan varrakka oʻxshatar edi. Dumini quvnoq silkitib uchadigan olmos varrak uning xayolini yana musaffo bolalik yillariga olib ketdi. Osmon dunyoning hamma joyida bir ekani, umrining boshlanishida Andijonda koʻrgan yulduzlari umrining oxirida Agrada ham chaqnab turgani unga soʻnggi bir tasallidek tuyildi. Bobur osmonga qarab yotganda yana yosh, sogʻlom yigitga aylanib, Andijon chorbogʻining supasida yotganday boʻldi.

Bir lahzalik bu shirin his ketidan yana shafqatsiz bir qaltiroq bosib keldi-yu, yulduzli osmonni girdobiga olib, gir-gir aylantira boshladi... Tun yarmidan

oshganda Tohirning oʻkirib yigʻlagani qorongʻi bogʻni zir titratdi...

* * *

Mavlono Fazliddin Kobulda Boburga anvoyi rangli marmarlar bilan ziynatlangan serfayz bir maqbara qurishga ulgurdi, lekin Xonzoda begim nomiga madrasa qurish unga nasib boʻlmadi, uning bu orzusini oradan yuz yillar oʻtgandan soʻng Boburning chevarasi Shoh Jahon qurdirgan mashhur Toj Mahalda ulugʻhind me'morlari roʻyobga chiqargan boʻlsalar ehtimol.

Tohir «Boburnoma»dan koʻchirilgan nusxalarni adibning Andijondagi, Toshkent va Samarqanddagi muxlislariga eltib topshirgach, oʻzi Robiya bilan birga Quvaga qaytdi. Ular umrlarining qolgan qismini tugʻilgan yurtlarida oʻtkazdilar. Biroq oʻgʻillari Safarbek mavlono Fazliddinning farzandlari bilan birga Agrada umrbod qoldilar va oʻsha yerda oila qurib, hind xalqiga qoʻshilib ketdilar.

Bobur tuzgan ulkan davlat oʻz qudrati va madaniy yodgorliklari bilan jahonga tanilib, uch asr umr koʻrdi-yu, tarixda qoldi. Uning oʻgʻil avlodlari bugungi kunga yetib kelolmadilar – eng oxirgi Boburiylar oʻtgan asrlarda ingliz mustamlakachilari davrida mahv etildi.

Faqat Bobur oʻz qoʻli bilan yozgan asarlar haligacha tirik bir qalbning haroratiga toʻlib, odamlarga hamon ma'naviy oziq va zavq beryapti. Toʻgʻri, uning bir umri qorongʻi osmonda olovli iz qoldirib uchgan yulduzdek tez soʻndi. Lekin oʻlmas asarlari sahifasida salkam besh asrdan beri davom etib kelayotgan ikkinchi umri – bu yulduzning tundan tongga qarab uchganini va oʻz nurini kelajakka yoʻnaltirganini aytib turibdi. Bobur qalb oʻtiga yoʻgʻirib yaratgan madaniy meros bugungi sernur avlodlarni bahramand qilgani sari uning ana shu ikkinchi umri ham qorongʻi tunlardan keyingi yorugʻ kunlarda astoydil obod boʻlyapti.

MUNDARIJA

AROSAT

Birinchi qism

| Andijon. Gul va quyun | 38 |
|---|------------|
| Quva. Jasoratning jazosi | 68 |
| Oʻsh. Najot qayda | 86 |
| Samarqand. Zafar va kulfat1 | 35 |
| Andijon, Xoʻjand. Uvol boʻlgan orzular1 | 59 |
| Xoʻjand, Margʻilon, Andijon. Amir Temur saboqlari 1 | 87 |
| Toshkent, Namangan, Andijon. Chingiziylar yana | |
| hukmron boʻlmoqchi2 | 03 |
| Samarqand. Hal qiluvchi olishuv2 | 29 |
| Toshkent, Oʻratepa, Soʻx. Koʻchki bosgan buloq3 | 10 |
| | |
| TAQDIR TAQOZOSI | |
| | |
| Ikkinchi qism | |
| Hiret Daviden aldingi equidality | 5 7 |
| Hirot. Dovuldan oldingi osudalik | |
| Hindikush. Kobul.Oʻlim bilan yuzma-yuz | |
| Hirot. Marv. Paymonasi toʻlganlar | |
| Qunduz. Samarqand. Ikki qilich orasida | |
| Kobul. Toshgan daryo oʻzan izlaydi4 | |
| Laxoʻr. Panipat. Dehli. Yangi qirgʻoqlar5 | |
| Agra. Yo hayot, yo mamot | |
| Sekri. Qayta koʻz ochgan buloq6 | |
| Agra. Yulduzlar girdobi | 44 |

Abadiy-badiiy nashr

PIRIMQUL QODIROV YULDUZLI TUNLAR

Roman

Muharrirlar Ma'mura QUTLIYEVA, Shahnoza RAHMONOVA

Musahhihlar Sunnat MUSAMEDOV, Sadoqat ESHQOʻZIYEVA

> Badiiy muharrir Uygʻun SOLIHOV

Kompyuterda sahifalovchi Nigora UMARQULOVA

Texnik muharrir Surayyo AHMEDOVA

Litsenziya raqami: AI № 252. 2014-yil 2-oktabrda berilgan.

Bosishga 2015-yil 3-fevralda ruxsat etildi. Bichimi 84x108 1\32. Bosma tobogi 20,875. Shartli bosma tobogi 35,07 . Garnitura «Bookman Cyr+Uzb». Ofset qogʻoz. Adadi 5000 nusxa. Buyurtma № 12. Bahosi kelishilgan narxda.

«Yangi asr avlodi» NMM da tayyorlandi. 100113. Toshkent, Chilonzor-8, Qatortol koʻchasi, 60.

Murojaat uchun telefonlar:

Nashr boʻlimi – 278-36-89; marketing boʻlimi – 128-78-43; faks – 273-00-14; web-saytimiz: www.ibook.uz e-mail: yangiasr@ibook.uz; yangiasravlodi@mail.ru

«Yangi asr avlodi» NMM 2015-yilda «Kamolot kutubxonasi» ruknida chop etilgan quyidagi kitoblarni taqdim etadi:

ZULFIYA «Bahor keldi seni soʻroqlab» 84x108 1/32, 192 bet, yumshoq muqova

XX asr oʻzbek she'riyatining zabardast vakillaridan biri, davlat arbobi Zulfiya Isroilova bugungi kun oʻquvchilari uchun yaxshi tanish. Maktab darsliklarida shoiraning qator she'rlarini mutolaa qilganmiz. Vatan, muhabbat, vafo, ezgulik tuygʻulariga yoʻgʻrilgan she'rlari barchamizning koʻnglimizdan munosib joy olgan.

Mazkur kitob Zulfiya tavalludining 100 yilligiga bagʻishlab nashrga tayyorlandi. Undan shoira ijodidagi eng sara she'rlar oʻrin olgan. Aziz oʻquvchilarimiz ushbu toʻplamni oʻqib, mutolaa zavqidan bahramand boʻladilar, degan umiddamiz.

MUSA TOSHMUHAMMAD OʻGʻLI OYBEK «Bolalik xotiralarim»

84x108 1/32, 348 bet, yumshoq muqova

Atoqli oʻzbek yozuvchisi Musa Toshmuhammad oʻgʻli Oybek turfa voqealarga boy, mashaqqatli va ayni paytda ajoyib hayot yoʻlini bosib oʻtgan. Qoʻlingizdagi «Bolalik xotiralarim» kitobida u ana shu yoʻlning 1917 – 1918-yillarga qadar boʻlgan qismi bilan siz, hurmatli kitobxonlarni tanishtiradi.

Oybek singari ulugʻallomalarning bolalik va yoshlik kezlari ularning koʻcha changitib yurgan oddiy boladan xalqning mutafakkir siymolaridan biriga aylanishi, ayniqsa, yosh avlodlar uchun hamisha maroqli va ibratlidir.

TOHIR MALIK «Alvido, bolalik» 84x108 1/32, 532 bet, yumshoq muqova

Bolalik – umrimiz bahori, orzu-umidlarimiz bilan ulgʻayadigan eng joʻshqin va haroratli damlar. Bolalik – umrimiz mazmunini, qoʻyingki, butun hayotimizni belgilab beruvchi shunday bir pallaki, bu davrda biz yaqinlarimizning alohida e'tiboriga ehtiyoj sezamiz. Agar bunday fursatlarda ozgina e'tiborsizlik holatlari kuzatilsa-chi?

Taqdim etilayotgan kitobda aynan shu jarayon bilan bogʻliq holatlarni yozuvchi hayotiy, real voqea-hodisalar asosida yoritib bergan.

ODIL YOQUBOV «Billur qandillar» 84x108 1/32, 322 bet, yumshoq muqova

Odil Yoqubov – oʻtgan asrning oltmishinchi – yetmishinchi yillari yoshlarining sevimli adiblaridan biri edi. «Billur qandillar», «Muqaddas», «Muhabbat» kabi qissalar oʻsha davr oʻquvchilarining axloqiy va ma'naviy tarbiyasiga ijobiy ta'sir etgan, desak xato boʻlmaydi.

Asarlarning barchasida yoshlar oʻrtasidagi muhabbat mavzusi yetakchilik qiladi. Chin sevgi, poklik va halollik, muhabbatga yetishish yoʻlidagi xudbinliklar, xiyonat kabi munosabatlar oʻquvchini asar mohiyatini bilishga undaydi.

Xudbinlik va nohalollik hukm surgan joyda muhabbat soʻnadi, hatto oʻladi. Mehr va vijdon muhabbatga yetkazadi. Yashashning mazmuni muhabbat bilan sayqal topadi. Shu boisdan Odil Yoqubov asarlari nafaqat bugungi kun chun, balki kelajak uchun ham ibratli boʻlib qolaveradi.

SHUKUR XOLMIRZAYEV

«Oʻn sakkizga kirmagan kim bor» 84x108 1/32, 388 bet, yumshoq muqova

Mazkur kitobga Oʻzbekiston xalq yozuvchisi, iqtidorli adib Shukur Xolmirzayevning eng sara qissa va hikoyalari kiritilgan. Ularda sevgi-muhabbatning oʻzgacha talqini, oshiqlik va ojizlik, matonat va razolat, inson ma'naviyati bilan bogʻliq boʻlgan ijtimoiy va axloqiy masalalar bayon etiladi.

ABDULLA QAHHOR

«Muhabbat»

84x108 1/32, 248 bet, yumshoq muqova

Abdulla Qahhorning ilk hikoyalar toʻplami 1932-yilda chop etilgan. Bugungacha boʻlgan davr mobaynida oʻzbek adabiyotida, jumladan, hikoyanavislikda juda koʻp asarlar yaratildi. Sara hikoyalar, deya e'tirof etilgan bir qancha ijod namunalari oʻquvchilar hukmiga havola etildi. Ammo Abdulla Qahhor hikoyalari yillar chigʻirigʻini pisand etmay, hamon sevib oʻqiladi.

Adib qahramonlari oʻquvchi uchun qadrdon va ardoqli. Mutolaadan keyingi tanaffusda Unsin uchun qaygʻuramiz, Turobjonning xotiniga anor ilinamiz, Qobil boboga taskin bergimiz keladi, ming bir jonli Mastura va uning vafodor eri Akromjonga havas qilamiz. Sodda va kamtar insonlar sizni suhbatga chorlaydi. Beixtiyor yana mutolaaga shoshilasiz. Abdulla Qahhor hikoyalarida ana shunday ohanrabo bor...

ALBER KAMYU

«Begona»

84x108 1/32 476 bet, qattiq muqova

Alber Kamyu – XX asrning fransuz adabiyotining yirik namoyandalaridan biri, adabiyot boʻyicha Nobel mukofotining sohibi, mohir adib, dramaturg, faylasuf, «Tubanlashuv», «Vabo», «Sifiz haqida asotir», «Kaligula»,

«Asotir va qiyofa», «Isyonkor odam», «Begona» kabi asarlar muallifi.

A.Kamyu oʻz asarlarida Ikkinchi jahon urushi dahshati oqibatida paydo boʻlgan insoniy taqdirning absurd hissiyotlarini kuylaydi.

Alber Kamyuning «Vabo» va «Begona» asarlari Ahmad A'zam tomonidan mohirona tarjima qilingan. «Hikmatlar», «Yon daftarchalar» asarlari esa I.Bek tomonidan oʻzbek tiliga oʻgirilgan.

Asar keng kitobxonlar ommasiga moʻljallangan.

FYODOR DOSTOYEVSKIY

«Jinoyat va jazo»

84x108 1/32 876 bet, qattiq muqova

Jahon va oʻzbek adabiyotining durdona asarlaridan tarkib topgan «Kamolot kutubxonasi» rukni bu gal atoqli rus yozuvchisi Fyodor Dostoevskiyning «Jinoyat va jazo» romanini taqdim etadi.

«Kambagʻallik ayb emas, biroq yoʻqchilik – illat. Birinchisida inson tugʻma olijanob fazilatlarni saqlab qola oladi, ammo yoʻqchilikda ularni hech qachon va hech kim saqlab qola olmaydi», asardagi personajlaridan biri bosh qahramonga bu gapni hayotiy misollar asosida izohlab beradi. Universitetning sobiq talabasi boʻlgan Raskolnikov esa bu gapdan tegishli xulosa chiqara olmaydi. Natijada, yoʻqchilikdan qutulish, tezda boyib ketish va yuqori mavqega ega boʻlish maqsadida aql bovar qilmaydigan jinoyat sodir qiladi. Fojiali jihati – qahramon oʻz jinoyatini oqlaydi. Ammo hayot qonunlari adolatli – jinoyatni jazosiz qolishiga imkon bermaydi. Ruhiy jazo jinoyatchini oʻz aybiga iqror boʻlishga majbur etadi.

Romanda shu mudhish qotillikning uzluksiz uqubatlari bilan birga goʻzal muhabbat tasviri ham borki, u kitobxon qalbini beixtiyor junbishga keltiradi.

IVAN TURGENEV «Otalar va bolalar» 84x108 1/32 320 bet, qattiq muqova

Mashhur rus yozuvchisi I.S. Turgenevning oʻz davrida katta shuhrat qozongan ushbu "Otalar va bolalar" romani rus adabiyotshunosligida yozuvchi ijodining choʻqqisi sifatida talqin etiladi. Adib bosh qahramon Bazarov obrazida hurfikrlilik va yangilik sari intilish kabi fazilatlarni mujassamlantirgan. Asardagi voqealar oʻsha davrda chiriy boshlagan jamiyatni shunchaki isloh etish emas, balki poydevorini tag-tugi bilan yoʻq qilib, yangisini barpo etish kerakligini koʻrsatib beradi. Turgenev Bazarovdagi nigilizmni (barcha narsalarni inkor qilish) tasvirlash orqali rus yoshlariga xos salbiy jihatlarni ham namoyon etgan. Kattalarni hurmat, kichiklarni izzat qilishga oʻrgatuvchi ushbu asar mutolaasi kitobxonga zavq baishlaydi, degan umiddamiz.

ILYA ILF, YEVGENIY PETROV «O'n ikki stul» 84x108 1/32 456 bet, qattiq muqova

«Oʻn ikki stul» – ushbu asar 1927–1928-yillarda yaratilgan boʻlib, oʻtkir yumoristik romanlar qatorida e'tirof etiladi. Asar hayotda sodir boʻlgan voqeliklarga asoslangan. Roman qahramonlari Ostap Bender hamda Ippolit Matveyevich Petuxova xonim boyliklarini izlab topish maqsadida birgalikda sayohatga otlanadilar va juda koʻp sarguzashtlarni boshdan kechiradilar. Ular mahoratli usta Gambs tomonidan yaratilgan ajoyib san'at namunalari boʻlmish oʻn ikki stul jamlanmasini birma-bir qoʻlga kiritishga intiladilar. Bu ikki hamtovoq oʻz maqsadiga erishish uchun eng qabih jinoyatlarni amalga oshirishdan toymaydi. Oʻquvchi ushbu asar orqali jinoyat jazosiz qolmasligi va birovning mulkiga koʻz olaytirish qanday fojialarga olib kelishi mumkinligini fahmlaydi.

YOHANN VOLFGANG GYOTE

«Faust»

84x108 1/32 536 bet, qattiq muqova

Buyuk nemis shoirining bu yirik asari jahon adabiyotining durdonalaridan sanaladi. Unda ikki mangu qarama-qarshi kuch: yaxshilik va yovuzlik, iqror va inkor kurashadi. Faust – hayot oshigʻi, taraqqiyot jangchisi, adolat jarchisi. Mefistofel – hayot yovi, taraqqiyot dushmani, adolat kushandasi. Asardagi murakkab voqealar silsilasi shu ikki qahramon xatti-harakatlari orqali rivojlanib boradi.

FENIMOR KUPER

«Chingachguk fojiasi yoxud Saskuixanna manbalarida»

84x108 1/32 672 bet, qattiq muqova

Mashhur amerikalik adib Fenimor Kuperning oʻzbek kitobxoniga havola qilinayotgan ushbu romani «Koʻn Paypoq» beshlik – pantalogiyasining toʻrtinchi kitobidir. Asarda abjir ovchi Natti Bampo bilan Oliver Edvardsning sarguzashtlari hamda mogikanlar sardori Chingachgukning fojiali oʻlimi aks ettiriladi.

Ushbu asarda Vatanga muhabbat, doʻstlik, sevgi va sadoqat singari ezgu tuygʻular qadrlanadi.

JEYN OSTIN

«Andisha va gʻurur»

84x108 1/32 404 bet, qattiq muqova

Jeyn Ostin «Andisha va gʻurur» asarida qishloq dvoryanining qizi Elizabet Bennet bilan oʻzining kelib chiqishi, boyligi ila magʻrur boy pomeshchikning oʻgʻli Fistuilyam Darsi oʻrtasidagi sarguzashtlarni hikoya qiladi. Asar 1813-yilda nashr qilinib, adabiyot dunyosida katta shov-shuvga sabab boʻldi. Ushbu asar haqida oʻsha paytdagi «Britaniya tanqidchisi» jurnali

shunday yozgan edi: «Asar shu paytgacha oʻquvchilar hukmiga havola qilingan bu turdagi hamma romanlardan yuqori turadi». Umid qilamizki, mazkur asar hurmatli oʻzbek kitobxonlariga ham manzur boʻladi.

ALEKSANDR SERGEYEVICH PUSHKIN «Yevgeniy Onegin» 84x108 1/32 224 bet, qattiq muqova

A.S.Pushkin jahon she'riyatini yangi taraqqiyot bosqichiga koʻtargan, asarlari dunyo xalqlari tillariga tarjima qilingan va hamon sevib oʻqilayotgan Firdavsiy, Nizomiy, Navoiy, Bayron, Gyote singari buyuk shoirlar sirasiga kiradi. Uning kitobxonlarni ham, mutaxassislarni ham hayratga solib kelayotgan she'riy dahosi «Yevgeniy Onegin» asarida oʻzining, ayniqsa, porloq badiiy tajassumini topgan.

1936-yilda buyuk shoir va adib Oybek tomonidan katta mahorat bilan tarjima qilingan bu asar oʻzbek xalqining rus shoiri ijodini kashf etishida muhim ahamiyatga molik boʻldi, oʻzbek she'riyatiga yangi adabiy janr va uslublarning kirib kelishi, she'riyatimizda poetik tafakkur va lirizmning chuqurlashishiga samarali ta'sir koʻrsatdi.

Rus she'riyatining bu o'lmas durdonasini adabiyot shaydolari qizg'in kutib oladilar, degan umiddamiz.